


Aadi keyri: linjiila  
iisaa almasiihu



New Testament in Fulfulde, Maasina

# **Aadi keyri: linjiila iisaa almasiihu**

## **New Testament in Fulfulde, Maasina**

copyright © 2005 Wycliffe Bible Translators, Inc.

Language: Maasina Fulfulde (Fulfulde, Maasina)

Translation by: Wycliffe Bible Translators

Contributor: Wycliffe Bible Translators, Inc.

### **Copyright Information**

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Fulfulde, Maasina

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

---

PDF generated using Haiola and XeLaTeX on 11 Nov 2022 from source files dated 29 Jan 2022  
680239a9-8aa6-5bc3-b42f-dc560bee09b8

## Contents

Matta . . . . .	1
Marka . . . . .	50
Luuka . . . . .	80
Yuhanna . . . . .	129
Golle Nelaabe . . . . .	167
Romankoo6e . . . . .	212
1 Korintunkoo6e . . . . .	232
2 Korintunkoo6e . . . . .	250
Galaatiyankoo6e . . . . .	262
Efeesunkoo6e . . . . .	269
Filipiyankoo6e . . . . .	276
Koloosiyankoo6e . . . . .	281
1 Tesaloniikiyankoo6e . . . . .	286
2 Tesaloniikiyankoo6e . . . . .	290
1 Timote . . . . .	293
2 Timote . . . . .	299
Titus . . . . .	303
Filemon . . . . .	306
Ibaraninkoo6e . . . . .	307
Yaakuuba . . . . .	323
1 Piyeer . . . . .	328
2 Piyeer . . . . .	334
1 Yuhanna . . . . .	338
2 Yuhanna . . . . .	343
3 Yuhanna . . . . .	344
Yahuuda . . . . .	345
Banngingol . . . . .	347

## Linjiila Iisaa Ngedu Matta

### *Haala dammbe Iisaa*

<sup>1</sup> Dammbe Iisaa Almasiihu, taanii Daawuuda, taanii Ibarahiima, annii:

<sup>2</sup> Ibarahiima rimi Isiyaaka,

Isiyaaka rimi Yaakuuba,

Yaakuuba rimi Yahuuda e mijiraaፎe mum,

<sup>3</sup> Yahuuda rimi Fares e Sera, ፆee ngoni ፆe o rimdi e Tamara,

Fares rimi Hisuruuna,

Hisuruuna rimi Aram,

<sup>4</sup> Aram rimi Aminadaabu,

Aminadaabu rimi Nasuuna,

Nasuuna rimi Salmon,

<sup>5</sup> Salmon rimi Bo'es, oo woni mo o rimdi e Rahab,

Bo'es rimi Obed, oo woni mo o rimdi e Ruut,

Obed rimi Yessa,

<sup>6</sup> Yessa rimi Daawuuda kaananke oo.

Daawuuda rimi Suleymaana, oo woni mo o rimdi e debbo dalaado Uriya,

<sup>7</sup> Suleymaana rimi Robo'am,

Robo'am rimi Abiya,

Abiya rimi Asa,

<sup>8</sup> Asa rimi Yusafat,

Yusafat rimi Yoram,

Yoram rimi Ujiya,

<sup>9</sup> Ujiya rimi Yotam,

Yotam rimi Akas,

Akas rimi Hejekiya,

<sup>10</sup> Hejekiya rimi Manaasa,

Manaasa rimi Amon,

Amon rimi Yusiya,

<sup>11</sup> Yusiya rimi Yekuniya e mijiraaፎe mum.

Dum hawrii e jamaanu nde Yahuudiyankooፎe konaa so naፆiraa Baabila ndee.

<sup>12</sup> Caggal ፆe konaama ፆe naፆaama Baabila,

Yekuniya rimi Salaatiyel,

Salaatiyel rimi Jorobaabel,

<sup>13</sup> Jorobaabel rimi Abihuda,

Abihuda rimi Eliyakim,

Eliyakim rimi Ajora,

<sup>14</sup> Ajora rimi Sadok,

Sadok rimi Akim,

Akim rimi Eliyuda,

<sup>15</sup> Eliyuda rimi Eliyaajaru,

Eliyaajaru rimi Mattan,

Mattan rimi Yaakuuba,

<sup>16</sup> Yaakuuba rimi Yuusufu, jom suudu Mariyama,

Mariyama woni inna Iisaa noddirteeፍo Almasiihu oo.

<sup>17</sup> No dammbe dee njokkondirta iwde Ibarahiima faa yottii Daawuuda, jamaanuujii sappo e nay hawrata, iwde Daawuuda faa yottii nde Yahuudiyankooፍe konaa nabiraa Baabila, jamaanuujii sappo e nay hawrata, iwde nde Yahuudiyankooፍe konaa nabiraa Baabila faa yottii Almasiihu oo, jamaanuujii sappo e nay hawrata.

### *Haala pinaade Iisaa Almasiihu*

<sup>18</sup> No Iisaa Almasiihu finiri annii: Mariyama inniiko oo yo cabbaado Yuusufu, kaa fade makko suddeede, Ruuhu Ceniido wadi mo cowiido. <sup>19</sup> Yuusufu cabbudo mo oo yo neddo poocciido, ana waji hersa makko, miili yaltude e cabbugal ngal e cuucuukka. <sup>20</sup> Nde o miili dum ndee, malaa'ika Joomiraado wari e makko ley koyፍol, wii mo:

—Aan Yuusufu, taanii Daawuuda, pati hul 6amde Mariyama, sabi 6inngel o saawi ngel e Ruuhu Ceniido iwi. <sup>21</sup> O riman biddo gorko, inndiraa mo Iisaa. Sabi oon hisinan yimፍe mum e luutti mum'en ddi.

<sup>22</sup> Dum fuu, dum wadii yalla haala ka Laamdo yottiniri annabaajo oo kaa ana tabita nde oon wii:

<sup>23</sup> «Surba oo 6aman reedu,  
rima biddo gorko,

oon inndirte Immaanuwel.»\*

Maanaa inde ndee yo: «Laamdo ana wondi e meeden».

<sup>24</sup> Nde Yuusufu fini ndee, wadii no malaa'ika Joomiraado oo wiirunoo dum nii. O 6ami Mariyama, <sup>25</sup> kaa o reentaali e mum faa 6eyni biddo gorko. Yuusufu inndiri oon Iisaa.

## 2

### *No jom'en annde ngardi faa yeewa Iisaa*

<sup>1</sup> Iisaa fini Baytilaama ley leydi Yahuudiya e jamaanu laamu Hirudus. Jom'en annde iwrii funnaange, ngari Urusaliima. <sup>2</sup> Nde 6e ngari ndee, 6e mbii:

—Hoto kaananke Yahuudiyankooፍe dimaado jooni oo woni? Min njii hoodere makko 6anngii funnaange, min ngarii sujidande mo.

<sup>3</sup> Oon kabaaru jiiፍi hakkille Hirudus, kaፓum e Urusaliimankooፍe fuu. <sup>4</sup> O noddi hooreeፍe yottinoፍe sadaka 6ee e dunkee'en Sariya 6ee fuu, o lamndii dum'en hoto Almasiihu oo foti rimeede. <sup>5</sup> Be njaabii mo, 6e mbii:

—Baytilaama ley leydi Yahuudiya, sabi ko annabaajo oo winndunoo koo annii:

<sup>6</sup> «Aan, Baytilaama, leydi Yahuudiya,  
tayoral a wanaa ngeenndi pamardi barke e geelle Yahuuda mawፍe dee.  
Sabi ardotoodo iwan e maa,

garoowo durde Israa'iilankooፍe, yimፍe am.»\*

<sup>7</sup> E ley dum, Hirudus noddi jom'en annde 6ee e cuucuukka, lamndii 6e wakkati mo hoodere ndee 6anngi oo. Been pammini mo. <sup>8</sup> Caggal mum, o neli 6e Baytilaama, o wii 6e:

—Njehee, kumpitoyo-don kabaaru cukalel ngel faa tayoron. So on njii ngel, kumpitee kam yalla mido yaha miin duu, mi sujidano ya ngel.

<sup>9-10</sup> Nde 6e nani ko kaananke oo haali koo ndee, 6e mbitti. Non 6e coynii hoodere nde 6e njiinoo funnaange ndee. Ko 6e njii nde koo, 6e ceyii seyo

\* 1:23 Esaaya 7.14 \* 2:6 Mika 5.1

manngo sanne. Nde ardii 6e yaade. Nde nde yottii do cukalel ngel woni doo ndee, nde darii. <sup>11</sup> Be naati ley galle oo, 6e njii cukalel ngel e inna mum Mariyama. Be korfii, 6e kujidani ngel, 6e kumti gineeji ma66e, 6e teddiniri ngel kanje e gowe e dacce uurooje biyeteede miiri. <sup>12</sup> Caggal dum, Laamdo daalii 6e ley koydol pati 6e mbirfitoo to Hirudus, 6e kootiri leydi ma66e laawol gongol.

*No Yuusufu dogiri suudoyaade Misira*

<sup>13</sup> Nde 6e mbitti ndee, malaa'ika Joomiraado wari e Yuusufu ley koydol, wii dum:

—Imma, 6am cukalel ngel e inna mum, dogu njahaa Misira, keddo-daa ton faa nde mbii-maa-mi ngartaa. Sabi Hirudus waran tewtude cukalel ngel faa wara dum.

<sup>14</sup> Yuusufu immii jemma, na6i cukalel ngel e inna maggel Misira. <sup>15</sup> O heddi ton faa Hirudus maayi, yalla haala ka Laamdo yottinirnoo annabaajo oo kaa ana tabita nde oon wii:

«Mi noddii 6iyam gondo Misira.»<sup>†</sup>

*No Hirudus masinbiniri sukaabe Baytilaama*

<sup>16</sup> Nde Hirudus faami jom'en annde 6ee njammbike dum ndee, mettaa sanne. O yamiri sukaabe wor6e Baytilaama e dakkol mum fuu mbaree, gila keccoy faa he6u6e duubi didi. O wadi dum hakke jalaade de jom'en annde 6ee ndokki mo tayloral mum dee. <sup>17</sup> Dum tabitirii haala ka Laamdo yottiniri annabi Yeremiya kaa nde oon wii:

<sup>18</sup> «Wullaango nanaama ley ngeenndi Rama, kajum e bojji e boytaali:

Dum Rahiilu<sup>‡</sup> woyata cukaloy mum.

O jabaali waaltineede, sabi koy keddaaki.»<sup>§</sup>

*No Yuusufu wartiri leydi Israa'iila*

<sup>19</sup> Caggal maayde Hirudus, malaa'ika Joomiraado wari e Yuusufu to Misira too ley koydol, <sup>20</sup> wii dum:

—Imma, wirfintin cukalel ngel e inna mum leydi Israa'iila, sabi yidunoo6e warde suka oo 6ee maayii.

<sup>21</sup> Yuusufu immii, na6ti cukalel ngel e inna mum leydi Israa'iila. <sup>22</sup> Kaa o nanii Arikilawus loomtiima baam mum Hirudus laatike kaananke Yahuudiya, o huli yaade ton. Ley dum, Laamdo jeertini mo ley koydol, o yehi leydi Galili, <sup>23</sup> o hodoyi ngeenndi mbiyeteendi Nasaraatu. Non dum laatorii so dum tabintini ko annabaa6e 6ee mbiinoo koo: «O wiyete Nasaraatunke.»

### 3

*No Yaayaa waajorii*

<sup>1</sup> E oon jamaanu, Yaayaa mo lootogal batisima 6anngi. Omo ooynoo ley ladde jeereende Yahuudiya, omo wiya:

<sup>2</sup> —Tuubee, sabi Laamu Laamdo battiima.

<sup>3</sup> Oo woni mo annabi Esaaya sappinoo, nde wiinoo:

«Neddo ana ooynoo ley ladde jeereende, ana wiya:

Moyyinee laawol Joomiraado ngol,

ndartinee dati makko!»<sup>\*</sup>

<sup>†</sup> **2:15** Hose'a 11.1    <sup>‡</sup> **2:18** Rahiilu woni jom suudu Yaakuuba. Mo yim6e Israa'iila njogorii hono inna mum'en.    <sup>§</sup> **2:18** Yeremiya 31.15    <sup>\*</sup> **3:3** Esaaya 40.3

<sup>4</sup> Kaddungal Yaayaa yo capiraangal lee6i ngelooba, omo humii nguruwol. Nguure makko yo buureeti e njuumri ladde. <sup>5</sup> Yim6e iwri Urusaliima e leydi Yahuudiya e seraaɗi maayo Urdun fuu, ngari e makko. <sup>6</sup> E6e njaadira luutti ma66e, Yaayaa looti 6e lootogal batisima ley maayo Urdun.

<sup>7</sup> Nde o yii Farisa'en e Saduki'en heew6e ana ngara faa lootee lootogal batisima ndee, o wii d'um'en:

—Bi66e bolle! Homo jeertini on ndogon jukkungo waroowo? <sup>8</sup> Ngollee golleeɗi kawrooji e tuubal. <sup>9</sup> Pati miilee e berde mon: «Minen, min taaniraabe Ibarahiima.» Sabi mido wiya on: Laamdo ana waawi waylitinde dee kaaye laato 6i66e Ibarahiima! <sup>10</sup> Jooni, jammberede ndee huncaama faa soppa dadi ledde. Ndennoo, lekki fuu ki rimataa bi66e lobbe, soppete, wedee e yiite.

<sup>11</sup> Miin, ndiyam mbatisiran-mi on faa hollita on tuubii. Kaa garoowo caggal am oo, kaɗum 6uri kam baawde, mi fotaa fay soccude pade makko. Kanko, Ruuhu Ceniido e yiite o batisirta on. <sup>12</sup> O lanndinike faa o hennoo ɗamri makko faa laaba. O moofta ɗamri makko ley beembaal, kaa ɗaande ndee o duppiran d'um yiite nge ɗifataa.

### *No Iisaa lootiraa lootogal batisima*

<sup>13</sup> Oon wakkati fuu, Iisaa iwi Galili, wari maayo Urdun to Yaayaa, yalla Yaayaa ana loota d'um lootogal batisima. <sup>14</sup> Kaa Yaayaa ujii, wii mo:

—Aan haani lootude kam, hono aan ngardataa ga am faa mi loote?

<sup>15</sup> Iisaa jaabii mo, wii:

—Walaa baasi, ja6u ngadaa non, sabi hono non kaan-den hi66inirde ko dartii fuu.

Nden, o ja6i. <sup>16</sup> Iisaa lootaa tan, yeenɗi iwde e ndiyam dam. E oon wakkati, kammu oo additii, o yii Ruuhu Laamdo ana jippoo no wuugaandu nii, ana wara e makko. <sup>17</sup> Don daande iwri dow kammu, wii:

—Oo doo yo Biyam mo korsin-mi, mo cu6ii-mi.

## 4

### *No Ibiliisa ndaardi seytoraade Iisaa*

<sup>1</sup> E oon wakkati, Ruuhu Ceniido nafi Iisaa ley ladde jeereende, yalla Ibiliisa ana tewta seytaade mo. <sup>2</sup> Iisaa ɗaamaali faa wadi balde capande nay jemma e ɗalooma. Caggal d'um, o yolbi. <sup>3</sup> Nii, Ceytotoodo oo battitii mo, wii mo:

—So a Bii Laamdo, yamir dee kaaye laato ɗaamdu.

<sup>4</sup> Kaa o jaabii oon, o wii:

—Ana winndii: «Wanaa ɗaamdu tan neddo wuurdata, ko neddo wuurdata dee, haala fuu ka Laamdo haali.»\*

<sup>5</sup> Caggal d'um, Ibiliisa nafi mo Urusaliima ngeenndi ceniindi ndii, darni mo dow lenɗe-lenɗe Suudu Dewal Mawndu, <sup>6</sup> wii mo:

—So a Bii Laamdo, suur njiippo-daa e leydi. Sabi ana winndii: «Laamdo yamiran malaa'ika'en mum nja66ite pati koyngal maa gaajo e haayre.»†

<sup>7</sup> Oon wii mo:

—Ana winndii kasen: «Pati ittu koro Laamdo, Joomiraado maa.»‡

<sup>8</sup> Kasen Ibiliisa nafi mo dow waamnde haayre toownde sanne, holli mo laamuuji aduna dii fuu e darja mum'en, <sup>9</sup> wii mo:

—Mi hokkete d'um doo fuu so tawii a sujidanii kam.

<sup>10</sup> Oon wii mo:

\* 4:4 Fillitagol Tawreeta 8.3 † 4:6 Jabuura 91.11-12 ‡ 4:7 Fillitagol Tawreeta 6.16

—Fottanam too, Ibiliisa! Sabi ana winndii: «Laamdo Joomiraado maa tan kaan-ɗaa sujidande, kanko tan kaan-ɗaa rewde.»<sup>§</sup>

<sup>11</sup> Oon wakkati fuu, Ibiliisa seli e makko. Malaa'ika'en ngari e makko, ana ngollana mo.

### *No Iisaa fuddiri golleeji mum ley Galili*

<sup>12</sup> Nde Iisaa nani Yaayaa uddaama ley kasu ndee, o wirfittii Galili. <sup>13</sup> O eggi Nasaraatu, o hodoyi Kafarnahum e daande weendu nduu ley leydi Jebulon, kaɗum e Naftali, <sup>14</sup> yalla ana tabintina haala ka Laamdo yottiniri annabi Esaaya kaa nde oon wii:

<sup>15</sup> «Leydi Jebulon e leydi Naftali  
gonde dow laawol weendu,  
caggal maayo Urdun,

e Galili hodorde yimbe be nganaa Yahuudiyankooɗe:

<sup>16</sup> Lepol gonnoongol e nimre ngol  
yii fooyre mawnde.

Wuurbe e ley leydi maayde ni66undi,  
fooyre yaaynani dum'en.»\*

<sup>17</sup> Gila nden, Iisaa fuddi waajaade ana wiya:

—Tuubee, sabi Laamu Laamdo battiima.

### *No Iisaa noddiri taalibaaɗe aranndeeɗe*

<sup>18</sup> Iisaa ana yahannoo dow fonngo weendu Galili, o yii worbe didon mijiraado e mawniraado, Simon noddirteedo Piyeer e mijum Andire ana tippoo bubbi mum'en ley weendu nduu, yo awooɗe. <sup>19</sup> Iisaa wii be:

—Njokkee kam, mi wada on awooɗe yimbe.

<sup>20</sup> Don e don be njoppi bubbi maɓɓe dui, be njokki e makko. <sup>21</sup> O yehi yeeso, o yii kasen rimdaaɗe didon wobbe, biɓɓe Jebede, Yaakuuba e mijum Yuhanna ana ley laana. Kambe e baam maɓɓe Jebede, ebe moyyintina bubbi maɓɓe. O noddi be. <sup>22</sup> Don e don be njoppi laana kaa e baam maɓɓe fuu, be njokki e makko.

### *No Iisaa waajorii e no selliniri yimbe*

<sup>23</sup> Iisaa yiilii ley leydi Galili fuu omo waajoo e ley cuudi baajordi maɓɓe, omo ooynoo Kabaaru Lobbo haala Laamu Laamdo oo, kasen omo sellina sii jawuuji e ellaaji fuu. <sup>24</sup> Kabaaru makko saakii ley leydi Siriya fuu. Omo waddanee sii jawbe fuu, laddaaɗe e kirikiraaɗe, kaɗum e wooybe, o sellini dum'en. <sup>25</sup> Jamaa keewdo sanne jokki e makko iwrudo Galili e leydi ndi geelle sappo e Urusaliima e Yahuudiya e caggal maayo Urdun.

## **Waaju Dow Waamnde Haayre**

(Baabuwol 5—6—7)

### **5**

<sup>1</sup> Nde Iisaa yii jamaa oo heewii ndee, o njabbi dow waamnde haayre, o joodii ton. Taalibaaɗe makko ɓee ngari e makko, <sup>2</sup> o fuddi waajaade be, o wii:

### *Haala mbelko'aaku*

<sup>3</sup> —Been annditinbe yonkiiji mum'en ana lo'i, mbelii hoore,  
sabi kambe njeɗ Laamu Laamdo oo!

<sup>4</sup> Been woyooɗe, mbelii hoore,  
sabi Laamdo waaltinan berde mum'en!



- <sup>5</sup> Been leydinkiniibe, mbelii hoore,  
sabi 6e keban leydi ndi Laamdo fodani 6e ndii!
- <sup>6</sup> Been yolbu6e fooccitaare so domdi dum, mbelii hoore,  
sabi 6e kaaran 6e domditan!
- <sup>7</sup> Been yurmotoo6e, mbelii hoore,  
sabi Laamdo yurmoto 6e!
- <sup>8</sup> Been laabu6e berde, mbelii hoore,  
sabi 6e njiyan Laamdo!
- <sup>9</sup> Been waddoo6e jam, mbelii hoore,  
sabi 6e noddirte 6i66e Laamdo!
- <sup>10</sup> Been torraa6e kammari fooccitaare, mbelii hoore,  
sabi kambe nje y Laamu Laamdo oo!
- <sup>11</sup> On mbelii hoore so yim6e njennii on, torrii on, kappii on sii boneeji fuu saabe am. <sup>12</sup> Ceyee, mbeltee, sabi mbarjaari mawndi ana doomi on dow kammu. Sabi hono non annabaa6e adiibe on 6ee torrira.

### *Haala lamdam e fooyre*

<sup>13</sup> —Onon ngoni lamdam aduna oo. Kaa so lamdam noottii lammude, kodum lamminta dum? Dam nafataa fay huunde! Ko dam waawi wadeede tan, tippeede sella, yim6e nja66a dam.

<sup>14</sup> Onon ngoni fooyre aduna oo. Ngalluure njibaande dow waamnde haayre waawaa noo6ude. <sup>15</sup> Fay gooto hu66ataa lampa, so hippa hen kaakol. Ko wadata dee, sinndan ka, ka yaaynana gondo e suudu nduu fuu. <sup>16</sup> Hono non fooyre moodon haani yaaynirde yeeso yim6e, yalla e6e njiya golleeji lobbi di ngadaton dii, 6e njetta Baabiraado moodon gondo dow kammu oo.

### *Ko Iisaa janngini banngal Tawreeta*

<sup>17</sup> —Pati cikkee mi gardo ittude Sariya binndaado ley Tawreeta naa ley dewte annabaa6e oo. Mi waraali ittude mo, mi gardo hi66inde mo. <sup>18</sup> Mido haalana on goonga: so nii kammu e leydi ana keddi, wanaa to66el wanaa masel tosataake e Sariya oo faa nde fuu tabiti. <sup>19</sup> Dum nee, boofudo ko buri fuu famdude e jamirooje dee, so janngini wo66e faa ngada non, laatoto burdo famdude e Laamu Laamdo. Kaa neddo fuu jokkudo sariya oo, so janngini wo66e ngada non, laatoto mawdo e Laamu Laamdo. <sup>20</sup> Sabi mido wiya on: so on buraali dunkee'en Sariya e Farisa'en fooccitaare, on naatataa e Laamu Laamdo abada.

### *Haala tikkere*

<sup>21</sup> —On nanii njaatiraa6e meeden 6ee mbiyanooma: «Pati naadu hoore, naadudo hoore fuu, ana haandi e sareede.»\* <sup>22</sup> Miin noo mido wiya on: tikkando sakiike mum fuu, ana haandi e sareede. Oon biido sakiike mum «Meereejo» darnete yeeso sariya burdo fuu naawde. Kasen neddo fuu biido mo «Nuykaado» ana haandi e naatude yiite jahannama. <sup>23</sup> Ndennoo, so a warii e ittirde sadaka faa cakko-daa, a miccitike don e don sakiike maa ana jogani maa metti, <sup>24</sup> yoppu don sadaka maa oo, njahaa njaafondiroyaa e sakiike maa oo tafon, so kebaa wartude cakko-daa.

<sup>25</sup> So won gullaniido ma saabe namaande, odon njaada sariya, yaawnu ndewritaa e joomum fade moodon yottaade, pati o wade e juude carooowo, oon wade e junngo kayboowo kasu, nden kaa, udde-daa e kasu. <sup>26</sup> Mido haalane goonga: abada a yaltataa so a yo6aali ko ndewete-daa koo faa laa6a.

### *Haala jeenu*

\* 5:21 Pergu 20.13

27 —On nanii wiyanooma: «Pati jeenu!»<sup>†</sup> 28 Miin noo mido wiya on: yeewrudo debbo janano muuyo fuu, jeenii e ley bernde mum. 29 Ndennoo, so yitere maa jaamere luuttinte, sol nde tippo-daa nde to woddi! Mbaasaa salndu maa wooturu buri moyyande ma diina caldi maa dii fuu mbedee e jahannama. 30 So junngo maa jaamo luuttinte, tayu ngo tippo-daa ngo to woddi: mbaasaa salndu maa wooturu buri moyyande ma diina caldi maa dii fuu naata jahannama.

### *Haala ceergal*

31 —Wiyanooma kasen: «Ceerdo jom suudu mum fuu, yo hokku dum talkuru ceergal.»<sup>‡</sup> 32 Miin noo mido wiya on: cerdo jom suudu mum tawee oon jeenaali, so o bamoyaama, gorko arano oo wadii mo e jeenu. Neddo fuu bamdo debbo ceeraado, kajum duu jeenii.

### *Haala hunoore*

33 —On nanii kasen, njaatiraa6e meeden mbiyanooma: «Pati fiirtu hunoore maa, tabintin nde yeeso Joomiraado.»<sup>§</sup> 34 Miin noo mido wiya on: pati kunee fey. Pati kunoree kammu, sabi dum yo joodorgal Laamdo, 35 naa leydi, sabi dum yo njaabirdi koyde makko, naa Urusaliima, sabi dum yo ngeenndi Kaananke mawdo oo. 36 Pati hunora hoore maa ndee, sabi a waawaa rawninde naa bawlinde fay leefol mayre gootol. 37 Mbiyaa «Mi wadan» naa «Mi wadataa», dum tan heyii. Ko beydii hen fuu, e Bondo oo iwi.

### *Haala yobtagol*

38 —On nanii wiyanooma: «Yitere yobirtee yitere, niinde yobirtee niinde.»<sup>\*</sup> 39 Miin noo mido wiya on: pati njobtee gadudo on ko boni. So won piido ma banaawo bannge jaamo, accu dum fiye bannge goddo oo duu. 40 So won gullaniido ma faa teeta forgo maa, accu dum naba dolloke oo duu. 41 So won tilsindo ma roondaade donngal yaadu kiloomeetere, roonda ngal yaadu kiloomeetereji diidi. 42 So won jaagiido ma, hokku dum, so won ndaardudo ma lu6al, pati hadu dum.

### *Haala yidugol konnee'en*

43 —On nanii wiyanooma: «Njidaa tanaa maa, mbarjaa garo maa.» 44 Miin noo mido wiya on: njidee konnee'en moodon, kasen duu nduwanee torroo6e on, 45 yalla odon laatoo bi66e Baabiraado moodon gondo dow kammu oo. Sabi no o fudinirta naange makko e bon6e nii, hono non o fudinirta nge e moyyu6e, kasen duu no o tobinirta e fooccitii6e nii, hono non o tobinirta e oonii6e. 46 So yidube on tan njidaton, mbarjaari hendi ke6aton hen? Fay duwaaje'en 6ee ana ngadira non! 47 So sakiraabe moodon tan njowtaton, kodum seenndi on e wo66e 6ee? Fay heefer6e 6ee ana ngadira non! 48 Ndennoo, laatee hi66u6e, hono no Baabiraado moodon gondo dow kammu oo laatorii ki66ude nii.

## 6

### *Haala sadaka*

1 —Ndeentee e gollirde gollleeji mon lobbi faa yiye. So on ngadii dum, on ke6ataa mbarjaari to Baabiraado moodon gondo dow kammu oo.

<sup>†</sup> 5:27 Pergu 20.14    <sup>‡</sup> 5:31 Fillitagol Tawreeta 24.1    <sup>§</sup> 5:33 Limooje 30.3    <sup>\*</sup> 5:38 Lewinkoo6e 24.20

<sup>2</sup> Ndennoo, so ada itta sadaka, pati wafu dillere faa yimbe njiye, hono no naafigi'en bee ngadata ley cuudi baajordi, kajum e laawi nii. Ebe ngada non yalla yimbe ana mana be. Mido haalana on goonga, been kepii mbarjaari mum'en faa timmi. <sup>3</sup> Kaa aan, so ada itta sadaka, pati nano maa annda ko jaamo maa wadata, <sup>4</sup> yalla sadaka maa oo ana heddo ley cuucuukka. Nden Baabiraado maa jiyoowo ko woni e cuucuukka oo, yofete.

### *Haala duwaawu*

<sup>5</sup> —So odon nduwoo, pati ngadee no naafigi'en nii: been ana njidi duworaade darnde ley cuudi baajordi, kajum e hakkunde dati celi, yalla yimbe fuu ana njiya dum'en. Mido haalana on goonga, been kepii mbarjaari mum'en faa timmi. <sup>6</sup> Kaa aan, nde nduwoto-daa fuu, naatu ley suudu maa, uddaa damal, jaago-daa Baabiraado maa e cuucuukka. Nden, Baabiraado maa jiyoowo ko suudii oo, yofete.

<sup>7</sup> So odon nduwoo, pati kebbinee haalaaji boli di ngalaa nafaa hono no heeferbe bee nii: ebe miili Laamdo jaabanto be so be kebbinii haala. <sup>8</sup> Pati jembee be, sabi Baabiraado moodon ana anndi ko kaaje-don gila on jaagaaki mo. <sup>9</sup> Nii kaan-don duworaade: Baabiraado amen gondo dow kammu, yo innde maa teddine.

<sup>10</sup> Yo Laamu maa war.

Yo muuyde maa ngade dow leydi no ngadiraawo dow kammu nii.

<sup>11</sup> Hokku min hannde jaamdu heyooru min.

<sup>12</sup> Yaafa min luutti amen,  
hono no min njaaforii toorube min nii.

<sup>13</sup> Pati accu min ceytee,  
hisin min e Bondo oo.

[Sabi laamu e baawde e teddeengal ana ngoodan maa faa abada. Aamiina.]\*

<sup>14</sup> Ndennoo, so on njaafiima toorube on, Baabiraado moodon gondo dow kammu oo duu yaafoto on. <sup>15</sup> Kaa so on njaafataako toorube on, Baabiraado moodon oo duu yaafataako luutti moodon.

### *Haala koorka*

<sup>16</sup> —So on koorii, pati njurminkinee no naafigi'en bee nii: been njornoto, yalla yimbe fuu ana anndita be hoorbe. Mido haalana on goonga: been kepii mbarjaari mum'en faa timmi. <sup>17</sup> Kaa aan, so a hoorii, culmaa yeeso maa, ngujaa hoore maa <sup>18</sup> pati yimbe annda a koordo. Baabiraado maa mo yiyataake oo tan anndata. Kasen duu Baabiraado maa jiyoowo ko ngad-daa e cuucuukka, kajum yofete.

### *Haala jawdi dow kammu*

<sup>19</sup> —Pati paggee jawdi aduna, do mooyu e nguudu mbonnata, do wuybe kelata baafe so ngujja. <sup>20</sup> Paggee jawdi dow kammu, do fay huunde bonnataa, wanaa mooyu wanaa nguudu, do wuybe kelataa baafe sako ngujja. <sup>21</sup> Sabi do jawdi maa woni fuu, don yonki maa duu woni.

### *Haala fooyre e nimre*

<sup>22</sup> —Gite ngoni lampa caldi. So gite maa ana moyyi, caldi maa fuu pooyan. <sup>23</sup> Kaa so de moyyaa, caldi maa fuu ni66an. Ndennoo, so fooyre wonnde e maa ndee yo nimre, nimre hoontii nimre!

### *Haala ndaartugol Laamu Laamdo*

\* 6:13 Cakite aaya 13 tawaaka e dereeji burdi fuu booyde dii.

24 —Fay gooto waawaa gollande halfaa6e didon, sabi naa joomum wajjii gooto, yidii keddiido oo, naa nanngondirii e gooto oo, yoppii keddiido oo. On mbaawaa gollidande Laamdo e jawdi.

25 Dum nee, mido wiya on: pati cunlee e nguurndam mon ko jaamatan e ko njaraton e ko koltoton. Pati cunlanee ko boornoto-don. Tama nguurndam buraa nguure? Tama caldi buraa koltal? 26 Yeewee pooli diwooji dii: di aawataa, di kettataa, di mbeembataa, kaa Baabiraado moodon gondoo dow kammu oo ana jammaa di. Onon nee, on buraa pooli teentilaade naa? 27 Homo e mon waawi beydude e balde mum fay jalooma gooto kammari sugulla mum? 28 Ko wadi so odon cunjana kaddule? Yeewee piindijji ley ngesa no peertirta: di tampataa, di mottataa. 29 Haya mido wiya on: Suleymaana e ngalu mum fuu paroraaki no gootel e majji nii. 30 So Laamdo ana holtinira nii leggiri taweteendi ley ngesa hannde, tippeteendi e yiite janngo, ko hadata mo holtinde on faa bura nii, onon famdu6e hoolaare! 31 Ndennoo, pati cunlee faa mbiyon: «Kodum jaamatan? Kodum njaraten? Kodum boornoto-don?» 32 Sabi dee kulle fuu heefer6e tan ndaarata dum. Kaa Baabiraado mon gondoo dow kammu oo ana anndi odon kasindini e majjum dum fuu. 33 Ndaartee tafon Laamu Laamdo oo, kaɓum e fooccitaare makko ndee. Ko heddi koo fuu, on beydante dum.

34 Ndennoo, pati cunlanee janngo, sabi janngo sunlanan hoore mum. Nalooma fuu, donngal mum ana heya dum.

## 7

### *Haala jijnondiral*

1 —Pati jijnee, yalla odon mbaasa jijnee. 2 Sabi hono no jijnirton wo66e nii, nii jijnirte-don. Kasen duu ko etiranton wo66e koo, dum etirante-don. 3 Ko saabii so ada yiya kudol ley yitere sakiike maa, tawee aan nee, a yiyataa leggal gonngal e ley nde maa ndee? 4 Hono mbaawru-daa wiide sakiike maa: «Sakiike, dal mi ittane kudol gonngol e yitere maa ngol», tawee aan nee, leggal woni e ley nde maa ndee? 5 Naafigi, ittu leggal gonngal e yitere maa ngal tafon, nden jiile maa laabata, faa kebaa no ittiraa kudol gonngol e yitere sakiike maa ngol.

6 Pati ndokkee dawaadi ko dagii, sabi di mbirfitanto on di njata on. Pati caakee naaye moodon dime yeeso girooji, sabi di nja66an de.

### *No Laamdo hokkirta jaagiido dum*

7 —Naagee, on keban, tewtee, on njiitan, calminee gila odon damal galle, on udditante. 8 Sabi jaagiido fuu heban, tewtudo fuu yiitan, calmindo fuu udditante. 9 Homo woni e mon mo biyum jaagotoo buuru so hokka dum haayre? 10 Naa jaagoo dum liingu, hokka dum mboddi? 11 No mbonir-don fuu, odon ndokka bi66e mon kulle lobbe, sako Baabiraado mon gondoo dow kammu oo. Omo hokka jaagiido mo fuu kulle lobbe. 12 Ndennoo, ngadiranee yim6e no njid-don 6e ngadirana on nii. Dum woni ko Tawreeta Muusaa e dewte annabaabe dee njamiri.

### *Haala damal paadungal*

13 —Naatiree damal paadungal ngal! Sabi damal naatirgal e halkere ana yaajii, laawol mum ngol ana newii, jokko6e ngol 6ee duu ana keewi. 14 Kaa damal naatirgal e nguurndam ana faadii, laawol mum ngol ana tiidi, kasen yiito6e ngol 6ee yo seeda.

### *Haala lekki e biddde mum*

<sup>15</sup>—Ndeentee e annabaaḅe peneeḅe ḅee. So eḅe ngara e mon, ḅe nanndinkinto e baali, kaa so goonga, ḅe jaatooji bonḅi. <sup>16</sup> Golleji maḅḅe annditirton ḅe hono no lekki annditirtee biddde mum nii. Peguuje teḅataake e kebbe, ibbe teḅataake e jakkaḅere. <sup>17</sup> Lekki lobbi biddde lobbe rimata, kaa lekki mbonki biddde bonde rimata. <sup>18</sup> Lekki lobbi waawataa rimde biddde bonḅe, kasen duu lekki mbonki waawataa rimde biddde lobbe. <sup>19</sup> Lekki fuu ki rimataa biddde lobbe soppete, wedee e yiite. <sup>20</sup> Ndennoo, golleji maḅḅe annditirton ḅe.

### *No taalibaaḅe peneeḅe carirtee*

<sup>21</sup>—Wanaa wiyooḅe kam «Moobbo, Moobbo» ḅee fuu naatata e Laamu Laamḅo oo. Wadooḅe sago Baabiraado am gondo dow kammu oo ḅee tan ngoni naatoḅe e makko. <sup>22</sup> Nannde darngal, heewḅe mbiyan kam: «Moobbo, Moobbo! Wanaa e innde maa min njottiniri nulal naa? Wanaa e innde maa min ndibbiri seyḅaani'en naa? Wanaa e innde maa min ngadiri kaayḅe keewḅe naa?» <sup>23</sup> Oon wakkati, mi jaaborto ḅe nii: «Mi anndaa on abada. Ngodḅee kam, onon wadooḅe ko boni ḅee!»

### *Haala cuudi dāi*

<sup>24</sup>—Ndennoo, nedḅo fuu kettindiido haalaaji am dīi so jokki dī, nanndan e hakkilante mahudo suudu mum e dow haayre. <sup>25</sup> Yiiwoonde toḅi, ilaali mbuuwi, kenuuli mawḅi mbibbi e mayru, fuu ndu saamaali, sabi ndu diidaama dow haayre. <sup>26</sup> Kaa nedḅo fuu kettindiido haalaaji am dīi so jokkaali dī, ana nanndi e mo walaa hakkille, mahudo suudu mum e dow njaaareendi. <sup>27</sup> Yiiwoonde toḅi, ilaali mbuuwi, kenuuli mawḅi mbibbi e mayru, ndu wurji wurjugol manngol.

<sup>28</sup> Nde Iisaa tilii e diin konngi ndee, jamaa oo satti haayneede e waaju makko oo, <sup>29</sup> sabi o waajorike ḅe hono no jom baawḅe nii, wanaa no dunkee'en Sariya ḅee nii.

## 8

### *No Iisaa selliniri ceppaado*

<sup>1</sup> Ko Iisaa jippii waamnde haayre ndee koo, jamaa keewḅo jokki e makko.

<sup>2</sup> Oon wakkati, gorko ceppaado wari diccii yeeso makko, wii mo:

—Moobbo, so tawii a jaḅii ada waawi sellinde kam.

<sup>3</sup> Iisaa foocci junngo mum, memi mo, wii:

—Mi jaḅii, sellu!

Don e don, ceppu gorko oo selli. <sup>4</sup> Caggal dum, Iisaa wii mo:

—Hettinda faa moyya! Pati kaalanaa dum fay gooto, kaa yaa holloy hoore maa jottinoowo sadaka, ngadaa sadaka mo Muusaa yamiri oo, faa anndina ḅe a sellii.

### *No Iisaa selliniri golloowo hooreejo sordaasi'en*

<sup>5</sup> Nde Iisaa naatannoo Kafarnahum ndee, hooreejo sordaasi'en ḅattii mo, ndaardi mo mballa, wii:

<sup>6</sup>—Moobbo, golloowo am ana lelii cuudi, sellaa faa junngo yahataa koyn-gal warataa, ana naawa sanne!

<sup>7</sup> Iisaa wii mo:

—Mi yahan mi sellinoya mo.

<sup>8</sup> Kaa hooreejo sordaasi'en oo jaabii, wii:

—Moobbo, miin, mi wanaa fay huunde, fotaa ko ngaraa galle am. Ndennoo daja ko kaal-ḅaa tan, golloowo am oo sellan. <sup>9</sup> Miin e hoore am mi

laamaado, miin duu mido laamii sordaasi'en. So mi yamirii gooto yaha, yahan, so mi wii goddo wara, waran, so mi wii golloowo am wada huunde, wadan.

<sup>10</sup> Nde Iisaa hettindii mo ndee, haaynaa e makko sanne, wii jokku6e e mum 6ee:

—Mido haalana on goonga, mi yiyaali hono ngal goondinal e sellude fay e Israa'ililanke. <sup>11</sup> Mido haalana on, heew6e iwrata funnaange e hiirnaange, njoododoo e Ibarahiima e Isiyaaka e Yaakuuba, 6e jaamda ley Laamu Laamdo. <sup>12</sup> Kaa jogoraabe naatoo6e e Laamu oo 6ee, mbedete ley nimre wonde sella ndee, ton 6e mboyata 6e njeryondira jiiye.

<sup>13</sup> Caggal dum, o wii hooreejo sordaasi'en oo:

—Hootu galle maa! Yo laatane no ngoondinir-daa nii.

E oon wakkati jaati, golloowo hooreejo sordaasi'en oo sellinaa.

### *No Iisaa selliniri jaw6e heew6e*

<sup>14</sup> Iisaa yehi galle Piyeer, tawi esii Piyeer debbo ana lelii yo jontaado.

<sup>15</sup> Iisaa memi junngo makko, jontere makko selli, oon immii laatani mo njaatigi.

<sup>16</sup> Nde hiirnoo ndee, Iisaa waddanaa yim6e heew6e 6e ladde woni e mum'en. Konngol makko tan o ribbiri laddeji gondi e ma66e ddi, o sellini jaw6e 6ee fuu. <sup>17</sup> O wadi non faa dum tabintina haala ka Laamdo yottiniri annabi Esaaya kaa nde oon wii:

«O ittii tampere meeden,

o sellinii jawuuji meeden.»\*

### *No yim6e mbiiri njokkan e Iisaa*

<sup>18</sup> Nde o yii jamaa oo ana filii mo ndee, o yamiri o lumbbinee. <sup>19</sup> Dunkee Sariya gooto battii, wii mo:

—Moobbo, mi jokkete do njahataa fuu.

<sup>20</sup> O wii oon:

—Doldolde ana njogii gayde, pooli duu ana njogii cuudi, kaa Bii Neddo oo walaa fay do soppinoo sako faa lelina hoore mum fowtinoo.

<sup>21</sup> Goddo jeyaado e taalibaa6e 6ee wii mo:

—Moobbo, accu mi iroya baabam tafon.

<sup>22</sup> O jaabii oon, o wii:

—Jokkam, dal maay6e ira maay6e mum'en.

### *No Iisaa waaltiniri yiiwoonde e henndu*

<sup>23</sup> O naati laana, taalibaa6e makko njokki e makko. <sup>24</sup> Don e don, yiiwoonde immodii e henndu mawndu e weendu nduu faa bemppeeje ana cudda laana kaa, tawi kanko omo daanii. <sup>25</sup> Taalibaa6e 6ee battii mo, pinndini mo, mbii mo:

—Moobbo, danndu min! Miden nii kalkoo!

<sup>26</sup> O jaabii 6e, o wii:

—Ko hul6inta on? Onon famdu6e hoolaare!

E oon wakkati, o immii, o jahii e henndu nduu e ndiyam weendu dam. Non fuu wii teen! <sup>27</sup> Haayni 6e, e6e mbiya:

—Gorko homo sifa mum wa'i nii, fay kenuuli e ndiyam ana dowtanoo dum?

### *No Iisaa selliniri wor6e didon laddaabe*

\* 8:17 Esaaya 53.4

<sup>28</sup> Nde Iisaa lummbunoo so heetti e leydi Gadaren ndee, worbe didon laddaabe njalti ley janaale, kawri e makko. Ebe janngunoo faa fay gooto suusaano yabboraa de laawol ngol. <sup>29</sup> Be ndarii ebe nduka ebe mbiya:

—Bii Laamdo, ko njid-daa wadude min? Torrude min waddu maa doo, gila wakkati cartaa doo oo yottaaki naa?

<sup>30</sup> Sewre girooji mawnde ana durannoo sera don. <sup>31</sup> Seydaani'en bee ndaardi mo mbii:

—So ribbude min njid-daa, dujana min min naatoya e ndee doo sewre girooji.

<sup>32</sup> O wii be:

—Njehee!

Seydaani'en bee njalti, naatoyi e girooji dii. Don e don, sewre ndee fuu diiri iwi hoore waamnde haayre too, sumpitii ley weendu nduu, yoolii.

<sup>33</sup> Duroo6e bee ndogi kooti ngeenndi too, njantoyii ko wadi koo fuu fay ko laddaabe bee koo. <sup>34</sup> Oon wakkati, yim6e ngeenndi bee fuu njehi hawritoyde e Iisaa. Nde be njii mo ndee, be ndaardi mo o yalta leydi ma66e ndii.

## 9

### *No Iisaa selliniri gorko bonnguujjo*

<sup>1</sup> Iisaa naati laana, lummbiti, warti ngeenndi mum. <sup>2</sup> O waddanaa bonnguujjo ana lelnaa e dengeleewo. Nde o yii goondinal yim6e bee ndee, o wii bonnguujjo oo:

—Gidam, seya! Luutti maa njaafaama!

<sup>3</sup> E oon wakkati, dunkee'en Sariya yogaa6e miili e ko'e mum'en: «Oo gorko ana bonkoo Laamdo!» <sup>4</sup> O faami miilooji ma66e, o wii:

—Kodum wadi so odon miiloo dii miilooji bondi e berde moodon? <sup>5</sup> Wiide «Luutti maa njaafaama» e wiide «Imma yaa», kodum hen furi newaade? <sup>6</sup> Kaa, faa mi anndina on Bii Neddo ana jogii baawde e aduna oo yaafaade luutti...

Nden, o wii bonnguujjo oo:

—Imma, 6am dengeleewo maa, kootaa suudu maa!

<sup>7</sup> Gorko oo immii, hooti suudu mum. <sup>8</sup> Nde yim6e bee njii dum ndee, kuli, ndarii ana njetta Laamdo saabe ko hokki bii-aadama baawde baade nii koo.

### *No Iisaa noddiri Matta jokka e mum*

<sup>9</sup> Iisaa iwi don, ana e laawol. O yii gorko biyeteedo Matta ana joodii e duwaajjeere mum, o wii dum:

—Jokku e am.

Matta immii, jokki e makko.

<sup>10</sup> Caggal dum, o wari omo jaama ley galle Matta. Duwaajje'en heew6e e luuttoo6e hono mum'en ngari njoodii ana jaamda e makko kanko e taalibaa6e makko. <sup>11</sup> Farisa'en bee njii dum, ndarii ana mbiya taalibaa6e makko bee:

—Ko saabii so moobbo moodon ana jaamda e duwaajje'en, karum e luuttoo6e hono mum'en?

<sup>12</sup> O nani dum, o wii be:

—Wanaa celludo hasindini e cawroowo, jawdo hasindini e cawroowo.

<sup>13</sup> Njehee njanngooyee ko winndaa ley Dewtere Seniinde koo. Laamdo wii: «Yurmeende woni ko njidu-mi,

wanaa sadaka duppeteedo.»\*

\* **9:13** Hosee'a 6.6

Sabi wanaa noddude fooccitiíe waddi kam, noddude luuttoo6e woni ko waddi kam.

### *Haala koorka*

<sup>14</sup> E oon wakkati, taalibaa6e Yaayaa 6attii Iisaa, lamndii mo dum doo:

—Ko saabii so minen e Farisa'en 6ee miden koora kaa taalibaa6e maa 6ee koorataa?

<sup>15</sup> O jaabii 6e, o wii:

—Tama nootiíe kuurtungu ana mbaawi ñoornaade so jommbaajo gorko ana wondi e mum'en? Kaa jalaade ngaran de jommbaajo gorko oo ittete e hakkunde ma66e. E deen jalaade, 6e kooran. <sup>16</sup> Fay gooto dammbataa fetalaare heyre e kaddungal kiinngal, sabi fetalaare heyre ndee daamtan kaddungal kiinngal ngal, ceekol ngol beydoo. <sup>17</sup> Kasen duu peguujam kesam loowataake e sumalleeji kiiddi. So dum wadii, sumalleeji dii pusan, peguujam dam yuppoo, sumalleeji dii mbona. Haya peguujam kesam e sumalleeji kesi loowetee, yalla dum fuu edum reenoo.

### *No Iisaa selliniri debbo e no wuurtiniri suka debbo*

<sup>18</sup> Nde Iisaa woni e haalde dum ndee, hooreejo suudu waajordu gooto yottii, diccii yeeso mum, wii:

—Biyam debbo hedditaaki jooni temmbu. Kaa war faw junngo maa e makko, o wuurtan.

<sup>19</sup> Iisaa immii jokki e makko, kañum e taalibaa6e mum. <sup>20</sup> E6e e laawol, debbo gooto mo tuundi mum tayataa ko waarata e duu6i sappo e didi, iwri caggal Iisaa, memi kommbol saaya makko. <sup>21</sup> Sabi o miilii e becce makko: «So mi hebii memde saaya makko tan, mi sellan.» <sup>22</sup> Iisaa yeecitii, yii mo, wii:

—Bannam debbo, seya! Goondinal maa danndii ma.

Oon wakkati fuu, debbo oo selli. <sup>23</sup> Iisaa yottii galle hooreejo waajordu oo, non o yii fiyoobe cereeli won6e to maayde too 6ee e yim6e woyoo6e 6ee, <sup>24</sup> o wii:

—Immee doo, sabi suka debbo oo maayaali, o daaniido tan.

Be njali mo. <sup>25</sup> Nde yim6e 6ee njaltinaa sella ndee, o naati ley suudu nduu, o nanngi junngo suka debbo oo, nii immii. <sup>26</sup> Oon kabaaru saakii e leydi ndii fuu.

### *No Iisaa wumtiniri wum6e didon*

<sup>27</sup> Nde Iisaa yahata ndee, wum6e didon njokki e mum ana ngulla ana mbiya:

—Taanii Daawuuda, yurma min!

<sup>28</sup> Nde o yottii cuudi ndee, wum6e 6ee 6attii mo, o lamndii dum'en, o wii:

—Odon ngoondini mido waawi wallude on?

Be njaabii mo, 6e mbii:

—Moobbo, miden ngoondini.

<sup>29</sup> E oon wakkati, o memi gite ma66e, o wii:

—Yo laatano on no ngoondinir-don nii.

<sup>30</sup> Don e don 6e mbumti. O yaggini 6e, o wii 6e:

—Pati kaalanee dum fay gooto.

<sup>31</sup> Kaa 6e njehi tan 6e caaki kabaaru makko e leydi ndii fuu.

### *No Iisaa selliniri gorko muumo*

<sup>32</sup> Nde wumtinaa6e 6ee njaltunoo ndee, Iisaa waddanaa kasen gorko mo seydaani muumdini. <sup>33</sup> O ribbi seydaani oo tan, muumdunoodo oo watti haalde. Jamaa oo fuu haaynaa, ana wiya:



—Hono dum yiyaaka e Israa'iila abada!

<sup>34</sup> Kaa Farisa'en 6ee mbii:

—Hooreejo seydaani'en oo hokki mo baawde ribbude seydaani'en 6ee!

### *No Iisaa yurmorii yimbe 6e ngalaa kawjo*

<sup>35</sup> Iisaa ana yiiloo e geelle e gure fuu, ana waajoo e ley cuudi baajordi, ana ooynoo Kabaaru Lobbo haala Laamu Laamdo oo, omo sellina jawuuji e ellaaji fuu. <sup>36</sup> Nde o yii yimbe 6ee ndee, 6e njurminii mo, sabi 6e tampu6e 6e tayu6e dimme hono baali di ngalaa duroowo nii. <sup>37</sup> Oon wakkati, o wii taalibaabe makko 6ee:

—Gese 6enndude ana keewi, kaa hettoobe keewaa. <sup>38</sup> Ndennoo, jaagee Jom kettal oo nelda hettoobe to hettantee too.

## 10

### *No Iisaa suborii nelaabe sappo e didon*

<sup>1</sup> Iisaa noddi taalibaabe mum sappo e didon 6ee, o hokki 6e baawde ribbugol seydaani'en e sellinool sii jawuuji e ellaaji fuu. <sup>2</sup> Inde nelaabe sappo e didon 6ee annii: arano e ma66e yo Simon noddirteedo Piyeer e Andire mijum, Yaakuuba 6ii Jebede e Yuhanna mijum, <sup>3</sup> Filipa e Bartolome, Tomaa e Matta duwaape oo, Yaakuuba 6ii Alfaa, kanum e Tadde, <sup>4</sup> Simon kiranoowo suudu baaba e Yahuuda Isikariyota jammbootoодо mo oo.

### *No Iisaa neliri taalibaabe mum sappo e didon 6ee*

<sup>5</sup> Iisaa neli 6een sappo e didon, o wii 6e:

—Pati njehee e leyde de Yahuudiyankoo6e ngalaa e mum dee, kasen duu pati naatee e geelle Samariya. <sup>6</sup> To baali suudu Israa'iila majjudi dii kaan-don yaade. <sup>7</sup> To njahaton fuu, ooynee mbiyon «Laamu Laamdo battiima!» <sup>8</sup> Cellinon jaw6e, nguurtinon maay6e, cellinon seppaa6e, ndibbon seydaani'en. On kebirii nii tan, ndokkiree nii tan. <sup>9</sup> Pati naboree kanje naa cardii naa mbuudu jakawalle e njiibaaji moodon. <sup>10</sup> Pati fay gooto e moodon nabora mbasu naa saayaaji didi. Pati fay gooto e moodon bama pade naa sawru. Sabi golloowo ana haandi e nguure.

<sup>11</sup> So tawii on ngarii e ngeenndi naa wuro, tewtee njaatigi lobbo, kasen keddee njaatigi mon doo faa nde iw-don don. <sup>12</sup> So odon naata e galle, calminon. <sup>13</sup> So galle oo ana haandi hen, yo jam mon yotto mo. Kaa so mo haandaa hen, yo jam mon wartu e mon. <sup>14</sup> So won galle naa ngeenndi do on nja66aaka naa on kettindaaka, njaltee nokku oo, pidon colla koyde mon duu. <sup>15</sup> Mido haalana on goonga: jannde darningal, jukkungo ndiin ngeenndi buran ngo geelle Sodooma e Gomoora ngoo naawde.\*

### *Haala torraaji garooji*

<sup>16</sup> —Kettindee! Mi nelii on no baali hakkunde pobbi nii. Ndennoo, yoyiree no boje nii, neworee no buugaaji nii. <sup>17</sup> Ndeento-don e yimbe 6ee, sabi 6e ndarnan on e carirde, 6e piyan on dorri ley cuudi ma66e baajordi. <sup>18</sup> On nabete yeeso saroobe e kaanankoo6e saabe am, faa laatano-don kam seedee'en yeeso ma66e kam6e e heefer6e 6ee. <sup>19</sup> So on ndarnaama e sarirde, pati mbemembe-don no kaaldaton naa ko kaalaton. Sabi on ndokkete konngi di kaan-don haalde e oon wakkati, <sup>20</sup> di iwataa e moodon, ko selli hen dee,

\* **10:15** Sodooma e Gomoora yo geelle didi de Laamdo halkii saabe heewgol majje luutti. Yeew Puddoode 19.1-29

RuuhuBaabiraado moodon oo haalata ley moodon. <sup>21</sup> Neddfo hokkitiran saki-ike mum waree, baabiraado duu biyum. Bi66e immanto saaraabe mum'en, piya dabare yalla been ana mbaree. <sup>22</sup> Yim6e fuu mbajan on saabe am. Kaa mupudo faa timmoode, joomum hisinte. <sup>23</sup> So on torraama e ngeenndi ngootiri, ndoganee ngonndi. Midfo haalana on goonga: on piltidataako geelle Israa'iila dee fuu tawa Bii Neddfo wartaali.

<sup>24</sup> Taalibbo 6uraa moobbo mum, maccudo 6uraa kalfaadfo mum. <sup>25</sup> Ana yidaa taalibbo wuurda no moobbo mum wuuri fuu, maccudo duu no kalfaadfo mum wuuri. Miin duu, mi noddiraama «Beelsebul» (hooreejo seydaani'en), wanaa haala mon onon.

### *Haala kulol Laamdo*

<sup>26</sup> —Ndennoo, pati kulee yim6e. Wala fuu ko suudii ko 6anngintaake, wala sirri mo saakataake. <sup>27</sup> Ko kaalan-mi on e nimre koo, kaaltee dum e fooyre. Ko ngunndante-don koo, ooynee dum dow beneeeji. <sup>28</sup> Pati kulee waroobe terde, 6e mbaawanaa yonkiiji. Laamdo baawdo halkude terde e yonkiiji fuu e jahannama, oo kaan-don hulde. <sup>29</sup> Tama biiwuuji didi coottataake mbuudu? Kaa fay gootel e majji yanataa e leydi tawa wanaa e sago Baabiraado moodon oo. <sup>30</sup> Onon, fay lee6i ko'e mon fuu ko limaa.

<sup>31</sup> Ndennoo, pati kulee, sabi onon 6uri biiwuuji keewdi teentilaade. <sup>32</sup> Neddfo fuu ceettaniido kam yeeso yim6e, miin duu, mi seettanto dum yeeso Baabiraado am gondfo dow kammu oo. <sup>33</sup> Kaa calaniido kam hakkunde yim6e fuu, miin duu, mi salanto dum yeeso Baabiraado am gondfo dow kammu oo.

### *No Iisaa laatorii sabaabu ceeraagu yim6e*

<sup>34</sup> —Pati miilee jam ngardu-mi e leydi ndii. Mi wardaali e jam, kaafaawi ngardu-mi. <sup>35</sup> Ko waddi kam dee, seenndude bidfo gorko e baam mum, bidfo debbo e inna mum, debbo 6amaado e esum debbo. <sup>36</sup> Neddfo fuu koreeji mum laatotoo way6e mum. <sup>37</sup> Korsindo inna mum naa baam mum faa 6uri kam fuu, wanaa potudo laataade taalibbo am. Korsindo biyum gorko naa debbo faa 6uri kam fuu, wanaa potudo laataade taalibbo am. <sup>38</sup> Mo 6amaali leggal mum bardugal,† jokka e am fuu, wanaa potudo laataade taalibbo am. <sup>39</sup> Tewtudo reenude yonki mum fuu, waasan ki, kaa baasirdfo ki sabaabu am, hewtan ki.

### *Haala mbarjaari*

<sup>40</sup> —Ja66iido on fuu ja66iima kam, ja66iido kam fuu ja66iima neldfo kam oo. <sup>41</sup> Ja66iido annabaajo saabe o annabaajo fuu, he6an mbarjaari ndi annabaajo fodanaa ndii. Ja66iido neddfo pooccitiido saabe o pooccitiido fuu, he6an mbarjaari ndi pooccitiido fodanaa ndii. <sup>42</sup> Midfo haalana on goonga: neddfo fuu dokkudo burdo famdude e taalibaabe am 6ee fay so horde loonde ndiyam 6uu6udam tan saabe o taalibbo am, o waasataa he6ude mbarjaari makko.

## 11

<sup>1</sup> Nde Iisaa tilii yamirde taalibaabe mum sappo e didon 6ee ndee, iwi don, yehi jannginoyde e waajoyaade ley geelle piliide dee.

### *No Yaayaa neliri taalibaabe mum to Iisaa*

† **10:38** Koro 6amde leggal bardugal woni fellisidde mursude yonki mum hono no Iisaa nii.

<sup>2</sup> Yaayaa ana ley kasu. O nani gollleeji Almasiihu oo ana njantee, o neli taalibaa6e makko 6ee, <sup>3</sup> faa lamndoo Iisaa:

—Aan woni kaando warde oo, naa min ndooman goddo?

<sup>4</sup> Iisaa jaabii 6e, wii:

—Njehee, njantanoyee Yaayaa ko nan-don e ko njii-don fuu: <sup>5</sup> wum6e ana mbumta, layannoobe ana njab6a faa gasa, seppaa6e ana cellinee, faadu6e ana paadita, maay6e ana nguurta, misikiina'en duu kaalanaama Kabaaru Lobbo oo. <sup>6</sup> Oon mo salaaki goondinde kam, welii hoore.

<sup>7</sup> Nde nelaabe Yaayaa 6ee njahata ndee, Iisaa fuddi haalande jamaa oo haala Yaayaa, o wii:

—Kodum yeewoyno-don to ladde jeereende too? Kudol dimmbotoongol e henndu naa? <sup>8</sup> Ndennoo, kodum yeewoyno-don? Gorko pariido naa? Parii6e e galleeeji kaanankoo6e tawetee. <sup>9</sup> Ndennoo, kodum yeewoyno-don? Annabaajo naa? Goonga! Mido haalana on, omo 6uri annabaajo. <sup>10</sup> Kanko woni mo Binndi dii cappii oo:

«Miin Laamdo, mi ardinante nelaado am moyyinanooowo ma laawol.»\*

<sup>11</sup> Mido haalana on goonga: bammaa6e bammaaali 6urdo Yaayaa mo lootogal batisima oo, tawee nee, 6urdo lo'ude e Laamu Laamdo oo 6uri mo teddude. <sup>12</sup> Gila Yaayaa mo lootogal batisima fuddi waajaade, Laamu Laamdo ana ruggoree semmbe, ruggotoo6e 6ee ana ndaara teetude mo. <sup>13</sup> Annabaabe 6ee fuu kapum e Tawreeta Muusaa cappike Laamu oo faa e jamaanu Yaayaa. <sup>14</sup> So odon njaba haala ma66e, Yaayaa woni annabi Iliyaasa mo garol mum sappaa oo. <sup>15</sup> Jom nowru fuu yo nanu.

<sup>16</sup> Kodum mbaaw-mi nanndinde e yim6e oo jamaanu? E6e nanndi e sukaa6e joodiife e luumooji, 6ee doo ana mbiya 6ee too:

<sup>17</sup> «Min piyanii on cereeli,

on mbamaali,

min mboyanii on woundu yurminiindu,

on dusaali.»

<sup>18</sup> Sabi Yaayaa warii, o koorooowo, o yarataa doro, wiyaama o laddaado. <sup>19</sup> Bii Neddo oo duu warii ana jaama, ana yara, yim6e mbii dum: «Naamde e yarde tan woni e hakkille mum, o gidu duwaane'en e luuttoo6e hono mum'en!» Kaa hakkilantaaku Laamdo ana banngina goonga muudum ley gollleeji muudum.

### *No Iisaa feliri geelle caliide tuubude*

<sup>20</sup> Caggal dum, Iisaa fuddi felde geelle de o 6uri wadu6e e mum kaayde dee, sabi hodube e deen geelle 6ee tuubaali. O wii:

<sup>21</sup> —Bone woodanii ma, aan Korasin! Bone woodanii ma, aan Baytisayda! Sabi so kaayde gadanoode e ley moodon dee ngadanooma Tirus e Sidon, nden, hodube ton 6ee tuubanno law, tawete 6e boornike licce caakuuji, 6e njoodike e ndoondi faa 6e kollita tuubugol ma66e. <sup>22</sup> Saabe dum, mido wiya on: jannde darngal, jukkungo mon buran ngo Tirus e Sidon ngoo naawde. <sup>23</sup> Aan duu Kafarnahum, ada miila a toownete faa dow kammu naa? A leydinte faa keedaa ley maay6e. Sabi so kaayde gadanoode e maa dee ngadanooma Sodooma, nden, ndiin ngeenndi heddotono faa jooni. <sup>24</sup> Saabe dum, mido wiya on: jannde darngal, jukkungo mon buran ngo Sodooma ngoo naawde.

### *No Iisaa fowtinirta yim6e*

<sup>25</sup> Oon wakkati fuu, Iisaa wii:

\* 11:10 Malakiya 3.1

—Baabiraado jom kammu e leydi, mi yettii ma, sabi a suudii dee kulle hakkilanteebe, kaɗum e annduɓe, bannginan-ɗaa ɗum cukaloy. <sup>26</sup> Jaati Baabiraado, hono non worri sabi ɗum wel maa.

<sup>27</sup> Baabiraado am tummbii huunde fuu e junngo am. Fay gooto anndaa Bajjo oo so wanaa Baabiraado oo, fay gooto anndaa Baabiraado oo so wanaa Bajjo oo, kaɗum e mo Bajjo oo muuyi bannginande ɗum fuu.

<sup>28</sup> Onon yimɓe tampuɓe roondaade donnge tedduɓe, on fuu ngaree e am, mi fowtinan on. <sup>29</sup> Dalee mi fawa tekkere am e dow mon, accon mi janngina on, sabi mido sawrii, mido leydinkinii, on tawan hen fowtere yonkijji moodon. <sup>30</sup> Sabi tekkere am ana yaafi roondaade, donngal am ana huyfi.

## 12

### *Haala ɗalaande fowteteende*

<sup>1</sup> Oon wakkati, Iisaa e taalibaaɓe mum ana ceeka gese ley ɗalaande fowteteende. Taalibaaɓe makko njolbi, ana kelta butaali ana yakka. <sup>2</sup> Nde Farisa'en ɓee njii ɗum ndee, ndarii ana mbiya mo:

—Yeew, taalibaaɓe maa ɓee ana ngolla ko dagaaki gollude ɗalaande fowteteende!

<sup>3</sup> O jaabii ɓe, o wii:

—Tama on njanngaali ko Daawuuda wadi nde yolbunoo, kaɗum e yimɓe mum? <sup>4</sup> O naati e ley hukkuu ceniido oo, kanko e yimɓe makko, ɓe ɗaami buuru cakkaado oo. Haya, ɓe nduɗanaaka ɗaamde mo, yottinoobe sadaka tan njeoy ɗaamde mo. <sup>5</sup> Naa duu, on njanngaali e ley Tawreeta Muusaa, nde wonnoo yottinoobe sadaka ɓee ana ngolla ley Suudu Dewal Mawndu nduu fay ɗalaande fowteteende? Kamɓe nee, eɓe comna ɗalaande fowteteende ndee, kaa ɗum felataa ɓe. <sup>6</sup> Mido wiya on: ko ɓuri Suudu Dewal Mawndu ana doo. <sup>7</sup> Sinndo odon anndunoo ko kaa haala Laamdo firritata: «Yurmeende woni ko njidu-mi, wanaa sadaka duppeteedo», on carataano ɓee laaɓuɓe. <sup>8</sup> Sabi Bii Neddo oo jey ɗalaande fowteteende ndee.

### *No Iisaa selliniri gorko mo junngo mum waati*

<sup>9</sup> Iisaa iwi don naatoyi suudu maɓɓe waajordu. <sup>10</sup> Gorko mo junngo mum waati ana wonnoo don. Wonnoobe don ɓee tuufani Iisaa yalla ana keɓa no kappira ɗum. Saabe ɗum, ɓe lamndii mo ɗum doo:

—Sariya meeden oo hokkii en sellinde neddo ɗalaande fowteteende naa?

<sup>11</sup> O jaabii ɓe, o wii:

—So won e mon jogiido mbaalu, so oon mbaalu saamii e luggere ɗalaande fowteteende, wanaa joomum yaltinoyan mo naa? <sup>12</sup> Odon anndi neddo ana ɓuri mbaalu do woddi! Ndennoo, ana dagoo wadande neddo ko moyyi ɗalaande fowteteende.

<sup>13</sup> Caggal ɗum, o wii gorko oo:

—Fooccu junngo maa!

Oon foocci ngo tan, ngo selli faa ngo warti hono no wonngo ngo nii.

<sup>14</sup> Farisa'en ɓee njalti, njoodoyii faa ndawrida no mbarda Iisaa.

### *No Laamdo suborii kaadime mum Iisaa*

<sup>15</sup> Nde Iisaa nani dum ndee, iwi e oon nokku, yimɓe heewɓe njokki e makko. O sellini ɗawɓe ɓee fuu, <sup>16</sup> o daalii been pati kumpita fay gooto kabaaru makko. <sup>17</sup> Dum wadirii non yalla haala ka Laamdo yottinirnoo annabi Esaaya kaa ana tabita nde oon wii:

- 18 «Annii kaadime am mo cubii-mi.  
Kanko korsin-mi,  
kanko welni bernde am.  
Mi jippinan e makko Ruuhu am,  
o ooynanto lejni dii laawol fooccitaare.
- 19 O falondirtaake, o dukataa,  
daande makko nanataake e mbeddaaji.
- 20 O helataa kudol oopiingol,  
o jifataa moottila mo pooyel mum famdi  
faa jannde o hokki fooccitaare jaalogal.
- 21 Lejni dii fuu pawan jikke mum'en e makko.»\*

*No Iisaa fenniri ko happaa koo*

22 Nden, Iisaa waddanaa gorko bumdo muumo, sabi oon yo laddaado. O sellini dum faa watti haalde e yiide. 23 Haaynii yimbe 6ee fuu, ndarii ana mbiya:

—Dum nee, taanii Daawuuda oo woni doo naa?

24 Kaa nde Farisa'en 6ee nani dum ndee, mbii:

—E baawde «Beelsebul» hooreejo seydaani'en o ribbirta seydaani'en 6ee.

25 Nde wonnoo Iisaa anndii milooji ma66e, o wii 6e:

—Laamu fuu pecciido ana ha6a e hoore mum, bonan. Ngeenndi naa galle fuu pecciido ana ha6a e hoore mum, heddataako. 26 So Ibiliisa ribbii seydaani'en mum, feccii hoore mum. Ndennoo, hono laamu mum heddortoo? 27 So tawii «Beelsebul» ndibbiran-mi seydaani'en, yimbe mon 6ee nee, homo ndibbirta 6e? Yimbe mon 6ee jaati kollata on ngalaa e goonga! 28 Kaa so Ruuhu Laamdo ndibbiran-mi seydaani'en, dum ana holla Laamu Laamdo warii e mon.

29 Iisaa beydi hen, wii:

—Fay gooto waawaa naatude e galle gorko jom semmbe teeta jawdi mum tawee ha6aali joomum tafon. Kaa so ha6bii joomum faa teenjii, ana waawi nabude ko woni e galle mum fuu.

30 Mo waldaa e am fuu yo gajo am. Mo mooftidataa e am fuu yo caakoowo.

31 Saabe dum, mido wiya on: yimbe ana mbaawi yaafeede luutti mum'en fuu, kajum e bonkaaji fuu. Kaa bonkiido Ruuhu Ceniido oo yaafataake. 32 Neddo fuu kaaldo ko boni e 'Bii Neddo, ana waawi yaafeede, kaa neddo fuu kaaldo ko boni e Ruuhu Ceniido, yaafataake jooni, yaafataake wakkati garoyoowo.

*No lekki annditirtee bidde mum*

33 —So lekki ana moyyi, bidde mum moyyan, so lekki moyyaa, bidde mum moyyataa, sabi lekki bidde mum annditirtee. 34 Bi66e bolle bonde! Hono hen mbaawirton haalde ko moyyi tawee on bonbe? Sabi ko woni e bernde, dum yaltata e hunduko. 35 Neddo moyyo, ko moyyi iwata e ndesaari ngonndi ley bernde mum. Neddo bondo, ko boni iwata e ndesaari ngonndi ley bernde mum. 36 Mido wiya on: jannde darngal yimbe kaaltan haalaaji laaliidi di kaalnoo fuu. 37 Sabi neddo haalaaji mum sarirtee pooccitiido naa jukketeedo.

*No Farisa'en ndaardiri taagumansa*

38 Caggal dum, yoga e dunkee'en Sariya, kajum e Farisa'en mbii Iisaa:

—Moobbo, miden njidi kollaa min taagumansa Laamdo nel maa.

39 O jaabii 6e, o wii:

\* 12:21 Esaaya 42.1-4

—Jamaanu jooni bonɗo cobuɗo oo ana ndaara holleede taagumansa, kaa taagumansa fuu o hollataake so wanaa taagumansa annabi Yuunusa oo. <sup>40</sup> Sabi, no Yuunusa wadiri balde tati jemma e jalooma ley reedu liingu mawɗo oo nii, hono non Bii Nedɗo wadirta balde tati jemma e jalooma ley yanaande. <sup>41</sup> Nannde darngal, worɓe Niniwe immodoto e yimɓe jamaanu jooni ɓee, liɓa dum'en. Sabi worɓe Niniwe tuubii nde nannoo waaju Yuunusa oo ndee. Haya, burɗo Yuunusa ana ɗoo! <sup>42</sup> Nannde darngal, kaananke debbo leydi baleeri oo immodoto e yimɓe jamaanu jooni ɓee, liɓa dum'en. Sabi o iwriino faa hoore leydi, warde hettindaade haalaaji Suleymaana kebbinaafi hakkilantaaku dii. Haya, burɗo Suleymaana ana ɗoo!

### *Haala wirfitagol seyɗaani*

<sup>43</sup> —So seyɗaani yaltii e nedɗo, seyɗaani oo yiilooyo e nokkuuje joorde tewta do ɗoottinoo, kaa ɗoottere fuu o heɓataa. <sup>44</sup> Nden kaa, o wiya: «Mido nii wirfitoo galle am mo eggunoo-mi e mum oo.» So o wirfitike, o tawan galle oo yo ɓolo, ana wuuwaa, ana moyyinaa faa woodi. <sup>45</sup> Nden, o wirfitoo, o waddoya seyɗaani'en njeddon woɓɓe burɓe mo bonde. Be naata e galle oo, ɓe koda e mum. Nii battane oo nedɗo burdata arannde mum bonde. Nii yimɓe ndee fedde bonnde duu laatoytoo.

### *Inna Iisaa e mijiraaɓe Iisaa*

<sup>46</sup> Nde Iisaa haaldannoo e jamaa oo ndee, inna makko e mijiraaɓe makko worɓe njottii. Be ndarii sella, eɓe njidi yiide mo. <sup>47</sup> Won biido mo:  
—Inna maa e mijiraaɓe maa ana ndarii sella ana njidi yiide ma.

<sup>48</sup> O jaabii oon nedɗo, o wii dum:

—Homo woni innam? Hoɓe ngoni mijiraaɓe am?

<sup>49</sup> O sappii taalibaaɓe makko ɓee, o wii:

—Innam e mijiraaɓe am annii. <sup>50</sup> Sabi mijam naa innam yo nedɗo gaɗoowo sago Baabiraaɗo am gonɗo dow kammu oo.

## 13

### *Bannɗol haala aawoowo*

<sup>1</sup> Ley oon jalooma, Iisaa yalti cuudi, joodoyii daande weendu. <sup>2</sup> Jamaa keewɗo ana filii mo faa o naatoyi laana, o joodii ley makka. Yimɓe ɓee ndarii e daande ndiyam ɗam. <sup>3</sup> O haalaniri ɓe kulle keewde e banndi. Omo wiya:

—Aawoowo yalti aawoyde. <sup>4</sup> E ley sankugol ngol, yoga e aawdi ndii saami e laawol, pooli ngari cuɓi dum. <sup>5</sup> Yoga mayri saami e korokaaye do leydi heewaano, fudi don e don sabi aawdi ndii iraka gasa. <sup>6</sup> Kaa nde naange wulnoo ndee, sumi, yoori saabe walaa ɗadi. <sup>7</sup> Yoga mayri saami do kebbe puɗata. Ndi fufidi e majje, ɗe cuumi ndi. <sup>8</sup> Yoga mayri saami e leydi lobbiri, fudi, rimi: yoga sowii cowe teemedere, yoga capande jeegom, yoga capantati. <sup>9</sup> Jom nowru fuu yo nanu!

### *Ko saabii so Iisaa ana haaldira e yimɓe banndi*

<sup>10</sup> Oon wakkati, taalibaaɓe ɓee battii Iisaa lamndii mo, mbii:

—Kodum wadi so ada haaldira e maɓɓe banndi?

<sup>11</sup> O jaabii ɓe, o wii:

—Onon, on ndokkaama faamude goonga tedduɗo haala Laamu Laamɗo oo, kaa kamɓe, ɓe ndokkaaka dum. <sup>12</sup> Sabi jogiido fuu, ɓeydante faa heewa. Kaa mo walaa oo, fay seeɗa mo jogii oo teetete. <sup>13</sup> Dum saabii so mido haaldira e maɓɓe banndi:

«Tawee 6e yeewoobe, 6e njiyataa,

Tawee 6e hettintoo6e, 6e nanataa, 6e paamataa.»

<sup>14</sup> Nii ko Laamdo wadunoo e hunduko annabi Esaaya koo tabitiri e ma66e:

«On kettinto faa palon noppi, kaa on paamataa.

On yeewan faa puttinon gite, kaa on njiyataa.

<sup>15</sup> Sabi yim6e ngol leñol laatike tiidu6e ko'e:

Be cukkii noppi ma66e,

6e mu66ii gite ma66e,

so wanaa dum

gite ma66e njiyan,

noppi ma66e nanan,

hakkillaaji ma66e paaman,

6e tuuban, mi sellina 6e.»\*

<sup>16</sup> Kaa onon, on mbelii hoore: gite moodon ana njiya, noppi moodon duu ana nana! <sup>17</sup> Mido haalana on goonga: annabaa6e heew6e e foocitiib6e heew6e muuyiino yiide ko njiyaton koo, 6e njiyaali. Be muuyiino nande ko nanaton koo, 6e nanaali.

### *No Iisaa fiirtiri banndol aawoowo*

<sup>18</sup> —Ndennoo, kettinee maanaa banndol aawoowo ngol. <sup>19</sup> Neddo fuu nando haala Laamu Laamdo tawee faamaali dum, bondo oo waran, doofa ko aawaa e bernde mum koo. Kabaaru oo neddo ana nanndi e laawol do aawdi ndii saami doo. <sup>20</sup> Kabaaru aawdi saamundi e korokaaye ndii, ana nanndi e neddo nanoowo konngol ngol so jab6oroo ngol seyo don e don.

<sup>21</sup> Kaa ngol walaa dadi e makko, o nanngan ngol wakkati gooto tan. So dum billike naa so o torrike saabe konngol ngol, o yankiran don e don. <sup>22</sup> Kabaaru aawdi saamundi e kebbe ndii, ana nanndi e neddo nanoowo konngol ngol, so sugullaaji aduna e koomti jawdi cuuma ngol, ngol laatoo dimarol. <sup>23</sup> Kaa kabaaru aawdi saamundi e leydi mbelndi ndii, been ngoni nanoobe konngol ngol so paama ngol. Oon wakkati, 6e ndiman bi66e: yoga teemedere, yoga capand6e jeegom, yoga capantati.

### *Banndol haala hudo bonko ley ngesa alkama*

<sup>24</sup> Iisaa haalani 6e banndol gonngol, wii:

—Hono nii Laamu Laamdo oo wa'i: gorko aawi e ngesa mum aawdi lobbiri. <sup>25</sup> Nde yim6e fuu daaninoo, gapo oon gorko wari, aawi hudo bonko e ley gulle dee, witti. <sup>26</sup> Nde aawdi ndii fudi faa rimi, nden hudo bonko koo duu banngi. <sup>27</sup> Maccu6e 6ee njehi mbiyoyi jom ngesa oo: «Kalfaado, wanaa aawdi lobbiri aawu-daa e ngesa maa ngaa naa? Hoto koo hudo bonko iwi?»

<sup>28</sup> O jaabii 6e, o wii: «Gapo wadi nii.» Caggal dum, maccu6e 6ee lamndii mo, mbii: «Min njaha min doofoya hudo bonko koo?» <sup>29</sup> O jaabii 6e, o wii: «Wanaa non, sabi so odon doofa hudo bonko koo, so on ndeentaaki on doofidan hen alkama oo. <sup>30</sup> Accidee di faa kettal. Nden, mi wiyan hettoobe 6ee doofa hudo bonko koo tafon, 6e ngada dum kafe faa duppee. So 6e ngadi dum fuu, 6e ketta alkama oo, nden 6e moobta dum ley beembal am.»

### *Banndol haala ngeeyu buyaage*

<sup>31</sup> Iisaa haalani 6e banndol gonngol, wii:

—Laamu Laamdo oo ana nanndi e ngeeyu buyaage mo neddo bami, so aawi e ngesa mum. <sup>32</sup> Kanko buri geeyi fuu famdude, kaa so mo fudii, o laatoto lekki mawki sanne faa pooli ngara jiba cuudi mum'en e ca6e makki.

\* 13:15 Esaaya 6.9-10

*Banndol haala yuufinirdi*

<sup>33</sup> O haalani 6e banndol gonngol, o wii:

—Laamu Laamdo oo ana wa'i hono no yuufinirdi seeda ndi debbo jii6i e saawal tati conndi alkama faa ndi fuu ndi yuufi.

<sup>34</sup> Dum fuu, Iisaa haalaniri yim6e 6ee e bannndi. O haaldataa e ma66e so wanaa e bannndi. <sup>35</sup> Yalla haala ka Laamdo yottinirnoo annabaajo oo kaa ana tabita nde oon wii:

«Mi haalaniran 6e bannndi,

mi haalanan 6e kulle cuudaade gila nde aduna tagaa.»<sup>†</sup>

*No Iisaa firtiri banndol hudo bonko*

<sup>36</sup> Caggal dum, Iisaa yoppiti yim6e 6ee, naati ley suudu. Taalibaa6e makko 6ee 6attii mo, mbii mo:

—Firritan min banndol hudo bonko ngol.

<sup>37</sup> O jaabii 6e, o wii:

—Aawdo aawdi lobbiri ndii oo, oon woni Bii Neddo oo, <sup>38</sup> ngesa ngaa woni aduna oo. Bi66e Laamu Laamdo 6ee ngonni aawdi lobbiri ndii, 6i66e bondo oo ngonni hudo bonko koo. <sup>39</sup> Gajo aawdo hudo bonko oo yo Ibiliisa, kettal ngal yo timmoode aduna, hettoobe 6ee yo malaa'ika'en. <sup>40</sup> Hono no hudo bonko ittirttee wedee e yiite nii, non timmoode aduna laaortoo. <sup>41</sup> Bii Neddo oo nelan malaa'ika'en mum, itta e laamu mum oo wadoobe wo66e e luuttal, kajum e wadoobe ko boni fuu, <sup>42</sup> mbedoo dum'en e yiite jahannama, ton 6e ngullata, 6e neryondira jiiye. <sup>43</sup> Kaa e oon wakkati, fooccitiibe 6ee njalbiran no naange nii e ley Laamu Baabiraado mum'en. Jom nowru fuu, yo nanu!

*Banndol haala jawdi cuudiindi*

<sup>44</sup> —Laamu Laamdo oo ana wa'i hono no jawdi cuudiindi e ley ngesa, gorko goddo hoocci ndiin jawdi, suudi ndi kasen. E ley seyo makko ngoo, o soottoyi ko o joginoo fuu, o soodi ngesa ngaa.

<sup>45</sup> Laamu Laamdo oo ana wa'i kasen hono no julaaajo tewtoowo jaaaye dime nii. <sup>46</sup> So joomum yii jaaayre rimre heewnde coggu, soottan ko jogii fuu sooda jaaayre ndee.

*Banndol haala liddi*

<sup>47</sup> —Laamu Laamdo oo ana wa'i kasen hono no bubbol bedaangol e geeci, so nanngi sii liddi fuu nii. <sup>48</sup> Faa ngol heewi, summoobe 6ee poodi ngol faa e danjeere, ana cu6a liddi dii. Be ngadi liddi lobbii dii e ley cagiije, 6e mbedii di nafataa fay huunde dii. <sup>49</sup> Hono non timmoode aduna laaortoo. Malaa'ika'en ngaran ceennda bon6e e moyyu6e, <sup>50</sup> mbedoo bon6e 6ee e ley yiite jahannama, ton been ngullata 6e neryondira jiiye.

*Banndol haala kulle kese e kiidde*

<sup>51</sup> Iisaa lamndii 6e, o wii:

—On paamii dum fuu naa?

Be njaabii, 6e mbii:

—Min paamii.

<sup>52</sup> Caggal dum, o wii 6e:

—Jannginoowo Sariya fuu laatiido taalibbo Laamu Laamdo, ana wa'i hono no jom galle jaltinoowo e ley ndesaari mum kulle kese e kulle 6ooyde nii.

*No Nasaraatunkoobe calorii jafande Iisaa*

<sup>†</sup> 13:35 Jabuura 73.2



<sup>53</sup> Nde Iisaa tilinoo e d̄iin banndi ndee, o iwi ton, <sup>54</sup> o hooti ngeenndi do o mawni doo, omo waajoo e suudu ma66e waajordu. Haaynii yim6e hettintoobe 6ee sanne, ndarii ana mbiya:

—Hoto fuu o he6i ngal anndal? Hono hen o he6iri baawde wadude d̄ii kaayeeffiji? <sup>55</sup> Tama o wanaa 6ii cehoowo ledde oo? Tama wanaa Mariyama woni inniiko? Tama o wanaa mawnii Yaakuuba e Yuusufu e Simon, kaɓum e Yahuuda? <sup>56</sup> Tama wanaa enen e banndiraa6e makko rew6e kodi? Ndenoo, hoto o he6i dum fuu?

<sup>57</sup> Dum saabanii 6e tippitaade mo. Caggal dum, o wii 6e:

—Annabaajo ana teddinaa e nokkuuje dee fuu, so wanaa ley ngeenndi mum'en, kaɓum e ley galle mum'en.

<sup>58</sup> Iisaa wadaali don kaayde keewde saabe waasude ma66e goondinde mo.

## 14

### *No Yaayaa maayiri*

<sup>1</sup> E oon wakkati, Hirudus hooreejo leydi Galili oo nani haala Iisaa ana haalee. <sup>2</sup> O wii golloobe makko:

—Dum Yaayaa mo lootogal batisima! O wuurtii. Dum saabii so omo jogii baawde wadude kaayde.

<sup>3</sup> Tawi Hirudus yamiriino Yaayaa nanngée, ha66ee, uddee ley kasu, kam-mari Hirudiya jom suudu mawniiko biyeteedo Filipa. <sup>4</sup> Sabi Yaayaa ana wiyannoo Hirudus:

—Dagantaako ma teetaa Hirudiya, sabi o gen mawna.

<sup>5</sup> Hirudus yidi warde mo kaa suusaano yim6e 6ee, sabi 6e fuu e6e njogori-noo Yaayaa yo annabaajo.

<sup>6</sup> Dum nee, ɓannde yiitu-mawuuri rimeede Hirudus, 6ii Hirudiya debbo darii ana woma yeeso nootii6e mo 6ee. Hirudus weltii sanne, <sup>7</sup> faa hunii hokkan mo huunde fuu ko o ɓaagii. <sup>8</sup> Suka debbo oo jokki haala inna mum, wii Hirudus:

—Waddanam doo hoore Yaayaa mo lootogal batisima oo e la'al!

<sup>9</sup> Hirudus yoomi, kaa nde wonnoo hunike yeeso nootii6e dum 6ee, yamiri oon waddanee nde. <sup>10</sup> Oon wakkati fuu, o yamiri hoore Yaayaa tayoyee ley kasu too. <sup>11</sup> Hoore ndee taya'a tummbaa e la'al, hokkaa suka debbo oo. Oon hokkoyi nde inna mum. <sup>12</sup> Taalibaa6e Yaayaa 6ee ngari 6amti tew oo, iroyi. Caggal dum, 6e njehi 6e kaalanoyi Iisaa ko wadi koo.

### *No Iisaa ɓamminiri ujunaaji joy neddo*

<sup>13</sup> Nde nanirde ndee warnoo e Iisaa ndee, Iisaa iwi ton naati laana, fa'i nokku teeldo, kaɓum tan. Yim6e 6ee kumpitii dum, njalti e geelle dee, cawndii daande weendu nduu, njokki e makko. <sup>14</sup> Nde o yalti e laana kaa ndee, o yii jamaa keewdo, o yurminaa 6e sanne, heddi omo sellina ɓaw6e ma66e. <sup>15</sup> Nde hiiri ndee, taalibaa6e 6ee 6attitii Iisaa, mbii dum:

—Jooni hiirii, kasen duu nokku oo yo ladde. Yoppitin jamaa oo, yalla ana coodoya ko ɓaama to geelle too.

<sup>16</sup> O jaabii 6e, o wii:

—Fotaa ko 6e njaha. Onon e ko'e moodon, ndokkee 6e ko 6e ɓaama!

<sup>17</sup> Be njaabii mo, 6e mbii:

—En ngalaa doo so wanaa buuruuje joy e lidfi d̄ifi.

<sup>18</sup> O wii 6e:

—Ngaddanee kam dum gaa.

<sup>19</sup> O yamiri yimbe 6ee njoodoo e huɗo, o ɓami buuruuje joy ɗee e liɗɗi ɗiɗi ɗii, o tiggiti kammu, o yetti Laamɗo. O tayi buuru oo, o hokki taalibaaɓe 6ee ndokka jamaa oo. <sup>20</sup> Be fuu 6e jaami faa 6e keddi. Taalibaaɓe 6ee ndeentini taye keddiɗe ɗee, ɗe kebbini cagiije sappo e ɗiɗi. <sup>21</sup> Naamnoobe 6ee ana mbaara e ujunaaji joy gorko ko walɗaa e rewbe e sukaaɓe.

### *No Iisaa yaariri koyɗe dow ndiyam*

<sup>22</sup> Don e don, o naanni taalibaaɓe 6ee e laana kaa yalla ana adoo mo lummbude weendu nduu, tawi kanko omo wondi e yoppitinde jamaa oo. <sup>23</sup> Caggal o yoppitii 6e, o njabboyi dow waamnde haayre faa o waɗa duwaawu kanko tan. Naange yanii, tawi kanko tan woni ton. <sup>24</sup> Laana kaa yehi faa wodɗii ɗanɗeere ndee, tawi hembpeeje ana piya ka, sabi ka jaɓɓotooka henndu. <sup>25</sup> Nde ɓadiɗoo weetude ndee, o wari e taalibaaɓe 6ee, omo yaara koyɗe dow ndiyam ɗam. <sup>26</sup> Kaa nde 6e njii mo omo yaha e dow ndiyam ɗam ndee, kulol manngol nanngi 6e, 6e mbii:

—Dum yo seyɗaani!

Be ndarii eɓe conkina no 6e poti hulde. <sup>27</sup> Don e don Iisaa wii 6e:

—Mbaaltinee hakkillaaji moodon! Dum miin, pati kulee!

<sup>28</sup> Piyeer jaabii mo, wii:

—Moobbo, so ɗum aan jaati woni ɗoo, yamir mi yaha dow ndiyam ɗam mi wara to maa.

<sup>29</sup> O jaabii mo, o wii:

—War!

Piyeer yalti laana kaa, hedde ana yaha dow ndiyam ɗam, fewti Iisaa. <sup>30</sup> Kaa nde mo yiinoo henndu nduu sattii ndee, o huli, o fuɗɗi yorkitaade, o wulli, o wii:

—Moobbo, nootam!

<sup>31</sup> Don e don, Iisaa foocci junngo mum, nanngi mo, wii:

—Nii pamɗir-ɗaa hoolaare? Ko saabii so cikki-ɗaa?

<sup>32</sup> Be ɗiɗon fuu, 6e naati laana kaa tan, henndu nduu darii. <sup>33</sup> Taalibaaɓe wonnoobe ley laana kaa 6ee cujidani mo, mbii:

—A Bii Laamɗo jaati!

### *No Iisaa selliniri jawbe ley leydi Genesaret*

<sup>34</sup> Be lummbi weendu nduu, 6e panndi leydi Genesaret. <sup>35</sup> Worbe oon nokku annditi mo, kaalani leydi ndii fuu garol makko, o waddanaa jawbe 6ee fuu. <sup>36</sup> Be jaagii mo mo acca jawbe 6ee mema fay so kommbol saaya makko tan. Haya duu, memɗo ngol fuu sellii.

## 15

### *Haala neesu njaatiraaɓe*

<sup>1</sup> Farisa'en e dunkee'en Sariya iwi Urusaliima, ngari e Iisaa lamndii dum, mbii:

<sup>2</sup> —Kodum waɗi so taalibaaɓe maa 6ee ana koyna neesuuji njaatiraaɓe meeden ɗii? Sabi 6e lootataa juude fade maɓɓe jaamɗe.\*

<sup>3</sup> O jaabii 6e, o wii:

—Onon nee, kodum waɗi so oɗon luutta yamiroore Laamɗo ndee faa njokkon neesu moodon? <sup>4</sup> Sabi Laamɗo wii: «Teddin inna maa e baam maa.»† O wii kasen: «Kudufɗo baam mum naa inna mum, wareede laato jukkungo

\* **15:2** Ngol lootugol juude haɓɓaaki e ittude tuundi, kammari faa joomum foocitanoo diina waɗiraa.

† **15:4** Pergu 20.12; Fillitagol Tawreeta 5.16

mum.»<sup>†</sup> <sup>5</sup> Kaa onon, odon mbiya so neddo wii baam mum naa inna mum: «Ko kaannoo-mi wallirde ma koo yo ngedu Laamdo», <sup>6</sup> dum ana heya neddo, fotaa ko teddina saaraa mum kasen. Hono non tosirton konngol Laamdo, faa njokkon neesu moodon! <sup>7</sup> Naafigi'en! Annabi Esaaya woofaali fey nde sappinoo e moodon so wii:

<sup>8</sup> «Laamdo wii:

Ngol lejol e haala tan teddinirta kam,  
kaa e ley berde ma66e e6e ngoddi kam.

<sup>9</sup> Meere 6e ndewata kam,

sabi ko 6e tuugii e ley janningol ma66e koo yo jamirooje yim6e tan.»<sup>§</sup>

### *Haala ko sobinta neddo*

<sup>10</sup> Oon wakkati, Iisaa noddi jamaa oo, wii dum:

—Kettinee, paamee: <sup>11</sup> wanaa ko naatata e hunduko neddo sobinta dum. Ko yaltata e hunduko sobinta neddo.

<sup>12</sup> E oon wakkati, taalibaa6e 6ee battitii mo, mbii mo:

—Tama a anndii Farisa'en 6ee mettaama e haalaaji maa dii?

<sup>13</sup> O jaabii, o wii:

—Funngo fuu ngo Baabiraado am gondo dow kammu oo aawaali, doofete.

<sup>14</sup> Accee 6e, 6e wum6e dowoo6e wum6e! So bumdo dowii bumdo, 6e didon fuu 6e caaman ley ngaykaare.

<sup>15</sup> Piyeer jaabii, wii mo:

—Firritan min kaa haala.

<sup>16</sup> Iisaa wii:

—Onon duu, faa jooni edum finkinii on naa? <sup>17</sup> On paamaali ko naati e hunduko fuu yahan ley reedu, kasen duu dum yehete ladde? <sup>18</sup> Kaa ko yaltata e hunduko koo e bernde iwata, dum jaati sobinta neddo. <sup>19</sup> Sabi e bernde neddo miilooji bondi iwata so ndunya dum e jaako'aaku e jeenu e faasigaaku e nguyka e kappi, katum e mbonka. <sup>20</sup> Dum woni ko sobinta neddo. Kaa jaamde tawee lootaali juude mum no 6e mbii nii sobintaa neddo.

### *No debbo Kanaanke goondiniri Iisaa*

<sup>21</sup> Caggal dum, Iisaa iwi don fa'i seraaji Tirus e Sidon. <sup>22</sup> Debbo jeyaado Kanaana kodudo e ndiin leydi wari e makko, wulli, wii:

—Moobbo, taanii Daawuuda, yurmam! Biyam debbo ladde ana e mum, ana torra dum sanne!

<sup>23</sup> Kaa o jaabaaki dum fay huunde. Taalibaa6e makko 6ee ndaardoyi mo, mbii mo:

—Ribbu mo dee! Omo nii jokki e meeden tan omo wulla.

<sup>24</sup> Iisaa jaabii, wii:

—E baali suudu Israa'iila majjudi dii tan nelaa-mi.

<sup>25</sup> Nii debbo oo saami yeeso makko, sujidi, wii:

—Moobbo, wallam!

<sup>26</sup> O jaabii, o wii:

—Bamde jaamdu sukaa6e so tippoo dawaadi moyyaa.

<sup>27</sup> Debbo oo wii:

—Goonga, Moobbo, kaa fay dawaadi ana jaama jaamdu joomum'en iwooru e la'al so saama nduu.

<sup>28</sup> Nden, Iisaa jaabii mo, wii:

—Debbo, hee goondinal maa ana mawni! Yo a wafane no njidir-daa nii.

E oon wakkati jaati, 6iyiiko debbo oo selli.

### *No Iisaa selliniri jawbe heewbe*

<sup>29</sup> Iisaa iwi don, takkii daande weendu Galili, nabbi waamnde haayre, joodii ton. <sup>30</sup> Yimbe heewbe ngari to makko, ngaddi layooobe e wumbe e 6e terde mum'en mbaati e muumdube, kajum e jawbe wobbe heewbe. Be battini been yeeso makko, o sellini 6e. <sup>31</sup> Haaynii yimbe 6ee sanne nde njiinoo muumdunoo ana kaala, 6e terde mum'en mbaati cellii, layannoobe ana njaha faa gasa, wumnoobe ana njiya. Hedde ebe njetta Laamdo Israa'ila oo.

### *No Iisaa jamminiri ujunaaji nay neddo*

<sup>32</sup> Iisaa noddi taalibaa6e mum 6ee, wii 6ee:

—Bee yimbe ana njurminii kam, sabi hannde woni balde tati ko 6e ngondi e am, haya duu 6e ngalaa ko 6e jaama. Mi waawaa yoppitinde 6e tawee 6e jaamaali, pati 6e caama yolbere e laawol so ebe koota.

<sup>33</sup> Taalibaa6e makko 6ee mbii mo:

—Hoto fuu kebaten ko jamminen oo jamaa e ley ndee ladde jeereende?

<sup>34</sup> O lamndii 6e, o wii:

—Hono foti buuruuje njogi-don?

Be njaabii mo, 6e mbii:

—Jeddi, kajum e liikoy seeda min njogii.

<sup>35</sup> Caggal dum, o yamiri jamaa oo joodoo e leydi. <sup>36</sup> O 6ami buuruuje jeddi dee kajum e liikoy koy, o yetta Laamdo, o tayi de, o hokki taalibaa6e 6ee ndokka dum jamaa oo. <sup>37</sup> Be fuu 6e jaami faa 6e keddi. Taalibaa6e 6ee ndeentini kedde dee, de kebbini cagiije jeddi. <sup>38</sup> Naamnoobe 6ee yo ujunaaji nay gorko, ko waldaa e rewbe e sukaa6e. <sup>39</sup> Caggal Iisaa yoppitii yimbe 6ee, naati laana, fa'i leydi Magadan.

## 16

### *No Farisa'en jaagorii kollee haaynde*

<sup>1</sup> Farisa'en e Saduki'en ngari ittude koro Iisaa, 6e ndaardi mo o holla 6e taagumansa kaayniido iwoowo dow kammu. <sup>2</sup> O jaaborii 6e nii:

—So on njii kammu ana wojji kiikiide, on mbiyan welan. <sup>3</sup> Beete law, so on njii kammu ana wojji ana ni66i, on mbiyan tofan. Odon mbaawi seenndude mbaadi kammu, kaa on mbaawaa seenndude taagumansaaji wakkatiiji dii! <sup>4</sup> Jamaanu jooni bondo cobudo oo ana ndaara holleede taagumansa, kaa taagumansa fuu o hollataake, so wanaa taagumansa annabi Yuunusa oo.

Caggal dum, o yoppi 6e don, o witti.

### *Haala yuufinirdi Farisa'en e Saduki'en*

<sup>5</sup> Nde taalibaa6e 6ee lummbata weendu nduu ndee, njeggiti yoo6aade jaamdu. <sup>6</sup> Iisaa wii 6e:

—Kakkilee, ndeentee e yuufinirdi Farisa'en e Saduki'en ndii.

<sup>7</sup> Taalibaa6e 6ee ndarii ana mbiyondira:

—Ko en njoobaaki buuru koo o wiiri non.

<sup>8</sup> Iisaa anndi ko 6e kaalata koo, wii 6e:

—Ko wadi so odon kaalda hakkunde moodon on njoobaaki buuru mbiiru-mi non? Onon famdube hoolaare! <sup>9</sup> Tama faa jooni on paamaali? Tama on miccitaaki buuruuje joy de njedu-mi e ujunaaji njoyon gorko dee, e cagiije de kebbin-don kedde dee? <sup>10</sup> Tama on miccitaaki kasen buuruuje jeddi de njedu-mi e ujunaaji nay neddo dee, e cagiije de kebbin-don kedde dee? <sup>11</sup> Hono

wadi on paamaali wanaa haala buuru kaalanan-mi on? Ndeentee e yuufinirdi Farisa'en e Saduki'en ndii.

<sup>12</sup> Oon wakkati, taalibaafe 6ee paami o wiyaali 6e ndeentoo e ko yuufinta buuru koo, ko o wii dee, 6e ndeentoo e ko Farisa'en e Saduki'en njanginta koo.

### *No Piyeer seedorii Iisaa woni Almasiihu*

<sup>13</sup> Iisaa yehi leydi Kaysariya Filipa. O lamndii taalibaafe makko 6ee, o wii: —Homo yimbe mbiyata 'Bii Neddo oo woni?

<sup>14</sup> 'Be njaabii, 6e mbii:

—Won wiyoo6e a Yaayaa mo lootogal batisima, won wiyoo6e a annabi Iliyaasa, won wiyoo6e kasen a annabi Yeremiya naa gooto e annabaaf 6ee.

<sup>15</sup> O wii 6e:

—Onon nee, homo mbiyat ongon-mi?

<sup>16</sup> Simon Piyeer jaabii mo, wii:

—Aan woni Almasiihu, 'Bii Laamdo guurdo oo.

<sup>17</sup> Nden Iisaa wii mo:

—A welii hoore, aan Simon 6ii Yuunusa. Sabi wanaa 6ii-aadama anndin maa dum, Baabiraado am gondo dow kammu oo anndin maa dum. <sup>18</sup> Miin duu, mido wiye Piyeer (dum woni haayre), e dow nden haayre mahan-mi deental am goondin6e ngal. Maayde e heewde semmbe fuu walaa ko waawi e mayre. <sup>19</sup> Mi hokkete cokitirde Laamu Laamdo: huunde fuu ko kadu-daa e leydi, hadete dow kammu. Ko njaabu-daa e leydi, ja6ete dow kammu.

<sup>20</sup> Nden, Iisaa daalii taalibaafe mum 6ee pati kaalana fay gooto kajum woni Almasiihu oo.

### *No Iisaa sapporii maayde mum e wuurtugol mum*

<sup>21</sup> Gila e oon wakkati, Iisaa fuddi anndinde taalibaafe mum 6ee ana tilsii mo yaha Urusaliima, ton maw6e lejol e hoore6e yottino6e sadaka e dunkee'en Sariya torran mo sanne, mo waree, kaa mo wuurtan jannde tatabere. <sup>22</sup> E ley dum, Piyeer sawndintini mo hedde ana jinja mo, wii mo:

—Yo Laamdo dannde Moobbo! Dum hebataa ma!

<sup>23</sup> Iisaa yeecitii, wii Piyeer:

—Woddam aan Ibiliisa! A fergitere e laawol am, sabi miiloo maa ngoo iwrataa to Laamdo, to yimbe ngo iwrata!

### *No Iisaa jokkirtee*

<sup>24</sup> Caggal dum, o wii taalibaafe makko 6e:

—Muuydo jokkude kam fuu, njoota yurmaade hoore mum, fama legal mum bardugal\* jokka e am. <sup>25</sup> Sabi muuydo danndude yonki mum, waasan ki. Kaa baasirde ki sabaabu am, hisinan ki. <sup>26</sup> Kodum hebude aduna oo fuu nafata neddo, so waasii yonki mum? Won ko neddo waawi hokkitirde faa soottitoo yonki mum naa? <sup>27</sup> Sabi 'Bii Neddo oo wardan e malaa'ika'en mum e ley teddeengal Baabiraado mum. Oon wakkati, o barjoto gooto fuu ko waarata e golle mum. <sup>28</sup> Mido haalana on goonga: yoga e won6e doo 6ee maayataa tawee njijaali 'Bii Neddo oo ana wara e ley laamu mum.

## 17

### *No noone Iisaa waylitorii*

<sup>1</sup> Balde jeegom caggal mum, Iisaa yaadi e Piyeer e rimdaaf 6e didon Yaaku-uba e Yuhanna, o teeldoyi e mum'en dow waamnde haayre toownde.

\* 16:24 Yeew Matta 10:38

<sup>2</sup>Noone makko waylitii yeeso ma66e. Yeeso makko ana jalba no naange nii, kaddule makko ndawni far hono fooyre. <sup>3</sup>Muusaa e Iliyaasa 6anngani 6e, ana kaalda e makko. <sup>4</sup>Piyeer wii Iisaa:

—Moobbo, gonal amen doo ana moyyi. Dal mi darna doo buguuji tati: aan wooturu, Muusaa wooturu, Iliyaasa wooturu.

<sup>5</sup>O tilaaki haalde, faa luurde jalboore suddi 6e. Daande iwi ley luurde ndee, wii:

—Oo doo yo Biyam mo korsin-mi, mo cu6ii-mi. Kettindee mo!

<sup>6</sup>Nde taalibaa6e 6ee nani nden daande ndee, 6e caami 6e kippii e leydi, 6e kuli sanne. <sup>7</sup>Iisaa 6attitii 6e, memi 6e, wii:

—Immee, pati kulee.

<sup>8</sup>E ley dum, 6e kunci gite, 6e njiyaali fay gooto so wanaa Iisaa tan.

<sup>9</sup>E ley ko 6e njippotoo waamnde haayre ndee koo, Iisaa daalii 6e, wii:

—Pati kaalane fay gooto ko njii-don koo faa wakkati nde Bii Neddo oo immitii e hakkunde maay6e fuu.

<sup>10</sup>Caggal dum, taalibaa6e 6ee lamndii mo, mbii:

—Kodum wadi so dunkee'en Sariya 6ee ana mbiya annabi Iliyaasa haani adaade Almasiihu warde?

<sup>11</sup>O jaabii 6e, o wii:

—Goonga, Iliyaasa adotoo warde moyyintina kulle dee fuu. <sup>12</sup>Kaa mido wiya on: Iliyaasa ya66ike, 6e annditaali dum, 6e ngollii dum ko 6e muuyi fuu. Hono non 6e torrirta Bii Neddo oo duu.

<sup>13</sup>Taalibaa6e 6ee paami ko o haalata haala Iliyaasa koo, haala Yaayaa mo lootalgal batisima o haalani dum'en.

### *No Iisaa selliniri kirikiraa6o*

<sup>14</sup>Nde 6e ngarti e jamaa oo ndee, gorko gooto 6attitii mo, diccii yeeso makko, <sup>15</sup>wii:

—Moobbo, yurma 6iyam gorko! O kirikiraa6o omo tampi sanne, wakkati-iji omo saama e yiite naa e ndiyam. <sup>16</sup>Mi na6ii mo to taalibaa6e maa 6ee kaa 6e ndonkii sellinde mo.

<sup>17</sup>O 6attitii, o wii:

—Hey yim6e jamaanu bondo 6e nganaa goondin6e! Faa mande tilotoo-mi e mon? Faa mande keddotoo-mi mujande on? Ngaddanee kam cukalel ngel doo!

<sup>18</sup>O jahii e ladde ndee, nde yalti e suka oo, o selli don e don.

<sup>19</sup>Caggal dum, taalibaa6e 6ee teeldi e makko, lamndii mo, mbii:

—Kodum wadi so min ndonki ittude ndee ladde?

<sup>20</sup>Iisaa jaabii 6e, wii:

—Saabe odon pamdi goondinal wadi dum. Mido haalana on goonga: so goondinal moodon fotii fay no ngeeyu buyaage nii, so on mbii ndee doo waamnde haayre: «Sottu doo, njahaa too», nde sottan. Fay huunde on ndonkataa wadude. [ <sup>21</sup>\* ]

### *No Iisaa sapporii kasen maayde mum e wuurtugol mum*

<sup>22</sup>No 6e njiilortoo e ley Galili nii, Iisaa wii 6e:

—Bii Neddo oo wafete e juude yim6e, <sup>23</sup>6e mbara mo, kaa e ley jalaande majjum tata6ere, o immitoto.

Taalibaa6e 6ee cunjli sanne.

### *Haala yo6ugol usuru Suudu Dewal Mawndu*

\* **17:21** E dereeji booydi dfi, yoga ana beyda aaya 21:Kaa hono oo seydaani ribbirtaake so wanaa duwaawu e kooraka.

24 Nde Iisaa e taalibaaʼe mum njottinoo Kafarnahum ndee, nanngooʼe usuru Suudu Dewal Mawndu ʼee 6attii Piyeer, mbii ʼum:

—Tama moobbo moodon oo ana yoba usuru Suudu Dewal Mawndu?

25 Piyeer jaabii, wii:

—Omo yoba.

Ko Piyeer naati galle oo koo, fade mum heʼude haala, Iisaa wii:

—Simon, kodum woni miilo maa e ʼum? Kaanankooʼe aduna ʼee, homo ʼe nduujata? Homo ʼe njobinta lampo? Dugule'en naa honaaʼe?

26 Piyeer jaabii, wii:

—Honaabe ʼee.

Iisaa wii mo:

—Ndennoo, dugule'en ʼee kaanaa yobude. 27 Kaa noo, en njidaa mettinde berde ʼee yimʼe. Yaa to weendu too, tippo-daa yammbuure maa e ley ndiyam dam. Liingu fuu adiiɗo moɗude nde poodaa, yehjinaa ʼum aaraa hunduko mum, a tawan hen kaalisi daneejo kibbinoowo usuru meeden. Ittaa njobanaa en, enen diɗon.

## 18

### *Haala burɗo teddude ley Laamu Laamɗo*

1 Oon wakkati, taalibaaʼe ʼee 6attitii Iisaa, lamndii ʼum, mbii:

—Homo buri teddude ley Laamu Laamɗo oo?

2 Iisaa noddi cukalel, darni ngel yeeso maʼʼe, 3 wii:

—Miɗo haalana on goonga: so nii on mbaylitaaki faa nanndon e cukaloy, on naatataa e Laamu Laamɗo oo abada. 4 Burɗo teddude ley Laamu Laamɗo yo leyɗinkiniido faa nanndi e ngel cukalel. 5 Nedɗo fuu jaɓɓiido cukalel gootel hono ngel e innde am, miin jaati o jaɓɓii.

### *Haala ko luuttinta yimʼe*

6 —Nedɗo fuu luuttindo gootel e koy cukaloy goonɗinkoy kam, ko buri moyyande joomum haayre teddunde haʼʼee e daande mum, yoolee ley iduru geeci.

7 Bone woodanii oo aduna saabe kulle gaɗooje yimʼe ley luutti dee! Waa-jibi kulle dee ngada, kaa bone woodanii laatiido sabaabu majje! 8 So tawii junngo maa naa koyngal maa luuttinte, tayu ʼum tippo-daa to wodɗi. Naataa e nguurndam nduumiidam a jakuɗo buri moyyande ma diina tippeede e yiite duumiinge a kibɓuɗo. 9 So tawii yitere maa luuttinte, sol nde tippo-daa. Sabi naatude maa e nguurndam nduumiidam a dokko, buri moyyande ma diina tippe-daa e yiite jahannama a kibɓuɗo.

### *Banndol haala mbaalu majjuɗo*

10 —Ndeentee e yawde fay gootel e koy cukaloy. Sabi miɗo wiya on: malaa'ika'en makkoy dow kammu ʼee, wakkati fuu ana yeewa yeeso Baabi-raaɗo am gondo dow kammu oo. [ 11 \*] 12 Ko miilaton? So nedɗo ana jogii baali teemedere majjiraama mbaalu gooto, yoppataa capande jeenay e jeenay dii fuu ana ndura ley ferro, tewtoya majjuɗo oo? 13 Miɗo haalana on goonga: so o yiitii mo, o seyorto oon faa bura capande jeenay e jeenay di majjaali dii. 14 Hono non Baabiraado moodon gondo dow kammu oo yidaa fay gootel e koy cukaloy majja.

### *Haala jaafondiral hakkunde sakiraabe*

\* 18:11 E dereeji 6ooyɗi dii, yoga ana 6eyda aaya 11:Sabi hisinde majjuʼe waddi Bii Nedɗo oo.

15 —So sakiike maa toojii ma, yaa to mum kollitaa dum toojannge mum oo tawee onon tan didon. So o jabanii ma, a hewtii sakiike maa. 16 Kaa so o jabaali kollitaa mo yaadu e neddo gooto naa yimbe didon hono no Binndi dhi mbiiri nii: «Huunde fuu ko neddo happaa ana hasindini e seedaaku yimbe didon naa taton.» 17 So o jabanaali ma, haalan dum deental goondinbe ngal. So o salike jabande deental goondinbe ngal, jogora mo keefeero naa duwaajne. 18 Mido haalana on goonga: huunde fuu ko kadu-don e leydi, hadete dow kammu. Huunde fuu ko nja6u-don e leydi, jabete dow kammu. 19 Mido haalana on kasen: e ley aduna, nde didon mon kawritii e dow huunde wootere jaagike Laamdo, ko nde waawi laataade fuu, Baabiraado am gondo dow kammu oo hokkan be nde. 20 Sabi nde didon naa taton kawriti e innde am fuu, mido hakkunde mum'en.

### *Banndol haala golloowo caliido yaafaade*

21 Oon wakkati, Piyeer battitii mo, lamndii mo, wii:

—Moobbo, cili hono foti kaan-mi yaafaade sakiike am mo noottaali toojude kam? Cili jeddi naa?

22 Iisaa jaabii mo, wii:

—Mi wiyaali ma cili jeddi, mbii-maa-mi cili capande jeddi faa nde cili jeddi.

23 Iisaa beydi hen wii:

—Dum Laamu Laamdo nanndi: kaananke gooto anniyii yamtude golloo6e mum jamaande. 24 Nde mo fuddi yamtude ndee, o waddanaa golloowo gooto mo o rewata miliyooji. 25 Oon gorko walaa ko yobira oon kaalisi. Dum nee, kaananke oo yamiri o soottee, kanko e jom suudu makko e sukaa6e makko e ko o jogii fuu, faa yoba jamaande ndee. 26 Golloowo oo diccii yeeso makko, jaagii mo, wii: «Mujanam, mi yobete fuu!» 27 Kaananke oo yurmii mo, yaafii mo jamaande ndee, yoppi mo o witti.

28 Golloowo oo yalti tan, hawri e gollidiido mum mo rewata kaalisi seeda. O te6bii dum, o nanngi daande mum, o wii: «Yobam kaalisi am!» 29 Gollidiido makko oo diccii, jaagii mo, wii: «Mujanam, mi yobete!» 30 Kaa oon jabaali. O uddoyi dum kasu, faa nde yobi jamaande ndee fuu. 31 Nde golloo6e heddiibe 6ee njii dum ndee, mettaa sanne, njehi kaalanoyi dum kaananke oo. 32 E ley dum, kaananke oo noddi golloowo oo, wii dum: «Aan a golloowo bondo! Nde jaagi-daa kam, mi yaafe ko ndewan-maa-mi koo ndee, mi yaafike ma. 33 Aan duu, a haanaanoo yurmaade jaado maa oo no njurmori-maa-mi nii naa?» 34 Kaananke oo bilaa sanne, wadi mo e juude jukko6e 6ee, faa nde o yobi jamaande ndee faa laafi.

Iisaa beydi hen wii:

35 —Hono non Baabiraado am gondo dow kammu oo wadata neddo fuu e moodon mo yaaforaaki sakiike mum bernde laa6unde.

## 19

### *Haala ko Iisaa wasii dow ceergal*

1 Nde Iisaa tilii e diin waajuuji ndee, iwi Galili fa'i bannge Yahuudiya gondo caggal maayo Urdun oo. 2 Yimbe heew6e njokki e makko, o sellini ton jaw6e mum'en.

3 Yoga e Farisa'en ngari e makko, lamndii mo dum doo faa itta koro makko: —Tama ana daganii gorko seerdude jom suudu mum daliili tawaado fuu?

4 O jaabii, o wii:



—Tama on njanngaali ko Binndi dii mbii? E fuddoode Laamdo tagii 6e wadii 6e gorko e debbo, <sup>5</sup> wii: «Dum wadi so gorko yoppaan inna mum e baam mum, nanngondira e jom suudu mum, 6e didon fuu 6e laatoo neddo gooto.»\*

<sup>6</sup> Nii woni 6e nganaa didon kasen, 6e neddo gooto. Ndennoo, pati neddo seennu ko Laamdo reentini.

<sup>7</sup> Be lamndii mo, 6e mbii:

—Ko saabii so Muusaa yamiri gorko hokka jom suudu mum talkuru ceergal nde ana seera dum?

<sup>8</sup> O jaabii 6e, o wii:

—On yoor6e berde, dum saabii so Muusaa hokki on no ceerdon rew6e moodon. Kaa e fuddoode, wanaa non worrunoo. <sup>9</sup> Mido wiya on: ceerdudo jom suudu mum ko wanaa fijirde, so 6amii debbo goddo, jeenii.

<sup>10</sup> Taalibaa6e makko 6ee mbii mo:

—So nii hakkunde gorko e debbo worri, waasude 6amde furi.

<sup>11</sup> Iisaa jaabii 6e, wii:

—Wanaa yim6e fuu mbaawi ja6ude kaa haala, 6e Laamdo hokki dum 6ee tan mbaawi ja6ude ka. <sup>12</sup> Daliliiji kadooji wor6e 6amde ana ngoodi. Sabi won wor6e rimete6e tawa yo waatoraa6e. Won derete6e. Heddi6e 6ee noo, kaɲum'en kadi ko'e mum'en 6amde faa ngollana Laamu Laamdo oo. Neddo fuu jarriido ndee tinndinoore, yo ja6u!

### *No Iisaa duwanorii cukaloy*

<sup>13</sup> Caggal dum, won waddan6e Iisaa cukaloy yalla omo fawa e makkoy juude makko o duwanoo koy, kaa taalibaa6e 6ee njahii e yim6e 6ee. <sup>14</sup> Nden o wii:

—Accee cukaloy koy ngara e am, pati ka6ee koy, sabi wa'u6e no makkoy nii 6ee njeɲ Laamu Laamdo oo.

<sup>15</sup> O fawi junngo makko dow makkoy, o duwanii koy. Nden o iwi ton.

### *No Iisaa e suka jokolle arsukunte ngaddi*

<sup>16</sup> Gorko gooto 6attitii Iisaa, lamndii mo, wii:

—Moobbo, honde huunde moyyunde kaan-mi wadude faa mi he6a ngu-urndam nduumiidam?

<sup>17</sup> Iisaa wii mo:

—Ko saabii so laamdi-ɗaa kam ko moyyi? Laamdo tan woni moyyo! So aɗa yidi naatude e nguurndam, jokku sariyaaji dii.

<sup>18</sup> Gorko oo lamndii Iisaa, wii:

—Hodi ngoni sariyaaji dii?

Iisaa jaabii, wii:

—Pati ɲaadu hoore, pati jeenu, pati wujju, pati seeda fenaande, <sup>19</sup> teddin inna maa e baam maa, njidira tanaa maa no njidir-ɗaa hoore maa nii.

<sup>20</sup> Suka jokolle oo wii mo:

—Mido haybi dum fuu. Kodum heddi?

<sup>21</sup> Iisaa wii mo:

—So tawii aɗa yidi hi66ude, yaa soottoy ko njogi-ɗaa fuu, ndokkaa kaalisi oo misikiina'en. Nden a he6an jawdi dow kammu. Caggal dum, ngaraa njokkaa kam.

<sup>22</sup> Nde suka jokolle oo nani diin haalaaji ndee, yaadi e yoomeende, sabi o arsukunte ɲoldo.

<sup>23</sup> E ley dum, Iisaa wii taalibaa6e mum 6ee:

\* 19:5 Puɗɗoode 2.24

—Midó haalana on goonga: hee naatugol arsukunte e Laamu Laamdo ana tiidi! <sup>24</sup> Midó haalana on kasen dum doo: ngelooba ya66oroo e wuddere mesalal buri newaade diina naatugol arsukunte e Laamu Laamdo.

<sup>25</sup> Haayni taalibaa6e 6ee sanne nde nani diin haalajii ndee, 6e mbii:

—Ndennoo, homo woni kisoowo?

<sup>26</sup> O yeewi 6e, o wii:

—Do yim6e dum laatataako, kaa walaa fuu ko Laamdo waawaa.

<sup>27</sup> Piyeer 6ami haala, wii mo:

—Minen, min njoppii fuu, min njokkii e maa. Kodum min ke6oyta?

<sup>28</sup> Iisaa wii 6e:

—Midó haalana on goonga: so Bii Neddo oo joodiima e joodorgal mum laamu teddungal ley aduna keso, onon sappo e didon jokku6e e am 6ee duu, on njoodoto e dow joodorde kaanankoo6e, caron cuudi baaba Israa'iila sappo e didi dii. <sup>29</sup> Neddo fuu joppirido saabe am galle mum naa sakiraa6e mum wor6e naa sakiraa6e mum rew6e naa inna mum naa baam mum naa sukaa6e mum naa gese mum, he6an ko buri dum cowe teemedere, kasen duu he6an nguurndam nduumiidam. <sup>30</sup> Kaa ardinoo6e heew6e laatoto caggalaa6e, caggalaa6e 6ee laatoto ardii6e.

## 20

### *Banndol haala golloo6e ley ngesa peguuje*

<sup>1</sup>—Annii ko Laamu Laamdo nanndi: jom ngesa peguuje yalti beetee law faa hasa golloo6e 6e ngolla ngesa mum peguuje. <sup>2</sup> O he6i golloo6e, o hawri e ma66e o yoban 6e hono ko woowi: jalooma fuu mbuudu cardi. O na6i 6e ngesa makko. <sup>3</sup> Wakkati jawlal, o yalti kasen, o tawi wob6e sakoro 6e ke6aali golle, <sup>4</sup> o wii 6e: «Njehee onon duu ngolloyon to ngesa am peguuje too, mi yoban on ko haani yobeede koo.» <sup>5</sup> Been duu njehi ton. Jom ngesa oo wadi non kasen hakkunde naange e caggal sallifanaa. <sup>6</sup> Caggal dum, o yalti kasen wakkati laasaraa, o tawi wob6e ana ndarii to sakoro too, o wii dum'en: «Kodum wadi so jallu-don doo on ngollaali fay huunde?» <sup>7</sup> Be njaabii mo, 6e mbii: «Fay gooto 6amaali min golle.» O wii 6e: «Njehee onon duu ngolloyon e ngesa am peguuje ngaa.» <sup>8</sup> Nde hiirnoo ndee, jom ngesa oo wii keyaado mum oo: «Noddu golloo6e 6ee njoo6aa dum'en. Ardoro-daa sakiti6e nanngede 6ee, cakitoro-daa adii6e nanngede 6ee.» <sup>9</sup> Nannganoo6e laasaraa 6ee ngari, gooto e mum'en fuu hokkaa mbuudu cardi. <sup>10</sup> Adinoo6e nanngede 6ee duu ngari, cikki njobetee ko buri dum. Kaa gooto e ma66e fuu hokkaa mbuudu cardi hono no 6ee too nii. <sup>11</sup> Nde 6e njoo6aa dum ndee, e6e nhermitoo yaade to jom ngesa too <sup>12</sup> e6e mbiya: «Bee doo golloo6e ngollaali kinaa wakkati gooto tan, 6e ponndaama e amen njoo6di, minen nee min ngollii jalooma kuurdo ley ngee naange wulnge!» <sup>13</sup> Jom ngesa oo jaabii gooto e ma66e, wii: «Gidam, mi toojaali ma. Tama wanaa aan jabunoo mi nanngire mbuudu cardi jalooma? <sup>14</sup> Ndennoo, 6am njoo6di maa njahaa. Miin muuyi hokkude kakitiido oo hono ko ke6u-daa koo. <sup>15</sup> Tama wanaa ko weli kam ngadan-mi e kaalisi am oo? Naa moyyuki am kii waddan maa haasidaade?»

<sup>16</sup> Iisaa wii:

—Hono nii caggalaa6e 6ee laatoto ardi6e, ardi6e 6ee laatoto caggalaa6e.

### *No Iisaa sapporii nde tatabere maayde mum e wuurtugol mum*

<sup>17</sup> Tawi Iisaa ana njabbita faade Urusaliima, sawndintini taalibaa6e sappo e didon 6ee e laawol, wii dum'en:

<sup>18</sup> —Kettinee, efen nii ḡabbita Urusaliima. Don Bii Neddo oo wadatee e juude hooreeḡe yottinoobe sadaka e dunkee'en Sariya. 'Be caran mo waree, <sup>19</sup> 6e ngada mo e juude heeferḡe, been duu njaayran mo, piya mo dorri, peḡa mo e leggal bardugal faa mo maaya. Kaa ḡalooma majjum tataḡo oo mo wuurtan.

*No Inna Yaakuuba e Yuhanna ḡaagorii Iisaa*

<sup>20</sup> Nden, inna 6iḡḡe Jebede 6attini sukaaḡe mum Iisaa. Inna oo diccii yeeso Iisaa faa ḡaagoo dum ballal. <sup>21</sup> Iisaa wii mo:

—Kodum njiḡ-ḡaa?

Debbo oo jaabii mo, wii:

—Mido yidi podaa 6iḡḡe am worḡe diḡon 6ee njoodoo bannḡe maa so a laamiima, gooto wona bannḡe maa ḡaamo, goddo oo wona bannḡe maa nano.

<sup>22</sup> Iisaa jaabii, wii:

—On anndaa ko ḡaagoto-ḡon. Oḡon mbaawi yarde horde mettunde nde njaran-mi ndee naa?

'Be njaabii mo, 6e mbii:

—Miden mbaawi.

<sup>23</sup> O wii 6e:

—On njaran nde jaati. Kaa joodagol bannḡe am ḡaamo naa nano wanaa miin yamirta dum. Deen joolle, 6e Baabiraado am moyyinani 6ee njey dum.

<sup>24</sup> Nde taalibaaḡe sappo heddiḡe 6ee nani dum ndee, mettaa e rimdaaḡe diḡon 6ee. <sup>25</sup> E oon wakkati, Iisaa noddi 6e fuu, wii 6e:

—Odon anndi laamiḡe heeferḡe ana kawjorii dum'en hawju bonḡo. Mawḡe 6ee duu ana laamorii 6e laamu boḡeejo. <sup>26</sup> Onon kaa, dum wadataa hakkunde moodon. So won jiddo teddeengal hakkunde mon, ana haani laataade golloowo moodon. <sup>27</sup> Kasen so won muuydo ardaade e mon, ana haani laataade maccudo moodon. <sup>28</sup> Dum nee, 'Bii Neddo wardaali faa gollanee, gollande yimḡe wardi, hokkitira yonki mum yalla ana laatoo cootitaari heewḡe.

*No Iisaa selliniri wumḡe diḡon*

<sup>29</sup> Nde Iisaa e taalibaaḡe mum njalti Yeriko ndee, jamaa keewdo jokki e makko. <sup>30</sup> Wumḡe diḡon ana njoodinoo e sera laawol ngol, nani ana wiyee Iisaa annii 6ettoo, puḡḡi wullude ana mbiya:

—Taanii Daawuuda, yurma min!

<sup>31</sup> Jamaa oo darii ana jahoo e maḡḡe ana wiya 6e ndeyyinoo, kaa 6e beydii wullude eḡe mbiya:

—Moobbo, taanii Daawuuda, yurma min!

<sup>32</sup> Iisaa darii, noddi 6e, wii:

—Kodum njiḡ-ḡon mi wadana on?

<sup>33</sup> 'Be njaabii mo, 6e mbii:

—Moobbo, min mbumta.

<sup>34</sup> Iisaa yurminaa 6e, memi gite maḡḡe. Don e don 6e mbumti, 6e njokki e makko.

## 21

*No Iisaa naatiri Urusaliima*

<sup>1</sup> Nde Iisaa e taalibaaḡe mum 6adinoo Urusaliima njottii Baytifaaji dow waamnde haayre wiyeteende Jaytun ndee, Iisaa neli taalibaaḡe diḡon, <sup>2</sup> wii 6e:

—Njehee naatoyee ngeenndi ngonndi yeeso mon ndii, oon wakkati fuu, on tawan ton ndakiiwa e mola mum ana ka66ii. Kumton di ngaddanon kam. <sup>3</sup> So won biido on huunde, njaabo-don dum Moobbo ana haajaa di. Don e don on njoppete ngaddon di.

<sup>4</sup> Dum wadii yalla haala ka Laamdo yottinirnoo annabaajo oo kaa ana tabita nde oon wii:

<sup>5</sup> «Mbiyee biibe Siyona:

Yeew, kaananke maa annii wara e maa, ana leydinkinii, ana waddii tefeewa,

ana waddii mola tefeewa.»\*

<sup>6</sup> Oon wakkati, taalibaa6e bee njehi ngadoyi ko Iisaa yamiri dum'en koo. <sup>7</sup> Be ngaddi ndakiiwa ngaa e mola mum, 6e njappi e majji saayaaaji ma66e, Iisaa waddii. <sup>8</sup> Ko 6uri heewde e jamaa oo weerti saayaaaji mum'en e laawol. Wo66e kelti ca6e ledde, mbeerti de e laawol ngol. <sup>9</sup> Ardiibe Iisaa 6ee e jokku6e e caggal makko 6ee ana ilina ana mbiya:

—Jettooje ngoodanii taanii Daawuuda! Barke woodanii gardoowo e dow innde Joomiraado!† Jettooje ngoodanii Laamdo Toowdo!

<sup>10</sup> Nde o naati Urusaliima ndee, yim6e 6ee fuu keddii ana caaya ana mbiya:

—Homo woni oo gorko?

<sup>11</sup> Jamaa oo jaabii:

—Dum annabi Iisaa, iwru6o Nasaraatu ley leydi Galili.

### *No Iisaa ribbiri jaagoto6e ley Suudu Dewal Mawndu*

<sup>12</sup> Iisaa naati daalaare Suudu Dewal Mawndu nduu, ribbi soodo6e e sootto6e won6e ley mayre 6ee fuu, li6i taabe wecco6e kaalisi e joodorde sootto6e buugaaji. <sup>13</sup> Caggal dum, o wii 6e:

—Ley Binndi dii Laamdo wii: «Suudu am noddirte suudu rewru6o Laamdo.»

Iisaa beydi hen, wii:

—Kaa onon, on ngadii ndu «suuforde yano6e!»‡

<sup>14</sup> Wum6e e layo6e ngari e makko e ley Suudu Dewal Mawndu nduu, o sellini 6e. <sup>15</sup> Hooree6e yottino6e sadaka 6ee e dunkee'en Sariya 6ee mettaa nde njii kulle kaayniide de o wadata dee, e nde nani sukaa6e ana ilina e ley Suudu Dewal Mawndu ana mbiya:

—Jettooje ngoodanii taanii Daawuuda!

<sup>16</sup> Nden 6e mbii Iisaa:

—A nanii ko cukaloy koy kaalata koo?

O wii 6e:

—Mi nanii. Tama on janngaali dum doo abada:

«A wadii fay sukaa6e waddu6e e muynoo6e ana njette?»§

<sup>17</sup> Caggal dum, o seerti e ma66e, o yalti ngalluure ndee, o yehi Baytaniya, o waaloyi ton.

### *No Iisaa hudiri ibbi*

<sup>18</sup> Beetee law omo wirfitoo to ngalluure too, tawi omo yolbi. <sup>19</sup> O soynii ibbi e sera laawol ngol, o fanji ki, kaa o tawaali e makki so wanaa haakolooji. Oon wakkati, o wii ki:

—Pati a rimu abada!

Don e don, ibbi kii yoori kolon. <sup>20</sup> Haayonii taalibaa6e 6ee nde njii dum ndee, 6e lamndii mo, 6e mbii:

\* **21:5** Jakariyaa 9.9 † **21:9** Jabuura 118.25-26 ‡ **21:13** Esaaya 56.7; Yeremiya 7.11 § **21:16** Jabuura 8.3

—Hono hen kii ibbi yoordi wakkati gooto tan?

<sup>21</sup> O jaabii 6e, o wii:

—Mido haalana on goonga: so tawii odon ngoondini on cikkitaaki, on njawtan waafude ko ngadu-mi kii ibbi koo. On mbaawan wiide fay ndee doo waamnde haayre: «Doofa, saamoy ley maayo geeci», laatoto non. <sup>22</sup> So odon ngoondini, ko jaagi-don e ley duwaawu fuu on njaabante.

### *Do yamiroore golle Iisaa iwri*

<sup>23</sup> Iisaa naati Suudu Dewal Mawndu nduu. Nde mo waajotoo ndee, hooree6e yottinoobe sadaka 6ee e maw6e Yahuudiyankoo6e 6ee battii mo, lamndii, mbii:

—Yamiroore hende ngollirtaa ko ngollataa koo? Kasen, dow yamiroore homo?

<sup>24</sup> Iisaa jaabii 6e, wii:

—Miin duu, huunde wootere tan lamndotoo-mi on. So on njaabike kam, mi haalanan on jamirdo kam mi golla ko ngollan-mi koo. <sup>25</sup> Homo neli Yaayaa loota yimbe lootogal batisima? Laamdo naa yimbe?

—Be ndawridi hakkunde ma66e, 6e mbii:

—So en mbii «Laamdo», o wiiyan: «Ndennoo, ko saabii so on ngoondinaali Yaayaa?» <sup>26</sup> Kaa so en mbii «yimbe», waajibi kulen jamaa oo, sabi yimbe 6ee fuu ana njogorii Yaayaa yo annabaajo.

<sup>27</sup> Be njaabii Iisaa, 6e mbii:

—Min anndaa.

O ja66itii, o wii 6e:

—Haya miin duu, mi haalantaa on yamiroore nde ngolliran-mi ko ngollan-mi koo.

### *Banndol haala rimdaabe didon*

<sup>28</sup> Iisaa beydi hen wii:

—Kodum miilatan e ngol banndol: gorko gooto ana joginoo 6i66e wor6e didon, 6adii arano oo, wii dum: «Bimngel am, yaa golloj hannde to ngesa peguuje too.» <sup>29</sup> Biddo oo jaabii, wii yahataa. Kaa caggal mum, oon mimsiti yehi. <sup>30</sup> Baabiraado oo noddi biddo dida6o oo, wii dum ko wiinoo arano oo koo. Oon duu jaabii, wii: «Moyyi Baaba», kaa yahaali. <sup>31</sup> Homo e ma66e woni ja6ando baam mum ko wii koo?

—Be njaabii, 6e mbii:

—Arano oo.

Nden, Iisaa wii 6e:

—Mido haalana on goonga: duwaane'en 6ee karum e bamfaaji dii adoyto on naatude e Laamu Laamdo oo. <sup>32</sup> Sabi Yaayaa warii e moodon, hollii on laawol foocitaare, on njaabanaali dum. Kaa duwaane'en 6ee karum e bamfaaji dii ngoondini mo. Haya duu, fay nde njii-don dum ndee, on mimsitaali so sakitii ngoondin-don mo.

### *Banndol haala remoo6e bon6e*

<sup>33</sup> —Kettinee banndol gonngol: neddo gooto tuti ngesa peguuje, o filtini nga kokowol, o asi ngaykaare boosirde peguujam, o mahi suudu toowndu faa o soynoroo ko warata e ngesa ngaa. Caggal dum, o hasiri nga remoo6e gese peguuje, o dawii. <sup>34</sup> Faa tebugol peguuje yottii, o neli golloo6e makko to remoo6e 6ee too, 6e ngaddanoya mo ngedu makko e 6i66e peguuje dee. <sup>35</sup> Kaa remoo6e 6ee nanngi golloo6e makko 6ee, pii hen gooto, mbari gooto, mbardi gooto kaaye. <sup>36</sup> Jom ngesa oo neli e ma66e golloo6e bur6e aranndee6e 6ee heewde. Remoo6e 6ee ngadi 6e no ngadunoo 6ee too nii. <sup>37</sup> O sakitii

nelde biyiiko gorko to ma66e, o wii: «No laatii fuu, 6e njaagoto biyam oo.»  
 38 Kaa nde remoo6e 6ee njii biyiiko oo ndee, mbiyondiri e ko'e mum'en: «Oo woni donoowo mo. Ngaree mbaren mo, keddoro-den ngesa ngaa!» 39 Oon wakkati, 6e nanngi mo, 6e mbedii mo to caggal ngesa too, 6e mbari mo. 40 Jooni nee, so jom ngesa peguuje oo warii, hono o wadata remoo6e 6ee?

41 Be njaabii mo, 6e mbii:

—Been bon6e, o halkiran 6e no boniri. O hasira ngesa ngaa remoo6e wo66e hokko6e mo ngedu makko e 6i66e magga nde nga te6aa fuu.

42 Caggal dum, Iisaa wii 6e:

—Tama on njanngaali ko winndaa ley Binndi dii koo?

«Haayre nde maho6e 6ee tippitii ndee,

kanjum laatii haayre 6urnde fuu teentilaade e maadi ndii.

Dum yo golle Joomiraado,

kanjum dum haaynde e jiile meeden!»\*

43 Saabe dum, mido wiya on: Laamu Laamdo oo ittete e mon, hokkee yim6e wado6e ko Laamdo yidi. 44 Neddo fuu caamdo e nden haayre, helan. Neddo fuu mo nde saami e mum, noyoto.

45 Nde hoore6e yottino6e sadaka 6ee e Farisa'en 6ee nani bannndi makko dii ndee, paamii bannndi dii e mum'en peewti. 46 E6e tewta no 6e nanngira mo, kaa 6e kulii yim6e 6ee, sabi 6e fuu e6e njogorii mo annabaajo.

## 22

### *Bannndol haala niiri yanng'e*

1 Iisaa haaldiri e ma66e bannndol kasen, wii 6e:

2—Laamu Laamdo ana wa'i hono no kaananke kuurtinando biyum gorko, so wadani dum yanng'e. 3 O neli golloo6e makko noddanoya mo jaamo6e, kaa gansaabe 6ee calii warde. 4 O neli kasen golloo6e wo66e, o wii dum'en: «Mbiyee gansaabe 6ee niiri yanng'e ndii moyyinaama faa gasi, mi hirsii ga'i e jalbi paydi, hankasen fuu lanndinaama, 6e ngara 6e nootoo yanng'e oo.»

5 Kaa gansaabe 6ee koyini mo, kiinnii haajuuji mum'en: oo ngesa mum, oo jaagu mum. 6 Heddiibe 6ee nanngi golloo6e 6ee, torri 6e, mbari 6e.

7 Kaananke oo mettaa, neli sordaasi'en mum mbaroyi been jaadu6e ko'e, nduppi ngeenndi mum'en. 8 Caggal dum, o wii golloo6e makko 6ee: «Niiri yanng'e ndii moyyinaama, kaa gansaabe 6ee kaandaa e jaamde ndi. 9 Dum nee, njehee dow mbeddaaji mawdi dii, noddon neddo fuu mo kawru-don wara jaama niiri yanng'e oo ndii.» 10 Kaadime'en 6ee njehi dow mbeddaaji dii, noddii yim6e 6e tawi ton fuu gila e bon6e faa e moyyu6e faa galle do yanng'e oo wadata doo heewi yim6e.

11 Nde kaananke oo naati faa yiya noddaa6e 6ee ndee, o soynii gorko mo paraaki. 12 O wii dum: «Gidam, hono naatir-daa doo tawi a paraaki?» Kaa oon deyyinii. 13 E ley dum, kaananke oo wii golloo6e 6ee: «Ka66e juude makko e koyde makko, tippo-don mo e ley nimre sella ndee, ton o wullata o njeryondira niije.»

14 Iisaa jokki wiide:

—Noddaabe ana keewi kaa su6aabe ana pamdi.

### *Haala yo6ugol lampo*

15 Farisa'en njehi ndawridoyi no tuufiranta Iisaa e ley haala mum. 16 Be neli yoga e taalibaa6e ma66e, kanjum e howruu6e Hirudus mbiya mo:

\* 21:42 Jabuura 118.22-23

—Moobbo, miden anndi a goongirante: ada jannginira laawol Laamdo ngol goonga, a hulataa fay gooto, sabi a burdintaa yimbe. <sup>17</sup> Dum nee, haalan min kodum anndu-daa e dum doo: ana dagoo min ndokka kaananke Roma mawdo oo lampo naa dagaaki?

<sup>18</sup> Kaa Iisaa ana anndi anniyaaji ma66e bondi dii. O wii 6e:

—Onon naafigi'en! Kodum wadi so odon tuufana kam? <sup>19</sup> Kollee kam kaalisi jobirteedo lampo oo.

Be ngaddani mo mbuudu cardi gooto. <sup>20</sup> O lamndii 6e, o wii:

—Natal homo e innde homo woni doo?

<sup>21</sup> Be njaabii mo, 6e mbii:

—Kaananke Roma.

O wii 6e:

—Ndennoo, ndokkee kaananke Roma oo ko jey, ndokkee Laamdo duu ko jey.

<sup>22</sup> Haaynii 6e nde 6e nani oo jaabu ndee. Be celi mo, 6e mbitti.

### *Haala immital maay6e*

<sup>23</sup> E ley oon jalooma jaati, yoga e waaldeSaduki'en ngari e Iisaa. Kambe ngonni fennu6e immital. <sup>24</sup> Be lamndii mo, 6e mbii:

—Moobbo, Muusaa wii: «So neddo maayii hebaali biddo, mijum naa mawnum 6amta debbo dalaado oo, yalla ana hebana dum beyngu.»\*

<sup>25</sup> Wadiino e bettaade to amen rimdaabe njeddon wor6e. Arano oo caggal dewlii, maayi hebaali biddo. Mijiiko gorko 6amti debbo makko oo, <sup>26</sup> kanum duu maayi hebaali biddo. Tata6o oo duu jokki hen faa yottii njedda6o oo.

<sup>27</sup> Caggal ma66e 6e fuu, debbo oo duu maayi. <sup>28</sup> Namde immital nee, homo e njeddon 6ee debbo oo laatotoo jom suudu mum? Sabi 6e fuu 6e 6amiino mo.

<sup>29</sup> Iisaa jaabii 6e, wii:

—On majjii, sabi on paamaali Binndi dii, on anndaa baawde Laamdo dee duu. <sup>30</sup> Sabi so maay6e immitike, wor6e 6amataa, rew6e 6amataake, 6e laatoto hono no malaa'ika'en won6e dow kammu 6ee nii. <sup>31</sup> E haala immital maay6e, tama on njangaali ko Laamdo wii on koo? O wii: <sup>32</sup> «Miin woni Laamdo Ibarahiima, Laamdo Isiyaaka, Laamdo Yaakuuba.»† Laamdo yo Laamdo wuur6e, wanaa Laamdo maay6e.‡

<sup>33</sup> Waaju makko oo haaynii yimbe hettindotoo6e mo 6ee fuu.

### *Haala yamiroore burnde fuu teentilaade*

<sup>34</sup> Nde Farisa'en 6ee nani o mu6bii kundude Saduki'en 6ee e haala ndee, 6e kawriti. <sup>35</sup> Gooto e ma66e jannginoowo Sariya yidi tuufande mo, lamndii mo, wii:

<sup>36</sup> —Moobbo, honde woni yamiroore burnde fuu teentilaade e ley Tawreeta?

<sup>37</sup> Iisaa jaabii mo, wii:

—Yidir Laamdo Joomiraado maa 6ernde maa fuu e yonki maa fuu e hakkille maa fuu.§ <sup>38</sup> Nden woni yamiroore burnde mawnude, burnde teentilaade. <sup>39</sup> Yamiroore dida6ere hono mayre anni: «Njidiraa tanaa maa no njidir-daa hoore maa nii.»\* <sup>40</sup> Tawreeta Muusaa e dewte annabaabe dee fuu e deen jamirooje didi pawii.

\* 22:24 Fillitagol Tawreeta 25.5 † 22:32 Pergu 3.6 ‡ 22:32 Gila e jamaanu Muusaa tawi Ibarahiima e Isiyaaka e Yaakuuba maayii gila ko 6ooyi. Ko Laamdo wii yo Laamdo ma66e koo, hollii ee nguuri. § 22:37 Pergu 6.5 \* 22:39 Lewinkoo6e 19.18

*Kabaaru Almasiihu e Daawuuda*

41 Nde wonnoo Farisa'en 6ee ana kawriti, Iisaa lamndii 6e, wii:

42 —Kofum miilu-don e Almasiihu oo? O taanii homo?

Be njaabii, 6e mbii:

—O taanii Daawuuda.

43 O wii 6e:

—Ndennoo, hono Daawuuda noddirta mo Joomiraado? Ruuhu Laamdo annindi mo dum, saabe majjum o wii:

44 «Joomiraado wii Joomam:

Jooda jaamo am,

faa mi wada nja66aa way6e maa.»†

45 So Daawuuda ana noddira mo «Joomam», ndennoo, hono mo laartoo taanum tan?

46 Be fuu 6e ndonki jaabaade mo fay karrol. Gila jannde nden, fay gooto suusaali lamndaade mo lamndi goddi.

**23***No Iisaa feliri dunkee'en Sariya e Farisa'en*

1 Nden, Iisaa wii jamaa oo e taalibaabe mum 6ee:

2 —Dunkee'en Sariya 6ee e Farisa'en 6ee kanum'en ndokkaa jannginde Sariya Muusaa oo. 3 Saabe dum, odon kaani jabande 6e, ngadon huunde fuu ko 6e mbii on. Kaa pati nemmbon golleeji ma66e, sabi 6e ngadataa ko 6e mbaajotoo koo. 4 Be ka66an donnge teddu6e, 6e mbakkina yim6e, kaa 6e njidaa wallirde been huncude de fay hoore fedeeendu. 5 Huunde fuu ko 6e ngadata, 6e ngadiran dum faa 6e kollinkinoo. Dum wadi so e6e ka66a talki mawdi, e6e njuutina cilmbi saayaaji ma66e faa ana ndaasoo. 6 E6e njidi joolle burde teddude so 6e noddaama e yanngeeeji, e6e njidi joolle burde yiitinkinaade ley cuudi baajordi. 7 Ko 6e njidi tan salmineede calminaali teddu6i ley luumooji e noddoreede «Moobbo». 8 Kaa onon, pati nja6ee noddoreede «Moobbo», sabi on fuu on sakiraa6e, Moobbo gooto tan njogi-don. 9 Pati mbiyee fay gooto «Baabiraado» e aduna, sabi Baabiraado gooto tan njogi-don, dum woni gondo dow kammu oo.\* 10 Pati nja6ee noddireede «Hooreejo», sabi Hooreejo gooto tan njogi-don, dum woni Almasiihu oo. 11 Burdo teddude hakkunde moodon yo laato gollanoowo heddi6e 6ee. 12 Toownudo hoore mum fuu, leydinte. Leydinkiniido fuu toownete.

13 Bone yanan e mon onon dunkee'en Sariya e Farisa'en, naafigi'en! Odon cokana yim6e damal Laamu Laamdo ngal. On naatataa, on accataa naato6e naata. [ 14 †]

15 Bone yanan e mon, onon dunkee'en Sariya e Farisa'en, naafigi'en! Odon njiiloo e leydeele odon mbanngoo geeci faa ke6on tuubuudo gooto. So on ke6ii dum, mbirfito-don kasen, ngadon dum bii jahannama faa sowa on cili didi.

16 Bone yanan e mon, onon wum6e dowo6e yim6e! Odon mbiya: «So neddo hunorike Suudu Dewal Mawndu nduu yo meere, kaa so hunorike kanje Suudu Dewal Mawndu oo, hunoore mum nanngan dum.» 17 Majju6e,

† 22:44 Jabuura 110.1 \* 23:9 Pati mbiyee fay gooto «Baabiraado» e adunawiyaali pati neddo soowa baaba mum dimdo dum. Ngol haali haala hooree6e diina fonndu6e ko'e mum'en e baabiraaku Laamdo. † 23:14 E dereeji 6ooydi dii, yoga ana beyda aaya 14: Bone yanan e mon, onon dunkee'en Sariya e Farisa'en, naafigi'en! Odon teeta cuudi rew6e 6e wor6e mum'en maayi, odon njuutina duwaawuuji moodon yalla odon manee. Saabe majjum, on ke6an jukkungo 6urngo fuu naawde.



wumbe! Kodum buri teentilaade: kanje oo naa Suudu la66inooru kanje oo nduu? <sup>18</sup> Odon mbiya kasen: «So neddo hunorike ittirde sadaka ndee yo meere, kaa so hunorike sadaka gondo dow mayre oo, hunoore mum nanngan dum.» <sup>19</sup> Wumbe! Kodum hen buri teentilaade: sadaka oo naa ittirde sadaka la66inoore sadaka oo ndee? <sup>20</sup> Ndennoo, neddo fuu kunoriido ittirde sadaka ndee, hunorike nde kayre e huunde fuu ko fawii e mayre. <sup>21</sup> Neddo fuu kunoriido Suudu Dewal Mawndu nduu, hunorike ndu kayru e Laamdo joodiido e mayru oo. <sup>22</sup> Neddo fuu kunoriido kammu oo, hunorike joodorgal Laamdo ngal e Joodiido e maggal oo.

<sup>23</sup> Bone yanan e mon, onon dunkee'en Sariya e Farisa'en, naafigi'en! Odon ittana Laamdo jakka naanaa, kajum e haakolooji goddi, kaa odon njeeboo ko buri teentilaade e Sariya oo koo, hono foocitaare e yurmeende e goondinal. Tawee nee, kajum kaanno-don wadude tawee on njeebaaki ko heddi koo. <sup>24</sup> On wumbe dowoo6e yimbe! So bowngu saamii e njaram moodon, on ciwan itton dum, tawee nee, odon moda ngelooba!

<sup>25</sup> Bone yanan e mon, onon dunkee'en Sariya e Farisa'en, naafigi'en! Odon lawya caggal kore loode e caggal lehoj, tawee nee ley mum'en ana heewi ko wujjaa e ko yanaa. <sup>26</sup> Farisanke bumdo! Lawyu ley kore loode tafon, nden caggal ngal duu laaban.

<sup>27</sup> Bone yanan e mon, onon dunkee'en Sariya e Farisa'en, naafigi'en! Odon nanndi e janaale dawninaade, de dow mum'en woodi tawee ley mum'en ana heewi gi'e e ko sobi fuu. <sup>28</sup> Onon duu hono non mbaa-don: e jiile gite odon nanndi e foocitiibe, kaa ley moodon ana wii pep naafigaaku e oonaare.

<sup>29</sup> Bone yanan e mon, onon dunkee'en Sariya e Farisa'en, naafigi'en! Odon mahana annabaa6e bee cuudi dow janaale mum'en, odon njardina janaale foocitiibe bee, <sup>30</sup> mbirfito-don mbiyon: «Sinndo min kawriino e jamaanu njaatiraa6e amen, min ittidataano e ma66e yonkiiji annabaa6e dii.»

<sup>31</sup> Hono non, ceettori-don onon jaati on bi66e warannoobe annabaa6e bee. <sup>32</sup> Ndennoo, kebbintinee saawal golleeji bondi di njaatiraa6e mon puddunoo dii! <sup>33</sup> Bolle, bi66e posoke! Hono fuu miilorto-don waasude wedeede e jahannama? <sup>34</sup> Dum saabii, mido nelda on annabaa6e e hakkilantee6e, kajum e jannginoobe. Mbaron yoga, pejon yoga, piyon yoga dorri e ley cuudi mon baajordi, njokkon dum'en ngeenndi e ngeenndi. <sup>35</sup> Yalla yonkiiji laa6u6e ittaadi e aduna oo dii fuu, hakke mum ana fiitoo on, gila yonki Haabiila poocitiido oo faa yonki Jakariyaa bii Barakiya mo mbarno-don hakkunde Suudu Dewal Mawndu e ittirde sadaka oo. <sup>36</sup> Mido haalana on goonga: jukkungo majjum dum fuu e yimbe oo jamaanu saamata!

### *No Iisaa sujirani yimbe Urusaliima*

<sup>37</sup> —Hay yimbe Urusaliima, on mbarii annabaa6e, on mbardii nelaa6e e mon kaaye! Cili kuurdi njidu-mi hawrintinde bi66e mon no cofal hawrintinirta bi66e mum ley biifoole mum nii. Kaa on nja6aali. <sup>38</sup> Dum nee, on daldete e Suudu mon Dewal, ndu laatoo saabeere. <sup>39</sup> Mido wiya on: on njiyataa kam gila jooni faa wakkati mo mbiyooyton e mum: «Barke woodanii gardoowo e dow innde joomiraado!»

## 24

### *Haala taagumansaaji kollooji timmoode aduna*

<sup>1</sup> Nde Iisaa yaltunoo Suudu Dewal Mawndu ndee, taalibaa6e mum battitii dum, kolli dum maadiiji galle mayru dii. <sup>2</sup> O wii 6e:

—On njii dum doo fuu naa? Midó haalana on goonga: fay haayre wootere heddataako doo ana fawii dow wonnde, fuu wurjinte.

<sup>3</sup> Nde Iisaa joodinoo dow waamnde haayre wiyeteende Jaytun ndee, taalibaa6e makko ngari e makko kajum'en tan, mbii mo:

—Humpitin min nde dum wadata. Taagumansa homo hollata gartol maa, kajum e timmoode aduna?

<sup>4</sup> O jaabii 6e, o wii:

—Ndeentee pati fay gooto yoyya on. <sup>5</sup> Sabi heew6e ngardan innde am, gooto e mum'en fuu wiya: «Miin woni Almasiihu oo.» Be yoyyan heew6e.

<sup>6</sup> On nanan golowole e kabaaru golowole kaa pati kulee! Ana tilsi dum wada, kaa dum wanaa timmoode tafon. <sup>7</sup> Lejol haban e lejol, laamu haban e laamu. Yolbereji ngadan, leydi dimmboto e nokkuuje yogaaje. <sup>8</sup> Dum kaa fuu hono no puddoode natawore beynoowo nii.

<sup>9</sup> Nden, yim6e naban on e carirdi yalla odon torree, mbare-don. Lepi dii fuu mbanan on saabe am. <sup>10</sup> Oon wakkati, heew6e njoppa goondinal mum'en, ana njambondira ana mbanondira e ko'e mum'en. <sup>11</sup> Annabaa6e pene6e heew6e banngan, yoyya heew6e. <sup>12</sup> Bonanndaaji keewan faa jilli yim6e heew6e buu6ta. <sup>13</sup> Kaa mujudo faa timmoode, joomum hisinte. <sup>14</sup> Oo doo Kabaaru Lobbo haala Laamu Laamdo ooynete e aduna oo fuu, yalla lepi dii fuu ana ke6a seedaaku oo. Nden, aduna timmata.

### *Haala torra mawdo gadoowo*

<sup>15</sup>—Nde njii-don «huunde harmunde bonnde»,\* ko annabi Daniyel haalnoo koo ana e nokku ceniido oo† (janngudo dum, tiinnoo faama)<sup>16</sup> nden, tawaa6e ley Yahuudiya fuu yo ndogu peewa baamle kaaye. <sup>17</sup> Tawaado dow bene, pati wiya 6aman kaaki ley suudu mum. <sup>18</sup> Tawaado gese, pati wirfoo so wiya 6amoowo saaya mum. <sup>19</sup> Bone yanan e haamili'en e muyninoo6e ley deen jalaade! <sup>20</sup> Naagee Laamdo pati doddu mon laato wakkati dabbunde naa jalaade fowteteende. <sup>21</sup> Sabi nden, torra mawdo wadan mo hono mum wadaali gila puddoode aduna, hono makko wadataa abada kasen. <sup>22</sup> Sinndo tawiino deen jalaade ndabbindinaaka, fay gooto e 6i66e aadama hisataano. Kaa Laamdo rabbindinirii de sabaabu 6e o subii 6ee. <sup>23</sup> E oon wakkati, so won biido on: «Yeewee! Almasiihu annii doo», naa «Omo naa too», pati ngoondinee. <sup>24</sup> Sabi almasiihu'en pene6e e annabaa6e pene6e banngoyan, 6e ngada taagumansaaji mawdi e kaayeefiiji yalla e6e majjina fay subaa6e 6ee, so 6e mbaawii. <sup>25</sup> Paamee gasa. Mi haalanii on gila dum waraali. <sup>26</sup> So won biido on: «Yeewee, omo naa ley ladde jeereende», pati njehee. Naa so won biido on: «Yeewee, omo naa to ley cuudi too», pati ngoondinee. <sup>27</sup> Hono no majere fooynirta kammu gila funnaange faa hiirnaange nii, hono non Bii Neddo oo wardata. <sup>28</sup> Do jiibe ngoni fuu, don dute kawritata.

### *No Bii Neddo oo wartirta*

<sup>29</sup>—Don e don, caggal torra ley deen jalaade, naange ni66an, lewru njottan yaaynude, koo de kammu caaman, kulle gonde dow kammu dee ndimmboto.‡ <sup>30</sup> E oon wakkati, taagumansa Bii Neddo oo banngan e mbeeyu, lepi aduna dii fuu ngullan. Be njiiyan Bii Neddo oo, ana wara e duule,

\* **24:15** Daniyel 9.27; 11.31; 12.11 † **24:15** Doo Iisaa haali ko annabi Daniyel sappinoo: kaananke gooto wattan tooru e ley Suudu Dewal Mawndu Yahuudiyankoo6e. Ko o sappinoo koo wadii gila Iisaa finaali. Jooni Iisaa wii hono majjum wartan kasen. ‡ **24:29** Esaaya 13.10; 34.4, Yo'ila 2.10

ana warda baawde mawde e teddeengal. <sup>31</sup> Buutatal manngal fuufete, o nela malaa'ika'en makko funnaange e hiirnaange, saahal e baleeri, moobta subaa'be makko bee gila hoore leydi faa hoore leydi.

<sup>32</sup> Taykitee ibbe: so ca'be majje keyditii, haakolooji majje mbillitii, ofon anndi ndunngu badike. <sup>33</sup> Hono non, so on njii dum fuu, anndee wakkati oo battiima, omo damal galle. <sup>34</sup> Mido haalana on goonga: oo jamaanu timmataa tawee kudde dee fuu ngadaali. <sup>35</sup> Kammu e leydi timman, kaa haalaaji am dii timmataa abada.

### *Haala timmoode aduna*

<sup>36</sup> —Kaa nden jalaande e oon wakkati fay gooto anndaa dum, wanaa malaa'ika'en wonbe dow kammu, wanaa Biddo oo. Walaa anndudo dum so wanaa Baabiraado oo. <sup>37</sup> No jamaanu Nuuhu nii, hono non nanndata so Bii Neddo oo ana wara. <sup>38</sup> E ley deen jalaade fade ilam tuufaanu dam warde, yimbe ana jaama, ana njara, ana ndewla, ana ndewlee, faa jannde Nuuhu naati laana kaa. <sup>39</sup> Be miilaali, 6e njaalaali faa ilam tuufaanu dam wari yooli 6e fuu. Garol Bii Neddo oo hono non nanndata. <sup>40</sup> E oon wakkati, worbe didon wonbe e ngesa ngoota, gooto mum'en nabete, goddo oo yoppee. <sup>41</sup> Rewbe didon undoo'be dow unirde wootere, gooto mum'en nabete, goddo oo yoppee. <sup>42</sup> Ndennoo, njeertee, sabi on anndaa wakkati mo Joomiraado mum warata. <sup>43</sup> Paamee dum doo: sinndo jom galle ana anndunoo wakkati mo gujjo warata ley jemma, daanataako yoppataa o naata galle mum. <sup>44</sup> Dum nee, onon duu lanndinee, sabi Bii Neddo oo waran e wakkati mo on miilaali.

### *Haala golloowo koolniido, kaɗum e golloowo bondo*

<sup>45</sup> —Ndennoo, homo woni golloowo koolniido, hakkilante? Oon woni mo kalfaado mum halfini dum koreeji mum faa hokka dum'en nguure mum'en e wakkati jidaado. <sup>46</sup> Golloowo mo kalfaado mum warti tawi ana hiinnii golle mum, welii hoore. <sup>47</sup> Mido haalana on goonga: kalfaado oo halfinan mo jawdi mum fuu. <sup>48</sup> Kaa so golloowo oo yo bondo, wii e hoore mum kalfaado mum booyan wartaali, <sup>49</sup> hedde ana fiya waayiraa'be mum golloobe bee, ana jaamda ana yarda e sigiroobe, <sup>50</sup> nden, kalfaado oo wartiran jalooma mo golloowo oo anndaa e wakkati mo o miilaali, <sup>51</sup> jukka mo jukkungo naawngo, watta mo hakkunde naafigi'en, ton o wullata o njeryondira niyye.

## 25

### *Bannol haala surbaybe sappo*

<sup>1</sup> —Laamu Laamdo oo nanndan e oo janta: surbaybe sappo bambe moottilaaji mum'en so njehi ja'bboyaade jommbaajo gorko.\* <sup>2</sup> Njoyon bee yoyaa, njoyon wobbe bee ana yoyi. <sup>3</sup> Be yoyaa bee bami moottilaaji tawi njoobaaki bulangga, <sup>4</sup> yoyube bee noo nabori paali bulangga. <sup>5</sup> Nde jommbaajo oo jenggi waraali ndee, 6e fuu 6e no'ji, 6e daanii. <sup>6</sup> Faa hejjere jemma, wullaango nanaa, wii: «Jommbaajo oo warii! Njaltee! Nja'bboyee mo!» <sup>7</sup> Nden 6e fuu 6e pini, ebe moyyina moottilaaji ma'bbe. <sup>8</sup> Surbaybe 6e yoyaa 6e mbii yoyube bee: «Ndokkoree min e bulangga mon mo njoobi-don oo, sabi moottilaaji amen annii jifa.» <sup>9</sup> Yoyube 6e mbii: «Hu'bindaaki, sabi ko min njogii koo hejjataa en, en fuu. Njehee to soottoobe, coodoyon!» <sup>10</sup> E ley no 6e yoyaa 6e njaari soodoyde bulangga nii, jommbaajo oo yottii. Lanndininoobe bee

\* **25:1** E neesu Yahuudiyankoo'be jommbaajo gorko ana yaadannoo e gidiraa'be jom suudu mum, sabi kaɗum'en ndammbotoo.

naatidi e makko e ley dammbordu nduu, damal ngal uddaa. <sup>11</sup> Faa 6ooyi seeda, surbaybe heddiibe 6ee ngarti, hedde ana ngulla ana mbiya: «Kalfaado, kalfaado, udditan min!» <sup>12</sup> Kaa o jaabii 6e, o wii: «Mido haalana on goonga: mi anndaa on.»

<sup>13</sup> Iisaa sakitii wiide:

—Njeertee, sabi on anndaa jalaande naa e wakkati mo Bii Neddo warata e mum.

### *Banndol haala golloobe taton*

<sup>14</sup> —Laamu Laamdo ana nanndi e gorko lanndiniido faa dawa, noddi golloobe mum, halfini dum'en jawdi mum. <sup>15</sup> O halfini gooto ma6be mutakal teemedede joy kanje, goddo teemedede didi, tata6o oo teemedere, gooto fuu ko waarata e mum. Caggal dum, o dawi. Don e don, <sup>16</sup> golloowo kebedo mutakal teemedede joy kanje oo yehi jaagoroyii mo, tinorii mutakal teemedede joy godde. <sup>17</sup> Kalfinaado mutakal teemedede didi kanje oo duu wadi non, tinorii kajum duu mutakal teemedede didi godde. <sup>18</sup> Kaa kalfinaado mutakal teemedere kanje oo yehi asoyi ngayka, iri ton ko kalfaado mum oo hokkunoo dum koo.

<sup>19</sup> Faa 6ooyi caggal mum, kalfaado ma6be oo warti noddi 6e, o yeewi jate ma6be. <sup>20</sup> Kalfinaado mutakal teemedede joy kanje oo wari, waddi mutakal teemedede joy godde, wii: «Kalfaado am, mutakal teemedede joy kalfin-daa kam, ede nii. Yeew, mi tinorike de mutakal teemedede joy godde.» <sup>21</sup> Kalfaado makko oo wii mo: «Golle maa gasii sanne golloowo lobbo, koolniido. Nde wonnoo a hoolnike e ko famdi, mi halfinte ko teentilii sanne. War naatu faa ceyododen!» <sup>22</sup> Golloowo kalfinaado mutakal teemedede didi kanje oo wari kajum duu, wii: «Kalfaado am, mutakal teemedede didi kanje kalfin-daa kam, ede nii. Yeew, mi tinorike de mutakal teemedede didi godde.» <sup>23</sup> Kalfaado makko oo wii mo: «Golle maa gasii sanne golloowo lobbo, koolniido. Nde wonnoo a hoolnike e ko famdi, mi halfinte ko teentilii sanne. War naatu faa ceyododen!» <sup>24</sup> Kalfinaado mutakal teemedere kanje oo wari kajum duu, wii: «Kalfaado am, mido anndunoo a gorko tiidudo alhaali: ada hetta ko a aawaali, ada moo6ta ko a tutaali. <sup>25</sup> Saabe dum, mi hulii, njaa-mi iroy-mi kanje maa oo. Haya, fii maa annii!» <sup>26</sup> Kalfaado makko jaabii mo, wii: «Golloowo laaliido, nattudo! So tawii ada anndunoo mido hetta ko mi aawaali, mido moo6ta ko mi tutaali, <sup>27</sup> ndennoo, ada haannoo wadude kanje am oo e banki, yalla ana daja ko tinorii-mi so mi wartoyii. <sup>28</sup> Jooni, teetee mo mutakal teemedere kanje oo, ndokkon dum jom mutakal teemedede joy kanje oo. <sup>29</sup> Sabi jogiido fuu beydante faa heewa. Kaa mo walaa, fay seeda mo jogii oo teetete. <sup>30</sup> Golloowo meereejo oo kaa, mbedee dum e ley nimre sella ndee, ton o wullata o njeryondira jiiye.»

### *No Bii Neddo oo sarirta yimbe fuu*

<sup>31</sup> —So Bii Neddo oo warii e teddungal mum, kajum e malaa'ika'en 6ee fuu, o joodoto e joodorgal makko laamu ngal. <sup>32</sup> Yimbe aduna 6ee fuu moo6tete yeeso makko, o faltoroo 6e no duroowo faltortoo baali e be'i nii: <sup>33</sup> o wadan baali dii e junngo makko jaamo, o wada be'i dii e junngo makko nano. <sup>34</sup> Hono nii, Kaananke oo wiirata won6e junngo mum jaamo 6ee: «Ngaree, onon barkinaa6e Baabiraado am, nanngée laamu mo ndesane-don gila e puddoode aduna oo. <sup>35</sup> Sabi mi yolbiino, on jamminii kam, mi domdiino, on njarnii kam, mi laatinoke kodo, on njippinii kam, <sup>36</sup> mi holiino, on koltinii kam, mi jawiino, on njandinii kam, mi uddanooma kasu, on yeewoyii kam.» <sup>37</sup> E oon wakkati, fooccitii6e 6ee njaabotoo mo, mbiya: «Joomiraado, mande

min njii maa ada yolbi, min jammin maa naa ada domdi, min njarnu maa?

<sup>38</sup> Mande min njii maa a kodo, min njippin maa naa a koldo, min koltin maa?

<sup>39</sup> Mande min njii maa a jawdo naa a uddaado kasu, min ngari yeewde ma?»

<sup>40</sup> Kaananke oo jaaboo 6e wiya: «Mido haalana on goonga: ko ngadan-don gooto e burdo famdude e sakiraa6e am 6ee, yo miin ngadan-don.»

<sup>41</sup> Caggal dum, o wiyen won6e junngo makko nano 6ee: «Ngoddee kam, onon hudaabe Laamdo! Njehee ley yiite duumiinge nge Laamdo resani Ibiliisa e malaa'ika'en mum ngee! <sup>42</sup> Sabi mi yolbiino, on jamminali kam, mi domdiino, on njarnaali kam, <sup>43</sup> mi kodo, on njippinaali kam, mi koldo, on koltinaali kam, mi jawdo naa mi uddanooma, on ngaraali yeewde kam.»

<sup>44</sup> Nden, 6e njaaboto mo kam6e duu 6e mbiya: «Joomiraado, mande min njii maa ada yolbi naa ada domdi naa a kodo naa a koldo naa a jawdo naa ada udda kasu, min paabaaki ma?» <sup>45</sup> O jaaboto 6e o wiya: «Mido haalana on goonga: ko mbaasu-don wadande gooto e 6ee doo bur6e famdude koo, miin woni mo on ngadanaali.» <sup>46</sup> Nden, 6een njaha e jukkungo duumiingo, foocitiibe 6ee ke6a nguurdam nduumiidam.

## 26

### *No maw6e diina ndawriri faa nannga Iisaa*

<sup>1</sup> Nde Iisaa timmini diin waajuuji fuu ndee, wii taalibaa6e mum 6ee:

<sup>2</sup> —Odon anndi balde didi palii en e iidi Paska, Bii Neddo oo hokkitirte tontee e leggal bardugal.

<sup>3</sup> E oon wakkati, hooree6e yottinoo6e sadaka e maw6e Yahuudiyankoo6e 6ee kawritoyi galle Jottinoowo Sadaka Mawdo biyeteedo Kayafas. <sup>4</sup> Be fuu 6e ndawridi faa 6e njammboroo Iisaa hiila, 6e mbara dum. <sup>5</sup> Kaa 6e mbii:

—Pati ngaden dum ley iidi oo so yim6e 6ee murta.

### *No Iisaa wujiraa nebam uuroojam*

<sup>6</sup> Nde wonnoo Iisaa ana Baytaniya do galle Simon ceppaado oo doo, <sup>7</sup> debbo gooto battitii dum ana jogii faandu nebam uuroojam, tiidudam coggu sanne. O tawi Iisaa ana naama, o wuji dam dow hoore mum. <sup>8</sup> Nde taalibaa6e 6ee njii dum ndee, mettaa, ana mbiya:

—Ko woni oo bonannda meere meere? <sup>9</sup> Edam waawnoo soottee6e kaalisi keewdo, kaalisi oo hokkee misikiina'en.

<sup>10</sup> Iisaa faami ko 6e kaalannoo koo, wii 6e:

—Ko saabii so odon torra oo debbo? O gollanii kam golle njardudo. <sup>11</sup> Sabi misikiina'en ana tawdee e mon jannde fuu. Kaa miin, mi tawdataake e mon jannde fuu. <sup>12</sup> O wujii terde am nebam uuroojam, ko o wadiri dum yalla omo lanndinanoo kam yanaande. <sup>13</sup> Mido haalana on goonga: do Kabaaru Lobbo waajaa e aduna oo fuu, ko oo debbo wadi koo jantete, kasen duu o miccitere.

### *No Yahuuda jammborii Iisaa*

<sup>14</sup> Nden Yahuuda Isikariyota, gooto e taalibaa6e sappo e didon 6ee, yehi to hooree6e yottinoo6e sadaka, <sup>15</sup> wii dum'en:

—Ko ndokkaton kam so mi waddanii on Iisaa?

Be njakkii buudi capantati cardi, 6e ndokki mo. <sup>16</sup> Gila nden, omo fiya dabare no o jammboroo Iisaa.

### *No Iisaa hiirtidorii e taalibaa6e mum hiraande iidi Paska*

<sup>17</sup> E jalooma arano iidi mo buuru yuufinaaka, taalibaa6e 6ee ngari, lamndii Iisaa, mbii dum:

—Hoto njid-ɗaa min lanndinoyoo hiraande iidi Paska ndee?

<sup>18</sup> O jaabii 6e, o wii:

—Njehee ngeenndi too, naaton galle maani, mbiyon ɗum: «Moobbo wii, wakkati mum yonii, e galle maa oo waɗata iidi Paska oo, kanko e taalibaa6e makko.»

<sup>19</sup> Taalibaa6e 6ee ngadi ko Iisaa yamirnoo ɗum'en koo, lanndinii hiraande ndee.

<sup>20</sup> Hiiri, o joododii e taalibaa6e sappo e ɗiɗon 6ee faa 6e kirto. <sup>21</sup> Nde 6e kirtotoo ndee, o wii:

—Mido haalana on goonga: gooto moodon jammбото kam.

<sup>22</sup> Be cunli sanne, hedde e6e lamndoroo mo gooto gooto, gooto fuu ana wiya:

—Moobbo, kori wanaa miin?

<sup>23</sup> O jaabii, o wii:

—Tummbididdo e am junngo mum e la'al oo, oon jammбото kam.

<sup>24</sup> Waajibi Bii Neddo dalira aduna no haaliraa ley Binndi dui nii. Kaa bone woodanii jammботоодо Bii Neddo oo! Oon gorko, so rimanooka fey ɗuri moyyande ɗum.

<sup>25</sup> Yahuuda garoowo jambaade mo oo 6ami haala, lamndii mo, wii:

—Moobbo, kori wanaa miin?

O jaabii ɗum, o wii:

—Aan haaldi hunduko maa.

<sup>26</sup> Nde 6e jaamata ndee, Iisaa 6ami buuru, yetti Laamdo, helti, hokki taalibaa6e mum 6ee, wii:

—Nanngée, jaamee, ɗum yo terde am.

<sup>27</sup> Caggal ɗum, o 6ami horde peguujam, o yetti Laamdo, o hokki 6e, o wii:

—On fuu, njaree hen. <sup>28</sup> Dum yo yiyyam am, yiyyam tabintinooram aadi keyri, njupportoodam saabe heew6e faa luutti njaafee. <sup>29</sup> Mido wiya on: abada mi yarataa ɗam peguujam kasen so wanaa jannde njardoy-den peguujam kesam e ley LaamuBaabiraado am.

<sup>30</sup> Caggal 6e njimii Jabuura,\* 6e njalti, 6e njehi waamnde haayre wiyeteende Jaytun.

### *No Iisaa sapporii Piyeer yankiran ɗum*

<sup>31</sup> E oon wakkati, Iisaa wii 6e:

—E ley oo jemma jaati, on fuu on njoppam kam, sabi ana winndii: «Mi fiyan duroowo oo, mi wara ɗum, sewre baali ndee saakoo.»†

Iisaa beydi hen, wii:

<sup>32</sup> —Kaa caggal mi wuurtii, mi adoyto on Galili.

<sup>33</sup> Nden Piyeer 6ami haala, wii mo:

—Fay so 6e fuu 6e njoppu maa, miin kaa abada mi yoppataa ma.

<sup>34</sup> Iisaa jaabii mo, wii:

—Mido haalane goonga: jemma hannde oo jaati, fade ndontoori jogginde a wiyan a anndaa kam cili tati.

<sup>35</sup> Piyeer wii mo:

—Fay so tilsi mi maaydan e maa, abada mi wiyataa mi anndaa ma.

Taalibaa6e 6ee fuu mbii hono non.

### *No Iisaa jaagorii Laamdo ley Gecemane*

<sup>36</sup> Caggal ɗum, Iisaa yottodii e ma66e nokku biyeteedo Gecemane, wii 6e:

\* **26:30** Neesu Yahuudiyankoo6e woni yimde jime Jabuura 115-118 e hiraande iidi Paska. † **26:31** Jakariyaa 13.7

—Njoodee doo, faa mi wadoya too duwaawu.

<sup>37</sup> O yaadi e Piyeer e 6i66e Jebede didon 6ee, 6ernde makko fuddi maatude yoomeende e ruubu. <sup>38</sup> E ley dum, o wii 6e:

—Yoomeende ana mawni e am sanne faa ana ndaara warde kam. Keddee doo, njeertodee e am pati daano-don.

<sup>39</sup> O wodditii seeda, o hippii e leydi, omo duwoo, omo wiya:

—Baabiraado, so tawii ana laato, woddinam ndee horde bone. Kaa pati laatoroo no njidir-mi, yo laatoro no njidir-daa aan.

<sup>40</sup> O warti, o tawi e6e daanii. O wii Piyeer:

—On mbaawaa jeertodaade e am tawee on daanaaki fay wakkati gooto naa? <sup>41</sup> Pati daanee, nduwee, pati on ceyte. Sabi hakkille ana heewi anniya lobb, kaa terde ana lo'i.

<sup>42</sup> O yehi kasen, o duwii, o wii:

—Baabiraado, so tawii nden horde bone waawaa woddineede so wanaa mi yara dum, yo sago maa wadu!

<sup>43</sup> O warti, o tawi 6e daantike, sabi doydi ana piilii e ma66e. <sup>44</sup> O yehi kasen, o duwii tata6erde hono no o duworinoo nii. <sup>45</sup> Caggal dum, o warti e taalibaa6e 6ee, o wii dum'en:

—Faa jooni odon daanii odon noottinoo? Yeewee, wakkati oo yottike! Bii Neddo oo wadete e juude luuttoo6e. <sup>46</sup> Immee njehen! Yeewee, jammbootodo kam oo annii wara!

### *No Iisaa nanngiraa*

<sup>47</sup> O tilaaki haalde, faa Yahuuda, gooto e sappo e didon 6ee, yottii ana wondi e yim6e heew6e jogii6e kaafaaje e cabbi. Hooree6e yottinoo6e sadaka 6ee e maw6e Yahuudiyankoo6e 6ee neli 6e. <sup>48</sup> Jammbootodo mo oo hokki 6e finde, wii:

—Neddo mo buccii-mi fuu, oo woni kanko. Nanngée dum.

<sup>49</sup> Don e don, Yahuuda 6attitii Iisaa, wii dum:

—Sadi Moobbo!

O buccii dum. <sup>50</sup> Iisaa jaabii mo, wii:

—Gidam, wadu ko waddu maa koo.

E oon wakkati, 6e 6attitii, 6e njani e Iisaa, 6e nanngi dum. <sup>51</sup> Gooto e wondunoo6e e Iisaa 6ee soorti kaafaawi mum, soppi golloowo Jottinoowo Sadaka Mawdo tayi nowru mum. <sup>52</sup> Nden, Iisaa wii mo:

—Soornu kaafaawi maa kii e n̄aro mum, sabi jogotodo kaafaawi fuu, kaafaawi halkata dum. <sup>53</sup> Naa ada miila jooni mi waawaa noddude Baabiraado am nelda kam ko 6uri konuuji sappo e didi malaa'ika? <sup>54</sup> Kaa so non laatorii, hono ko winndaa ley Binndi dii koo tabitirta? Sabi di mbii hono non dum laatotoo.

<sup>55</sup> E oon wakkati, o wii jamaa oo:

—Ko ngardu-don e kaafaaje e cabbi faa nanngon kam hono mi janoowo? Ley Suudu Dewal Mawndu nduu ngonannoo-mi nannde fuu mido janngina, on nanngaali kam. <sup>56</sup> Kaa dum fuu wadan yalla Binndi annabaabe dii ana tabita.

Nden, taalibaa6e 6ee fuu njoppi mo, ndogi.

### *No maw6e diina cariri Iisaa*

<sup>57</sup> Nanngu6e Iisaa 6ee na6i dum to Kayafas Jottinoowo Sadaka Mawdo oo, tawi dunkee'en Sariya 6ee e maw6e lepol 6ee ana kawritinoo ton. <sup>58</sup> Piyeer jokitii mo fali daawre hakkunde ma66e, faa daalaare galle Jottinoowo

Sadaka Mawdo oo. O naati ley galle oo, o jooddii e doomoo6e 6ee faa o yiya no dum sakitortoo.

<sup>59</sup> Hooree6e yottinoo6e sadaka e waalde Saahii6e ndee fuu ana tewta fenaande nde kappira Iisaa yalla ana waree. <sup>60</sup> Fay so taweede yim6e heew6e ngari seedanaade mo pene, 6e ke6aali sabaabu fuu ko waawi warde mo. Ko sakitii koo, wor6e didon ngari, <sup>61</sup> mbii:

—Kanko wiinoo omo waawi wurjinde Suudu Dewal Laamdo, o mahitoo ndu ley balde tati.

<sup>62</sup> Jottinoowo Sadaka Mawdo oo immii, wii Iisaa:

—A jaabataako fay huunde naa? Tama a nanaali ko 6e mbiyete koo?

<sup>63</sup> Fuu omo deyyinii. Jottinoowo Sadaka Mawdo oo wii mo:

—Mido lamndore saabe Laamdo guurdo oo, haalan min so tawii aan woni AlmasiihuBii Laamdo oo.

<sup>64</sup> O jaabii dum, o wii:

—No mbii-daa nii. Kasen, mido wiya on fuu: gila jooni, on njiyan Bii Neddo ana joodii naamo Jom Baawde oo, ana wara dow duule kammu.

<sup>65</sup> E ley dum, Jottinoowo Sadaka Mawdo oo mettaa faa seeki kaddule mum, wii:

—O bonkike Laamdo! En kaajaaka seedee'en hankasen! On narrii noppi moodon ko o bonkii Laamdo koo. <sup>66</sup> Kodum njii-don hen?

Be njaabii, 6e mbii:

—Omo haani wareede.

<sup>67</sup> Caggal dum, 6e tutti e yeeso makko, 6e culkii mo. Yoga ma66e ana piya mo banaaje <sup>68</sup> ana mbiya:

—Almasiihu! Haalan min piido ma, so a annabaajo.

### *No Piyeer wadi so yankiri Iisaa*

<sup>69</sup> Piyeer joodii sella e daalaare galle oo. Gooto e hor6e 6ee battitii mo, wii:

—Aan, ada wondunoo e Iisaa Galilinke oo.

<sup>70</sup> Nii o yeddi dum hakkunde yim6e fuu, o wii:

—Mi faamataa ko kaalataa koo.

<sup>71</sup> Caggal dum, o fa'i to damal galle too. Kordo goddo yii mo, wii won6e don 6ee:

—Oo gorko e Iisaa Nasaraatunke oo wondunoo.

<sup>72</sup> Piyeer yeddi kasen, wii:

—Mi hunike, mi anndaa oo gorko.

<sup>73</sup> Faa 6ooyi seeda, won6e don 6ee battii Piyeer, mbii dum:

—Tayoral, e ma66e njeye-daa, sabi demngal maa ngal hollii to iw-daa.

<sup>74</sup> E ley dum, Piyeer darii ana hunoo ana huttoo ana wiya:

—Mi anndaa oo gorko!

Oon wakkati fuu, ndontoori joggini, <sup>75</sup> non Piyeer miccitii ko Iisaa wiinoo dum koo: «Fade ndontoori jogginde, a wiyan a anndaa kam cili tati.» O yalti sella, o darii omo woaya faa omo heppiya.

## 27

### *No Iisaa nabiraa to Pilaatu*

<sup>1</sup> Beete law, hooree6e yottinoo6e sadaka 6ee e maw6e lejol 6ee fuu njooddii faa yeewa no mbarda Iisaa. <sup>2</sup> Be ka66i mo, 6e na6i mo to Pilaatu goforneer oo.

### *No Yahuuda maayiri*



<sup>3</sup> Nde Yahuuda jammbiido Iisaa oo yii no o sariraa o bareteedo nii, mimsiti, wartiri buudi capantati cardi dii to hooree6e yottinoo6e sadaka e maw6e lejol 6ee, <sup>4</sup> wii dum'en:

—Mi luuttii ko njammbii-mi mo wiyaali wadaali oo koo!

Nii 6e njaabii mo, 6e mbii:

—Ko hilli min? Aan anndi!

<sup>5</sup> Yahuuda tippii kaalisi oo ley Suudu Dewal Mawndu nduu. Caggal dum, o 6ami 6oggol, o wartoyii. <sup>6</sup> Hooree6e yottinoo6e sadaka 6ee 6ami kaalisi oo, mbii:

—E sariya meeden daganaaki en wattude oo kaalisi e keesu oo, sabi dum diyo.

<sup>7</sup> Caggal 6e ndawridii, 6e 6ami kaalisi oo, 6e coodi dum ngesa e junngo mahoowo loode faa wadee jenaale joolaa'en. <sup>8</sup> Dum wadi so ngaan ngesa ana wiyee faa jooni «Ngesa Yiiyam». <sup>9</sup> Nden haala ka Laamdo yottinirnoo annabi Yeremiya kaa tabiti nde oon wii:

«Be 6amii buudi capantati cardi,  
coggu mo yim6e Israa'iila njatorii yonki makko,

<sup>10</sup> 6e coodi dum ngesa mahoowo loode,

hono no Joomiraado yamirnoo kam nii.»\*

### *No Pilaatu lamndorii Iisaa*

<sup>11</sup> Iisaa darii yeeso goforneer oo, oon lamndii mo, wii:

—Aan woni kaananke Yahuudiyankoobe oo naa?

O jaabii, o wii:

—No mbii-daa nii.

<sup>12</sup> Kaa nde hooree6e yottinoo6e sadaka 6ee e maw6e lejol 6ee kappi mo ndee, o jaabaaki fay huunde. <sup>13</sup> Dum wadi so Pilaatu wii mo:

—A nanaali ko 6e ceettante koo fuu naa?

<sup>14</sup> Kaa o jaabaaki hen fay karrol. Dum haaynii goforneer oo sanne.

### *No Iisaa sariraa yo bareteedo*

<sup>15</sup> Iidi Paska fuu, goforneer oo ana hokkannoo yim6e 6ee su6aade e kasunkoo6e 6ee mo njidi yoppitaneede. <sup>16</sup> E oon wakkati, ana woodunoo kasunke jom innde biyeteedo Iisaa Barabas. <sup>17</sup> E ley no jamaa oo mo6torii nii, Pilaatu lamndii 6e, wii:

—Homo njid-don mi yoppitana on: Iisaa Barabas naa, naa Iisaa biyeteedo Almasiihu oo?

<sup>18</sup> Sabi Pilaatu ana anndunoo haasidaaku wadi so 6e ndokkitiri Iisaa.

<sup>19</sup> Kasen, nde o joodii to sarirde too ndee, jom suudu makko neli e makko, wii:

—Sel e oo gorko poocciitido, sabi jemma hanken koydi makko tampinii kam sanne.

<sup>20</sup> Hooree6e yottinoo6e sadaka 6ee e maw6e lejol 6ee ndunyi jamaa oo naagoo Pilaatu yoppitana 6e Barabas, wara Iisaa. <sup>21</sup> Goforneer oo lamnditii 6e:

—Homo e didon 6ee njid-don mi yoppitana on?

Be njaabii, 6e mbii:

—Barabas!

<sup>22</sup> Pilaatu lamndii 6e, wii:

—Ndennoo, hono ngadan-mi Iisaa biyeteedo Almasiihu oo?

Be fuu 6e njaabii, 6e mbii:

—Tontu mo e leggal bardugal!

\* 27:10 Jakariyaa 11.12-13, Yeremiya 19.1-13; 32.6-15

23 O lamndii 6e, o wii:

—Kodum o wadi ko boni?

Be beydii dukude semmbe, ebe mbiya:

—Tontu mo e leggal bardugal!

24 Nden Pilaatu yii walaa ko waawi hen, tawi duko ngoo duu ana beydii sanne, o bami ndiyam, o looti juude makko yeeso yimbe 6ee, o wii 6e:

—Mi woytirtaake yonki oo gorko. Dum yo kunkoo mon.

25 Be fuu 6e njaabii, 6e mbii:

—Yonki makko ana jonngii dow amen, minen e 6i66e amen!

26 E oon wakkati, Pilaatu yoppitani 6e Barabas, yamiri Iisaa fiyee dorri, caggal dum, o hokkitiri dum tontoyee e leggal bardugal.

### *No sordaasi'en njaayriri Iisaa*

27 Sordaasi'en goforneer 6ee na6i Iisaa ley galle to hu6eere ndee woni too, fedde sordaasi'en 6ee fuu pili mo. 28 Be 6oorti mo kaddule makko, 6e 6oorni mo burmusuure wo6eere.† 29 Caggal dum, 6e caji tenngaade gi'e, 6e kippi e hoore makko. Be ngadi kasen kalacal e junngo makko jaamo, 6e ndiccii yeeso makko, hedde e6e njaayra mo e6e mbiya:

—Sadi, kaananke Yahuudiyankoo6e!

30 Be tutti e makko, 6e bami kalacal ngal e6e piya e hoore makko. 31 Nde 6e tilii jaayrude mo ndee, 6e itti burmusuure ndee, 6e 6oorni mo kaddule makko. Caggal dum, 6e na6i mo faa 6e tontoya mo e leggal bardugal.

### *No Iisaa tontiraa dow leggal bardugal*

32 Nde 6e njaltata ngeenndi ndii ndee, 6e kawriti e gorko Sireenanke biyeteedo Simon. Sordaasi'en 6ee ndooldini mo o wakkoo leggal bardugal Iisaa ngal. 33 Be njottii nokku biyeteedo Golgata. (Maanaa Golgata woni nokku laalagal hoore.) 34 Be ndokki Iisaa peguujam njillondiraadam e safaare haadunde faa o yara. Nde o meedi dum ndee, o salii yarde.

35 Nde 6e tonti mo e leggal bardugal ndee, 6e pecciri kaddule makko urwa.

36 Caggal dum, 6e njoodii don e6e kayba mo. 37 Be mbinndi daliili ko tonti mo, 6e takki dum do tiimde hoore makko doo. Dum doo 6e mbinndi: OO YO IISAA, KAAANANKE YAHUUDIYANKOOBE. 38 E oon wakkati, yanoo6e didon tontidaa e makko, gooto jaamo makko, goddo oo nano makko. 39 Yimbe ya66otoo6e don 6ee ana njenna mo, ana njinka ko'e mum'en, 40 ana mbiya:

—Aan gurjinoowo Suudu Dewal Mawndu nduu so mahitoo ndu ley balde tati, biltu hoore maa. So a Bii Laamdo, jippa leggal bardugal ngal!

41 Hono non, hooree6e yottinoo6e sadaka 6ee e dunkee'en Sariya 6ee e maw6e lejol 6ee fuu njaayriri mo ana mbiya:

42 —O biltii wo66e, kaa o ronkii biltude hoore makko. Kanko o kaananke Israa'ila. Jooni, o jippoo leggal bardugal ngal, faa ngoondinen mo. 43 O fawii fii makko e Laamdo. Yo Laamdo biltu mo jooni, so ana yidi mo. Sabi o wii o Bii Laamdo.

44 Yanoo6e tontaa6e sera makko 6ee duu ndarii ana mbonkoroo mo non.

### *Haala maayde Iisaa*

45 Gila hakkunde naange, nimre wadi e leydi ndii fuu faa wakkati yamnde tati kiikiide. 46 Banngal yamnde tati kiikiide, Iisaa wulli wullaango toowngo, wii:

—Eli, Eli, lama sabaktanii?

† 27:28 Wakkati Iisaa, burmusuure wo6eere yo saaya ka kaananke 6oornotoo.

(Dum woni: «Laamdo am, Laamdo am! Kofum wadi so njoppu-daa kam?»)

<sup>47</sup> Yoga e darinoobe ton bee nde nanunoo dum ndee, mbii:

—Omo nii nodda annabi Iliyaasa!

<sup>48</sup> Don e don, gooto dogi waddoyi liccere, suuwi dum e biineegiri, ha66i dum e sawru, feewtini hunduko makko yalla omo buuccoo. <sup>49</sup> Kaa heddiibe bee mbii:

—Njoppee mo. Yeewen yalla Iliyaasa waran bilta mo.

<sup>50</sup> Caggal dum, Iisaa wulli wullaango toowngo kasen, dali aduna.

<sup>51</sup> Oon wakkati, heedoode faliinde ley Suudu Dewal Mawndu ndee seekii gila dow faa ley, laatii taye didi. Leydi dimmbii, kaaye ceekii, <sup>52</sup> janaale udditii, seniibe heewbe maaynoobe nguurti. <sup>53</sup> Be njalti e janaale dee. Caggal ko Iisaa wuurti koo, 6e naati ngalluure seniinde ndee, yimbe heewbe njii be.

<sup>54</sup> Hooreejo sordaasi'en oo e dardinoobe e mum faa kayba Iisaa bee njii no leydi ndii dimmborii nii e ko wadi koo fuu, kuli sanne, mbii:

—So goonga nii, oo yo Bii Laamdo!

<sup>55</sup> Rewbe heewbe ana toowti, ana coynoo. Been yo jokkunoo6e e makko gila Galili faa ngollana mo. <sup>56</sup> Ana e been rewbe: Mariyama mo Magdala e Mariyama inna Yaakuuba e Yuusufu, kaɗum e inna biibe Jebede.

### *No tew Iisaa wadira e yanaande*

<sup>57</sup> Faa hiiri, gorko arskunte jeyaado Arimatiya wari. Omo wiyee Yuusufu, kanko duu o taalibbo Iisaa. <sup>58</sup> O yehi to Pilaatu, o ndaardi dum tew Iisaa. E oon wakkati, Pilaatu dɗanani mo o hokkee dum. <sup>59</sup> O 6ami tew oo, o fiili dum e kasanke keso, <sup>60</sup> o watti dum e yanaande heyre nde o yamirnoo o asanee e haayre. Caggal dum, o talliti haayre teddunde, o uddiri damal yanaande ndee, o witti. <sup>61</sup> Mariyama mo Magdala e Mariyama goddo oo ana njoodinoo don, ana peewti e yanaande ndee.

### *No sordaasi'en kaybiri yanaande Iisaa*

<sup>62</sup> Janngo mum yo jalaande fowteteende. Hooree6e yottinoobe sadaka e Farisa'en kawriti to Pilaatu, <sup>63</sup> mbii dum:

—Kaananke, min micciti ke yojjoo6o yimbe oo wiino nde wuuri ndee, wuurtan balde tati caggal maayde mum. <sup>64</sup> Ndennoo, tiinna yamir yanaande ndee doomee faa jalooma tata6o oo yawta, pati taalibaabe makko ngara ngujjita tew makko mbiya yimbe bee o immitiido hakkunde maaybe. Nden ngol yojjngol cakitiingol buran aranndeewol ngol bonde.

<sup>65</sup> Pilaatu wii 6e:

—Sordaasi'en hayboobe annii. Njehee ndoomiroyee yanaande ndee no mbaawru-don fuu!

<sup>66</sup> E oon wakkati, 6e njehi hiinnoyaade yanaande ndee: 6e uddi nde faa gasi, 6e meeli nde, 6e ndarni don sordaasi'en hayboobe.

## 28

### *No Iisaa immintiniraa*

<sup>1</sup> Ko jalaande fowteteende ndee 6ettii koo, beete kecco jannde alan, Mariyama mo Magdala e Mariyama goddo oo njehi yeewtoyaade yanaande ndee. <sup>2</sup> Don, leydi dimmbii semmbe. Malaa'ika Joomiraado jippii iwde dow kammu talliti haayre ndee joodii dow mayre. <sup>3</sup> Omo jalbira hono no majere nii, kaddule makko duu ana ndawni far hono no 6iraadam nii. <sup>4</sup> Doomoobe 6ee kuli sanne faa ana cijna, 6e laatii hono maaybe nii. <sup>5</sup> Malaa'ika oo wii rewbe 6ee:

—Pati kulee! Mido anndi Iisaa tontanooḍo oo tewtaton. <sup>6</sup> O walaa ḍoo, o immitike hono no o wiirunoo nii. Ngaree, yeewee ḍo o lelinoo ḍoo. <sup>7</sup> Njaawnee njehee, kumpitoyee taalibaaḍe makko ḍee o immitike e maayde. Jooni o adoyto on Galili, ton njiyoyton mo. Dum njidunoo-mi haalande on.

<sup>8</sup> Rewḍe ḍidon ḍee keñii iwi ḍo yanaande ḍoo, ḍe heewḍe kulol e seyo manngo, ḍe ndogi haalanoyde taalibaaḍe makko ḍee oo kabaaru. <sup>9</sup> Don e ḍon, Iisaa hawri e maḍḍe, wii ḍe:

—Cadee!

Ḃe ḍattitii mo, ḍe nanngi koyḍe makko, ḍe cujidani mo. <sup>10</sup> E oon wakkati, o wii ḍe:

—Pati kulee! Njehee mbiyoyee taalibaaḍe am ḍee njaha Galili. Ton ḍe njiyoyta kam.

### *No haybooḍe yanaande Iisaa ḍee njantorii fuu*

<sup>11</sup> Rewḍe ḍee ana e laawol, faa yoga e sordaasi'en haybannoḍe yanaande nde ḍee kooti ngeenndi too, kaalani hooreeḍe yottinoḍe sadaka ḍee ko wadi koo fuu. <sup>12</sup> Hooreeḍe yottinoḍe sadaka ḍee kawriti e mawḍe ḍee. Be ndawridi yeenude sordaasi'en haybannoḍe yanaande ndee ḍee kaalisi keewḍo, <sup>13</sup> ḍe mbii ḍum'en:

—Mbiyon taalibaaḍe makko ḍee ngarii jemma tawi oḍon ḍaanii, ngujjitii mo. <sup>14</sup> So goforneer oo nanii ḍum, min kawan ḍum e haala, min palanoo on e torra fuu.

<sup>15</sup> Sordaasi'en ḍee nanngi kaalisi oo, ngadiri no mbiyaa nii. Oon kabaaru ana jantee hakkunde Yahuudiyankooḍe faa hannde.

### *No Iisaa ḍanngirani taalibaaḍe mum*

<sup>16</sup> Taalibaaḍe sappo e go'o ḍee njeḍi Galili to dow waamnḍe haayre nde Iisaa tinndinnoo ḍum'en ndee. <sup>17</sup> Nde ḍe njii mo ndee, ḍe cujidani mo, kaa yoga e maḍḍe ana sikkittii. <sup>18</sup> O ḍattitii, o wii ḍe:

—Mi hokkaama baawḍe fuu dow kammu e leydi. <sup>19</sup> Ndennoo, njehee ngadee leñi ḍii fuu taalibaaḍe am, lootiree ḍe lootogal batisima innḍe Baabi-raaḍo e Biḍḍo e Ruuhu Ceniḍo, <sup>20</sup> njannjinee ḍe ḍe njokka ko njamir-mi on koo fuu. Anndee, mido wondi e moodon jannḍe fuu faa aduna timma.

## Linjiila Iisaa Ngedu Marka

### *No Yaayaa waajorii*

<sup>1</sup> Dum woni puɗɗoode Kabaaru Lobbo haala Iisaa Almasiihu Bii Laamdo oo.

<sup>2</sup> Nii winndorii e dewtere annabi Esaaya:

«Miin Laamdo, mi ardinante nelaado am moyyinanoo ma laawol.\*

<sup>3</sup> Neddo ana ooynoo ley ladde jeereende:

Moyyinee laawol Joomiraado ngol,

ndartinee dati makko.»†

<sup>4</sup> Oon nelaado woni Yaayaa lootoowo lootogal batisima oo. O banngi ley ladde jeereende, omo ooynoo omo wiya yimbe tuuba, mbatisee yalla luutti mum'en ana njaafee. <sup>5</sup> Yimbe leydi Yahuudiya e yimbe Urusaliima fuu ngari, njaadiri luutti mum'en, Yaayaa looti be lootogal batisima ley maayo Urdun.

<sup>6</sup> Yaayaa, kaddule de leeɓi geloodi 6oornotonoo, humoo nguruwol, buureeti e njumri ladde o wuuri. <sup>7</sup> Omo waajoroo daande toownde, omo wiya:

—Burdo kam baawde waran caggal am, mi fotaa fay turaade mi humta foggii pade makko. <sup>8</sup> Miin, ndiyam mbatisir-mi on, kaa kanko, Ruuhu Ceniido o batisirta on.

### *No Iisaa batisiraa e no Ibiliisa hordi mo*

<sup>9</sup> Ley deen palaade, Iisaa iwi ngeenndi Nasaraatu ley leydi Galili, wari, Yaayaabatisi mo ley maayo Urdun. <sup>10</sup> Wakkati o yeentata ndiyam dam oo, o yii kammu udditike, o yii Ruuhu Ceniido ana jippoo e makko hono no wuugaandu nii. <sup>11</sup> Daande iwnde dow kammu ooyinii, wii:

—Aan woni Biyam mo korsin-mi, aan cubii-mi.

<sup>12</sup> Oon wakkati fuu, Ruuhu nabi mo ley ladde jeereende. <sup>13</sup> O wadi ton balde capande nay, Ibiliisa ana tewta seytaade mo, omo hakkunde kulle ladde, malaa'ika'en ana ngollana mo.

### *No Iisaa noddiri taalibaabe arandeebe*

<sup>14</sup> Caggal uddeede Yaayaa ley kasu, Iisaa yehi Galili ana waajoo Kabaaru Lobbo haala Laamdo, <sup>15</sup> ana wiya:

—Wakkati oo warii, Laamu Laamdo battiima. Tuubee, ngoondinee Kabaaru Lobbo.

<sup>16</sup> Iisaa ana yahannoo dow fonngo weendu Galili, non yii Simon e mijum Andire ana tippoo bubbi mum'en ley weendu nduu yo awoobe. <sup>17</sup> Iisaa wii be:

—Njokkee kam, mi wada on awoobe yimbe.

<sup>18</sup> Don e don be njoppi bubbi maɓbe dii, be njokki e makko. <sup>19</sup> O yehi yeeso seeda, o yii Yaakuuba gii Jebede e mijum Yuhanna ley laana mum'en ana moyyintina bubbi. <sup>20</sup> Oon wakkati fuu, o noddi be. Be njoppi baam maɓbe Jebede, kajum e hasaabe be ley laana kaa, be njokki e makko.

### *No Iisaa ribbiri seydaani*

<sup>21</sup> Caggal dum, be njehi ngeenndi mbiyeteendi Kafarnahum, Iisaa naati suudu waajoroo, fuddi waajaade. Namde mum yo fowteteende. <sup>22</sup> Tawaaɓe don bee kaaynaa e waaju makko oo, sabi o waajorike be no jom baawde nii,

\* 1:2 Malakiya 3.1 † 1:3 Esaaya 40.3

wanaa no dunkee'en Sariya nii. <sup>23</sup> Gorko laddaado ana e waajordu nduu, wulli, <sup>24</sup> wii:

—Iisaa Nasaraatunke oo, kofum hillu maa e amen? A garo halkude min naa? Mido anndi ko ngon-daa, a ceniido iwrufo to Laamdo!

<sup>25</sup> Iisaa jahii e seydaani oo, wii:

—Deyyu yaltu e makko!

<sup>26</sup> Seydaani oo dimmbi gorko oo semmbe, wulli wullaango toowngo, yalti e makko. <sup>27</sup> Jamaa oo fuu haaynaa, hedde ana lamndondira:

—Ko dum woni? 'Dum anndal kesal koy! Omo yamira fay seydaani'en bee, be dowtanta mo.

<sup>28</sup> Wakkati gooto kabaaru makko saakii ley leydi Galili fuu.

### *No Iisaa selliniri jawbe heewbe*

<sup>29</sup> Nde be njaltunoo waajordu nduu ndee, be njehi galle Simon e Andire. Yaakuuba e Yuhanna njaadi e ma66e. <sup>30</sup> Esii Simon debbo ana lelii yo jontaafo. Iisaa yottii tan, haalanaa haala makko, <sup>31</sup> battitii mo, nanngi junngo makko, immiini mo. Don e don jontere makko selli, o laatani be njaatigi.

<sup>32</sup> Kiikiide caggal janal naange, yimbe ngaddani Iisaa jawbe e laddaabe fuu. <sup>33</sup> Ngeenndi ndii fuu hawriti dow damal ngal. <sup>34</sup> O sellini jawbe heewbe, jawbe jawuujii di ngaladaa sii. O ribbi seydaani'en heewbe, o accataa seydaani'en bee kaala, sabi e6e anndi ko mo woni jaati.

### *No Iisaa waajorii ley Galili*

<sup>35</sup> Janngo mum, Iisaa hujji gila law, yehi nokku teeldo ana wada ton duwaawu. <sup>36</sup> Simon e wondii6e mum ndarii ana tewta mo. <sup>37</sup> Nde be njiiti mo ndee, be mbii mo:

—Yimbe fuu ana ndaarte.

<sup>38</sup> Iisaa wii be:

—Njehen ley geelle 6adiide dee faa mi waajoo ton duu, sabi dum waddi kam.

<sup>39</sup> O yehi ley leydi Galili fuu, omo waajoo ley cuudi baajordi ma66e, omo ribba seydaani'en.

### *No Iisaa selliniri ceppaado*

<sup>40</sup> Gorko ceppaado wari diccii yeeso makko, ndaardi mo, wii:

—So tawii a jabii, ada waawi sellinde kam!

<sup>41</sup> Iisaa yurminaa, foocci junngo mum, memi mo, wii:

—Mi jabii, sellu!

<sup>42</sup> Don e don, cepe dee iwi e gorko oo, o selli. <sup>43</sup> Oon wakkati fuu, Iisaa yoppiti mo, daalii mo, <sup>44</sup> wii:

—Haya koy, pati humpitin fay gooto, yaa holloy hoore maa jottinoowo sadaka, ngadanaa laabugol maa ngol sadaka mo Muusaa yamiri oo faa anndina be a sellii.

<sup>45</sup> Kaa kanko, o iwi don tan, o darii omo saaka kabaaru oo. Dum wadi so Iisaa ronki naatude geelle, heddii ladde, yimbe ana iwra tatteeji fuu ana ngara e mum.

## 2

### *No Iisaa selliniri bonnguujjo*

<sup>1</sup> Caggal balde seeda, Iisaa warti ngeenndi Kafarnahum. Yimbe nani omo cuudi. <sup>2</sup> Jamaa keewdo hawriti don faa fay nokkuure heddaaki, wanaa haala

yeeso damal ngal, hedde omo waajoo 6e konngol Laamdo ngol. <sup>3</sup> Yim6e ngari, ngaddani mo bonnguujoo mo wor6e nayon ndoondii. <sup>4</sup> Kaa 6e ndonkii yottinde mo Iisaa sabaabu jamaa oo. Dum wadi so 6e kippiti bene oo foonndo makko, 6e njippiniri bonnguujoo oo e yulannde ndee, tawi ana lelnaa e dengeleewo. <sup>5</sup> Nde Iisaa yiinoo goondinal ma66e ndee, wii bonnguujoo oo:

—Gidam, luutti maa njaafaama.

<sup>6</sup> Dunkee'en Sariya joodinoobe don 6ee ndarii ana miiloo e berde mum'en: <sup>7</sup> «Hono oo gorko haaldi dum? O bonkike Laamdo! Homo waawi yaafaade luutti so wanaa Laamdo gooto oo?» <sup>8</sup> Iisaa faami don e don miilooji ma66e, wii 6e:

—Kodum wadi so odon miiloo miilooji baadi nii e berde moodon? <sup>9</sup> Wiide bonnguujoo «Luutti maa njaafaama» e wiide dum «Imma, 6am dengeleewo maa njahaa», kofum hen 6uri newaade? <sup>10</sup> Kaa, faa mi anndina on Bii Neddo ana jogii baawde e aduna oo yaafaade luutti...

Nden, o wii bonnguujoo oo:

<sup>11</sup> —Midó haalane: imma, 6am dengeleewo maa, kootaa suudu maa.

<sup>12</sup> Don e don gorko oo immii, 6ami dengeleewo mum witti, hedde yim6e fuu ana yeewa dum. Be fuu 6e kaaynaa, 6e ndarii e6e njetta Laamdo, e6e mbiya: —Min njiyaali hono dum abada.

### *No Iisaa noddiri Lewi*

<sup>13</sup> Iisaa wirfitii to weendu too. Jamaa oo fuu tawoyi mo ton, omo waajoo dum'en. <sup>14</sup> Nde o yahata ndee, o yii Lewi 6ii Alfaa ana joodii e duwaaneere mum, o wii dum:

—Jokku e am!

Lewi immii, jokki e makko. <sup>15</sup> Nde Iisaa jaamannoo e ley suudu Lewi ndee, duwaane'en heew6e e luuttoobe hono mum'en njoodii, ana jaamda e makko, kanko e taalibaa6e makko. Sabi yim6e heew6e ana njokki e Iisaa. <sup>16</sup> Dunkee'en Sariya jeyaa6e e waalde Farisa'en njii Iisaa ana jaamda e been yim6e, mbii taalibaa6e makko 6ee:

—Ko saabii so omo jaamda e duwaane'en, kaɓum e luuttoobe hono mum'en?

<sup>17</sup> Nde o nani dum ndee, o wii 6e:

—Wanaa celludo hasindini e cawroowo, jawdo hasindini e cawroowo. Wanaa noddude foocitiibe waddi kam, noddude luuttoobe woni ko waddi kam.

### *Haala koorka*

<sup>18</sup> Taalibaa6e Yaayaa e Farisa'en ana kooraa. E ley dum, yim6e ngari, lamndii Iisaa:

—Ko saabii so taalibaa6e Yaayaa e taalibaa6e Farisa'en ana kooraa, kaa 6e maa 6ee koorataa?

<sup>19</sup> O jaabii 6e, o wii:

—Nootiife kuurtungu ana mbaawi salaade jaamde tawa jommbaajo gorko oo ana wondi e mum'en naa? Mbaawaa. So nii jommbaajo gorko oo ana wondi e ma66e, 6e mbaawaa salaade jaamde. <sup>20</sup> Kaa jalaade ngaran de jommbaajo gorko oo ittete e hakkunde ma66e. E deen jalaade, 6e kooran.

<sup>21</sup> Fay gooto dammbataa fetalaare heyre e kaddungal kiinngal. So dum wadii, fetalaare heyre ndee daamtan kaddungal kiinngal ngal, ceekol ngol beydoo.

<sup>22</sup> Kasen duu fay gooto loowataa peguujam kesam e sumalleeji kiidfi. So dum wadii peguujam dam fusan di, kanjam e sumalleeji dii fuu mursidee. Peguujam kesam e sumalleeji kesi loowetee!

### *Haala jalaande fowteteende*

<sup>23</sup> Wadiino e jalaande fowteteende wootere, Iisaa ana seeka gese, taalibaa6e mum ana kelta butaali e laawol ngol. <sup>24</sup> E ley dum, Farisa'en 6ee mbii mo:

—Yeew, kodum wadi so taalibaa6e maa 6ee ana ngolla ko dagaaki gollude jalaande fowteteende?

<sup>25</sup> O jaabii 6e, o wii:

—Tama on meedaali janngude ko Daawuuda wadi nde yolbi haajaa ko jaamete, kaɗum e yim6e mum? <sup>26</sup> O naati e ley hukkuu ceniido oo e jamaanu Jottinoowo Sadaka Mawdo biyeteedo Abiyataar, o jaami buuru cackaado oo, o hokki hen yim6e makko. Tawee nee, yottinoobe sadaka tan ndunanaa jaamde oon buuru.

<sup>27</sup> Iisaa wii 6e kasen:

—Jalaande fowteteende ndee kammari neddo wadira, wanaa neddo wadira kammari jalaande fowteteende ndee. <sup>28</sup> Ndennoo fay jalaande fowteteende ndee, Bii Neddo woni joomum.

## 3

### *No Iisaa selliniri gorko ley jalaande fowteteende*

<sup>1</sup> Iisaa naati ley suudu waajordu nduu, o tawi ton gorko mo junngo mum waati. <sup>2</sup> Yim6e wonnoobe don 6ee ngattani Iisaa hakkille. Ana yeewa yalla o anniyiido sellinde gorko oo e jalaande fowteteende ndee, faa ke6a wullanaade mo. <sup>3</sup> Iisaa wii mo junngo mum waati oo:

—Imma, dara hakkunde ma66e!

<sup>4</sup> Caggal dum, o lamndii 6e:

—E ley jalaande fowteteende ana dagoo gollude ko moyyi naa gollude ko boni? Danndude neddo naa warde dum?

Kaa 6e njaabaaki. <sup>5</sup> Iisaa yeewri 6e tikkere, tiindam-hoore ma66e dam woyni yonki makko, o wii gorko oo:

—Fooccu junngo maa!

Oon foocci ngo tan, ngo selli faa ngo warti hono no wonngo ngoo nii. <sup>6</sup> Don e don, Farisa'en 6ee njalti, njooddii e howruu6e Hirudus faa ndawrida no mbarda Iisaa.

### *No yim6e ngariri e Iisaa*

<sup>7</sup> Caggal dum, o iwi don, o fa'i weendu too, kanko e taalibaa6e makko. Jamaa keewdo iwdo Galili jokki e makko. <sup>8</sup> Yim6e heew6e, iw6e Yahuudiya e Urusaliima e Idumiya e leydi funnaange Urdun e seraaji Tirus e Sidon, nani ko o wadannoo koo, ngari to makko. <sup>9</sup> Iisaa wii taalibaa6e mum 6ee ndaarana dum laana pati jamaa oo gilla dum. <sup>10</sup> Saabe omo sellinannoo heew6e wadi so jaw6e 6ee fuu kepanii mo yalla ana mema mo. <sup>11</sup> Wakkati mo seydaani'en njii mo fuu, ndiccoto, ngulla:

—Aan a Bii Laamdo!

<sup>12</sup> Omo yagginannoo 6e pati 6e kumpita fay gooto kabaaru makko.

### *No Iisaa suborii taalibaabe sappo e didon*

<sup>13</sup> Caggal dum, o njabboyi dow waamnde haayre, o noddii 6e o muuyi noddude, 6een ngari e makko. <sup>14</sup> O subii hen sappo e didon, yalla ana ngonda e makko, o nela dum'en waajoyaade, <sup>15</sup> kasen o hokka dum'en baawde ribbude seydaani'en. <sup>16</sup> Bee doo ngoni sappo e didon 6e o subii 6ee: Simon mo o innditiri Piyeer oo <sup>17</sup> e Yaakuuba e mijum biyeteedo Yuhanna, 6i66e Jebede



6e o innditiri Bowanerges 6ee (maanaa mum woni «nanndu6e e gidaango») <sup>18</sup> kaɓum e Andire e Filipa e Bartolome e Matta e Tomaa e Yaakuuba 6ii Alfaa e Tadde e Simon kiranoowo suudu baaba <sup>19</sup> e Yahuuda Isikariyota jammbotoodo mo oo.

### *No Iisaa fenniri ko happaa koo*

<sup>20</sup> Caggal d̄um, o hooti cuud̄i. Jamaa hawriti dow hoore makko kasen faa kanko e taalibaabe makko 6e ndonki he6ude no 6e ɓaamira. <sup>21</sup> Nde sakiraa6e makko nani d̄um ndee, ngarani mo, sabi wiyaama hakkille makko sottii.

<sup>22</sup> Dunkee'en Sariya iwnoo6e Urusaliima ngari, mbii:

—Beelsebul woni e makko.

Kasen 6e mbii:

—Oon woni hooreejo seyɗaani'en mo o ribbirta seyɗaani'en 6ee.

<sup>23</sup> E ley d̄um, Iisaa nodd̄i 6e 6e ngara e mum, haalaniri 6e banndol, wii:

—Hono Ibiliisa waawirta ribbude Ibiliisa? <sup>24</sup> So laamu fecciima ana ha6a e hoore mum, oon laamu waawataa heddaade. <sup>25</sup> Kasen duu so galle fecciima ana ha6a e hoore mum, oon galle waawataa heddaade. <sup>26</sup> Ndennoo, so Ibiliisa yanii e hoore mum fecciima, waawataa heddaade. Ko laatoto dee, kabaaru mum timman.

<sup>27</sup> Iisaa jokkini hen:

—Fay gooto waawaa naatude e galle gorko jom semmbe yaada e jawdi mum tawa ha66aali joomum tafon. Kaa so ha66ii joomum faa teenjii, ana waawi na6ude ko woni e galle mum fuu. <sup>28</sup> Mid̄o haalana on goonga: yim6e ana mbaawi yaafeede luutti mum'en fuu e bonkaaji d̄i 6e mbonkii Laamdo fuu. <sup>29</sup> Kaa bonkiid̄o Ruuhu Ceniid̄o oo he6ataa yaafaamuya fey, sabi joomum heddoto e luuttal mum faa abada.

<sup>30</sup> Iisaa haaldii kaa haala saabe ko 6e mbii omo wondi e seyɗaani koo.

### *Inna Iisaa e mijiraa6e Iisaa*

<sup>31</sup> Inna Iisaa e mijiraa6e Iisaa wor6e ngari, ndarii caggal galle oo, neli o noddee. <sup>32</sup> Do jamaa oo filii mo doo, wii mo:

—Inna maa e mijiraa6e maa ana sella too, ana kaaje maa.

<sup>33</sup> O jaabii, o wii:

—Homo woni innam e mijiraa6e am?

<sup>34</sup> O yeewi joodiibe so ana pilli mo 6ee, o wii:

—Innam e mijiraa6e am annii. <sup>35</sup> Sabi gaɗoowo sago Laamdo, kaɓum woni mijam gorko, kaɓum woni mijam debbo, kaɓum woni innam.

## 4

### *Banndol haala aawoowo*

<sup>1</sup> Iisaa ana waajoo dow fonngo weendu nduu kasen. Jamaa keewdo filii mo faa o naati laana, o joodii. Jamaa oo fuu ana dow fonngo ngoo. <sup>2</sup> O darii omo waajoroo 6e gede keewde e banndol, omo wiya 6e:

<sup>3</sup> —Kettinee! Aawoowo yalti aawoyde. <sup>4</sup> E ley sankugol ngol, yoga e aawdi ndii saami e laawol: pooli ngari cuɗi d̄um. <sup>5</sup> Yoga mayri saami e korokaaye do leydi heewaano, fud̄i don e don, sabi aawdi ndii suddaaki gasa. <sup>6</sup> Kaa nde naange wulnoo ndee, sumi, yoori saabe walaa ɗadi. <sup>7</sup> Yoga mayri saami do kebbe pudata. Ndi fud̄idi e majje, de cuumi ndi, ndi rimaali. <sup>8</sup> Yoga mayri saami e leydi mbelndi, fud̄i, mawni, rimi: yoga sowii cowe capantati, yoga capande jeegom, yoga teemedere.

<sup>9</sup> Caggal d̄um, o wii:

—Jom nowru fuu yo nanu!

<sup>10</sup> Nden Iisaa teelti, sappo e didon 6ee e filinoobe mo 6ee lamndii mo maanaa banndol ngol. <sup>11</sup> O wii 6e:

—Onon, on ndokkaama faamde goonga teddufo haala Laamu Laamdo oo. Kaa won6e sella 6ee, huunde fuu e banndol kaalaniran-mi 6e. <sup>12</sup> Dum wadi so:

«ana yeewa faa gasa tawa njiyataa,  
ana nana faa laa6a paca tawa paamataa,  
sako 6e tuuba so 6e njaafee.»\*

<sup>13</sup> O wii 6e:

—On paamaali ngol banndol naa? Hono paamirton banndi goddi dii fuu ndennoo? <sup>14</sup> Aawoowo oo konngol Laamdo o aawata. <sup>15</sup> Yim6e yogaa6e ana nanndi e laawol do aawdi ndii saami doo. Be nanan konngol ngol, oon wakkati fuu Ibiliisa warata so itta konngol aawaangol e ma66e ngol. <sup>16</sup> Yogaa6e ana nanndi e korokaaye de aawdi ndii yuppil e muudum dee. Be nanan konngol ngol, 6e nja66oroo ngol seyo oon wakkati fuu, <sup>17</sup> kaa ngol walaa dadi e ma66e, wakkati gooto tan ngol wonata e ma66e. Wakkati mo billaare naa torra hewti 6e saabe konngol ngol fuu, 6e njankiran. <sup>18</sup> Yogaa6e 6ee ana nanndi e nokku kebbe do aawdi ndii saami doo. Bee ngoni nan6e konngol ngol, <sup>19</sup> kaa sugullaaji aduna e koomti jawdi, kaɲum e gidaade yonki godde naatan e ma66e, cuuma konngol ngol, ngol laatoo dimarol. <sup>20</sup> Kaa do aawdi ndii saami e leydi lobbiri doo, 6ee ngoni nanoo6e konngol ngol so nja6a ngol. Be ndiman: yoga sowoo cowe capantati, yoga capande jeegom, yoga teemedere.

### *Haala Laamu Laamdo*

<sup>21</sup> Caggal dum, Iisaa wii 6e:

—Won fuu ku66oowo lampa so hippa hen saawal, naa soorna dum ley leeso? Wanaa sinndan dum naa? <sup>22</sup> Walaa fuu ko ɲoo6i ko banngintaake, walaa ko suudii ko yaltintaake sella. <sup>23</sup> Jom nowru fuu yo nanu!

<sup>24</sup> O wii 6e kasen:

—Tiidee e no nanirton haalaaji am dii nii! Sabi no etirton nii, non etirante-don on beydante duu. <sup>25</sup> Sabi jogiido fuu beydante, kaa mo walaa oo, fay seeda mo jogii oo teetete.

<sup>26</sup> O wii kasen:

—Laamu Laamdo ana wa'i no neddo cankufo aawdi e ngesa mum nii. <sup>27</sup> Caggal mum, daanoo jemma daroo ɲalooma, no laatii fuu aawdi ndii fudan, mawna, tawa joomum anndaa no ndi mawniri. <sup>28</sup> Leydi ndii e hoore mum fudinta ndi, ndi wada gulle, wutaandu jokka hen, caggal dum, gabbe njokka hen. <sup>29</sup> So ko aawaa koo benndii, o 6aman wawdu makko o hetta, sabi wakkati mum yottike.

<sup>30</sup> O jokkini hen:

—Kodum nanndinten e Laamu Laamdo oo? Banndol hongol mbanndirten mo? <sup>31</sup> Laamu Laamdo ana nanndi e ngeeyu buyaage. Kaɲum buri geeyi dii fuu famdude. <sup>32</sup> Kaa so mo aawaama, mo mawnan faa mo laatoo lekki mawki sanne, ki wada ca6e mawde faa pooli mbaawa ɲibude cuudi e dowdi makki.

<sup>33</sup> Iisaa haalaniri yim6e 6ee konngol Laamdo ngol e banndi keewdi baadi non, ko waarata e faamu ma66e. <sup>34</sup> O waajortaako so wanaa e banndol. Kaa nde o teeldi e taalibaabe makko 6ee fuu, o firritanan dum'en banndi dii fuu.

\*

\* 4:12 Esaaya 6.9-10

*No Iisaa waaltiniri henndu*

<sup>35</sup> Kiikiide oon jalooma, Iisaa wii taalibaa6e mum 6ee:

—Lummben, keedoyen ootoo banng'e.

<sup>36</sup> Be njoppi jamaa oo, 6e tawti mo e laana ka o wonnoo e mum kaa, 6e ndeerti. Laanaaji goddi duu ana njokki e makko. <sup>37</sup> Henndu sattundu immii, bempeeje immii ana piya laana kaa, faa ka hosi heewde ndiyam. <sup>38</sup> Kanko, omo daanii to laaci laana too, omo wawlii mbawlu. Be pinndini mo, 6e mbii mo:

—Moobbo, tama ko min kalkotoo koo wemmbaali ma?

<sup>39</sup> O immii, o jahii e henndu nduu, o wii weendu nduu:

—Deyyina! Wii teen!

Henndu nduu deyyinii, fuu wii teen. <sup>40</sup> Caggal dum, o wii 6e:

—Ko saabii so kul-don? Faa hannde on ngalaa hoolaare naa?

<sup>41</sup> Be kuli kulol cattungol hedde e6e mbiyondira:

—Homo oo gorko woni faa henndu e ndiyam ana d'owtanoo dum?

**5***No Iisaa selliniri laddaado*

<sup>1</sup> Caggal dum, 6e njottii oo too banng'e e weendu nduu, e leydi Gerasankoo6e. <sup>2</sup> Nde Iisaa yalti laana kaa ndee, laddaado iwri ley janaale, hawri e makko. <sup>3</sup> Ley janaale dee o joodinoo, fay gooto waawaa ha66ude mo, sabi fay calali ka66ataa mo. <sup>4</sup> Sabi heewii ko o humti tonngood'e e calali, o tayan calali, o hela geyyelle. Fay gooto waawaa nanngirde mo semmbe. <sup>5</sup> Nannde fuu, jemma e jalooma ley janaale e baamle kaaye o woni, omo wulla omo fiitoroo kaaye. <sup>6</sup> O soynii Iisaa, o dogani dum, o sujidani dum, <sup>7</sup> o wulli faa toowi, o wii:

—Iisaa Bii Laamdo Toowdo, kodum njid-daa wadude kam? Mi surdii ma saabe Laamdo, pati torram!

<sup>8</sup> Walaa ko o wiiri non sinaa Iisaa wii mo:

—Seydaani, yaltu e makko.

<sup>9</sup> Iisaa lamndii mo, wii:

—Hono mbiyete-daa?

O jaabii, o wii:

—Mido wiyee jamaa, sabi miden keewi.

<sup>10</sup> O naagii dum sanne, o ndaardi dum pati yaltina seydaani'en 6ee leydi ndii. <sup>11</sup> Sewre girooji mawnde ana durannoo don e hoore waamnde haayre.

<sup>12</sup> Seydaani'en 6ee ndaardi mo o dujanoo dum'en naata e ley girooji dii. <sup>13</sup> O dujanii 6e dum. Seydaani'en 6ee njalti, naati e girooji dii. Sewre ndee fuu diiri iwi daande waamnde haayre too, naatoyi ley weendu nduu, yoolii. Edi poti ujunaaji didi. <sup>14</sup> Duroo6e 6ee ndogi njantanoyii ngeenndi ndii e seraaji mum ko hewtii dum'en koo. Yim6e 6ee njehi yeewoyde ko wadi koo, <sup>15</sup> 6e ngari e Iisaa. Nde 6e njii gorko laddanoo6o oo ana joodii ana 6oornii kaddule, yeedditii ndee, kulol nanngi 6e. <sup>16</sup> Tawaa6e don 6ee njantanii 6e ko hewtinoo laddaado oo e girooji dii. <sup>17</sup> Be ndaardi Iisaa yalta leydi ma66e ndii.

<sup>18</sup> Nde o naattata laana kaa ndee, laddanoo6o oo ndaardi mo o acca jokka e makko. <sup>19</sup> O salanii oon, o wii dum:

—Hootu suudu maa e koreeji maa, kumpitaa 6e ko Joomiraado wadan maa e no o yurmori maa.

<sup>20</sup> O yehi omo haala e leydi ndi geelle sappo ndii ko Iisaa wadani mo. Be fuu 6e kaaynaa.

*No Iisaa wuurtiniri bii Jayrus e no selliniri debbo jawdo*

<sup>21</sup> Nde Iisaa naati e laana wirfittii oo too banngge weendu nduu ndee, jamaa keewdo filii mo kasen dow fonngo doo. <sup>22</sup> Nden gooto e hooree6e suudu waajordu biyeteedo Jayrus wari. O yii Iisaa tan, o diccii yeeso mum, <sup>23</sup> o naagii dum o haali faa heewi, o wii:

—Biyam debbo ana ha6ana yonki. War faw junngo maa e makko, yalla omo sella, o wuura!

<sup>24</sup> Iisaa yaadi e makko, jamaa keewdo jokki e mum faa ana 6illa dum.

<sup>25</sup> Debbo mo tuundi mum tayataa ko waarata e duubi sappo e didi ana wonnoo ton. <sup>26</sup> O tampii hen sanne, o yehii to sawroo6e heew6e faa junngo makko laa6i. Ko 6uri dum fuu o yiyaali hen sami, jaw oo beydoto jaati. <sup>27-28</sup> O nani haala Iisaa ana haalee, o naati e jamaa oo. Sabi o miilii: «So mi memii saaya makko tan, mi sellan.» O iwri caggal mum, o memi saaya mum. <sup>29</sup> Don e don tuundi makko tayi, o maati e caldi makko o sellii. <sup>30</sup> Oon wakkati fuu, Iisaa maati won semmbe iwi e mum, yeecitii hakkunde jamaa oo, wii:

—Homo memi saaya am?

<sup>31</sup> Taalibaa6e makko 6ee mbii mo:

—A yii jamaa annii 6illu maa, ada lamndoo: «Homo memi kam?»

<sup>32</sup> Kaa o darii omo tewta memdo mo oo. <sup>33</sup> Debbo oo ana siyya no foti hulde sabi ana anndi ko wadi, wari, diccii yeeso makko, haalani mo goonga. <sup>34</sup> Iisaa wii mo:

—Banndam debbo, goondinal maa danndii ma. Yaa e jam! A sellii e jaw maa oo!

<sup>35</sup> O tilaaki haalde, faa won iwru6e to suudu Jayrus hooreejo waajordu oo, mbii dum:

—Biya oo heddaaki. Fotaa ko tampinaa Moobbo oo hankasen!

<sup>36</sup> Kaa Iisaa tippitii haala ma66e, wii Jayrus:

—Pati hul, hoolam tan!

<sup>37</sup> O dalaali fay gooto yaada e makko so wanaa Piyeer e Yaakuuba e Yuhanna mijjii Yaakuuba oo. <sup>38</sup> Be njottii suudu hooreejo waajordu nduu oo. O tawi don dooyoore, yim6e ana mboya, ana conkina semmbe. <sup>39</sup> Nde o naatunoo ndee, o wii 6e:

—Ko woni dii bojji e dii jonaali? Suka oo maayaali, o daaniido tan.

<sup>40</sup> Be puuytini haala makko. Non o yaltini 6e fuu, o naatidi e baaba suka oo e inna mum e taalibaa6e taton 6ee suudu to suka oo lelii too. <sup>41</sup> O nanngi junngo mum, o wii:

—*Talita kuumii!* (Dum woni: «Suka debbo, imma!»)

<sup>42</sup> Suka oo immii don e don, ana yaha. Duubi makko yo sappo e didi. Yim6e 6ee kaaynaa sanne. <sup>43</sup> Iisaa yaggini 6e pati 6e anndina dum fay gooto. O wii 6e ndokka suka oo ko jaama.

## 6

*No Nasaraatunkoo6e calorii jabande Iisaa*

<sup>1</sup> Iisaa iwi e oon nokku, taalibaa6e mum njokki e mum, wirfittii ngeenndi mum'en. <sup>2</sup> Nde jalaande fowteteende yottinoo ndee, o fuddi waajaade ley suudu waajordu nduu. Nan6e waaju makko 6ee kaaynaa, hedde ana mbiya:

—Hoto o he6i dum? Hono o he6iri oo hakkille? Yee! Hono neddo waawiri wadirde dii kaayefiiji? <sup>3</sup> Tama o wanaa cehoowo ledde, tama o wanaa bii Mariyama? Tama o wanaa mawnii Yaakuuba e Yoses e Yahuuda e Simon? Tama wanaa enen e banndiraa6e makko rew6e koddi?

Kammari dum wadi so 6e njankiri mo. <sup>4</sup> E oon wakkati, o wii 6e:

—Annabaajo ana teddinaa nokku fuu so wanaa e ley ngeenndi mum'en e hakkunde rimdaa6e mum, kaɗum e ley galle mum'en.

<sup>5</sup> Iisaa hebaali wadufe don fay haaynde wootere, so wanaa ko fawi junngo mum e ɗaw6e seeda, sellini dum'en. <sup>6</sup> Kasen duu waasude ma66e goondinde laatanii mo haaynde.

### *No Iisaa neliri taalibaa6e mum sappo e didon bee*

Caggal dum, Iisaa yiilii e geelle piliide don dee, ana waajoo. <sup>7</sup> O noddi taalibaa6e sappo e didon bee, o neliri dum'en didon didon. O hokki 6e baawde ribbude seydaani'en, <sup>8</sup> o wii 6e so e6e ndawa, pati 6e na6ora fay huunde, so wanaa sawru. Pati 6e na6ora buuru naa mbasu naa kaalisi e ley njiibaaji ma66e. <sup>9</sup> O yamiri 6e 6e boornoo pade, kaa pati 6e na6ora saayaaji didi. <sup>10</sup> O wii 6e kasen:

—Galle fuu mo njippi-don e mum, keddo-don don faa nde iw-don e oon nokku fuu. <sup>11</sup> So on ngarii e nokku, yim6e nja66aaki on naa kettinanaaki on, iwon ton, pidon colla koyde moodon faa jeertina 6e ko 6e ngadi koo ana boni.

<sup>12</sup> Be njehi, 6e mbaajii yim6e 6ee tuuba, <sup>13</sup> 6e ndibbi seydaani'en heew6e, 6e nguji nebam e ɗaw6e heew6e 6e cellini dum'en.

### *No Yaayaa maayiri*

<sup>14</sup> Hirudus, kaananke oo, nani haala Iisaa ana haalee, sabi innde Iisaa walaa fuu do yottaaki. Won wiyoo6e Yaayaa mo lootogal batisima wuurti, dum wadi so o jogii baawde wadufe kaayde. <sup>15</sup> Wo66e ana mbiya o annabi Iliyaasa. Wo66e duu ana mbiya o annabaajo no annabaabe aranndee6e 6ee nii. <sup>16</sup> Nde Hirudus nani dum ndee, wii:

—Yaayaa mo tayunoo-mi hoore mum oo, kaɗum wuurti!

<sup>17</sup> Tawi Hirudus yamiriino Yaayaa nanngée, ha66ee, uddee ley kasu. Saabe Hirudiya jom suudu mawniiko biyeteedo Filipa mo o 6amnoo oo, wadi.

<sup>18</sup> Sabi Yaayaa ana wiyannoo mo:

—Dagantaako ma teetaa jom suudu mawna.

<sup>19</sup> Hirudiya mettaa e Yaayaa, yidi o waree, kaa hebaali laawol, <sup>20</sup> sabi Hirudus ana hulannoo Yaayaa, ana anndunoo o gorko poocciitido, ceniido. Dum wadi so o mo haybannoo dum. So o hettinike haala mum, hakkille makko jii6oto, haya kasen duu omo yidi hettinaade dum.

<sup>21</sup> Kaa noo, Hirudiya he6i laawol ɗannde yiitu-mawuuri rimeede Hirudus. Hirudus wadani howruufe mum e hooree6e sordaasi'en 6ee e inndee-anndee'en Galili 6ee fuu hiraande. <sup>22</sup> Bii Hirudiya debbo naati ana woma. Dum weli Hirudus e nootiife dum 6ee fuu. O wii suka debbo oo:

—Haalanam ko njid-ɗaa faa mi wadane.

<sup>23</sup> O hunanii dum, o wii o hokkan dum huunde fuu ko ɗaagii mo, fay so tawii feccere laamu makko oo. <sup>24</sup> E ley dum, suka debbo oo yalti, wii inna mum:

—Kodum kaan-mi ɗaagaade?

Inniraado oo jaabii mo, wii:

—Naaga mo hoore Yaayaa mo lootogal batisima oo!

<sup>25</sup> Suka debbo oo hejii, wirfitii to kaananke oo too, ɗaagii dum, wii:

—Ko njidu-mi, ngaddanaa kam jooni jooni hoore Yaayaa mo lootogal batisima oo e la'al!

<sup>26</sup> Terde Hirudus mbaati faa wanaa seese, kaa nde wonnoo o hunike yeeso nootiife mo 6ee, o waji yaltude e konngol makko ngol. <sup>27</sup> O neli don e don gooto e sordaasi'en doomo6e mo 6ee, o yamiri dum yo waddoy hoore Yaayaa. Sordaasi oo wirfitii, naati e ley kasu oo, tayi hoore Yaayaa, <sup>28</sup> tummbi

e la'al, waddi, hokki suka debbo oo. Suka debbo oo duu hokki inna mum.  
<sup>29</sup> Nde taalibaa6e Yaayaa 6ee nani dum ndee, ngari 6amti tew makko oo, ngadoyi dum e yanaande.

*No Iisaa jamminiri ujunaaji joy neddo*

<sup>30</sup> Nelaabe 6ee ngarti e Iisaa, njantanii dum ko ngadi koo e ko mbaajii koo fuu. <sup>31</sup> O wii 6e:

—Njehen nokku teeldo, yalla odon ke6a fowtinaade.

Sabi yaha-warta ana heewi, faa kanko e taalibaa6e makko 6ee, 6e ndonki he6ude fay no 6e jaamira. <sup>32</sup> Be njehi 6e naatoyi laana, 6e teeli kam6e tan e feere ma66e, <sup>33</sup> tawi heew6e njii e6e njaha, annditi to 6e peewi. Yim6e heew6e iwri e geelle dee fuu, kejanii to 6e peewi too, adii 6e yottaade. <sup>34</sup> Nde o yalti e laana kaa ndee, o yii jamaa keewdo. O yurminaa 6e sanne, sabi e6e mba'i no baali de ngalaa duroowo nii. O darii omo waajoo 6e kulle keewde. <sup>35</sup> Nde hiiri ndee, taalibaa6e 6ee 6attitii mo, mbii:

—Jooni hiirii, kasen duu nokku oo yo ladde. <sup>36</sup> Yoppitin jamaa oo saakoo e geelle e daakaaji piliidi dii yalla ana coodoya ko jaama.

<sup>37</sup> O jaabii 6e, o wii:

—Onon e ko'e moodon, ndokkee 6e ko 6e jaama!

Non 6e lamndii mo, 6e mbii:

—Ndennoo ada yidi min 6ama buudi cardi teemedede didi min coodano ya 6e buuru ko 6e jaama?

<sup>38</sup> E oon wakkati, o wii 6e:

—Hono foti buuruuje njogi-don? Njehee yeewoyee!

Nde 6e njehi 6e kumpitoyii ndee, 6e mbii mo:

—Buuruuje joy e liddi didi min njogii.

<sup>39</sup> O yamiri taalibaa6e 6ee njoyyinira jamaa oo tunaale-tunaale dow hudo hecco. <sup>40</sup> Be njoodii 6e ngadi tunaale-tunaale, yoga teemedere neddo, yoga capande njoyon. <sup>41</sup> O 6ami buuruuje joy dee e liddi didi dii, o tiggittii kammu, o yetti Laamdo. O tayi buuru oo, o hokki taalibaa6e 6ee njeda yim6e 6ee. Hono non liddi didi dii duu. <sup>42</sup> Be fuu 6e jaami faa 6e keddi. <sup>43</sup> Taalibaa6e 6ee ndeentini kedde dee, kebbini cagiije sappo e didi. <sup>44</sup> Ujunaaji joy gorko jaamunoo buuru oo.

*No Iisaa yaariri koyde dow ndiyam*

<sup>45</sup> Don tan, Iisaa yamiri taalibaa6e mum naata laana kaa yalla ana adoo dum oo too banngwe weendu nduu faade Baytisayda, tawi kanko e hoore makko omo wondi e yoppitinde jamaa oo. <sup>46</sup> Nde o seerti e ma66e ndee, o jabbayi dow waamnde haayre faa o wada duwaawu.

<sup>47</sup> Nde jemma wari ndee, tawi laana kaa ana hakkunde weendu too, kanko tan gooto heddi njoorndi. <sup>48</sup> O soynii taalibaa6e 6ee ana ngurfa ko mbaawi fuu, sabi 6e nja66otoo6e henndu. Nde 6adinoo weetude ndee, o wari e ma66e omo yaara koyde dow ndiyam dam, faa o hosi ya66aade 6e. <sup>49</sup> Kaa nde 6e njii mo omo yaha e dow ndiyam dam ndee, 6e cikki dum seydaani, 6e ndarii e6e ngulla, <sup>50</sup> sabi 6e fuu, nde 6e njiinoo mo ndee, 6e kulii. Don e don Iisaa wii 6e:

—Mbaaltinee hakkillaaji moodon! Miin, mi Iisaa, pati kulee!

<sup>51</sup> O naati laana kaa, o tawti 6e, henndu nduu darii. Be mugaa. <sup>52</sup> Be paamaano haaynde nde Iisaa wadiri buuru oo ndee, sabi 6e wum6e 6erde.

<sup>53</sup> Be lummbi weendu nduu, 6e njottii Genesaret, 6e panndi don. <sup>54</sup> Be njalti e laana kaa tan, yim6e 6ee annditi mo, <sup>55</sup> caakii e seraaji dii fuu, ana pawa jaw6e mum'en e dengeleeje, ana ngaddana mo nokku fuu do nanaa omo

woodi. <sup>56</sup>Kasen duu do Iisaa tawaa fuu, gila e ley gure faa e geelle faa e ladde, yimbe 6ee ngaddan jawbe mum'en e daalaa'e, ana jaagoo mo mo acca 6e mema fay so kommbol saaya makko. Kasen duu memdo dum fuu sellii.

## 7

### Haala neesu njaatiraa'be

<sup>1</sup> Farisa'en e yoga e dunkee'en Sariya iwnoo'be Urusaliima pili Iisaa. <sup>2</sup> Be njii won e taalibaa'be makko ana jaamira juude cobude, dum woni tawa looti-raali no tawaangal ma'bbe worri nii.\* <sup>3</sup> Sabi Farisa'en e Yahuudiyankoo'be fuu jaamataa lootaali juude mum'en faa laa'ba, neesu njaatiraa'be ma'bbe oo 6e njokki. <sup>4</sup> So 6e ngartii luumo, 6e jaamataa so 6e lootaaki. E 6e njogii neesuuji goddi keewdi di 6e njokki, ko wa'i hono lawyude kore loode e potiije e kaaki jakawalle. <sup>5</sup> E oon wakkati, Farisa'en e dunkee'en Sariya lamndii Iisaa, mbii: —Kodum wadi so taalibaa'be maa 6ee ana mbaasa rewde neesuuji njaatiraa'be meeden dii, ana jaamira juude cobude?

<sup>6</sup> O jaabii 6e, o wii:

—Annabi Esaaya woofaali fey nde sappinoo e moodon, onon naafigi'en 6ee, ngol doo konggol:

«Ngol lejol e haala tan teddinirta kam,  
kaa e ley berde ma'bbe e'be ngoddi kam.

<sup>7</sup> Meere 6e ndewata kam,

sabi ko 6e tuugii e ley janningol ma'bbe koo yo jamirooje yimbe tan.»†

<sup>8</sup> Iisaa jokkini hen, wii:

—Odon njoppa jamirooje Laamdo dee, odon njokka neesuuji yimbe dii.

<sup>9</sup> Eyyoo! Odon mbaawi salaade yamiroore Laamdo faa loomtinon nde neesu moodon! <sup>10</sup> Sabi Muusaa wii: «Teddin inna maa e baam maa.»‡ O wii kasen: «Kududo inna mum naa baam mum, wareede laato jukkungo mum.»§ <sup>11</sup> Kaa onon, odon mbiya: so neddo wii inna mum naa baam mum: «Ko kaannoo-mi wallirde ma koo yo *Korbaan*» (dum woni sadaka Laamdo), <sup>12</sup> hankasen fotaa ko o walla inna makko naa baam makko. <sup>13</sup> Hono non tosirton konggol Laamdo neesuuji di ndonondirton dii. Kasen duu odon ngada kulle keewde baade non.

<sup>14</sup> Caggal dum, Iisaa nodditi jamaa oo, wii dum:

—Kettinane kam, on fuu paamee: <sup>15</sup> Fay huunde naatataa e neddo so sobina dum, kaa kudde iwooje e neddo dee, karnum cobinta dum. [ <sup>16</sup>\* ]

<sup>17</sup> Nde Iisaa seertii e jamaa oo so naatoyi ley suudu ndee, taalibaa'be mum 6ee lamndii dum maanaa banndol ngol. <sup>18</sup> O wii 6e:

—Onon duu, edum finkinii on naa? On paamaali ko iwata sella so naata e hunduko neddo koo, sobintaa joomum? <sup>19</sup> Sabi dum naataali e bernde joomum, e reedu mum naati, kasen duu dum yaltan.

Dii haalaaji Iisaa daginirii jaamdu fuu. <sup>20</sup> O wii kasen:

—Ko yaltata e bernde koo, dum sobinta neddo. <sup>21</sup> Sabi e bernde neddo miilooji bondi iwata so ndunya dum e faasigaaku e nguyka e jaako'aaku e <sup>22</sup> jeenu e joote e comdam e jamma e somburaaku e haasidaaku e mbonka

\* **7:2** Ngol lootugol juude ha'baaaki e ittude tuundi, kammari faa joomum foocitanoo diina wadira.

† **7:7** Esaaya 29.13 ‡ **7:10** Pergu 20.12; Fillitagol Tawreeta 5.16 § **7:10** Pergu 21.17; Lewinkoo'be 20.9 \* **7:16** E dereeji booydi dii, yoga ana beyda aaya 16:Jom norru fuu yo nanu!

e mawninkinaare, kaɗum e majjere. <sup>23</sup> Deen gefe bonde fuu e bernde iwata, kasen duu kaɗum'en cobinta neddo.

*No debbo mo wanaa Yahuudiyanke goondiniri Iisaa*

<sup>24</sup> Iisaa iwi don fa'i leydi Tirus. O jippii e galle gooto. O yidaano fay gooto humpitoo omo ton, kaa o waawaano suudaade. <sup>25</sup> E ley dum, debbo gooto mo binngel mum dewel laddaa, nani haala makko ana haalee, hejanii mo sujidi yeeso makko. <sup>26</sup> Oon debbo wanaa Yahuudiyanke, o leɗol Sirifenisi'en. O naagii Iisaa itta ladde ndee e biyiiko oo. <sup>27</sup> Kaa Iisaa wii mo:

—Accu sukaaɓe bee kaara tafon. Sabi ɓamde ɗaamdu sukaaɓe so tippoo dawaadi moyyaa.

<sup>28</sup> Debbo oo jaabii, wii mo:

—Goonga, Moobbo, kaa fay dawaadi minotoodi dɗi ana ɗaama ɗaamdu sukaaɓe iwooru e la'al so saama nduu.

<sup>29</sup> E oon wakkati, Iisaa wii mo:

—Saabe oo jaabu, hootu, ladde ndee yaltii e ɓiya oo.

<sup>30</sup> E ley dum, o hooti, o tawi biyiiko oo ana lelii dow leeso, ladde ndee yaltii e mum.

*No Iisaa selliniri gorko paho mo haala mum laaɓaa*

<sup>31</sup> Iisaa iwi leydi Tirus, wardi leydi Sidon, tacciti leydi ndi geelle sappo ndii, warti weendu Galili. <sup>32</sup> O waddanaa gorko paho mo haala mum laaɓaa, o ɗaagaa o fawa junngo makko e dow mum. <sup>33</sup> E oon wakkati, Iisaa woddintini mo jamaa oo, wadi pedeeli mum e noppi makko, siryi, memiri cirye dee demngal makko. <sup>34</sup> Caggal dum, o tiggiti kammu, o uumi, o wii paho oo:

—*Efata!* (Dum woni: «Sukkita!»)

<sup>35</sup> Don e don, noppi gorko oo cukkiti, demngal mum tonngitii, hedde ana haalira no haalirtee nii. <sup>36</sup> Iisaa hadi yimɓe bee haalande dum fay gooto. Kaa omo hada ɓe dum tan, eɓe beydoo haalde. <sup>37</sup> Be kaaynaa faa yottii kaaddi, eɓe mbiya:

—Golle makko fuu ana moyyi. Omo nanina faaduɓe, omo haalina muumduɓe.

## 8

*No Iisaa ɗamminiri ujunaaji nay neddo*

<sup>1</sup> E oon wakkati, jamaa keewɗo hawriti kasen. Nde wonnoo ɓe ngalaa ko ɓe ɗaama, Iisaa noddi taalibaaɓe mum ɓee, wii dum'en:

<sup>2</sup> —Bee yimɓe ana nɗurminii kam, sabi hannde woni balɗe tati eɓe ngondi e am, ɓe keddoraaki ko ɓe ɗaama. <sup>3</sup> So mi yoppitii ɓe koota tawee ɓe ɗaamaali, ɓe mboɓfoto yolbere e laawol. Sabi yoga maɓɓe iwii to woddi.

<sup>4</sup> Taalibaaɓe makko ɓee njaabii mo, mbii:

—Hoto fuu keɓaten ko ɗamminen ɓe e ley ndee ladde jeereende?

<sup>5</sup> O lamndii taalibaaɓe makko ɓee, o wii:

—Hono foti buuruuje njogi-don?

Be mbii mo:

—Buuruuje jeddi min njogii.

<sup>6</sup> E ley dum, o yamiri jamaa oo joodoo e leydi. O ɓami buuruuje jeddi dee, o yetti Laamdo, o tayi de, o hokki taalibaaɓe makko ɓee njeda jamaa oo. Be ngadiri non. <sup>7</sup> Eɓe njoginoo kasen liikoy pamaroy seɗa. Iisaa yetti Laamdo dow makkoy, wii taalibaaɓe mum ɓee njeda koy, kankoy duu. <sup>8</sup> Be ɗaami faa ɓe keddi. Taalibaaɓe ɓee ndeentini kedde dee, de kebbini cagiije jeddi. <sup>9</sup> Eɓe



poti ujunaaji nay neddo. Caggal dum, Iisaa yoppiti 6e, <sup>10</sup> naatidi e taalibaa6e mum laana don e don, fa'i leydi Dalmanuuta.

*No Farisa'en ndaardiri taagumansa*

<sup>11</sup> Farisa'en 6ee ngari, puɗɗi hiitondirde e Iisaa. Faa itta koro makko, 6e ndaardi mo o holla 6e taagumansa kaayniido iwoowo dow kammu. <sup>12</sup> Iisaa uumi, wii:

—Kodum wadi so oo doo jamaanu ana ndaara holleede taagumansa? Mido haalana on goonga: fay taagumansa gooto mo hebataa!

<sup>13</sup> Caggal dum, o seerti e ma66e, o naatti e laana kaa, o fa'i oo too banng'e.

<sup>14</sup> Taalibaa6e 6ee njeggiti yoo6aade naamdu, sabi buuruwal gootal tan heddiino e ley laana kaa. <sup>15</sup> E oon wakkati, o yaggini 6e, o wii:

—Kakkilee, ndeentee e yuufinirdi Farisa'en ndii e ndi Hirudus ndii.

<sup>16</sup> Taalibaa6e 6ee ndarii ana kaalda ana mbiya ko en njoo6aaki buuru koo o wiiri non. <sup>17</sup> Iisaa anndi ko 6e kaalata koo, wii 6e:

—Ko wadi so odon kaalda hakkunde moodon on njoo6aaki buuru? Tama faa jooni on paamataa? Naa on wum6e 6erde? <sup>18</sup> Odon njogii gite, on njiyataa naa? Odon njogii noppi, on nanataa naa? Tama on miccitaaki <sup>19</sup> nde njeɗu-mi ujunaaji njoyon gorko buuruuje joy ndee, cagiije hono foti kebbin-don kedde?

Be njaabii mo, 6e mbii:

—Cagiije sappo e didi.

<sup>20</sup> O lamndii 6e kasen, o wii:

—Nde njeɗu-mi ujunaaji nay neddo buuruuje jeddi ndee, cagiije hono foti kebbin-don kedde?

Be njaabii mo, 6e mbii:

—Cagiije jeddi.

<sup>21</sup> Nden, o wii 6e:

—Faa jooni on paamataa naa?

*No Iisaa wumtiniri bumdo ley Baytisayda*

<sup>22</sup> Be njottii Baytisayda, Iisaa waddanaa bumdo, o ndaardaa o mema dum.

<sup>23</sup> O nanngi bumdo oo, o renni dum ngeenndi ndii. Caggal dum, o siryi e gite mum, o fawi juude makko e mum, o lamndii dum, o wii:

—Won ko njiyataa naa?

<sup>24</sup> Bumdo oo feerti gite mum, wii:

—Mido yiya yim6e, kaa e6e mba'ani kam no ledde jahooje nii.

<sup>25</sup> Iisaa fawi juude mum e gite makko kasen. Nden o tawi o sellii, o wonti yiide no laa6iri. <sup>26</sup> Iisaa wii mo:

—Hootu, kaa pati mbirfito-daa ley ngeenndi ndii.

*No Piyeer wiiri Iisaa woni Almasiihu*

<sup>27</sup> Caggal dum, Iisaa e taalibaa6e mum pahi geelle badaangal Kaysariya Filipa. O lamndii 6e dum doo e laawol:

—Homo yim6e mbiyata ngon-mi?

<sup>28</sup> Be njaabii mo, 6e mbii:

—Won wiyoo6e a Yaayaa mo lootogal batisima, won wiyoo6e a annabi Iliyaasa, won wiyoo6e kasen a gooto e annabaa6e 6ee.

<sup>29</sup> O lamndii 6e, o wii:

—Onon nee, homo mbiyatongon-mi?

Piyeer jaabii mo, wii:

—Aan woni Almasiihu.

<sup>30</sup> E ley dum, o daalii 6e daaloore sattunde pati 6e kaalana dum fay gooto.

*No Iisaa sapporii maayde mum e wuurtugol mum*

<sup>31</sup> O fuddi famminde 6e:

—Ana tilsi Bii Neddo torree torraaji keewdi, maw6e 6ee e hooree6e yotti-noo6e sadaka e dunkee'en Sariya tippitoto mo. O waree, caggal balde tati o immitoto.

<sup>32</sup> O haalani 6e dum faa laa6i, nii Piyeer sawndintini mo, wii pati o haala hono dñi haalaaji. <sup>33</sup> O yeecitii, o yeewi taalibaa6e makko 6ee, o jahii e Piyeer, o wii:

—Woddam aan Ibiliisa! Sabi miilooji maa dñi iwrataa to Laamdo, to yim6e di iwrata.

*No Iisaa jokkirtee*

<sup>34</sup> Caggal dum, o noddi jamaa oo e taalibaa6e makko 6ee, o wii dum'en:

—Muuydo jokkude kam fuu, ñootta yurmaade hoore mum, 6ama leggal mum bardugal, jokka e am.\* <sup>35</sup> Sabi muuydo danndude yonki mum, waasan ki. Kaa baasirde ki sabaabu am e sabaabu Kabaaru Lobbo oo, danndan ki. <sup>36</sup> Kodum hebude aduna oo fuu nafata neddo so tawii waasii yonki mum? <sup>37</sup> Won ko neddo waawi hokkitirde faa soottitoo yonki mum naa? <sup>38</sup> Neddo fuu jaannoriido kam miin e haalaaji am dñi e ley oo jamaanu cobudo, luuttudo Laamdo, miin, Bii Neddo oo duu, mi yaannorto dum nde mi wardii e malaa'ika'en seniie6e e ley teddeengal Baabiraado am.

## 9

<sup>1</sup> O wii 6e kasen:

—Mido haalana on goonga: yoga e won6e doo 6ee maayataa tawee njiyaali Laamu Laamdo oo ana warda baawde.

*Haala waylitagol noone Iisaa*

<sup>2</sup> Balde jeegom caggal mum, Iisaa yaadi e Piyeer e Yaakuuba e Yuhanna, o teeldoyi e mum'en dow waamnde haayre toownde. Noone makko wayliti yeeso ma66e. <sup>3</sup> Kaddule makko ngatti jalbude, ndawni far faa fay cuuwoowo gooto waawaa rawnirde non e aduna oo. <sup>4</sup> Iliyaasa e Muusaa 6annngani 6e, ana kaalda e Iisaa. <sup>5</sup> E ley dum, Piyeer wii mo:

—Moobbo, gonal amen doo ana moyyi. Dal min ndarna doo buguuji tati: aan wooturu, Muusaa wooturu, Iliyaasa wooturu.

<sup>6</sup> O anndaano ko o haalannoo, sabi kulol manngol naati 6e, kam6e taalibaa6e 6ee. <sup>7</sup> Luurde wari suddi 6e, daande iwri e ley luurde ndee ana wiya: —Oo doo yo Biyam mo korsin-mi. Kettindee mo!

<sup>8</sup> Don e don, taalibaa6e 6ee tiggiti, njiyaali fay gooto so wanaa Iisaa tan.

<sup>9</sup> E ley ko 6e njippotoo waamnde haayre ndee koo, o daalii 6e pati 6e kaalana fay gooto ko 6e njii koo faa wakkati nde Bii Neddo oo wuurti e hakkunde maay6e fuu. <sup>10</sup> Be nja6ii konngol ngol, kaa 6e ndarii e6e lamndondira e ko'e ma66e kodum woni maanaa wuurtude e hakkunde maay6e.

<sup>11</sup> Caggal dum, 6e lamndii mo, 6e mbii:

—Kodum wadi so dunkee'en Sariya 6ee ana mbiya annabi Iliyaasa haani adaade Almasiihu warde?

<sup>12</sup> O jaabii 6e:

—Goonga, Iliyaasa adotoo warde tafon moyyintinde kulle dee fuu. Ndenoo ko saabii so Binndi dñi mbii ana tilsi Bii Neddo torree torraaji keewdi, hoynee? <sup>13</sup> Mido haalana on: Iliyaasa warii, 6e ngollii dum kam6e duu ko 6e muuyi fuu, hono no haala makko haaliraa e Binndi dñi nii.

\* **8:34** Maanaa 6amde leggal bardugal woni fellisidde mursude yonki mum hono no Iisaa nii.

*No Iisaa selliniri suka laddaado*

<sup>14</sup> Nde 6e ngarti e taalibaa6e heddi6e 6ee ndee, 6e njii jamaa keewdo ana filii dum'en, dunkee'en Sariya 6ee ana njeddondira e mum'en. <sup>15</sup> Yim6e 6ee njii Iisaa tan, 6e fuu 6e kaaynaa, 6e ndogi 6e nja66oyii mo. <sup>16</sup> O lamndii 6e, o wii:

—Kodum njeddondirton e ma66e?

<sup>17</sup> Gorko gooto jaabii mo e jamaa oo, wii:

—Moobbo, mi gaddando ma 6iyam gorko mo ladde muumdini. <sup>18</sup> Do ladde ndee immorii mo fuu, lifan mo e leydi, hunduko makko yufa ngufo, o neryondira niye, o yooraa kolon. Mi jaagike taalibaa6e maa 6ee ndibba nde, kaa 6e ndonkii.

<sup>19</sup> Iisaa wii yim6e 6ee:

—Hey yim6e jamaanu jooni 6e nganaa goondin6e! Faa mande tilotoo-mi e mon? Faa mande keddotoo-mi mujande on? Ngaddanee kam suka oo!

<sup>20</sup> O waddanaa oon. Nde ladde ndee yii Iisaa ndee, dimmbi suka oo, lifi dum, hedde suka oo ana talloo e leydi, hunduko mum ana yufa ngufo. <sup>21</sup> Iisaa lamndii baaba suka oo, wii:

—Gila mande dum he6i mo?

Baaba oo jaabii, wii:

—Gila omo famdi. <sup>22</sup> Kasen duu wakkati fuu ladde ndee ana lifa mo ley yiite naa ndiyam faa halka mo. Yurma min, mballaa min so tawii ada waawi!

<sup>23</sup> Iisaa wii mo:

—So mido waawi mbii-daa? Huunde fuu ana waawi laatanaade goondindo.

<sup>24</sup> Don e don, baaba suka oo wulli, wii:

—Mi goondinii, kaa wallam, sabi goondinde ana tiidi kam!

<sup>25</sup> Nde Iisaa yii jamaa oo ana dogaa ana wara ndee, jahii e ladde ndee, wii dum:

—Ladde muumdinoore faadinoore, mi yamirii ma yaltu e suka oo, pati naattu e makko abada kasen!

<sup>26</sup> Ladde ndee wulli, dimmbi suka oo semmbe, yalti. O wa'i no maaydo nii, faa ko heewi e wonnoo6e don 6ee ndarii ana mbiya o maayii. <sup>27</sup> Kaa Iisaa nanngi junngo makko, immiini mo tan, o darii.

<sup>28</sup> Nden Iisaa naati suudu, taalibaa6e mum 6ee teeldi e mum, lamndii dum, mbii:

—Kodum wadi so min ndonki ribbude ladde ndee?

<sup>29</sup> O jaabii:

—Ndee ladde, sii mum ribbirtaake so wanaa duwaawu.

*No Iisaa haaliri dida6ol maayde mum e wuurtugol mum*

<sup>30</sup> Be iwi don, 6e ceeki leydi Galili. O yidaa fay gooto annda dum, <sup>31</sup> sabi omo waajotonoo taalibaa6e makko 6ee, kasen duu omo wiyannoo dum'en:

—Bii Neddo oo wadete e juude yim6e, 6e mbara mo, kaa e ley balde tati caggal maayde makko, o wuurtan.

<sup>32</sup> Kaa taalibaa6e makko 6ee paamaali haala kaa, kulii lamndaade mo.

*Haala burdo teddude*

<sup>33</sup> Be njottii Kafarnahum. Nde 6e njippinoo e galle ndee, o lamndii taalibaa6e makko, o wii:

—Kodum njeddondir-don e laawol ngol?

<sup>34</sup> Be ndeyyini. Ko 6e njeddondiri e laawol ngol dee, burdo teddude.

<sup>35</sup> Ndennoo Iisaa joodii, noddii taalibaa6e sappo e didon 6ee, wii dum'en:

—Muuydo ardaade fuu, caggal heddiibe 6ee heedata, laatoo golloowo ma66e 6e fuu.

<sup>36</sup> Caggal dum, o nanngi junngo cukalel, o darni ngel yeeso ma66e, o huufi ngel, o wii 6e:

<sup>37</sup> —Neddo fuu ja66iido cukalel gootel hono ngel e innde am, miin jaati o ja66ii. Kasen duu ja66iido kam fuu, wanaa miin tan ja66ii, ja66ike neldo kam oo duu.

<sup>38</sup> Yuhanna wii mo:

—Moobbo, min njii gorko gooto ana ribbira seydaani'en innde maa. Min kadii mo, sabi o jokkaali e meeden.

<sup>39</sup> Kaa Iisaa wii:

—Pati kadee mo dum, sabi fay gooto waawaa wadirde kaayde e innde am, so sakitoo bonkoo kam don e don. <sup>40</sup> Sabi mo honnaaki en fuu, e meeden wondi. <sup>41</sup> Mido haalana on goonga: neddo fuu dokkudo on horde ndiyam kammari on yim6e Almasiihu, o waasataa hebude mbarjaari makko.

<sup>42</sup> Neddo fuu luuttindo gootel e koy cukaloy goondinkoy kam, ko buri moyyande joomum haayre teddunde habbee e daande mum, tippee e geeci.

<sup>43</sup> So tawii junngo maa luuttinte, tayu ngo. Naataa e nguurndam nduumiidam a jakudo buri moyyande ma diina naatude e jahannama yiite nge jifataa tawee a ki66udo. [ <sup>44</sup> \* ] <sup>45</sup> So tawii koyngal maa luuttinte, tayu ngal. Naataa e nguurndam nduumiidam a jakudo buri moyyande ma diina

tippeede e jahannama a ki66udo. [ <sup>46</sup> † ] <sup>47</sup> Kasen duu so yitere maa luuttinte, solnde. Sabi naatude maa e Laamu Laamdo a dokko buri moyyande ma diina tippe-daa e jahannama a ki66udo. <sup>48</sup> Don, «gildi mum mbaatataa, yiite mum duu jifataa.»† <sup>49</sup> Sabi gooto fuu la66inirte yiite hono no sadakaaji la66inirtee lamdam nii. <sup>50</sup> Lamdam yo huunde lobbere, so lamdam noottii lammude, kodum lamminta dum? Ngadee lamdam e moodon, moyyondiron.

## 10

### Haala ceergal

<sup>1</sup> O iwi don, o feewi leydi Yahuudiya e funnaange maayo Urdun. Yim6e heew6e pilli mo, o darii omo waajoo dum'en kasen, hono no o woownoo nii.

<sup>2</sup> Yoga e Farisa'en ngari faa itta koro makko, lamndii mo:

—Tama ana daganii gorko seerde jom suudu mum?

<sup>3</sup> O jaabii 6e:

—Kodum Muusaa yamiri on?

<sup>4</sup> Be njaabii, 6e mbii:

—Muusaa yamirii gorko winnda talkuru ceergal nde ana seera jom suudu mum.\*

<sup>5</sup> E ley dum, o wii 6e:

—On yoor6e berde, dum saabii so Muusaa winndani on nden yamiroore.

<sup>6</sup> Kaa gila e fuddoode, «Laamdo tagii 6e wadii 6e gorko e debbo. <sup>7</sup> Dum wadi so gorko yoppan inna mum e baam mum, <sup>8</sup> 6e didon fuu 6e laatoo neddo gooto.»† Nii woni 6e nganaa didon kasen, 6e neddo gooto. <sup>9</sup> Ndennoo, pati neddo seenndu ko Laamdo reentini.

\* **9:44** E dereeji 6ooydi dii, yoga ana beyda aaya 44:Don, gildi mum mbaatataa, yiite mum duu jifataa.

Yeew aaya 48. † **9:46** E dereeji 6ooydi dii, yoga ana beyda aaya 46:Don, gildi mum mbaatataa, yiite

mum duu jifataa. Yeew aaya 48. † **9:48** Esaaya 66.24 \* **10:4** Fillitagol Tawreeta 24.1 † **10:8**

Puddoode 1.27; 2.24

<sup>10</sup> Nde 6e kootunoo cuufi ndee, taalibaa6e makko 6ee lamndii mo haala majjum. <sup>11</sup> O wii 6e:

—Ceerdo jom suudu mum fuu so 6ami goddo, jeenii, <sup>12</sup> hono non duu, debbo cuutaniido gorum, so gorko goddo 6ami dum, oon debbo jeenii.

### *No Iisaa duwanorii cukaloy*

<sup>13</sup> Won waddan6e Iisaa cukaloy, yalla ana mema koy, non taalibaa6e 6ee njahii e yim6e 6ee. <sup>14</sup> Nde o yii dum ndee, o 6erni, o wii taalibaa6e 6ee:

—Accee cukaloy koy ngara e am, pati ka6ee koy, sabi wa'u6e no makkoy nii 6ee njeu Laamu Laamdo oo. <sup>15</sup> Mid6 haalana on goonga: mo ja6iraali Laamu Laamdo oo no cukalel nii fuu, naatataa hen.

<sup>16</sup> Caggal dum, o huufi cukaloy koy, o fawi junngo makko e makkoy, o duwanii koy.

### *No Iisaa e gorko arsukunte ngaddi*

<sup>17</sup> Nde Iisaa nanngunoo laawol ndee, gorko gooto dogani mo, diccii yeeso makko, lamndii mo, wii:

—Moobbo moyyo, kodum kaan-mi wadude faa mi he6a nguurndam nduuniidam?

<sup>18</sup> Iisaa wii mo:

—Ko saabii so a6a noddira kam moyyo? Moyyo walaa so wanaa gooto, oo woni Laamdo. <sup>19</sup> A6a anndi dii doo sariyaaji: «Pati jaadu hoore, pati jeenu, pati wujju, pati seeda fenaande, pati tooju, teddin inna maa e baam maa.»†

<sup>20</sup> Gorko oo jaabii mo, wii:

—Moobbo, mid6 haybi dum fuu gila e cukaaku am.

<sup>21</sup> Nden Iisaa yeewi mo, yidi mo, wii mo:

—Huunde wootere ana jaku maa: yaa soottoy ko njogi-daa koo fuu, ndokkaa kaalisi oo misikiina'en. Nden, a he6an jawdi dow kammu. Caggal dum, ngaraa njokkaa kam.

<sup>22</sup> Kaa nde gorko oo nani diin haalaaji ndee, jir6inii, wittidi e metti, sabi o arsukunte joldo. <sup>23</sup> Iisaa yeewi taalibaa6e mum 6ee, wii:

—Hee naatugol arsukunte e Laamu Laamdo ana tiidi!

<sup>24</sup> Taalibaa6e 6ee mugaa e diin haalaaji. O beydi hen kasen, o wii 6e:

—Sukaa6e am, hee naatude e Laamu Laamdo ana tiidi! <sup>25</sup> Sabi ngelooba ya66oroo e wuddere mesalal 6uri newaade diina naatugol arsukunte e Laamu Laamdo.

<sup>26</sup> Taalibaa6e 6ee beydii mugeede, hedde ana lamndondira e ko'e mum'en ana mbiya:

—Ndennoo, homo woni kisoowo?

<sup>27</sup> O yeewi 6e, o wii:

—Do yim6e dum laatataako, kaa edum laatoo to Laamdo. Sabi walaa fuu ko Laamdo waawaa.

<sup>28</sup> Nden, Piyeer darii ana wiya mo:

—Minen, min njoppii fuu min njokkii e maa!

<sup>29</sup> O jaabii dum, o wii:

—Mid6 haalana on goonga: neddo fuu joppirdo saabe am e saabe Kabaaru Lobbo oo galle mum naa sakiraa6e mum wor6e naa sakiraa6e mum rew6e naa inna mum naa baam mum naa sukaa6e mum naa gese mum, <sup>30</sup> he6an ko 6uri dum cowe teemedere e oo doo wakkati mo ngon-den e mum jooni: joomum he6an galleeji e sakiraa6e wor6e e sakiraa6e rew6e e inniraa6e e sukaa6e e gese, torrete duu. E ley wakkati garoyoowo oo duu, joomum he6an

† **10:19** Pergu 20.12-16; Fillitagol Tawreeta 5.16-20

nguurndam nduumiidam. <sup>31</sup> Kaa ardinoo6e heew6e laatoto caggalaa6e, caggalaa6e 6ee laatoto ardiibe.

*No Iisaa sapporii nde tatabere maayde mum e wuurtugol mum*

<sup>32</sup> E6e e laawol faa 6e njabbita Urusaliima. Iisaa ardii 6e, tawi taalibaa6e 6ee ana cunli, jokkunoo6e e mab6e 6ee duu yo hul6e. O noddi taalibaa6e sappo e didon 6ee, o darii omo haalana dum'en ko warata he6ude mo. <sup>33</sup> O wii 6e:

—Kettinee, eden nii njabbita Urusaliima, don 'Bii Neddo oo wadatee e juude hooree6e yottinoo6e sadaka e dunkee'en Sariya. 'Be caran mo waree, 6e ngada mo e juude heefer6e. <sup>34</sup> Been njaayran mo, tutta e makko, piya mo dorri, mbara mo. Kaa balde tati caggal mum, o wuurtan.

*No Yaakuuba e Yuhanna jaagorii Iisaa*

<sup>35</sup> Caggal dum, Yaakuuba e Yuhanna 6ib6e Jebede 6ee ngari e Iisaa, mbii dum:

—Moobbo, won ko min njidi jaagaade ma, miden njidi ngadanaa min dum.

<sup>36</sup> O wii 6e:

—Kodum njid-don mi wadana on?

<sup>37</sup> Be njaabii mo:

—Ngadanaa min min njoodoo oo bannge maa jaamo, oo bannge maa nano e ley teddeengal maa.

<sup>38</sup> O jaabii 6e, o wii:

—On anndaa ko jaagoto-don. Odon mbaawi yarde horde mettunde nde njaran-mi ndee, naa batiseede batisima naawdo mo mbatisetee-mi oo naa?

<sup>39</sup> Be njaabii mo, 6e mbii:

—Miden mbaawi.

O wii 6e:

—On njaran horde nde njaran-mi ndee, ke6on batisima mo mbatisetee-mi oo. <sup>40</sup> Kaa joodagol bannge am jaamo naa nano wanaa miin yamirta dum. Deen joolle, 6e Laamdo moyyinani dum'en 6ee nje y dum.

<sup>41</sup> Nde taalibaa6e sappo heddiibe 6ee nani dum ndee, mettaa e Yaakuuba e Yuhanna. <sup>42</sup> Iisaa noddi 6e fuu, wii:

—Odon anndi jataa6e laamiibe heefer6e 6ee, ana kawjorii yim6e mum'en hawju bondo, maw6e 6ee duu ana laamorii laamu bo6eejo. <sup>43</sup> Onon kaa, dum wadataa hakkunde moodon. So won jiddo teddeengal hakkunde mon, ana haani laataade golloowo moodon. <sup>44</sup> Kasen so won muuydo ardaade e mon, ana haani laataade maccudo moodon, on fuu. <sup>45</sup> Sabi fay 'Bii Neddo wardaali faa gollanee, gollande yim6e wardi, hokkitira yonki mum yalla ana laatoo coottitaari heew6e.

*No Iisaa wumtiniri Bartime*

<sup>46</sup> Be njottii Yeriko. Nde Iisaa e taalibaa6e mum 6ee njalti ngeenndi ndii ndee, kam6e e jamaa keewdo, 6e tawi bumdo biyeteedo Bartime bii Time ana joodii ana garbinoo e sera laawol ngol. <sup>47</sup> Nde o nani Iisaa Nasaraatunke oo bettootoo don ndee, o darii omo wulla omo wiya:

—Iisaa, taanii Daawuuda, yurmam!

<sup>48</sup> Heew6e ndarii ana njahoo e makko ana mbiya o deyyinoo, kaa o beydii wullude, omo wiya:

—Taanii Daawuuda, yurmam!

<sup>49</sup> Iisaa darii, wii:

—Noddee mo.

Nden, 6e noddi bumdo oo, 6e mbii dum:

—Seya, imma, o noddii ma.

<sup>50</sup> O gurbittii, o tippii disaare makko, o wari e Iisaa. <sup>51</sup> Iisaa lamndii mo, wii: —Kodum njid-daa mi wadane?

Bumdo oo jaabii mo, wii:

—Moobbo, mi hewta gite am.

<sup>52</sup> Iisaa wii mo:

—Yaa, goondinal maa danndii ma.

Don e don o wumti, o yaadi e Iisaa jahaangal muudum ngal.

## 11

### *No Iisaa naatiri Urusaliima*

<sup>1</sup> Nde 6e 6adinoo Urusaliima, 6e njottii Baytifaaji e Baytaniya, dow waamnde haayre wiyeteende Jaytun, Iisaa neli taalibaa6e mum didon, <sup>2</sup> o wii 6e:

—Njehee naatoyee ngeenndi ngonndi yeeso mon ndii. Oon wakkati fuu, on tawan mola ndakiiwa nga fay gooto waddaaki abada ana ha66ii. Kumton nga, ngaddon nga doo. <sup>3</sup> So won biido on ko ngatton nga, njaabo-don Moobbo ana haajaa nga. Don e don on njoppete ngaddon nga.

<sup>4</sup> Be njehi, 6e tawi mola ana ha66ii damal sella, 6e kumti dum. <sup>5</sup> Yoga e darinoobe don 6ee lamndii 6e:

—Kodum ngollaton doo? Ko kumtirton mola ngaa?

<sup>6</sup> Be njaaborii been no Iisaa wiirunoo nii. Been njoppi 6e. <sup>7</sup> Be na6ani Iisaa mola ngaa, 6e njappi e magga saayaaji ma66e, o waddii. <sup>8</sup> Heew6e mbeerti saayaaji mum'en e laawol, wo66e kelti cabe ledde sera ton, mbeerti de e laawol ngol. <sup>9</sup> Bee ardii mo, 6ee keedi caggal makko e6e ilinoo:

—Jettooje e barke ngoodanii gardoowo e dow innde Joomiraado!\* <sup>10</sup> Barke woodanii laamu njaati meeden Daawuuda, laamu garoowo oo! Jettooje ngoodanii Laamdo Toowdo!

<sup>11</sup> Iisaa njabbiti Urusaliima tan, naatoyi Suudu Dewal Mawndu nduu. Nde o yiinoo ko woni e mayru fuu ndee, o feewi Baytaniya kanko e sappo e didon 6ee, tawi hiirri.

### *No Iisaa huɗiri ibbi*

<sup>12</sup> Janngo mum, caggal 6e ndawii Baytaniya, tawi omo yolbi. <sup>13</sup> O soynii ibbi mbillitikki, o yehi yeewoyde yalla omo tawa e makki 6i66e. Nde o yottinoo ki ndee, o tawaali e makki so wanaa haakooloji. Sabi oon wakkati wanaa wakkati rimugol ibbe. <sup>14</sup> O wii ibbi kii:

—Pati fay gooto naamu 6i66e maa abada kasen!

Taalibaa6e makko 6ee nani dum.

### *No Iisaa ribbiri jaagotoobe ley Suudu Dewal Mawndu*

<sup>15</sup> Be njottii Urusaliima, Iisaa naati daalaare Suudu Dewal Mawndu nduu, o darii omo ribba soodoobe e soottoobe won6e ley mayre 6ee. O li6i taabe weccoobe kaalisi e joodorde soottoobe buugaaji. <sup>16</sup> O dalaali fay gooto seeka daalaare Suudu Dewal Mawndu nduu ana roondii kaaki. <sup>17</sup> O waajii 6e:

—Tama wanaa ana winndii: «Suudu am nduu noddirte suudu rewruudu lejni fuu!»† Kaa onon, on ngadii ndu suudorde yanoobe.‡

<sup>18</sup> Hooreefe yottinoobe sadaka e dunke'en Sariya nani dum, ndaari no masinbinira mo. Be kuli mo, sabi waaju makko oo naatii jamaa oo sanne.

<sup>19</sup> Nde hiirnoo ndee, kanko e taalibaa6e makko 6e njalti ngeenndi ndii.

### *Haala duwaawu gondudo e goondinal*

\* 11:9 Jabuura 118.25-26 † 11:17 Esaaya 56.7 ‡ 11:17 Yereimiya 7.11

<sup>20</sup> Janngo mum, beetee law, e6e 6ettoroo to ibbi kii too, 6e njii ki yoorii kolon faa yottii dadi. <sup>21</sup> Piyeer miccitii, wii mo:

—Moobbo, yeew! Ibbi ki kuduno-daa kii yoorii.

<sup>22</sup> Iisaa jaabii, wii 6e:

—Ngoondinee Laamdo! <sup>23</sup> Midó haalana on goonga: neddo fuu biido ndee waamnde haayre: «Doofa, saamoy ley maayo geeci», sikkitaaki ley bernde mum, goondinii ko wii koo wadan, jabante. <sup>24</sup> Dum saabii so mido wiya on: ko naagi-don e ley duwaawu fuu, ngoondinee on kebii dum, nden, on njabante.

<sup>25</sup> Nde ndari-don faa ngadon duwaawu fuu, so won gadunoodo on huunde, njaafee dum, yalla Baabiraado mon gondó dow kammu oo ana yaafoo on luutti moodon. [ <sup>26</sup> § ]

### *Do yamiroore golle Iisaa iwri*

<sup>27</sup> Be mbirfitii Urusaliima kasen. E ley no o yiilortoo ley Suudu Dewal Mawndu nii, hooree6e yottinoobe sadaka e dunkee'en Sariya e maw6e battitii mo <sup>28</sup> lamndii mo:

—Yamiroore hende ngollirtaa ko ngollataa koo? Homo yamir maa ngollaa dum?

<sup>29</sup> Iisaa wii:

—Huunde wootere tan lamndotoo-mi on. Njaabo-don kam, mi haalanan on jamirdo kam mi golla ko ngollan-mi koo. <sup>30</sup> Lootogal batisimaYaayaa ngal to Laamdo iwri naa to yim6e? Njaabee kam!

<sup>31</sup> Be ndawridi hakkunde ma66e, 6e mbii:

—So en mbii to Laamdo, o wian: «Ndennoo ko saabii so on ngoondinaali Yaayaa?» <sup>32</sup> En mbiyan «yim6e» naa?

E6e kula yim6e 6ee sabi 6e fuu e6e njogorii Yaayaa yo annabaajo jaati. <sup>33</sup> Be njaabii Iisaa, 6e mbii:

—Min anndaa.

Iisaa wii 6e:

—Haya miin duu, mi haalantaa on yamiroore nde ngolliran-mi ko ngollan-mi koo.

## 12

### *Banndol haala remoo6e bon6e*

<sup>1</sup> Iisaa fuddi haaldirde e ma66e e banndol, o wii:

—Neddo gooto tuti ngesa peguuje, o filtini nga kokowol, o asi ngaykaare foosirde, o mahi doomirdu. Caggal dum, o hasiri nga wo66e, o dawi. <sup>2</sup> Nde tebugol yottinoo, o neli golloowo makko to remoo6e 6ee too, 6e ngaddanoya mo ngedu makko e 6i66e peguuje dee. <sup>3</sup> Be nanngi nelaado oo, 6e pii dum, 6e mbirfini dum juude teete. <sup>4</sup> O neli e ma66e golloowo makko goddo. Be koyni dum, 6e eli dum. <sup>5</sup> Jom ngesa oo neli kasen golloowo mum tata6o, 6e mbari dum. Non 6e ngadiri wo66e heew6e: 6e pii yoga, 6e mbari yoga. <sup>6</sup> Jooni kaa gooto tan o heddorii, 6iyiiko korsudo oo. Sakitii o neli oo duu e ma66e, o wii: «Be njaagoto biyam oo.» <sup>7</sup> Kaa remoo6e 6ee mbiyondiri e ko'e mum'en: «Oo woni donoowo mo. Ngaree mbaren mo, keddoro-den ngesa ngaa!» <sup>8</sup> Be nanngi biido oo, 6e mbari dum, 6e mbedii dum to caggal ngesa too.

<sup>9</sup> Jooni nee, hono jom ngesa oo wadata? O waran, o halka remoo6e 6ee, o hasira ngesa ngaa wo66e. <sup>10</sup> Tama on njanngaali ko winndaa ley Binndi dii koo?

§ **11:26** E dereeji 6ooydi dii, yoga ana 6eyda aaya 26:Kaa so on njaafataako, Baabiraado mon gondó dow kammu oo yaafataako on onon duu luutti moodon.



«Haayre nde mahooḅe 6ee tippitii ndee,  
kanjum laatii haayre burnde fuu teentilaade e maadi ndii.

11 Dum yo golle Joomiraado,  
kanjum dum haaynde e jiile meeden!»\*

12 Hooreeḅe Yahuudiyankooḅe tewti no nanngira lisa, sabi 6e paamii ngol bannḅol e maḅḅe fewti. Kaa 6e cuusaano jamaa oo, dum wadi so 6e njoppi mo, 6e mbitti.

### *Haalayoḅugol lampo*

13 Be neli e makko yoga e Farisa'en e howruuḅe Hirudus yalla ana tuufinira mo konngol makko. 14 Be ngari, 6e mbii mo:

—Moobbo, miden anndi a goongirante: a hulataa fay gooto, sabi a burdintaa yimḅe, ada jannginira laawol Laamḅo ngol goonga. Ana dagoo min ndokka kaananke Roma mawḅo oo lampo naa dagaaki? Min ndokka mo naa pati min ndokka mo?

15 Nde wonnoo omo anndi naafigaaku maḅḅe, o wii 6e:

—Kodum wadi so oḅon tuufana kam? Ngaddanee kam mbuudu cardi faa mi yiya dum.

16 Be ngaddani mo. O lamndii 6e:

—Natal homo e innde homo woni doo?

Be mbii mo:

—Kaananke Roma.

17 O jaabii 6e, o wii:

—Ndennoo ndokkee kaananke Roma ko jey, ndokkee Laamḅo duu ko jey. Be kaaynaa e makko.

### *Haala immital maayḅe*

18 Yoga e Saduki'en ngari e makko. Kamḅe ngoni fennuḅe immital. Be lamndii mo, 6e mbii:

19 —Moobbo, Muusaa yamirii en so nedḅo maayii heḅaali biḅḅo, mijum naa mawnum ḅamta debbo ḅalaado oo yalla ana heḅana dum ḅeyngu.†

20 Wadiino e ḅettaade rimḅaaḅe njeḅḅon. Arano oo ḅami debbo, maayi, heḅaali biḅḅo. 21 Didaḅo oo ḅamti debbo oo, kanjum duu maayi heḅaali biḅḅo. Tataḅo oo duu wadi hono non. 22 Hono nii njeḅḅon 6ee fuu ḅamiri mo, ḅalaali biḅḅo. Caggal maḅḅe 6e fuu, debbo oo duu maayi. 23 Ndennoo, jannde immital, homo e maḅḅe debbo oo laatotoo jom suudu mum? Sabi 6e njeḅḅon fuu 6e ḅamiino mo!

24 Iisaa jaabii 6e, wii:

—Hee on majjii! On paamaali Binndi dii, on paamaali baawḅe Laamḅo dee. 25 Sabi so maayḅe immitike, worḅe ḅamataa, rewḅe ḅamataake, 6e laatoto hono no malaa'ika'en wonḅe dow kammu 6ee nii. 26 Ko maayḅe immitoto koo, on njanngaali e dewtere Muusaa haala wuutuure, hono Laamḅo haaldiri e makko, wii: «Miin woni Laamḅo Ibarahiima, Laamḅo Isiyaaka, Laamḅo Yaakuuba»?‡ 27 Laamḅo yo Laamḅo wuurḅe, wanaa Laamḅo maayḅe.§ On majjuḅe sanne.

### *Haala yamiroore burnde teentilaade*

\* 12:11 Jabuura 118.22-23 † 12:19 Fillitagol Tawreeta 25.5 ‡ 12:26 Pergu 3.6,15-16 § 12:27 Gila e jamaanu Muusaa tawi Ibarahiima e Isiyaaka e Yaakuuba maayii gila ko ḅooyi. Ko Laamḅo wii yo Laamḅo maḅḅe koo, hollii eḅe nguuri.

28 Dunkee Sariya gooto 6attitii Iisaa, nani jeddondiral ma66e, nani o jaabike Saduki'en 6ee faa gasi, lamndii mo:

—Jamirooje dee fuu, honde 6uri teentilaade?

29 Iisaa jaabii mo:

—Burnde fuu teentilaade e jamirooje dee yo ndee doo: «Hettina Israa'iila, Laamdo Joomiraado meeden oo tan woni Joomiraado. 30 Yidir Laamdo Joomiraado maa 6ernde maa fuu e yonki maa fuu e hakkille maa fuu e semmbe maa fuu.»\* 31 Dida6erde ndee yo hono mayre, kayre woni: «Njidiraa tanaa maa no njidir-daa hoore maa nii.»† Walaa fuu yamiroore 6urnde dee didi teentilaade.

32-33 Dunkee Sariya oo wii mo:

—Moobbo! A haalii goonga nde mbii-daa Laamdo tan woni Joomiraado, kasen duu Laamdo goddo walaa so wanaa kanko. E yidirde Laamdo 6ernde fuu e hakkille fuu e semmbe fuu, e yidirde tanaa no hoore mum nii, kanjum 6uri sadakaaji duppamaaji e kirsamaaji fuu! Haala maa ana selli sanne.

34 Nde Iisaa yii o jaaborike hakkilantaaku ndee, wii mo:

—A wodfaa Laamu Laamdo oo.

Caggal dum, fay gooto suusaali lamndaade Iisaa huunde.

### *Haala Almasiihu e Daawuuda*

35 Nde Iisaa waajotoo ley Suudu Dewal Mawndu ndee, wii:

—Hono dunkee'en Sariya 6ee mbaawiri wiirude Almasiihu oo yo taanii Daawuuda tan? 36 Sabi Daawuuda e hoore mum wiirii Ruuhu Ceniido:

«Joomiraado wii Joomam:

Jooda naamo am,

faa mi wadi nja66aa way6e maa.»‡

37 Daawuuda e hoore mum «Joomam» noddirta mo. Ndennoo, hono o laatoroo taanum tan?

### *No Iisaa daalorii jamaa oo banngal dunkee'en Sariya*

Jamaa keewdo ana hettiranoo Iisaa seyo. 38 E ley waajagol makko ngol, o wii 6e:

—Ndeentee e dunkee'en Sariya yidu6e yiiloraade saayaaji mawdi e jowteede ley luumooji, 39 foodantoo6e joolle burde teddude e ley cuudi baajordi e ley yanngeejii fuu. 40 E6e teeta cuudi rew6e talka'en 6e wor6e mum'en maayi, e6e njuutina duwaawuujii ma66e faa 6e nanndinkinoo e moyyu6e. Kam6e, jukkungo naawngo burata jippineede e muudum'en.

### *Haala sadaka burdo moyyude*

41 Iisaa joodii fewti e keesu Suudu Dewal Mawndu nduu, yii no jamaa oo wadirta kaalisi e keesu oo nii. Arsukunte'en heew6e ngadi e makko kaalisi keewdo. 42 Debbo talka mo gorum maayi wari, wadi hen buufi didi. 43 Iisaa noddi taalibaa6e mum 6ee, wii dum'en:

—Mido haalana on goonga: oo debbo talka, ko o wadi e ley keesu oo koo ana 6uri ko 6ee too fuu ngadi hen koo. 44 Sabi 6e fuu, ko bonnantaa 6e huunde tan 6e ngadi hen, kaa kanko debbo oo, ko o hasindini e mum o wadi hen, ko o jogii faa o wuurda koo fuu.

## 13

### *Haala taagumansaaaji kollooji timmoode aduna*

\* 12:30 Fillitagol Tawreeta 6.4-5 † 12:31 Lewinkoo6e 19.18 ‡ 12:36 Jabuura 110.1

<sup>1</sup> Nde o yalti Suudu Dewal Mawndu nduu ndee, taalibbo makko gooto wii mo:

—Moobbo, yeew! Woy kaaye mawde mahiraade maadi lobbiri!

<sup>2</sup> Iisaa jaabii mo, wii:

—A yii ndii maadi no foti mawnude? Fay haayre wootere heddataako doo ana fawii dow wonnde, fuu wurjinte.

<sup>3</sup> O joodoyii dow waamnde haayre wiyeteende Jaytun, o fewti e Suudu Dewal Mawndu nduu. Piyeer e Yaakuuba e Yuhanna e Andire teeldi e makko, lamndii mo, mbii:

<sup>4</sup> —Humpitin min nde dum wadata. Taagumansa homo hollata wadugol kudde dee fuu?

<sup>5</sup> Nii Iisaa darii ana wiya 6e:

—Ndeentee, pati fay gooto yonna on. <sup>6</sup> Heew6e ngardan innde am, mbiya: «Miin woni kanko.» Be yonna heew6e. <sup>7</sup> So on nanii dillere golowole 6adiide, so on kaalanaama golowole godfude, pati kulee, ana tilsi dum wadan, kaa dum wanaa timmoode tafon. <sup>8</sup> Lejol haban e lejol, laamu haban e laamu, leydi dimboto e nokkuje yogaaje, hono non yolbereeji duu. Dum woni pudfoode natawere.

<sup>9</sup> Ndeenee ko'e mon, sabi yim6e naban on to carirdi, on piyete ley cuudi baajordi, 6e ndarna on yeeso saroobe e kaanankoo6e saabe am, faa laatano-don kam seedee'en yeeso ma66e. <sup>10</sup> Ana tilsi Kabaaru Lobbo oo waajee lepi dii fuu tafon. <sup>11</sup> Nde 6e nabii on faa 6e ndokkitira on, pati mbemmbe-don ko kaalaton. Nde wakkati mum wari fuu, on keban ko kaalon. Sabi wanaa onon kaalata, Ruuhu Ceniido haalata. <sup>12</sup> Neddo hokkitiran sakiike mum waree, baabiraado duu 6iyum. Bi66e immanto saaraabe mum'en, piya dabare yalla been ana mbaree. <sup>13</sup> Yim6e fuu mbajan on saabe am. Kaa mujudo faa timmoode, joomum hisinte.

<sup>14</sup> Nde njii-don «huunde harmunde bonnde»\* ana woni do haanaa wonde fuu† (janggudo dum, tiinnoo faama), nden, 6e dum tawi ley Yahuudiya fuu yo ndogu peewa baamle kaaye. <sup>15</sup> Tawaado dow bene, pati jippoo fey so wiya naatan faa 6ama huunde ley suudu muudum. <sup>16</sup> Tawaado gese, pati wirfoo so wiya bamoowo saaya mum. <sup>17</sup> Bone yanan e haamili'en e muyninoobe ley deen jalaade! <sup>18</sup> Naagee Laamdo pati dum wada wakkati dabbunde. <sup>19</sup> Sabi ley deen jalaade torra wadan mo hono mum wadaali gila fuddoode aduna nde Laamdo tagi tageefu oo warde hannde, mo wattataa kasen duu. <sup>20</sup> Sinndo Joomiraado rabbindinaalino deen jalaade, fay gooto hisataano, kaa sabaabu subaabe 6ee o rabbindiniri de. <sup>21</sup> E oon wakkati, so won biido on: «Almasiihu annii doo», naa «Yeewee! Omo naa too», pati ngoondinee. <sup>22</sup> Sabi almasiihu'en peneefe e annabaa6e peneefe banngoyan, 6e ngada taagumansaaji e kaayefiiji yalla e6e majjina subaabe 6ee, so 6e mbaawii. <sup>23</sup> Dum nee, so wanaa ndeento-don! Mi haalanii on huunde fuu gila waraali tafon.

### *No Bii Neddo oo wartirta*

<sup>24</sup> —Kaa e ley deen jalaade, caggal oon torra, naange ni66an, lewru joottan yaaynude, <sup>25</sup> kooode kammu caaman, kulle gonde dow kammu dee

\* **13:14** Daniyel 9.27; 11.31; 12.11 † **13:14** Doo Iisaa haali ko annabi Daniyel sappinoo: kaananke gooto wattan tooru e ley Suudu Dewal Mawndu Yahuudiyankoo6e. Ko o sappinoo koo wadii gila Iisaa finaali. Jooni Iisaa wii hono majjum wartan kasen.

ndimmboto.† 26 E oon wakkati, Bii Neddo oo yiyete ana wara e duule,§ ana warda baawde mawde e teddeengal. 27 O nelan malaa'ika'en makko funnaange e hiirnaange, saahal e baleeri, moofta sufaa6e makko 6ee gila hoore leydi faa hoore leydi.

28 Taykitee ibbe: so ca6e majje keyditii, haakoolooji majje mbillitii, odon anndi ndunngu 6adike. 29 Hono non, so on njii deen kulle ana ngada, anndee o battiima, omo damal galle. 30 Mid6 haalana on goonga: oo jamaanu timmataa tawee kudde dee fuu ngadaali. 31 Kammu e leydi timman, kaa haalaaji am dii timmataa abada.

32 Kaa nden jalaande e oon wakkati fay gooto anndaa dum. Wanaa malaa'ika'en won6e dow kammu, wanaa Biddo oo. Walaa anndu6o dum so wanaa Baabiraado oo. 33 Ndeentee, njeerto-don, sabi on anndaa wakkati mo o warata. 34 Edum wa'i no gorko lanndiniido faa dawa, yalti suudu mum, hokki golloo6e mum homo fuu golle mum, yamiri doomoowo damal oo yo jeerto. 35 Ndennoo, njeertee, sabi on anndaa nde jom galle oo wartata: ana waawi laataade kiikiide, naa hejjere jemma, naa wakkati nde ndontoori jogginta, naa beetee law. 36 Pati o juha on so o tawa odon daanii! 37 Ko kaalanan-mi on koo, dum kaalanan-mi yim6e fuu: njeertee!

## 14

### *No maw6e diina ndawriri faa nannga Iisaa*

1 Balde didi hadi iidi Paska e iidi mo buuru yuufinaaka yottaade. Hooree6e yottinoofe sadaka e dunkee'en Sariya tewti molanaade Iisaa faa nannga dum yalla ana mbara dum. 2 Kaa 6e mbii:

—Pati ngaden dum ley iidi oo so yim6e 6ee murta.

### *No Iisaa wujiraa nebam uuroojam*

3 Nden Iisaa ana Baytaniya, do galle Simon ceppaado oo doo. O joodii faa o naama, debbo gooto naati ana jogii faandu nebam laa6udam, uuroojam, tiidudam coggu sanne. Debbo oo heli faandu nduu, wuji nebam dam e hoore makko. 4 Yoga e wonnoo6e ton 6ee mettaa, mbiyondiri e ko'e mum'en:

—Bonnude dam nebam, kodum nafata? 5 Edam waawnoo sootteede ko 6uri buudi cardi teemed6e tati, kaalisi oo hokkee misikiina'en!

Hedde e6e jin7a debbo oo. 6 Kaa Iisaa wii:

—Celee e makko! Ko saabii so odon torra mo? Golle makko 7ardii sanne. 7 Sabi misikiina'en ana tawdee e mon 7annde fuu, nde muuy-don fuu odon mbaawi wadande dum'en moyyere. Kaa miin, mi tawdataake e mon 7annde fuu. 8 O wadii ko o waawi: ko o wujiri kam nebam uuroojam dam yalla mido lanndinanoo yanaande. 9 Mid6 haalana on goonga: do Kabaaru Lobbo waajaa e aduna oo fuu, ko oo debbo wadi koo jantete, kasen duu o miccitate.

### *No Yahuuda jamborri Iisaa*

10 Yahuuda Isikariyota, gooto e sappo e didon 6ee, yehi to hooree6e yottinoofe sadaka faa wada Iisaa e juude mum'en. 11 Nde 6e nani dum ndee, 6e ceyii, 6e podani mo 6e njeenan mo kaalisi. E ley dum, omo fiya dabare no o jambortoo Iisaa.

### *No Iisaa hiirtidorii e taalibaa6e mum hiraande iidi Paska*

12 Nalooma arano iidi mo buuru yuufinaaka, nde 6e mboownoo hirsude jawdi Paska ndee, taalibaa6e Iisaa lamndii dum, mbii:

† 13:25 Esaaya 13.10; 34.4; Yo'ila 2.10 § 13:26 Daniyel 7.13

—Hoto njid-*daa* min njaha min lanndinanoye hiraande iidi Paska ndee?

<sup>13</sup> O neli taalibaa*6e* makko *di*don, o wii *du*m'en:

—Njehee ngeenndi too, on kawran ton e gorko ana roondii mbulku ndiyam, njokkon e mum. <sup>14</sup> Galle mo o naati fuu, mbiyon jom galle oo: «Moobbo wii suudu jaamdata e taalibaa*6e* mum *6ee* hiraande iidi Paska?» <sup>15</sup> O hollan on sooro manngo, paraango faa gasi, ton lanndinanton en hiraande ndee.

<sup>16</sup> Taalibaa*6e* *di*don *6ee* njehi, naatoyi ngeenndi ndii, *6e* tawri hono no o wii *6e* nii, ton *6e* lanndinii hiraande Paska ndee.

<sup>17</sup> Hiiri, Iisaa wardi e sappo e *di*don *6ee*. <sup>18</sup> Nde *6e* njoodii *e6e* jaama ndee, Iisaa wii:

—Mido haalana on goonga: gooto moodon jamm*boto* kam, omo jaamda e am jooni.\*

<sup>19</sup> Dum laatanii *6e* sugulla, hedde *e6e* lamndoroo mo gooto gooto, gooto fuu ana wiya:

—Kori wanaa miin kaa?

<sup>20</sup> O jaabii *6e*, o wii:

—Gooto e moodon, onon sappo e *di*don *6ee*, tummbidoowo e am junngo mum e la'al oo. <sup>21</sup> Waajibi Bii Neddo dalira aduna no haaliraa ley Binndi d*ii* nii. Kaa bone woodanii jamm*boto*do Bii Neddo oo! Oon gorko, so rima*nooka* fey *6uri* moyyande *du*m!

<sup>22</sup> Nde *6e* jaamata ndee, Iisaa *6ami* buuru, yetti Laamdo, helti, hokki *6e*, wii:

—Nanng*ee*, *du*m yo terde am.

<sup>23</sup> Caggal *du*m, o *6ami* horde peguujam, o yetti Laamdo, o hokki *6e*, *6e* fuu *6e* njari. <sup>24</sup> O wii *6e*:

—Dum yo yiiyam am, yiiyam tabintinoojam aadi keyri, njupportoodam saabe heew*6e*. <sup>25</sup> Mido haalana on goonga: abada mi yarataa peguujam kasen so wanaa jannde njaroy-mi peguujam kesam e ley Laamu Laamdo.

<sup>26</sup> Caggal *6e* njimii Jabuura,<sup>†</sup> *6e* njalti, *6e* njehi waamnde haayre wiyeteende Jaytun. <sup>27</sup> Iisaa wii *6e*:

—On fuu on njoppan kam, sabi ana winndii: «Mi fiyan duroowo oo, mi wara *du*m, baali d*ii* caakoo.»<sup>‡</sup> <sup>28</sup> Kaa caggal mi wuurtii, mi adoyto on Galili.

<sup>29</sup> Piyeer wii mo:

—Fay so *6e* fuu *6e* njoppu maa, miin kaa mi yoppataa ma.

<sup>30</sup> Iisaa wii mo:

—Mido haalane goonga: jemma hannde oo jaati, fade ndontoori jogginde cili d*idi* a wiyan a anndaa kam cili tati.

<sup>31</sup> Piyeer haali, tekkini, wii:

—Fay so tilsi mi maaydan e maa, abada mi wiyataa mi anndaa ma.

Taalibaa*6e* *6ee* fuu mbii hono non.

### *No Iisaa jaagorii Laamdo ley Gecemane*

<sup>32</sup> Be njottii nokku biyeteedo Gecemane, o wii taalibaa*6e* makko *6ee*:

—Njood*6e* doo, faa mi wadoya duwaawu.

<sup>33</sup> O yaadi e Piyeer e Yaakuuba e Yuhanna. O fuddi maatude kulol, o ruubi.

<sup>34</sup> O wii *6e*:

—Yoomeende ana mawni e am sanne faa ana ndaara warde kam. Keddee doo, njeertee pati daanee.

\* 14:18 Jabuura 41.10 † 14:26 Neesu Yahuudiyankoo*6e* woni yimde jime Jabuura 115-118 e hiraande iidi Paska. ‡ 14:27 Jakariyaa 13.7

<sup>35</sup> O wodditii seefaa, o hippii e leydi, o duwii yalla omo dafa e oo wakkati naawdo so ana huwindoo. <sup>36</sup> O wii:

—Abba! Ada waawi huunde fuu, woddinam ndee horde bone. Kaa pati laatoro no njidir-mi, yo laatoro no njidir-daa aan.

<sup>37</sup> O warti, o tawi ebe daanii. O wii Piyeer:

—Simon, a daaniido naa? A waawaa jeertaade tawee a daanaaki fay wakkati gooto naa? <sup>38</sup> Pati daanee, nduwee, pati on ceYTE. Sabi hakkille ana heewi anniya lobbo, kaa terde ana lo'i.

<sup>39</sup> O yehi kasen, o duworii no arannde nii. <sup>40</sup> O warti, o tawi 6e daantike, sabi doyd'i ana piilii e ma66e. Be ndonki annudde ko 6e njaabotoo mo. <sup>41</sup> O warti cilol tatabol, o wii 6e:

—Faa jooni odon daanii odon hooottinoo naa? Heyii. Wakkati oo warii. Bii Neddo wadete e juude luuttoo6e. <sup>42</sup> Immee njehen! Yeewee, jammbotoodo kam oo annii.

### *No Iisaa nanngiraa*

<sup>43</sup> O tilaaki haalde, faa Yahuuda, gooto e sappo e didon 6ee, yottii ana wondi e yim6e heew6e jogiibe kaafaaje e cabbi. Hooree6e yottinoo6e sadaka, dunkee'en Sariya e maw6e, kapium'en neli 6e. <sup>44</sup> Jammbotoodo mo oo hokki 6e finnde, wii:

—Neddo mo buccii-mi fuu, oo woni kanko. Nanngee dum, na6on dum kawjo-don dum.

<sup>45</sup> Yahuuda yottii tan, battitii Iisaa, wii dum:

—Moobbo!

O buccii dum. <sup>46</sup> Nii 6e njani e Iisaa, 6e nanngi dum. <sup>47</sup> Gooto e darinoo6e don 6ee, soorti kaafaawi mum, soppi golloowo Jottinoowo Sadaka Mawdo, tayi nowru mum. <sup>48</sup> Iisaa wii 6e:

—Ko ngardu-don e kaafaaje e cabbi faa nanngon kam hono mi janoowo? <sup>49</sup> Mido wondi e mon jannde fuu ley Suudu Dewal Mawndu nduu mido waajoo, on nanngaali kam. Kaa dum wadan yalla ko Binndi dii mbii koo ana tabita.

<sup>50</sup> E ley dum, taalibaa6e 6ee fuu njoppi mo, ndogi.

<sup>51</sup> Jokolle mo boornaaki ko wanaa waandaade disaare, jokki e makko, 6e nanngi dum <sup>52</sup> o yoppi disaare ndee, o dogiri 6e terde teete.

### *No maw6e diina cariri Iisaa*

<sup>53</sup> Be na6i Iisaa to Jottinoowo Sadaka Mawdo oo, tawi hooree6e yottinoo6e sadaka e maw6e e dunkee'en Sariya fuu ana moo6tii. <sup>54</sup> Piyeer jokkitii mo fali daawre hakkunde ma66e, faa naati ley daalaare galle Jottinoowo Sadaka Mawdo. O jooddii e doomo6e, omo yuwloo yiite. <sup>55</sup> Hooree6e yottinoo6e sadaka e jeyaa6e e waalde Saahii6e ndee fuu ana tewta ko kappira Iisaa yalla ana waree, kaa 6e kebaali. <sup>56</sup> Heew6e ana kappa mo, kaa kam6e e hoore ma66e, kappi ma66e dii ana luuttodiri. <sup>57</sup> Yogaa6e kappi mo, mbii:

<sup>58</sup> —Min nanii omo wiya: «Mi wurjinan Suudu Dewal Mawndu ndu yim6e mahiri juude, e ley balde tati mi maha suudu dewal wonndu ndu mahiraaka juude.»

<sup>59</sup> Kaa e dum duu, happugol ma66e ngol ana luuttodiri. <sup>60</sup> Jottinoowo Sadaka Mawdo oo darii hakkunde jamaa oo, lamndii Iisaa:

—Walaa ko njaaboto-daa naa? Tama a nanaali ko 6e mbiyete koo?

<sup>61</sup> Fuu omo deyyinii, o jaabaaki fay huunde. Jottinoowo Sadaka Mawdo oo ana lamndoo mo kasen, ana wiya:

—Aan a Almasiihu, 6ii mo jettooje ngoodani oo naa?

<sup>62</sup> O jaabii, o wii:

—Miin woni kanko. On njiyan Bii Neddo ana joodii jaamo Jom Baawde oo, § ana warda e duule kammu.\*

<sup>63</sup> E ley dum, Jottinoowo Sadaka Mawdo oo mettaa faa seeki kaddule mum, wii:

—En kaajaaka seedee'en hankasen. <sup>64</sup> On narrii noppi moodon ko o bonkii Laamdo koo. Kodum njii-don hen?

Be fuu 6e mbii omo haani wareede.

<sup>65</sup> Yoga ma66e fuddi tuttude e makko, 6e cuddi yeeso makko, e6e culkoo mo, e6e mbiya mo:

—Annditin culkiido ma!

Nii doomoobe 6ee nanngi mo, ana piya mo banaaje.

### *No Piyeer wadi so yankiri Iisaa*

<sup>66</sup> E ley no Piyeer worri e ley daalaare galle oo nii, gooto e hor6e Jottinoowo Sadaka Mawdo yottii. <sup>67</sup> Nde o yiinoo Piyeer ana yuwloo ndee, o taykitii dum, o wii:

—Aan, afa wondunoo e Iisaa Nasaraatunke oo.

<sup>68</sup> Nii Piyeer yeddi mo, wii:

—Wanaa miin! Mi faamataa ko kaalataa koo.

Caggal dum, Piyeer yehi naatoyi bolongal galle oo. [Tan ndontoori joggini.]† <sup>69</sup> Nde kordoo oo yiinoo mo kasen ndee, haaltani darinoobe don 6ee, wii:

—Oo yo gooto ma66e!

<sup>70</sup> Piyeer yeddi kasen. Don e don darinoobe don 6ee mbii Piyeer:

—Tayoral, a gooto e ma66e, sabi a Galilinke.

<sup>71</sup> Nii o fuddi hunaade e huttaade, omo wiya:

—Mi anndaa gorko mo kaalaton haala mum oo fey!

<sup>72</sup> Ndontoori joggini dida6erde, Piyeer miccitii ko Iisaa wiinoo dum koo: «Fate ndontoori jogginde cili didi, a wiyan a anndaa kam cili tati.» O darii omo woya.

## 15

### *No Pilaatu lamndorii Iisaa*

<sup>1</sup> Beetee law, hooree6e yottinoobe sadaka e maw6e e dunkee'en Sariya e waalde Saahii6e ndee, 6e fuu 6e ndawridi. Be ka66i Iisaa, 6e nabi dum to Pilaatu goforneer oo.

<sup>2</sup> Pilaatu lamndii mo, wii:

—Aan woni kaananke Yahuudiyankoo6e oo naa?

O jaabii, o wii:

—No mbii-daa nii.

<sup>3</sup> Hooree6e yottinoobe sadaka 6ee ana ngullanoroo mo kulle keewde.

<sup>4</sup> Pilaatu lamndii mo kasen:

—Walaa ko njaaboto-daa naa? A nanaali ko 6e ngullani maa koo fuu naa?

<sup>5</sup> Kaa Iisaa jaabaaki fay huunde, faa dum haayinii Pilaatu.

### *No Iisaa sariraa yo bareteedo*

<sup>6</sup> Iidi Paska fuu, goforneer oo ana hokkannoo yim6e 6ee su6aade e ka-sunkoo6e 6ee mo njidi yoppitaneede. <sup>7</sup> Gorko biyeteedo Barabas murtidiino e wob6e faa 6e mbari neddo. Oon wakkati, e6e uddanoo kasu saabe ko 6e

ngadi koo. <sup>8</sup> Jamaa oo nabboyi to Pilaatu woni too, naati e jaagaade dum wadana 6e ko woownoo wadande 6e koo. <sup>9</sup> O jaabii 6e, o wii:

—Odon nijidi mi yoppitana on kaananke Yahuudiyankoo6e oo naa?

<sup>10</sup> Sabi o anndii hooree6e yottinoo6e sadaka 6ee haasidaaku wadi so ndokkitiri mo. <sup>11</sup> Kaa 6e ndunyi jamaa oo e jaagaade Pilaatu yoppitana 6e Barabas burani 6e yoppita Iisaa. <sup>12</sup> Pilaatu jaabii kasen, wii 6e:

—Ndennoo, kodum nijid-don mi wada mo mbiyaton kaananke Yahuudiyankoo6e oo?

<sup>13</sup> Be ngulli:

—Tontu mo e leggal bardugal!

<sup>14</sup> Pilaatu lamndii 6e:

—Kodum o wadi ko boni?

Be beydi dukude semmbe:

—Tontu mo e leggal bardugal!

<sup>15</sup> Nde wonnoo Pilaatu ana yidi welnude berde jamaa oo, yoppitani dum'en Barabas. Caggal dum, o yamiri Iisaa fiyee dorri, tontoyee e leggal bardugal.

<sup>16</sup> Sordaasi'en 6ee nabi mo naannoyi mo ley galle to hu6eere ndee woni too, moo6ti fedde sordaasi'en 6ee fuu. <sup>17</sup> Be 6oorni mo burmusuure wodeere,\* 6e capi tennaade gi'e 6e kippi e hoore makko. <sup>18</sup> Be keddii e6e calma mo, e6e mbiya:

—Sadi, kaananke Yahuudiyankoo6e.

<sup>19</sup> E6e piira hoore makko kalacal, e6e tutta e makko, 6e tuggi koppi ma66e e6e cujidana mo. <sup>20</sup> Nde 6e tilii jaayrude mo ndee, 6e itti burmusuure wodeere ndee, 6e 6oorni mo kaddule makko, 6e nabi mo sella faa 6e tontoya mo e leggal bardugal.

### *No Iisaa tontiraa dow leggal bardugal*

<sup>21</sup> Gorko gooto biyeteedo Simon, jeyaado Sireene, baaba Aleksandere e Rufus, ana bettoroo don iwru6o ley ladde. Sordaasi'en 6ee ndooldini mo o wakkoo leggal bardugal Iisaa ngal. <sup>22</sup> Be nabi Iisaa nokku biyeteedo Golgata. (Maanaa Golgata woni nokku laalagal hoore.) <sup>23</sup> Be ngaddani mo peguujam njillondiraadam e safaare haadunde yalla omo yara, kaa o jabaali. <sup>24</sup> Be tonti mo e leggal bardugal, 6e pecciri kaddule makko urwa, 6e anndi ko gooto fuu he6ata.† <sup>25</sup> Nde 6e tontata mo ndee, wakkati yamnde jeenay beetee. <sup>26</sup> Be mbinndi e alluwal tiimde hoore makko daliili ko tonti mo: KAAANANKE YAHUUDIYANKOOBE. <sup>27</sup> Be tontidi mo e yanoo6e didon, gooto jaamo makko, god6o oo nano makko. [ <sup>28</sup> † ] <sup>29</sup> Yim6e ya66otoo6e don 6ee ana njenna mo, ana njinka ko'e mum'en, ana mbiya:

—Coo! Gurjinoowo Suudu Dewal Mawndu nduu so mahitoo ndu ley balde tati, <sup>30</sup> biltu hoore maa, jippa leggal bardugal ngal!

<sup>31</sup> Hono non, hooree6e yottinoo6e sadaka 6ee duu njaayriri mo, kajum e dunkee'en Sariya ana mbiyondira e ko'e mum'en:

—O biltii wo66e, kaa o ronkii biltude hoore makko! <sup>32</sup> Kanko Almasiihu kaananke Israa'iila oo. Jooni, o jippoo leggal bardugal ngal, yalla eden njiya ngoondinen!

Yanoo6e didon 6e o tontidaa 6ee duu ana mbonkoroo mo non.

\* **15:17** Wakkati Iisaa, burmusuure wodeere yo saaya ka kaananke 6oornotoo. † **15:24** Jabuura 22.19 † **15:28** E dereeji 6ooydi dii, yoga ana beyda aaya 28:Dum tabintini Binndi biidi: «O hiisodaama e bon6e.»



<sup>33</sup> Wakkati hakkunde naange, nimre waɗi e leydi ndii fuu faa wakkati yamnde tati kiikiide. <sup>34</sup> E ley yamnde tati kiikiide ndee, Iisaa wulli wullaango toowngo, wii:

—*Eloyi, eloyi, lama sabaktanii?* (Dum woni: «Laamɗo am, Laamɗo am! Kodum waɗi so njoppu-ɗaa kam?»<sup>§</sup>)

<sup>35</sup> Yoga e darinooɓe ton ɓee nde nanunoo ɗum ndee, mbii:

—Kettinee, omo nii noddada annabi Iliyaasa!

<sup>36</sup> Nii gooto dogi, suuwoyi liccere ley biineegiri, haɓɓi ɗum e sawru, feewtini hunduko makko yalla omo ɓuuccoo, wii:

—Njoppen mo yeewen yalla Iliyaasa waran jippina mo!

<sup>37</sup> Iisaa wulli wullaango toowngo kasen, dali aduna. <sup>38</sup> Heedoode faliinde ley Suudu Dewal Mawndu ndee seekii gila dow faa ley, laatii taye ɗiɗi. <sup>39</sup> Hooreejo sordaasi'en darinooɗo yeeso makko oo yii no o ɗaliri aduna nii, wii:

—So goonga nii, oo neddo yo Bii Laamɗo!

<sup>40</sup> Rewɓe yogaaɓe ana toowti, ana coynoo. Ana e maɓɓe: Mariyama mo Magdala e Salome e Mariyama inna Yaakuuba suka e Yoses. <sup>41</sup> Been njokkannoo e makko ana ngollana mo nde o wonnoo Galili ndee. E rewɓe woɓɓe kasen, njabbidinnooɓe e makko Urusaliima ana ngonnoo ɗon.

### *No tew Iisaa waɗiraa e yanaande*

<sup>42</sup> Hiiri, ɗum hawri e wakkati lanndinal tawi ɗalaande fowteteende ɓadike fuɗɗude. <sup>43</sup> Gooto e waalde Saahiiɓe, tedduɗo, biyeteɗo Yuusufu mo Arimatiya, wari. Kanko duu omo doomunoo ɓannugol Laamu Laamɗo oo. O hulaali yaade to Pilaatu o ndaarda ɗum tew Iisaa. <sup>44</sup> Pilaatu haaynaa nde nanunoo o maayirii nii tan ndee, noddii hooreejo sordaasi'en, lamndii ɗum so tawii yo goonga o maayii. <sup>45</sup> Nde hooreejo sordaasi'en haalani mo ɗum ndee, o ɗunjanii Yuusufu ɓamta tew oo. <sup>46</sup> Yuusufu soodi kasanke, jippini tew Iisaa oo, fiili ɗum e kasanke oo, o watti ɗum e yanaande asaande ley haayre. Caggal ɗum, o talliti haayre, o uddiri damal yanaande ndee. <sup>47</sup> Mariyama mo Magdala e Mariyama inna Yoses njii to o waɗaa too.

## 16

### *No Iisaa immintiniraa*

<sup>1</sup> Nde ɗalaande fowteteende ndee ɓettinoo ndee, Mariyama mo Magdala e Salome e Mariyama inna Yaakuuba, coodi nebameeji uurooji ngaddi faa nguja e tew makko oo. <sup>2</sup> Nannde alan, ɓe ngari e yanaande ndee beete kecco wakkati puɗal naange. <sup>3</sup> Be ndarii eɓe mbiyondira:

—Homo tallitanta en haayre ndee iwa e damal yanaande ndee?

<sup>4</sup> Kaa nde ɓe kunci gite ndee, ɓe njii haayre ndee tallitaama. Ende mawni sanne. <sup>5</sup> Wakkati ɓe naatunoo e yanaande ndee, ɓe njii jokolle ana joodii bannge ɗaamo ana ɓoornii saaya ndaneewa, ɓe kuli. <sup>6</sup> O wii ɓe:

—Pati kulee! Iisaa Nasaraatunke tontanooɗo oo tewtaton. O immitike, o walaa doo. Nokku ɗo o waɗanoo doo, annii. <sup>7</sup> Jooni kaa, njehee, mbiyoyee taalibaaɓe makko ɓee e Piyeer o adooyo on Galili. Ton njiyoyton mo, hono no o wiirunoo on nii.

<sup>8</sup> Rewɓe ɓee njalti yanaande ndee, ɓe ndogi eɓe cijnja kulul cattungol. Be kaalanaali fay gooto huunde no ɓe poti hulde.

<sup>9</sup> Caggal Iisaa wuurtii beetee law jannde alan, Mariyama mo Magdala mo o ribbani seydaani'en njeddon oo, kajum mo adii banngande. <sup>10</sup> O yehi humpitoyde dum wondunooፎe e Iisaa ፎee, tawi eፎe cunaa eፎe mboya. <sup>11</sup> Ko ፎe nanunoo o wuurtii koo e ko Mariyama yii mo koo, fuu ፎe ngoondinaali dum.

<sup>12</sup> Caggal dum, o banngirani didon maፎፎe mbaadi ngonndi, eፎe nanngi laawol jahoowol ladde. <sup>13</sup> Be ngarti ፎe kumpitoyi heddiፎe ፎee, ፎe ngoondinaali dum'en kajum'en duu.

<sup>14</sup> Ko sakitii koo o banngani taalibaaፎe sappo e go'o ፎee tawaaፎe ana naama. O nijiri ፎe waasude maፎፎe goondinde e yoorde maፎፎe bernde, sabi ፎe ngoondinaali yiፎe mo caggal immitagol makko ፎee. <sup>15</sup> O wii ፎe:

—Njehee ley aduna oo fuu, mbaajo-don tagoore ndee fuu Kabaaru Lobbo oo. <sup>16</sup> Goondindo so lootaa lootogal batisima, hisinte. Mo goondinaali jukkete. <sup>17</sup> Dii kaayefiiji ana ngoodani goondinፎe ፎee: ፎe ndibbiran seydaani'en saabe am, ፎe kaalan demle kese, <sup>18</sup> ፎe nanngiran ፎoggi leydi juude maፎፎe. Fay so ፎe njarii poson, fay huunde wadataa ፎe. Be pawan junngo maፎፎe e jawፎe, cella.

<sup>19</sup> Caggal Iisaa Joomiraado oo haaldii e maፎፎe, ስabbinaa kammu, joodii naamo Laamdo. <sup>20</sup> Kaa kamፎe, ፎe njehi eፎe mbaajoyoo ley nokkuuje fuu. Joomiraado ana wondi e maፎፎe, tabintiniri konngol ngol taagumansaaji jaadooji e maggol.\*

---

\* **16:20** Aaya 9 yaade 20 tawaaka e dereeji burdi fuu ፎooyde dii.

## Linjiila Iisaa Ngedu Luuka

### *Ko sabinbini so dewtere ndee winndaa*

<sup>1</sup> Yimbe heewbe kornii jantaade kulle gadufe hakkunde men, <sup>2</sup> hono no seediibe gila puddoode, laatiibe kaadime'en konngol ngol bee, kaalaniri en nii. <sup>3</sup> Tawfilus teddudo, mi widike kulle dee fuu gila arannde, mi tawii ana haani mi winndane dum no wadiri nii, <sup>4</sup> yalla ada heba tayoral jannde nde njannjine-daa ndee yo goonga.

### *No Jibiriilu sapporii pinaade Yaayaa*

<sup>5</sup> E ley jamaanu Hirudus, kaananke Yahuudiya, jottinoowo sadaka biyeteedo Jakariyaa ana woodunoo. Omo jeyaa e waalde Abiya, bii Haaruuna oo. Jom suudu Jakariyaa duu yo iwdi Haaruuna, innde mum yo Elisabet. <sup>6</sup> Be didon fuu be foocitiibe yeeso Laamdo, ebe njokki jamirooje Joomiraado e sariyaaji mum fuu, jinjoore fuu walaa e ma66e. <sup>7</sup> Kaa be kebaalino biddo, sabi Elisabet laatinoke dimaro, kasen duu be didon fuu be naywii.

<sup>8</sup> Nannde wootere, Jakariyaa ana golla golle mum yottingol sadaka yeeso Laamdo, sabi nannde mum yo waalde makko jeyti. <sup>9</sup> Nde wonnoo yottinoobe sadaka ana mboownoo wadufe urwa, nii urwa nanngi mo faa o naata Suudu Dewal Mawndu nduu, o ura ton uurdi. <sup>10</sup> Jamaa oo fuu darii sella ana duwoo wakkati mo uurdi ndii uretee oo. <sup>11</sup> Oon wakkati, malaa'ika Joomiraado banngani mo, darii jaamo urirde ndee. <sup>12</sup> Nde Jakariyaa yiinoo malaa'ika oo ndee, tayi, darii ana sijnja. <sup>13</sup> Malaa'ika oo wii mo:

—Jakariyaa pati hul, sabi duwaawu maa jaabaama. Jom suudu maa Elisabet rimante biddo gorko, inndiraa dum Yaayaa. <sup>14</sup> Oon biddo waddante seyo manngo, heewbe ceyorto pinaade makko, <sup>15</sup> sabi o laatoto teddudo e Joomiraado. O yarataa doro, o yarataa huunde fuu ko sigirta. O heewan Ruuhu Ceniido gila e ley reedu inniiko, <sup>16</sup> o wartiran bi66e Israa'iilankoo6e heew6e e Laamdo Joomiraado mum'en. <sup>17</sup> O ardoto Joomiraado oo warde, o wonda e ruuhu e baawde de annabi Iliyaasa he6unoo, faa o wartira berde baabiraa6e faade e bi66e mum'en, faa o wartira murtu6e duu e hakkille foocitiibe, kajum e moyyinande Joomiraado oo lejol lanndiniingol.

<sup>18</sup> Jakariyaa lamndii malaa'ika oo, wii:

—Hono hen anddiran-mi dum goonga? Sabi miin mi naywii, jom suudu am oo duu wadii duubi.

<sup>19</sup> Malaa'ika oo jaabii mo, wii:

—Miin woni Jibiriilu darotoodo yeeso Laamdo, mi nelaado e maa faa mi haalane oo kabaaru lobbo. <sup>20</sup> Ndennoo jooni a muumdan. A haalataa so wanaa wakkati mo dum tabiti, sabi a goondinaali haala am. Haala am kaa tabitoyan so wakkati majjum warii.

<sup>21</sup> E ley dum fuu tawi yimbe bee ana ndoomi Jakariyaa, ana kaaynaa ko 6ooyni dum ley Suudu Dewal Mawndu too. <sup>22</sup> Nde o yalti ndee, o ronki haaldude e ma66e. Be paami won ko jergii e makko e ley Suudu Dewal Mawndu nduu. O darii omo haalda e ma66e muumankoo6e, o heddii e muumaaku. <sup>23</sup> Nde o tilinoo e golle makko ndee, o hooti suudu makko.

<sup>24</sup> Caggal deen balde, Elisabet jom suudu makko oo reedi, dammbii hakke lebbi joy, ana wiya:

25 —Dum woni ko Joomiraado wadani kam nde wattani kam hakkille, ittani kam dukkuru hakkunde yimbe.

### *No Jibiriilu sapporii pinaade Iisaa*

26 E ley lewru Elisabet jeego6urdu nduu, Laamdo neli malaa'ika Jibiriilu e ngeenndi mbiyeteendi Nasaraatu ley leydi Galili, 27 faade e surba mo taanii Daawuuda biyeteedo Yuusufu sabbi. Surba oo ana wiyee Mariyama.

28 Malaa'ika oo naati do Mariyama woni doo, wii dum:

—Aan e jam, kebudo moyyere Laamdo. Joomiraado ana wondi e maa.

29 Haala kaa jii6i hakkille Mariyama, darii ana miila ko ngoo jowtaango waawi laataade. 30 Nii malaa'ika oo wii mo:

—Mariyama pati hul! Sabi a hebii moyyere iwnde e Laamdo, 31 a reedan, ndimaa biddo gorko, inndiraa dum Iisaa. 32 Oon biddo laatoto teddudo, o noddirte Bii Laamdo Toowdo. Laamdo Joomiraado hokkan mo laamu maamiiko Daawuuda. 33 O laamoto iwdi Yaakuuba, laamu makko timmataa abada.

34 Mariyama wii malaa'ika oo:

—Hono dum laatortoo, mi anndaa gorko?

35 Malaa'ika oo jaabii mo, wii:

—Ruuhu Ceniido jippoto e maa, baawde Laamdo Toowdo oo kuurete no dowdi nii. Saabe dum, biddo mo ndimataa oo noddirte Ceniido, noddirte Bii Laamdo. 36 Haya yeew, sakiike maa Elisabet duu 6amii reedu, taweede mo naywii fuu, mo rima biddo gorko. Ana wiyetenoo mo dimaro, kaa jooni omo woni e lewru makko jeego6urdu, 37 sabi walaa fuu ko Laamdo waawaa.

38 E oon wakkati, Mariyama wii:

—Miin, mi kordo Joomiraado. Yo laatanoram no mbiiru-daa nii.

Caggal dum, malaa'ika oo witti, seli e makko.

### *No Mariyama yaari to Elisabet*

39 E ley deen jalaade, Mariyama immii law yehi ngeenndi Yahuudiya ngootiri ngonndi dow baamle kaaye. 40 O naati galle Jakariyaa, o jowti Elisabet. 41 Nde Elisabet nannoo jowtaango makko ndee, biddo gondó e reedu mum oo dillinii, Elisabet hebbinaa Ruuhu Ceniido, 42 ilinii, wii:

—A barkinaado hakkunde rewbe, biddo mo caaw-daa oo duu yo barkinaado. 43 Miin, ko ngon-mi faa inna Joomam naata galle am? 44 Nde jowtaango maa tob6inoo e nowru am ndee, biddo gondó e reedu am oo dillinike saabe kuyam. 45 A welii hoore, aan goondindo ko Joomiraado fodaan maa koo laatoto.

### *Yimre Mariyama*

46 Mariyama wii:

—Yonki am ana yetta Joomiraado,

47 bernde am ana heewi seyo Laamdo

Kisinoowo kam,

48 sabi o yurmike kam,

miin, kordo makko lo'udo oo.

Gila jooni jamaanuujii fuu noddiran kam beldo hoore.

49 Sabi Jom Baawde oo wadani kam kulle mawde!

Innde makko yo seniinde.

50 Yurmeende makko herataa e hul6e mo abada.

51 O gollirii gollleeji mawdi junngo makko semmbinngo,  
o saakii mawninkiniibe.

52 O boortii kaanankoo6e iwde e laamu mum'en,

o toownii leydu6e.

53 O haarnirii yolbu6e kulle lobbe,

o wirfintinii taajiri'en juude 6ole.

54-55 O faabike Israa'iilankoo6e, jiyaa6e makko,

o yeggitaali yurmaade Ibarahiima e iwdi mum faa abada,

hono no o fodorirnoo njaatiraa6e men nii.

56 Mariyama fa66idi e Elisabet ko waarata e lebbi tati, caggal mum, hooti suudu mum.

### *Haala pinaa6e Yaayaa*

57 Wakkati 6eynugol Elisabet yottii, o 6eyni o he6i 6id6o gorko.

58 Taakallemme'en makko e sakiraa6e makko nani hinnee maw6o mo Joomiraa6o wadani mo oo, ceyodii e makko.

59 Nde cukalel ngel hi66innoo yontere ndee, 6e ngari taadude ngel.\* Be njidiino inndirde ngel baaba maggel Jakariyaa, 60 kaa inna maggel jabaali, wii ngel inndiree Yaayaa. 61 Be mbii dum:

—Sii maa fuu walaa inndiraa6o ndee innde.

62 Be lamndorii baaba maggel muumankoore, homo yidi 6iyum oo inndiree. 63 Jakariyaa lamndii alluwal, winndi e maggal: «Innde maggel yo Yaayaa.» Be fuu 6e kaaynaa. 64 Oon wakkati fuu, hunduko Jakariyaa yoppitaa, demngal mum humtaa, watti haalde e yettude Laam6o. 65 Kulol nanngi hodu6e e seraaji dii 6ee fuu. Kasen duu dum saakii e ley haayre Yahuudiya fuu. 66 Nan6e dum 6ee fuu ndesi dum e hakkillaaji mum'en, ana mbiya: «Kodum ngel cukalel foti laataade?» Sabi 6e njii baaw6e Joomiraa6o ana e maggel.

### *Yimre Jakariyaa*

67 Jakariyaa, baaba cukalel ngel, heewi Ruuhu Ceniido, sappii, wii:

68 —Jettooje ngoodanii Joomiraa6o, Laam6o Israa'ila, sabi faabike yim6e mum, soottitike dum'en.

69 O waddanii en kisinoowo teddu6o

iw6o e suudu Daawuuda, kaadime makko oo

70 hono no o haalirnoo e kundude annabaa6e makko seniio6e gila arande nii.

71 O fodii o danndan en e konnee'en men,

o ittan en e juude way6e men.

72 O 6annginanan en yurmeende nde o 6annginani maamiraa6e men ndee, sabi o miccitike aadi makko ceniindi ndii,

73 dum yo hunoore nde o hunanii maama men Ibarahiima.

Hunoore ndee woni o hokkan en 74-75 rewirde mo rafi kulol ley nguurdam men fuu

e ley senaare e foocitaare yeeso makko,

tawi en ittaabe e juude konnee'en men.

76 Aan duu 6inngel am, a noddirde annabaa6o Laam6o Toow6o,

sabi a ardoto Joomiraa6o oo warde faa moyyinanaa mo laawol,

77 faa anndinaa yim6e makko o hisiniran dum'en yaafaamuya luutti.

78 Sabi Laam6o men yo keew6o yurmeende,

faa o faaboroo en nanndu6o e fooyre iwrunde dow,

79 yalla ana fooynana won6e e nimre, fooynana won6e e kulol maayde, watta koyde men e laawol jam.

\* 1:59 Neesu Yahuudiyankoo6e, so suka gorko rimaama, jannde inndaa fuu, nden taadetee duu.

<sup>80</sup> Suka oo ana mawna, hakkille mum ana beydoo. O joodii ley ladde jeereende faa wakkati mo o bannginanaa Israa'iila.

## 2

### *Haala pinaade Iisaa Almasiihu*

<sup>1</sup> E ley deen balde, Ogusta kaananke mawdo oo, yamiri limgal wadee e ley laamu Roma fuu. <sup>2</sup> Kanngal woni limgal aranal, forri e laamu Kiriniyas ley leydi Siriya. <sup>3</sup> Yimbe fuu njehi winndoyaade, gooto fuu e ngeenndi mum'en. <sup>4</sup> Yuusufu duu immii Nasaraatu ley leydi Galili, faa yaha ngeenndi Daawuuda mbiyeteendi Baytilaama ley leydi Yahuudiya, sabi e lejol Daawuuda jaati mo iwata. <sup>5</sup> O yehi ton winndoyaade, kanko e Mariyama cabbaado makko, cowiido. <sup>6</sup> E ley gonal ma66e ton, wakkati beynugol Mariyama yottii, <sup>7</sup> o dikkii hammadi makko, o saawi dum e licce, o lelni dum ley akalaawal, sabi be keyaali e jippunde ndee.

<sup>8</sup> Duroo6e ana mbaalannoo haybude sewre mum'en baali e seraaji dhi. <sup>9</sup> Malaa'ika Joomiraado banngani 6e, teddeengal Joomiraado filii 6e hono no fooyre nii. Kulol manngol nanngi 6e. <sup>10</sup> Nii malaa'ika oo wii 6e:

—Pati kulee! Sabi mi gardo haalande on Kabaaru Lobbo gaddanoowo lejol ngol fuu seyo manngo. <sup>11</sup> Hannde on ndimanaama kisinoowo ley ngeenndi Daawuuda ndii, kanko woni Almasiihu, kanko woni Joomiraado oo. <sup>12</sup> Finnde majjum annii: on tawan cukalel keccel ana saawaa e licce, ana lelana ley akalaawal.

<sup>13</sup> Don e don, higgere malaa'ika'en iwi dow kammu, tawti malaa'ika arano oo, naati e yettude Laamdo, ana mbiya:

<sup>14</sup> —Teddeengal woodanii Laamdo Toowdo! Jam woodanii yimbe dow leydi, yimbe horsube e makko 6ee.

<sup>15</sup> Nde malaa'ika'en 6ee ceerti e ma66e ndee, njabbiti kammu. Duroo6e 6ee ndarii ana mbiyondira:

—Njehe Baytilaama, yeewen ko wadi, ko Joomiraado annidini en koo.

<sup>16</sup> Be kenii, 6e njehi, 6e tawi ton Mariyama e Yuusufu e cukalel keccel ngel engel lelana ley akalaawal. <sup>17</sup> Nde 6e njiinoo ngel ndee, 6e kaalti ko malaa'ika oo haalnoo e maggel koo. <sup>18</sup> Nan6e haala duroo6e 6ee fuu, kaayde nanngi dum'en. <sup>19</sup> Kaa Mariyama ana resi dum fuu e hakkille mum, o heddii omo miiloo dum. <sup>20</sup> Caggal dum, duroo6e 6ee mbirfittii ana teddina Laamdo ana njetta dum, saabe ko 6e nani e ko 6e njii. Sabi dum fuu dum laatorike no malaa'ika oo haalanirnoo 6e nii.

### *No Iisaa taadiraa e no battiniraa Joomiraado*

<sup>21</sup> Nde jalooma jetta6o pinaade cukalel ngel yottinoo ndee, ngel taadaa,\* ngel inndiraa Iisaa. Dum woni innde nde malaa'ika oo haalannoo Mariyama gila reedaali ndee.

<sup>22</sup> Nde laa6ugol Mariyama yottinoo, hono no Sariya Muusaa yamiri nii, 6e na6i cukalel ngel Urusaliima faa 6e battina ngel Joomiraado. <sup>23</sup> Sabi nii winndiraa e Sariya Joomiraado:

«Biddo gorko hammadiijo fuu, Joomiraado woodani.»†

<sup>24</sup> Be ngadi duu sadaka kirsamaajo hono no Joomiraado yamiri nii: 6i66e buugaaji didi naa 6i66e pooli maraadi didi.

\* **2:21** Neesu Yahuudiyankoo6e, so suka gorko rimaama, nannde inndaa fuu, nden taadete duu.

† **2:23** Pergu 13.2,12,15; Limooje 18.15-16

<sup>25</sup> Gorko gooto ana wonnoo Urusaliima, ana wiye Simeyon. Ruuhu Ceniido ana e makko, o gorko poocciitido kuldo Laamdo, omo hedinoo wakkati mo gondi Israa'iila cocetee. <sup>26</sup> Ruuhu Ceniido oo anndinnoo mo e koydol, o maayataa o yiyaali Almasiihu Joomiraado oo. <sup>27</sup> Jooni Ruuhu naanni mo ley Suudu Dewal Mawndu nduu, wakkati mo saaraabe 6ee ngaddi cukalel ngel faa ngadana dum ko Sariya oo yamiri koo. <sup>28</sup> Simeyon nanngi ngel, tammii ngel e juude mum, darii ana yetta Laamdo, ana wiya: <sup>29</sup> —Joomiraado, fodoore maa ndee tabitii, bantu maccudo maa e jam.

<sup>30</sup> Sabi mi yiirii gite am kisindam

<sup>31</sup> dam lanndinani-daa yimbe fuu.

<sup>32</sup> Kisindam dam yo fooyre yaaynnoore leji aduna oo fuu, dam fooyre teddinoore lejol maa Israa'iila duu.

<sup>33</sup> Ko haalaa e maggel koo, haayni inna maggel e baaba maggel.

<sup>34</sup> Simeyon duwanii 6e, wii Mariyama, inna maggel:

—Ngel cukalel wardii li6ude yogaa6e e imminde yogaa6e ley Israa'iila. Ngel finnde nde yimbe calotoo. <sup>35</sup> Nii miilooji gondi e yimbe 6anngirta. Aan e hoore maa, metti suufan bernde maa no kaafaawi nii.

<sup>36</sup> Annabaajo debbo biyeteedo Anna ana don kajum duu. O fii Fanu'iila, jeyaado e suudu Asiira. O naaywii sanne. O suddaama e surbaaku makko, o waaldii e jom suudu makko duu6i jeddi, <sup>37</sup> oon maayi, o heddi o walaa gorko. Jooni duubi makko ana mbaara e capande jetti e nay, o yaltataa Suudu Dewal Mawndu nduu fey, omo rewra Joomiraado koorka e duwaawu, jemma e jalooma fuu. <sup>38</sup> E oon wakkati, o wari kanko duu, o darii omo yetta Laamdo, omo haalana dooftu6e coottaari Urusaliima 6ee fuu kabaaru cukalel ngel.

<sup>39</sup> Nde Yuusufu e Mariyama ngadunoo huunde fuu ko Sariya Joomiraado yamiri koo ndee, 6e mbirfitii ngeenndi ma66e Nasaraatu ley leydi Galili.

<sup>40</sup> Cukalel ngel ana mawna, ana beydoro semmbe e hakkille. Korsa Laamdo ana e maggel.

### *No Iisaa haaldiri e jannginoobe ley Suudu Dewal Mawndu*

<sup>41</sup> Hitaande fuu, saaraa6e Iisaa njabban Urusaliima so iidi Paska warii. <sup>42</sup> Nde o hebi duubi sappo e didi ndee, 6e njabbi Urusaliima no 6e mboowrunoo nii, 6e na6ori mo. <sup>43</sup> Iidi oo tilii, 6e mbirfitii 6e kooti, jaka Iisaa heddike Urusaliima, tawi 6e anndaa, <sup>44</sup> 6e cikkuo omo wondi e yaadu6e ma66e. Be njehi jalooma ki66o. Caggal mum, 6e puddi tewtude mo hakkunde sakiraa6e ma66e e yi66e ma66e. <sup>45</sup> Kaa nde wonnoo 6e njiitaali mo ndee, 6e mbirfitii Urusaliima tewtoyde mo. <sup>46</sup> Balde tati caggal mum, 6e tawi mo ley Suudu Dewal Mawndu, omo joodii hakkunde jannginoobe, omo hettindii dum'en, omo lamnditoo dum'en. <sup>47</sup> Hettindiibe mo 6ee fuu kaaynaa hakkille makko e jaabuui makko. <sup>48</sup> Nde saaraa6e makko njiiti mo ndee, kaayde nanngi dum'en. Inna makko wii mo:

—Bingel am, ko saabii so ngadu-daa min nii? Miin e baaba maa fuu, min cunjii e tewtude ma.

<sup>49</sup> O jaabii, o wii:

—Kodum wadi so odon tewta kam? Tama on anndaa ana tilsi mi wona e suudu Baabiraado am?

<sup>50</sup> Kaa 6e paamaali haala ka o haalani 6e kaa. <sup>51</sup> Caggal dum, o regodii e ma66e, 6e kooti Nasaraatu, o downtanii 6e. Inna makko ana resunoo kulle dee fuu e hakkille mum.

<sup>52</sup> Isaa ana mawna, hakkille mum ana beydoo. Laamdo e yimbe fuu korsini mo.

### 3

#### *No Yaayaa waajorii*

<sup>1-2</sup> Laamdo loowi Yaayaa bii Jakariyaa oo konngol mum ley ladde jeereende. Dum hawrii e hitaande sappo e jooberde laamu Tibeer kaananke Roma mawdo oo, nde Pontiyu Pilaatu wonnoo goforneer Yahuudiya, Hirudus duu ana laamii Galili, mawnum Filipa ana laamii leydi Ituriya e Tarankoniti, Lisaniya duu ana laamii leydi Abileen, hawri e nde Annas e Kayafas ngonnoo hooree6e yottinoobe sadaka. <sup>3</sup> Yaayaa yiilii e seraaji maayo Urduu fuu ana ooynoo yimbe tuuba, lootee lootogal batisima yalla luutti mum'en ana njaafee. <sup>4</sup> Nii haala mum winndiraa e dewtere annabi Esaaya: «Neddo ana ooynoo ley ladde jeereende ana wiya:

Moyyinee laawol Joomiraado ngol,  
ndartinee dati makko!

<sup>5</sup> Naddiire fuu diddete,  
waamnde haayre e toowondireere fuu leydiinee,  
laawi oopiidi fuu ndartinee,  
laawi bondi fuu moyyintinee!

<sup>6</sup> Neddo fuu yiyan kisindam iwroojam to Laamdo.»\*

<sup>7</sup> Yimbe heew6e ana ngarannoo to Yaayaa faa lootee lootogal batisima. Kaa omo wiya 6e:

—Bi66e bolle! Homo jeertini on ndogon jukkungo waroowo? <sup>8</sup> Ngollee golleeji kawrooji e tuubal. Pati miilee e berde mon: «Minen, min taaniraabe Ibarahiima.» Sabi mido wiya on: Laamdo ana waawi waylitinde dee kaaye laato 6i66e Ibarahiima. <sup>9</sup> Jooni jammberere ndee huncaama faa soppa dadi ledde. Ndennoo, lekki fuu ki rimataa bidd6e lobbe, soppete, wedee e yiite.

<sup>10</sup> Yimbe 6ee lamndii mo, mbii:

—Kofum min kaani wadude?

<sup>11</sup> O jaabii 6e, o wii:

—Neddo fuu jogiido saayaaji didi, yo hokku ngoota kaa mo walaa, neddo fuu jogiido nguure, yo wadu hono non.

<sup>12</sup> Duwaape'en ngari kajum'en duu faa lootee lootogal batisima, mbii mo:

—Moobbo, kofum min kaani wadude?

<sup>13</sup> O jaabii 6e, o wii:

—Pati njobinee yimbe ko yawti sariya.

<sup>14</sup> Sordaasi'en lamndii mo kajum'en duu, mbii:

—Minen nee, kofum min kaani wadude?

O wii 6e:

—Pati ngarnee fay gooto, pati kappee fay gooto fenaande, kejjitoree njobdi mon.

<sup>15</sup> Tawi yimbe fuu ana ndenngii Almasiihu, gooto e ma66e fuu ana miila e bernde mum yalla wanaa Yaayaa woni Almasiihu ya? <sup>16</sup> Yaayaa jaabii 6e fuu, wii:

—Miin, ndiyam mbatisiran-mi on. Kaa burdo kam baawde ana wara. Mi fotaa fay humtude boggi pade makko. Kanko, Ruuhu Ceniido e yiite o batisirta on. <sup>17</sup> O lanndinike faa o hennoo jamri makko faa laaba. O moobta

\* 3:6 Esaaya 40.3-5



namri ndii ley beembal makko, kaa jaande ndee o duppiran dum yiite nge jifataa.

<sup>18</sup> Tawi Yaayaa fannginanii yimbe kabaaru Laamdo, o waajorike 6e kulle keewde. <sup>19</sup> Kaa Hirudus kaananke oo, o feliino dum saabe tayii Hirudiya jom suudu mawnum, kajum e kulle godde bonde fuu de wadannoo. <sup>20</sup> Hirudus yowi hen bonnde wonnde kasen, o uddii Yaayaa e kasu.

### *No Iisaa lootiraa lootogal batisima*

<sup>21</sup> Do yimbe fuu lootaa lootogal batisima doo, doo Iisaa duu lootaa. Wakkati mo o duwotoo oo, kammu udditii, <sup>22</sup> Ruuhu Ceniido jipporii e makko mbaadi wuugaandu. Daande ooyinii iwde dow kammu, wii:

—Aan woni Biyam mo korsin-mi, aan cubii-mi.

### *Haala dammbe Iisaa*

<sup>23</sup> Nde Iisaa fuddata golle mum ndee, duubi mum ana njaara e capantati. E ley jate yimbe, Iisaa yo gii Yuusufu.

Yuusufu yo gii Eli, <sup>24</sup> Eli gii Matat,

Matat gii Lewi, Lewi gii Melki,

Melki gii Yannaayi, Yannaayi gii Yuusufu,

<sup>25</sup> Yuusufu gii Matatiya, Matatiya gii Amos,

Amos gii Nahum, Nahum gii Hesili,

Hesili gii Naggaayi, <sup>26</sup> Naggaayi gii Maata,

Maata gii Matatiya, Matatiya gii Semeyin,

Semeyin gii Yuseka, Yuseka gii Yoda,

<sup>27</sup> Yoda gii Yohana, Yohana gii Resa,

Resa gii Jorobaabel, Jorobaabel gii Salaatiyel,

Salaatiyel gii Neeri, <sup>28</sup> Neeri gii Melki,

Melki gii Addi, Addi gii Kusama,

Kusama gii Almadama, Almadama gii Eri,

<sup>29</sup> Eri gii Iisaa, Iisaa gii Eliyeseer,

Eliyeseer gii Yorima, Yorima gii Matat,

Matat gii Lewi, <sup>30</sup> Lewi gii Simeyon,

Simeyon gii Yahuuda, Yahuuda gii Yuusufu,

Yuusufu gii Yonam, Yonam gii Eliyakim,

<sup>31</sup> Eliyakim gii Malaya, Malaya gii Menna,

Menna gii Mattata, Mattata gii Natana,

Natana gii Daawuuda, <sup>32</sup> Daawuuda gii Yessa,

Yessa gii Obed, Obed gii Bo'es,

Bo'es gii Sala, Sala gii Nasuuna,

<sup>33</sup> Nasuuna gii Aminadaabu, Aminadaabu gii Adamin,

Adamin gii Arni, Arni gii Hisuruuna,

Hisuruuna gii Fares, Fares gii Yahuuda,

<sup>34</sup> Yahuuda gii Yaakuuba, Yaakuuba gii Isiyaaka,

Isiyaaka gii Ibarahiima, Ibarahiima gii Taraha,

Taraha gii Nahor, <sup>35</sup> Nahor gii Saruku,

Saruku gii Ragawu, Ragawu gii Faleka,

Faleka gii Eber, Eber gii Sala,

<sup>36</sup> Sala gii Kaynam, Kaynam gii Arfasada,

Arfasada gii Samu, Samu gii Nuuhu,

Nuuhu gii Lamaka, <sup>37</sup> Lamaka gii Matusala,

Matusala gii Henok, Henok gii Yarada,

Yarada gii Maleliyel, Maleliyel gii Kaynam,

<sup>38</sup> Kaynam gii Enos, Enos gii Setu,

Setu 6ii Aadama, Aadama 6ii Laamdo.

## 4

### *No Ibiliisa ndaardi seytoraae Iisaa*

<sup>1</sup> Iisaa iwi maayo Urdun yo keewdo Ruuhu Ceniido. Ruuhu oo nafi mo ley ladde jeereende. <sup>2</sup> To ley jeereende too, Ibiliisa waddi e makko balde capande nay ana tewta seytaade mo. Fay huunde o jaamaali ley den jalaade fuu. Ko saktii koo, o yolbi. <sup>3</sup> Ibiliisa wii mo:

—So a Bii Laamdo, yamir ndee haayre laatoo jaamdu.

<sup>4</sup> Iisaa jaabii mo, wii:

—Ana winndii: «Wanaa jaamdu tan neddo wuurdata.»\*

<sup>5</sup> Ibiliisa nafi mo nokku toowdo, holli mo wakkati gooto laamuuji aduna oo dii fuu, <sup>6</sup> wii mo:

—Mi hokkete baawde dow dum fuu, kajum e teddungal mum. Sabi miin hokkaa dum, mido waawi hokkude mo muuy-mi. <sup>7</sup> So a sujidanii kam, dum fuu yo aan jey.

<sup>8</sup> Iisaa jaabii mo, wii:

—Ana winndii: «Joomiraado maa Laamdo tan kaan-daa sujidande, kanko tan kaan-daa rewde.»†

<sup>9</sup> Kasen Ibiliisa nafi mo Urusaliima, darni mo dow leŋŋe-leŋŋe Suudu Dewal Mawndu, wii mo:

—So a Bii Laamdo, suur njippo-daa e leydi, <sup>10</sup> sabi ana winndii: «O yamiran malaa'ika'en makko ndeene.»

<sup>11</sup> Ana winndii kasen:

«Be njabbete, pati koyngal maa gaajoo e haayre.»‡

<sup>12</sup> Iisaa jaabii mo, wii:

—Ana winndii: «Pati ittu koro Laamdo, Joomiraado maa.»§

<sup>13</sup> Nde Ibiliisa ronkunoo seytaade mo ndee, seli e makko seeda.

### *No Nasaraatunkooŋe calorii jafande Iisaa*

<sup>14</sup> Iisaa wirfittii leydi Galili, semmbe Ruuhu ana e mum, kabaaru makko saakii e leydi ndii fuu. <sup>15</sup> Omo waajoo ley cuudi baajordiYahuudiyankooŋe, yimŋe fuu ana teddini mo.

<sup>16</sup> O yehi Nasaraatu do o mawni doo, o naati e ley suudu waajordu jalaande fowteteende no o woowiri nii. O immii faa o jannga, <sup>17</sup> o hokkaa dewtere annabi Esaaya, o udditi nde, o forri e nokku binndiraado hono nii:

<sup>18</sup> «Ruuhu Joomiraado ana e am,

sabi o subike kam faa mi anndina misikiina'en Kabaaru Lobbo.

O neli kam faa mi ooynanoo nanngaabe yoppiteede mum'en,

e wumŋe wumtineede mum'en,

e torraabe yoppiteede mum'en,

<sup>19</sup> faa mi ooynoo hitaande nde Joomiraado hollata moyyere mum ndee warii.»\*

<sup>20</sup> Caggal dum, o uddi dewtere ndee, o totti nde golloowo ley suudu waajordu nduu oo, o joodii. Wonnooŋe ton ŋee fuu, puttini mo gite. <sup>21</sup> O darii omo wiya ŋe:

—Ko winndii koo, hannde dum tabitii do nan-don dum doo.

\* **4:4** Fillitagol Tawreeta 8.3 † **4:8** Fillitagol Tawreeta 6.13 ‡ **4:11** Jabuura 91.11-12 § **4:12** Fillitagol Tawreeta 6.16 \* **4:19** Esaaya 61.1-2

<sup>22</sup> Be fuu e6e kaala haala makko lobba, kasen duu konngi lobbi jaltudi e hunduko makko dii ana kaaynoo 6e. Be ndarii e6e mbiya:

—Wanaa oo woni 6ii Yuusufu oo naa?

<sup>23</sup> O wii 6e:

—Mido anndi on kaalanan kam ngol banndol: «Cawroowo, sawru hoore maa. Ko min nani a wadii Kafarnahum koo, wadu dum ngeenndi maa doo duu.»

<sup>24</sup> O wii kasen:

—Mido haalana on goonga: annabaajo fay gooto ja6antaake e ngeenndi mum'en. <sup>25</sup> Mido haalana on, rew6e misikiina'en 6e wor6e mum'en maayi ana keewnoo Israa'iila e jamaanu annabi Iliyaasa, wakkati nde waadere kammu saamaali e leydi ndii duubi tati e lebbi jeegom. Nden yolbere mawnde wadiino e leydi ndii fuu. <sup>26</sup> Kaa annabi Iliyaasa nelaaka e fay gooto e ma66e, so wanaa e debbo gooto mo gorum maayi, jeyaado Sarepta leydi Sidon. <sup>27</sup> Kasen duu, seppaa6e ana keewnoo Israa'iila e jamaanu annabi Eliisa, kaa fay gooto e ma66e sellinaaka, so wanaa Naaman jeyaado e leydi Siriya.

<sup>28</sup> Nde yim6e won6e e ley suudu waajordu nduu nannoo kaa haala ndee, mettaa sanne, <sup>29</sup> immii, ndibbi Iisaa faa caggal ngeenndi, ngaddi dum faa sera waamnde haayre do ngeenndi ma66e ndii woni doo, faa mbedoo mo ley. <sup>30</sup> Kaa o seeki hakkunde ma66e, o witti.

### *No Iisaa selliniri gorko laddaado*

<sup>31</sup> Iisaa yehi Kafarnahum ley leydi Galili, omo waajoo yim6e e ley jalaande fowteteende. <sup>32</sup> Be kaaynaa e waaju makko oo, sabi omo waajoroo 6e baawde.

<sup>33</sup> Gorko mo seydaani woni e mum ana ley waajordu nduu, wulli faa toowi, wii:

<sup>34</sup> —Iisaa Nasaraatunke oo, kodum hillu maa e amen? A gar6o halkude min naa? Mido anndi ko ngon-daa, a ceniido iwrudo to Laamdo!

<sup>35</sup> Iisaa jahii e seydaani oo, wii:

—Deyyu yaltu e makko!

Seydaani oo li6i neddo oo hakkunde yim6e fuu yalti e mum, tawi dum wadaali neddo oo fay huunde. <sup>36</sup> Be fuu 6e kaaynaa, hedde e6e lamndondira hakkunde ma66e:

—Ko kaa haala woni? Seydaani'en 6ee, omo yamira 6e semmbe e doole 6e njaltan!

<sup>37</sup> Innde Iisaa nanaa e seraaji dii fuu.

### *No Iisaa selliniri jaw6e heew6e*

<sup>38</sup> Nde o yalti suudu waajordu nduu ndee, o naati galle taalibbo makko biyeteedo Simon. Esii Simon debbo ana wondunoo e jontere naawnde, 6e ndaardi mo o walla dum. <sup>39</sup> O darii sera daddo mum, o jahii e jontere ndee, non jontere ndee yoppi debbo oo, o selli. Debbo oo immii don e don, laatani 6e njaatigi.

<sup>40</sup> Nde naange mutunoo, jogiido jawdo fuu waddi dum e makko. Jaw6e jawuuji ko di tawaa fuu ngaddaa, o fawi junngo makko e ma66e 6e fuu gooto gooto, o sellini 6e. <sup>41</sup> Seydaani'en ana njalta e yim6e heew6e ana ngulla, ana mbiya:

—Aan woni Bii Laamdo!

Omo jahoo e ma66e, omo wiya 6e ndeyya, sabi e6e anndi kanko woni Almasiihu.

*No Iisaa waajorii haala Laamu Laamdo*

<sup>42</sup> Nde weetunoo ndee, Iisaa yalti, yehi nokku teelɔ. Jamaa oo tewti mo faa yiiti mo, nanngi mo pati o seerta e mum. <sup>43</sup> Kaa o wii 6e:

—Ana tilsi mi 6anngina Kabaaru Lobbo haala Laamu Laamdo oo e geelle godde. Sabi kammari majjum neliraa-mi.

<sup>44</sup> O yehi, hedde omo waajoo ley cuudi baajordi leydi Yahuudiya.

## 5

*No Iisaa noddiri taalibaabe aranndeefe*

<sup>1</sup> Nannde wootere Iisaa ana darii dow fonngo weendu Genesareeti, hedde jamaa ana billondira sera makko faa hettindoo konngol Laamdo ngol. <sup>2</sup> O yii laanaaji didi ana panndi e danjeere weendu nduu. Awoofe yaltube e majji 6ee, ana lalla bubbi mum'en. <sup>3</sup> O naati ngoota e laanaaji dii, ka Simon kaa, o ndaardi dum deerta ka seeda, ka iwa e njoorndi ndii. O joodii e laana kaa, omo waajoo jamaa oo. <sup>4</sup> Nde mo tilii waajaade ndee, mo wii Simon:

—Njehee to luggidi, tippo-don bubbi mon, awon.

<sup>5</sup> Simon jaabii, wii:

—Moobbo, min mbaalii miden awa, min ke6aali fay huunde. Kaa so non mbii-ɗaa, mi tippoto bubbi dii.

<sup>6</sup> Nde 6e tippii di ndee, 6e nanngi liɗɗi faa heewi, faa bubbi ma66e kosi seekaade. <sup>7</sup> Be noddii wondii6e ma66e won6e e laana ngokka kaa 6ee, ngara mballa 6e. Been ngari, 6e kebbini laanaaji didi dii fuu, faa di kosi mutude.

<sup>8</sup> Nde Simon Piyeer yii dum ndee, diccii yeeso Iisaa, wii dum:

—Moobbo, wodɗitam, sabi mi neddo luuttudo.

<sup>9</sup> Ko saabii so o wii dum dee, kanko e wondii6e makko 6ee fuu, 6e kaaynaama saabe keewal liɗɗi di 6e nanngi dii. <sup>10</sup> Hono non Yaakuuba e Yuhanna 6i66e Jebede reentube e Simon 6ee duu kaayniraa. Kaa Iisaa wii Simon:

—Pati hul, gila jooni a laatoto awoowo yim6e.

<sup>11</sup> Nii 6e panndi laanaaji ma66e dii, 6e njoppi fuu, 6e njokki e Iisaa.

*No Iisaa selliniri ceppaado*

<sup>12</sup> Nden Iisaa ana wonnoo e ngeenndi ngootiri, faa gorko ceppaado yii dum, diccii yeeso mum, wii:

—Moobbo, so tawii a ja6ii, ada waawi sellinde kam.

<sup>13</sup> Iisaa foocci junngo mum, memi mo, wii:

—Mi ja6ii, sellu!

Don e don ceppe dee iwi e makko. <sup>14</sup> Caggal dum, Iisaa daalii mo pati mo haalana dum fay gooto, kaa wii mo:

—Yaa holloy hoore maa jottinoowo sadaka, ngadanaa laa6ugol maa ngol sadaka mo Muusaa yamiri oo, faa anndina 6e a sellii.

<sup>15</sup> Non innde Iisaa beydii naneede. Jamaa keewdo wari, hawriti do makko faa hettindanoo mo, sellinee e jawuuji mum'en, <sup>16</sup> kaa o serindii e nokkuuje teelde, omo wada duwaawu.

*No Iisaa selliniri bonnguujjo*

<sup>17</sup> Nannde wootere Iisaa ana waajoo. Farisa'en e jannginoofe Sariya Muusaa, iwru6e geelle Galili e Yahuudiya, kaɗum e Urusaliina fuu, ana njoodii. Joomiraado ana 6anngina baawde mum e makko, omo sellina jawuuji. <sup>18</sup> Non yogaa6e ngaddi gorko bonnguujjo ana lalnaa e dengelewo, ana tewta naannude dum faa lalna dum yeeso makko. <sup>19</sup> Kaa nde 6e ndonkunoo naannude mo sabaabu jamaa oo, 6e njabbinoyi mo dow bene oo,

6e kippiti dum, 6e njippini bonnguujo oo e dengeleewo mum fuu hakkunde yim6e 6ee yeeso Iisaa. <sup>20</sup> Nde o yiinoo goondinal ma66e ndee, o wii bonnguujo oo:

—Gidam, luutti maa njaafaama.

<sup>21</sup> Dunkee'en Sariya 6ee e Farisa'en keddii miilde ana mbiya e ko'e mum'en: «Oo homo bonkotoo Laamdo? Homo waawi yaafaade luutti so wanaa Laamdo gooto oo?» <sup>22</sup> Iisaa faami miilooji ma66e, jaabii 6e, wii:

—Kodum wadi so ofon miiloo miilooji baadi nii e berde mon? <sup>23</sup> Wiide: «Luutti maa njaafaama» e wiide: «Imma yaa», kodum hen buri newaade? <sup>24</sup> Kaa faa mi anndina on Bii Neddo ana jogii baawde e aduna oo yaafaade luutti...

Nden o wii bonnguujo oo:

—Mido haalane: imma, 6am dengeleewo maa, njahaa suudu maa.

<sup>25</sup> Don e don, bonnguujo oo immii yeeso yim6e fuu, 6amti dengeleewo mum, hooti suudu mum ana yetta Laamdo. <sup>26</sup> Be fuu 6e kaaynaa, hedde e6e njetta Laamdo. Kulol nanngi 6e, 6e mbii:

—Hannde njii-den kaayefiiji.

### *No Iisaa noddiri Lewi*

<sup>27</sup> Caggal dum, Iisaa yalti, yii duwaaje gooto ana wiyee Lewi ana joodii e duwaajeere mum. O wii dum:

—Jokku e am!

<sup>28</sup> Lewi yoppi fuu, immii, jokki e makko.

<sup>29</sup> Lewi nabi mo galle mum, hoocci mo kodu mawdo, duwaaje'en heew6e e yim6e wob6e ana jaamda e ma66e. <sup>30</sup> Farisa'en e dunkee'en Sariya mum'en keddii ana njurjarta, ana mbiya taalibaa6e makko 6ee:

—Ko saabii so ofon jaamda ofon njarda e duwaaje'en, kaajum e luuttoo6e hono mum'en?

<sup>31</sup> Iisaa jaabii 6e, wii:

—Wanaa celludo hasindini e cawroowo, jawdo hasindini e cawroowo.

<sup>32</sup> Wanaa noddude fooccitii6e waddi kam, noddude luuttoo6e faa tuuba woni ko waddi kam.

### *Haala koorka*

<sup>33</sup> Be mbii mo:

—Taalibaa6e Yaayaa ana koora ana ngada duwaawu wakkati fuu, hono non taalibaa6e Farisa'en 6ee duu ngadata. Kaa 6e maa 6ee, ana jaama ana njara.

<sup>34</sup> O wii 6e:

—Ofon mbaawi hoorinde nootii6e kuurtungu, tawa jommbaajo gorko ana wondi e mum'en naa? <sup>35</sup> Kaa jalaade ngaran de jommbaajo gorko oo ittete e hakkunde ma66e. E deen jalaade 6e kooran.

<sup>36</sup> O haalani 6e banndol kasen:

—Fay gooto ittataa e kaddungal kesal fetalaare, faa dammbira kiinngal. So dum wadii, joomum bonnan kesal ngal, tawee fetalaare ittaande hen ndee yaadataa e kiinngal ngal. <sup>37</sup> Kasen duu, fay gooto loowataa peguujam kesam e sumalleeji kiiddi. So dum wadii, peguujam kesam dam fusan di, yuppoo, di mursee. <sup>38</sup> Peguujam kesam e sumalleeji kesi loowetee. <sup>39</sup> Fay gooto muuyataa peguujam kesam so yarii kiiddam, sabi wiyan kiiddam dam buri welde.

## 6

*Haala jalaande fowteteende*

<sup>1</sup> Wadiino e jalaande fowteteende wootere, Iisaa ana seeka gese. Taalibaa6e makko ana kelta butaali, ana ngoroo ana yakka. <sup>2</sup> Kaa yoga e Farisa'en mbii 6e:

—Ko saabii so odon ngolla ko dagaaki gollude jalaande fowteteende?

<sup>3</sup> Iisaa jaabii 6e, wii:

—Tama on njanngaali ko Daawuuda wadi nde yolbi, kaɗum e yim6e mum?

<sup>4</sup> O naati e ley hukkuum ceniido oo, o jaami buuru cakkaado oo, o hokki hen yim6e makko. Tawee nee, yottinoobe sadaka tan nduɗanaa jaamde oon buuru.

<sup>5</sup> O wii 6e kasen:

—Bii Neddo jey jalaande fowteteende.

<sup>6</sup> Jalaande fowteteende wonnde, o naati suudu waajordu omo waajoo. Gorko mo junngo mum jaamo waati ana tawaa ton. <sup>7</sup> Dunkee'en Sariya e Farisa'en ana ngattani Iisaa hakkille. Ana yeewa yalla o anniyiido sellinde gorko oo e ley jalaande fowteteende ndee, faa ke6a wullanaade mo. <sup>8</sup> Kaa nde wonnoo omo anndi miilooji ma66e, o wii mo junngo mum waati oo:

—Imma, dara hakkunde yim6e!

Gorko oo immii, darii. <sup>9</sup> Caggal dum, Iisaa wii 6e:

—Midɗo lamndoo on: e ley jalaande fowteteende ana dagoo gollude ko moyyi naa gollude ko boni? Danndude neddo naa halkude dum?

<sup>10</sup> E oon wakkati, o yeewi 6e fuu, o wii mo junngo mum waati oo:

—Fooccu junngo maa!

Oon foocci ngo tan, ngo selli faa warti hono no wonngo ngoo nii. <sup>11</sup> Dum metti 6e sanne, hedde e6e piya dabare no 6e kaani wadude Iisaa.

*No Iisaa suborii nelaarabe sappo e didon*

<sup>12</sup> E ley deen jalaade, Iisaa yalti, yehi dow waamnde haayre faa wada duwaawu. O waali wadude duwaawu. <sup>13</sup> Nde weetunoo ndee, o noddi taalibaa6e makko 6ee, o subii hen sappo e didon, o inndiri dum'en nelaa6e.

<sup>14</sup> Kam6e ngoni: Simon mo o innditiri Piyeer e Andire mijum e Yaakuuba e Yuhanna e Filipa e Bartolome <sup>15</sup> e Matta e Tomaa e Yaakuuba gii Alfaa e Simon noddirteedo Kiranoowo suudu baaba <sup>16</sup> e Yahuuda gii Yaakuuba e Yahuuda Isikariyota jammbootoодо mo oo.

*No Iisaa waajorii e no selliniri yim6e*

<sup>17</sup> O jippodii e ma66e, o darii e nokku jaajudo, kanko e heew6e e taalibaa6e makko. Jamaa keewdo iwri e ley leydi Yahuudiya fuu e Urusaliima e gure tiimude maayo geeci gila Tirus faa Sidon. <sup>18</sup> Be ngari hettindanaade mo e sellineede e jawuuji ma66e. Be ladde torrunoo cellinaama. <sup>19</sup> Yim6e 6ee fuu ana njidi memde mo, sabi baawde ana njalta e makko cellina dum'en fuu.

*Haala wel6e hoore e mettube hoore*

<sup>20</sup> E oon wakkati fuu, o hunci gite makko o yeewi taalibaa6e makko 6ee, o wii:

—Onon misikiina'en, on mbelii hoore, sabi onon njeɗ Laamu Laamdo oo.

<sup>21</sup> Onon yolbu6e jooni, on mbelii hoore, sabi on kaaran.

Onon woyoo6e jooni, on mbelii hoore, sabi on njalan.

22 On mbelii hoore so yimbe mbarjii on,  
ndibbii on, njennii on,  
mbonnii inde mon saabe Bii Neddo.

23 Nannde mum, ceyee, ilino-don, sabi mbarjaari mawndi ana doomi on  
dow kammu. Hono non be ngadunoo annabaabe aranndeebe bee.

24 Kaa bone woodanii on, onon arsukunte'en,  
sabi on kebii neema mon.

25 Bone woodanii on, onon haarbe jooni,  
sabi on njolban.

Bone woodanii on, onon jaloobe jooni,  
sabi on cunjan, on mboyan.

26 Bone woodanii on, so yimbe fuu manii on,  
sabi hono non be ngadunoo annabaabe peneebe bee duu.

### *Haalayidugol konnee'en*

27 —Kaa onon hettindantooobe kam bee, mido wiya on: njidee konnee'en  
mon, tikkanbe on ngadanon dum'en moyyere. 28 Nduwane hudoobe on,  
torroobe on duu, naagano-don dum'en Laamdo. 29 So won piido ma banaawo,  
accu dum fiye banngge goddo oo duu. So won teetudo ma dolloke maa, pati  
hadu dum forgo oo duu. 30 Neddo fuu naagiido ma, ndokkaa dum. Teetudo ma  
jawdi maa, njoppiraa dum. 31 Ngadiranee yimbe no njid-don be ngadirana on  
nii.

32 So yidube on tan njidaton, bural hongal kebaton? Fay luuttoobe ana  
njidi yidube dum'en. 33 So wadanoobe on moyyere tan ngadanton moyyere,  
bural hongal kebaton? Fay luuttoobe bee hono non ngadata. 34 So be miil-don  
hebude e mum tan namloto-don, bural hongal kebaton? Fay luuttoobe bee  
ana namloo luuttoobe hono mum'en, yalla ana njobee namaande mum'en.

35 Kaa onon, njidee konnee'en mon, ngadon moyyere tawa on daminaaki hen  
fay huunde. Nden, on keban mbarjaari mawndi, on laatoto fiibe Laamdo  
Toowdo oo, sabi oon ana neemina bonnoobe moyyere ana neemina bonbe  
duu. 36 Laatee yurmotoobe, no Baabiraado mon oo laatorii jurmotoodo nii.

### *Haala njindiral*

37 —Pati njinee, on njinataake. Pati njukkee, on njukkataake. Njaafee, on  
njaafete. 38 Ndokkee, on ndokkete. So on ndokkii, on cowirante saawal  
lobbal, kebbinaangal faa ana yuppoo, sabi ko etiranton wobe koo, dum  
etirante-don.

39 O beydani be hen banndol gonngol, o wii:

—Bumdo ana waawi dowde bumdo hono mum naa? So dum wadii, wanaa  
be didon fuu, be caaman ley ngaykaare naa? 40 Taalibbo burataa moobbo  
mum, taalibbo ki6budo laatoto hono moobbo mum. 41 Ko saabii so ada yiya  
kudol ley yitere sakiike maa, tawee aan nee, a yiyataa leggal gonngal e ley  
nde maa ndee? 42 Hono mbaawru-daa wiide sakiike maa: «Sakiike, dal mi  
ittane kudol gonngol e yitere maa ngol», tawee aan nee, a maatataa leggal  
gonngal e ley nde maa ndee? Naafigi, ittu leggal gonngal e yitere maa ngal  
tapon, nden jiile maa laabata, faa kebaa no ittiraa kudol gonngol e yitere  
sakiike maa ngol.

### *Haala lekki e bidde mum*

43 —Lekki lobbi rimataa bidde bonde, lekki ki woodaa rimataa bidde lobbe.  
44 Sabi lekki fuu ana annditiree bidde mum. Ibbe tebataake e kebbe, peguuje  
tebataake e gi'e. 45 Neddo moyyo, ko moyyi iwata e ndesaari ngonndi ley

6ernde mum. Neddo bondo, ko boni iwata e ndesaari ngonndi ley 6ernde mum. Sabi ko woni e 6ernde, dum yaltata e hunduko.

### *Bannol haala suudu diidaandu dow haayre*

<sup>46</sup> —Ko saabii so odon noddira kam «Moobbo», kaa on ngadataa ko mbii-mi? <sup>47</sup> Neddo fuu gardo e am so hettindii haalaaji am so jokki di, mi hollan on mo nanndi: <sup>48</sup> Joomum ana nanndi e neddo mahufo suudu, so asi leydi ndii faa yottii haayre, diidi ndu dow mayre. Nde yiiwoonde to6unoo faa ilaali mbuwi, ronki fay dimmbude ndu, sabi dow haayre ndu mahaa. <sup>49</sup> Kaa nando haalaaji am so jokkaali, ana wa'i hono mahufo suudu dow njaareendi, mo asanaali dum diidol. Nde ilaali mbuuwnoo, ndu wurji e leydi don e don, ndu boni.

## 7

### *No Iisaa selliniri kaadime hooreejo sordaasi'en*

<sup>1</sup> Nde Iisaa tilii waajaade hettindotoo6e 6ee ndee, yehi Kafarnahum. <sup>2</sup> Hooreejo sordaasi'en gooto, kaadime mum korsufo jawi faa ana ha6ana yonki. <sup>3</sup> Hooreejo oo nani haala Iisaa ana haalee, neli e makko maw6e Yahuudiyankoo6e, o wara o dannda kaadime mum oo. <sup>4</sup> Be ngari e Iisaa, 6e ndaardi dum sanne sanne, e6e mbiya:

—Omo haani wadaneede dum, <sup>5</sup> sabi omo yidi lejol men ngol, kasen duu kanko mahi suudu men waajordu nduu.

<sup>6</sup> Iisaa yaadi e ma66e. Kaa nde 6e 6adinoo galle oo ndee, hooreejo sordaasi'en oo neli yim6e mum e makko, wii mo:

—Moobbo, pati tampin hoore maa, sabi miin, mi wanaa fay huunde, fotaa ko ngaraa galle am. <sup>7</sup> Dum saabii mi taykike miin e hoore am, mi haanaa yaade to maa. Kaa dapa ko kaal-6aa tan, kaadime am oo sellan. <sup>8</sup> Miin e hoore am, mi laamaado, miin duu mido laamii sordaasi'en. So mi yamirii gooto yaha, yahan, so mi wii goddo wara, waran, so mi wii kaadime am wada huunde, wadan.

<sup>9</sup> Nde Iisaa nani kaa haala ndee, haaynaa e hooreejo sordaasi'en oo, yeeyii yim6e jokku6e e mum 6ee, wii:

—Mido haalana on, mi yiyaali hono ngal goondinal e sellude fay e Is-  
raa'iilanke.

<sup>10</sup> Nde nelaabe 6ee mbirfitii galle too ndee, tawi kaadime oo sellii.

### *No Iisaa wuurtiniri bii debbo mo gorum maayii*

<sup>11</sup> Janngo mum, o yehi ngeenndi mbiyeteendi Nayin, kanko e taalibaabe makko e yim6e heew6e. <sup>12</sup> Nde o 6adinoo damal ngeenndi ndii ndee, o hawri e mahiidi suka gorko. Oon yo bajjo, abba mum maayii, inna mum 6amaaka kasen. Yim6e ngeenndi ndii heew6e ana njokki e inniraado oo. <sup>13</sup> Nde Iisaa yii inniraado oo ndee, yurmii dum, wii:

—Pati woy!

<sup>14</sup> Iisaa 6adii, memi leggal na6irgal ngal. Roondinoo6e 6ee ndarii, o wii:

—Suka jokolle, mido wiye: imma!

<sup>15</sup> Nii maaydo oo immii joodii, ana haala. Iisaa totti mo inniiko. <sup>16</sup> Kulol nanngi yim6e 6ee fuu, hedde e6e njetta Laamdo, e6e mbiya:

—Annabaajo mawdo 6anngii e ley men! Laamdo warii faabaade yim6e mum!

<sup>17</sup> Oo kabaaru saakii e leydi Yahuudiya e seraaji mum fuu.

### *Haala nelal ngal Yaayaa neli e Iisaa*



18 Ko wadi koo fuu, Yaayaa narrii d̄um taalibaabe mum, noddi d̄idon ma66e, 19 neli d̄um'en to Iisaa, 6e lamndoo d̄um yalla kaɲum woni garoowo oo, naa 6e ndooman goddo? 20 Been wor6e d̄idon ngari e Iisaa, mbii d̄um:

—Yaayaa mo lootogal batisima neli min e maa, min lamnde yalla aan woni kaando warde oo, naa min ndooma goddo?

21 E oon wakkti, omo sellina yim6e heew6e jawuui di ngaldaa sii, omo ribba seydaani'en, omo wumtina wum6e heew6e. 22 O jaabii 6e, o wii:

—Njehee njantanoyee Yaayaa ko njii-d̄on e ko nan-d̄on: wum6e ana mbumta, layannoobe ana njabba faa gasa, seppaabe ana cellinee, faadu6e ana paadita, maay6e ana nguurta. Misikiina'en duu kaalanaama Kabaaru Lobbo oo. 23 Oon mo salaaki goondinde kam, welii hoore.

24 Nde nelaar6e 6ee kooti ndee, Iisaa fuddi haalande jamaa oo haala Yaayaa, o wii:

—Kodum yeewoyno-d̄on to ladde jeereende too? Kudol dimmbotoongol e henndu naa? 25 Kodum yeewoyno-d̄on? Neddo pariido naa? Boornotoobe kaddule lobbe so nguura nguurdam lobbam 6ee, e cuudi kaanankoo6e tawete. 26 Kodum yeewoyno-d̄on ndennoo? Annabaajo naa? Goonga! Mid̄o haalana on, omo 6uri annabaajo. 27 Kanko woni mo Binndi d̄ii mbii e mum:

«Miin Laamdo, mi ardinante nelaar6e am moyyinanooowo ma laawol.»\*

28 Mid̄o haalana on, bammaade bammaali 6urdo Yaayaa, tawee nee, 6urdo lo'ude e Laamu Laamdo oo 6uri mo teddude. 29 Yim6e hettindii6e mo 6ee fuu, fay duwaaje'en 6ee, njabii konngol Laamdo ngol ko Yaayaa looti d̄um'en lootogal batisima koo. 30 Kaa Farisa'en e jannginoobe Sariya mberrike faandaa Laamdo ko 6e calii looteede e junngo Yaayaa koo.

31 Ndennoo, kodum nanndinan-mi e yim6e oo jamaanu? Hobe 6e nanndi?

32 E6e mba'i hono sukaa6e joodii6e e luumo, ana noddondira, ana mbiya:

«Min piyanii on cereeli,  
on mbamaali.

Min mboyanii on woondu yurminiindu,  
on mboyaali.»

33 Sabi Yaayaa mo lootogal batisima warii, ɲaamataa 6ii jalo, yarataa doro, on mbii yo laddaado. 34 Kaa Bii Neddo oo warii, ana ɲaama ana yara, on mbii ɲaamde e yarde tan woni e hakkille mum, o gid̄o duwaaje'en e luuttoobe hono mum'en. 35 Kaa Laamdo hakkilante oo, ja6u6e d̄um 6ee fuu njiyan goonga mum.

### *No Iisaa yaaforii debbo pijoowo*

36 Gooto e Farisa'en 6ee noddi mo bottaari. O naati galle joomum, omo ɲaamda e mum. 37 Debbo pijoowo ana e ngeenndi ndii. Ko o nani Iisaa ana wottoo to galle Farisanke oo koo, o waddi faandu nebam uuroojam, 38 o heedi caggal mum sera koyde mum, omo woya, omo leefinira koyde mum dee gondi makko, omo soccira de sukundu makko, omo uurnoo de, omo wuja e majje nebam dam. 39 Nde Farisanke noddudo mo oo yii d̄um ndee, wii e ley becce mum: «Sinndo oo yo annabaajo, o anndan debbo memoowo mo oo, o annandan oon yo pijoowo.» 40 Iisaa haaldi e Simon Farisanke oo, wii:

—Simon, mid̄o haalane huunde wootere.

O jaabii:

—Haal, Moobbo!

41 Iisaa wii:

\* 7:27 Malakiya 3.1

—Namlotoodo gooto ana rewannoo yimbe didon, gooto oo buudi cardi teemedede joy, goddo oo buudi cardi capande joy. <sup>42</sup> Kaa nde mo anndunoo 6e ngalaa ko 6e njobira mo ndee, o yaafii 6e didon fuu. Jooni, homo e ma66e buri yidude mo?

<sup>43</sup> Simon jaabii:

—Midó miila mo o yaafii kaalisi keewdo oo.

Iisaa wii mo:

—A haalii goonga!

<sup>44</sup> Caggal dum, o yeeyii debbo oo, o wii Simon:

—A yii oo doo debbo naa? Mi naatii galle maa, fay ndiyam ko mi semmbira koyde am a hokkaali kam. Kaa kanko, gondi makko o leefniri koyde am, o socciri de sukundu makko. <sup>45</sup> Aan, a buuccaaki kam, kaa kanko, gila naatumi, o noottaali buuccaade koyde am. <sup>46</sup> A wujaali hoore am nebam, kaa kanko, o wujii e koyde am nebam uuroojam. <sup>47</sup> Dum saabii so midó wiye: luutti makko e heewde fuu njaafaama, ndennoo jilli makko ana mawni. Kaa jaafaado seeda, jilli seeda hollata.

<sup>48</sup> Caggal dum, o wii debbo oo:

—Luutti maa njaafaama.

<sup>49</sup> Naamdannoo6e e makko 6ee ana mbiya e ko'e mum'en: «Homo woni oo gorko jaafotoodo fay luutti?»

<sup>50</sup> Non o wii debbo oo:

—Goondinal maa hisinii ma. Yaa e jam.

## 8

### *No rew6e downtanirii Iisaa*

<sup>1</sup> Caggal dum, Iisaa ana yiiloo e geelle e gure fuu, ana ooynoo Kabaaru Lobbo haala Laamu Laamdo. Taalibaa6e makko sappo e didon 6ee ana ngondi e makko, <sup>2</sup> kajum e rew6e yogaa6e 6e seydaani'en mum'en ndibbaa, nawuuji mum'en cellinaa. Kam6e ngoni Mariyama annditirteedo mo Magdala, mo seydaani'en njeddon ndibbanoo iwde e mum, <sup>3</sup> e Yowanna jom suudu howruujo Hirudus biyeteedo Huja, kajum e Susaana e rew6e wo66e heew6e wallirannoo6e 6e jawle mum'en.

### *Banndol haala aawoowo*

<sup>4</sup> Yimbe iwi e geelle dee fuu, ngari e makko. Jamaa keewdo filii mo, o haalani 6e ngol banndol:

<sup>5</sup>—Aawoowo yalti sankoyde. E ley sankugol ngol, yoga e aawdi ndii saami e laawol, yaabaa, pooli ngari cu6i dum. <sup>6</sup> Yoga mayri saami e korokaaye, fudi, yoori, sabi nokku oo darnataa ndiyam. <sup>7</sup> Yoga mayri saami do kebbe pudata, kebbe dee cuumi ndi. <sup>8</sup> Yoga mayri saami e leydi mbelndi, fudi, rimi, wabbere fuu sowii cowe teemedere.

Nde o haalnoo dum ndee, o toowni daande makko, o wii:

—Jom nowru fuu yo nanu.

<sup>9</sup> Taalibaa6e makko 6ee lamndii mo:

—Kodum ngol banndol firritata?

<sup>10</sup> O wii 6e:

—Onon, on ndokkaama faamde goonga teddu6o haala Laamu Laamdo oo. Kaa wo66e 6ee e banndi 6e kaalanirtee, yalla: «e6e yeewa, tawa 6e njiyataa, 6e nana, tawa 6e paamataa.»\*

\* 8:10 Esaaya 6.9

11 Maanaa bannadol ngol annii: aawdi ndii yo konngol Laamdo. 12 Yimbe yogaabe ana nanndi e laawol. So 6e nanii konngol ngol fuu, Ibiliisa waran itta ngol e berde ma66e pati 6e ngoondina, sako 6e kisa. 13 Yogaabe ana nanndi e korokaaye. Be nanan konngol ngol, 6e nja66oroo ngol seyo. Kaa ngol walaa dadi e ma66e, wakkati gooto tan 6e ngoondinta. Nde soobee oo wari fuu, 6e njoppa. 14 Yogaabe ana nanndi e nokku kebbe do aawdi ndii saami doo. So 6e nanii konngol ngol tan, 6e mbittan, sabi sugullaaji aduna e joote jawdi e gidaade yonki cuuman ngol ngol waasa 6enndude. 15 Kaa do aawdi ndii saami e leydi mbelndi doo, 6een ngoni naniroo6e konngol ngol berde belde, laa6ude, so kayba ngol faa ngol rima.

### *Bannadol haala lampa*

16—Fay gooto hu66ataa lampa so hippa hen la'al naa soorna dum ley leeso. Ko wadata dee, sinndan dum, yalla eka yaaynana naato6e. 17 Sabi walaa fuu ko noofi ko 6anngintaake, walaa ko suudii ko annditaaake faa yaltinee sella. 18 Ndennoo, tiidee e no nanir-don nii, sabi jogiido fuu, beydante. Kaa mo walaa oo, fay ko miilata ana jogii koo teetete.

### *Inna Iisaa e mijiraa6e Iisaa*

19 Inniiko e mijiraa6e makko wor6e ngari e makko, kaa 6e ke6aali yottaade mo saabe jamaa. 20 O haalanaa inna makko e mijiraa6e makko ana ndarii sella ana njidi yiide mo. 21 Nii o jaabii, o wii:

—Innam e mijiraa6e am yo nanoo6e konngol Laamdo ngol so gollira dum bee.

### *No Iisaa waaltiniri henndu*

22 Nannde wootere Iisaa e taalibaa6e mum naati laana. O wii 6e:

—Lummben weendu nduu.

Be ndeerti. 23 E ley lummbugol ngol, mo daanii. Oon wakkati fuu, henndu mawndu immii, laana kaa heewi ndiyam, ka hosi mutude. 24 Be 6adii, e6e pinndina mo e6e mbiya:

—Moobbo, Moobbo, miden nii kalkoo!

O fini, o jahii e henndu nduu e bempееje dee, non fuu wii teen! 25 Caggal dum, o wii 6e:

—Hoto hoolaare mon woni?

Be kuli, 6e cunli, e6e mbiyondira e ko'e ma66e:

—Ko oo gorko woni? Omo yamira fay henndu e ndiyam, di downtanto mo.

### *No Iisaa selliniri laddaado tuddiido janaale*

26 Caggal dum, 6e panndoyi leydi Gerasankoo6e, peewtondirndi e leydi Galili. 27 Nde o yeenti ndee, gorko laddaado, jeyaado e ngeenndi ndii, joppudo kaddule ko 6ooyi so tuddoyii janaale, wari e makko. 28 Nde o yii Iisaa ndee, o wulli, o diccii yeeso mum, o haali faa toowi, o wii:

—Iisaa, Bii Laamdo Toowdo, ko njid-daa wadude kam? Mido jaage, pati torram.

29 Walaa ko o wiiri non, sinnaa Iisaa yamirii seydaani oo yalta e neddo oo. Oo seydaani ana war-wartannoo e makko cili keewdi. Oon ana geyyeteno juude e koyde fuu, geyyiree calali, kaa o tayan dum fuu, seydaani oo regina mo ngeenndi, na6a mo ley ladde jeereende. 30 Iisaa lamndii mo, wii:

—Hono mbiyete-daa?

O jaabii:

—Mido wiyee «Jamaa».

O wii dūm non, sabi seydaani'en heewbe ana ngondi e makko. <sup>31</sup> Be ndarii ebe ndaarda Iisaa pati o yamira be be naatoya e iduru. <sup>32</sup> Sewre girooji mawnde ana durannoo don e hoore waamnde haayre. Seydaani'en be ndaardi mo o dujanoo dūm'en naatoya e ley girooji dii. O dujanii be. <sup>33</sup> Be njalti e neddo oo, be naati e ley girooji dii. Sewre ndee fuu diiri, iwi hoore waamnde haayre too, naatoyi e ley weendu nduu, yoolii.

<sup>34</sup> Nde duroobe bee njii dūm ndee, be ndogi, be njantanoyii dūm yimbe ngeenndi ndii e seraaji mum. <sup>35</sup> Been ngari yeewde ko wadi koo. Nde be njottii Iisaa ndee, be tawi laddanoodo oo ana joodii banngge makko, ana boornii kaddule, yeedditii. Nii kulol nanngi be. <sup>36</sup> Yiinoobe dūm be njantanii yimbe no laddanoodo oo selliniraa. <sup>37</sup> Yimbe leydi Gerasa fuu ndaardi Iisaa yoppana dūm'en leydi mum'en, sabi kulol manngol nanngi dūm'en. O naati laana, o witti. <sup>38</sup> Mo seydaani mum ribbaa oo, ndaardi Iisaa acca o jokka e mum. Kaa Iisaa wirfintini mo, wii:

<sup>39</sup> —Hootu suudu maa, kumpitaa yimbe maa ko Laamdo wadan maa.

O yehi, o ooyinii e ngeenndi ndii fuu ko Iisaa wadani mo koo.

### *No Iisaa wuurtiniri bii Jayrus e no selliniri debbo jawdo*

<sup>40</sup> Nde Iisaa wartunoo ndee, jamaa oo ja6bii dūm, sabi yimbe fuu ana ndoomunoo dūm. <sup>41</sup> Non gorko biyeteedo Jayrus, hooreejo suudu waajordu, wari e makko, diccii yeeso makko, ndaardi mo o wara galle mum, <sup>42</sup> sabi biyūm debbo bajjo, mo duubi mum mbaarata e sappo e didi, ana ha6ana yonki.

E ley yaadu Iisaa ton nduu, yimbe billi dūm sanne. <sup>43</sup> Debbo gooto, mo tuundi mum tayataa ko waarata e duubi sappo e didi, ana tawaa ton. Ko mo joginoo fuu mo sawrorike faa laabi, kaa fay gooto he6aali sellinde mo. <sup>44</sup> Mo iwri caggal Iisaa, mo memi kōmbol saaya mum. Don e don yiyam dam tayi.

<sup>45</sup> Iisaa wii:

—Homo memi kam?

Kaa nde wonnoo fay gooto jaabaaki, Piyeer wii:

—Moobbo, hakkunde yimbe ngon-daa, ebe billu maa.

<sup>46</sup> Iisaa wii:

—Won memdo kam, sabi mi maatii won semmbe iwdo e am.

<sup>47</sup> Nde debbo oo anneditinnoo dūm suudataako ndee, wari ana siɣna, diccii yeeso makko, haali hakkunde yimbe fuu ko saabii so memi mo e no selliri don e don. <sup>48</sup> Iisaa wii mo:

—Bannam debbo, goondinal maa danndii ma. Yaa e jam.

<sup>49</sup> Iisaa tilaaki haalde, faa won iwrufo to hooreejo suudu waajordu oo too, wii Jayrus:

—Biya oo heddaaki, fotaa ko tampinaa moobbo oo hankasen.

<sup>50</sup> Kaa nde wonnoo Iisaa nanii dūm, wii hooreejo suudu waajordu oo:

—Pati hul, hoolam tan, biya oo dadan.

<sup>51</sup> Nde o yottii galle Jayrus ndee, o dalaali fay gooto naadda e makko, so wanaa Piyeer e Yuhanna e Yaakuuba e baaba suka oo e inna mum. <sup>52</sup> Yimbe be fuu ndarii ana mboya suka oo, ana conkina semmbe. O wii be:

—Pati mboyyee! O maayaali, o daaniido tan.

<sup>53</sup> Kaa be puuytini haala makko, sabi ebe anndi o maayii. <sup>54</sup> Iisaa nanngi junngo suka oo, toowni daande, wii:

—Suka, imma!

<sup>55</sup>Yonki makko warti e makko, o immii don e don. Iisaa yamiri 6e ndokka mo ko o naama. <sup>56</sup>Saaraa6e suka oo kaaynaa. O daalii 6e pati 6e kaalana fay gooto ko wadi koo.

## 9

### *No Iisaa neliri taalibaa6e mum sappo e didon 6ee*

<sup>1</sup>Iisaa noddi taalibaa6e sappo e didon 6ee, hokki dum'en semmbe, hokki dum'en baawde ribbugol seydaani'en e sellingol jawuuji. <sup>2</sup>O neli 6e 6e ooynoo Kabaaru Lobbo haala Laamu Laamdo oo, 6e cellina jaw6e. <sup>3</sup>O wii 6e:

—Pati na6oree fay huunde e laawol ngol, wanaa sawru, wanaa mbasu, wanaa nguure, wanaa kaalisi. Kasen duu pati na6oron saayaaaji didi. <sup>4</sup>Galle mo njippi-don e mum fuu, keddo-don don faa nde iw-don don. <sup>5</sup>Ngeenndi fuu ndi yim6e mum nja66aaki on, njalton dum, pidon colla koyde mon, faa jeertina 6e ko 6e ngadi koo ana boni.

<sup>6</sup>Be mbitti, e6e ngada ngeenndi e ngeenndi, e6e mbaajoo Kabaaru Lobbo oo, e6e cellina jaw6e won6e e nokkuuje dee fuu.

### *No kabaaru Iisaa jii6iri hakkille Hirudus*

<sup>7</sup>Hirudus, hooreejo leydi oo, nde nannoo haala Iisaa ana haalee, hakkille mum jii6ii. Sabi won wiyanno6e Yaayaa mo lootogal batisima oo wuurti, <sup>8</sup>w66e ana mbiya annabi Iliyaasa 6anngi, w66e kasen ana mbiya gooto e annabaa6e aranndee6e 6ee wuurti. <sup>9</sup>Kaa Hirudus wii:

—Mi tayii hoore Yaayaa. Homo woni oo mo nanan-mi baado hono nii? Omo tewta yiide dum.

### *No Iisaa namminiri ujunaaji joy gorko*

<sup>10</sup>Nela6e 6ee ngarti. Be njantani Iisaa ko 6e ngadi koo fuu. O nabi 6e hedde ngeenndi mbiyeteendi Baytisayda, o teeldi e ma66e. <sup>11</sup>Jamaa oo nani dum, jokki e makko, o ja66ii 6e, hedde mo haalana 6e haala 6anngugol Laamu Laamdo oo, o sellini e ma66e hasindin6e e sellineede 6ee. <sup>12</sup>Nde hiiri ndee, sappo e didon 6ee battitii mo, mbii mo:

—Yoppitin jamaa oo yaha e geelle e daakaaji piliidi yalla ana ke6a do njippoo naama, sabi oo nokku yo ladde.

<sup>13</sup>O wii 6e:

—Onon e ko'e mon, ndokkee 6e ko 6e naama!

Be mbii mo:

—Buuruuje joy e liddi didi tan min njogii, naa so wanaa min coodanoyan 6ee yim6e fuu ko naama dee.

<sup>14</sup>Tawi yim6e 6ee ana njaha e ujunaaji joy gorko. O wii taalibaa6e makko 6ee:

—Njoyyiniree 6e tunaale-tunaale, wootere fuu capande njoyon.

<sup>15</sup>Be ngadiri non, 6e njoyyini been fuu. <sup>16</sup>O 6ami buuruuje joy dee e liddi didi dii, o tiggiti kammu, o yetti Laamdo. O tayi buuru oo e liddi dii, o hokki taalibaa6e makko 6ee njeda jamaa oo. <sup>17</sup>Be fuu 6e naami faa 6e keddi. Taalibaa6e 6ee ndeentini taye keddiide dee, kebbini cagiije sappo e didi.

### *No Piyeer seedorii Iisaa woni Almasiihu*

<sup>18</sup>Naande wootere omo teeldi e taalibaa6e makko, omo wada duwaawu, kanko tan. O lamndii 6e, o wii:

—Homo yim6e mbiyata ngon-mi?

<sup>19</sup>Be njaabii mo, 6e mbii:

—Won wiyoo6e a Yaayaa mo lootogal batisima, won wiyoo6e a annabi Iliyaasa, won wiyoo6e kasen gooto e annabaa6e aranndee6e 6ee wuurti.

<sup>20</sup> O lamndii 6e:

—Onon nee, homo mbiyaton ngon-mi?

Piyeer jaabii mo, wii:

—A Almasiihu Laamdo!

<sup>21</sup> O yaggini 6e pati 6e kaalana dum fay gooto.

### *No Iisaa 6annginiri maayde mum e wuurtugol mum*

<sup>22</sup> O 6eydi hen kasen, o wii:

—Ana tilsi Bii Neddo torree torraaji keewdi, maw6e 6ee e hooree6e yotti-noo6e sadaka e dunkee'en Sariya tippitoto mo, o waree, kaa mo wuurtan jannde tatabere.

<sup>23</sup> Caggal dum, o wii 6e fuu:

—Muuydo jokkude kam fuu, nootta yurmaade hoore mum, 6ama leggal mum bardugal\* jannde fuu, jokka e am. <sup>24</sup> Sabi muuydo danndude yonki mum, waasan ki. Kaa baasirdo ki sabaabu am, danndan ki. <sup>25</sup> Kodum he6ude aduna o fuu nafata neddo so halkii yonki mum naa mursii hoore mum? <sup>26</sup> Jaannoriido kam miin e haalaaaji am dii fuu, miin Bii Neddo oo duu, mi yaannorto dum nde mi wardii e malaa'ika'en seniio6e ley teddeengal am e ley teddeengal Baabiraado am. <sup>27</sup> Mido haalana on goonga: yoga e won6e doo 6ee maayataa, tawee njijaali Laamu Laamdo oo 6anngii.

### *No noone Iisaa waylitorii*

<sup>28</sup> Ko waarata e balde jetti caggal ko o haali dii haalaaaji koo, o njabboyi dow waamnde haayre faa o wada duwaawu, o yaadi e Piyeer e Yuhanna e Yaakuuba. <sup>29</sup> Nde mo duwotoo ndee, yeeso makko waylitii, kaddule makko ndawni faa ana njalba. <sup>30</sup> Non wor6e didon 6anngi, ana kaalda e makko, dum Muusaa e Iliyaasa. <sup>31</sup> Be 6anngidi e teddeengal, e6e kaala haala laawol makko tabitoyoowol Urusaliima ngol. <sup>32</sup> Piyeer e wondiio6e mum 6ee yo daaninoo6e doyngol teddungol, 6e pini, 6e njii teddeengal makko, 6e njii wor6e didon wondube e makko 6ee. <sup>33</sup> Nde yim6e didon 6ee ngari faa ceerta e Iisaa ndee, Piyeer wii mo:

—Moobbo, gonal amen doo ana moyyi. Dal min ndarna doo buguui tati: aan wooturu, Muusaa wooturu, Iliyaasa wooturu.

Kanko e hoore makko, o anndaano ko o haalannoo. <sup>34</sup> O tilaaki haalde, faa luurde wari, suddi 6e. Taalibaa6e 6ee kuli sanne nde luurde ndee suddi 6e ndee. <sup>35</sup> Daande iwri e ley luurde ndee, wii:

—Oo doo yo Biyam mo cubii-mi. Kettindee mo!

<sup>36</sup> Ko daande ndee nanaa koo, Iisaa karum tan gooto tawaa ton. Taalibaa6e 6ee cuudi kabaaru oo. E ley deen jalaade, 6e kaalanaali fay gooto ko 6e njii koo.

### *No Iisaa selliniri suka laddaado*

<sup>37</sup> Janngo mum, ko 6e njippii waamnde haayre ndee koo, higgere jamaa ja66ii mo. <sup>38</sup> E ley jamaa oo, gorko gooto eewnii, wii:

—Moobbo, mido jaage, tiinna yeewanam biyam gorko, sabi kanko tan njogii-mi. <sup>39</sup> Ladde ana nannga mo, o wulla, o sijnja faa hunduko makko yufa ngufo. Nde yoppataa mo so wanaa caldi makko fuu taya. <sup>40</sup> Mi jaagike taalibaa6e maa 6ee ndibba nde, kaa 6e ndonkii.

<sup>41</sup> Iisaa jaabii, wii:

\* **9:23** Maanaa 6amde leggal mum bardugal woni fellisidde mursude yonki mum hono no Iisaa nii.

—Hey yimbe jamaanu bondo be nganaa goondinbe. Faa mande tilotoo-mi e mon? Faa mande keddotoo-mi mujande on? Battin biya oo doo!

<sup>42</sup> Nde suka oo badinoo Iisaa ndee, ladde ndee liifi dum e leydi, hedde ana dimmba dum. Nii Iisaa jahii e ladde ndee, sellini suka oo, totti dum baaba mum. <sup>43</sup> Yimbe fuu kaaynaa saabe baawde Laamdo mawde dee.

### *No Iisaa bannginiri kasen maayde mum e wuurtugol mum*

E ley ko jamaa oo fuu haaynaa e gollleeji Iisaa dii koo, o wii taalibaa6e makko 6ee:

<sup>44</sup>—Onon, piddee noppi mon, nanon ko kaalan-mi: Bii Neddo oo wadete e juude yimbe.

<sup>45</sup> Kaa 6e paamaali haala kaa, maanaa makka ana suudanii 6e, faa 6e mbaasi annditinde ka. Be kulii lamnditaade mo duu.

### *Haala burdo teddude*

<sup>46</sup> Non taalibaa6e 6ee ndarii ana njeddondira burdo teddude hakkunde mum'en. <sup>47</sup> Nde wonnoo omo anndi ko woni e berde ma66e, o nanngi junngo cukalel, o darni ngel banng makko, <sup>48</sup> o wii 6e:

—Neddo fuu ja66iido ngel cukalel e innde am, miin jaati o ja66ii. Kasen duu, ja66iido kam, ja66iike neldo kam oo. Sabi burdo lo'ude hakkunde mon fuu, katum woni tedduo.

### *Haala mo yeddaali en fuu, e men wondi*

<sup>49</sup> Yuhanna haali, wii:

—Moobbo, min njii gorko gooto ana ribbira seyfaani'en innde maa, min kadii mo, sabi o waldaa e men.

<sup>50</sup> Iisaa wii mo:

—Pati ka6ee mo dum, sabi mo honnaaki on fuu, e mon wondi.

<sup>51</sup> Nde wakkati mo Laamdo njabbintinta Iisaa dow kammu badinoo, Iisaa e hoore mum fellisi yahan Urusaliima, <sup>52</sup> neli nelaar6e ardo0 dum. Been nelaar6e naati e ngeenndi Samariyankoo6e ngootiri faa ndaartana mo jip-punde. <sup>53</sup> Kaa ndiin ngeenndi ja66aaki mo, sabi Urusaliima o fa'i. <sup>54</sup> Nde Yaakuuba e Yuhanna njiinoo dum ndee, mbii:

—Kalfaado, ada yidi min njamira yiite iwa dow kammu duppa 6e naa?

<sup>55</sup> Nii o yeecitii 6e, o ninji 6e. <sup>56</sup> Caggal mum, 6e njehi ngeenndi ngonndi.

### *No yimbe mbiiri njokkan e Iisaa*

<sup>57</sup> E ley yaadu ma66e nduu, neddo gooto wii mo:

—Mi jokkete to njahataa fuu.

<sup>58</sup> Iisaa wii mo:

—Doldolde ana njogii gayde, pooli duu ana njogii cuudi, kaa Bii Neddo oo walaa fay do soppinoo sako faa lelna hoore mum fowtinoo.

<sup>59</sup> O wii neddo goddo:

—Jokkam!

Oon jaabii mo, wii:

—Accu mi iroya baabam tafon.

<sup>60</sup> Iisaa wii mo:

—Dal maay6e ira maay6e mum'en. Aan kaa, waajoya haala Laamu Laamdo oo.

<sup>61</sup> Goddo kasen wii mo:

—Mi jokkan e maa, Moobbo, kaa accu mi waynoyoo galle am tafon.

<sup>62</sup> Iisaa jaabii mo, wii:

—Neddo fuu nanngudo jalo sari nde yeeyii, walaa ko nafata e Laamu Laamdo oo.

## 10

### *No Iisaa neliri taalibaaʼbe mum capande njeddōn e didōn*

<sup>1</sup> Caggal dum, Iisaa suʼii e ley taalibaaʼbe mum capande njeddōn e didōn, neliri ʼbe didōn didōn, ʼbe ardoō dum e ngeenndi fuu e nokku fuu do o haannoo yaade, kanko e hoore makko. <sup>2</sup> O wii ʼbe:

—Gese ʼbenndude ana keewi, kaa hettoobe keewaa. Ndennoo, ʼjaagee Jom kettal oo nelda hettoobe to hettantee too. <sup>3</sup> Njehee, mi nelii on no baali hakkunde pobbi nii. <sup>4</sup> Pati naʼoree fay huunde, wanaa dannga, wanaa mbasu, wanaa pade. Pati njowtee fay gooto e dow laawol. <sup>5</sup> Galle mo naataton fuu, njowton joomumʼen tafon, mbiyon: «Yo jam wonu e oo galle!» <sup>6</sup> So neddo jom jam won don, duwaawu mon hewtan dum. Kaa so walaa, duwaawu mon oo wartan e mon. <sup>7</sup> Njippo-don e oon galle. Ko ʼbe ndokki on fuu ʼjaamon, njaron, sabi golloowo ana haandi e njobdi mum. Pati ngadee naata-yalta e ley galleeji. <sup>8</sup> Ngeenndi fuu ndi naatu-don, so on njaʼbaama, ko ngaddane-don fuu ʼjaamon. <sup>9</sup> Cellinon ʼjawʼbe ʼbe taw-don don fuu, mbiyon yimʼbe ngeenndi ndii: «Laamu Laamdo battiima on.» <sup>10</sup> Ngeenndi fuu ndi naatu-don, so on njaʼbaaka e mum, njalton e mbeddaaji mum, mbiyon: <sup>11</sup> «Min piddii e mon fay colla ngeenndi mon takkinooka e koyde amen. Kaa dum e taweede, anndee Laamu Laamdo battiima.» <sup>12</sup> Mido haalana on: ʼjannde darngal, jukkungo ndiin ngeenndi ʼburan ngo Sodooma\* ngoo naawde.

<sup>13</sup> Bone woodanii ma, aan Korasin! Bone woodanii ma, aan Baytisayda! Sabi so kaayde gadanoode e ley mon dee ngadanooma Tirus e Sidon, nden, hoduʼbe ton ʼbee tuubanno law, tawete ʼbe boornike licce caakuuji, ʼbe njoodike e ndoondi, faa ʼbe kollita tuubugol maʼbe. <sup>14</sup> Saabe dum, ʼjannde darngal, jukkungo mon ʼburan ngo Tirus e Sidon ngoo naawde. <sup>15</sup> Aan duu Kafar-nahum, ada miila a toownete faa dow kammu naa? A leydinte faa keedaa ley maayʼbe.

<sup>16</sup> O haalani taalibaaʼbe makko kasen:

—Kettindaniido on fuu, miin hettindanii. Calaniido on fuu, miin salanii. Calaniido kam fuu, salanike neldo kam oo duu.

<sup>17</sup> Capande njeddōn e didōn ʼbee ngartidi e seyo, mbi:

—Kalfaado, fay seydaaniʼen ʼbee downtanike min saabe innde maa.

<sup>18</sup> O wii ʼbe:

—Mi yii Ibiliisa ana iwa dow kammu, ana saamira no suraango nii. <sup>19</sup> Mi hokkii on baawde yaabude bolle e jahe, mi hokkii on jaalaade konnee fuu. Fay huunde torraata on abada. <sup>20</sup> Kaa noo, pati ceyoree ko seydaaniʼen downtanii on koo. Ceyoree ko inde mon mbinndaa dow kammu koo.

### *Haala seyo Iisaa*

<sup>21</sup> Oon wakkati fuu, Ruuhu Ceniido hebbini Iisaa seyo. Iisaa wii:

—Baabiraado jom kammu e leydi, mi yettii ma, sabi a suudii dee kulle hakkilanteeʼbe e annduʼbe, ʼbannginan-daa dum cukaloy. Jaati, Baabiraado, hono non worri, sabi dum wel maa. <sup>22</sup> Baabiraado am tummbii huunde fuu e junngo am. Fay gooto anndaa Bajjo oo so wanaa Baabiraado, fay

\* **10:12** Sodooma yo ngootiri e geelle didi de Laamdo halki saabe heewgol majje luutti. Yeew Pudfoode 19.1-29



gooto anndaa Baabiraaɗo oo so wanaa Bajjo oo, kaɗum e mo Bajjo oo muuyi bannginande ɗum fuu.

<sup>23</sup> Caggal ɗum, Iisaa yeecitii taalibaaɗe ɓee, gunndii ɗum'en, wii:

—Gite jiyooje ko njiyaton koo, mbelii hoore! <sup>24</sup> Sabi miɗo wiya on: annabaabe heewɓe e kaanankooɓe heewɓe njidiino yiide ko njiyaton koo, njiyaali, njidiino nande ko nanaton koo, nanaali.

### *Bannol haala Samariyanke moyyo*

<sup>25</sup> Non, jannginoowo Sariya gooto immii faa hora mo, wii:

—Moobbo, hono kaan-mi wadude faa mi heɓa nguurndam nduumiidam?

<sup>26</sup> Iisaa jaabii mo, wii:

—Kodum winndii e Sariya? Kodum njanngu-daa ton?

<sup>27</sup> Jannginoowo Sariya oo jaabii, wii:

—Yidiri Laamɗo Joomiraado maa ɓernde maa fuu e yonki maa fuu e semmbe maa fuu e hakkille maa fuu. Njidiraa tanaa maa no njidir-daa hoore maa nii.†

<sup>28</sup> Iisaa wii mo:

—Jaabu maa moyyii. So a wadii non, a heɓan nguurndam ɗam!

<sup>29</sup> Kaa jannginoowo Sariya oo ana yidi heedude e goonga, wii mo:

—Homo woni tanaa am?

<sup>30</sup> Iisaa jaabii mo, wii:

—Nannde wootere gorko gooto iwi Urusaliima, ana fa'i Yeriko. E ley yaadu makko nduu, o hawri e yanooɓe, ɓe ɓoli mo, ɓe pii mo faa ɓe njoppi mo wanaa guurɗo mo wanaa maayɗo. <sup>31</sup> Forri e jottinoowo sadaka gooto ana warannoo e laawol ngol. Nde o yiinoo janaado oo ana lelii ndee, o woorti ɗum, o yaɓɓii.

<sup>32</sup> Lewinke‡ gooto, kaɗum duu wari tawi mo ɗon, yii mo, woorti mo, yaɓɓii.

<sup>33</sup> Samariyanke dawɗo wari e makko, yii mo, yurminaa, <sup>34</sup> ɓadii mo, sawriri barme makko nebam e peguuɗam, fiili hen licce. Caggal ɗum, o waddini ɗum daaba makko, o naɓi ɗum e jippunde hoɓɓe, o hinnii ɗum. <sup>35</sup> Janngo mum, o itti buudi cardii ɗiɗi, o hokki njaatigi mum oo, o wii ɗum: «Hinna mo. So almusadda makko ɓurii ɗum, so mi wartii, mi tottete.»

<sup>36</sup> Nde Iisaa tilii bannol ngol ndee, wii:

—E miilo maa, homo e taton ɓee laatii tanaa janaado oo?

<sup>37</sup> Jannginoowo Sariya oo jaabii, wii:

—Jurmiido mo oo.

Iisaa wii mo:

—Aan duu, yaa, wadoy hono non!

### *No Iisaa jippanorii Marta e Mariyama*

<sup>38</sup> E laawol maɓɓe ngol, Iisaa fanji ngeenndi ngootiri, debbo biyeteɗo Marta jippini mo. <sup>39</sup> Marta ana jogii mijiraado biyeteɗo Mariyama. Oon ana joodii sera koyɗe Iisaa, ana nana haala mum. <sup>40</sup> Kaa Marta, no gollleeji ɗii keewiri nii tan woni e hakkille mum, wari, wii:

—Moobbo, a hillaaka ko mijam oo ɗaldi kam golle oo koo naa? Wii mo o immoo, o walla kam!

<sup>41</sup> Moobbo oo jaabii mo, wii:

—Marta, Marta, ada tampina hoore maa kulle keewɗe, ada jiiɓa hakkille maa. <sup>42</sup> Kaa huunde wootere tan woni ko nedɗo hasindini e mum. Mariyama suɓike ko moyyi koo, o teetataake ɗum duu.

† **10:27** Fillitagol Tawreeta 6.5, Lewinkooɓe 19.18 ‡ **10:32** Yimɓe lepol Lewi ngonnoo humaniife golle dewal Laamɗo gila e jamaanu Muusaa.

# 11

## *No Iisaa jannginiri taalibaabe mum no duwortee*

<sup>1</sup> Nannde wootere, Iisaa ana wada duwaawu e nokku gooto. Nde o tilinoo ndee, gooto e taalibaabe makko bee wii mo:

—Moobbo, janngin min no min nduwortoo, hono no Yaayaa jannginiri taalibaabe mum nii.

<sup>2</sup> O wii 6e:

—So odon nduwoo, nii mbiyaton:

Baabiraado,

yo innde maa teddine.

Yo Laamu maa war.

<sup>3</sup> Hokku min jannde fuu jaamdu heyooru min.

<sup>4</sup> Yaafa min luutti amen,

sabi miden njaafoo toojube min fuu.

Pati accu min ceytee.

<sup>5</sup> O wii 6e kasen:

—So gooto mon yehii to gido mum hejjere jemma, wii dum: «Gidam, jamlam buuruje tati, <sup>6</sup> mi hebiu kodo jooni, mi walaa ko mi holla dum»,

<sup>7</sup> yalla gido maa oo ana jaabe to ley galle too, wiye: «Pati torram, sabi damal ngal cokaangal, sukaa6e am duu yo leliibe, mi waawaa immaade faa mi hokke fay huunde?» <sup>8</sup> Mido wiya on: fay so o immaaki o hokkire saabe a gido makko, waajibi mo inmoo, mo hokke hakke ko kasindin-daa e mum fuu, kammari ko tekkin-daa jaagunde maa ndee koo. <sup>9</sup> Miin, mido wiya on: jaagee, on keban, tewtee, on njiitan, calminee gila odon damal galle, on udditante. <sup>10</sup> Sabi jaagiido fuu, heban, tewtudo fuu, yiitan, calmindo fuu, udditante. <sup>11</sup> Homo woni e mon baabiraado mo biyum jaagotoo liingu so hokka dum mboddi? <sup>12</sup> Naa jaagoo dum boccoonde, hokka dum yaare? <sup>13</sup> No mbonir-don fuu, odon ndokka bi66e mon kulle lobbe, sako Baabiraado mon gondo dow kammu oo. Naagiido mo Ruuhu Ceniido fuu, o hokkan dum mo.

## *No Iisaa fenniri ko happaa koo*

<sup>14</sup> Nannde wootere, Iisaa ana ribbana neddo gooto seydaani muumdinnoodo dum. Nde seydaani oo yalti ndee, muumdunoodo oo watti haalde. Jamaa oo haaynaa. <sup>15</sup> Kaa yoga e ma66e ana wiya:

—«Beelsebul», hooreejo seydaani'en oo o ribbirta seydaani'en bee!

<sup>16</sup> Wo66e ndaardi mo taagamansa kaayniido iwoowo dow kammu faa itta koro makko. <sup>17</sup> Nde wonnoo omo anndi miilooji ma66e, o wii 6e:

—Laamu fuu pecciido ana ha6a e hoore mum, bonan, maadiiji mum fuu ngurjan e leydi. <sup>18</sup> So Ibiliisa e hoore mum feccima, hono laamu mum heddortoo? Nde wonnoo on mbii «Beelsebul» ndibbiran-mi seydaani'en bee.

<sup>19</sup> So tawii «Beelsebul» ndibbiran-mi seydaani'en, yim6e mon bee nee, homo ndibbirta 6e? Yim6e mon bee jaati kollata on ngalaa e goonga! <sup>20</sup> Kaa so baawde Laamdo ndibbiran-mi seydaani'en, dum ana holla Laamu Laamdo warii e mon. <sup>21</sup> Gorko jom semmbe jogiido kaafaawi, so haybii galle mum, jawdi mum reenoto. <sup>22</sup> Kaa so burdo dum semmbe yanii e mum, jaalike dum, teetan joomum kaafaawi ki fawnoo hoolaare e mum kii, fecca jawdi mum ndii e wo66e. <sup>23</sup> Mo waldaa e am fuu yo gajo am. Mo moobtidataa e am fuu yo caakoowo.

<sup>24</sup> So seydaani yaltii e neddo, seydaani oo yiiloyto e nokkuuje joorde, tewta do noottinoo. So mo hebaali, mo wiyon: «Mido nii wirfitoo galle am mo eggunoo-mi e mum oo.» <sup>25</sup> So mo wirfitike, mo tawan galle oo ana wuuwaa,

ana moyyinaa ana paraa faa woodi. <sup>26</sup> Nden, mo wirfitoo, mo waddoya seydaani'en njeeddoo burbe mo bonde, be naata e galle oo, be koda e mum. Nii battane oo neddo burdata arannde mum bonde.

<sup>27</sup> Nde o haalata dum ndee, debbo gooto ana hakkunde jamaa oo, toowni daande mum, wii:

—Debbo caawdo ma so muynin maa, welii hoore!

<sup>28</sup> Non Iisaa jaabii, wii:

—Welbe hoore dee, nanoo6e konngol Laamdo so njokka ngol 6ee!

### *No jamaa ndaardiri taagumansa*

<sup>29</sup> Nde wonnoo jamaa oo ana billondira e makko sanne, o fuddi wiide:

—Yimbe jamaanu jooni yo yimbe bonbe. E6e ndaara holleede taagumansa, kaa 6e kollataake so wanaa taagumansa annabi Yuunusa oo. <sup>30</sup> Sabi no Yuunusa laatanorii Niniwenkoobe taagumansa nii, hono non Bii Neddo oo duu laatanortoo yimbe oo jamaanu taagumansa. <sup>31</sup> Nannde darngal, kaananke debbo leydi baleeri oo immodoto e yimbe jamaanu jooni 6ee, li6a dum'en. Sabi o iwriino faa hoore leydi, warde hettindaade haalaaji Suleymaana kebbinaadi hakkilantaaku dii. Haya, burdo Suleymaana won doo! <sup>32</sup> Nannde darngal, yimbe Niniwe duu immodoto e yimbe jamaanu jooni 6ee, li6a dum'en. Sabi 6e tuubii gila nde 6e nannoo waaju annabi Yuunusa ndee. Haya, burdo Yuunusa won doo!

### *Haala fooyre caldi*

<sup>33</sup> Iisaa wii kasen:

—Fay gooto hu66ataa lampa so suuda dum naa hippa e mum kaakol. So lampa hu66aama, sinndete, yalla ana yaaynana naatoobe. <sup>34</sup> Gite maa ngoni lampa caldi maa. So gite maa ana moyyi, caldi maa fuu pooyan. Kaa so de moyyaa, caldi maa fuu ni66an. <sup>35</sup> Ndennoo, haybu pati fooyre wonnde e maa ndee ni66a. <sup>36</sup> Sabi so caldi maa fuu keewii fooyre, tawa walaa fuu salndu maa wonndu e nimre, di fuu di pooyniran no lampa fooynirante nii.

### *No Iisaa feliri Farisa'en e jannginoobe Sariya*

<sup>37</sup> E ley ko Iisaa waajotoo koo, Farisanke gooto noddi dum bottaari. O nootoyii dum galle mum, o joodii faa o jaama. <sup>38</sup> Farisanke oo haaynaa nde yiinoo o lootaali juude fade makko jaamde.\* <sup>39</sup> E ley dum, Iisaa wii mo:

—Onon Farisa'en, odon lawya caggal kore loode e caggal lehoi, tawee nee, berde mon ana caawi nguykaaji e boneeji! <sup>40</sup> Jaahili'en! Tama wanaa Tagudo dow oo tagi ley oo duu? <sup>41</sup> Ittiree sadakaaji mon dii berde laa6ude. Nden, ko heddi koo fuu daganto on.

<sup>42</sup> Bone yanan e mon, onon Farisa'en. Sabi odon ittana Laamdo jakka naanaa, odon ittana dum jakka danndi e ko tutaton fuu. Kaa odon njeebii foocitaare, odon njeebii yidude Laamdo. Tawee nee, kaɗum kaanno-don wafude tawee on njeebaaki ko heddi koo. <sup>43</sup> Bone yanan e mon, onon Farisa'en! Sabi odon njidi joolle lobbe e ley cuudi baajordi, odon njidi salmineede calminaali teddungal e luumooji. <sup>44</sup> Bone yanan e mon. Sabi odon nanndi e janaale de ngalaa maande, de yimbe njahata e mum, tawee andaa.

<sup>45</sup> Gooto e jannginoobe Sariya jaabii Iisaa, wii:

—Moobbo, no kaalirtaa nii, ada hoyna min minen duu.

<sup>46</sup> Iisaa jaabii, wii:

\* **11:38** Ngol lootugol juude ha66aaki e ittude tuundi, kammari faa joomum foocitanoo diina wafiraa.

—Onon jannginoo6e Sariya 6ee duu, bone yanan e mon! Sabi odon ndonndina yim6e donnge teddu6e, tawee onon e ko'e mon, on memirtaa de fay hoore fedeendu mon. <sup>47</sup> Bone yanan e mon, sabi odon maha janaale annabaa6e 6e njaatiraa6e mon mbari 6ee. <sup>48</sup> Ndennoo, onon, on ceettiima golle mab6e oo ana weli on. Sabi kam6e, 6e mbarii annabaa6e, onon, odon maha janaale mum'en! <sup>49</sup> Dum nee, Laamdo hakkilante oo wii: «Mi neldan 6e annabaa6e e nelaa6e, 6e mbara yoga, 6e torra yoga.» <sup>50</sup> Dum wadi so yiyam annabaa6e njuppaadam gila e puddoode aduna oo dam, ana yobtee e yim6e oo jamaanu. <sup>51</sup> So goonga dee, mido wiya on: yiyam gila Haabiila faa Jakariyaa baraado hakkunde ittirde sadaka ndee e suudu Laamdo nduu, dum fuu dum yobete e oo jamaanu. <sup>52</sup> Bone yanan e mon, onon jannginoo6e Sariya! Sabi on teetii cokitirgal anndal, on naataali onon e ko'e mon, kasen duu on kadii naatoobe 6ee naatude.

<sup>53</sup> Nde Iisaa iwi don ndee, dunkee'en Sariya e Farisa'en ana mettaa e mum sanne sanne. Ana lamndoo mo kulle keewde, <sup>54</sup> hedde e6e tuufana mo faa 6e ke6a e makko haala ka 6e nannginira mo.

## 12

### *Haala kulol Laamdo*

<sup>1</sup> Ko foti ujunaaji ujunaaji yim6e kawriti faa ana njaabondira. Nden Iisaa wii taalibaabe mum 6ee:

—Ndeentee e yuufinirdi Farisa'en, dum woni 6e naafigi'en. <sup>2</sup> Walaa fuu ko suudii ko 6anngintaake, walaa sirri mo saakataake. <sup>3</sup> Dum saabii huunde fuu ko kaal-don ley nimre nantete ley fooyre. Kasen duu ko ngunndi-don ley cuudi fuu, ooynete dow beneiji.

<sup>4</sup> Mido haalana on, onon gidiraa6e am: pati kulee waroo6e yim6e 6e ngalaa fuu ko mbaawi caggal majjum 6ee. <sup>5</sup> Mi hollan on mo kaan-don hulde: kulee baroowo neddo baawdo tippaade dum ley jahannama. So goonga dee, mido wiya on: oon kaan-don hulde! <sup>6</sup> Tama biiwuuji joy coottataake buudi didi? Laamdo yeggitataa fay gootel e majji. <sup>7</sup> Onon, fay lee6i ko'e mon fuu ko limaa faa laa6i. Ndennoo, pati kulee, sabi onon 6uri biiwuuji keewdi teentilaade.

<sup>8</sup> Mido wiya on: ceettaniido kam hakkunde yim6e fuu, miin Bii Neddo oo duu, mi seettanto dum yeeso malaa'ika'en Laamdo. <sup>9</sup> Kaa calaniido kam hakkunde yim6e, salante yeeso malaa'ika'en Laamdo. <sup>10</sup> Neddo fuu kaaldo ko boni e Bii Neddo, ana waawi yaafeede. Kaa bonkiido Ruuhu Ceniido oo yaafataake. <sup>11</sup> So on nabaama e cuudi baajordi naa yeeso hooree6e naa kaanankoo6e, pati mbembe-don ko njaaboto-don, naa ko kaalaton, <sup>12</sup> sabi Ruuhu Ceniido oo anndinan on oon wakkati fuu ko kaan-don haalde.

### *Banndol haala arsukunte pamaro hakkille*

<sup>13</sup> Won biido e ley jamaa oo:

—Moobbo, wii mawnam oo hokka kam ngedu am e ndonu amen oo.

<sup>14</sup> Iisaa jaabii mo, wii:

—Hey aan! Homo wadi kam caroowo mon naa peccoowo jawdi mon?

<sup>15</sup> O wii jamaa oo:

—Ndeentee e joote, sabi wanaa jawdi wuurnata neddo fay so tawaa mo arsukunte.

<sup>16</sup> O haalani 6e banndol, o wii:

—Arsukunte gooto, gese mum moyyuno0 faa sanne. <sup>17</sup> O miilii e hoore makko: «Hono ngadan-mi? Sabi mi walaa fuu do mi moobta pamri am ndii.

<sup>18</sup> Eyyoo! Mi wurjinan beembe am dee, mi maha godde burde de manngu,

mi moofita hen jamri am ndii e ngalu am fuu, <sup>19</sup> mi wiya hoore am: A hebii ngalu baawdo jogaade ma duubi kuurdi, hankasen fowtu, jaamaa, njaraa, mbelto-daa.» <sup>20</sup> Kaa Laamdo wii mo: «Pamaro hakkille! Yonki maa ittete e oo doo jemma. Homo heettata e ko paggiti-daa koo?» <sup>21</sup> Nii woni sifa neddo fuu paggitanido hoore mum jawdi aduna, wanaa galo yeeso Laamdo.

### *Haala ndaartugol Laamu Laamdo*

<sup>22</sup> Caggal dum, o wii taalibaabe makkoo bee:

—Dum saabii so mido wiya on: pati cunjlanee e ley nguurndam mon ko naamaton e ko boornoto-don. <sup>23</sup> Sabi nguurndam buri nguure, terde buri koltal. <sup>24</sup> Yeewee daawle dee: de aawataa, de kettataa, de ngalaa caakuuji, de ngalaa beembe, kaa Laamdo ana jammina de. Onon, odon buri pooli dii teentilaade do woddii! <sup>25</sup> Homo e mon waawi beydude e balde mum fay jalooma gooto kammari sugulla mum? Walaa. <sup>26</sup> Ndennoo, so tawii on mbaawaa wadude fey hono dum e famdude, ko saabii so odon cunjana ko heddii koo? <sup>27</sup> Yeewee piindijii no peertirta. Di tampataa, di mottataa. Haya mido wiya on: Suleymaana e ngalu mum fuu paroraaki no gootel e majji nii. <sup>28</sup> Laamdo ana holtina leggiri taweteendi ley ngesa hannde, tippeteendi e yiite janngo, sako onon, onon famdube hoolaare! <sup>29</sup> Pati kiinnee ndaartude jaamdu e yardu, pati mbemembe-don! <sup>30</sup> Sabi dee kulle fuu yimbe aduna tan ndaarata dum. Kaa Baabiraado mon ana anndi odon kasindini e majjum. <sup>31</sup> Ko kaan-don wadude dee, ndaartee Laamu Laamdo. Ko heddii koo, on beydante dum.

<sup>32</sup> Pati kulee, onon sewre famarde, sabi Baabiraado mon ana seyorii hokkude on Laamu oo. <sup>33</sup> Coottee jawdi mon fuu, cakko-don. Moyyinaanee ko'e mon danngaaji di mbonataa, njogo-don jawdi ngonndi dow kammu ndi timmataa, ndi gujjo badataako, mooyu duu bonnataa. <sup>34</sup> Sabi do jawdi maa woni fuu, don yonki maa duu woni.

### *Bannadol haala lanndinii6e ja66aade kalfaado mum'en*

<sup>35</sup> —Kumee, ku66ee lampaaji mon. <sup>36</sup> Laatee hono yimbe lanndinaniibe ja66aade kalfaado mum'en nde wartata kuurtungu, faa udditana dum don e don so salminii. <sup>37</sup> Kaadime'en 6e kalfaado mum'en tawi daanaaki, mbelii hoore. Mido haalana on goonga: o humoto, o joyyina 6e faa 6e jaama, o wara o gollana 6e. <sup>38</sup> So o wartirii didabere jemma naa so tatabere jemma, 6e o tawri non 6ee, mbelii hoore.

<sup>39</sup> Paamee dum doo: sinndo jom galle ana anndunoo wakkati mo gujjo warata, yoppataa o naata galle mum. <sup>40</sup> Onon duu, lanndinee, sabi Bii Neddo oo waran e wakkati mo on miilaali.

<sup>41</sup> Piyeer wii mo:

—Kalfaado, ngol bannadol, minen tan kaaldu-daa naa yimbe fuu?

<sup>42</sup> Iisaa jaabii, wii:

—Homo woni golloowo koolniido, hakkilante, mo kalfaado mum halfinta maccu6e mum hokka dum'en nguure mum'en? <sup>43</sup> Oon golloowo mo kalfaado mum warti so tawi ana golla golle mo halfinaa oo, welii hoore. <sup>44</sup> Mido haalana on goonga: kalfaado oo halfinan mo jawdi mum fuu. <sup>45</sup> Kaa so golloowo oo wii e hoore mum kalfaado mum oo 6ooyii wartaali, hedde ana fiya maccu6e e hor6e, ana jaama ana yara ana sigira, <sup>46</sup> nden, kalfaado oo wartiran jalooma mo golloowo oo anndaa e wakkati mo o miilaali, jukka mo jukkungo naawngo, watta mo hakkunde 6e nganaa hoolniibe. <sup>47</sup> Golloowo anndudo ko kalfaado mum yidi, mo lanndinaaki fay huunde, mo gollaali

ko kalfaado mum yidi, fiyete boggi keewdi. <sup>48</sup> Kaa golloowo mo anndaa ko kalfaado mum yidi, so wadii ko fiyata dum, fiyete boggi seeda. Dokkaado ko heewi, lamndete ko heewi. Kalfinaado ko heewi, lamndete ko buri heewde.

### *No Iisaa laatorii sabaabu ceeraagu yimbe*

<sup>49</sup>—Mi wardii wedaade yiite e leydi ndii. Mido heppi nge huɓɓaali! <sup>50</sup> Won lootogal batisima naawngal ngal lootetee-mi. Mido heppi dum wadaali. <sup>51</sup> Odon miila jam ngardu-mi e leydi ndii naa? Wanaa! Mido wiya on: seenndude yimbe ngardu-mi. <sup>52</sup> Gila jooni yimbe njoyon ley galle gooto ceeran, taton bee kaba e didon bee, didon bee kaba e taton bee. <sup>53</sup> Baabiraado haban e biyum gorko, biddo gorko haban e baaba mum, inniraado haban e biyum debbo, biddo debbo haban e inna mum, debbo gamaado haban e esum debbo.

### *Haala seenndude mbaadiiji*

<sup>54</sup> Iisaa wii jamaa oo kasen:

—So on njii luurde ana iwra hiirnaange tan, on mbiyan nde toɓan. Laartorto hono non duu. <sup>55</sup> So henndu ɓaleeri wibbii, on mbiyan wulan taw. Hono non laartortoo duu. <sup>56</sup> Onon naafigi'en! Odon mbaawi seenndude mbaadi leydi e kammu, ko wadi so on mbaawaa seenndude mbaadi oo doo jamaanu?

<sup>57</sup> Ko saabii so on mbaawaa anndande ko'e mon ko woni foocitaare? <sup>58</sup> So ada yaada e mo kaɓu-ɗaa faa cardoyon, ndaartu rewritinde e makko gila e laawol, pati o naɓe to caroowo, so caroowo oo hokke kayboowo kasu, kayboowo kasu oo duu udde. <sup>59</sup> Mido haalane: abada a yaltataa, so a yoɓaali ko ndewete-ɗaa koo faa laaɓa.

## 13

### *Haala tuubugol e halkagol*

<sup>1</sup> E oon wakkati, won warɓe so kumpiti Iisaa ko hewtii Galilinkooɓe yogaaɓe. Be mbii Pilaatu\* jillondiriino yiyyam maɓɓe e yiyyam sadakaaji maɓɓe. <sup>2</sup> Iisaa jaabii ɓe, wii:

—Odon miila ɓee Galilinkooɓe torraaɓe buri luuttude diina Galilinkooɓe heddiɓe ɓee naa? <sup>3</sup> Mido haalana on: wanaa non. Kaa so on tuubaali, on fuu hono non kalkorto-ɗon. <sup>4</sup> Naa odon miccitoo sappo e njetton ɓe suudu Silowam toowndu nduu saami e mum'en faa maayi ɓee? Odon miila kamɓe buri Urusaliima fuu junuubu naa? <sup>5</sup> Mido haalana on: wanaa non. Kaa so on tuubaali, on fuu hono non kalkorto-ɗon.

<sup>6</sup> Caggal dum, o wadani ɓe ngol banndol:

—Neddo gooto tutino ibbi ley ngesa mum. O wari teɓude ki, kaa o tawaali e makki fay huunde. <sup>7</sup> Non o wii golloowo ngesa oo: «Hikka woni duuɓi tati, hitaande fuu mi waran faa mi teɓa ki, mi tawa ki rimaali. Feyyu ki! So walaa ko ki nafata, ko saabii so eki itta semmbe leydi ndii?» <sup>8</sup> Golloowo oo wii mo: «Kalfaado, yoppu ki doo faa mawuuri. Doo e nden, mi gaawtoto foomre makki, mi wada hen birgi. <sup>9</sup> Ana moyya ki rima doo e mawuuri. So ki rimaali, peyyaa ki.»

### *No Iisaa selliniri debbo ley jalaande fowteteende*

<sup>10</sup> Wadiino e jalaande fowteteende wootere, Iisaa ana darii ana waajoo ley suudu waajordu wooturu. <sup>11</sup> Debbo gooto mo ladde jawni duuɓi sappo e

\* 13:1 Pilaatu yo hooreejo leydi Yahuudiya.

jetti ana tawaa don. O turii do tan, o waawaa dartaade fey. <sup>12</sup> Nde Iisaa yiinoo mo ndee, noddii mo, wii mo:

—Banndam debbo, a dadii e jaw maa oo.

<sup>13</sup> Iisaa fawii juude mum dow makko, non o dartii cot! Hedde omo yetta Laamdo. <sup>14</sup> Jaka hooreejo suudu waajordu oo mettaama ko Iisaa sellini neddo ley jalaande fowteteende koo, wii yimbe bee:

—Balde jeegom kaande golleede ana ngoodi. E deen balde kaan-don warde sellineede, wanaa e jalaande fowteteende.

<sup>15</sup> Iisaa jaabii mo, wii:

—Naafigi'en! Wanaa homo e mon fuu ana humta nagge mum naa ndakiiwa mum jalaande fowteteende yarnoya dum naa? <sup>16</sup> Oo debbo taanii Ibarahiima, mo Ibiliisa ha66biri duu6i sappo e jetti, haanaa humteede jalaande fowteteende naa?

<sup>17</sup> Nde Iisaa haalnoo dum ndee, way6e mum 6ee fuu njaagii faa walaa seese. Kaa jamaa oo fuu ana seyii e dow kaayefiiji di o waadata dii.

### *Banndi haala Laamu Laamdo*

<sup>18</sup> Iisaa wii:

—Hono Laamu Laamdo wa'i? Kodum nanndinan-moo-mi? <sup>19</sup> Laamu Laamdo ana nanndi e ngeeyu buyaage mo neddo 6ami, aawi e sardiye mum. Ngeeyu oo fudi, laatii lekki faa pooli ana ji6a cuudi e ca6e mum.

<sup>20</sup> O wii kasen:

—Kodum nanndinan-mi e Laamu Laamdo oo? <sup>21</sup> Omo nanndi e yuufinirdi ndi debbo 6ami, so jiibi e saawal tati conndi alkama faa ndi fuu ndi yuufi.

### *Haala damal paaɗungal*

<sup>22</sup> Iisaa ana fa'i Urusaliima, ana faɗa geelle e gure fuu, ana waajoo. <sup>23</sup> Neddo gooto lamndii mo:

—Moobbo, yimbe seeda tan kisata naa?

O wii 6e:

<sup>24</sup> —Tiinneee naatiron damal paaɗungal ngal, sabi mido wiya on: heew6e njidan naatude, ndonka. <sup>25</sup> So jom galle oo immiima sokii damal ngal, onon on keedii sella odon calmina, odon mbiya: «Kalfaado, udditan min!» o jaaboto on: «Mi anndaa to njeje-don!» <sup>26</sup> Nden, on ndaroto odon mbiya: «Min jaamdii e maa, min njardii e maa, a waajike e daalaaje amen.» <sup>27</sup> Mo jaaboto on: «Mi anndaa to njeje-don. Ngoddee kam, onon ooɗiibe!» <sup>28</sup> On njiyan Ibarahiima e Isiyaaka e Yaakuuba, kaɗum e annabaabe fuu ley Laamu Laamdo, tawa onon odon mbedaa sella. Nannde nden on mboyan, on neryondiran jiiye kammari mimsee mon. <sup>29</sup> Yimbe iwan funnaange e hiirnaange, saahal e baleeri, njoodoo jaamda ley Laamu Laamdo. <sup>30</sup> Nden yoga e caggalaabe laatoto ardiibe, yoga e ardiibe laatoto caggalaabe.

### *No Iisaa suɗlirani yimbe Urusaliima*

<sup>31</sup> E oon wakkati fuu, yoga e Farisa'en ngari, mbii mo:

—Iw doo, njahaa e laawol maa, sabi Hirudus kaananke oo ana tewta no warde.

<sup>32</sup> O wii 6e:

—Njehee mbiyoyee ndo6u oo: «Miin, mi ribban laddeji, mi sellinan jaw6e hannde e janngo. Nalooma tata6o oo mi timminan golle am fuu. <sup>33</sup> Kaa ana tilsi mi yaha hannde e janngo e fa66i-janngo, sabi annabaajo haanaa maayde so wanaa ley Urusaliima.»

<sup>34</sup> Hay yim6e Urusaliima, on mbarii annabaa6e, on mbardii nelaa6e e mon kaaye! Cili kuurdi njidu-mi hawrintinde 6i66e mon no cofal hawrintinirta 6i66e mum ley biifoole mum nii. Kaa on nja6aali. <sup>35</sup> Dum nee, on daldete e Suudu mon Dewal, ndu laatoo saabeere. Mid6 wiya on: on njiyataa kam so wanaa faa wakkati mo mbiyat6n e mum: «Barke woodanii gardoowo e dow innde Joomiraa6o!»†

## 14

### *No Iisaa selliniri gorko uppu6o*

<sup>1</sup> Wadiino e ley jalaande fowteteende wootere, Iisaa ana wonnoo e galle hooreejo Farisa'en gooto faa jaama. Tawanoo6e ton 6ee ngattani mo hakkille <sup>2</sup> kammari ned6o uppu6o ana tawanoo don. <sup>3</sup> Iisaa haaldi e janninoo6e Sariya e Farisa'en, wii:

—Sellinde jaw6o ley jalaande fowteteende, ana dagii naa dagaaki?

<sup>4</sup> Be fuu, 6e mbii teen. E oon wakkati, o memi jaw6o oo, o sellini dum, o yoppiti dum. <sup>5</sup> Caggal dum, o wii 6e:

—Homo e mon biyum naa ngaari mum saamata e bunndu waasa yaltinde dum don e don, fay so dum jalaande fowteteende?

<sup>6</sup> Be ndonki jaabaade mo e majjum.

### *Haala subaade joolle e noddude yim6e*

<sup>7</sup> Nde Iisaa yiinoo noddaa6e 6ee ana cu6oo joolle burde teddude ndee, o waajii 6e, o wii:

<sup>8</sup> —So a noddaama kuurtungu, pati jooda e joonnde burnde teddude. Sabi burdo ma teddude ana waawi warde, <sup>9</sup> noddudo on oo wara, wiye: «Hokku oo doo joonnde ndee!» Nden, a yaagoto joodooyaade e joonnde burnde leydude ndee. <sup>10</sup> So a noddaama kuurtungu, joodooya caggal, yalla noddudo ma oo ana wara, wiye: «Gido, heettu yeeso gaa!» Nden, dum laatante teddungal yeeso noddaa6e 6ee fuu. <sup>11</sup> Sabi mawninkiniido fuu, leydinte, leydinkiniido teddinte.

<sup>12</sup> O wii noddudo mo oo duu:

—So ada nodda yim6e bottaari naa hiraande, pati noddu gidiraabe naa banndiraa6e naa sakiraabe naa taakallemme'en maa tawaabe yo ar-sukunte'en. So 6e noddite, dum laatoo mbarjaari maa. <sup>13</sup> So a wadii waliima, noddu misikiina'en e wooy6e e bonnguube e wum6e. <sup>14</sup> Nden, a welan hoore, sabi been ngalaa ko nj6bire, a yo6ete jannde immital foccitiife.

### *Banndol haala waliima*

<sup>15</sup> Gooto e jaamoobe 6ee, nde nani haala kaa ndee, wii mo:

—Naamoyoowo ley Laamu Laamdo, welii hoore.

<sup>16</sup> Iisaa wii mo:

—Gorko gooto wadiino waliima, noddi yim6e faa heewi. <sup>17</sup> Nde jaamdu nduu tilinoo ndee, o neli kaadime makko to yim6e 6ee, wiya: «ngaree, waliima oo lanndinike.» <sup>18</sup> Be fuu, gooto gooto, 6e puddi ujaade. Gooto wii: «Mi soodii ngesa, ana tilsi mi yaha mi yiyoya nga, njaaf6-daa kam.» <sup>19</sup> Goddo wii: «Mi soodii ga'i demooje sappo e jale sari joy. Mid6 yidi hornoyde di, njaaf6-daa kam.» <sup>20</sup> Goddo kasen wii: «Mi jommbaajo, dum saabii so mi he6ataa warde.» <sup>21</sup> Kaadime oo warti, haaltani dum kalfaado mum. Oon bilaa, wii mo: «Yaa law ley boli e dinngiraaji ngeenndi ndii, noddoyaa misikiina'en e wooy6e e wum6e e bonnguube.» <sup>22</sup> Kaadime oo warti, wii:

† 13:35 Jabuura 118.26



«Kalfaado, ko mbii-daa koo fuu wadaama, kaa faa jooni yolannde ana heddii.»  
<sup>23</sup> Kalfaado oo wii kaadime oo: «Yaa dow dati jaajudi e paadudi. Mo kebu-daa fuu, ndoolinaa dum wara naata, yalla suudu am nduu ana huu6a. <sup>24</sup> Sabi mido wiya on: fay gooto e 6e noddunoo-mi 6ee meedataa jaamdu am.»

### *No neddo laatortoo taalibbo Iisaa*

<sup>25</sup> Yim6e heew6e ana njaada e Iisaa. O yeecitii, o wii 6e:

<sup>26</sup> —Gardo e am fuu, sinaa mi burana dum inna mum e baam mum e jom suudu mum e sukaa6e mum e mijiraa6e mum e mawniraa6e mum, mi burana dum fay kanum e hoore mum. So wanaa dum, joomum waawaa laataade taalibbo am. <sup>27</sup> Kasen duu, mo 6amaali leggal mum bardugal jokka e am fuu, waawaa laataade taalibbo am. <sup>28</sup> So won muuydo e mon mahude suudu toowndu, wanaa joomum joodoto tafon, hiisoo ko hasindini e mum, yeewa so ana jogii ko biltata dum naa? <sup>29</sup> So wanaa dum, so joomum diidii tajjjaali, jiido mo fuu jalan mo, <sup>30</sup> wiya: «Yeewee oo neddo diidii, ronkii tajjjudu.» <sup>31</sup> Kasen, so kaananke yehii faa ha6oya e kaananke goddo, o miilataako tafon yalla wor6e ujunaaji sappo ana mbaawi ja66aade wor6e ujunaaji noogay faa ka6a e mum? <sup>32</sup> So mo waawaa ja66aade dum, o wadan e mum nelaa6e gila yottaaki badaaki, faa jam wada hakkunde ma66e. <sup>33</sup> Hono non, fay gooto e mon waawaa laataade taalibbo am so yoppaali ko jogii fuu.

<sup>34</sup> Lamdam ana moyyi, kaa so dam njootii lammude, kodum lamminta dam kasen? <sup>35</sup> Walaa fuu do dam waawata naftoreede, wanaa e leydi, wanaa e birgi. Dam tippete sella.

Jom nowru fuu yo nanu.

## 15

### *Banndol haala mbaalu majjudo*

<sup>1</sup> Duwaaje'en e luuttoo6e hono mum'en fuu ana 6adinoo mo faa kettindanoo mo. <sup>2</sup> Farisa'en e dunkee'en Sariya ana njurjurta, ana mbiya:

—Oo ana ja66oo luuttoo6e ana jaamda e mum'en!

<sup>3</sup> E ley dum, o wadani 6e ngol banndol, o wii:

<sup>4</sup> —So gooto mon ana jogii baali teemedere, majjiraama mbaalu gooto, wanaa yoppaan capande jeenay e jeenay dii fuu ley ladde tewtoya majjudo oo faa yiita dum naa? <sup>5</sup> So o yiitii mo, o towiran dum seyo. <sup>6</sup> Nde o warti galle makko fuu, o hawrintinan gidiraa6e makko e taakallemme'en makko, o wiya dum'en: «Ceyodee e am, sabi mi yiitii mbaalu am majjunoodo oo.» <sup>7</sup> Mido haalana on: hono non seyo laatortoo dow kammu so luuttoowo gooto tuubii. Engo buri seyo capande njeenayon e njeenayon foocitiibe 6e kasindinaa e tuubal.

### *Banndol haala mbuudu cardi majjudo*

<sup>8</sup> —Naa, so debbo ana jogii buudi cardi sappo, majjiraama hen gooto, hu66ataa lampa, wuuwa galle oo, tewtira mbuudu oo hakkille faa yiita dum naa? <sup>9</sup> So o yiitii mo, o hawrintinan gidiraa6e makko e taakallemme'en makko, o wiya: «Ceyodee e am, sabi mi yiitii mbuudu am majjunoodo oo.»

<sup>10</sup> Mido haalana on: hono non malaa'ika'en Laamdo ceyortoo so luuttoowo gooto tuubii.

### *Banndol haala biiddo kalkiido*

<sup>11</sup> Iisaa wii kasen:

—Gorko gooto ana joginoo biibbe worbe didon. <sup>12</sup> Mijiraado oo wii baam mum: «Baaba, hokkam ngedu am e jawdi ndii.» Ndennoo, baabiraado oo fecci jawdi mum ndii hakkunde maabe. <sup>13</sup> Wadi balde seeda, mijiraado oo reentini ko jogii fuu, dawi, yehi leydi ngoddundi. Ton o bonniri ngedu makko oo fuu e fijirde. <sup>14</sup> Nde o timminnoo ndee, yolbere bonnde wadi e ndiin leydi, o fuddi tampude. <sup>15</sup> O yehi o takkoyii e gorko jeyaado e ndiin leydi. Oon neldi mo gese mum faa mo duranoya dum girooji. <sup>16</sup> Omo muuyannoo fay jaamde jaamdu girooji dii, kaa fay gooto hokkaali mo. <sup>17</sup> Nde hakkille makko wartunoo ndee, o wii hoore makko: «Gollanoobe baabam jaaman faa njoppa, miin mido maaya doo yolbere. <sup>18</sup> Mi immoto, mi hoota galle baabam, mi wiya dum: Baaba, mi toonii Laamdo, mi toonii ma, <sup>19</sup> mi haanaa fay wiyeede biya. Ndennoo, jogoram no gooto e golloobe maa bee nii!» <sup>20</sup> Oon wakkati fuu, o immii o fa'i to baabiiko. Baaba oo soynii mo to woddi, bernde mum heccidi, dogi maaBii mo. <sup>21</sup> Biddo oo wii mo: «Baaba, mi toonii Laamdo, mi toonii ma, mi haanaa fay wiyeede biya.» <sup>22</sup> Non baaba oo wii golloobe mum: «Njaawnee, ngaddoyee saaya burka fuu moyyude boornon mo, ngadanon mo felfelde e fedeendu makko, ngadon pade e koyde makko. <sup>23</sup> Ngaddon ngaari njarnaandi faa fayi ndii duu, kirson dum faa jaamen, mbelto-den. <sup>24</sup> Sabi biyam oo, o maaynoodo o wuurtii, o kalkinoodo o hewtaama.» Nii be puddi weltaare.

<sup>25</sup> E ley dum, biddo hammadiijo oo iwri gese. Nde o badinoo yottaade galle oo ndee, o nani bawdi e dippande. <sup>26</sup> O noddi gooto e golloobe bee, o lamndii dum ko ndee dillere woni? <sup>27</sup> Oon wii mo: «Mija oo warti e jam, baam maa hirsanii mo ngaari payndi ndii.» <sup>28</sup> Nii mawniraado oo tikki, salii naatude galle oo. Baaba oo yalti, suri mo yalla omo naata. <sup>29</sup> O jaabii baabiiko, o wii: «Annii, duuBi kuurdi mido gollane, fay nde wooteere mi salaaki yamiroore maa. Kaa dum e taweede, abada a hokkaali kam fay damngel faa miin e gidiraabe am, min mbeltoroo. <sup>30</sup> Kaa biya jaamdo jawdi maa fuu e fugaaji so warti oo, a hirsanii dum ngaari payndi ndii.» <sup>31</sup> Baabiiko wii mo: «Bingel am, enen ngondi abada, ko njey-mi fuu, aan jey. <sup>32</sup> Ana haani ceyo-den, mbelto-den. Sabi mija oo, o maaynoodo o wuurtii, o kalkinoodo o hewtaama.»

## 16

### *Bannol haala howruujo yoyudo*

<sup>1</sup> Iisaa wii taalibaaBe mum bee kasen:

—Arsukunte gooto halfiniino howruujo mum jawdi. O haalanaa howruujo oo ana bonna jawdi makko. <sup>2</sup> O noddi dum, o wii: «Ko nanu-mi e maa koo, ko woni? War, hiisa ko kalfine-daa koo, sabi hankasen a waawaa halfineede.» <sup>3</sup> Howruujo oo wii e hoore mum: «Hono ngadan-mi? Sabi kalfaado am yoppan kam golle. Mi walaa doole remde, mido yaagoo jaagaade. <sup>4</sup> Ooho! Mi anndii no ngadan-mi, yalla ana daja jaBiiBe kam e ley cuufi mum'en, so mi boortaama.» <sup>5</sup> Oon wakkati, o noddiri be kalfaado makko rewata bee, gooto gooto. O wii arano oo: «Hono foti kalfaado am oo rewete?» <sup>6</sup> Oon wii mo: «Bidojaaji teemedere nebam ndewetee-mi.» Howruujo oo wii mo: «Bam dewtere maa jamaale, yaawnu, jooda mbinndaa capande joy.» <sup>7</sup> O wii goddo kasen: «Aan nee, hono foti ndewete-daa?» Oon wii mo: «Caakuuji teemedere gawri ndewetee-mi.» O wii oon: «Bam dewtere maa jamaale, mbinndaa caakuuji capande jetti.» <sup>8</sup> Kalfaado oo mani howruujo ooniiido oo saabe yoyre mum. Sabi yimbe adunankooBe bee buri yimbe jeyaabe e fooyre

Laamdo 6ee yoyande yim6e hono mum'en. <sup>9</sup> Miin, mido wiya on: tewtee gidraa6e, tewtiree 6e jawdi aduna yalla so ndi timmii, odon nja66itee e ley nguurndam nduumiidam.

<sup>10</sup> Iisaa 6eydi hen, wii:

—Koolniido e kulle pamare, hollan hoolaare e kulle teentiliide. Jambbiido e kulle pamare, jambbotto e kulle teentiliide duu. <sup>11</sup> Ndennoo, so on kollaali hoolaare e jawdi adunankoori ndii, homo fuu halfinta on jawdi ngoongaraari ndii? <sup>12</sup> Kasen duu so on kollaali hoolaare e jawdi janandi, hono ndokkirte-don ko nje-y-don koo? <sup>13</sup> Golloowo fay gooto waawaa gollande halfaa6e didon, sabi naa joomum wajii gooto, yidii keddiido oo, naa nanngondirii e gooto oo, yoppii keddiido oo. On mbaawaa gollidande Laamdo e jawdi.

<sup>14</sup> Farisa'en 6ee ana kettindoo dum fuu. Nde wonnoo 6e yi66e kaalisi, e6e njala mo. <sup>15</sup> O wii 6e:

—Onon, odon cenna ko'e mon yeeso yim6e, kaa Laamdo ana humpitii 6erde mon. Sabi ko yim6e teddinta koo, ana harmi to Laamdo.

<sup>16</sup> Sariya oo e annabaa6e ana ngoodunoo faa e jamaanu Yaayaa. Gila e Yaayaa Kabaaru Lobbo haala Laamu Laamdo oo ana 6annginee. Gooto fuu ana ha6anoo naatude e makko. <sup>17</sup> Timmugol kammu e leydi 6uri newaade diina ittude to66ere wootere e ley Sariya oo.

<sup>18</sup> Ceerdo jom suudu mum so 6ami goddo fuu, jeenii. Kasen duu neddo fuu 6amdo debbo ceeraado, jeenii.

### *Banndol haala arsukunte e Laajaru*

<sup>19</sup>—Wadiino e 6ettaade, gorko arsukunte gooto parortonoo6o burmusuuje bodeeje daatude, duuminoo6o e neema e weltaare. <sup>20</sup> Gorko uubaado mo walaa fay huunde, biyeteedo Laajaru, ana lelinoo damal galle makko. <sup>21</sup> Ana yidunoo jaamde kedde makko, fay dawaadi ana ngarannoo ana mettoo uube makko dee. <sup>22</sup> Misikiino oo maayi, malaa'ika'en na6i dum faa to Ibarahiima. Arsukunte oo maayi karum duu, iraa, <sup>23</sup> naati yiite. E ley jukkungo makko ngoo, o hunci gite makko, o soynii Ibarahiima to woddi, Laajaru ana dow koyde mum. <sup>24</sup> O eewnii o wii: «Maamam Ibarahiima, yurmam, nel Laajaru suuwa hoore fedeendu mum ley ndiyam, yalla ana 6uumna demngal am. Sabi mi torrike sanne ley ngee yiite.» <sup>25</sup> Kaa Ibarahiima wii: «Binngel am, miccita a hebii neema maa e ley nguurndam maa, Laajaru kaa bone hebii. Jooni, kanko mo he6an hinnee, aan torro-daa. <sup>26</sup> Ko 6uri dum fuu, ngaykaare mawnde woni hakkunde amen e mon. Ndennoo so won yidube iwde to mon ngara ga amen, naa iwde ga amen njaha to mon, tawan mbaawaa.» <sup>27</sup> Arsukunte oo wii: «Ndennoo maama, mido jaage, nel Laajaru galle baabam, <sup>28</sup> sabi mi dalii ton mijiraa6e am njoyon wor6e, faa o jeertina 6e pati 6e ngara e oo nokku torra.» <sup>29</sup> Kaa Ibarahiima wii mo: «E6e njogii dewtere Muusaa e dewte annabaa6e 6ee, yo 6e kettindano den.» <sup>30</sup> O jaabii dum: «Wanaa non, maamam Ibarahiima! Kaa so won iwdo hakkunde maay6e yehi to ma66e, 6e tuuban.» <sup>31</sup> Ibarahiima wii mo: «So 6e kettindanaaki Muusaa e annabaa6e, fay iwdo e hakkunde maay6e wadataa so 6e ngoondina.»

## 17

### *Haala luuttude e yaafeede*

<sup>1</sup> Iisaa wii taalibaa6e mum 6ee:

—Ko fergitata yimbe faa luutta waasataa hebeede, kaa bone woodanii laatiido sabaabu majjum. <sup>2</sup> Haayre teddunde habbee e daande joomum tippee ley geeci furi moyyande dum, diina luuttinde gootel e koy doo cukaloy. <sup>3</sup> Kaybee ko'e mon: so sakiike maa luuttii, nijaa dum. So tuubii, njaafodaa dum. <sup>4</sup> So o toonii ma cili jeddi e ley jalooma gooto, o warti e maa cili jeddi omo tuubane, njaafodaa mo.

*Haala goondinal e dowtaare*

<sup>5</sup> Nelaabe bee mbii Moobbo oo:

—Beydan min goondinal.

<sup>6</sup> Iisaa jaabii, wii:

—So goondinal mon famdiriino no ngeeyu buyaage nii, so on mbiino kii doo lekki ruggitoo, daroyoo ley geeci, ki downtanto on.

<sup>7</sup> Homo e mon maccudo mum demoowo naa duroowo mum wartata ladde so wiya dum jaamdu mum annii oon wakkati fuu? <sup>8</sup> Walaa! A wiyan mo moyyinane jaamdu, o lanndinoo yalla omo gollane faa jaamaa njaraa. Caggal mum, o jaama kanko duu. Wanaa non worri naa? <sup>9</sup> Yalla a yettan maccudo oo saabe wadii ko njamir-daa dum koo? <sup>10</sup> Onon duu hono non. So on ngadii huunde fuu ko njamire-don, mbiyee: «Min maccoy tan, ko min kaani wadude nii min ngadi.»

*No Iisaa selliniri seppaabe sappo*

<sup>11</sup> Nde Iisaa yahannoo Urusaliima ndee, yaabborii hakkunde leyde Samariya e Galili. <sup>12</sup> O wari faa o naata ngeenndi ngootiri, non seppaabe sappo worbe peewti mo, ndarii to toowti, <sup>13</sup> eewnii, mbii:

—Moobbo Iisaa, yurma min!

<sup>14</sup> Nde o yiinoo be ndee, o wii be:

—Njehee, kolloyee ko'e mon yottinoobe sadaka bee.

E ley yaadu ma6be nduu, be cellinaa. <sup>15</sup> Gooto ma6be, nde yiinoo sellii ndee, wirfitii ana yetta Laamdo e daande toownde. <sup>16</sup> O diccii yeeso Iisaa, o yetti dum. Oon yo Samariyanke. <sup>17</sup> Iisaa ja6bitii, wii:

—Tama wanaa sappo bee fuu cellinaama? Hoto njeenayon bee nee ngoni?

<sup>18</sup> Walaa miildo wirfitaade yetta Laamdo so wanaa janano oo naa?

<sup>19</sup> Caggal dum, o wii gorko oo:

—Imma yaa e laawol maa, sabi goondinal maa danndii ma.

*No Laamu Laamdo wardata*

<sup>20</sup> Nden Farisa'en bee lamndii Iisaa mande Laamu Laamdo oo warata? O jaabii be, o wii:

—No Laamu Laamdo wardata nii, yiyataake. <sup>21</sup> Fay gooto waawaa wiide omo nii naa omo naa. Anndee, Laamu Laamdo ana hakkunde mon.

<sup>22</sup> Caggal dum, o wii taalibaabe makko bee:

—Wakkati waran mo muuyaton e mum yiide jalaade Bii Neddo oo, fay so jannde wootere, kaa on njiyataa. <sup>23</sup> On mbiyete: «Omo too», naa «Omo gaa», pati njehee, pati njokkee be. <sup>24</sup> Sabi no majere fooynirta kammu fuu nii, hono non Bii Neddo laatortoo jannde gartol mum. <sup>25</sup> Kaa ko adii dum, ana tilsii o torree torraaji keewdi, yimbe oo doo jamaanu tippitoo mo. <sup>26</sup> No wa'unoo e wakkati Nuuhu nii, hono non kasen wa'ata e jalaade Bii Neddo: <sup>27</sup> yimbe ana jaama, ana njara, ana ndewla, ana ndewlee, faa jannde Nuuhu naati laana kaa. Nii ilam tuufaanu dam wari, halkiri be fuu. <sup>28</sup> Wa'an hono no wakkati Luudu nii, yimbe ana jaama, ana njara, ana cooda, ana cootta, ana ndema, ana maha. <sup>29</sup> Kaa nde Luudu yaltunoo Sodooma ndee, Laamdo tomni yiite e

sitti, halki 6e fuu. <sup>30</sup> Hono non jannee banngugol Bii Neddo oo duu wa'ata. <sup>31</sup> Nannde nden, mo dum tawi dow bene, tawi kaaki mum ana ley suudu, pati wiya jippanto di. Mo dum tawi gese, pati hoota cuudi. <sup>32</sup> Miccitee jom suudu Luudu oo. <sup>33</sup> Neddo fuu tewtudo danndude yonki mum, waasan ki, kaa neddo fuu baasudo ki, danndan ki. <sup>34</sup> Mido haalana on: e oon jemma, yimbe didon leddiibe e daddo wooto, gooto maabe nabete, goddo oo yoppee. <sup>35</sup> Rewbe didon undoo6e, gooto mum'en nabete, goddo oo yoppee. [ <sup>36</sup> \* ]

<sup>37</sup> Taalibaa6e 6ee nja66itii, mbii mo:

—Kalfaado, hoto dum wadata?

O wii 6e:

—Do jiibe ngoni fuu, don dute kawritata.

## 18

### *Bannol haala caroowo oojiido*

<sup>1</sup> Iisaa wadani 6e bannol faa hollita 6e ana tilsi 6e nduumoo e duwaawu, pati 6e njeeboo. <sup>2</sup> O wii:

—Caroowo gooto mo hulataa Laamdo, yaagataako fay gooto, ana wonnoo e ngeenndi ngootiri. <sup>3</sup> Debbo mo gorum maayi ana ley ndiin ngeenndi. Ana warannoo e caroowo oo, wiya: «Wallam faa mi hewta goonga hakkunde am e ka6do am oo.» <sup>4</sup> Caroowo oo deyyinii faa 6ooyi. Kaa sakitii o wii hoore makko: «Fay so taweede mi hulataa Laamdo mi yaagataako fay gooto duu, <sup>5</sup> mi wallan debbo oo faa o hewta goonga makko, sabi omo torra kam, yalla omo sukkita noppi am.»

<sup>6</sup> Caggal dum, Iisaa wii:

—On nanii ko caroowo oojiido oo wii naa? <sup>7</sup> Laamdo nee wallataa subaa6e mum wullitotoo6e dum jemma e jalooma 6ee fuu faa 6e kewta goonga maabe naa? Mo jaabantaako 6e law naa? <sup>8</sup> Mido haalana on: o wallan 6e law. Kaa so Bii Neddo waroyii, omo tawa goondin6e mo e leydi ndii naa?

### *Bannol haala Farisanke e duwaaje*

<sup>9</sup> Yimbe jogorii6e ko'e mum'en yo foocitiibe, njataaki wo66e, 6een o wadani ngol bannol:

<sup>10</sup> —Wor6e didon naati ley Suudu Dewal Mawndu nduu, faa ngada duwaawu. Gooto oo Farisanke, goddo oo duwaaje. <sup>11</sup> Farisanke oo darii ana duworoo ley bernde mum hono nii: «Laamdo, mi yettiri ma ko mi nanndaali e yimbe heddiibe 6ee, dum woni wuybe e oojiibe e jeeno6e, e ko mi nanndaali e oo doo duwaaje koo. <sup>12</sup> Mido hoora yontere fuu cili didi, mido itta jakka e huunde fuu ko ke6u-mi.» <sup>13</sup> Duwaaje oo nee darii to toowti, huli fay tiggitaade kammu, jurginii, ana wiya: «Laamdo yurmam, mi luuttoowo.» <sup>14</sup> Haya, mido wiya on: oo hooti yo nanngiraado poocitiido, wanaa oo too. Sabi mawninkiniido fuu leydinte, leydinkiniido fuu toownete.

### *No Iisaa duwanorii cukaloy*

<sup>15</sup> Won waddan6e Iisaa cukaloy keccoy, yalla omo mema koy. Kaa nde taalibaa6e 6ee njiinoo dum ndee, ndarii ana njahoo e yimbe 6ee. <sup>16</sup> Non Iisaa noddii taalibaa6e 6ee, wii dum'en:

\* **17:36** E deereji 6ooydi dii, yoga ana beyda aaya 36:Wor6e didon won6e e ngesa ngoota, gooto mum'en nabete, goddo oo yoppee.

—Accee cukaloy koy ngara e am, pati kaḏee koy, sabi wa'uḓe no makkoy nii ḓee njeŷ Laamu Laamḓo oo. <sup>17</sup> Miḓo haalana on goonga: mo jaḓiraali Laamu Laamḓo oo no cukalel nii fuu, naatataa hen!

*No Iisaa e gorko arsukunte ngaddi*

<sup>18</sup> Gooto e hooreeḓe Yahuudiyankooḓe lamndii mo, wii:

—Moobbo moyyo, koḓum kaan-mi waḓude faa mi heḓa nguurndam ndu-umiḓam?

<sup>19</sup> Iisaa wii mo:

—Ko saabii so aḓa noddira kam moyyo? Moyyo walaa so wanaa gooto, oo woni Laamḓo. <sup>20</sup> Aḓa anndi ḓii ḓoo sariyaaji: «Pati jeenu, pati jaḓu hoore, pati wujju, pati seeda fenaande, teddin inna maa e baam maa.»\*

<sup>21</sup> Hooreejo oo jaabii mo, wii:

—Miḓo haybi ḓum fuu gila e cukaaku am.

<sup>22</sup> Nde Iisaa nanunoo ḓum ndee, wii mo:

—Aḓa jaḓoraa huunde wootere: soottu ko njogi-ḓaa koo fuu, ndokkaa kaalisi oo misikiina'en. Nden, a heḓan jawḓi dow kammu. Caggal ḓum, ngaraa, njokkaa kam.

<sup>23</sup> Kaa nde mo nanunoo ḓum ndee, mo jirḓinii, sabi o arsukunte jḓoḓo.

<sup>24</sup> Iisaa yeewi mo, wii:

—Hee naatugol arsukunte e Laamu Laamḓo ana tiḓi! <sup>25</sup> Sabi yaḓḓoraade ngelooba e wuddere mesalal ḓuri newaade, ḓiina naatugol arsukunte e Laamu Laamḓo.

<sup>26</sup> Hettindantooḓe mo ḓee mbii:

—Ndennoo, homo woni kisoowo?

<sup>27</sup> Iisaa jaabii:

—ḓo yimḓe ḓum laatataako, kaa eḓum laatoo to Laamḓo.

<sup>28</sup> Piyeer jaḓḓitii, wii:

—Minen, min njoppii ko min njogii fuu, min njokkii e maa.

<sup>29</sup> O wii ḓe:

—Miḓo haalana on goonga: neḓḓo fuu joppirḓo galle mum naa jom suudu mum naa sakiraaḓe mum naa saaraaḓe mum naa sukaaḓe mum saabe Laamu Laamḓo, <sup>30</sup> heḓan cowe keewḓe e oo ḓoo wakkati mo ngon-ḓen e mum jooni, heḓa nguurndam nduumiḓam e wakkati garoyoowo oo duu.

*No Iisaa sapporii nde tatabere maayde mum e wuurtugol mum*

<sup>31</sup> Iisaa noddii taalibaaḓe mum sappo e ḓiḓon ḓee, wii ḓum'en:

—Kettinee, eden nii ḓabbita Urusaliima. Ko annabaaḓe mbinnunoo haala Bii Neḓḓo koo fuu, tabitan. <sup>32</sup> Sabi o waḓete e juuḓe heeferḓe, ḓe njaayra mo, ḓe torra mo, ḓe tutta e makko, <sup>33</sup> ḓe piya mo dorri, ḓe mbara mo. Kaa jaḓooma tataḓo oo, mo wuurtan.

<sup>34</sup> Taalibaaḓe ḓee paamaali haala kaa. Maanaa makka suuḓanike ḓe, ḓe anḓaa ko o yiḓi wiide.

*No Iisaa wumtiniri bumḓo*

<sup>35</sup> Nde Iisaa ḓaḓino Yeriko ndee, tawi bumḓo ana jooḓii sera laawol ngol, ana garbinoo. <sup>36</sup> Oon maati jamaa ana yaḓḓoo, lamndii ko ḓum woni? <sup>37</sup> Be mbii mo:

—Iisaa Nasaraatunke oo ḓettotoo ḓoo.

<sup>38</sup> O wulli, o wii:

—Iisaa, taanii Daawuuda, yurmam!

\* 18:20 Pergu 20.12-16; Fillitagol Tawreeta 5.16-20

<sup>39</sup> Ardii6e 6ee ndarii ana njahoo e makko, ana mbiya o deyy<sup>inoo</sup>. Kaa o beydii wullude, omo wiya:

—Taanii Daawuuda, yurmam!

<sup>40</sup> Iisaa darii yamiri 6e ngadda mo e mum. Nde mo 6adinoo ndee, Iisaa lamndii mo, wii:

<sup>41</sup>—Kodum njid-6aa mi wadane?

O wii:

—Moobbo, mi hewta gite am!

<sup>42</sup> Iisaa wii mo:

—Wumtu, goondinal maa danndii ma.

<sup>43</sup> Don e don o wumti, o jokki e mum, omo yetta Laamdo. Nde yim6e 6ee njiinoo dum ndee, ndarii ana njetta Laamdo.

## 19

### *No Jakayus goondiniri Iisaa*

<sup>1</sup> Iisaa naati Yeriko, ana seeka ngeenndi ndii. <sup>2</sup> Gorko biyeteedo Jakayus ana wonnoo ton. O hooreejo duwaane'en, o arsukunte duu. <sup>3</sup> Omo yidunoo yiide Iisaa faa o annda ko woni, kaa o ronkii saabe 6illondiral, nde wonnoo mo da66o. <sup>4</sup> O dogi, o arditii, o nabbi lekki do Iisaa ya66oroo doo faa o yiya dum. <sup>5</sup> Nde Iisaa yottinoo nokku oo ndee, tiggittii, yii mo, wii:

—Jakayus, yaawnu jippa, sabi ana haani mi jippoo galle maa hannde.

<sup>6</sup> Jakayus yaawni jippii, ja66orii mo seyo. <sup>7</sup> Yii6e dum 6ee fuu keddi ana nurnjarta, ana mbiya:

—O jippanoyike luuttoowo.

<sup>8</sup> Kaa Jakayus darii yeeso Iisaa, wii:

—Moobbo, mi hokkan feccere jawdi am fuu misikiina'en. So won mo teetu-mi huunde, mi yoban dum cowe nay.

<sup>9</sup> Iisaa wii mo:

—Hannde, kisindam naatii e oo galle, sabi oo duu yo taanii Ibarahiima!

<sup>10</sup> Sabi Bii Neddo warii tewtude majju6e faa hisina dum'en.

### *Banndol haala mutakal*

<sup>11</sup> Yim6e ana ngondi e hettindaade haala Iisaa, faa o fawi hen banndol gonngol. Sabi o 6adike Urusaliima, kasen duu yim6e miilii Laamu Laamdo banngan jooni temmbu. <sup>12</sup> O wii:

—Gorko dimo dor yehey leydi ngodfundi faa lamminee, caggal dum, warta.

<sup>13</sup> O noddi kaadime'en makko sappo, o hokki gooto ma66e fuu mutakal kanje, o wii 6e: «Njaagoree faa mi warta.» <sup>14</sup> Kaa nde wonnoo yim6e ngeenndi makko njidaa mo, 6e immini nelaa6e caggal makko, 6e mbii: «Min njidaa o laamoo min.» <sup>15</sup> Nde mo lamminaa so mo warti ndee, mo yamiri mo noddanee kaadime'en 6e mo halfini jawdi 6ee, faa mo annda ko gooto ma66e fuu tinorii e jaagu mum oo.

<sup>16</sup> Arano oo wari, wii: «Kalfaado, mutakal maa ngal tinike mutakal sappo.» <sup>17</sup> O wii dum: «Golle maa gasii sanne kaadime lobbo. Nde wonnoo a hoolnike e ko famdi, mi lamminii ma geelle sappo.»

<sup>18</sup> Dida6o oo wari, wii: «Kalfaado, mutakal maa ngal tinike mutakal joy.» <sup>19</sup> O wii: «Aan duu, mi lamminii ma geelle joy.» <sup>20</sup> Caggal dum, goddo kasen wari, wii: «Kalfaado, annii mutakal maa, mi pi6unoodo ngal e fetalaare <sup>21</sup> sabi mido hule. Sabi a gorko naadudo, ada bama ko a resaali, ada hetta do a aawaali.» <sup>22</sup> O wii dum: «Dara! Haalaaji maa jaati cariran-maa-mi, aan kaadime laaliido. Ada anndi mi gorko naadudo, mi baman ko mi resaali, mi hettan do mi aawaali. <sup>23</sup> Ko saabii so a wadaali jawdi am ndii e ley banki,

yalla ana daja ko keɓu-mi hen so mi wartoyii?» <sup>24</sup> Caggal ɗum, kalfaaɗo oo wii kaadime'en mum ɓee: «Teetee mo mutakal ngal, ndokkon ngal jogiido mutakal sappo oo.» <sup>25</sup> Be mbii mo: «Kalfaaɗo, kanko, omo jogii mutakal sappo.» <sup>26</sup> O wii: «Mido haalana on, jogiido fuu ɓeydante, kaa mo walaa, fay seeda mo jogii oo teetete. <sup>27</sup> Kaa wayɓe am ɓe njidaa mi laamoo ɗum'en ɓee, ngaddee ɓe doo, mbaron ɓe yeeso am.»

### *No Iisaa naatiri Urusaliima*

<sup>28</sup> Nde Iisaa tilinoo haalde ɗum ndee, ardi wɔɓɓe ɓee, njabbiti fa'i Urusaliima. <sup>29</sup> Nde o ɓadinoo Baytifaaji e Baytaniya hedde waamnde haayre wiyeteende Jaytun, o neli taalibaaɓe makko ɗidon, <sup>30</sup> o wii ɓe:

—Njehee, naatoyee e ngeenndi ngonndi yeeso mon ndii, on tawan mola ndakiwa nga fay gooto waddaaki abada ana haɓɓii. Kumton nga, ngaddon nga doo. <sup>31</sup> So won biido on, «Ko saabii so oɗon kumta nga?» mbiyon ɗum hono nii: «Moobbo ana haajaa nga.»

<sup>32</sup> Nelaabe ɓee njehi, tawri no o wiiri ɗum'en nii. <sup>33</sup> E ley humtugol maɓɓe mola ngaa, jeyɓe mola ngaa ɓee mbii:

—Ko kumtirton mola ngaa?

<sup>34</sup> Be njaabii, ɓe mbii:

—Moobbo ana haajaa nga.

<sup>35</sup> Nii ɓe naɓani Iisaa mola ngaa, ɓe njappi e magga saayaaji maɓɓe, o waddii. <sup>36</sup> No o yaarata nii, ɓe mbeerti saayaaji maɓɓe dow laawol ngol. <sup>37</sup> Nde o faandii Urusaliima ndee, hedde jipporde waamnde haayre wiyeteende Jaytun, tawi taalibaaɓe ɓee fuu ana keewi seyo, ndarii ana njetta Laamɗo e daande toownde, saabe deental kaayɗe ɗe ɓe njiinoo ɗee. <sup>38</sup> Eɓe mbiya:

—Barke woodanii kaananke gardoowo e dow innde Joomiraado! <sup>\*</sup> Jam dow kammu. Teddeengal woodanii Laamɗo Toowɗo!

<sup>39</sup> Yoga e Farisa'en tawaaɓe e jamaa oo ɓee mbii mo:

—Moobbo, haja taalibaaɓe maa ɓee!

<sup>40</sup> O jaabii ɓe, o wii:

—Mido haalana on, so kamɓe ɓe ndeyyii, kaaye ɗee ngattata wullude!

### *No Iisaa woyirani Urusaliima*

<sup>41</sup> Nde o ɓadinoo, so o yii ngeenndi ndii ndee, o woyi ndi, <sup>42</sup> o wii:

—So aan duu, aɗa anndunoo hannde ko hokkete jam...! Kaa jooni, ɗum suudaama e gite maa. <sup>43</sup> Nalaade ngaran nde wayɓe maa moyyinta cuuɗorde, pile, ɓille, <sup>44</sup> ngurjine, kalke aan e ɓiɓɓe maa fuu. Be njoppataa e maa fay haayre wootere ana fawii dow wonnde, sabi a annditaali wakkati mo Laamɗo wari faabaade ma oo.

### *No Iisaa ribbiri jaagotooɓe ley Suudu Dewal Mawndu*

<sup>45</sup> Caggal ɗum, o naati daalaare Suudu Dewal Mawndu nduu, o darii omo ribba jaagotooɓe, <sup>46</sup> omo wiya ɗum'en:

—Ana winndii: «Suudu am laatoto rewruɗo Laamɗo»,<sup>†</sup> kaa onon, on ngadii ndu suuɗorde yanooɓe.

<sup>47</sup> Iisaa ana waajoo, ɓannde fuu ley Suudu Dewal Mawndu nduu. Hooreeɓe yottinooɓe sadaka e dunkee'en Sariya e mawɓe lejol ngol ɓee ana ndaara no masinbinira mo, <sup>48</sup> kaa ɓe ndonkii heɓude laawol, sabi yimɓe ɓee ana ngattani haalaaji makko ɗii hakkille faa sanne.

<sup>\*</sup> 19:38 Jabuura 118.26    <sup>†</sup> 19:46 Esaaya 56.7; Yeremiya 7.11



## 20

*Do yamiroore golle Iisaa iwri*

<sup>1</sup> Nannde wootere Iisaa ana janngina yimbe ley daalaare Suudu Dewal Mawndu nduu. E ley no o jannginirta be Kabaaru Lobbo oo nii, mawbe bee e hooreebe yottinoobe sadaka e dunkee'en Sariya ngari e makko, <sup>2</sup> mbii mo: —Yamiroore hende ngollirtaa ko ngollataa koo? Homo yamir maa ngollaa dum?

<sup>3</sup> Iisaa jaabii be, wii:

—Miin duu, huunde wootere tan lamndotoo-mi on. Njaabo-don kam dum:

<sup>4</sup> lootogal batisimaYaayaa ngal, to Laamdo iwri naa to yimbe?

<sup>5</sup> Be ndawridi hakkunde ma66e, be mbii:

—So en mbii to Laamdo, o wiyan: «Ndenoo ko saabii so on ngoondinaali Yaayaa?» <sup>6</sup> Kaa so en mbii «yimbe», jamaa oo wedoto en kaaye, sabi be fuu ebe tayori Yaayaa yo annabaajo.

<sup>7</sup> Non be njaabii be anndaa to lootogal batisima Yaayaa iwri. <sup>8</sup> Iisaa wii be:

—Haya miin duu, mi haalantaa on yamiroore nde ngolliran-mi ko ngollan-mi koo.

*Bannol haala remoo6e bon6e*

<sup>9</sup> Iisaa fuddi haalande yimbe ngol bannol, wii:

—Neddo gooto tuti ngesa peguuje, hasiri nga remoo6e, dawi. O 6ooyi e dawol makko ngol. <sup>10</sup> Nde te6ugol yottinoo, o neli golloowo makko to remoo6e bee too, be ngaddanoya mo ngedu makko e 6i66e peguuje dee. Kaa remoo6e bee pii nelaado oo, mbirfini dum juude teete. <sup>11</sup> O neli e ma66e golloowo goddo, be pii oon duu, be koyini dum, be mbirfini dum juude teete. <sup>12</sup> O neli kasen golloowo tata6o, be mbarmini oon, be ndibbi dum. <sup>13</sup> E oon wakkati, jom ngesa oo wii: «Hono ngadan-mi? Ooho, mi nelan 6iyam gorko korsudo oo, yaama be njaagoo mo!» <sup>14</sup> Kaa nde remoo6e bee njiinoo biddo oo ndee, mbiyondiri hakkunde mum'en: «Oo woni donoowo mo, mbaren mo, keddor-don ngesa ngaa!» <sup>15</sup> Be mbedii mo to caggal ngesa too, be mbari mo. Jooni nee, hono jom ngesa oo waddata e ma66e? <sup>16</sup> O waran, o halka remoo6e bee, o hasira ngesa ngaa wo66e.

Nde yimbe bee nannoo dum ndee, mbii:

—Pati hono majjum laato!

<sup>17</sup> Iisaa yeewi be, wii:

—Ndenoo, kodum woni maanaa ko winndii koo:

«Haayre nde mahoo6e bee tippitii ndee,

kapum laatii haayre burnde fuu teentilaade e maadi ndii?»\*

<sup>18</sup> Neddo fuu caamdo e nden haayre, helan. Neddo fuu mo nde saami e mum, noyoto.

<sup>19</sup> Dunkee'en Sariya e hooreebe yottinoobe sadaka paamii bannol ngol e mum'en fewti. Be njiidiino nanngude mo don e don, kaa be kulii yimbe.

*Haala yobugol lampo*

<sup>20</sup> Dunkee'en Sariya e hooreebe yottinoobe sadaka ngattani Iisaa hakkille, neli horoo6e nanndinkiniibe e moyyu6e, yalla ana ke6a e haala makko laawol, ngada mo e juude goforneer laamiido leydi ndii oo, sara dum. <sup>21</sup> Been lamndii mo:

—Moobbo, miden anndi ko kaalataa koo e ko mbaajoto-daa koo yo goonga, miden anndi a burdintaa yimbe, ada jannginira laawol Laamdo ngol goonga.

\* 20:17 Jabuura 118.22

22 Minen nee, ana dagoo min ndokka kaananke Roma mawdo oo lampo naa dagaaki?

23 Nde wonnoo o faamii hiila ma66e kaa, o wii 6e:

24 —Kollee kam mbuudu cardi! Natal homo e innde homo woni doo?

Be mbii:

—Kaananke Roma.

25 Caggal dum, o wii 6e:

—Ndennoo ndokkee kaananke Roma oo ko jey, ndokkee Laamdo duu ko jey.

26 Be ndonki he6ude laawol e ko mo haalata yeeso yim6e koo, jaabu makko oo haayinii 6e, 6e ndeyyini.

### *Haala immitagol maay6e*

27 Yoga e waalde Saduki'en ngari e Iisaa. Kam6e ngoni fennu6e immital. Be lamndii mo, 6e mbii:

28 —Moobbo, Muusaa yamirii en, so neddo 6amii debbo, maayii, he6aali bid6o, mijum naa mawnum 6amta debbo oo, yalla ana he6ana maaydo oo 6eyngu. 29 Wadiino e 6ettaade rimdaa6e njedd6on. Arano oo 6ami debbo, maayi, he6aali bid6o. 30 Dida6o oo 6amti debbo oo, maayi, 31 tata6o oo jokki hen. Hono nii njedd6on 6ee fuu 6amiri mo, dalaali bid6o. 32 Caggal ma66e 6e fuu, debbo oo duu maayi. 33 Ndennoo, jannde immital, homo e ma66e debbo oo laatotoo jom suudu mum? Sabi 6e njedd6on fuu 6e 6amiino mo.

34 Iisaa jaabii 6e, wii:

—Yim6e oo jamaanu ana 6ama, ana 6amee. 35 Kaa haandinaa6e e ngu-urndam janngo, karnum e immitagol 6ee, 6amataa, 6amataake, 36 sabi 6e mbaawaa maayde kasen. Be laatoto no malaa'ika'en nii, 6e 6i66e Laamdo, sabi 6e immitike e maayde. 37 Kaa ko maay6e immitoto koo, fay Muusaa sappike dum e ley haala wuutuure. Sabi ton o noddiri Joomiraado oo «Laamdo Ibarahiima e Laamdo Isiyaaka e Laamdo Yaakuuba.»† 38 Laamdo yo Laamdo wuur6e, wanaa Laamdo maay6e.‡ Sabi banngal makko yim6e fuu yo wuur6e!

39 Yoga e dunkee'en Sariya mbii:

—Moobbo, a haalii goonga.

40 Caggal dum, 6e cuusaali lamndaade mo fay huunde.

### *Kabaaru Almasiihu e Daawuuda*

41 Iisaa wii 6e:

—Hono 6e mbaawiri wiide Almasiihu yo taanii Daawuuda? 42 Daawuuda e hoore mum wii e ley dewtere mum Jabuura: «Joomiraado wii Joomam: Jooda jnaamo am,

43 faa mi wada nja66aa way6e maa.»§

44 Daawuuda «Joomam» noddirta mo, ndennoo, hono mo laatortoo taanum tan?

### *No Iisaa feliri dunkee'en Sariya*

45 Nde wonnoo yim6e 6ee fuu ana kettindano mo, o wii taalibaa6e makko 6ee:

46 —Ndeentee e dunkee'en Sariya yidu6e yiiloraade saayaaji mawdi e jowteede ley luumooji, foodantoo6e joolle burde teddude e ley cuudi baajordi

† 20:37 Pergu 3.6 ‡ 20:38 Gila e jamaanu Muusaa tawi Ibarahiima e Isiyaaka e Yaakuuba maayii gila ko 6ooyi. Ko Laamdo wii yo Laamdo ma66e koo, holli e6e nguuri. § 20:43 Jabuura 110.1

e ley yanngееji fuu. <sup>47</sup> E6e teeta cuudi rew6e talka'en 6e wor6e mum'en maayi, e6e njuutina duwaawuuji ma66e faa 6e nanndinkinoo e moyyu6e. Kam6e, jukkungo naawngo 6urata jippineede e ma66e.

## 21

### *Haala sadaka burdo moyyude*

<sup>1</sup> Iisaa hunci gite, yii arsukunte'en ana ngada sadakaaji mum'en e keesu sadaka oo. <sup>2</sup> Mo yii debbo misikiino mo gorum maayi, kaɽum duu ana wada hen buudi didi. <sup>3</sup> E ley dum, o wii:

—Mid6o haalana on goonga: oo debbo misikiino, ko o wadi e ley keesu oo koo, 6uri ko 6ee too fuu ngadi hen koo. <sup>4</sup> Sabi 6e fuu, ko bonnantaa 6e huunde tan 6e ngadi hen, kaa kanko debbo oo, ko o hasindini e mum o wadi hen, ko o jogii faa o wuurda koo fuu.

### *Haala taagumansaaji kollooji timmoode aduna*

<sup>5</sup> Won yogaa6e ana kaala haala Suudu Dewal Mawndu nduu, no ndu ɽardiniraa kaaye e kulle cakkaade. Nden Iisaa wii:

<sup>6</sup> —Ko njiyaton koo, wakkati waran nde fay haayre wootere heddataako doo ana fawii dow wonnde, fuu wurjinte.

<sup>7</sup> Be lamndii mo, 6e mbii:

—Moobbo, humpitin min nde dum wadata. Taagumansa homo hollata wadugol kudde dee fuu?

<sup>8</sup> O wii:

—Ndeentee pati on yoyɽe. Heew6e ngardan innde am, mbiya: «Miin woni kanko», «Wakkati oo 6adike». Pati njokkee 6e. <sup>9</sup> So on nanii golowole e murtereeji, pati kulee. Ana tilsi dum wada tafon, kaa dum wanaa timmoode don e don.

<sup>10</sup> O jokki wiide:

—Leɽol ha6an e leɽol, laamu ha6an e laamu, <sup>11</sup> dimmbande leydi mawde e yolbereeeji ngadan, ɽawuuji bondi ngaran e nokkuuje yogaaaje, kulle kul6iniide e taagumansaaji mawdi 6anngan dow kammu. <sup>12</sup> Kaa gila dum fuu dum wadaali, yim6e nanngan on, torra on cara on ley cuudi baajordi, mbede-don e kasu, na6e-don yeeso kaanankoo6e e saro6e saabe am. <sup>13</sup> Dum hokkan on seettanaade kam. <sup>14</sup> Pi6ee anniya e 6erde mon mbaason lanndinanaade no ndanndirton ko'e mon, <sup>15</sup> sabi mi hokkan on waawde haala, mi hokkan on hakkilantaaku ko way6e mon 6ee fuu mbaawaa salaade naa yeddude. <sup>16</sup> Saaraa6e mon e sakiraabe mon e koreeeji mon e gidiraabe mon, kaɽum'en njammootoo on, mbara yoga e mon. <sup>17</sup> Yim6e fuu mbaajan on saabe am, <sup>18</sup> kaa fay leembol ko'e mon majjataa. <sup>19</sup> Muɽal mon ndanndirton yonkiiji mon.

### *No Urusaliima halkirtee e no Bii Neddo oo wartirta*

<sup>20</sup> —Nde njii-don Urusaliima ana filaa konuui fuu, anndee helde mum 6adike. <sup>21</sup> Oon wakkati, 6e dum tawi Yahuudiya fuu, yo ndogu peewa baamle kaaye, 6e dum tawi e ley ngeenndi ndii fuu, yo njaltu e mayri, tawaa6e ladde fuu, pati naattu ngeenndi ndii. <sup>22</sup> Sabi deen jalaade yo jalaade yoftagol, daa ko winndii koo fuu tabita. <sup>23</sup> Bone woodanii haamili'en e muyninoo6e ley deen jalaade! Sabi torraaji mawdi njanan e leydi ndii, jukkungo jippoo e leɽol ngol. <sup>24</sup> Be camminirte kaafaawi, 6e nanngee, 6e na6ee hakkunde heefer6e. Been ndippan e Urusaliima faa nde wakkati mum'en timmi.

<sup>25</sup> Taagumansaaji ngadan e naange e lewru e koode. Kulol wadan e leydi ndii, faa leji dii fuu mbembee saabe dillere geeci e bempeeje mum. <sup>26</sup> Yimbe modoto saabe kulol so miilike albalaawu jippotoodo e aduna oo, sabi fay kulle gonde dow kammu dee ndimmboto. <sup>27</sup> E oon wakkati, Bii Neddo oo yiyete, ana wara e duule, ana warda baawde e teddeengal manngal. <sup>28</sup> Onon, so dum fuddii wadude, ceyo-don, njoonndoro-don soottiteede mon badike.

### *Banndol haala ibbe*

<sup>29</sup> Caggal dum, o haalani be ngol banndol:

—Taykitee ibbe e ledde godde dee fuu. <sup>30</sup> So on njii de mbillitii, odon anndi onon e ko'e mon, ndunngu badike. <sup>31</sup> Hono non, so on njii deen kulle ana ngada, anndee Laamu Laamdo oo badike. <sup>32</sup> Mido haalana on goonga: oo jamaanu timmataa, tawee kudde dee fuu ngadaali. <sup>33</sup> Kammu e leydi timman, kaa haalaaji am dii timmataa abada.

### *Haala jeertanagol gartol Almasiihu*

<sup>34</sup> —Ndeenee ko'e mon pati berde mon metta, so kebbinoro-don yaraawo faa cigiron, so cunlanon aduna, so nannde gartol Almasiihu ndee juhira on <sup>35</sup> no piccal nii. Sabi ende wara dow yimbe aduna fuu. <sup>36</sup> Ndennoo, njeerto-don wakkati fuu, nduwo-don, yalla odon keba dadude e deen kulle gadooje fuu, mbaawon daraade yeeso Bii Neddo oo.

<sup>37</sup> Nalooma, Iisaa ana waajoo ley Suudu Dewal Mawndu nduu, jemma, o yaltan, o waaloya dow waamnde haayre wiyeteende Jaytun. <sup>38</sup> Yimbe fuu ana immoo, ana njaha to Suudu Dewal Mawndu too gila beete kecco faa kettindanoo mo.

## 22

### *No hooreebe ndawriri faa nannga Iisaa*

<sup>1</sup> Wakkati iidi mo buuru yuufinaaka biyeteedo Paska oo badike. <sup>2</sup> Hooreebe yottinoobe sadaka e dunkee'en Sariya bee ana tewta no mbarda Iisaa, kaa ee kula yimbe bee.

<sup>3</sup> Nden Ibiliisa naati e Yahuuda annditirteedo Isikariyota, jeyaado e sappo e didon bee. <sup>4</sup> Yahuuda yehi haaldoyi e hooreebe yottinoobe sadaka e hayboobe Suudu Dewal Mawndu nduu no o wadira Iisaa e juude mum'en. <sup>5</sup> Be ceyii, be podani mo be njeenan mo kaalisi. <sup>6</sup> O jabi, omo fiya dabare no o jammbootoo Iisaa tawa yimbe bee kumpitaaki.

### *Haala lanndinanaade hiraande iidi Paska*

<sup>7</sup> Iidi mo buuru yuufinaaka, nde be mboownoo hirsude jawdi Paska ndee, yottii. <sup>8</sup> Nden Iisaa neli Piyeer e Yuhanna, wii dum'en:

—Njehee lanndinaneen en hiraande iidi Paska faa naamamen.

<sup>9</sup> Be lamndii mo:

—Hoto njid-daa min lanndinoyoo nde?

<sup>10</sup> O wii be:

—Yeewee, so on naatii ngeenndi ndii, on kawran ton e gorko, ana roondii mbulku ndiyam. Njokkee e makko faa e galle do mo naatata doo, <sup>11</sup> mbiyon jom galle oo: «Moobbo wii suudu hondu naamdata e taalibaaabe mum bee hiraande iidi Paska?» <sup>12</sup> O hollan on sooro manngo paraango, ton lanndinanton en dum.

<sup>13</sup> Be njehi, be tawri hono no o wii be nii, be lanndinii hiraande Paska ndee.

*No Iisaa hiirtidorii e taalibaa6e mum hiraande iidi Paska*

<sup>14</sup> Nde wakkati oo yottinoo ndee, o joodii kanko e sappo e didon 6ee. <sup>15</sup> O wii 6e:

—Mido yidi jaamdude e mon sanne hiraande Paska ndee, gila mi torraaka.

<sup>16</sup> Sabi mido wiya on: mi hiirtataako nde kasen faa jaannde nde nde tabiti ley Laamu Laamdo.

<sup>17</sup> O 6ami horde, o yetti Laamdo, o wii:

—Nanngée dum, peccée dum e hakkunde mon <sup>18</sup> sabi mido wiya on: mi yarataa peguujam kasen faa nde Laamu Laamdo waroyi.

<sup>19</sup> Kasen, o 6ami buuru, o yetti Laamdo, o helti, o hokki 6e, o wii:

—Dum yo terde am cakkiraa6e kammari mon, ngadee dum faa miccito-don kam.

<sup>20</sup> Hono non duu, nde 6e tilii hiraande ndee, o 6ami horde peguujam, o hokki 6e, o wii:

—Ndee doo horde woni aadi keyri. Aadi ndii tabintiniraama yiyam am njupportoodam saabe mon. <sup>21</sup> Kaa jammbotoodo kam oo ana jaamda e am e la'al gootal. <sup>22</sup> Waajibi Bii Neddo dalira aduna no fodiranaa nii. Kaa bone woodanii jammbotoodo mo oo!

<sup>23</sup> Hedde e6e lamndondira hakkunde ma66e homo e ma66e gollata oo golle.

*No Iisaa waynorii taalibaa6e mum 6ee*

<sup>24</sup> Nii taalibaa6e 6ee ndarii ana njeddondira hakkunde mum'en homo 6uri teddude. <sup>25</sup> Iisaa wii 6e:

—Kaanankoo6e ana ndonna laamu mum'en dow leji mum'en. Jom'en doole e ma66e 6ee duu ana njidi noddireede sooninkoo6e. <sup>26</sup> Kaa onon, wanaa non dum laatortoo hakkunde mon. Ko kaan-don laataade dee, burdo teddude e mon yo laato hono cukalel, ardiido laato hono golloowo.

<sup>27</sup> Homo 6uri teddude, joodiido faa jaama naa battinoowo jaamdu? Wanaa jaamoowo oo naa? Kaa miin, mido wa'i hakkunde mon no battinoowo jaamdu nii.

<sup>28</sup> Onon ngoni wondube e am e ley ko koro am ittete koo fuu. <sup>29</sup> Kammari dum, miin duu, mi hokkii on laamu no Baabiraado am hokkiri kam laamu nii, <sup>30</sup> faa jaamden, njarden e la'al am ley laamu am, njoodo-don e dow joodorde kaanankoo6e, caron cuudi baaba Israa'ila sappo e didi dii.

<sup>31</sup> Simon, Simon, Ibiliisa jaagike faa sefa on no alkama sedirtee nii. <sup>32</sup> Kaa mi jaaganike ma pati goondinal maa mursee. Aan, so a wartii e am, ngadaa e sakiraa6e maa 6ee semmbe.

<sup>33</sup> Piyeer wii mo:

—Kalfaado, mi lanndinike na6deede e maa kasu e wardeede e maal!

<sup>34</sup> Kaa Iisaa wii:

—Piyeer, mido haalane: fade ndontoori jogginde hannde a wiyan a andaa kam cili tati.

<sup>35</sup> O wii 6e kasen:

—Nde nelunoo-mi on rafi dannga e mbasu e pa6e, won ko naki on naa?

Be mbii:

—Walaa!

<sup>36</sup> O wii 6e:

—Jooni kaa, jogiido dannga 6ama, jogiido mbasu na6ora, mo walaa kaafaawi, sootta saaya mum sooda ngooti. <sup>37</sup> Sabi ana winndii mi hiisodete e bon6e.\* Mido wiya on: ana tilsi dum hewtoo kam. Ko cappanaa-mi koo fuu goondan.

\* 22:37 Esaaya 53.12

<sup>38</sup> Be mbii:

—Kalfaado, kaafaaje dīdī annii!

O wii 6e:

—Heyii!

*No Iisaa jaagorii Laamdo dow waamnde haayre Jaytun*

<sup>39</sup> Iisaa yalti, fa'i waamnde haayre wiyeteende Jaytun no o woowiri nii. Taalibaabe makko 6ee njokki e makko. <sup>40</sup> Nde o yottinoo ndee, o wii 6e:

—Nduwee pati on ceyte.

<sup>41</sup> Caggal dum, o toowtiri 6e ko waarata e wedannde haayre, o diccii, omo duwoo, <sup>42</sup> omo wiya:

—Baaba, so a muuyii, woddinam ndee horde bone. Kaa pati laatoo sago am, laatoo sago maa aan!

<sup>43</sup> Oon wakkati fuu, malaa'ika iwrufo dow kammu 6anngani mo, hokki mo semmbe. <sup>44</sup> O ruubi faa walaa seese, o beydii tekkinde duwaawu makko, nguli makko ana to66a e leydi no to66e yiyam nii. <sup>45</sup> Nde o tilii duwaade ndee, o wirfittii e taalibaabe makko 6ee, o tawi e6e daanii saabe terde baatudē. <sup>46</sup> O wii 6e:

—Kodum daanoto-don? Immee nduwo-don, pati on ceyte!

*No Iisaa nanngiraa*

<sup>47</sup> Omo e haala kaa faa jamaa wari. Biyeteedo Yahuuda, gooto e sappo e didon 6ee, ardii 6e. Yahuuda battitii Iisaa faa buuccoo dum. <sup>48</sup> Iisaa wii mo:

—Yahuuda, buccaango njamborto-daa Bii Neddo oo naa?

<sup>49</sup> Nde wondube e Iisaa 6ee njii ko wadata koo ndee, mbii:

—Kalfaado, min coppa 6e kaafaaje naa?

<sup>50</sup> Non gooto ma66e soppo golloowo Jottinoowo Sadaka Mawdo tayi nowru mum jaamuru. <sup>51</sup> Iisaa jaabii, wii:

—Daldee nii!

O memi nowru kaadime oo, o sellini dum. <sup>52</sup> Iisaa haalani war6e nanngude dum 6ee, maw6e 6ee e hooree6e yottinoo6e sadaka e hayboo6e Suudu Dewal Mawndu 6ee, wii:

—Ko ngardu-don e kaafaaje e cabbi faa nanngon kam hono mi janoowo?

<sup>53</sup> Nannde fuu mido wondunoo e mon ley Suudu Dewal Mawndu nduu, on pawaali e am junngo. Kaa jooni yo wakkati mon, jooni yo wakkati mo nimre laamotoo.

*No Piyeer wadi so yankiri Iisaa*

<sup>54</sup> Be nanngi Iisaa, 6e ngusi dum faa ley galle Jottinoowo Sadaka Mawdo. Piyeer jokkitii mo fali daawre hakkunde ma66e. <sup>55</sup> Yiite hu66anooma hakkunde daalaare galle oo, Piyeer wari jooddii e joodiibe ton 6ee. <sup>56</sup> Kordo gooto yii omo fewti e fooyre ndee, taykitii mo faa gasi, wii:

—Oo duu e makko wondunoo.

<sup>57</sup> Nii Piyeer yeddi mo, wii:

—Banndam debbo, mi anndaa mo fey.

<sup>58</sup> Nde 6ooynoo seeda, goddo yii mo, wii:

—Aan duu e ma66e njeje-daa!

Piyeer wii oon:

—Gido, mi jeyaaka e ma66e!

<sup>59</sup> Faa wadi leer caggal mum, goddo kasen immini haala kaa, wii:

—Tayoral, kanko duu omo wondunoo e makko, sabi o Galilinke.

<sup>60</sup> Piyeer jaabii, wii:

—Gido, mi faamataa ko kaalataa koo!

O tilaaki haalde, faa ndontoori joggini. <sup>61</sup> Nden Iisaa yeecctii, yeewi Piyeer. Non Piyeer miccitii konngol ngol Iisaa haalannoo dum ngol: «Faa ndontoori jogginde hannde, a wiyan a anndaa kam cili tati.» <sup>62</sup> O yalti sella, o darii omo woya faa omo heppiya.

*No maw6e diina cariri Iisaa*

<sup>63</sup> Yim6e nanngu6e Iisaa 6ee ndarii ana njaayra dum, ana piya dum. <sup>64</sup> Be cuddi yeeso makko, e6e lamndoo mo, e6e mbiya:

—Annditin homo fii maa!

<sup>65</sup> Hedde e6e mbiya mo bihiile bonde.

<sup>66</sup> Nde weetunoo ndee, waalde Saahii6e ndee hawriti, dum woni maw6e lejol ngol e hooree6e yottinoo6e sadaka e dunkee'en Sariya. Iisaa waddaa yeeso ma66e. <sup>67</sup> Be mbii dum:

—So aan woni Almasiihu oo, haalan min.

O wii 6e:

—Fay so mi wii on non, on nja6ataa. <sup>68</sup> So mi lamndike on duu, on njaabataako. <sup>69</sup> Kaa gila jooni, Bii Neddo oo joodoyto jaamo Laamdo, Jom Baawde oo.

<sup>70</sup> Be fuu 6e mbii:

—Ndennoo a Bii Laamdo naa?

O wii 6e:

—No mbii-don nii.

<sup>71</sup> Be mbii:

—En kaajaaka seedee hankasen, nde wonnoo o haaldii hunduko makko, en fuu en nanii!

## 23

*No Pilaatu lamndorii Iisaa*

<sup>1</sup> Caggal dum, waalde Saahii6e ndee fuu immii, na6i Iisaa to Pilaatu goforneer oo. <sup>2</sup> Be ndarii e6e ngullanoo mo, e6e mbiya:

—Min tawii oo ana jirkita lejol amen, ana hada dum yo6ude kaananke Roma oo lampo, ana wiya hoore mum yo Almasiihu, dum woni kaananke.

<sup>3</sup> Pilaatu lamndii mo, wii:

—Aan woni kaananke Yahuudiyankoo6e oo naa?

O jaabii, o wii:

—No mbii-daa nii.

<sup>4</sup> Pilaatu ja66itii, wii hooree6e yottinoo6e sadaka e jamaa oo fuu:

—Mi yiyaali e makko daliili fuu ko jukkata mo.

<sup>5</sup> Kaa 6e cattini e haala ma66e faa sanne, e6e mbiya:

—Ko o waajotoo koo ana murtina yim6e ley leydi Yahuudiya fuu, gila Galili to o fuddiri too faa doo.

<sup>6</sup> Nde Pilaatu nanunoo dum ndee, lamndii yalla o Galilinke naa? <sup>7</sup> O faami Iisaa e laamu Hirudus iwata, o neldi dum Hirudus. Sabi e ley den palaade tawi Hirudus ana Urusaliima. <sup>8</sup> Nde Hirudus yii Iisaa ndee, weltii hen sanne, sabi 6ooyii omo yidi yiide dum saabe ko mo nannoo e mum koo. Kasen duu omo yeloo yiide dum ana wada kaayde. <sup>9</sup> O lamndii dum lamndi keewdi, kaa Iisaa jaabaaki fay huunde. <sup>10</sup> Hooree6e yottinoo6e sadaka e dunkee'en Sariya ndarii don, ana ngullanoo mo ko mbaawi fuu. <sup>11</sup> Hirudus duu hoyni mo, jaayri mo, kajum e sordaasi'en mum, 6oorni mo saaya lobba, neltiri mo Pilaatu. <sup>12</sup> Nannde mum Pilaatu e Hirudus laatii gidiraa6e, arannde 6e honnondirnoo6e.

*No Iisaa sariraa yo bareteedo*

13 Pilaatu noddii hooree6e yottinoo6e sadaka e maw6e 6ee e yim6e fuu,  
14 wii dūm'en:

—On ngaddanii kam oo neddo jirkitoowo yim6e. Mi lamndike mo yeeso mon, kaa ko ngullaniri-don mo koo fuu, mi yiyaali hen daliili ko jukkata mo.

15 Hirudus duu yiyaali e makko fay huunde, sabi o neltirii en mo. Anndee, oo gorko wadaali fay huunde ko warata dūm. 16 Ndennoo, mi fiyan mo, mi yoppita mo. [17\*]

18 Be fuu 6e ngullidi daande wootere, 6e mbii:

—War mo, njoppitanaa min Barabas!

19 Barabas nee yo uddiranoodo kasu saabe murtere wadunoonde e ngeendi ndii, e saabe war-hoore. 20 Pilaatu haaldi e ma66e cilol dida6ol dow yidude yoppitinde Iisaa, 21 kaa 6e ndarii e6e ngulla, e6e mbiya:

—Tontu mo! Tontu mo e leggal bardugal!

22 Pilaatu wii 6e tata6ol:

—Kodum o wadi ko boni? Mi yiyaali e makko daliili fuu ko haani warde mo! Ndennoo, mi fiyan mo, mi yoppita mo.

23 Kaa 6e 6eydii wullude gullaali mawdi, e6e mbiya o tontee. Gullaali ma66e dii njaalii Pilaatu, 24 o fellisi wadande 6e ko 6e jaagii koo. 25 O yoppitani 6e mo 6e jaagii yoppitee oo, oon yo uddiranoodo kasu saabe murtere e war-hoore. Kaa Iisaa, o wadi dūm e juude ma66e, faa 6e ngada dūm ko weli 6e.

### *No Iisaa tontiraa dow leggal bardugal*

26 Nde 6e na6ata mo ndee, 6e nanngi gorko Sireenanke biyeteedo Simon, iwru6o ley ladde. Be mbakkini dūm leggal bardugal ngal faa jokka e caggal Iisaa. 27 Yim6e heew6e njokki hen. Rew6e duu ana hakkunde ma66e, ana mboya no dūm foti mettude dūm'en. 28 Iisaa yeecctii rew6e 6ee, wii dūm'en:

—Rew6e Urusaliima, pati mboyyee kam, mboyyee ko'e mon e 6i66e mon!

29 Sabi jalaa6e ngaran nde yim6e mbiyata: «Rew6e rimar6e e deedi di caawaali abada e endi di muyninaali, mbelii hoore!» 30 Nden, yim6e mbiyan baamle kaaye caama dow mum'en, mbiya tule cudda dūm'en. 31 Sabi so 6e ngadii nii gila ca6al ngal keccal, hono laatotoo so ngal yoorii?

32 Be nabidi e Iisaa yim6e didon yanoo6e. Been duu yo waretee6e. 33 Nde 6e njottinoo nokku biyeteedo Laalagal Hoore ndee, 6e tonti mo e leggal bardugal, kanko e yanoo6e didon 6ee, gooto jaamo makko, goddo oo nano makko. 34 O wii:

—Baaba, yaafa 6e sabi 6e anndaa ko 6e ngadata.

Nii 6e pecciri kaddule makko urwa. 35 Yim6e ndarii don ana yeewa. Hooree6e 6ee duu ndarii ana njaayra mo, ana mbiya:

—O biltii wo66e, o bilta hoore makko so o Almasiihu, Cu6aa6o Laamdo oo!

36 Sordaasi'en 6ee duu njaayri mo, ngaddani mo biineegiri, 37 ana mbiya:

—So aan woni kaananke Yahuudiyankoo6e oo, biltu hoore maa!

38 Tawi ana winndii e tiimde hoore makko: OO YO KAAANANKE YAHU-UDIYANKOOBE.

39 Gooto e yanoo6e didon tontidaa6e e makko 6ee ana jinja mo, ana wiya:

—Wanaa aan woni Almasiihu naa? Biltu hoore maa, mbiltaa min minen duu!

40 Kaa goddo oo jahii e oo too, wii:

\* **23:17** E dereeji 6ooydi dii, yoga ana 6eyda aaya 17:Nde wonnoo ana tilsi e Pilaatu iidi Paska fuu yoppitana 6e kasunke gooto.



—A hulataa Laamdo naa? Aan e makko fuu, on potu jukkungo. <sup>41</sup> Enen, en kebii ko kaandu-den, jukkeede men yo goonga jaati, sabi ko ngollu-den tan njobete-den. Kaa kanko, o wadaali fay huunde ko dagaaki.

<sup>42</sup> Caggal dum, o wii:

—Iisaa, miccito-daa kam so a laatitike kaananke.

<sup>43</sup> Iisaa wii mo:

—Midó haalane goonga: hannde jaati a wondoyan e am ley alijenne.

### *Haala maayde Iisaa*

<sup>44</sup> Wakkati hakkunde naange, nimre wadi e leydi ndii fuu faa wakkati yamnde tati kiikiide, <sup>45</sup> naange ni66i, heedoode faliinde ley Suudu Dewal Mawndu ndee seekii, laatii taye didi. <sup>46</sup> Iisaa wulli wullaango manngo, wii:

—Baaba, mi tummbii yonki am kii e junngo maa.

O haali dum tan, o dali aduna. <sup>47</sup> Nde hooreejo sordaasi'en oo yii ko wadi koo ndee, yetti Laamdo, wii:

—So goonga nii, oo neddo yo poocitiido!

<sup>48</sup> Jamaa garnoodo yeewde oo fuu, nde yiinoo ko wadi koo ndee, wirfitii terde mum ana mbaati. <sup>49</sup> Kaa anndu6e mo 6ee fuu, ndarii to toowti ana yeewa. Rew6e jokkunoo6e e makko gila leydi Galili 6ee ana e ma66e.

### *No tew Iisaa wadira e yanaande*

<sup>50-51</sup> Gorko gooto ana jeyaa e waalde Saahii6e ndee, ana wiyee Yuusufu. Omo iwa Arimatiya, ngootiri e geelle leydi Yahuudiya. O gorko moyyo, poocitiido, omo doomunoo banngugol Laamu Laamdo oo. O tawdaaka e waalde Saahii6e ndee haala e golle. <sup>52</sup> O yehi to Pilaatu, o ndaardi dum tew Iisaa, <sup>53</sup> o jippini dum legal bardugal ngal, o fiili dum e kasanke, o watti dum e yanaande asaande ley haayre, do fay gooto meedaali wateede. <sup>54</sup> Dum hawri e jannde lanndinal tawi jalaande fowteteende 6adike fuddude.

<sup>55</sup> Rew6e wondunoo6e e Iisaa gila Galili 6ee njokki e Yuusufu, njii yanaande ndee e no o wattiraa ley mayre, <sup>56</sup> kooti, moyyinoyi nebameeji uurooji.

Caggal dum, 6e powti jalaande fowteteende no yamiroore ndee wiiri nii.

## 24

### *No Iisaa immintiniraa*

<sup>1</sup> Beetee law jannde alan, 6e pahi to yanaande too, tawi 6e na6orii nebameeji uurooji di 6e moyyinoo dii. <sup>2</sup> Be tawi haayre ndee tallitaama, ittaama e damal yanaande ndee, <sup>3</sup> kaa nde 6e naatunoo ndee, 6e tawaali ton tew Iisaa, Moobbo oo. <sup>4</sup> E ley no hakkille ma66e jirkitorii nii, wor6e didon ndarii yeeso ma66e, ana 6oornii kaddule jalbooje. <sup>5</sup> Nii kulul nanngi 6e, 6e tuggi tiide ma66e e leydi. Oon wakkati wor6e 6ee mbii 6e:

—Ko saabii so odon tewta guurdo hakkunde maay6e? <sup>6</sup> O walaa doo, o immitike. Miccitee ko o haalannoo on leydi Galili koo <sup>7</sup> nde o wii: «Ana tilsi Bii Neddo oo wadee e juude luuttoo6e, tontee e legal bardugal, immitoo jannde tatabere.»

<sup>8</sup> Nii 6e miccittii haala Iisaa kaa. <sup>9</sup> Be iwi to yanaande too, 6e mbirfitii 6e kaalanoyi dum sappo e go'o 6ee e wob6e 6ee fuu. <sup>10</sup> Been rew6e ngonii: Mariyama no Magdala e Yowanna e Mariyama inna Yaakuuba. Kam6e e rew6e wondunoo6e e ma66e 6ee kaalani dum nelaa6e 6ee. <sup>11</sup> Nelaa6e 6ee njogorii haala ma66e kaa yo meere, calii goondinde 6e, <sup>12</sup> kaa Piyeer immii,

dogani yanaande ndee. Nde o yuurninoo ndee, kasanke oo tan o yii. Caggal d̄um, o hooti galle ma66e, o bemmbaado saabe ko wadi koo.

*No Iisaa banngirani taalibaa6e mum didon dow laawol Emmayus*

<sup>13</sup> E oon jalooma jaati, didon e taalibaa6e 6ee nanngi laawol wuro wiyeteengo Emmayus. Hakkunde ngoon wuro e Urusaliima ana waara e kilooji sappo e go'o. <sup>14</sup> E6e ngaajodoo ko wadi koo fuu. <sup>15</sup> E ley gaajaate ma66e dee e6e ndokkondira hakkillaaji, nii Iisaa e hoore mum hewtii 6e, waddi e ma66e jaadal. <sup>16</sup> Kaa heedoode wadaa e gite ma66e pati 6e anndita mo. <sup>17</sup> O wii 6e:

—Kodum ngaajoto-don e laawol mon ngol?

Non 6e ndarii, terde ma66e mbaati. <sup>18</sup> Gooto e ma66e biyeteedo Kiliyopas jaabii mo, wii:

—Aan tan gooto woni kodo ley Urusaliima mo anndaa ko wadi e ley jalaade dee koo naa?

<sup>19</sup> O wii 6e:

—Kodum?

Be mbii mo:

—Ko wadi e Iisaa Nasaraatunke oo koo. O annabaajo, jom baawde ley haala makko e golle makko yeeso Laamdo e yim6e fuu. <sup>20</sup> Kaa hooree6e yottinoobe sadaka e maw6e men ngadi mo e juude laamu yalla omo jukkee jukkungo maayde, tonti mo e leggal bardugal. <sup>21</sup> Miden njikkunoo kanko soottitotoo Israa'iila. Hannde woni jalooma tata6o ko dum wadi. <sup>22</sup> Kasen, yoga e rew6e amen kaaynii min. Be njehi to yanaande too beete law, <sup>23</sup> 6e tawaali ton tew makko, 6e ngarti, 6e mbii malaa'ika'en bannganii 6e, mbii omo wuuri. <sup>24</sup> Caggal d̄um, yoga e wondi6e amen njaabe to yanaande too 6ee, tawri no rew6e 6ee mbiiri nii, kaa kanko e hoore makko, 6e njiyaali mo.

<sup>25</sup> Oon wakkati Iisaa wii 6e:

—Hey onon famar6e hakkille! Booyii on ngoondinaali haala annabaa6e!

<sup>26</sup> Wanaa ana tilsi Almasiihu torree, naata e teddungal mum naa?

<sup>27</sup> Nden o fammini 6e ko Binndi d̄ii fuu kaali haala makko, gila e Tawreeta Muusaa faa e dewte annabaa6e 6ee.

<sup>28</sup> Nde 6e paandii wuro ngo 6e immanii ngoo ndee, Iisaa wadi hono o anniyiido bettaade nii. <sup>29</sup> Nii 6e jaagii mo, 6e mbii:

—Heddoda e amen, sabi hiirii, jemma warii.

O jokki e ma66e, o jippanii 6e. <sup>30</sup> Nde 6e njoodinoo e6e jaama ndee, o 6ami buuru, o yetti Laamdo, o helti buuru oo, o hokki 6e. <sup>31</sup> Non gite ma66e peerti, 6e annditi mo. Don e don o iwi e gite ma66e. <sup>32</sup> Gooto fuu darii ana wiya goddo:

—Nde o haaldata e men e laawol ngol omo fammina en Binndi d̄ii ndee, wanaa berde men guubii naa?

<sup>33</sup> Don e don, 6e immii 6e mbirfittii Urusaliima, 6e tawtoyi ton sappo e go'o 6ee e wondii6e mum'en ana kawriti. <sup>34</sup> Been mbii:

—Goonga, Kalfaado men Iisaa wuurtii, o bannganii Simon.

<sup>35</sup> Didon 6ee duu njantanii 6e ko wadunoo e laawol mum'en, e no annditiri mo nde o helti buuru ndee.

*No Iisaa banngirani taalibaa6e mum sappo e go'o 6ee*

<sup>36</sup> Be tilaaki haalde, faa Iisaa e hoore mum darii hakkunde ma66e, wii 6e:

—Onon e jam!

<sup>37</sup> Be kuli, 6e demyii, 6e miili ko 6e njii koo yo mbeelu. <sup>38</sup> Non o wii 6e:

—Ko hulɓini on? Ko saabii so oɗon miila dii miilooji e berɗe mon? <sup>39</sup>Yeewee juude am e koyɗe am, dum miin jaati. Memee kam, yeewon. Sabi mbeelu walaa tew, walaa gi'e no am nii.

<sup>40</sup>Nde o haalata dum ndee, o holli ɓe juude makko e koyɗe makko. <sup>41</sup>Nde wonnoo ɓe ndonkii goondinde saabe seyo e kaayɗe, o wii ɓe:

—Oɗon njogii ɗoo ko jaametee naa?

<sup>42</sup>Be ngaddani mo tayre liingu cahaado, <sup>43</sup>o nanngi nde, o jaami yeeso maɓɓe.

<sup>44</sup>Caggal dum, o wii ɓe:

—Ko Tawreeta Muusaa e dewte annabaaɓe e Jabuura cappii e am koo fuu, ana tilsi dum goonda. Dum jaati woni ko kaalannoo-mi on nde ngondunoo-mi e mon ndee.

<sup>45</sup>Oon wakkati, o udditi hakkillaaji maɓɓe, yalla eɓe paama Binndi dii. <sup>46</sup>O wii ɓe:

—Ana winndii Almasiihu oo torrete faa maaya, immitoto hakkunde maayɓe jalooma tataɓo. <sup>47</sup>Ana winndii kasen: saabe makko leɓi dii fuu ooynante faa tuuba, keɓa yaafaamuya luutti. Dum ana fudɗa gila Urusaliima.

<sup>48</sup>Onon ngoni seettotooɓe kulle dee! <sup>49</sup>Miin, mi neldan on ko Baabiraado am fodi koo fuu. Kaa keddee e ngalluure ndee, faa nde baawɗe gonɗe dow dee njippii e mon fuu.

*No Iisaa njabbiraa dow kammu*

<sup>50</sup>Iisaa naɓi ɓe faa hedde Baytaniya, hunci juude, duwanii ɓe. <sup>51</sup>Do o duwantoo ɓe ɗoo, o seerti e maɓɓe, o njabbinaa dow kammu. <sup>52</sup>Be cujidani mo, caggal dum, ɓe mbirfodii Urusaliima e seyo manngo. <sup>53</sup>Wakkati fuu eɓe tawee ley Suudu Dewal Mawndu nduu, eɓe njetta Laamɗo.

## Linjiila Iisaa Ngedu Yuhanna

### *No Konngol Laamdo laatorii neddo*

<sup>1</sup> E puddoode biyeteedo Konngol ana woodi. Biyeteedo Konngol oo ana wondi e Laamdo, o Laamdo. <sup>2</sup> Omo wondi e Laamdo gila puddoode. <sup>3</sup> E makko Laamdo tagiri huunde fuu. Fay huunde e ko woodi koo, tagaaka so wanaa e makko. <sup>4</sup> E makko nguurndam woni, dam nguurndam laatanii yimbe fooyre. <sup>5</sup> Fooyre ndee ana yaayna ley nimre. Nimre ndee waawaa jifude nde.

<sup>6</sup> Wadiino e wakkati, Laamdo nelii neddo biyeteedo Yaayaa. <sup>7</sup> O seedee gardo haalde haala ndeen fooyre oo, yalla yimbe fuu ana ngoondinira saabe haala makko kaa. <sup>8</sup> Wanaa kanko woni fooyre ndee, kaa o seedee gardo haalde haala mayre oo. <sup>9</sup> Kayre woni fooyre goongaraare warnde ley aduna faa yaaynana yimbe fuu.

<sup>10</sup> Biyeteedo Konngol oo ana ley aduna, kanko woni tagudo aduna oo, kaa aduna oo annditaali mo. <sup>11</sup> Mo warii e lejol makko, kaa lejol makko ja66aaki mo. <sup>12</sup> Kaa ja66iibe mo so ngoondini mo 6ee, o hokkii dum'en baawde laataade 6i66e Laamdo. <sup>13</sup> Been yo rimraabe ko wanaa muuyo terde, ko wanaa muuyo gorko, kambe 6e rimraabe iwruude to Laamdo.

<sup>14</sup> Konngol ngol laatii neddo. Oon hodidi e meeden, o keewdo hinnee e goonga. Min njii teddeengal makko, teddeengal hono ngal Bajjo hebata e baam mum.

<sup>15</sup> Yaayaa seettanike mo, eewonii, wii:

—Kanko woni mo kaalannoo-mi on haala mum oo, mbii-mi: «Caggal am ardiido kam waran, sabi omo woodi gila mi tagaaka.»

<sup>16</sup> No hinnee makko foti heewde, en fuu en ke6ii, hinnee dow hinnee.

<sup>17</sup> Saabe Muusaa kefir-dén Sariya, kaa hinnee e goonga saabe Iisaa Almasihu he6iraa. <sup>18</sup> Fay gooto yiyaali Laamdo abada. Jonnoo, Biddo bajjo gondudo e Baabiraado oo, kajum humpiti en mo.

### *No Yaayaa waaqorii*

<sup>19</sup> Yahuudiyankoo6e Urusaliima neli Lewinkoo6e\* e yottinoo6e sadaka to Yaayaa lamndoo kajum woni homo. <sup>20</sup> O jaabii 6e ko selli:

—Miin, mi wanaa Almasiihu.

<sup>21</sup> Be lamndii mo, 6e mbii:

—Aan, a homo? A annabi Iliyaasa naa?

O wii:

—Mi wanaa.

Be mbii:

—A Annabaajo oo naa?

O jaabii:

—Mi wanaa!

<sup>22</sup> Be mbii mo:

—A homo ndennoo? Haalan min ko min kaaltanoya nelu6e min 6ee. Ko njogori-daa hoore maa?

<sup>23</sup> O jaabii, o wii:

---

\* **1:19** Yimbe lejol Lewi ngonnoo humaniibe golle dewal Laamdo gila e jamaanu Muusaa.

—Miin woni «ooynotoодо ley ladde jeereende so ana wiya: moyyintinee laawol Joomiraado»,† hono no annabi Esaaya wiiri nii.

<sup>24</sup> Nelaabe 6ee to Farisa'en iwri. <sup>25</sup> Be lamndii mo:

—Ko saabii so ada loota yimbe lootogal batisima, tawi a wanaa Almasihu a wanaa Iliyaasa a wanaa Annabaajo oo?

<sup>26</sup> Yaayaa jaabii 6e, wii:

—Miin, mido batisira ndiyam, kaa won dariido hakkunde mon mo on anndaa. <sup>27</sup> Kanko, o waran caggal am. Miin, mi fotaa fay e humtude foggi pade makko.

<sup>28</sup> Dum wadii Baytaniya ootoo bannge maayo Urdun, do Yaayaa batisannoo doo.

<sup>29</sup> Janngo mum, Yaayaa yii Iisaa ana wara e mum, wii:

—Anni, njawdiri Laamdo ndoondotoondi luutti aduna. <sup>30</sup> Dum woni ko mbiinoo-mi e makko: «Neddo waran caggal am, ardiido kam, sabi omo woodi gila mi tagaaka.» <sup>31</sup> Miin, mi anndaano mo, kaa mi warii mido batisira ndiyam yalla omo bannkana Israa'ilankoo6e.

<sup>32</sup> Yaayaa seettii, wii:

—Mi yii Ruuhu hono wuugaandu ana jippoo iwde dow kammu faa hodi dow makko. <sup>33</sup> Miin, mi anndaano mo. Kaa neldo kam mi batisira ndiyam oo, karam wii kam: «Oon mo njiyataa Ruuhu ana jippoo dow mum oo, karam woni batisiroowo Ruuhu Ceniido.» <sup>34</sup> Miin, mi yii, mi seettike kanko woni Bii Laamdo.

*No Iisaa suborii taalibaabe mum arandee6e*

<sup>35</sup> Janngo mum kasen Yaayaa ana dardii e taalibaa6e mum didon. <sup>36</sup> O yii Iisaa ana bettoo, o wii:

—Anni, njawdiri Laamdo!

<sup>37</sup> Taalibaa6e didon 6ee nani ko o haali koo, njokkitii Iisaa. <sup>38</sup> Iisaa yeecitii, yii e6e njokki e mum, wii 6e:

—Kodum tewtaton?

Be njaabii, 6e mbii:

—*Rabbii* (dum woni «Moobbo»), hoto njoodoto-daa?

<sup>39</sup> O wii 6e:

—Ngaree yeewee!

Nden 6e ngari, 6e njii do o joodotoo doo. Be ngondi e makko oon jalooma. Dum wadii wakkati kiikiide.

<sup>40</sup> Andire mijii Simon Piyeer oo yo gooto e didon nan6e haala Yaayaa so njokkitii Iisaa 6ee. <sup>41</sup> Mawniiko Simon o adii fuu hawrude, o wii dum:

—Min njii Almasihu.

(Dum woni Cubaado.)

<sup>42</sup> O nabi dum to Iisaa. Iisaa yeewi Simon, wii dum:

—Aan, Simon bii Yuhanna mbiyete-daa, caggal jooni a innditirte Kefas.

(Kefas e Piyeer fuu gootum. Maanaa majjum yo haayre.)

<sup>43</sup> Janngo mum, Iisaa anniyii yaade Galili. O hawri e Filipa, o wii dum:

—Jokkam!

<sup>44</sup> Filipa ana jeyaa Baytisayda, ngalluure nde Andire e Piyeer fuu njeyaa e mum ndee. <sup>45</sup> Filipa hawri e Natanayel, wii dum:

—Min tawii mo haala mum winndaa ley Tawreeta Muusaa e ley dewte annabaa6e oo. O Iisaa Nasaraatunke bii Yuusufu oo.

<sup>46</sup> Natanayel wii mo:

—Ko moyyi ana waawi iwrude Nasaraatu naa?

† 1:23 Esaaya 40.3

Filipa jaabii mo:

—War yeew!

<sup>47</sup> Iisaa yii Natanayel ana feewi dum, wii:

—Oo yo Israa'iilanke jaati, kutee fuu walaa e makko.

<sup>48</sup> Natanayel wii mo:

—Hoto anndu-daa kam?

Iisaa jaabii mo, wii:

—Mi yii ma ley ibbi gila Filipa noddaali ma.

<sup>49</sup> Natanayel jaabii, wii:

—Moobbo, a Bii Laamdo, a kaananke Israa'iila.

<sup>50</sup> Iisaa jaabii mo, wii:

—Saabe mi wii mi yii ma ley ibbi koo tan ngoondinir-daa naa? A yiyan ko furi dum haaynaade.

<sup>51</sup> Nden o wii Natanayel:

—Mido haalana on goonga: on njiyan kammu ana udditoo, on njiyan malaa'ika'en Laamdo ana njabba ana njippoo dow Bii Neddo.

## 2

### *No Iisaa wadiri haaynde ley kuurtungu*

<sup>1</sup> Balde didi caggal mum, kuurtungu wadi ley ngalluure wiyeteende Kaana ley leydi Galili. Inna Iisaa ana tawanoo ton. <sup>2</sup> Iisaa e taalibaa6e mum duu noddaama ngara kawra e kuurtungu oo. <sup>3</sup> Nde peguujam ma66e timmunoo ndee, inna Iisaa wii:

—Be ngalaa peguujam.

<sup>4</sup> Iisaa jaabii mo, wii:

—Tama aan haalanta kam ko kaan-mi wadude? Wakkati am yonaali tafon.

<sup>5</sup> Inniiko wii golloo6e 6ee:

—Ko o yamiri on fuu, ngadon.

<sup>6</sup> Kaaye jeegom, asiide faa laatii hono pakaaje mawde do Yahuudiyankoo6e lootetee faa la66inee banngal diina, ana ngonnoo ton. Honde fuu ana naanna bulki sappo ndiyam. <sup>7</sup> Iisaa wii 6e:

—Kebbinee pakaaje dee ndiyam.

Be kebbini de faa de keewi. <sup>8</sup> O wii 6e:

—Jooni kaa, nedee nabanee hooreejo kuurtungu oo.

Be na6i. <sup>9</sup> Nde hooreejo oo meedunoo ndiyam mbaylitaadam peguujam dam ndee, annditaali to dam ittaa. Kaa golloo6e nedu6e ndiyam dam 6ee ana anndi. O noddi jommbaajo gorko oo, <sup>10</sup> o wii dum:

—Yim6e fuu peguujam mbeldam mboowi adoraade. Nde yim6e cigirii, nden dam wela6a dam yaretee. Kaa aan, ada resi mbeldam dam faa jooni.

<sup>11</sup> Nii Iisaa golliri haaynde mum aranndeere ley ngalluure Kaana ley leydi Galili. O banngini baawde makko, taalibaa6e makko 6ee ngoondini mo.

<sup>12</sup> Caggal dum, o iwi Kaana, o yehi ngalluure wiyeteende Kafarnahum, kanko e inniiko e mijiraa6e makko e taalibaa6e makko. Be pa66i ton balde seeda.

### *No Iisaa ribbiri jaagotoo6e ley Suudu Dewal Mawndu*

<sup>13</sup> Nde iidi Yahuudiyankoo6e biyeteedo Paska oo 6adinoo ndee, Iisaa njabbiti Urusaliima. <sup>14</sup> O tawi ley daalaare Suudu Dewal Mawndu nduu julaa6e ga'i e baali e soottoo6e buugaaji, kanum e wecco6e kaalisi ana njoodii. <sup>15</sup> O nanngi boggi, o sowi, o ribbi 6e fuu 6e njalta Suudu Dewal Mawndu nduu, kam6e e ga'i ma66e e baali ma66e. O sankiti kaalisi wecco6e, o hippi taabe ma66e.

<sup>16</sup> O wii soottoo6e buugaaji 6ee:

—Ittee dum doo, pati ngadee suudu Baabiraaḍo am nduu soottirdu.

<sup>17</sup> Taalibaaḍe makko ḅee miccitii ko Binndi ḍii mbii koo:

«Jilli suudu maa laatanike kam sugulla.»\*

<sup>18</sup> Nden hooreeḅe Yahuudiyankooḅe mbii mo:

—Haayne honde kollataa min aḍa foti waḍude ko ngad-ḍaa koo?

<sup>19</sup> Iisaa jaabii ḅe, wii:

—Ngurjinee Suudu Dewal nduu. So on ngurjinii ndu, on njiyan miḍo mahitoo ndu ley balde tati.

<sup>20</sup> Be njaabii mo:

—Nduu suudu mahiraama duuḅi capande nay e jeegom. Dee aan, a mahitoto ndu ley balde tati naa?

<sup>21</sup> Kaa Iisaa hoore mum wappiri suudu nduu. <sup>22</sup> Nde Iisaa wuurtunoo ndee, taalibaaḍe mum ḅee miccitii o haaliino dum. Be ngoondini ko Binndi ḍii mbii koo e konngol o haalnoo ngol.

<sup>23</sup> Nde Iisaa faḅḅoynoo Urusaliima iidi Paska ndee, heewḅe ngoondini mo saabe njii kaayḍe ḍe o waḍi ḍee. <sup>24</sup> Kaa Iisaa hoolaaki ḅe faa hokkita ḅe hoore mum, sabi omo anndi ḅe fuu. <sup>25</sup> O hasindinaa fay gooto seettanoo mo ko woni e yimḅe, nde wonnoo omo humpitii ko woni e ḅii-aadama.

### 3

#### *No Iisaa haaldiri e Nikodemus*

<sup>1</sup> Won gorko Farisanke biyeteḍo Nikodemus, gooto e hooreeḅe Yahuudiyankooḅe. <sup>2</sup> Oon gorko yehi to Iisaa jemma, wii dum:

—Moobbo, miḍen anndi a jannginoowo iwruḍo to Laamḍo, sabi fay gooto waawaa waḍude hono kaayḍe ḍe ngadataa ḍee so Laamḍo wondaa e mum.

<sup>3</sup> Iisaa jaabii mo, wii:

—Miḍo haalane goonga: fay gooto waawaa yiide Laamu Laamḍo tawee rimtaaka kasen.

<sup>4</sup> Nikodemus wii mo:

—Hono mawḍo waawiri rirtireede? Omo waawi naattude e reedu inniiko, o rimtee kasen naa?

<sup>5</sup> Iisaa jaabii:

—Miḍo haalane goonga: so wanaa neḍḍo rirtiree ndiyam e Ruuhu so heḅa naattude e Laamu Laamḍo. <sup>6</sup> Ko ḅii-aadama rimata koo yo ḅii-aadama. Ko Ruuhu oo rimata koo yo ruuhu. <sup>7</sup> Pati dum haayne saabe mi wii ma kinaa ndimte-ḍon kasen. <sup>8</sup> Henndu ana wibba ḍo muuyiri fuu. Aḍa nana dillere mayru, kaa a anndaa to ndu iwri, a anndaa to ndu yahata. Hono non oon dimraaḍo Ruuhu oo worri.

<sup>9</sup> Nikodemus wii mo:

—Hono hen dum laatortoo?

<sup>10</sup> Iisaa jaabii mo:

—Aan, jannginoowo ley Israa'iila oo fuu, a anndaa dum naa? <sup>11</sup> Miḍo haalane goonga: minen, ko min anndi min kaalata, ko min njii min ceettoo, kaa onon, on njaḅataa seedaaku amen. <sup>12</sup> On ngoondinaali nde kaalanmi on haala kulle leydi ndee. Hono ngoondinirton so mi haalanii on haala kulle dow kammu? <sup>13</sup> Fay gooto ḅabbaali dow kammu, so wanaa oon iwruḍo dow kammu oo, dum woni Bii Neḍḍo. <sup>14</sup> Hono no Muusaa toowniri mboddi jakawalle ley ladde jeereende nii, so wanaa Bii Neḍḍo oo duu toowniree hono non, <sup>15</sup> yalla goondindoo mo fuu ana heḅa nguurndam nduumiidam.

\* 2:17 Jabuura 69.10

<sup>16</sup> Sabi Laamdo ɓamii ana yida aduna oo faa hokkitiri Biyum bajjo, yalla goondindo Bajjo oo fuu ana waasa naatude yiite, heɓa nguurndam nduuniidam.

<sup>17</sup> Laamdo neliraali Biyum oo e aduna faa Biyum oo saroo aduna oo. Ko mo neliraa dee, faa aduna oo hisira saabe makko. <sup>18</sup> Goondindo mo fuu sarataake. Mo goondinaali fuu tilike sareede, sabi goondinaali Bii Laamdo bajjo oo.

<sup>19</sup> Sariya oo annii: fooyre warii e aduna, kaa yimbe, nimre cubii dow fooyre saabe gollleeji mum'en bondi. <sup>20</sup> Bondo tagu yidaa fooyre, warataa e mayre, hulde pati gollleeji mum bondi ɓanngu. <sup>21</sup> Kaa goongirante waran e fooyre yalla gollleeji di wadiri saabe Laamdo dii ana ɓannga.

### *No Yaayaa seettorii kabaaru Iisaa*

<sup>22</sup> Caggal mum, Iisaa yaadi e taalibaabe mum leydi Yahuudiya. O faɓɓiide e maɓɓe ton, omo loota yimbe lootogal batisima. <sup>23</sup> Yaayaa duu ana batisa to Aynon too bannge Salim, sabi cewle ana keewi ton. Yimbe ana ngara ana mbatisee. <sup>24</sup> Tawi Yaayaa nannganooka tafon.

<sup>25</sup> Taalibaabe Yaayaa ɓee njeddondiri e Yahuudiyanke haala laaɓal. <sup>26</sup> Be njehi to Yaayaa, ɓe mbii dum:

—Moobbo, gorko gondunoodo e maa ootoo bannge maayo Urdun mo ceettani-daa oo, kanko duu omo batisa, yimbe fuu ana njaha to makko.

<sup>27</sup> Yaayaa jaabii ɓe, wii:

—Neddo waawaa heɓude fay huunde so wanaa ko Laamdo hokki dum.

<sup>28</sup> Onon e ko'e mon, on seedee'en am mi wii mi wanaa Almasiihu, kaa mido adii mo neleede. <sup>29</sup> Gaddanaado jommbaajo debbo, kaɓum woni jommbaajo gorko. Dammbidiido gorko oo ana darii, ana hettindii. So o nanii daande jommbaajo gorko oo, o seyoto sanne. Nii seyo am ngoo hiɓɓiri. <sup>30</sup> So wanaa kanko o toowa, so miin mi leyda.

<sup>31</sup> Oon iwruɗo dow, kaɓum tiimti yimbe fuu. Iwɗo e leydi yo leydinke. Haalaaji mum duu yo haalaaji leydinkooji. Oon iwruɗo dow kammu, kaɓum tiimti yimbe fuu. <sup>32</sup> Ko o yii e ko o nani o seettotoo, kaa fay gooto jaɓataa seedaaku makko. <sup>33</sup> Oon jaɓuɗo seedaaku makko, sellinii Laamdo yo goongirante. <sup>34</sup> Oon mo Laamdo neli, ko Laamdo haali haaltata, sabi Laamdo hokkii mo Ruuhu mo walaa do haadi. <sup>35</sup> Baabiraado oo ana yidi Biddo oo faa wadi huunde fuu e junngo makko. <sup>36</sup> Goondindo Biddo oo, heɓii nguurndam nduuniidam. Mo goondinaali Biddo oo, heɓataa dam, tikkere Laamdo duu ana woodani dum.

## 4

### *No Iisaa haaldiri e Samariyanke debbo*

<sup>1</sup> Farisa'en nanii wiyaama Iisaa ana loota lootogal batisima ana heɓa taalibaabe faa ɓuri Yaayaa. <sup>2</sup> Tawi Iisaa e hoore mum kaa batisaali fay gooto. Taalibaabe makko ɓee tan mbatisannoo. <sup>3</sup> Nde Iisaa nannoo ko haalanoo e mum koo ndee, iwi leydi Yahuudiya, wirfitii leydi Galili, <sup>4</sup> kinaa o seeka leydi Samariya. <sup>5</sup> O wari e ngalluure Samariya wiyeteende Sikar bannge ngesa nga Yaakuuba hokkunoo ɓiyum Yuusufu nгаа. <sup>6</sup> Don ɓunndu Yaakuuba nduu woni. Iisaa joodii daande ɓunndu nduu faa ɗoottinoo. Dum forrii e wakkati hakkunde naange. <sup>7</sup> Samariyanke debbo wari yoogude. Iisaa wii mo:

—Hokkam ndiyam, mi yara no!



<sup>8</sup> Tawi taalibaaፎe makko ፎee njehii to ngeenndi too soodoyde jaamdu.

<sup>9</sup> Debbo oo wii Iisaa:

—Haa! Hono aan, Yahuudiyanke, jaagorto-daa kam miin, Samariyanke, ndiyam njaraa?

(Sabi Yahuudiyankooፎe e Samariyankooፎe yo harmondirፎe.)

<sup>10</sup> Iisaa jaabii mo:

—Sinndo ada anndunoo no dokke Laamፎo poti e oon biido ma ndokkaa dum ndiyam yara oo, a jaagotono mo, o hokke ndiyam nguurndam njaraa.

<sup>11</sup> Debbo oo wii mo:

—Gido, a walaa cafirgal. Bunndu nduu ana luggidi. Hoto kebataa dam ndiyam nguurndam? <sup>12</sup> Aan, ada buri njaatigi amen Yaakuuba dokkudo min bunndu nduu oo teddude naa? Kanko e ፎiፎፎe makko e daabaaji makko fuu, ፎe njarii e mayru.

<sup>13</sup> Iisaa jaabii mo:

—Neddo fuu jardo dam ndiyam domdan kasen, <sup>14</sup> kaa jardo ndiyam dam ndokkan-mi dum dam fuu, domdataa abada. Sabi ndiyam ndokkan-mi dum dam laatanto dum ndiyam iloojam nguurnoojam dum nguurndam nduumiidam.

<sup>15</sup> Debbo oo wii:

—Gido, hokkam dam ndiyam pati mi domda kasen, sako mi warta yoogude doo kasen.

<sup>16</sup> Iisaa wii mo:

—Yaa noddoy jom suudu maa, ngardon!

<sup>17</sup> Debbo oo jaabii mo:

—Mi walaa jom suudu.

Iisaa wii mo:

—A haalii goonga ko mbii-daa a walaa jom suudu koo. <sup>18</sup> A ፎamanooma worፎe njoyon. Gorke ngondu-daa jooni oo duu, wanaa jom suudu maa. A haalii goonga.

<sup>19</sup> Debbo oo wii mo:

—Moobbo, laaፎanii kam a annabaajo. <sup>20</sup> Njaatiraaፎe amen ndewii Laamፎo e ndee waamnde haayre, kaa onon Yahuudiyankooፎe, odon mbiya to Urusaliima too Laamፎo haani reweede.

<sup>21</sup> Iisaa wii mo:

—Banndam debbo, jaፎu ko kaalanan-maa-mi koo: wakkati waran, mo ndewatan Baabiraado tawee wanaa e ndee waamnde haayre, wanaa e Urusaliima. <sup>22</sup> Onon Samariyankooፎe, odon ndewa ko on anndaa, kaa minen Yahuudiyankooፎe, ko min anndi min ndewata, sabi kisindam to Yahuudiyankooፎe iwrata. <sup>23</sup> Wakkati ana wara, mo yottike jaati, nde rewirooፎe Laamፎo goonga ፎee ndewirta dum Ruuhu e goonga. Hono ፎee rewooፎe Baabiraado ndaarti. <sup>24</sup> Laamፎo yo Ruuhu. Rewooፎe mo ፎee kinaa ndewira mo ruuhu e goonga.

<sup>25</sup> Debbo oo wii:

—Mido anndi Cuፎaado biyeteedo Almasiihu oo yo garoowo. Nde o warii, o humpitan min kulle fuu.

<sup>26</sup> Iisaa wii mo:

—Miin kaaldoowo e maa oo woni kanko.

### *No Samariyankooፎe heewፎe ngoonፎiniri Iisaa*

<sup>27</sup> E dow dum taalibaaፎe makko ፎee njottii. Ko Iisaa haaldata e debbo oo koo haaynii ፎe, kaa fay gooto e maፎፎe wiyaali dum: «Ko ndaartataa? Ko

kaaldataa e makko?» <sup>28</sup> Nden debbo oo yoppi mbulku mum ton, wirfitei ngeenndi haalanoyi yim6e, wii:

<sup>29</sup> —Ngaree yeewee gorko kaaltando kam ko ngannoo-mi fuu annii, yalla wanaa kanko woni Almasiihu?

<sup>30</sup> Be njehi yeewoyde mo.

<sup>31</sup> Oon wakkati, taalibaa6e 6ee ndaardi mo, ana mbiya:

—Moobbo, tiinna jaamu!

<sup>32</sup> O jaabii 6e:

—Mido jogii ko mi jaama ko on anndaa.

<sup>33</sup> Taalibaa6e 6ee ana lamndondira:

—Dum nee, won gaddando mo ko jaametee naa?

<sup>34</sup> Iisaa wii 6e:

—Jaamdu am yo wadude sago neldo kam oo e timminde golle makko.

<sup>35</sup> Onon, odon mbiya: «Faa hannde lebbi nay so kettal wara.» Kaa miin, mido wiya on: tippee gite mon, yeewee gese dee fuu benndii, de njonii hetteede.

<sup>36</sup> Kettudo heban ngeenaari, moobтана jamri ndii nguurndam nduumiidam, yalla aawudo e kettudo ana ceyodoo. <sup>37</sup> Dum tabintinta banndol biyoowol: «Gooto ana aawa, goddo ana hetta.» <sup>38</sup> Mi nelii on kettoyon nga on tampanaali. Wo66e tampi. Onon, on ndaamitike e tampere ma66e.

<sup>39</sup> Samariyankoobe heew6e ley ndee ngalluure ngoondinii Iisaa saabe haala debbo ceettiido so wii: «O haaltanii kam ko ngadunoo-mi fuu.» <sup>40</sup> Nde Samariyankoobe 6ee njottinoo Iisaa ndee, ndaardi mo o fa66ana dum'en. O wadi don balde didi. <sup>41</sup> Yim6e heew6e ngoondini mo kasen faa buri no arande nii saabe konngol makko ngol. <sup>42</sup> Be mbii debbo oo:

—Jooni, wanaa saabe haalaaji maa dii tan min ngoondiniri. Ko min ngoondiniri dee, minen e ko'e amen, min nanii konngol makko, min anndi kanko jaati woni kisinoowo aduna oo.

### *No Iisaa selliniri 6ii howruujo kaananke*

<sup>43</sup> Caggal balde didi dee, o iwi ton, o yehi Galili. <sup>44</sup> Kanko e hoore makko o seettinoke: «Annabaajo teddintaake e ley suudu baam mum.» <sup>45</sup> Nde o yottinoo Galili ndee, Galilinkoo6e nja66orii mo juude didi, sabi kam6e duu 6e njehiino iidi Urusaliima, 6e njiino ko o gollonoo ley iidi oo koo.

<sup>46</sup> Nden Iisaa warti Kaana ley leydi Galili, do mo waylitinnoo ndiyam o wadi dam peguujam doo. Howruujo kaananke mo 6iyum sellaa ana ley Kafarahum. <sup>47</sup> Nde howruujo oo nannoo Iisaa iwrii Yahuudiya wartii Galili ndee, yehi to Iisaa, ndaardi dum jippoo sellinoya 6iyiiko ka6anoowo yonki.

<sup>48</sup> Iisaa wii mo:

—So on ke6aali finnde, on njiyaali kaayde, on ngoondintaa.

<sup>49</sup> Howruujo kaananke oo wii mo:

—Moobbo, njehen gila 6iyam oo maayaali.

<sup>50</sup> Iisaa wii mo:

—Hootu, 6iya oo sellii.

Gorko oo goondini ko Iisaa wii dum koo, hooti. <sup>51</sup> Golloo6e makko kawriti e makko e laawol, kumpiti mo, mbii:

—Biya oo dadii.

<sup>52</sup> O lamndii 6e wakkati homo suka o samtanaa. Be mbii mo:

—Sallifanaa keejen jonte dee njoppiti mo.

<sup>53</sup> Baaba suka oo annditi oon wakkati jaati Iisaa wiinoo dum: «Biya oo sellii!» Nii kanko e koreeji makko fuu 6e ngoondiniri Iisaa. <sup>54</sup> Dum woni haaynde dida6ere nde Iisaa golli kasen leydi Galili nde iwnoo Yahuudiya.

## 5

*No Iisaa selliniri bonnguujjo*

<sup>1</sup> Caggal majjum, iidi Yahuudiyankooḅe ana waḁa. Iisaa ḡabboyi Urusaliima. <sup>2</sup> To Urusaliima too, banng'e dammbugal biyeteengal Dammbugal Baali ngal, luggal ndiyam ana ton. Engal wiyee Baytijata e ibaraninkoore. Dand'e joy ana pilii ngal. <sup>3</sup> Nawḁe heewḁe ana lelii ley deen dand'e: wumḁe e wooyḁe e ḁe terḁe mum'en fuu mbaati. [<sup>4</sup>\*] <sup>5</sup> Gorko jawḁo duuḁi capantati e jetti ana wonnoo ḁon. <sup>6</sup> Iisaa yii omo lelii, anndi o ḁooydii e jaw, lamndii mo:

—Ada yidi sellude naa?

<sup>7</sup> Nawḁo oo jaabii mo, wii:

—Moobbo, mi walaa fay gooto balloowo kam regaade e luggal ngal nde ndiyam ḁam jirkitike. Do mbiyan-mi mi regike fuu, a tawan won adiido kam jolde.

<sup>8</sup> Iisaa wii mo:

—Imma, ḁamtu daddo maa, yaa!

<sup>9</sup> Don e ḁon gorko oo selli, ḁamti daddo mum fudditi yaade.

Dum hawrii e jalaande fowteteende, <sup>10</sup> saabe majjum hooreeḁe Yahuudiyankooḅe mbii cellinaado oo:

—Hannde yo jalaande fowteteende, dagantaako ma ndoondo-ḁaa daddo maa.

<sup>11</sup> O jaabii ḁe:

—Cellindo kam oo, kaḡum wii kam: «Bamtu daddo maa, yaa!»

<sup>12</sup> Be lamndii mo:

—Homo woni oo neddo biido ma ḁamtu daddo maa, yaa?

<sup>13</sup> Kaa cellinaado oo anndaano mo, sabi Iisaa iwii ḁon sabi yimḁe ana keewnoo e oon nokku. <sup>14</sup> Caggal ḁum, Iisaa hawriti e makko ley Suudu Dewal Mawndu nduu, wii mo:

—Yeew, jooni kaa, a sellii, pati luuttu kasen so ko ḁuri ḁum bonde heḁe.

<sup>15</sup> Gorko oo yehi haalanoyi hooreeḁe Yahuudiyankooḅe ḁee Iisaa woni cellindo ḁum oo.

*Kabaaru Baabiraado oo e Biddo oo*

<sup>16</sup> Nden hooreeḁe Yahuudiyankooḅe puḁḁi torrude Iisaa sabi o wadii ḁum e jalaande fowteteende. <sup>17</sup> Iisaa wii ḁe:

—Baabiraado am ana golla faa jooni, miin duu, mido golla.

<sup>18</sup> Nden hooreeḁe Yahuudiyankooḅe ḁeydi tewtude warde mo, wanaa saabe ko o bonnii jalaande fowteteende ndee koo tan, ko o wii kasen Laamdo yo baam makko koo. O fonndii hoore makko e Laamdo.

<sup>19</sup> Iisaa wii ḁe:

—Mido haalana on goonga: Biddo waawaa gollude fay huunde kaḡum tan, kinaa ko yii Baabiraado ana golla. Sabi ko Baabiraado oo gollata koo, ḁum Biddo oo duu gollata. <sup>20</sup> Sabi Baabiraado oo ana yidi Biddo oo, ana holla ḁum huunde fuu ko gollata. O hollan ḁum gollleeji burdi dii doo fuu teentilaade faa kaayne-ḁon. <sup>21</sup> Sabi hono no Baabiraado oo immintinirta maayḁe so hokka ḁum'en nguurndam nii, non Biddo oo duu hokkirta nguurndam mo muuyi hokkude. <sup>22</sup> Baabiraado oo, kaḡum kaa sarataa fay gooto, o wadii sariya kaa fuu e junngo Biddo oo, <sup>23</sup> yalla yimḁe fuu ana teddinira Biddo oo hono no

\* **5:4** E dereeji ḁooydi dii, yoga ana ḁeyda aaya 4:Eḁe ndoomi faa ndiyam ḁam jirkitoo, sabi malaa'ika Joomiraado ana jippoo e luggal ngal saatu e saatu ana jirkita ndiyam ḁam. Nawḁo adiido fuu regaade e ndiyam ḁam nde ḁam jirkittii ndee, sellan ko jaw mum oo tawaa fuu.

teddiniri Baabiraado oo nii. Nefdo fuu mo teddinaali Biddo oo, teddinaali Baabiraado neldo mo oo.

<sup>24</sup> Mido haalana on goonga: nando haala am so goondini neldo kam oo hebii nguurndam nduumiidam. Mo sarataake, mo diwii maayde, mo naatii e nguurndam. <sup>25</sup> Mido haalana on goonga: wakkati ana wara, o yottike jaati, wakkati mo maaybe nanata daande Bii Laamdo oo. Nanbe bee nguuran. <sup>26</sup> Hono no Baabiraado oo wuuriri e hoore mum nii, hono non o hokkiri Biddo oo duu baawde wuurirde e hoore mum. <sup>27</sup> O hokkii oon baawde sarde, sabi oon yo Bii Nefdo. <sup>28</sup> Pati dum haayno on. Wakkati waran mo maaybe wonbe ley janaale fuu nanata daande makko, <sup>29</sup> njalta. Gollu6e gollleeji lobbi immitanoo nguurndam, gollu6e gollleeji bonfi immitanoo sariya. <sup>30</sup> Miin, walaa fuu ko mbaaw-mi gollirde hiini hoore am. Ko nanu-mi koo cariran-mi. Sariya am ana dartii, sabi mi jokkataa sago am, sago neldo kam oo njokku-mi.

### *No Laamdo seettirantoo Iisaa*

<sup>31</sup> —So mi seettanike hoore am, seedaaku am sellataa. <sup>32</sup> Won goddo ceettantoodo kam. Mido anndi seedaaku mo seettantoo kam oo yo goonga. <sup>33</sup> Onon, on nelii e Yaayaa, o seettike goonga. <sup>34</sup> Miin, mi hasindinaa e seedaaku bii-aadama, walaa ko mbiiru-mi seedaaku Yaayaa oo so wanaa faa kison. <sup>35</sup> Yaayaa laatike lampa ku66oowa, njaaynoowa. On nja6ii weltaade wakkati gooto e fooyre makko. <sup>36</sup> Miin, mido jogii seedaaku burdo mo Yaayaa oo teentilaade: gollleeji di Baabiraado yamiri kam mi golla dii, kajum jaati ceettantoo kam Baabiraado neli kam. <sup>37</sup> Kasen duu, Baabiraado neldo kam oo hoore seettantoo kam. Abada on nanaali daande makko, abada on njiyaali mo, <sup>38</sup> haala makko deembilaaki e mon, sabi on ngoondinaali mo o neli oo. <sup>39</sup> Odon mbititoo Binndi dii sabi on miilli on ke6an e majji nguurndam nduumiidam. Kanji jaati ceettantoo kam. <sup>40</sup> Kaa on nja6aali warde e am faa ke6on nguurndam.

<sup>41</sup> Wanaa teddeengal yim6e tewtan-mi. <sup>42</sup> Kaa miin, mido anndi on, mido anndi jilli Laamdo ngalaa e mon. <sup>43</sup> Miin, mi wardii saabe Baabiraado am, on nja6baaki kam. Kaa so goddo wardii saabe hoore mum, on nja66oto dum. <sup>44</sup> Odon tottondira teddeengal, on tewtataa teddeengal iwrungal to Laamdo gooto, hono mbaawru-don goondinirde? <sup>45</sup> Pati miilee miin wullantoo on to Baabiraado. Muusaa, mo pawu-don jikke mon dow mum oo, kajum wullantoo on. <sup>46</sup> So nii on ngoondiniino Muusaa, on ngoondinanno kam miin duu, sabi miin o sappinoo e binndi makko. <sup>47</sup> Kaa so on ngoondinaali ko o winndi koo, hono goondinirton haala am?

## 6

### *No Iisaa jammiriniri ujunaaji joy gorko*

<sup>1</sup> Caggal dum, Iisaa lumbbi weendu Galili, wiyeteendu Tiberiyas. <sup>2</sup> Jamaa keewdo ana jokki e makko sabi 6e njii kaayde de o wadunoo nde o sellinnoo jaw6e bee ndee. <sup>3</sup> Iisaa jabbii dow waamnde haayre, jooddii ton e taalibaabe mum. <sup>4</sup> Tawi iidi Yahuudiyankoo6e biyeteedo Paska oo 6adike. <sup>5</sup> Iisaa hunci hoore, soynii jamaa keewdo ana fa'i dum. O wii Filipa:

—Hoto coodaten jaamdu ko jamminta 6ee fuu?

<sup>6</sup> Tawi o biirudo non tan faa o nana ko Filipa jaabotoo, sabi omo anndi ko o faandii gollude. <sup>7</sup> Filipa jaabii mo:

—Buuru teemedede didi cardi heyataa 6e faa gooto e ma66e fuu he6a hen seeda.

8 Taalibbo makko goddo, biyeteedo Andire mijii Simon Piyeer, wii mo:

9 —Annii, suka gorko gooto ana jogii buuruuje joy e liddi didi, kodum dum nafirta yimbe heewbe hono bee?

10 Iisaa wii:

—Mbiyee 6e njoodoo!

Nde wonnoo nokku oo ana heewi hufo, 6e njoodii. Ebe poti e ujunaaji joy gorko. 11 Iisaa 6ami buuruuje dee, yetti Laamdo, hokki taalibaa6e 6ee. Been ndokki joodiibe 6ee. Hono non liddi dii duu. Gooto fuu he6i ko haajaa. 12 Nde 6e kaarnoo ndee, Iisaa wii taalibaa6e mum:

—Ndeentinee kedde dee pati fay huunde mursee.

13 Be kawrini kedde taye buuruuje joy de jaamnoo6e 6ee keddi dee, de kebbini cagiije sappo e didi. 14 Nde yimbe 6ee njiinoo haaynde nde Iisaa gollii ndee, mbii:

—Kanko jaati woni Annabaajo cappanoodo ana wara e aduna oo.

15 Nde Iisaa annditinnoo e6e njarroo namngirde dum junngo 6e ngada dum kaananke ndee, iwi don njabi duu waamnde haayre kajum tan.

### *No Iisaa yaariri koyde dow ndiyam*

16 Nde hiirnoo ndee, taalibaa6e Iisaa 6ee ndegii e weendu nduu. 17 Be naati laana faa 6e lummba, yaade Kafarnahum. Jemma naatii, tawi Iisaa hewtaaki 6e. 18 Henndu mawndu ana wibba, bempeeje immike. 19 Be ngurfi laana kaa faa 6e ke6i hono kilooji joy naa jeegom. Nden 6e coynii Iisaa ana warda koyde dow weendu nduu, ana fewti 6e. Be kuli. 20 Iisaa wii 6e:

—Dum miin. Pati kulee!

21 Be ndaardi mo o naata laana kaa. Don e don 6e panndi do 6e pa'unoo doo.

22 Janngo mum, jamaa keddinoodo oo too bannge weendu nduu oo ana anndunoo laana ngoota tan wonnoo ton. Be njii Iisaa naatidaali e taalibaa6e mum laana kaa. Be njii duu taalibaa6e 6ee tan ngonnoo e makka, ndeerti, mbitti. 23 Laanaaji iwru6i Tiberiyas ngarii bannge do Iisaa yettunoo Laamdo so 6e jaami buuru doo. 24 Nde jamaa oo yiinoo Iisaa e taalibaa6e mum fuu ngalaa don ndee, naati laanaaji dii, peewti Kafarnahum tewtoyde Iisaa.

### *No Iisaa wiiri kajum woni jaamdu wuurnooru*

25 Nde 6e tawnoo Iisaa oo too bannge weendu nduu ndee, 6e mbii dum:

—Moobbo, mande ngar-daa doo?

26 Iisaa jaabii 6e:

—Mido haalana on goonga: wanaa saabe on njii kaayde tewtirton kam. Ko tewtirton kam dee, saabe on jaamii buuru on kaarii. 27 Pati tampanee jaamdu murseteendu. Ko kaan-don tampande dee, jaamdu heddotoondu wuurnooru yimbe nguurndam nduumiidam. Nduun jaamdu Bii Neddo hokkata on. Sabi Laamdo Baabiraado oo wadii maande mum e makko.

28 Nden 6e lamndii mo:

—Kodum min ngadata faa min ngolla gollleeji di Laamdo yidi?

29 Iisaa jaabii 6e:

—Golle mo Laamdo yidi oo woni ngoondinon mo o neli oo.

30 Be njaabii mo:

—Haaynde honde ngadata faa min njiya, min ngoondine? Kodum ngol-lataa? 31 Njaatiraa6e amen jaamii jaamdu wiyeteendu «maanu» ley ladde jeereende, hono no winndiraa nii: «O hokkii 6e jaamdu iwrundu dow kammu faa 6e jaama.»\*

\* 6:31 Pergu 16.4; Jabuura 78.24

<sup>32</sup> Iisaa jaabii 6e:

—Mido haalana on goonga: wanaa Muusaa hokki on jaamdu iwrundu dow kammu. Ko selli hen dee, Baabiraado am katum woni dokkoowo on jaamdu goongaraaru iwrundu dow kammu. <sup>33</sup> Sabi jaamdu ndu Laamdo hokkata nduu woni iwrooru dow kammu, hokkooru aduna oo nguurdam.

<sup>34</sup> Be mbii mo:

—Moobbo, hokku min jannde fuu nduun jaamdu.

<sup>35</sup> Iisaa wii 6e:

—Miin woni jaamdu wuurnooru. Gardo e am fuu, yobataa abada. Goondindo kam fuu domdataa abada. <sup>36</sup> Mi wii on: on njii kam, kaa on ngoodinaali. <sup>37</sup> Mo Baabiraado hokki kam fuu, waran e am. Gardo e am fuu, mi ribbataa dum. <sup>38</sup> Sabi wanaa faa mi wada sago am iwru-mi dow kammu, faa mi wada sago neldo kam oo. <sup>39</sup> Annii sago neldo kam oo: pati fay gooto e 6e o hokki kam 6ee majja, mi immintinan 6e jalaande sakitotoonde. <sup>40</sup> Annii sago Baabiraado am oo: neddo fuu jiido Biddo oo so goondini dum heban nguurdam nduumiidam, mi immintinan dum jalaande sakitotoonde.

<sup>41</sup> Hooree6e Yahuudiyankoo6e 6ee ana nermiteo haala makko sabi o wii «Miin woni jaamdu iwrundu dow kammu nduu.» <sup>42</sup> Be mbii:

—Oo, wanaa Iisaa bii Yuusufu mo anndu-den inna mum e baam mum oo naa? Hono o wiirata dow kammu o iwri?

<sup>43</sup> Iisaa wii 6e:

—Pati nermitee hakkunde mon! <sup>44</sup> Fay gooto waawaa warde e am so Baabiraado neldo kam oo foodaali dum. Gardo e am fuu, mi immintinan dum jalaande sakitotoonde. <sup>45</sup> Ana winndii ley dewte annabaabe: «Be fuu, Laamdo anndinan 6e.»<sup>†</sup> Neddo fuu kettindiido Baabiraado oo so faami, waran e am. <sup>46</sup> Fay gooto yiyaali Baabiraado, so wanaa iwru do to makko oo. Kanko tan yii Baabiraado. <sup>47</sup> Mido haalana on goonga: goondindo kam, hebii nguurdam nduumiidam. <sup>48</sup> Miin woni jaamdu wuurnooru. <sup>49</sup> Njaatiraabe moodon jaamii «maanu» ley ladde jeereende. Dum e taweede hadaali 6e maayde. <sup>50</sup> Kaa dum doo jooni yo jaamdu iwrundu dow kammu, yalla so neddo jaamii ndu ana waasa maayde. <sup>51</sup> Miin woni jaamdu wuurnooru iwrundu dow kammu. So neddo jaamii nduun jaamdu, wuuran faa abada. Jaamdu ndu ndokkiran-mi saabe nguurdam aduna nduu yo terde am.

<sup>52</sup> Dow dum Yahuudiyankoo6e ana ndukida ko mbaawi fuu, ana mbiya:

—Hono o waawari hokkude en terde makko faa jaamen?

<sup>53</sup> Iisaa jaabii 6e:

—Mido haalana on goonga: so on jaamaali terde Bii Neddo, on njaraali yiyam mum, nguurdam walanaa on. <sup>54</sup> Neddo fuu jaamdo terde am so yari yiyam am hebii nguurdam nduumiidam. Miin duu mi immintinan dum jalaande sakitotoonde. <sup>55</sup> Sabi terde am yo jaamdu jaati, yiyam am duu yo njaram jaati. <sup>56</sup> Neddo fuu jaamdo tew am so yari yiyam am, jii6ii e am, mi jii6ii e mum. <sup>57</sup> Baabiraado neldo kam oo yo guurdo. E makko nguuru-mi. Hono non jaamdo kam fuu wuurirta e am. <sup>58</sup> Kayru woni jaamdu iwrundu dow kammu: ndu waldaa e ndu njaatiraabe mon jaamunoo so maayii nduu. Jaamdo nduun jaamdu, wuuran faa abada.

<sup>59</sup> Dii waajuuji Iisaa waajinoo ley waajordu Kafarnahum.

<sup>60</sup> Nde 6e nannoo di ndee, heew6e e taalibaa6e makko mbii:

—Dii waajuuji njoorii sanne. Homo waawi hettinaade di?

<sup>†</sup> 6:45 Esaaya 54.13

<sup>61</sup> Iisaa humpitii ley becce mum taalibaa6e mum 6ee ana ηermitoo e majjum, wii 6e:

—Dum hu6indanaaki on naa? <sup>62</sup> Ndennoo so on njii Bii Neddo ηabbitii to wonnoo too, hono ngadaton? <sup>63</sup> Ruuhu, kaɲum hokkata nguurndam, kaa terde bii-aadama nafataa fay huunde. Haalaaji di kaalanan-mi on dii, kaɲum woni ruuhu, kaɲum woni nguurndam. <sup>64</sup> Ana e mon 6e ngoondintaa.

Nde wonnoo Iisaa ana anndi gila e puddoo6e 6e ngoondintaa dum 6ee, kaɲum e jammbotoo6o dum oo. <sup>65</sup> O 6eydi hen:

—Dum saabii so mbii-mi on: fay gooto waawaa warde e am so Baabiraado hokkaali dum no warda.

<sup>66</sup> Caggal dum, heew6e e taalibaa6e makko 6ee mbitti, ηootti jokkude e makko. <sup>67</sup> Nden Iisaa wii sappo e didon 6ee:

—Onon duu, odon njidi wittude naa?

<sup>68</sup> Simon Piyeer jaabii mo:

—Moobbo, to homo min njahata? Do maa doo haalaaji guurnooji neddo nguurndam nduumiidam ngoni. <sup>69</sup> Min ngoondinii, miden anndi a Ceniido Laamdo.

<sup>70</sup> Iisaa wii:

—Onon sappo e didon 6ee, wanaa miin subii on naa? Kaa gooto moodon yo seydaani.

<sup>71</sup> Haala Yahuuda bii Simon Isikariyota o haalannoo. Oo woni jammbotoo6o mo oo, haya o gooto e sappo e didon 6ee nee.

## 7

### *No Iisaa yaari iidi Buguuji*

<sup>1</sup> Caggal mum, Iisaa wonti yiilaade ley Galili. Omo teedii yiilaade ley Yahuudiya sabi hooree6e Yahuudiyankoo6e ana tewta no mbarda mo. <sup>2</sup> Tawi iidi Yahuudiyankoo6e biyeteedo iidi Buguuji oo 6adike. <sup>3</sup> Mijiraa6e Iisaa wor6e mbii dum:

—Eggu, njahaa Yahuudiya yalla taalibaa6e maa 6ee ana njija golleeji di ngollataa dii. <sup>4</sup> Fay gooto suudataa ko gollata so ana yidi anndeede. So ada golla dii golleeji, bannginan yim6e hoore maa.

<sup>5</sup> Tawi fay mijiraa6e makko 6ee duu ngoondinaali mo. <sup>6</sup> Iisaa wii 6e:

—Wakkati am waraali tafon, kaa onon, wakkati fuu yo wakkati mon. <sup>7</sup> Yim6e aduna mbaawaa wajude on, kaa miin e6e mbajni kam, sabi mido seedii golleeji ma66e dii moyyaa. <sup>8</sup> Onon, njehee kawroyee e oon iidi. Miin, mi yahataa hawroyde e oon iidi sabi wakkati am yottaaki tafon.

<sup>9</sup> O haalani 6e dum tan, o heddi Galili.

<sup>10</sup> Nde mijiraa6e Iisaa 6ee njahunoo hawroyde e iidi oo ndee, Iisaa duu yehii ton, kaa o bannginaali hoore makko, o suudi. <sup>11</sup> Hooree6e Yahuudiyankoo6e ana tewta mo ley jamaa iidi oo, ana mbiya:

—Hoto o woni?

<sup>12</sup> Yim6e heew6e ana liddondira haala makko. Yoga ana wiya:

—O neddo lobbo!

Wo66e ana mbiya:

—Wanaa dee, o majjinoowo yim6e.

<sup>13</sup> Kaa fay gooto suusaali haalde haala makko faa nanee, sabi e6e kula hooree6e Yahuudiyankoo6e.

<sup>14</sup> Nde iidi o feccirta, tawi Iisaa fuddii waajaade ley Suudu Dewal Mawndu nduu. <sup>15</sup> Yahuudiyankoo6e kaaynaa sanne, 6e mbii:

—Hono o waawiri dewte, kanko mo janngaali?

<sup>16</sup> Iisaa jaabii 6e:

—Waju mo mbaajotoo-mi oo, iwataa e am. To neldo kam oo mo iwranta kam. <sup>17</sup> So neddo muuyii gollude sago makko, annditan so konngi am dii to Laamdo iwri, naa so waajuuji am dii e am iwi. <sup>18</sup> Oon baajortoodo hiini hoore mum, hoore mum teddinta. Kaa oon teddinoowo neldo dum, goonga haalata, ojaare walaa e mum. <sup>19</sup> Wanaa Muusaa hokki on Sariya naa? Kaa fay gooto e mon jokkaali Sariya. Ko saabii so odon tewta warde kam?

<sup>20</sup> Yimbe 6ee njaabii mo:

—Aan, a laddaado. Homo ndaarata warde ma?

<sup>21</sup> Iisaa jaabii 6e:

—Golle gooto tan ngollu-mi, on fuu, on kaaynaama. <sup>22</sup> Muusaa yamiri on taadagol. Taweede to njaatiraa6e moodon dum iwrii fuu, wanaa to Muusaa. Odon taada neddo fay jalaande fowteteende. <sup>23</sup> So nii neddo ana taadee jalaande fowteteende pati on luuttu Sariya Muusaa, kodum tikkiranton kam saabe mi sellinii neddo kuurdo jalaande fowteteende? <sup>24</sup> Pati cariree no njiiru-don, cariree goonga.

### *No yimbe lamndorii yalla Iisaa woni Almasiihu*

<sup>25</sup> Yoga e yimbe Urusaliima mbii:

—Wanaa oo woni mo 6e tewtata warde oo naa? <sup>26</sup> Omo nii darii, omo waajoo hakkunde jamaa oo. Be mbiyaali mo fay huunde. Tama maw6e 6ee cellinii kanko woni Almasiihu oo jaati? <sup>27</sup> Oo doo kaa, eden anndi do iwata, kaa nde Almasiihu oo ana wara, fay gooto anndataa to iwrata.

<sup>28</sup> Tawi Iisaa ana waajoo ley Suudu Dewal Mawndu nduu. O haali faa toowi, o wii:

—Odon anndi kam, odon anndi do iwan-mi? Wanaa miin waddi hoore am. Neldo kam oo yo goongaraajo. Onon, on anndaa mo. <sup>29</sup> Kaa miin, mido anndi mo sabi to makko iw-mi. Kanko neli kam.

<sup>30</sup> Nden 6e ndaari nanggude mo, kaa fay gooto junngo mum fawaaki e makko, sabi wakkati makko waraalino tafon. <sup>31</sup> Heew6e e ley jamaa oo ngoondinii mo, mbii:

—So Almasiihu oo warii, gollan kaayde burde de oo gorko golli dee naa?

### *No hayboo6e Suudu Dewal Mawndu neliraa nannga Iisaa*

<sup>32</sup> Farisa'en nani ko yimbe 6ee ngunndondirta e haala Iisaa koo. Hooree6e yottinoo6e sadaka e Farisa'en neli hayboo6e Suudu Dewal Mawndu nduu nannga mo. <sup>33</sup> Non Iisaa wii:

—Miin, mido wondi e moodon seeda tafon. Caggal mum, mi wirfitoto to neldo kam oo. <sup>34</sup> On tewtan kam, kaa on njiitataa kam, sabi on mbaawaa yaade to ngonan-mi too.

<sup>35</sup> Yahuudiyankoo6e lamndondiri:

—Hoto o yahata faa tawee en mbaawaa yiitude mo? O tawtoyan yimbe men fer6e to Yunaninkoo6e, o waajoo dum'en naa? <sup>36</sup> O wii en tewtan mo, en njiitataa mo, sabi en mbaawaa yaade to mo tawetee too. Kodum woni maanaa kaa haala?

### *No Iisaa wiiri goondindo dum fuu domdataa*

<sup>37</sup> Nalaande sakitotoonde teddunde e iidi, Iisaa darii, haali faa toowi, wii:

—Neddo fuu domdundo wara e am, yara. <sup>38</sup> Neddo fuu goondindo kam, calludi ndiyam nguurnoojam ilan iwde e bernde mum, hono no winndiraa e Binndi dii nii.



<sup>39</sup> Tawi dum o haali haala Ruuhu mo goondindo mo fuu heɓata oo. Nden Ruuhu waraali, sabi Iisaa ɗabbitaali e teddeengal Laamdo tafon.

*No yimbe luurriri saabe Iisaa*

<sup>40</sup> Nde heewɓe e jamaa oo nanunoo kaa haala ndee, mbii:

—Kanko jaati woni Annabaajo oo.

<sup>41</sup> Yogaaɓe mbii:

—Kanko woni Almasiihu oo.

Woɓɓe kasen mbii:

—Almasiihu, Galili iwrata naa? <sup>42</sup> Binndi dii mbii e lepol Daawuuda Almasiihu iwata, e ngeenndi Baytilaama ndi Daawuuda iwata e mum ndii.

<sup>43</sup> Jamaa oo fecci saabe makko. <sup>44</sup> Won yiɓɓe nanngude mo e maɓɓe, kaa fay gooto junngo mum fawaaki e makko.

*No mawɓe Yahuudiyankooɓe calorii goondinde Iisaa*

<sup>45</sup> Non hayboɓe Suudu Dewal Mawndu ɓee ngarti to hooreeɓe yottinooɓe sadaka e Farisa'en. Been mbii ɓe:

—Ko saabii so on ngaddaali mo?

<sup>46</sup> Hayboɓe ɓee njaabii:

—Abada fay gooto waajoraaki no oo gorko nii.

<sup>47</sup> Farisa'en njaabii ɓe:

—Onon duu on majjinaama naa? <sup>48</sup> Won fuu e hooreeɓe ɓee naa e Farisa'en goondindo mo naa? <sup>49</sup> Bee yimbe paamataa Sariya Muusaa, ɓe huɗaɓe.

<sup>50</sup> Gooto e Farisa'en biyeteɗo Nikodemus, jahunooɗo to Iisaa jemma oo, wii ɓe:

<sup>51</sup> —Sariya meedɗen ana sara neddo tawee nanaaka ko haali, anndaaka ko gollii naa?

<sup>52</sup> Be njaabii mo:

—Aan duu, a Galilinke naa? Widita Binndi dii, a yiyan annabaajo fuu iwrataa Galili.

*No Iisaa waddi e debbo mabbaado e jeenu*

<sup>53</sup> Caggal mum, gooto fuu hooti suudu mum.

## 8

<sup>1</sup> Nden Iisaa ɗabboyi waamnde haayre wiyeteende Jaytun. <sup>2</sup> Beete kecco o warti ley Suudu Dewal Mawndu. Jamaa oo fuu wari. O joodii, omo waajoo ɓe. <sup>3</sup> Dunkee'en Sariya e Farisa'en ngaddani mo debbo maɓɓaado e jeenu. Be ndarni dum hakkunde jamaa oo. <sup>4</sup> Be mbii Iisaa:

—Moobbo, oo debbo yo maɓɓaado ana jeena. <sup>5</sup> Muusaa yamirii min ley Sariya min mbarda hono ɓee rewɓe kaaye. Aan nee, ko mbiyataa?

<sup>6</sup> Be kaaldi nii faa ɓe tuufana mo, yalla eɓe keɓa ko ɓe kappira mo. Iisaa noo turii, ana diidira fedeendu mum leydi. <sup>7</sup> Nde wonnoo eɓe njokki e lamndaade mo ndee, Iisaa hunci hoore, wii ɓe:

—Gooto mon mo luuttaali abada yo ardo wedaade mo haayre.

<sup>8</sup> O turii kasen, omo diida e leydi. <sup>9</sup> Nde ɓe nannoo dum ndee, ɓe mbittiri gooto gooto. Nayeeɓe ɓee fuu adii wittude faa heddi Iisaa tan e debbo oo.

<sup>10</sup> Iisaa hunci hoore, wii mo:

—Banndam debbo, hoto wullaniibe ma ɓee ngonni? Fay gooto jukkaali ma naa?

<sup>11</sup> O jaabii:

—Moobbo, fay gooto.

Iisaa wii mo:

—Miin duu, mi jukkataa ma. Yaa, pati luuttaa kasen.\*

*No Iisaa wiiri kaḡum woni fooyre aduna*

<sup>12</sup> Iisaa waajii 6e kasen, wii:

—Miin woni fooyre aduna oo. Jokkudo kam fuu heḡan fooyre nguurdam, yahataa ley nimre.

<sup>13</sup> Nden Farisa'en mbii mo:

—Ada seettanoo hoore maa, seedaaku maa sellataa.

<sup>14</sup> Iisaa jaabii 6e:

—Fay so mi seettanike hoore am, seedaaku am ana sella, sabi mido anndi do iwru-mi, mido anndi to njahan-mi. Kaa onon, on anndaa do iwru-mi, on anndaa to njahan-mi. <sup>15</sup> Onon, no njiiru-don yimḡe cardaton dum'en, kaa miin, mi sarataa fay gooto. <sup>16</sup> Fay so mido sara, sariya am ana sella, sabi mi sarataa miin tan, Baabiraado neldo kam oo ana wondi e am. <sup>17</sup> Warri e Sariya moodon: seedaaku yimḡe didon ana sella. <sup>18</sup> Miin, mido seettanoo hoore am. Baabiraado neldo kam oo duu, ana seettanoo kam.

<sup>19</sup> Be mbii mo:

—Hoto Baabiraado maa oo woni?

Iisaa jaabii:

—On anndaa kam miin, sako Baabiraado am. Sinndo oḡon anndunoo kam, maa on annduno Baabiraado am oo duu.

<sup>20</sup> Iisaa haali dii haalaaji nde waajotonoo ley Suudu Dewal Mawndu, nokku do keesuwal sadakaaji ngal woni doo. Fay gooto nanngaali mo, sabi wakkati makko yottaaki tafon.

<sup>21</sup> Iisaa wii 6e kasen:

—Mido nii yaha, on tewtan kam, on maaydan e luutti mon. On mbaawaa yaade to njahan-mi too.

<sup>22</sup> Non Yahuudiyankooḡe mbii:

—Dum nee, o bartoytoodo so o wii en mbaawaa yaade to o yahata too naa?

<sup>23</sup> Iisaa wii 6e:

—Onon, ley njeje-don, kaa miin, dow njejaa-mi. Onon, e aduna njeje-don, kaa miin, mi jeyaaka e makko. <sup>24</sup> Dum saabii so mbii-mi on: on maaydan e luutti mon. Sabi so on ngoondinaali miin woni mo ngon-mi oo, on maaydan e luutti mon.

<sup>25</sup> Be mbii mo:

—Aan homo?

Iisaa jaabii:

—Ko mbiinoo-mi on gila arannde koo ngon-mi. <sup>26</sup> Mido joganii on ko heewi ko haaletee e ko saretee. Haya neldo kam oo yo goongirante. Ko narru-moo-mi kaalanam-mi aduna oo.

<sup>27</sup> Be paamaali haala Baabiraado o haalanta 6e. <sup>28</sup> Nden Iisaa wii 6e:

—Nde Bii Neddo toownaa fuu, nden paamatan miin woni mo ngon-mi oo. Mi wadirtaa fay huunde hiini hoore am, mi haalan ko Baabiraado anndini kam koo. <sup>29</sup> Neldo kam oo ana wondi e am, o yoppaali kam mi teeldo, sabi ko weli mo tan ngadan-mi wakkati fuu.

*Haala rimḡe e maccuḡe*

<sup>30</sup> Nde Iisaa haaldunoo nii ndee, heewḡe ngoondini mo. <sup>31</sup> Non Iisaa wii Yahuudiyankooḡe goondinḡe dum 6ee:

\* **8:11** Aaya 7.53 yaade 8.11 tawaaka e dereeji 6urdi fuu 6ooyde dii.

—So on jiiḡii e konngol am, on taalibaaḡe am jaati. <sup>32</sup> Nden anndaton goonga. Goonga oo rimḡinan on.

<sup>33</sup> Be njaabii mo:

—Minen, min iwḡi Ibarahiima, abada fay gooto maraali min. Hono mbiirataa min ndimḡan?

<sup>34</sup> Iisaa jaabii ḡe:

—Mido haalana on goonga: luuttoowo fuu yo maccuḡo luutti. <sup>35</sup> Abada maccuḡo heddataako e galle, kaa ḡiḡḡo ana heddoḡo faa abada. <sup>36</sup> So ḡiḡḡo rimḡinii on, on laatoto rimḡe ḡor. <sup>37</sup> Mido anndi on iwḡi Ibarahiima, kaa oḡon tewta warde kam sabi waaju am naataali on. <sup>38</sup> Miin, ko njiiru-mi Baabiraado am mbaajotoo-mi. Onon, ko narru-ḡon baaba mon ngadaton.

<sup>39</sup> Be njaabii mo:

—Ibarahiima woni baaba amen.

Iisaa wii ḡe:

—Sinndo on iwḡi Ibarahiima, maa on ngolluno gollleeji Ibarahiima. <sup>40</sup> Kaa jooni oḡon tewta warde kam, miin kaalando on goonga mo narru-mi Laamḡo oo. Dum Ibarahiima waḡaali. <sup>41</sup> Onon, gollleeji baaba mon ngollaton.

Be mbii mo:

—Minen, min nganaa ḡiḡḡe haram, baaba gooto min njogii, oo woni Laamḡo.

<sup>42</sup> Iisaa wii ḡe:

—Sinndo Laamḡo wonnoo baam mon jaati, maa on njidam, sabi to Laamḡo iwru-mi, so ngar-mi. Mi wardaali hiini hoore am, kanko neli kam. <sup>43</sup> Ko saabii so on paamataa haala am? Saabe on nanataa ko kaalan-mi koo. <sup>44</sup> Onon, Ibiliisa woni baam mon. ḡiḡaade baam mon ngollaton. O jaadii hoore ḡila puḡḡoḡe. O walaa e goonga sabi goonga walaa e makko. So o fenii, gikku makko tan o waḡi, sabi mo penoowo, mo inna pene. <sup>45</sup> Kaa miin, saabe mido haala goonga woni ko on ngoonḡiniraali kam. <sup>46</sup> Homo e moodon waawi felirde kam luutti? So mi haalii goonga, ko saabii so on ngoonḡintaa kam? <sup>47</sup> Neḡḡo Laamḡo hettintoo haala Laamḡo. Onon nee, on kettintaako sabi on nganaa yimḡe Laamḡo.

### *No Iisaa burdi Ibarahiima*

<sup>48</sup> Yahuudiyankoḡe mbii mo:

—Min kaalaalino goonga nde min mbiinoo a Samariyanke, a laddaado ndee naa?

<sup>49</sup> Iisaa jaabii:

—Mi wanaa laddaado, mido teddina Baabiraado am. Onon, oḡon koyna kam. <sup>50</sup> Miin, mi tewtanta hoore am teddeengal. Ana woodi tewtanoowo kam ngal. Oon woni caroowo. <sup>51</sup> Mido haalana on goonga: neḡḡo fuu jokkudo konngol am maayataa abada.

<sup>52</sup> Yahuudiyankoḡe mbii mo:

—Jooni fuu tabitani min a laddaado. Ibarahiima e annabaaḡe fuu maayii, kaa aan, ada wiya neḡḡo fuu jokkudo konngol maa, meedataa ḡeḡḡe maayde. <sup>53</sup> Tama ada ḡuri baaba amen Ibarahiima teentilaade? Oon maayii, annabaaḡe duu maayii. Kodum cikku-ḡaa ngon-ḡaa?

<sup>54</sup> Iisaa jaabii ḡe:

—Miin, so hoore am teddinan-mi, teddeengal am yo meere. Baabiraado am mo mbiyaton Laamḡo mon oo teddinta kam. <sup>55</sup> On anndaa mo. Kaa miin, mido anndi mo. So mi wii mi anndaa mo, naa mi laato penoowo hono mon. Mido anndi mo, mido jokki konngol makko. <sup>56</sup> Baaba mon Ibarahiima ana seyortonoḡo yiide jalaande am. O yii nde, o seyike.

<sup>57</sup> Yahuudiyankooḅe mbii mo:

—Fay duuḅi capande joy a heḅaali tafon, kaa a yii Ibarahiima?

<sup>58</sup> Iisaa jaabii ḅe:

—Miḅo haalana on goonga: gila Ibarahiima tagaaka, miin, miḅo woodi.

<sup>59</sup> Non, ḅe cuḅi kaaye faa ḅe mḅedoo mo. Nden Iisaa mooltii, yalti Suudu Dewal Mawndu nduu.

## 9

### *No Iisaa wumtiniri pinduḅo e mbumndam*

<sup>1</sup> Nden Iisaa ana yahannoo faa yii gorko pinduḅo e mbumndam.

<sup>2</sup> Taalibaaḅe makko lamndii mo:

—Moobbo, homo luutti so mo findi e mbumndam, kanko naa saaraaḅe makko?

<sup>3</sup> Iisaa jaabii:

—Wanaa kanko luutti, wanaa saaraaḅe makko. Dum wadii yalla baawḅe Laamḅo ana ḅannga e makko. <sup>4</sup> So nii ḅalooma ana heddi, ana haani no ngollen gollēji nelḅo kam oo, sabi jemma waran nde fay gooto waawaa gollude. <sup>5</sup> So nii miḅo heddi e aduna oo, miin woni fooyre makko.

<sup>6</sup> Nde o haalnoo ḅum ndee, o tutti e leydi, o jiiḅiri tuttaaḅe dee loope, o wuji e gite bumḅo oo. <sup>7</sup> O wii ḅum:

—Yaa sulmoya luggal biyeteengal Silowam.

(Maanaa majjum yo «nelaado».)

O sulmoyii, o warti omo yiya. <sup>8</sup> Hoddiiḅe makko, kaḅum e yiyannooḅe mo omo garbinoo, mbii:

—Tama wanaa oo woni joodinooḅo ana garbinoo oo?

<sup>9</sup> Bee mbii:

—Dum kanko!

Bee mbii:

—Wanaa! Nanndoore makko!

Gorko oo e hoore mum wii:

—Dum miin jaati!

<sup>10</sup> Be mbii mo:

—Hono mbumtir-ḅaa?

<sup>11</sup> O jaabii:

—Gorko biyeteḅo Iisaa oo jiiḅi loope, wuji e gite am, wii kam mi yaha luggal Silowam, mi sulmoyoo. Culmoyii-mi, mbumtu-mi.

<sup>12</sup> Be mbii mo:

—Hoto gorko oo woni?

O wii:

—Mi anndaa!

### *No Farisa'en lamndorii bumtinaaḅo oo*

<sup>13</sup> Nden ḅe naḅi bumnooḅo oo to Farisa'en. <sup>14</sup> Nde Iisaa jiiḅunoo loope so wumtini mo ndee, yo ḅalaande fowteteende. <sup>15</sup> Non Farisa'en duu lamndii mo:

—Hono mbumtir-ḅaa?

O jaabii ḅe:

—O wuji loope e gite am, culmii-mi, mbumtu-mi.

<sup>16</sup> Yoga e Farisa'en mbii:

—Gorko oo iwraali to Laamḅo sabi o jokkaali sariya ḅalaande fowteteende.

Woḅḅe mbii:

—Hono nedḅo luuttuḅo waawiri wadiḅe hono dee kaayḅe?

Dow dum 6e luurri, 6e ceeri. <sup>17</sup> Farisa'en 6ee lamndii bumnooɗo oo kasen: —Aan nee, ko mbiyataa e bumtindo ma oo?

O jaabii:

—O annabaajo.

<sup>18</sup> Dum fuu e taweede hooree6e Yahuudiyankoo6e nja6aali mo bumnooɗo so mo wumtinaa faa 6e noddii saaraa6e makko. <sup>19</sup> Be lamndii 6een:

—Oo ɗoo yo 6ii moodon naa? Mbii-ɗon e mbumndam mo findi naa? Ndennoo hono mo wumtiri jooni?

<sup>20</sup> Saaraa6e 6ee njaabii:

—Miden anndi mo 6ii amen, e mbumndam mo findi. <sup>21</sup> Kaa no o wumtiri jooni, min anndaa. Min anndaa duu homo wumtini mo. Kanko duu o mawɗo, lamndee mo! Omo waawi jaabanaade hoore makko.

<sup>22</sup> Walaa ko saaraa6e makko mbiiri nii so wanaa kammari e6e kula hooree6e Yahuudiyankoo6e. Saabe 6een kawrii: neɗɗo fuu cellindo Iisaa woni Almasiihu oo, 6e ndibban dum yalta waajordu. <sup>23</sup> Dum saabii so saaraa6e makko 6ee mbii: «O mawɗo, lamndee mo!»

<sup>24</sup> Farisa'en nodditi bumnooɗo oo, mbii mo:

—Haalu hakkunde maa e Laamɗo! Minen kaa miden anndi oo gorko yo luuttuɗo.

<sup>25</sup> O jaabii 6e:

—So o luuttuɗo duu, miin kaa, mi anndaa. Gootel tan anndu-mi: mi bumnooɗo, jooni mi wumtii.

<sup>26</sup> Be mbii mo:

—Kodum o wadi e maa? Hono o wumtinir ma?

<sup>27</sup> O jaabii 6e:

—Mi haalaniino on ɗum, kaa on nja6aali. Ko saabii so oɗon njidi nantude ɗum kasen? Tama onon duu, oɗon njidi laataade taalibaa6e makko?

<sup>28</sup> Been njenni mo, mbii mo:

—Aan woni taalibbo makko! Minen, min taalibaa6e Muusaa. <sup>29</sup> Minen, miden anndi Laamɗo haaldii e Muusaa, kaa kanko, min anndaa fay to mo iwata.

<sup>30</sup> Gorko oo jaabii, wii 6e:

—Hee, ko haayni! O wumtinii kam. Onon, oɗon mbiya on anndaa to mo iwata! <sup>31</sup> Eden anndi Laamɗo jaabantaako luuttoo6e, kaa omo jaabanoo kulɗo mo, gaɗoowo sago makko. <sup>32</sup> Abada nanaaka bumtindo pinduɗo e mbumndam. <sup>33</sup> Sinndo wanaa to Laamɗo oo gorko iwri, o waawataa waɗude fay huunde.

<sup>34</sup> Be njaabii mo:

—Aan, a fuu ley luutti pinu-daa! Aan waajotoo min minen naa? Be njaltini mo sella.

### *Haala mbumndam berɗe*

<sup>35</sup> Iisaa nani 6e njaltinii mo, yiiti mo, lamndii mo:

—Aan nee, aɗa goondini Bii Neɗɗo oo naa?

<sup>36</sup> O jaabii:

—Moobbo, homo woni kanko faa mi goondina mo?

<sup>37</sup> Iisaa wii mo:

—A yii mo. Kaalɗoowo e maa oo woni kanko.

<sup>38</sup> O jaabii:

—Moobbo, miɗo goondini.

O sujidani ɗum. <sup>39</sup> Nden Iisaa wii mo:

—Sarɗe waddi kam e oo aduna, faa wum6e njiya, yiyoo6e mbuma.

<sup>40</sup> Farisa'en tawanoobe don 6ee, nani haala kaa, lamndii mo:

—Minen nee, min wumbe naa?

<sup>41</sup> Iisaa jaabii 6e:

—Sinndo on wumbe, on luuttataano. Kaa no mbii-don jooni odon njiya nii, luutti moodon keddike.

## 10

### *Haala duroowo lobbo*

<sup>1</sup>—Mido haalana on goonga: neddo fuu naatoowo hoggo baali mo naati-raali damal, kaɓum woni gujjo, kaɓum woni janoowo. <sup>2</sup> Kaa naatiroowo damal oo, kaɓum woni duroowo baali. <sup>3</sup> Kayboowo damal oo udditinan mo, baali dii nana daande makko. O noddira baali makko dii, hongu fuu innde mum, o yaltina di. <sup>4</sup> Nde o yaltini di fuu, o ardoto di njokka e makko, sabi eɗi anndi daande makko. <sup>5</sup> Di njokkataa kodo, ko jaasi dum fuu, di ndogan mo sabi di annditataa daande ho66e.

<sup>6</sup> Iisaa haalani 6e ngol tinndinol, kaa 6e paamaali ko o muuyiri dum.

### *No Iisaa wiiri kaɓum woni duroowo lobbo oo*

<sup>7</sup> Iisaa wii 6e kasen:

—Mido haalana on goonga, miin woni damal hoggo baali. <sup>8</sup> Adii6e kam warde 6ee fuu yo wuy6e nii e yanoobe, baali dii nanataa daade ma66e. <sup>9</sup> Miin woni damal. Neddo fuu naatirɗo kam, hisan, naatan, yaltan, he6an durdude. <sup>10</sup> Gujjo wardataa so wanaa faa wujja, hirsaa, bonna. Kaa miin, mi wardii faa yimbe nguura, 6e nguura nguurndam lobbam. <sup>11</sup> Miin woni duroowo lobbo. Duroowo lobbo woni dokkitiroowo yonki mum saabe baali mum. <sup>12</sup> Kaa kasaado mo wanaa dunkee durngol, mo walaa ko wonani dum e dammuli dii, nde yii panngiri fuu, yoppa di dogaa, panngiri ndii nannga ko nanngata, keddiidi dii caakoo. <sup>13</sup> Kasaado oo dogan yoppa di sabi o kasaado tan, walaa ko wonani mo e majji. <sup>14-15</sup> Miin woni duroowo lobbo. Hono no Baabiraado oo anndiri kam so anndir-mi dum nii, hono non anndir-mi baali am so baali am anndi kam. Non mido hokkitira yonki am saabe majji. <sup>16</sup> Mido jogii baali goddi kasen di ngalaa ley ngoo hoggo. Diin duu kinnaa mi wadda di. Di nana daande am, di laatoo sewre wootere, duroowo gooto. <sup>17</sup> Baabiraado ana yidi kam saabe mido hokkitira yonki am faa mi hewta ki kasen. <sup>18</sup> Fay gooto ittanta kam ki. Miin e hoore am hokkitirta ki. Mido jogii baawde hokkitirde ki. Mido jogii baawde wartirde ki. E Baabiraado am kebu-mi ndee yamiroore.

<sup>19</sup> Dii haalaaji beydi waddondirde Yahuudiyankoo6e. <sup>20</sup> Heew6e ma66e ana mbiya:

—O laddaado o kaahaango. Ko saabii so odon kettindoo mo?

<sup>21</sup> Kaa yoo6a6e mbii:

—Dii waajuuji nganaa waajuuji laddaado. Laddaado ana waawi wumtinde bumdo naa?

### *No Yahuudiyankoo6e calorii goondinde Iisaa*

<sup>22</sup> Yiitu mawuuri heyɗintingol Suudu Dewal Mawndu nduu wadii Urusali-ima. Dum hawrii e dabbunde. <sup>23</sup> Do Suudu Dewal Mawndu doo, Iisaa ana wada yaha warta ley ndanki Suleymaana kii. <sup>24</sup> Nden Yahuudiyankoo6e pili mo, mbii mo:

—Faa mande keddoto-daa ada yoppi min e wemmbere? Haalan min faa laa6a, aan woni Almasiihu oo naa?

<sup>25</sup> Iisaa jaabii 6e:

—Mi haalanii on, on ngoondinaali. Golleeji di ngollir-mi e innde Baabiraado am dii, kanji ceettantoo kam. <sup>26</sup> Kaa onon, on ngoondinaali sabi on nganaa baali am. <sup>27</sup> Baali am ana nana daande am. Mido annadi di, edi njokka e am. <sup>28</sup> Mido hokka di nguurndam nduumiidam, di mbaatataa abada. Fay gooto ittataa di e junngo am. <sup>29</sup> Baabiraado dokkudo kam di oo furi huunde fuu teddude. Fay gooto waawaa ittude di e junngo Baabiraado am oo. <sup>30</sup> Miin e Baabiraado, min gooto.

<sup>31</sup> Yahuudiyankoo6e cu6i kaaye kasen faa mbedoo mo. <sup>32</sup> Iisaa wii 6e:

—Mi gollirii baawde Baabiraado golleeji lobbi keewdi yeeso mon. E ley dui golleeji, saabe homo e majji mbedorto-don kam kaaye?

<sup>33</sup> Yahuudiyankoo6e njaabii mo:

—Wanaa saabe golle lobbo min mbedorte kaaye, ko min mbedorte kaaye dee, saabe ada bonkoo Laamdo. Aan a neddo, a wadii hoore maa a Laamdo.

<sup>34</sup> Iisaa jaabii 6e:

—Tama winndaaka ley Sariya mon too: Laamdo wii «onon on laamdo'en»?\* <sup>35</sup> Laamdo noddirii laamdo'en been 6e o haaldi. Ko Binndi dui mbii koo sottataa. <sup>36</sup> Mo Baabiraado subii so neli e aduna oo, hono mbiiraton mo bonkike Laamdo saabe mi wii mi Bii Laamdo? <sup>37</sup> So mi gollaali golleeji Baabiraado am, pati ngoondinee kam. <sup>38</sup> Kaa so mido golla di, fay so on ngoondintaa kam, ngoondinee golleeji dui yalla odon annda, ngoondinon mido e Baabiraado, Baabiraado ana e am.

<sup>39</sup> Be tewti nanngude mo kasen. O sob6itorii 6e.

<sup>40</sup> O yehi ootoo banngede maayo Urdun nokku do Yaayaa lootannoo lootogal batisima arannde doo kasen, o fa66i ton. <sup>41</sup> Yim6e heew6e ngari e makko, mbii:

—Yaayaa wadaali haaynde fay wootere. Kaa ko o haali e gorko oo koo fuu goondii.

<sup>42</sup> Heew6e ngoondini Iisaa ton.

## 11

### *Haala maayde Laajaru*

<sup>1</sup> Gorko jawdo biyeteedo Laajaru ana Baytaniya, karum e banndiraa6e mum rew6e Mariyama e Marta. <sup>2</sup> Tawi Mariyama woni gujudo Moobbo oo nebam uuroojam so socciri koyde makko sukundu muudum. Laajaru jawdo oo yo mijiiko gorko. <sup>3</sup> Banndiraa6e rew6e 6ee neli e Iisaa, mbii:

—Moobbo, gidu maa mo korsin-daa oo jawii.

<sup>4</sup> Nde Iisaa nanunoo dum ndee, wii:

—Oo jaw wanaa jaw saate. Mo jaw tabintinoowo teddeengal Laamdo, yalla Bii Laamdo oo ana teddiniree mo.

<sup>5</sup> Iisaa ana horsini Laajaru e banndiraa6e mum rew6e, Marta e Mariyama,

<sup>6</sup> taweede o nanii Laajaru sellaa fuu, hadaali mo fa66ude ton balde didi godde.

<sup>7</sup> Caggal dum, o wii taalibaa6e makko:

—Mbirfito-don Yahuudiya!

<sup>8</sup> Taalibaa6e 6ee njaabii:

—Moobbo, 6ooyaa fey ko Yahuudiyankoo6e ndaari wardude ma kaaye, laatoo ton mbirfoto-daa kasen naa?

<sup>9</sup> Iisaa jaabii:

\* **10:34** Jabuura 82.6

—Wanaa wakkatiiji sappo e didi ngoni ley jalooma naa? Jahoowo jalooma fergataako sabi omo yiya fooyre aduna oo. <sup>10</sup> Kaa jahoowo jemma fergoto sabi fooyre walaa e muudum.

<sup>11</sup> Caggal o haalii dii haalaaaji, o wii 6e:

—Gido men Laajaru daanike, mi yahan mi finndinoya mo.

<sup>12</sup> Taalibaa6e 6ee mbii:

—Moobbo, so tawii o daaniido, ndennoo o dadii.

<sup>13</sup> Haala maayde Laajaru o haalannoo. Kam6e 6e miilii haala dooyngol o haali. <sup>14</sup> Iisaa labbinani 6e:

—Laajaru hedditaaki! <sup>15</sup> Mi seyorike saabe moodon ko mi tawaaka ton koo yalla odon ngoondina. Kaa jonnoo, njehen to makko.

<sup>16</sup> Nden Tomaa noddirteedo Funeeru oo wii taalibaa6e wo66e 6ee:

—Njehen enen duu yalla eden maayda e makko.

### *No Iisaa wiiri kaqum woni immital e nguurndam*

<sup>17</sup> Nde Iisaa yottinoo ndee, tawi wadii balde nay ko Laajaru iriraa.

<sup>18</sup> Nde wonnoo hakkunde Baytaniya e Urusaliima buraa hono kilooji tati,

<sup>19</sup> Yahuudiyankoo6e heew6e ngarii to Mariyama e Marta duwaaru Laajaru, e6e koomta dum'en e maayde mijii6e gorko. <sup>20</sup> Nde Marta nannoo Iisaa warii ndee, yehi sakkitooyii mo. Mariyama kaa heddii cuudi. <sup>21</sup> Marta wii Iisaa:

—Moobbo, sinndo ada wonnoo doo, mijam gorko oo maayataano. <sup>22</sup> Kaa fay jooni mido anndi huunde fuu ko ndaardu-daa Laamdo, wadante.

<sup>23</sup> Iisaa wii mo:

—Mijam gorko oo immitoto.

<sup>24</sup> Marta wii:

—Mido anndi o immitoto jannde immital, jalaande saktitotoonde.

<sup>25</sup> Iisaa wii mo:

—Miin woni immital, miin woni nguurndam. Neddo fuu goondindo kam, fay so maayi, wuuran. <sup>26</sup> Guurdo fuu goondindo kam, maayata abada. Ada goondini dum naa?

<sup>27</sup> O jaabii:

—Sanne Moobbo! Mido goondini aan woni Almasihu'Bii Laamdo garoowo e aduna oo.

<sup>28</sup> E dow dum, o yehi noddoyde mijniiko Mariyama, o gunndii dum:

—Moobbo oo warii, omo nodde.

<sup>29</sup> Nde Mariyama nanunoo dum ndee, hejii law, nootoyii. <sup>30</sup> Tawi fuu Iisaa naataalino ngeenndi ndii tafon. Omo heddii do Marta hawrunoo e makko doo. <sup>31</sup> Yahuudiyankoo6e ana ngondunoo e Mariyama ley galle, ana koomtannoo dum. Be njii o gurbitike, o yaltii. Be njokkitii mo, 6e miili o woyoyan dow yanaande too. <sup>32</sup> Mariyama yottii do Iisaa woni doo, yii dum tan, diccii yeeso muudum, wii dum:

—Moobbo, sinndo ada wonnoo doo, mijam gorko oo maayataano.

<sup>33</sup> Nde Iisaa yiinoo Mariyama e Yahuudiyankoo6e wondufe e mum 6ee ana mboya ndee, yonki makko jawi, hakkille makko immii. <sup>34</sup> O wii:

—Hoto ndesu-don mo?

Be njaabii:

—Moobbo, war yeew!

<sup>35</sup> Nii Iisaa woyi. <sup>36</sup> Yahuudiyankoo6e 6ee mbii:

—Yeewee no o foti horsinde dum.

<sup>37</sup> Yoga e ma66e wii:

—Bumtindo bumdo waawaano hadude Laajaru maayda naa?



*No Iisaa wuurtiniri Laajaru*

<sup>38</sup> Yonki Iisaa 6eydi jawde, o yehi tiimoyde yanaande ndee. Yanaande ndee yo loowol uddiraangol haayre. <sup>39</sup> Iisaa wii:

—Ittee haayre ndee!

Marta, banndii debbo maaydo oo, wii mo:

—Moobbo, ana haani ko tawee henndu makko waylitike, sabi hannde woni balde makko nay.

<sup>40</sup> Iisaa jaabii mo:

—Tama mi wiyaali ma, so a goondinii, a yiyan teddeengal Laamdo?

<sup>41</sup> Be itti haayre ndee. Iisaa tiggiti, wii:

—Baabiraado, mido yettire ko njaabani-daa kam koo. <sup>42</sup> Miin kaa, mido anndi jannde fuu ada jaabanoo kam. Kaa mi haaldirii nii saabe yimbe filii6e kam 6ee, yalla e6e ngoondina aan neli kam.

<sup>43</sup> Caggal dii haalaaji, o duki semmbe, o wii:

—Laajaru, yaltu sella!

<sup>44</sup> Maaydo oo yalti, juude mum e koyde mum ana piilaa leppi, yeeso mum ana suddii. Iisaa wii 6e:

—Kumtee mo, njoppon mo o yaha!

*No waalde Saahiibe dawriri faa nannga Iisaa*

<sup>45</sup> Heew6e e Yahuudiyankoo6e warnoo6e to Mariyama 6ee njii ko Iisaa wadi koo, ngoondini dum. <sup>46</sup> Kaa yogaa6e njehi to Farisa'en, kaaltani dum'en ko Iisaa wadi koo. <sup>47</sup> Nden Farisa'en e hooree6e yottinoo6e sadaka moofti waalde Saahiibe ndee, mbii:

—Oo gorko ana wada kaayde keewde. Hono ngadaten? <sup>48</sup> So en njoppirii mo nii, jamaa oo fuu goondinan mo. Nden kaa, Romankoo6e ngaran mbonna nokku men ceniido oo e lejol men ngol.

<sup>49</sup> Gooto ma66e biyeteedo Kayafas, laatinoodo Jottinoowo Sadaka Mawdo e nden hitaande, wii 6e:

—Onon, on anndaa fay huunde. <sup>50</sup> On anndaa neddo gooto maayana yimbe fuu 6uri moyyande en diina lejol meeden fuu halkoo.

<sup>51</sup> Tawi wanaa hiini hoore makko o haaldi kaa haala, kaa nde wonnoo o Jottinoowo Sadaka Mawdo nden hitaande, o sappike Iisaa maayanan lejol ngol. <sup>52</sup> Kaa wanaa lejol ngol tan o maayanta, ko o maayanta dee, faa o moofta 6i66e Laamdo saakiibe 6ee fuu e fedde wootere. <sup>53</sup> Gila oon jalooma, 6e ndawridi faa 6e mbara mo.

<sup>54</sup> Dum wadi so Iisaa njootti saccude hakkunde Yahuudiyankoo6e. O iwi do o wonnoo doo, o yehi ngalluure wiyeteende Efrayim heettunde e ladde jeereende. O joododii ton e taalibaa6e makko.

<sup>55</sup> Tawi iidi Yahuudiyankoo6e biyeteedo Paska oo 6adike. Heew6e e yimbe leydi ndii njehi Urusaliima faa cenna ko'e mum'en gila iidi oo yottaaki. <sup>56</sup> E6e tewta Iisaa. E6e ndarii ley Suudu Dewal Mawndu nduu, e6e kaalda:

—Odon miila o wara e iidi oo naa on miilaali?

<sup>57</sup> Tawi hooree6e yottinoo6e sadaka e Farisa'en njamiriino neddo fuu anndudo to mo woni yo haalu faa mo nannee.

## 12

*No Mariyama wujiri koyde Iisaa nebam*

<sup>1</sup> Balde jeegom fade iidi Paska yottaade, Iisaa yehi Baytaniya do Laajaru mo o wuurtinnoo oo jeyaa doo. <sup>2</sup> Don 6e ndefani mo jaamdu. Marta feccani 6e, Laajaru yo gooto e jaamdoobe e Iisaa 6ee. <sup>3</sup> Nden Mariyama 6ami feccitere

liituru nebam laaɓudam, uuroojam, tiidudam coggu, wuji dam e koyde Iisaa, socciri de sukundu mum. Suudu nduu fuu ukkiti. <sup>4</sup> Gooto e taalibaaɓe Iisaa ɓee, dum woni Yahuuda Isikariyota jammbootoɗo mo oo, wii:

<sup>5</sup>—Ko saabii so dam nebam soottaaka buudi teemedɗe tati cardɗi, \* hokkee misikiina'en?

<sup>6</sup> Walaa ko o wiiri non so wanaa o gujjo, wanaa yurmeende misikiina'en. Kanko woni kawjotoɗo jawdi maɓɓe, omo woowi wujjitidde hen. <sup>7</sup> Iisaa wii: —Celee e debbo oo. O resirii dam jannde iretee-mi. <sup>8</sup> Sabi misikiina'en ana tawdee e mon jannde fuu. Kaa miin, mi tawdataake e mon jannde fuu.

*No hooreeɓe yottinooɓe sadaka anniyorii warde Laajaru*

<sup>9</sup> Yahuudiyankooɓe heewɓe anndi Iisaa ana Baytaniya, njehi ton. Wanaa saabe Iisaa tan waddi ɓe, yalla eɓe njiya Laajaru guurtinaaɗo oo duu. <sup>10</sup> Non hooreeɓe yottinooɓe sadaka ndawridi mbaran Laajaru duu, <sup>11</sup> sabi Yahuudiyankooɓe heewɓe ana njoppa ɓe ngoonɗinoya Iisaa saabe Laajaru.

*No Iisaa naatiri Urusaliima*

<sup>12</sup> Janngo mum, jamaa keewɗo garɗo hawrude e iidi oo nani Iisaa garoowo Urusaliima. <sup>13</sup> Be ɓami caɓe tamarooje, ɓe cakkitoyii mo. Eɓe kuljina, eɓe mbiya:

—Jettooje e barke ngoodanii garɗoowo e dow innde Joomiraaɗo oo!† Jettooje ngoodanii mo, kanko kaananke Israa'iila!

<sup>14</sup> Iisaa heɓi mola ndakiiwa, waddii, hono no Binndi dii mbiiri dum nii:

<sup>15</sup> «Yimɓe ngalluure Siyona, pati kulee!

Yeew, kaananke mon ana wara,  
ana waddii mola ndakiiwa.»‡

<sup>16</sup> Nden taalibaaɓe makko ɓee paamaalino ko dum woni. Kaa caggal Iisaa teddinaama, ɓe miccitii ko mo sappananoo koo ɓe ngadi mo. <sup>17</sup> Jamaa tawdanooɗe e makko nde o wuurtinnoo Laajaru, o noddi dum iwde e yanaande ndee, kaɗum'en duu ana ceettii. <sup>18</sup> Dum wadi so yimɓe heewɓe njehi cakkitoyii mo sabi ɓe nanii o wadii ndee haaynde. <sup>19</sup> Non Farisa'en mbiyondiri:

—On njii, walaa fuu ko mbaawan-ɗen mo, aduna oo fuu annii jokki e makko.

<sup>20</sup> Won Yunaninkooɓe tawaaɓe hakkunde warɓe Urusaliima faa ndewa ley jalaade iidi dee. <sup>21</sup> Be battitii Filipa jeyaaɗo Baytisayda ley leydi Galili, ɓe mbii dum:

—Moobbo, miden njidi yiide Iisaa.

<sup>22</sup> Filipa yehi haalanoyi Andire. Be njottinoyi haala kaa Iisaa. <sup>23</sup> Iisaa jaabii ɓe:

—Wakkati mo Laamɗo hollata teddeengal Bii Neddo oo yottike. <sup>24</sup> Midɗo haalana on goonga: so wabbere alkama yooraaali aawaama e leydi, heddoto yo wabbere wootere. Kaa so nde yoorii nde aawaa fuu, nde rima faa heewa. <sup>25</sup> Neddo fuu jiddo yonki mum, mursan ki, kaa jeebiido yonki mum e aduna oo, damman ki, heban nguurndam nduumiidam. <sup>26</sup> So don muuyɗo gollande kam, yo jokku e am. Do ngon-mi fuu, doo golloowo am wuu wonata. Baabiraado teddinan gollanoowo kam.

*No Iisaa sapporii maayde mum*

\* 12:5 Buudi teemedɗe tati cardɗi ana mbaara e njoɗdi neddo hitaande. † 12:13 Jabuura 118.25-26

‡ 12:15 Jakariyaa 9.9

27 —Jooni mi wemmbaama. Kofum mbiyan-mi? Mi wiya Abba hisinam e oo wakkati naa? Mi waawaa wiide dum sabi kammari wakkati oo ngardu-mi. 28 Abba, teddin innde maa.

Daande nanaa iwruude dow kammu:

—Mi teddinii nde, mi teddinan nde kasen.

29 Nde yim6e darinoo6e ton 6ee nanunoo nden daande ndee, mbii dum riggaango kammu. Wo66e mbii:

—Malaa'ika haaldi e makko!

30 Iisaa wii 6e:

—Wanaa saabe am daande ndee wardi, saabe moodon. 31 Jooni woni sariya aduna oo. Jooni kaananke oo doo aduna tippete sella. 32 Miin, so mi toownaama iwde e leydi ndii, mi foodan yim6e fuu warde e am.

33 Tawi dii haalaaji o sapporii no mo maayrata nii. 34 Yim6e 6ee njaabii mo: —Sariya oo anndinii min Almasiihu yo duumotooti 6e. Hono aan mbiirataa kinaa Bii Neddo oo toownee? Homo woni oo Bii Neddo?

35 Iisaa jaabii 6e:

—Fooyre ana wondi e mon wakkati seeda tafon. Njahon gila fooyre ana heddi e mon, pati nimre hippoo on. Jahoowo ley nimre anndaa do yahata.

36 Ngoondinee fooyre gila ende e mon yalla odon laatoo yim6e fooyre.

### *No yim6e calorii goondinde Iisaa*

Iisaa haalu dum tan, yehi suudoyii 6e. 37 Kaayde de o wadi yeeso ma66e dee fuu, wadaali so 6e ngoondini mo, 38 yalla haala annabi Esaaya kaa ana tabita: «Joomiraado, homo goondini waaju amen oo?

Homo bannginanaa baawde Joomiraado?»§

39 Be mbaawaano goondinde, sabi Esaaya wii kasen:

40 «O wumnii gite ma66e,  
o helii hakkillaaji ma66e,  
pati gite ma66e njiya,

pati hakkillaaji ma66e paama

sako 6e tuuba, so mi sellina 6e.»\*

41 Dum Esaaya wii nde yiinoo teddeengal Iisaa, so haali haala makko ndee.

42 Kaa dum fuu e taweede, hooree6e Yahuudiyankoo6e heew6e ngoondinii Iisaa. Kaa saabe Farisa'en, 6e kulii yaadirde pati 6e njaltinee waajordu.

43 Dum woni teddineede yim6e burani 6e teddineede Laamdo.

44 Iisaa haali faa toowi, wii:

—Goondindo kam, wanaa miin tan o goondini, neldo kam oo duu o goondinii dum. 45 Neddo fuu jiido kam, yii neldo kam oo. 46 Miin, mi warii mi fooyre aduna oo, faa goondindo kam fuu pati heddo ley nimre.

47 So won nando waaju am jokkaali dum, miin, mi sarataa dum. Sabi mi wardaali sarde aduna oo, faa mi hisina mo ngardu-mi. 48 Oon calaniido kam, so jabaali waajuuji am, ana jogii caroowo. Konngol ngol kaal-mi ngol sarata dum palaande sakitotoonde. 49 Sabi miin, mi haaldaali hiini hoore am. Baabiraado neldo kam oo hokki kam yamiroore ko kaalan-mi e ko mbaajotoo-mi. 50 Miin, mido anndi yamiroore makko, kapum woni nguurdam nduumiidam. Ko kaal-mi koo, no Baabiraado haalaniri kam nii kaaltir-mi.

## 13

### *No Iisaa lootiri koyde taalibaabe mum*

<sup>1</sup> Gila iidi Paska yottaaki, Iisaa ana anndi wakkati mo iwata e aduna so hootana Baabiraado oo warii. Ga aduna gaa omo yidi yimbe makko, omo yidi be kaaddi jilli. <sup>2</sup> Wakkati mo be kirtotoo oo, Ibiliisa wadi e bernde Yahuuda bii Simon Isikariyota jammaade mo. <sup>3</sup> Iisaa e hoore mum ana anndi to Laamdo iwri to Laamdo hootata. Laamdo wadii huunde fuu e junngo makko. <sup>4</sup> O immii e hiraande ndee, o boortii saaya makko, o fami disawel, o filii e makko. <sup>5</sup> Non o wayli ndiyam e feere lootorde, o naati e lootude koyde taalibaabe makko, omo soccira de disawel o filii ngel. <sup>6</sup> Nde o yottinoo Simon Piyeer ndee, onn wii mo:

—Moobbo, aan lootata koyde am naa?

<sup>7</sup> Iisaa jaabii mo:

—A faamaali ko ngadan-mi koo tafon, kaa a faamoyan caggal jooni.

<sup>8</sup> Piyeer wii mo:

—A lootataa koyde am abada!

Iisaa jaabii mo:

—So mi lootanaali ma, a walaa ngedu e am.

<sup>9</sup> Simon Piyeer wii mo:

—Moobbo! So non, pati haadu e koyde am tan, lootu juude am e hoore am duu.

<sup>10</sup> Iisaa wii mo:

—Lootiido fuu yo laabufo. Mo hasindinaa e lootaneede kinaa koyde tan. Onon on laabufo, kaa wanaa on fuu.

<sup>11</sup> Tawi omo anndi jammbootodo mo oo. Dum wadi so o wii wanaa on fuu ngoni laabbe.

<sup>12</sup> Nde Iisaa lootunoo koyde maabbe ndee, famti saaya muudum, joottii, wii be:

—On paamii ko ngadu-mi on koo naa? <sup>13</sup> Odon noddira kam «Moobbo» odon noddira kam «Kalfaado». Ko mbiyat on koo ana moyyi, sabi dum ngon-mi.

<sup>14</sup> Ndennoo, miin Kalfaado, miin Moobbo, mi lootii koyde mon, waajibi onon duu gooto fuu lootana goddo koyde mum. <sup>15</sup> Ko ngadu-mi on koo yo tinndinol yalla onon duu, odon ngafondira hono ko ngadu-mi on koo. <sup>16</sup> Mido haalana on goonga: maccudo burataa kalfaado mum teddude, nelaado duu burataa neldo dum. <sup>17</sup> Nde wonnoo on anndii dum jooni, so nii on njokkirii non, on mbelan hoore. <sup>18</sup> Wanaa haala mon on fuu kaal-mi. Mido anndi been be cubii-mi, kaa kinaa ko Binndi dii mbii koo tabita: «Naamdudo e am latiri kam teppere muudum.»\*

<sup>19</sup> Gila jooni mido haalana on dum, fade majjum yottaade, yalla nde dum yottii fuu, odon ngoondina miin woni mo ngon-mi.

<sup>20</sup> Mido haalana on goonga: neddo fuu jabbiido nelaado am, jabbiike kam. Neddo fuu jabbiido kam, jabbiike neldo kam oo duu.

### *No Yahuuda jammatorii Iisaa*

<sup>21</sup> Nde o haalnoo dum ndee, yonki makko jawi, o wii:

—Mido haalana on goonga: gooto moodon jammoto kam.

<sup>22</sup> Taalibaabe bee yeewondiri. Be anndaa mo o haalata haala mum. <sup>23</sup> Gooto e taalibaabe bee, mo Iisaa horsini oo, ana joodinoo bannge mum. <sup>24</sup> Simon Piyeer himyi mo gite mo lamndoo Iisaa homo o haalata haala mum. <sup>25</sup> Non taalibbo oo naayorii hedde Iisaa, wii:

—Moobbo, dum homo?

<sup>26</sup> Iisaa jaabii:

—Mo ndokkan-mi lonngere nde cuuwan-mi ndee oo.

\* 13:18 Jabuura 41.10

O suuwi lonngere, o hokki Yahuuda bii Simon Isikariyota oo. <sup>27</sup> Caggal lonngere ndee, Ibiliisa naati e Yahuuda. Iisaa wii mo:

—Wafu ko ngadataa koo law!

<sup>28</sup> Tawi fay gooto e joodiibe don 6ee faamaali ko Iisaa haalani mo koo. <sup>29</sup> Nde wonnoo Yahuuda woni kawjotoodo jawdi ma66e, yoga miilli Iisaa wii mo somonoyoo iidi, naa daja ko o hokki misikiina'en. <sup>30</sup> Yahuuda nanngu lonngere ndee tan, yalti oon wakkati fuu. Dum jemma.

### *Haala yamiroore heyre*

<sup>31</sup> Nde Yahuuda yaltunoo ndee, Iisaa wii:

—Jooni Bii Neddo teddinaama, Laamdo duu teddiniraama saabe makko.

<sup>32</sup> So Laamdo teddiniraama saabe makko,† kaɲum duu teddinan mo e hoore mum, teddinan mo law. <sup>33</sup> Sukaabe am, mido wondi e mon seeda tafon. On tewtan kam. Mido wiya on jooni hono ko mbiinoo-mi Yahuudiyanoo6e e 6ettaade: on mbaawaa yaade to njahan-mi too. <sup>34</sup> Mido hokka on yamiroore heyre: njidondiree! Hono no njidir-mi on nii, onon duu njidondiron hono non! <sup>35</sup> So on njidondirii, yim6e fuu annditan on taalibaabe am.

### *No Iisaa holliri Piyeer yankiran dum*

<sup>36</sup> Simon Piyeer wii mo:

—Moobbo, hoto njahataa?

Iisaa jaabii mo:

—To njahan-mi jooni too, a waawaa jokkude e am. Kaa caggal jooni a jokkan e am!

<sup>37</sup> Piyeer wii mo:

—Moobbo, ko saabii so mi waawaa jokkude e maa jooni? Mido hokkitira yonki am saabe maa.

<sup>38</sup> Iisaa jaabii mo:

—Goonga fuu, a hokkitiran yonki maa saabe am naa? Mido haalane goonga: fade ndontoori jogginde hannde a wiyana anndaa kam cili tati.

## 14

### *No Iisaa wiiri kaɲum woni laawol ngol*

<sup>1</sup> Iisaa wii taalibaabe mum 6ee:

—Pati imminee hakkille mon. Ngoondinee Laamdo, ngoondinee kam.

<sup>2</sup> Cuudi keewdi ana ley galle Baabiraado am. So walaano, mi wiyanno on. Mi yahan, mi moyyinanoaya on ton nokku. <sup>3</sup> Ndennoo, so mi moyyinanoyii on nokku, mi wartan kasen mi 6amta on faa onon duu ngonon to ngonan-mi too. <sup>4</sup> Odon anndi to njahan-mi too, odon anndi laawol mum.

<sup>5</sup> Tomaa wii mo:

—Moobbo, min anndaa to njahataa, hono min anndirta laawol mum?

<sup>6</sup> Iisaa jaabii mo:

—Miin woni laawol ngol, miin woni goonga oo, miin woni nguurdam dam. So wanaa saabe am fay gooto waawaa yaade to Baabiraado. <sup>7</sup> Sinndo odon anndunoo kam, maa on anndu Baabiraado am oo duu. Gila jooni on anndii mo, on njii mo.

<sup>8</sup> Filipa wii mo:

—Moobbo, hollu min Baabiraado, dum tan ana heya min.

<sup>9</sup> Iisaa wii mo:

† **13:32** Pudfoofe aaya 32, «So Laamdo teddiniraama saabe makko», tawaaka e dereeji burdi fuu 6ooyde dii.

—No ngondir-mi e moodon faa booyi nii fuu, Filipa, a anndaali kam naa? Jiido kam, yii Baabiraado. Hono mbiirataa: «Hollu min Baabiraado?»<sup>10</sup> A goondinaali mido e ley Baabiraado, Baabiraado ana e am naa? Waajuuji di mbaajii-mi on dii fuu, mi waajortaako di hiini hoore am. Baabiraado gondo e am oo gollata gollleeji mum.<sup>11</sup> Ngoondinee kam so mi wii mido e Baabiraado, Baabiraado ana e ley am. Fay so on ngoondinaali dum, ngoondiniron kam saabe gollleeji dii.<sup>12</sup> Mido haalana on goonga: neddo fuu goondindo kam, gollan kaɲum duu gollleeji di ngollan-mi dii, gollan ko buri di, sabi mi kootowo to Baabiraado am.<sup>13</sup> Mi wadanan on huunde fuu ko ɲaagori-don Laamdo saabe am. Mi wadan dum yalla Baabiraado oo ana teddirree saabe Biddo oo.<sup>14</sup> So won ko ɲaagori-don Laamdo saabe am, mi wadanan on.

### *No Iisaa fodiri neldan Ruuhu Ceniido*

<sup>15</sup>—So odon njidi kam, on njokkan jamirooje am.<sup>16-17</sup> Mi ɲaagoto Baabiraado hokka on Balloowo goddo, oo woni Ruuhu goonga, yalla omo wonda e mon faa abada. Aduna oo waawaa jaɓɓaade mo, sabi yiyataa mo, anndaa mo. Kaa onon, odon anndi mo sabi omo wondi e mon, omo e mon.<sup>18</sup> Mi yoppataa on atiime'en, mi wartin e mon.<sup>19</sup> So booyii seeda aduna oo yiyataa kam kasen. Kaa onon, on njiyan kam, sabi mi guurdo, onon duu on nguuran.<sup>20</sup> Nannde nden on paaman mido e ley Baabiraado, odon e am, mido e ley mon.<sup>21</sup> Neddo fuu anndudo jamirooje am so jokki de, kaɲum woni jiddo kam. Jiddo kam, Baabiraado am yidan dum. Miin duu, mi yidan dum, mi ɓannginananaam duu hoore am.

<sup>22</sup> Yahuuda, mo wanaa Yahuuda Isikariyota, jaabii mo:

—Moobbo, hono ɓannginirantaa min hoore maa, tawee a ɓannganaali aduna oo?

<sup>23</sup> Iisaa jaabii mo:

—So neddo ana yidi kam, jokkan konngol am, Baabiraado am yidan dum. Miin e Baabiraado am oo min ngaran to mum min njooddoo e mum.<sup>24</sup> Neddo fuu mo yidaa kam, jukkataa konngol am. Haala ka nanaton kaa, ka wanaa ka am, ka haala Baabiraado neldo kam oo.<sup>25</sup> Dum kaalanana-mi on gila mido tawdaa e mon.<sup>26</sup> Ruuhu Ceniido, Balloowo on mo Baabiraado neldirta on saabe am oo, kaɲum anndinta on kulle fuu. O miccintinan on ko mbaajinoo-mi on koo fuu.

<sup>27</sup> Jam njoppidan-mi on, jam am ndokkan-mi on. Miin, mi hokkirtaa on no aduna oo hokkirta on nii. Pati imminee hakkille mon, pati kulee.

<sup>28</sup> On nanii ko mbii-mi on: «mi yahan, caggal mum mi warta e mon.» Sinndo odon njidunoo kam, maa on ceyoro mi jahoowo to Baabiraado, sabi Baabiraado buri kam teddude.<sup>29</sup> Mi haalanii on jooni gila dum waraali, yalla so dum warii, odon ngoondina.<sup>30</sup> Haala am e moodon heewataa kasen, sabi kaananke oo aduna ana wara. Fay huunde o waawaa e am.<sup>31</sup> No Baabiraado yamiri kam nii, non ngadiran-mi, faa aduna oo faama mido yidi Baabiraado. Immee njehen, iwen doo.

## 15

### *No Iisaa wiiri kaɲum woni peguwi ngoongaraawi*

<sup>1</sup>—Miin woni peguwi ngoongaraawi, Baabiraado woni jom ngesa peguje.<sup>2</sup> Caɓal am dimaral fuu o feyyan dum, caɓal dimoowal fuu, o saltoto dum yalla engal ɓeydoo rimde.<sup>3</sup> Onon, jooni on laaɓuɓe saabe waaju mo mbaajii-mi on oo.<sup>4</sup> Niiɓee e am. So on jiiɓii e am, miin duu mi jiiɓan e mon! Hono

no cabal peguowi waawaa rimde e hoore mum kinaa tawee engal jii6i e peguowi nii, hono non onon duu, on mbaawaa rimde so on jii6aali e am. <sup>5</sup> Miin woni peguowi, onon ngoni cাবে. Neddó fuu jii6udo e am, mi jii6ii e mum, ríman duu faa heewa. On mbaawaa wadude fay huunde so on ngaldaa e am. <sup>6</sup> Neddó fuu mo jii6aali e am, tippete sella hono no cabal peyyaangal nii, yooraa. Cাবে joorde dee moobete, tippee ley yiite, de ku66a. <sup>7</sup> So on jii6ii e am, waaju am jii6ii e mon, nden kaa naagee Laamdo ko muuy-don fuu, on ke6an. <sup>8</sup> So on ndimii faa heewii, dum hollititta on laatike taalibaa6e am, nden yim6e njiyata teddeengal Baabiraado am. <sup>9</sup> Hono no Baabiraado yidiri kam nii, miin duu hono non njidir-mi on. Nii6ee e jilli am. <sup>10</sup> So on njokkii jamirooje am, on jii6an e jilli am, hono no njokkir-mi jamirooje Baabiraado am so jii6u-mi e jilli mum nii.

<sup>11</sup> Mi waajike on dum yalla seyo am ana jii6a e mon, seyo mon hi66a. <sup>12</sup> Annii yamiroore am: njidondiree hono no njidir-mi on nii. <sup>13</sup> Huunde fuu buraa dii doo jilli mawnude: neddo hokkitira yonki mum saabe yi66e mum. <sup>14</sup> Onon ngoni yi66e am, so on ngollii ko njamir-mi on koo. <sup>15</sup> Mi wiyataa on maccu6e kasen sabi maccudo anndaa ko kalfaado mum gollata. Mido wiya on yi66e, sabi ko narru-mi Baabiraado am koo fuu, mi anndinii on. <sup>16</sup> Wanaa onon cu6ii kam, miin subii on so yamiri on njahon ndimoyon bi66e, bi66e mon nduumoo, yalla Baabiraado ana hokka on huunde fuu ko naagori-don saabe am. <sup>17</sup> Njidondiree! Dum njamir-mi on.

### *No aduna oo wajiri Iisaa e taalibaa6e mum fuu*

<sup>18</sup> —So aduna oo ana waji on, anndee, miin o adii wajude. <sup>19</sup> Sinndo on laatinoke adunankoo6e, maa aduna oo yidu on. Kaa on nganaa adunankoo6e. Mi subike on mi seenndii on e aduna oo. Dum saabani mo wajude on. <sup>20</sup> Miccitee ko mbiinoo-mi on koo: «Maccudo burataa kalfaado mum.» So 6e torrii kam, 6e torran on, onon duu. So 6e njokkii konngol am, 6e njokkan ngol mon ngol duu. <sup>21</sup> Be ngadiran on dum fuu saabe am, sabi 6e anndaa neldo kam oo. <sup>22</sup> So mi waraalino, mi waajanooki 6e, 6e njinataakeno. Kaa jooni mi warii, mi waajike 6e, 6e ngalanaa luutti ma66e dii ujuuru fuu. <sup>23</sup> Neddó fuu bajudo kam, wajii Baabiraado am oo duu. <sup>24</sup> Sinndo mi gollaalino dii golleeji di fay gooto meedaali gollude yeeso ma66e, 6e njinataakeno. Kaa jooni 6e njii di fuu, e6e keddii wajude kam, miin e Baabiraado am. <sup>25</sup> Dum wadii faa tabintina ko winndaa ley Sariya ma66e: «Be mbajirii kam dow meere.»\*

<sup>26</sup> Ruuhu goonga iwroowo to Baabiraado, Balloowo on mo neldan-mi on oo, nde warii, katum seettantoo kam. <sup>27</sup> Onon duu, on ceettanto kam sabi odon ngondi e am gila puddoode.

## 16

<sup>1</sup> —Mi waajike on dum pati on njoppu goondinal. <sup>2</sup> Be njaltinan on cuudi baajordi. Wakkati waroyan nde bardo on fuu miilata rewii Laamdo. <sup>3</sup> Be ngadan dum sabi 6e anndaa Baabiraado oo, 6e anndaa kam miin duu. <sup>4</sup> Mi waajike on dum, yalla so wakkati oo warii, odon miccadoo mi haalaniino on dum.

### *Haala golle Ruuhu Ceniido*

—Mi haalanaali on gila arannde sabi mido wondi e mon. <sup>5</sup> Jooni mido nii hootana neldo kam oo, kaa fay gooto e mon lamndaaki kam hoto njahan-mi.

\* 15:25 Jabuura 35.19; 69.5

<sup>6</sup> On cunaama sanne saabe ko kaalan-mi on d̄um koo. <sup>7</sup> Dum fuu e taweede, mido haalana on goonga: yaadu am buri moyyande on. Sabi so mi yahaali, Balloowo on oo warataa. Kaa so mi yehii, mi neldan on mo. <sup>8</sup> So o warii, o niŋan aduna oo banngal luutti e fooccitaare e sariya. <sup>9</sup> Banngal luutti, sabi 6e ngoondinaali kam. <sup>10</sup> Banngal fooccitaare, sabi mido hoota to Baabiraado oo, on njiyataa kam kasen. <sup>11</sup> Banngal sariya, sabi kaananke oo doo aduna saraama.

<sup>12</sup> Mido jogii ko heewi kasen ko mi waajoo on, kaa on mbaawtataa d̄um jooni. <sup>13</sup> Nde Ruuhu goonga oo warii fuu, d̄owan on faade e goonga fuu. Sabi o haaldataa hiini hoore makko, o haalanan on ko o nani fuu, o humpitan on ko waroyta. <sup>14</sup> Kanko, o teddinan kam, sabi o baman ko njeŋ-mi koo, o humpitira on. <sup>15</sup> Ko Baabiraado oo jogii fuu, miin jey. Dum saabii mbii-mi o humpitan on ko o hebi e am koo.

### *No sunu waylitorto seyo*

<sup>16</sup> —So booyii seeda, on njiyataa kam, so booyii seeda kasen, njiyon kam.

<sup>17</sup> Yoga e taalibaa6e makko 6ee lamndondiri, mbii:

—Kodum woni maanaa haala makko so o wii «so booyii seeda, on njiyataa kam e so booyii seeda kasen, njiyon kam», o wii kasen «sabi mi jahoowo to Baabiraado?»

<sup>18</sup> Be mbii:

—«So booyii seeda», kodum d̄um firritata? Min paamaali ko o wii koo.

<sup>19</sup> Nde Iisaa anndunoo e6e njidi lamndaade d̄um ndee, wii 6e:

—Odon lamndondira maanaa haala am kaa: «So booyii seeda on njiyataa kam, so booyii seeda kasen, njiyon kam.» <sup>20</sup> Mido haalana on goonga: onon, on mboyan, on mboytoto, tawe e aduna oo ana seyii. On cuŋlan, kaa sunu mon waylitoto seyo. <sup>21</sup> So debbo ana ŋaywa, mo surŋan sabi wakkati makko warii. Kaa so cukalel ngel rimaama, o miccitataako naawalla ŋatawore makko, no seyo makko foti heewde dow aduna oo hebi kod̄o. <sup>22</sup> Onon duu hono non cuŋlir-d̄on jooni, kaa mi yiitan on kasen, on ceyoto, fay gooto waawaa bonnude seyo mon. <sup>23</sup> Nannde nden, on lamndataako kam fay huunde. Mido haalana on goonga: huunde fuu ko ŋaagi-d̄on Baabiraado oo, hokkiran on saabe am. <sup>24</sup> Faa jooni, walaa fuu ko ŋaagori-d̄on saabe am. Naagee, on keban, yalla seyo mon ana hi66a.

### *No Iisaa jaalorii aduna*

<sup>25</sup> —Ko kaalan-mi on jooni koo yo haala hippaaka. Wakkati waran, wakkati mo mi hippataa haala. Nden kaa mi haalanan on haala Baabiraado faa laa6a. <sup>26</sup> Nannde nden on ŋaagorto Laamdo saabe am. Mi wiyaali mido ŋaaganoo on Baabiraado, <sup>27</sup> sabi Baabiraado e hoore mum ana yidi on. O yidiri on saabe odon njidi kam, on ngoondinii to Laamdo iwru-mi. <sup>28</sup> Mi iwii to Baabiraado, mi warii e aduna. Jooni mido dala aduna oo, mi hootana Baabiraado.

<sup>29</sup> Taalibaa6e makko mbii mo:

—Jooni kaa, a haalii faa laa6i, walaa fuu ko kippu-daa hen. <sup>30</sup> Jooni kaa, min anndii walaa fuu ko a anndaa, fay gooto hasindinaa e lamndaade ma. Dum saabii so min ngoondini a iwdo to Laamdo.

<sup>31</sup> Iisaa jaabii 6e:

—Jooni, on ngoondinii naa? <sup>32</sup> Wakkati oo ana wara, o warii jooni, do on fuu caakoto-d̄on, homo fuu hoota suudu mum, njoppon kam mi teeldo. Kaa mi wanaa teeldo, sabi Baabiraado oo ana wondi e am. <sup>33</sup> Mi haalanii on d̄um,



yalla oḍon kemra jam e am. Oḍon ngondi e torra ley aduna oo. Kaa ceyo-ḍon, miin, mi jaalike aduna oo!

## 17

### *No Iisaa duworii saabe taalibaabe mum*

<sup>1</sup> Nde Iisaa waajinoo waajuuji ḍii ndee, tiggittii kammu, wii:

—Baabiraado, wakkati oo warii, teddin Biya, yalla Biya oo duu ana teddine.

<sup>2</sup> Sabi a hokkii mo baawde dow neddo fuu, yalla omo hokka been 6e ndokku-daa mo 6ee fuu nguurndam nduumiidam. <sup>3</sup> Nguurndam nduumiidam woni 6e annde, aan Laamdo goongaraajo gooto oo, 6e annda Iisaa Almasiihu mo nel-daa oo. <sup>4</sup> Mi teddinii ma e dow leydi ndii, mi yottinii golle mo ndokku-daa kam mi golla oo. <sup>5</sup> Jooni kaa, Baabiraado, teddinam teddeengal ngal njoginoo-mi do maa doo gila aduna oo tagaaka ngal.

<sup>6</sup> Yim6e 6e ndokku-daa kam e aduna oo 6ee, mi bannginani dūm'en innde maa. Aan jey 6e, a hokkii kam 6e, e6e njokki konngol maa. <sup>7</sup> Jooni kaa, 6e anndii ko ndokku-daa kam koo fuu to maa iwi, <sup>8</sup> sabi mi haaltanii 6e haalaaji do kaalan-daa kam ḍii, 6e njabii ḍi. Be kebii tayoral to maada iwrumi, 6e ngoondinii aan neli kam. <sup>9</sup> Mido jaagore saabe ma66e. Mi jaagortaako saabe aduna oo, mido jaagoroo saabe 6e ndokku-daa kam 6ee, sabi aan jey 6e. <sup>10</sup> Be nje-mi fuu, aan jey, 6e nje-daa fuu, miin jey. Mi teddiniraama saabe ma66e. <sup>11</sup> Kam6e, 6e keddoto e aduna oo, kaa miin, mi heddataako e makko. To maa njahan-mi. Aan Baabiraado Ceniido, reenir 6e baawde maada de ndokku-daa kam dee, yalla e6e laato gooto hono no men nii. <sup>12</sup> Nde ngondunoo-mi e ma66e ley aduna oo ndee, mi reenirii 6e baawde maa de ndokku-daa kam dee, mi tiidii e ma66e. Fay gooto majjaali so wanaa yiitenke oo, yalla ko sappaa e Binndi ḍii koo ana tabita. <sup>13</sup> Jooni kaa mido wara to maa. Mido haala ḍii haalaaji gila mido heddi e aduna oo tafon, yalla seyo am ana hi66a e ma66e. <sup>14</sup> Mi yottinii 6e konngol maa. Aduna oo wajii 6e, sabi 6e njeyaaka e makko, hono no miin duu mi jeyiraaka e makko nii. <sup>15</sup> Mi jaagaaki ittaa 6e e aduna oo, kaa mido jaage ndeenaa 6e e Ibiliisa. <sup>16</sup> Be njeyaaka e aduna oo, hono no miin duu mi jeyiraaka e makko nii. <sup>17</sup> Sennir 6e goonga maa. Konngol maa woni goonga. <sup>18</sup> Hono no nelir-daa kam e oo aduna nii, miin duu non nelir-mi 6e e makko. <sup>19</sup> Mido sennira hoore am saabe ma66e, yalla kam6e duu e6e laato senniraabe goonga.

<sup>20</sup> Wanaa saabe ma66e tan jaagorto-maa-mi. Mido jaagoroo duu saabe been goondinir6e kam waajuuji ma66e, <sup>21</sup> yalla 6e fuu e6e laato gooto. Hono no aan Baabiraado laatori-daa e am, miin duu mido e maa nii, yalla kam6e duu e6e laato gooto e men, yalla aduna oo ana goondina aan neli kam. <sup>22</sup> Mi wadanii 6e teddeengal ngal ngadan-daa kam ngal, yalla e6e laato gooto, hono no laatori-ḍen gooto nii. <sup>23</sup> Miin mido e ma66e, aan ada e am, yalla ngootummaaku ma66e ana hi66a, yalla aduna oo ana annda aan neli kam, mo annda duu ada yidi 6e hono no njidir-daa kam nii. <sup>24</sup> Baabiraado, mido yidi 6e ndokku-daa kam 6ee ngonda e am nokku fuu do tawaa-mi, yalla e6e njija teddeengal ngal ngadan-daa kam ngal sabi a yidii kam gila aduna oo diidaaka.

<sup>25</sup> Baabiraado poccitiido, aduna oo anndaa ma, kaa miin noo mido anndu maa, 6ee doo ana anndi aan neli kam. <sup>26</sup> Mi anndinii 6e ko ngon-daa, mi beydan anndinde 6e, yalla jilli njid-daa kam ḍii ana tawee e ma66e, miin duu mi tawee e ma66e.

## 18

*No Iisaa nanngiraa*

<sup>1</sup> Nde Iisaa duworinoo nii ndee, yaadi e taalibaa6e mum ootoo banng'e callugol biyeteengol Kedoron. Be naati ton e nokku keewdo ledde. <sup>2</sup> Yahuuda jammbotoodo mo oo ana anndi nokku oo, sabi Iisaa e taalibaa6e mum ana moo6totonoo ton sanne. <sup>3</sup> Yahuuda ardii oorngal sordaasi'en e golloo6e iwru6e to hooree6e yottinoo6e sadaka e Farisa'en. Be ngari ton, e6e njogii cunkume ku6ooje e lampaaji e ka6orde. <sup>4</sup> Nde wonnoo Iisaa ana anndi ko fa'i warde e mum fuu, sakkiti 6e, wii:

—Homo tewtaton?

<sup>5</sup> Be njaabii mo:

—Iisaa Nasaraatunke oo.

O wii 6e:

—Miin woni kanko!

Yahuuda jammbotoodo mo oo duu ana dardii e ma66e. <sup>6</sup> Nde Iisaa wiinoo «Miin woni kanko» ndee, 6e njaari cagga-caggarde 6e caami e leydi. <sup>7</sup> Iisaa lamndii 6e kasen:

—Homo tewtaton?

Be njaabii:

—Iisaa Nasaraatunke oo.

<sup>8</sup> Iisaa wii 6e:

—Mbii-mi on, miin woni kanko! So miin tewtaton, accee 6ee kaa njaha.

<sup>9</sup> Non dum laatorii, yalla haala Iisaa kaa ana tabita: «Mi majjoraaka fay gooto e 6e ndokku-daa kam 6ee.» <sup>10</sup> Simon Piyeer ana joginoo kaafaawi, soorti ki, soppi golloowo Jottinoowo Sadaka Mawdo e nowru jaamru faa ndu tayi. Golloowo oo ana wiyeer Malkus. <sup>11</sup> Nden Iisaa wii Piyeer:

—Soornu kaafaawi maa kii e njaru mum. Ada miili mi yarataa horde bone nde Baabiraado hokki kam ndee naa?

<sup>12</sup> Don sordaasi'en e kaananke mum e gollanoo6e hooree6e Yahuudiyanko6e nanngi Iisaa, ka66i dum. <sup>13</sup> Be nafi mo to Annas tafon. Annas yo esii Kayafas laatiido Jottinoowo Sadaka Mawdo ley nden hitaande. <sup>14</sup> Kanko Kayafas oo dawrannoo hooree6e Yahuudiyanko6e dabare, wii: ko buri moyyude e yim6e lejol ngol, neddo gooto maayana 6e.\*

*No Piyeer wadi so yankiri Iisaa*

<sup>15</sup> Simon Piyeer e taalibbo goddo njokkitii Iisaa. Taalibbo oo ana anndondiri e Jottinoowo Sadaka Mawdo oo, dum wadi so o he6i naaddude e Iisaa galle mawdo hooree6e yottinoo6e sadaka oo. <sup>16</sup> Piyeer kaa, darii damal sella too. Taalibbo anndondirdo e Jottinoowo Sadaka Mawdo oo, yalti haaldi e debbo doomoowo damal ngal oo, naanni Piyeer. <sup>17</sup> Kordo doomoowo damal oo lamndii Piyeer:

—Aan nee, a wanaa gooto e taalibaa6e gorko oo naa?

Piyeer jaabii mo:

—Mi wanaa!

<sup>18</sup> Nde wonnoo jaangol ana heewi, golloo6e e doomo6e ku66iino yiite ana yuwloo. Piyeer duu dardii e ma66e ana yuwloo.

*No maw6e diina cariri Iisaa*

<sup>19</sup> Nden Jottinoowo Sadaka Mawdo oo lamndii Iisaa haala taalibaa6e mum e waaju mum. <sup>20</sup> Iisaa jaabii mo:

\* 18:14 Yuhanna 11.49-50

—Mi bannginanii aduna oo waaju am. Wakkati fuu miɗo waajoo ley cuudi baajordi e ley Suudu Dewal Mawndu to Yahuudiyankooɓe fuu kawrititta too. Walaa fuu ko kaaldu-mi cuucuukka. <sup>21</sup> Ko lamndorto-ɗaa kam? Lamnda been hettindiiɓe kam. Kamɓe kaa, eɓe anndi ko mbaajii-mi koo.

<sup>22</sup> Nde Iisaa haalnoo ɗum ndee, gooto e doomooɓe ɓee fii mo banaawo, wii: —Nii jaaborto-ɗaa Jottinoowo Sadaka Mawɗo oo naa?

<sup>23</sup> Iisaa jaabii mo, wii:

—So ko boni mbii-mi, haalanam ko boni e majjum. So tawii ko moyyi mbii-mi, ko saabii so pii-ɗaa kam?

<sup>24</sup> Nden Annas neldi mo to Kayafas Jottinoowo Sadaka Mawɗo oo, omo haɓɓii.

### *No Piyeer waɗi so yankiri Iisaa kasen*

<sup>25</sup> Simon Piyeer ana darinoo ton ana yuwloo. Faa ɓe mbii mo:

—Aan, a wanaa gooto e taalibaaɓe makko ɓee naa?

O yeddi, o wii:

—Mi wanaa!

<sup>26</sup> Gooto e gollanooɓe Jottinoowo Sadaka Mawɗo oo, sakiike mo Piyeer tayunoo nowru muudum oo, wii:

—Mi yiidaalino ma e makko ley nokku keewɗo leɗɗe too naa?

<sup>27</sup> Piyeer yeddi kasen, e oon wakkati fuu, ndontoori joggini.

### *No Iisaa sariraa yeeso Pilaatu*

<sup>28</sup> Caggal ɗum, ɓe itti Iisaa to Kayafas gila beetee kecco, ɓe naɓi mo to huɓeere gofornee oo. Naɓuɓe mo ɓee naataali huɓeere ndee, sabi so ɓe naatii nde, ɓe coɓan, ɓe jaamataa ndeendi iidi Paska ndii. <sup>29</sup> Pilaatu, gofornee oo, tawoyi ɓe sella too, wii:

—Kodum ngullaniri-ɗon oo gorko?

<sup>30</sup> ɓe njaabii mo:

—Sinndo o gollaalino ko boni, min ngaddataano mo ga maa.

<sup>31</sup> Nden Pilaatu wii ɓe:

—Naɓee mo, cardon mo sariya moodon.

Yahuudiyankooɓe ɓee njaabii:

—Min ndunanaaka warde fay gooto.

<sup>32</sup> Nii haala ka Iisaa haalnoo haala maayde mum kaa tabitiri. <sup>33</sup> Pilaatu naatti galle mum, noddii Iisaa, wii ɗum:

—Aan woni kaananke Yahuudiyankooɓe oo naa?

<sup>34</sup> Iisaa jaabii mo:

—Aan e hoore maa wii non naa woɓɓe narru-ɗaa?

<sup>35</sup> Pilaatu jaabii mo:

—Miin, mi Yahuudiyanke naa? Ko ngadu-ɗaa so leɗol maa e hooreeɓe yottinooɓe sadaka ngaddu maa ga am?

<sup>36</sup> Iisaa jaabii:

—Laamu am jeyaaka e oo aduna. Sinndo omo jeyanoo e oo aduna, gollooɓe am kaɓotono pati mi naata juude hooreeɓe Yahuudiyankooɓe. Kaa jooni laamu am oo wanaa mo doo.

<sup>37</sup> Nden Pilaatu wii mo:

—Ndennoo, a kaananke?

Iisaa jaabii:

—No mbii-ɗaa nii, mi kaananke. Walaa fuu ko ndimiraa-mi so ngar-mi ley aduna oo so wanaa faa mi seetoo goonga. Neddo fuu jiddo goonga, ana nana daande am.

<sup>38</sup> Pilaatu wii mo:

—Goonga? Kodum woni goonga?

Nde o haalnoo dūm ndee, o yalti kasen, o tawtoyi Yahuudiyankooḅe ḅee to sella too, o wii ḅe:

—Mi heḅaali feloore fay wootere e makko. <sup>39</sup> Kaa ley aada moodon, iidi Paska fuu mido yoppitana on kasunke gooto. Odon njidi mi yoppitana on kaananke Yahuudiyankooḅe oo naa?

<sup>40</sup> Be fuu ḅe ngulli, ḅe mbii:

—Wanaa oo, Barabas min njidi.  
Barabas nee yo janoowo.

## 19

<sup>1</sup> Nden Pilaatu nanngi Iisaa, yamiri fiyee dorri. <sup>2</sup> Sordaasi'en ḅee caji tenngaade gi'e, kippi e hoore makko, ḅoorni mo burmusuure wodeere.\* <sup>3</sup> Be ḅattitii mo, eḅe mbiya:

—Sadi, kaananke Yahuudiyankooḅe!

Eḅe piya mo banaaje. <sup>4</sup> Pilaatu yalti kasen, wii Yahuudiyankooḅe ḅee:

—Mi yaltinan mo faa anndon mi heḅaali feloore fay wootere e makko.

<sup>5</sup> Non Iisaa yaltinaa ana hippii tenngaade gi'e ndee, ana ḅoornii saaya mbodeewa kaa. Pilaatu wii ḅe:

—Gorko oo annii!

<sup>6</sup> Nde hooreeḅe yottinooḅe sadaka e doomooḅe ḅee njiinoo mo ndee, ngulli mbii:

—Tontu mo e leggal bardugal! Tontu mo e leggal bardugal!

Pilaatu wii ḅe:

—Nanngē mo onon tonton mo, sabi miin kaa, mi heḅaali feloore e makko.

<sup>7</sup> Yahuudiyankooḅe njaabii mo:

—O luuttii sariya amen. E ley sariya amen oo kaa waajibi o waree, sabi o wadii hoore makko o Bii Laamdo.

<sup>8</sup> Nde Pilaatu nannoo kaa haala ndee, kulol mum ḅeydii. <sup>9</sup> O naatti huḅeere ndee kasen o wii Iisaa:

—Aan, hoto iwataa?

Iisaa jaabaaki mo fay huunde. <sup>10</sup> Nden Pilaatu wii mo:

—Miin muroto-ḅaa naa? Tama a anndaa mido waawi yoppitidde ma, mido waawi tontude ma?

<sup>11</sup> Iisaa jaabii mo:

—So wanaa Laamdo hokku maa baawde, a waawaano e am fay huunde. Dum saabii so gattudo kam e junngo maa oo ḅur maa jinjinaade.

<sup>12</sup> Gila nden Pilaatu ana ndaara yoppitinde mo. Dum saabii so Yahuudiyankooḅe ana ngulla, ana mbiya:

—So nii a yoppitii mo, a wanaa gidō kaananke Roma mawdo oo. Neddo fuu gadudo hoore mum kaananke yo gano kaananke Roma.

<sup>13</sup> Nde Pilaatu nannoo dīi haalaaji ndee, yaltini Iisaa, joodii dow joodorgal sariya, nokku biyeteedo Dinngira Kaaye (e ibaraninkoore omo wiye Gab-bata). <sup>14</sup> Nden yo pannde lanndinal iidi Paska, wakkati hakkunde naange. Pilaatu wii Yahuudiyankooḅe:

—Kaananke moodon annii!

<sup>15</sup> Be nduki semmbe:

—War mo! War mo! Tontu mo e leggal bardugal!

Pilaatu jaabii:

—Mi tonta kaananke moodon oo naa?

Hooreeḅe yottinooḅe sadaka ḅee mbii:

\* **19:2** Wakkati Iisaa, burmusuure wodeere yo saaya ka kaananke ḅoornotoo.

—Min ngalaa kaananke ko wanaa kaananke Roma mawdo oo.

<sup>16</sup> Nden o hokki 6e Iisaa faa 6e tontoya dum.

### *No Iisaa tontiraa dow leggal bardugal*

Nii 6e nanngi Iisaa, 6e naŋi dum. <sup>17</sup> Iisaa yalti ana roondii leggal mum bardugal faa yottii nokku biyeteedo Laalagal Hoore (e ibaraninkoore omo wiyee Golgata). <sup>18</sup> Don 6e tontidi mo e didon woŋŋe: oo nano, oo ŋaamo, Iisaa ana lommbii. <sup>19</sup> Pilaatu winndi e alluwal: IISAA NASARAATUNKE OO, KAAANANKE YAHUUDIYANKOOBE. O yamiri ngal takkee e leggal bardugal ngal. <sup>20</sup> Yahuudiyankooŋe heewŋe njanngii binndi dŋi sabi do Iisaa tontaa doo woddaa ngalluure ndee. Alluwal ngal winndaama e ibaraninkoore e yunaninkoore e romankoore. <sup>21</sup> Nden hooreeŋe yottinooŋe sadaka 6ee mbii Pilaatu:

—Pati winndu: «Kaananke Yahuudiyankooŋe», winndu: «o wii kanko woni kaananke Yahuudiyankooŋe».

<sup>22</sup> Pilaatu jaabii:

—Ko mbinndu-mi koo winndaama, tilike.

<sup>23</sup> Nde sordaasi'en 6ee tilinoo tontude Iisaa ndee, pecci kaddule makko pece nay. Homo fuu 6ami feccere mum. Be 6ami saaya makko duu. Saaya kaa walaa ŋootol. Ka fuu ka lefol gootol. <sup>24</sup> Sordaasi'en 6ee kaaldi:

—Pati ceeken saaya kaa. Ngaden ka urwa, yeewen keŋoowo ka.

Dum wadii, yalla ko sappaa e Binndi dŋi koo ana tabita:

«Be peccii kaddule am hakkunde maŋŋe,

6e ngadii saaya am urwa.»†

Dum sordaasi'en 6ee ngadi.

<sup>25</sup> Inna Iisaa, e sakiike mum debbo, Mariyama jom suudu Kolopa, e Mariyama mo Magdala ana ndarii banngi leggal ngal Iisaa tontaa e mum ngal. <sup>26</sup> Iisaa yii inna mum e taalibbo mum korsudo oo ana ndarodii, wii inna mum:

—Inna, 6iya annii!

<sup>27</sup> Nden o wii taalibbo oo:

—Inna maa, annii.

Gila nden taalibbo oo naŋi Mariyama galle mum.

### *Haala maayde Iisaa*

<sup>28</sup> Caggal dum, Iisaa anndi walaa fuu ko heddi. Yalla ko Binndi dŋi mbii koo ana tabita, o wii:

—Mi domdii!‡

<sup>29</sup> Mbulku keewdo biineegiri ana wonnoo don. Be cuuwi liccere e biineegiri oo, 6e kaŋŋi e loocol hisopiyaawol, 6e cukki e hunduko makko. <sup>30</sup> Nde Iisaa 6uuccinoo biineegiri oo ndee, wii:

—Tilike!

O turi hoore, o dali aduna. <sup>31</sup> Nden yo ŋannde lanndinal iidi. Hooreeŋe Yahuudiyankooŋe ndaardi Pilaatu yalla korre tontaaŋe 6ee ana kelee, 6een 6amtee, pati terde dee keddoo e ledde dee ŋalaande fowteteende. Sabi ŋalaande ndee yo teddunde. <sup>32</sup> Non sordaasi'en 6ee ngari, keli korre worŋe didon tontidanooŋe e Iisaa 6ee. <sup>33</sup> Kaa nde 6e njottinoo Iisaa ndee, 6e tawi mo maayii. Dum saabii 6e kelaali korre makko. <sup>34</sup> Kaa gooto e sordaasi'en 6ee yuwi Iisaa labbo e wuttuldu. Don yiyam e ndiyam mbaacii. <sup>35</sup> Neddo ceettiido dum oo yii dum. Seedaaku makko duu ana sella. Kaaldo oo ana anndi haalii

† 19:24 Jabuura 22.19 ‡ 19:28 Jabuura 22.16

goonga, yalla onon duu, oḍon ngoondina. <sup>36</sup> Dum fuu wadii, yalla ko Binndi dii mbii koo ana tabita:

«Fay gootal e gi'e makko helataake.» §

<sup>37</sup> Di mbii kasen:

«Be njiitan oon mo 6e njuwnoo oo.» \*

### *No tew Iisaa wadīraa e yanaande*

<sup>38</sup> Caggal mum, Yuusufu Arimatiyanke ndaardi Pilaatu yalla omo 6amta tew Iisaa oo. Pilaatu jaḅani mo. O 6amti oon. Tawi Yuusufu oo yo taalibbo Iisaa e cuucuukka, sabi omo hulannoo hooreeḅe Yahuudiyankooḅe.

<sup>39</sup> Nikodemus jaanooḍo to Iisaa jemma oo duu wari, o jillondiri uurdiiji mbiyeteedi miiri e alo'e o waddori. Edum yaha e kilooji capantati e diḍi.

<sup>40</sup> Non 6e 6amti tew Iisaa, 6e nguji mo uurdi ndii, 6e ngadi mo e kasanke hono no Yahuudiyankooḅe mboowiri wadude fade mum'en irde maayḍo nii.

<sup>41</sup> Nokku keewḍo ledḍe ana wonnoo ḍo Iisaa tontanoo ḍoo. Yanaande heyre ana ley nokku oo, ḍo fay gooto meedaaali wateede. <sup>42</sup> Dum hawri e wakkati lanndinal Yahuudiyankooḅe, tawi yanaande ndee ana baḍii, ḍum wadi so 6e ndesi Iisaa ḍon.

## 20

### *No Iisaa immintiniraa*

<sup>1</sup> Nannde alan, Mariyama mo Magdala hujji, yehi to yanaande too. O tawi haayre uddiranoonde yanaande ndee tallitaama. <sup>2</sup> O dogi, o yehi to Simon Piyeer e taalibbo mo Iisaa horsinnoo oo, o wii 6e:

—Be ittii Moobbo oo e yanaande ndee, mi anndaa fuu ḍo 6e ngadi mo.

<sup>3</sup> Piyeer e taalibbo oo njalti, njehi to yanaande too. <sup>4</sup> Eḅe ndoga ko 6e mbaawi fuu. Taalibbo oo dadi Piyeer, adii ḍum e yanaande ndee. <sup>5</sup> O yuurnii, o yii kasanke oo yo 6olo, kaa o naataali. <sup>6</sup> Simon Piyeer, kaḅum kaa yottii fuu, naati, tawi kasanke oo ana joodii. <sup>7</sup> Pilkol pilkanooḅol e hoore Iisaa ngol tawdaaka e kasanke oo, ngol tawaama engol sowii feere maggol. <sup>8</sup> Nden taalibbo ardinooḍo warde oo, kaḅum duu naati, yii, goondini. <sup>9</sup> Tawi 6e paamaano tafon ko Binndi dii mbii koo, Iisaa yo immitintooḍo. <sup>10</sup> Caggal mum, taalibbaaḅe diḍon 6ee kooti to mum'en.

### *No Iisaa banngirani Mariyama mo Magdala*

<sup>11</sup> Kaa Mariyama ana darii ḍo damal yanaande ḍoo, ana woya. O turii, o yuurnii ley yanaande ndee. <sup>12</sup> O yii malaa'ika'en diḍon 6e kaddule daneeje ana njoodii ḍo tew Iisaa oo resanoo ḍoo, gooto ḍo hoore ḍoo, godḍo oo to koyḍe too. <sup>13</sup> Malaa'ika'en 6ee mbii mo:

—Bannam debbo, koḍum mboyataa?

O jaabii 6e:

—Be ittii Moobbo am ḍoo, mi anndaa fuu to 6e ndesi ḍum.

<sup>14</sup> Nde o haalnoo kaa haala ndee, o yeecitii, o yii Iisaa ana darii, kaa o annditaali ḍum. <sup>15</sup> Iisaa wii mo:

—Bannam debbo, koḍum mboyataa? Homo tewtataa?

Mariyama miili golloowo nokku oo haaldata e mum, wii oon:

—Gido, so aan itti mo ḍoo, haalanam ḍo ndesu-daa mo, faa mi 6amta mo.

<sup>16</sup> Iisaa wii mo:

—Mariyama!

O yeecitii, o wii e ibaraninkoore:

—*Rabbunii!*

(Dum woni «Moobbo».)

<sup>17</sup> Iisaa wii mo:

—Pati memam, sabi mi ḡabbitaali to Baabiraado am tafon. Yaa to sakiraaḡe am, mbiyaa 6e mi ḡabbitan to Baabiraado am, Baabiraado mon, Laamdo am, Laamdo mon.

<sup>18</sup> Mariyama mo Magdala martinoyi taalibaaḡe 6ee kumpa, wii 6e:

—Mi yii Moobbo oo.

O haaltani 6e ko Iisaa haalani mo koo fuu.

### *No Iisaa 6anngirani taalibaaḡe mum*

<sup>19</sup> Nde kiikiide alan warnoo ndee, taalibaaḡe Iisaa coki baafal dow hoore mum'en nokku do 6e kawriti doo, saabe kulol hooreeḡe Yahuudiyankooḡe. Nden Iisaa wari darii hakkunde maḡḡe, wii 6e:

—Onon e jam!

<sup>20</sup> Nde o jowtunoo 6e ndee, o holli 6e nebbe juude makko e wuttuldu makko. Taalibaaḡe 6ee ceyii nde njii Joomiraado oo ndee. <sup>21</sup> Nden Iisaa wii 6e kasen:

—Onon e jam! Hono no Baabiraado neliri kam nii, neliran-mi on.

<sup>22</sup> Nde o haalnoo dii haalaaji ndee, o fuufi e maḡḡe, o wii:

—Njaḡḡe Ruuhu Ceniido! <sup>23</sup> Mo njaafi-don luutti mum, yaafaama di, mo on njaafaaki luutti mum, yaafataake.

### *No Iisaa 6anngirani Tomaa*

<sup>24</sup> Kaa Tomaa noddirteedo Funeeru, gooto e sappo e didon 6ee, walaano don nde Iisaa 6anngunoo hakkunde maḡḡe ndee. <sup>25</sup> Taalibaaḡe 6ee mbii mo:

—Min njii Moobbo men!

O jaabii 6e:

—So mi yiyaali batte tontande dee e nebbe makko, mi wada fedeendu am e majje, mi wada junngo am e wuttuldu makko, abada mi goondintaa.

<sup>26</sup> Yontere wootere caggal mum, taalibaaḡe 6ee kawriti kasen. Tomaa ana wondi e maḡḡe. Baafe dee fuu ana cokii. Iisaa 6anngi, darii hakkunde maḡḡe, wii:

—Onon e jam!

<sup>27</sup> O wii Tomaa:

—Waddu doo fedeendu maa, yeew juude am, waddu junngo maa, wadu ngo e wuttuldu am. Sel sikkitaade, goondin tan.

<sup>28</sup> Tomaa jaabii, wii mo:

—Joomiraado am, Laamdo am.

<sup>29</sup> Iisaa wii mo:

—Saabe a yii kam ngoondinir-daa. Been 6e njiyaali kam so ngoondini, mbelii hoore.

### *Haala faandaa dewtere ndee*

<sup>30</sup> Iisaa wadii yeeso taalibaaḡe mum kaayde godde keewde de mbinndaaka ley ndee dewtere. <sup>31</sup> Dee doo mbinndaama, yalla odon ngoondina Iisaa woni AlmasiihuBii Laamdo oo, yalla so on ngoondinii, odon kefira nguurndam saabe makko.

## 21

### *No Iisaa 6anngirani taalibaaḡe mum njeḡḡon*

<sup>1</sup> Caggal dum, Iisaa 6annganii taalibaaḡe mum 6ee kasen sera weendu Tiberiyas. Anni no mo 6anngiri: <sup>2</sup> Simon Piyeer e Tomaa noddirteedo

Funeeru oo e Natanayel mo Kaana leydi Galili e 6i66e Jebede wor6e 6ee e taalibaa6e didon wob6e, 6e fuu e6e tawdanoo ton. <sup>3</sup> Simon Piyeer wii 6e:

—Mi yahan awgal.

Be mbii mo:

—Minen duu, min njaadan e maa.

Don e don 6e njalti, 6e naatoyi laana. Oon jemma, 6e ke6aali fay huunde.

<sup>4</sup> Nde fajiri feccii ndee, Iisaa darii dow danjeere ndee, kaa taalibaa6e 6ee annditaali dum Iisaa. <sup>5</sup> O wii 6e:

—Sukaa6e, odon jogii ko jaametee naa?

Be mbii:

—Min ngalaa!

<sup>6</sup> O wii 6e:

—Tippee bubbol ngol banngge jaamo laana kaa, on ke6an.

Non 6e tippii ngol. Be ke6i liddi faa 6e ndonki suutude ngol. <sup>7</sup> Taalibbo mo Iisaa horsini oo wii Piyeer:

—Dum Moobbo men!

Nde Simon Piyeer nannoo dum moobbo mum'en ndee, 6oornii saaya mum, sabi mo 6oortinoodo ka, mo fiyii e ndiyam dam. <sup>8</sup> Taalibaa6e heddi6e 6ee ngaddi laana kaa, ana ndaasa bubbol keewngol liddi ngol. Be ngoddoraaki danjeere ndee kinaa ko waarata e meeturuuji teemedere. <sup>9</sup> Nde 6e yeentunoo ndee, 6e njii liddi ana pawii dow yul6e yiite, 6e njii buuru duu.

<sup>10</sup> Iisaa wii 6e:

—Ngaddee yoga e liddi di nanngu-don jooni dii.

<sup>11</sup> Simon Piyeer naati laana kaa, foodi bubbol ngol, yenjini. Ngol keewngol liddi mawdi. Liddi dii yo teemedere e capande joy e tati. No di poti heewde nii fuu, bubbol ngol seekaaki. <sup>12</sup> Iisaa wii 6e:

—Ngaree, jaamee!

Nde wonnoo 6e fuu 6e anndii dum Joomiraado, fay gooto e taalibaa6e 6ee lamndaaki mo «Aan homo?» <sup>13</sup> Nden Iisaa wari, 6ami buuru e liddi, hokki 6e.

<sup>14</sup> Ngol woni cilol tata6ol ko Iisaa banngani taalibaa6e mum cagal immitagol mum.

### *No Iisaa haaldiri e Piyeer*

<sup>15</sup> Nde 6e tayunoo kooyol ndee, Iisaa wii Simon Piyeer:

—Simon 6ii Yuhanna, a buraa 6ee doo yidude kam naa?

O jaabii:

—Goonga, Moobbo, ada anndi mido yidu maa.

Iisaa wii mo:

—Tiidu e baaloy am!

<sup>16</sup> Iisaa wii mo kasen:

—Simon, 6ii Yuhanna, ada yidi kam naa?

O jaabii:

—Sanne, Moobbo, ada anndi mido yidu maa!

Iisaa wii mo:

—Tiidu e baali am!

<sup>17</sup> Iisaa wii mo kasen:

—Simon, 6ii Yuhanna, ada yidi kam naa?

Piyeer sunaa sabi jooni woni cilol tata6ol ko Iisaa wii mo «Ada yidi kam naa?» Piyeer wii mo:

—Joomiraado, ada humpitii huunde fuu, ada anndi mido yidu maa.

Iisaa wii mo:



—Tiiɗu e baali am! <sup>18</sup> Miɗo haalane goonga, e njokollaaku maa a ɓoornike kaddule maa, a yehii to njiɗ-ɗaa fuu. Kaa nde a naywii, a foocan juude maa, godɗo ɓoorne ɗe, nabe to a yiɗaa.

<sup>19</sup> E ɗii haalaaji Iisaa sapporii no Piyeer maayrata e no teddinirta Laamɗo. Nde o haalnoo ɗum ndee, o wii ɗum:

—Jokkam!

*No Iisaa haaliri haala taalibbo mum korsuɗo oo*

<sup>20</sup> Piyeer yeecitii, yii taalibbo mo Iisaa horsini oo ana jokki e mum'en. Kajum woni naayinooɗo e Iisaa nde ɓe kirtotonoo ndee, so wii: «Moobbo, homo woni jammbotooɗo ma oo?»

<sup>21</sup> Nde Piyeer yiinoo korsuɗo oo ndee, wii Iisaa:

—Moobbo, hono oo nee wattinirta?

<sup>22</sup> Iisaa jaabii mo:

—So miɗo muuyani mo nguurndam faa nde ngartu-mi, koɗum hillu maa hen? Aan kaa, jokkam tan.

<sup>23</sup> Ngol konngol saakii hakkunde goonɗinɓe Iisaa fuu: «Taalibbo oo maayataa.» Kaa Iisaa wiyaali mo maayataa, ko o wii ɗee: «So miɗo muuyani mo nguurndam faa nde ngartu-mi, koɗum hillu maa hen?»

<sup>24</sup> Oo taalibbo seettii ɗee kulle so winndi ɗe, eɗen anndi duu seedaaku makko oo yo goonga.

*Timmooɗe dewtere ndee*

<sup>25</sup> Iisaa wadii kuɗɗe godɗe keewɗe kasen. So ɗe mbinndiranooma gootel gootel, miɗo miila ɗee dewte mbaawataano heyude e aduna oo.

## Golle Nelaabe

<sup>1</sup> Waayam Tawfilus, e ley dewtere am aranndeere ndee, mi winndii hen ko Iisaa fuddiri gollude e waajaade fuu, <sup>2</sup> faa jannde nde mo jabbinaa ndee, caggal o wasike nelaabe 6e o suforii Ruuhu Ceniido 6ee.

<sup>3</sup> Caggal nde o torraa ndee, o 6annginani 6e hoore makko, o hollirii 6e e daliilaaji keewdi omo wuuri. O wondi e ma66e balde capande nay, omo waajoo 6e haala Laamu Laamdo. <sup>4</sup> Nannde wootere omo jaamda e ma66e, o wasii 6e pati 6e ngoddo Urusaliima, 6e kettoo fodoore Baabiraado nde 6e naniri mo ndee.

O wii:

<sup>5</sup>—Yaayaabatisirannoo ndiyam, kaa e ley balde seeda, onon, on mbatisirte Ruuhu Ceniido.

<sup>6</sup> Be fuu 6e kawri, 6e lamndii mo, 6e mbii:

—Joomiraado, e oo wakkati ngartirtaa laamu Israa'iila naa?

<sup>7</sup> Iisaa jaabii 6e, wii:

—On mbaawaa annude jamaanuujii e wakkatiiji di Baabiraado wadiri baawde mum. <sup>8</sup> Kaa so Ruuhu Ceniido oo jippike e moodon, on ke6an baawde, on laatoto seedee'en am ley Urusaliima e ley leydi Yahuudiya fuu, ka6um e Samariya, faa to leydi haadi.

<sup>9</sup> Nde o haalnoo dum ndee, o jabbinaa. Be tiggittii, e6e yeewa faa luurde suddi mo.

<sup>10</sup> Do 6e tiggittii kammu oo tawi omo jabbinee doo, wor6e didon 6e kaddule daneje ngari ndardii e ma66e, <sup>11</sup> mbii:

—Galilinkoo6e, ko saabii so ndari-don, odon yeewa kammu? Iisaa ittaado e mon so jabbintinaa dow kammu oo wartiran hono no njiiru-don omo jabbittira dow kammu nii.

<sup>12</sup> Nde 6e iwnoo to waamnde haayre wiyeteende Jaytun ndee, 6e mbirfittii Urusaliima. Ton e Urusaliima ana waara e kilon gooto. <sup>13</sup> Nde 6e njottii ndee, 6e jabboyi suudu dowuuru ndu 6e mboownoo moo6taade e mum nduu. Nelaabe 6ee ngoni: Piyeer e Yuhanna e Yaakuuba e Andire e Filipa e Tomaa e Bartolome e Matta e Yaakuuba 6ii Alfaa e Simon kiranoowo suudu baaba e Yahuuda 6ii Yaakuuba. <sup>14</sup> Be fuu 6e laatii daande wootere, e6e tiidi e duwaawu, kam6e e mijiraabe Iisaa e Mariyama inna Iisaa e rew6e wo66e.

### *No Mattiyas loomtorii Yahuuda*

<sup>15</sup> Ley deen palaade, goondin6e ko waarata e teemedere e noogay kawri. Piyeer immii, darii hakkunde ma66e, wii:

<sup>16</sup>—Sakiraabe, ko Ruuhu Ceniido haaliri e hunduko Daawuuda, ko woni e Binndi dii koo, tabitirii no haaniri nii: o haaliino haala Yahuuda, kolludo nanngu6e Iisaa 6ee laawol oo. <sup>17</sup> E meeden Yahuuda hiisetenoo, o he6ii ngedu makko e golle e nelal. <sup>18</sup> (Kaalisi mo o yeenanoo e golle makko bondo oo, o soodi dum ngesa, o yehi o wartoyii ley magga, reedu makko seekii, teketi makko fuu mbaylii e leydi. <sup>19</sup> Yim6e Urusaliima fuu nanii dum. Dum wadi so 6e inndiri ngesa ngaa Akeldama. E ley demngal ma66e dum woni «Ngesa Yiyamaawa».) <sup>20</sup> Sabi dum winndii e ley dewtere Jabuura:

«Yo galle makko laato saabeere,  
pati fay gooto ho6u hen.

Yo goddo darto darnde makko.»\*

\* 1:20 Jabuura 69.26; 109.8

<sup>21</sup> Haya, worbe yogaa6e njaadii e men ko juuti gila nde Joomiraado men Iisaa wondi e men ndee, <sup>22</sup> iwde e wakkati mo Yaayaa looti mo lootogal batisima yaade e jalaande nde o 6amtaa faade e kammu ndee. Joonnoo, ana tilsi gooto e ma66e laatidoo e men seedee immitagol Iisaa.

<sup>23</sup> Be ndarni worbe didon: Yuusufu noddirteedo Barasaba coowirteedo Yustus, kajum e Mattiyas. <sup>24</sup> Be nduwii, 6e mbii:

—Joomiraado, aan anndudo berde yim6e fuu, fammin min mo cufi-daa e 6ee doo didon <sup>25</sup> faa roondoo golle e nelal, loomtoo Yahuuda joppudo dum so yehi to nokku mo haandi e mum oo.

<sup>26</sup> Be ngadi urwa ma66e. Urwa oo hawri e Mattiyas. O hiisodaa e nelaabe sappo e go'o 6ee.

## 2

### *No Ruuhu Ceniido jipporii dow goondin6e*

<sup>1</sup> Nde iidi biyeteedo Pantekot warnoo ndee, goondin6e Iisaa 6ee fuu moobtii e nokku gooto. <sup>2</sup> Oon wakkati fuu, dillere wa'unde no henndu mawndu nii iwri dow kammu, hebbini suudu do 6e njoodii doo fuu. <sup>3</sup> Ko wa'i no demde yiite nii 6anngani 6e. De peccii, de pawii e gooto ma66e fuu. <sup>4</sup> Be fuu 6e keewi Ruuhu Ceniido, 6e puddi haalde demde janane no Ruuhu oo hokkiri 6e 6e kaala nii.

<sup>5</sup> Wor6e Yahuudiyankoo6e hul6e Laamdo iwooo6e e tateeji dii fuu ana njoodii Urusaliima. <sup>6</sup> Nde dillere ndee wadunoo ndee, jamaa oo fuu hawriti, wemmbaa, sabi gooto fuu nanii demngal mum ana haalee. <sup>7</sup> Be fuu 6e mbemmbaa, 6e kaaynaa, 6e mbiyondiri:

—Bee haaloobe fuu nganaa Galilinkoo6e naa? <sup>8</sup> Dum nee, hono hen gooto e meeden fuu nanirta ko 6e kaalata e demngal ngal muyni? <sup>9</sup> En Partiyankoo6e e Mediyankoo6e e Elamiyankoo6e, en joodiibe Mesopotamiya, kajum e Yahuudiya e Kappadokiya e Ponta e Asiya <sup>10</sup> e Firigiya e Pamfiliya e Misira e leyde sera Libiya hedde Sireene. Yoga e meeden iwii e Roma, <sup>11</sup> en Yahuudiyankoo6e kajum e naatu6e e diina Yahuudiyankoo6e. Yoga kasen iwii Kereta, yoga iwii leydi Arabiya. Kaa dum e taweede fuu, en fuu eden nii nana e6e kaala e demde meeden gollleeji mawdi di Laamdo wadi dii!

<sup>12</sup> Be fuu 6e mbemmbaa, 6e cikkitii, 6e mbiyondiri:

—Kodum dum foti laataade?

<sup>13</sup> Wob6e ana njaayra goondin6e 6ee, ana mbiya:

—Be haar6e doroo so e6e cigira!

### *No Piyeer waajorii jamaa oo*

<sup>14</sup> Piyeer dardii e sappo e go'o 6ee, toowni daande muudum, wii jamaa oo: —Onon Yahuudiyankoo6e e onon joodiibe Urusaliima fuu, kettinee haala am yalla odon paama kabaaru gadudo oo. <sup>15</sup> Bee yim6e nganaa sigir6e hono no onon miildaton nii, sabi jooni yo jawlal tan. <sup>16</sup> Dum woni ko annabi Yo'ila wii:

<sup>17</sup> «Laamdo wii:

E ley jalaade cakitotoode dee

mi saakan Ruuhu am e dow tagaa6e fuu.

Bi66e moodon wor6e e rew6e

kaaliran hono no annabaa6e nii,

jokol6e moodon njiyan ko yellitii e mum'en,

nayee6e moodon koydinte.

<sup>18</sup> Fay golloo6e am wor6e e golloo6e am rew6e,

mi saakan Ruuhu am dow muudum'en e ley deen jalaade,  
6e kaaltan konngol ngol loow-mi e ma66e ngol.

19 Mi wadan kaayde dow kammu,  
mi wadan taagumansaaji dow leydi,  
di laatoo yiyam e yiite e curki.

20 Fade jannde gartol Joomiraado mawnde teddunde ndee warde,  
naange ni66an,  
lewru wojjan hono no yiyam nii.

21 Nden, neddo fuu noddudo innde Joomiraado hisinte.»\*

22 Piyeer wii kasen:

—Israa'ilankoo6e, kettinee ddi haalaaji: Iisaa Nasaraatunke oo yo neddo mo Laamdo subanii on. Laamdo hokki dum baawde, o hokki dum wadude kaayde e taagumansaaji hakkunde mon, no onon e ko'e mon anndir-don nii. 23 On ngadii oon neddo e juude bon6e, on tontii mo e leggal bardugal, on mbaririi mo no Laamdo muuyrunoo dum laatoo gila arannde nii.

24 Kaa Laamdo wuurtinii mo, itti mo e naawalla maayde, sabi maayde ndee waawaanoo heddoraade mo. 25 Sabi Daawuuda ana haala haala makko nde wii:

«Wakkati fuu mido yiya Joomiraado,  
sabi omo jaamo am, pati mi yeryerta.

26 Saabe majjum 6ernde am seyii,  
demngal am jaarii  
faa terde am duu mbaaltoo dow jikke,

27 sabi a yoppataa yonki am hakkunde maay6e,  
a accataa Ceniido maa oo jola.

28 A anndinii kam laawi nguurdam,  
mido seyii sabi ada wondi e am.»†

29 Piyeer jokkini hen:

—Sakiraa6e, mido haalana on ko laa6i haala njaati meeden Daawuuda: o maayii, o iramaa, yanaande makko ndee ana do meeden doo faa hannde.

30 O annabaajo, omo anndi Laamdo hunanike mo gooto e taaniraa6e makko joottoto e bimmbeere makko laamu. 31 O adii o yii o haali haala immitagol Almasiihu, kajum yonki muudum accaaka hakkunde maay6e, terde muudum jolaali. 32 Oo woni Iisaa mo Laamdo immintini, min fuu miden ceedii.

33 Laamdo toowni mo, heedini mo jaamo muudum, mo he6i e Baabiraado Ruuhu Ceniido podananoodo en oo, o saaki dum. Jooni odon njiya dum, odon nana dum. 34 Sabi Daawuuda meedaali njabbude dow kammu, kaa wii:

«Joomiraado wii Joomam:  
Jooda jaamo am,

35 faa mi wada nja66aa way6e maa.»‡

36 Yo suudu baaba Israa'iila fuu taylor Laamdo wadii Iisaa mo tontu-don e leggal bardugal oo Joomiraado, wadii dum Almasiihu.

### *Haala deental adii6e goondinde*

37 Nde 6e nannoo kaa haala ndee, 6e tayi sanne, 6e mbii Piyeer e nelaabe heddi6e 6ee:

—Sakiraa6e, kodum min ngadata?

38 Piyeer jaabii 6e, wii:

\* 2:21 Yo'ila 3.1-5 † 2:28 Jabuura 16.8-11 ‡ 2:35 Jabuura 110.1

—Tuubee, gooto e moodon fuu lootiree lootogal batisima e innde Iisaa Almasiihu, yalla odon keba yaafeede luutti. Nden on ndokkete Ruuhu Ceniido. <sup>39</sup> Sabi fodoore ana woodani on, onon e fiibe moodon e woddube fuu. Ende woodani neddo mo Joomiraado Laamdo meeden noddi fuu.

<sup>40</sup> Caggal dum, Piyeer seedanike 6e haalaaji goddi keewdi, ana waajoo 6e, ana wiya:

—Celee e ndee fedde bonnde yalla odon kisa.

<sup>41</sup> Jaube haala makko 6ee lootaa lootogal batisima. Nannde nden, ana foti ujunaaji tati neddo ko naati e deental goondinbe ngal.

<sup>42</sup> E6e njokki waaju nelaabe 6ee, e6e nanngondiri e deental ma66e ngal, e6e taya buuru, § kasen e6e ngadida duwaawuuj. <sup>43</sup> Kulol naati e gooto fuu, sabi nelaabe 6ee kapum'en duu ana ngadannoo kaayde e taagumansaaji keewdi. <sup>44</sup> Goondinbe 6ee fuu yu daande wootere, 6e ngadi fii ma66e fuu foroba. <sup>45</sup> Be cootti jawleele ma66e, 6e ndokki gooto fuu ko hasindini e muudum. <sup>46</sup> Nannde fuu 6e kawritan ley Suudu Dewal Mawndu nduu, 6e laatii daande wootere, e6e taya buuru, e6e naamda ley cuudi ma66e ley weltaare e seyo. <sup>47</sup> E6e njetta Laamdo, yimbe fuu ana njidi 6e. Nannde fuu Joomiraado ana beydana deental ngal hisoo6e.

### 3

#### *No Piyeer selliniri bonnguujoo e no waajorii yimbe*

<sup>1</sup> Piyeer e Yuhanna naaddi ley Suudu Dewal Mawndu nduu wakkati sallifanaa. <sup>2</sup> Tawi gorko bonnguujoo pindudo e bonnguwaaku ana joodii damal Suudu Dewal Mawndu mbiyeteengal Damal Lobbal. Nannde fuu yimbe makko njoyyinan mo don faa o garbinoo naatoobe Suudu Dewal Mawndu 6ee sadaka. <sup>3</sup> Nde o yii Piyeer e Yuhanna ana naata ndee, o garbinii dum'en. <sup>4</sup> Be taykitii mo, non Piyeer wii:

—Yeew min!

<sup>5</sup> O yeewi 6e, sabi omo miilii he6ude e ma66e huunde. <sup>6</sup> Piyeer wii:

—Mi walaa kaalisi, mi walaa kanje, kaa mi hokkete ko njogii-mi koo: saabe Iisaa Almasiihu Nasaraatunke oo, imma yaa!

<sup>7</sup> O nangi junngo muudum naamoo, o darni dum. Don e don koyde muudum teenji e leydi, <sup>8</sup> gurbitii, darii, ana yiiloo. O naatidi e ma66e ley Suudu Dewal Mawndu nduu, omo yiiloo, omo fitta, omo yetta Laamdo. <sup>9</sup> Yimbe 6ee fuu njii mo, omo yiiloo, omo yetta Laamdo. <sup>10</sup> Be annditi mo, kanko woni joodotonoodo e Damal Lobbal ngal so ana garbinoo oo. Kaayde e wembere nangi 6e sanne saabe ko o hefi koo.

<sup>11</sup> Do o jokkondirnoo e Piyeer e Yuhanna doo, yimbe 6ee fuu ndogi kawriti e ma66e to ndanki mbiyeteeki ndanki Suleymaana too no poti haayneede.

<sup>12</sup> Nde Piyeer yiinoo dum ndee, wii yimbe 6ee:

—Israa'iilankoo6e, ko wadi so odon kaaynee dum doo? Ko wadi so odon puttina min gite, hono baawde amen naa kulol amen Laamdo wadi so oo gorko ana yaha e koyde muudum? <sup>13</sup> Laamdo Ibarahiima e Isiyaaka e Yaakuuba, Laamdo njaatiraabe meeden, teddini kaadime muudum Iisaa. Kaa onon on ngadii mo e juude laamu, on njankirii mo yeeso Pilaatu, fay so taweede Pilaatu ana yidunoo yoppitinde mo. <sup>14</sup> Kaa onon, on njankirii Ceniido Poocitiido oo, on ndaartii yoppitaneede bardo hoore. <sup>15</sup> Gaddoowo nguuraand nduumiidam oo, oon mbar-don. Kaa Laamdo wuurtinii mo e

maayde. Miden ceedii dum. <sup>16</sup> Gorko mo njiyatn mo annu-don oo, ko mo goondini Iisaa koo sellini mo yeeso moodon on fuu.

<sup>17</sup> Haya, sakiraafe, hono ko onon e hooreefe moodon ngadu-don Almasiihu koo, mido anndi yo majjere tan. <sup>18</sup> Kaa hono nii Laamdo tabintiniri ko annabaafe muudum fuu kaali koo: Almasiihu torroto. <sup>19</sup> Ndennoo tuubee, ngarton, yalla luutti moodon ana tosee, <sup>20</sup> yalla Joomiraado ana waddana on wakkatiiji ceyniidi, nelda on Iisaa Almasiihu cubananoodo on gila arannde oo. <sup>21</sup> Ana tilsii oon heddoo dow kammu faa nde Laamdo heydintini kulle dee fuu, no annabaafe seniife fee kaaldunoo haala muudum gila arannde nii.

<sup>22</sup> Sabi Muusaa wii: «Joomiraado Laamdo moodon nelan e mon annabaajo hono am, sakiike mon. Njafon huunde fuu ko o haalanta on. <sup>23</sup> Neddo fuu mo jafanaali annabaajo oo, yaltinte e suudu baaba, halkete.»\*

<sup>24</sup> Gila e Samuyila faa e annabaafe jokku6e e muudum, 6e fuu e6e kaalanoo haala dee jalaade. <sup>25</sup> Onon ngoni ronoo6e annabaafe fee, onon ngoni ronoo6e aadi ndi Laamdo nanngani njaatiraafe men fee nde wii Ibarahiima: «E iwdi maa, cuudi baaba aduna oo fuu ke6irta barke.»†

<sup>26</sup> Nde Laamdo immintinnoo Iisaa kaadime muudum oo ndee, e moodon o adii nelde dum, faa o wada e mon barke e ley ko o wartirta homo e mon fuu e makko so njoppon golle mon bondo.

## 4

### *Kabaaru Piyeer e Yuhanna yeeso waalde Saahiife*

<sup>1</sup> Nde Piyeer e Yuhanna kaaldata e yim6e fee ndee, yottinoo6e sadaka e mawdo hayboo6e Suudu Dewal Mawndu oo, kaɗum e Saduki'en ngari e ma66e. <sup>2</sup> E6e mettaa sabi Piyeer e Yuhanna ana njanngina yim6e fee haala immital maay6e, ko 6e mbii Iisaa wuurtii koo. <sup>3</sup> Be nanngi 6een, 6e uddi dum'en e kasu faa janngo muudum, sabi tawii hiiriino. <sup>4</sup> Kaa heew6e e nan6e waaju oo 6ee ngoondini, faa 6e laatii ko foti ujunaaji joy gorko.

<sup>5</sup> Janngo muudum, hooreefe ma66e e maw6e e dunkee'en Sariya kawritoyi Urusaliima. <sup>6</sup> Annas Jottinoowo Sadaka Mawdo oo e Kayafas e Yuhanna e Aleksandere e iwdi hooreefe yottinoo6e sadaka ndii fuu ana ton. <sup>7</sup> Be ndarni Piyeer e Yuhanna yeeso ma66e, 6e lamndii dum'en e dow dabare honde naa alhorma homo 6e celliniri bonnguujo oo.

<sup>8</sup> Nden, Piyeer keewdo Ruuhu Ceniido oo wii 6e:

—Hooreefe e maw6e, <sup>9</sup> so on lamndike min hannde moyyere nde min ngadani bonnguujo oo ndee, on lamndike min no o selliri, <sup>10</sup> odon kaani anndineede dum, onon e Israa'iilankoo6e 6ee fuu. Saabe Iisaa Almasiihu Nasaraatunke mo tontuno-don e leggal bardugal so Laamdo wuurtini dum oo, kaɗum darni mo yeeso mon so sellini mo. <sup>11</sup> Iisaa woni: «haayre nde onon mahoo6e tippiti-don,

laatiinde haayre burnde fuu teentilaade e maadi ndii.»\*

<sup>12</sup> Kisindam he6irtaake e goddo fey, innde wonnde duu walaa ley aduna oo fuu nde Laamdo hokki yim6e nde kaan-den hisinireede.

<sup>13</sup> Nde waalde Saahiife 6ee njiinoo causal Piyeer e Yuhanna ndee, 6e kaaynaa, sabi e6e anndi been njannginaaka, 6e baadiyankoo6e. Be annditi been ana ngondunoo e Iisaa. <sup>14</sup> Kaa nde 6e njiinoo gorko cellinaado oo ana

\* 3:23 Fillitagol Tawreeta 18.15,18,19 † 3:25 Puɗfoode 12.3 \* 4:11 Jabuura 118.22

dardii e ma66e, walaa fuu ko 6e mbaawi yeddude. <sup>15</sup> Be njamiri yo been njaltu sarirde ndee, e6e ndawrida, <sup>16</sup> e6e mbiya:

—Kodum ngadatn 6ee doo wor6e didon? Tabitanii hodufe Urusaliima fuu, 6e ngadii doo haaynde maanunde, kasen duu en mbaawaa yeddude dum. <sup>17</sup> Kaa ndaalo-den 6e, kaden 6e haalande fay gooto innde Iisaa ndee pati dum saakoo e ley yim6e 6ee.

<sup>18</sup> Nden 6e nodditi been kasen, 6e njaggini dum'en pati mbaajoo, pati njanngina innde Iisaa. <sup>19</sup> Kaa Piyeer e Yuhanna njaabii 6e, mbii:

—Onon e ko'e moodon, yeewee yalla dwtanaade on luutta Laamdo woni goonga. <sup>20</sup> Minen kaa, min mbaawaa njoottude haalde ko min njiiri gite amen e ko min naniri noppi amen.

<sup>21</sup> Be ndaalii been kasen. Caggal dum, 6e njoppiti dum'en, tawi 6e kebaali fay huunde ko 6e njukkira dum'en saabe yim6e 6ee. Sabi yim6e fuu ana njetta Laamdo dow ko wadi koo. <sup>22</sup> Celliniraado haaynde ndee oo, duubi muudum ana 6uri capande nay.

<sup>23</sup> Nde 6e njoppaa ndee, Piyeer e Yuhanna mbirfitii to yim6e muudum'en, njantanii dum ko hooree6e yottinoo6e sadaka e maw6e mbii dum'en koo fuu. <sup>24</sup> Nde been nani dum ndee, 6e fuu 6e laatii daande wootere, 6e eewnii Laamdo, 6e mbii:

—Laamdo, tagudo kammu e leydi e geeci e ko woni e muudum'en fuu, <sup>25</sup> aan kaalirido dow baawde Ruuhu Ceniido e hunduko njaati amen Daawuda kaadime maa nde oon wii:

«Ko saabanii leji jirkitaade?

Ko saabanii yim6e miilde miilooji 6oli?

<sup>26</sup> Kaanankoo6e aduna ndarii, ardiibe mo6tondiri faa ka6a e Joomiraado e Almasiihu muudum.»†

<sup>27</sup> Tayoral, e ley ndee ngalluure Hirudus e Pontiyu Pilaatu nanngondirii e Israa'ilankoo6e e leji goddi faa ka6a e Iisaa, kaadime maa ceniido mo cu6i-daa oo, <sup>28</sup> yalla e6e ngolla ko koddirno-daa baawde maa e muuyde maa fuu. <sup>29</sup> Jooni Joomiraado, yeew gidi ma66e dii, ndokkaa golloo6e maa waajoraade haala maa fuu cuusal, <sup>30</sup> 6anngin baawde maa, sellin jaw6e, wadu taagumansaaji e kaayde saabe Iisaa, kaadime maa ceniido oo.

<sup>31</sup> Nde 6e tilinoo jaagaade Laamdo ndee, nokku do 6e kawritinnoo doo dimmbii. Be fuu 6e kebbinaa Ruuhu Ceniido, e6e mbaajoroo konngol Laamdo ngol cuusal.

### *No goondin6e 6ee nguurdi*

<sup>32</sup> Jamaa goondin6e oo fuu yo daande wootere yo hakkille gooto. Be ngadi ko 6e njogii fuu foroba, fay gooto e ma66e wiyantaa jawdi muudum fay huunde. <sup>33</sup> Baawde mawde nelaabe 6ee ceettortonoo immitagol Iisaa Joomiraado, kasen duu moyyere mawnde ana e ma66e 6e fuu. <sup>34</sup> Fay gooto e ma66e hasindinaa, sabi jogiibe gese e galleeji fuu coottan, ngadda kaalisi oo, <sup>35</sup> tummba dum e juude nelaabe 6ee. Nden homo e ma66e fuu hokkee ko hasindini e muudum.

<sup>36</sup> Iwdo e lejol Lewi† biyeteedo Yuusufu, mo nelaabe 6ee coowirannoo Barnabas (dum woni 6ii koomtoowo), pindo Kiprus, <sup>37</sup> ana joginoo ngesa, sootti nga, waddi kaalisi oo, tummbi dum e juude nelaabe 6ee.

† **4:26** Jabuura 2.1-2 † **4:36** Yim6e lejol Lewi ngonnoo humaniibe golle dewal Laamdo gila e jamaanu Muusaa.

## 5

*No Ananias e Safira penirani Ruuhu Ceniido*

<sup>1</sup> Gorko biyeteedo Ananias ana wondi e jom suudu muudum Safira. O sootti ngesa makko. <sup>2</sup> O suudi feccere e kaalisi oo, jom suudu makko oo ana anndani. O nabi ko heddii koo, o hokki nelaabe 6ee. <sup>3</sup> Piyeer wii:

—Ananias, ko saabii so accu-daa Ibiliisa naata e bernde maa faa penanaa Ruuhu Ceniido, cuudaa yoga e coggu ngesa ngaa? <sup>4</sup> Tama wanaa aan e hoore maa jeynoo nga? Tama nde coottu-daa nga ndee, a waawaano nawtoraade kaalisi oo? Ko hewti maa so ngad-daa nii? Wanaa yimbe penan-daa, Laamdo penan-daa.

<sup>5</sup> Nde Ananias nani kaa haala ndee, tayi, saami, maayi. Dum laatani nanbe dum 6ee fuu kulol manngol. <sup>6</sup> Sukaabe jokolbe immii, ngadi mo e kasanke, ndoondii mo, njalti sella, iri mo.

<sup>7</sup> Caggal muudum, ko waarata e leeruujii tati, jom suudu makko naati, tawi nanaali ko wadi koo. <sup>8</sup> Piyeer wii mo:

—Haalanam so tawii dum jaati coottu-don ngesa moodon ngaa?

O wii:

—Ooho, dum jaati min cootti.

<sup>9</sup> Nden Piyeer wii mo:

—Hono aan e jom suudu maa kawrir-don faa itton koro Ruuhu Joomiraado? Muryu, iroynoobe jom suudu maa ana ngara, naa be nabe, aan duu!

<sup>10</sup> Oon wakkati fuu, kanko duu o tayi, o saami yeeso Piyeer, o maayi. Jokolbe 6ee naati, tawi o maayii, 6e ndoondii mo, 6e njalti sella, 6e iri mo bange jom suudu makko. <sup>11</sup> Kulol manngol nanngi deental goondinbe 6ee e nanbe dum 6ee fuu.

*No nelaabe 6ee ngolliri taagumansaaji e kaayde*

<sup>12</sup> Nelaabe 6ee ana ngadannoo taagumansaaji e kaayde keewde hakkunde yimbe 6ee. Goondinbe 6ee fuu ana kawrita ley ndanki Suleymaana kii, 6e fuu 6e daande wootere. <sup>13</sup> Fay gooto e wobbe 6ee suusaa takkaade e ma6be. Kaa dum e taweede yimbe 6ee ana teddina 6e. <sup>14</sup> Goondinbe Joomiraado 6ee ana beydoroo yimbe heewbe, jamaa worbe e rewbe, <sup>15</sup> faa 6e ndoondii jawbe, 6e njaltini dum'en dow mbeddaaji, e6e lelina dum'en e dow leese e daage, yalla so Piyeer warii, mbeelu muudum ana mema yoga ma6be. <sup>16</sup> Yimbe heewbe iwri e geelle piliide Urusaliima dee, ngaddi jawbe e laddaabe. Been fuu cellinaa.

*No nelaabe 6ee torrira*

<sup>17</sup> Ndennoo, Jottinoowo Sadaka Mawdo oo e tawdaabe e muudum hakkille 6ee, dum woni Saduki'en, haasidaaku naati e ma6be. <sup>18</sup> Be nanngi nelaabe 6ee, 6e uddi dum'en ley kasu. <sup>19</sup> Kaa e oon jemma, malaa'ika Joomiraado udditi dame kasu oo dee, yaltini 6e, wii:

<sup>20</sup> —Njehee ndaroyee ley Suudu Dewal Mawndu too, mbaajo-don yimbe haalaaji dokkooji nguurndam kesam dii fuu.

<sup>21</sup> Nde 6e nannoo dum ndee, 6e naatoyi e Suudu Dewal Mawndu nduu gila beetee, e6e njanngina.

Beetee Jottinoowo Sadaka Mawdo oo e battaa'en mum noddii waalde Saahii6e e maw6e Israa'iila fuu batu. Be njamiri nelaabe 6ee ittoyee to kasu too, ngaddee. <sup>22</sup> Kaa nde doomoobe 6ee njottinoo ndee, tawaali been e ley kasu oo. Be mbirfitii, 6e kaaltani waalde Saahii6e 6ee, 6e mbii:



<sup>23</sup> —Min tawii kasu oo ana uddii ana sokii, doomoobe 6ee ana ndarii sella ana pewtondiri e dame dee, kaa nde min udditinnoo ndee, min tawaali fay gooto ley too.

<sup>24</sup> Nde mawdo doomoobe Suudu Dewal Mawndu oo e hooreebe yottinoobe sadaka 6ee nani dum ndee, 6e mbemmbaa ko dum foti laataade. <sup>25</sup> Nden neddo gooto wari, humpiti 6e, wii:

—Wor6e 6e udduno-don kasu 6ee, annii ndarii ley Suudu Dewal Mawndu too, ana njanngina yim6e!

<sup>26</sup> Nden, mawdo doomoobe oo yaadi e doomoobe, ngartiri nelaabe 6ee. Kaa 6e ngadiraali dum doole sabi e6e kula pati yim6e mbedoo 6e kaaye.

<sup>27</sup> Nde 6e ngartiri been ndee, 6e ndarni dum'en yeeso waalde Saahiibe 6ee. Jottinoowo Sadaka Mawdo oo lamndii 6e, <sup>28</sup> wii:

—Min ndaalinoke on daalooe sattunde, pati njannginon haala gorko oo. Kaa onon on caakii waaju moodon oo ley Urusaliima. Kasen duu, odon njidi min ngoytiree gorko oo.

<sup>29</sup> Piyeer e nelaabe 6ee njaabii, mbii:

—Neddo ana haani downtanaade Laamdo faa 6ura no downtirantoo yim6e nii. <sup>30</sup> Laamdo njaatiraabe meeden wuurtinii Iisaa mo tontu-don e leggal so mbar-don dum oo. <sup>31</sup> Kanko Laamdo teddini so toowni, so joyyini bannge muudum jaamo, wadi mo hooreejo, wadi mo kisinoowo faa o hokka Israa'iilankoo6e no tuubira, yalla ana ke6a yaafeede luutti. <sup>32</sup> Minen ngoni seedee'en kabaaruuji dii, minen e Ruuhu Ceniido mo Laamdo hokki been downtaniibe dum.

<sup>33</sup> Nde 6e nani dum ndee, 6e mbilaa sanne, 6e ndawridi no 6e mbarda been.

<sup>34</sup> Gorko jeyaado e waalde Farisa'en biyeteedo Gamaliyel, janninoowo Sariya Muusaa, tedduo e yim6e fuu, immii darii hakkunde waalde Saahiibe 6ee, yamiri nelaabe 6ee njaltinee seeda. <sup>35</sup> Caggal dum, o wii 6e:

—Israa'iilankoo6e, ndeenee ko'e mon e 6ee yim6e e ko anniyi-don wadude koo. <sup>36</sup> Tewdas banngiino ko 6ooyaali. Omo jogorinoo hoore makko won no o foti. Ko waarata e yim6e teemedde nayon ana njokkunoo e makko. O waraama, jokkunoo6e e makko 6ee fuu caakike, fay gooto heddaaki.

<sup>37</sup> Caggal makko, Yahuuda Galilinke oo wariino wakkati limgal, yim6e heew6e njokkii e makko. O halkike kanko duu, jokkunoo6e e makko 6ee fuu caakike. <sup>38</sup> Jooni, mido haalana on: ngoortee 6ee yim6e, celon e ma66e. Sabi so anniyaaji ma66e e golle ma66e to yim6e iwri, firritoto. <sup>39</sup> Kaa so nii tawii to Laamdo iwri, on mbaawaa sakkaade dum. Kaybee, pati on luuttu Laamdo!

<sup>40</sup> Waalde Saahiibe 6ee nja6i dabare makko. Be nodditi nelaabe 6ee, 6e pii dum'en, 6e ndaalii dum'en pati kaala haala innde Iisaa kasen, 6e njoppiti dum'en. <sup>41</sup> Nelaabe 6ee iwi yeeso waalde Saahiibe 6ee. Be ceyii sabi Laamdo ana teddini 6e, ko yim6e koyini 6e saabe Iisaa koo. <sup>42</sup> Gila dum wadi, 6e keraali e waajaade e jannginge Kabaaru Lobbo haala Iisaa Almasiihu ley Suudu Dewal Mawndu nduu e ley galleeji.

## 6

### *No wor6e njeddon cubiraa faa mballa nelaabe 6ee*

<sup>1</sup> E deen balde, tawi taalibaabe 6ee ana beyduo heewde, Yahuudiyankoo6e haaloobe yunaninkooe ngullanii Yahuudiyankoo6e haaloobe ibaraninkooe, sabi rew6e mum'en talka'en 6e wor6e mum'en maayi 6ee njakkantaake hiraande so yim6e fuu ana njakkanee. <sup>2</sup> Nelaabe sappo e didon 6ee noddii jamaa goondin6e oo fuu, mbii:

—Minen, yoppude konngol Laamdo, min kiinnoo jakkaade hiraande, sell-antaa min. <sup>3</sup> Sakiraaɓe, cuɓee hakkunde moodon worɓe njeɗɗon anndiraaɓe gikku lobbo, heewɓe Ruuhu Ceniido e caahu, faa min keettina dum'en e oon golle. <sup>4</sup> Minen kaa, accon min kiinnoo wafude duwaawu e waajaade konngol Laamdo.

<sup>5</sup> Haala kaa weli goondinɓe ɓee fuu. Nden ɓe cuɓii Eciyen, gorko goondindo keewdo Ruuhu Ceniido oo, kaɗum e Filipa e Porokor e Nikanor e Timon e Parmenas e Nikolas, jeyaaɗo Antiyokiya naatudo e diina Yahuudiyankooɓe oo. <sup>6</sup> Be ndarnaa yeeso nelaabe ɓee. Been pawɗi juude muudum'en e dow maɓɓe, nduwaniɗi ɓe.

<sup>7</sup> Konngol Laamdo ana yaaja yaade, taalibaaɓe ana ɓeydoo heewde sanne e ley Urusaliima. Yottinooɓe sadaka heewɓe ngoondini Iisaa.

### *No Eciyen nanngiraa*

<sup>8</sup> Eciyen, keewdo moyyere e baawɗe Laamdo oo, ana wafannoo kaayɗe e taagumansaaji mawɗi hakkunde yimɓe. <sup>9</sup> Kaa won yoga e jeyaaɓe e waajordu wiyeteendu waajordu rimdinaaɓe, kaɗum e iwɓe Sireene e Aleksandiri e Silisi e Asiya, immaniiɓe mo ana ndukida e makko, <sup>10</sup> kaa ɓe ndonkii jaalaade mo saabe omo haaldira e maɓɓe hakkilantaaku e Ruuhu. <sup>11</sup> Nden ɓe kaaldi e yimɓe yalla ana mbiya nanii omo yenna Muusaa e Laamdo. <sup>12</sup> Nii ɓe njirkitiri jamaa oo e mawɓe ɓee e dunkee'en Sariya ɓee. Nden, ɓe nanngi Eciyen, ɓe naɓi dum to waalde Saahiiɓe too, <sup>13</sup> ɓe ngaddi seedee'en peneɓe, ana mbiya:

—Oo gorko ɗootaali yennude Suudu Dewal Mawndu nduu, o ɗootaali yennude Sariya Muusaa. <sup>14</sup> Min nanii omo wiya Iisaa Nasaraatunke oo wurjinaa suudu nduu, waylita aadaaji di Muusaa daldi en dii.

<sup>15</sup> Saahiiɓe joodiiɓe ton ɓee fuu puttini Eciyen gite, njii yeeso makko ana wa'i no yeeso malaa'ika nii.

## 7

### *No Eciyen waajorii*

<sup>1</sup> Nden Jottinoowo Sadaka Mawdo oo lamndii:

—Ko ɓe mbii koo, hono non worri naa?

<sup>2</sup> Eciyen jaabii, wii:

—Sakiraaɓe e baabiraaɓe, accee hakke, kettinee! Laamdo tedduɗo oo ɓannganii njaati meeden Ibarahiima nde wonnoo leydi Mesopotamiya, fade muudum hodoyde Haran, <sup>3</sup> wii dum: «Eggu e leydi maa e suudu baam maa, njahaa e leydi ndi kollan-maa-mi ndii.»\* <sup>4</sup> Nden Ibarahiima iwi leydi Kaldiya, yehi hodoyi Haran. Caggal maayde baam mum, Laamdo eggini dum don, waddi dum e ndii doo leydi, ndi kodu-don e muudum joonin ndii. <sup>5</sup> Laamdo hokkaali mo e leydi ndii fay taaɓannde, kaa fodii hokkude mo ndi, ndi laattoo halal makko, kanko e iwdi makko, fay so taweede o walaa biɗɗo tafon. <sup>6</sup> Anni ko Laamdo wii: «Iwdi maa feran joodoyoo leydi jananndi, maree, torree duuɓi teemedede nay. <sup>7</sup> Kaa leɗol marngol ɓe ngol, mi jukkan dum'en. Caggal dum, ɓe njaltan, ɓe ndewa kam e oo doo nokku.»† <sup>8</sup> Nden Laamdo nanngondiri e Ibarahiima aadi. Taadagol laatii finnde aadi ndii. Hono non, Ibarahiima heɓi Isiyaaka, taadi dum nde heɓunoo balde jetti. Hono non Isiyaaka taadiri Yaakuuba, hono non Yaakuuba duu taadiri biɓɓe muudum sappo e didon, laatiiɓe njaatiraaɓe leɗi sappo e didi ɓee.

\* 7:3 Puɗɗoode 12.1 † 7:7 Puɗɗoode 15.13-14

<sup>9</sup> Njaatiraaḅe 6ee kaasidii Yuusufu, cootti ḁum Misira. Kaa Laamḁo ana wondi e makko, <sup>10</sup> hinnii mo e torraaji makko fuu, hokki mo moyyere e hakkilantaaku yeeso Fira'awna kaananke Misira oo. Oon wadi mo o dawranooḁo galle muuḁum e Misira fuu. <sup>11</sup> Nden yolbere wadi ley Misira e Kanaana fuu. Billaare mawni faa njaatiraaḅe meeden ndonki nguure. <sup>12</sup> Nde Yaakuuba nannoo jamri ana Misira ndee, neli ton njaatiraaḅe meeden. Be ngarti, 6e njehe kasen. <sup>13</sup> Nden Yuusufu anndintini sakiraaḅe muuḁum 6ee hoore mum. Suudu baaba Yuusufu duu 6anngani Fira'awna. <sup>14</sup> Nden Yuusufu neli noddanee baam mum Yaakuuba e koreeji muuḁum fuu, 6e capande njedḁon e njoyon nedḁo. <sup>15</sup> Yaakuuba nootoyii Yuusufu Misira. O maayi ton, kanko e njaatiraaḅe meeden 6ee. <sup>16</sup> Be naḁtaa Sikem, 6e iraa e yanaande nde Ibarahiima soodunoo e 6iḁḁe Hamor to Sikem too kaalisi cardi.

<sup>17</sup> Nde fodoore nde Laamḁo fodannoo Ibarahiima 6adinoo yottaade ndee, Ibaraninkooḅe keewi ley Misira. <sup>18</sup> Oon wakkati, kaananke godḁo mo anndaano Yuusufu laamii Misira. <sup>19</sup> Oon kaananke hiili lejol meeden, torri njaatiraaḅe meeden faa tilsini 6e 6e njoppa cukaloy maḁḁe yalla ana maaya. <sup>20</sup> Ley oon wakkati, Muusaa fini, laatii moy-ḁaro sanne. O muyninaa lebbi tati e galle baam makko. <sup>21</sup> Nde o tippaa ndee, 6ii Fira'awna debbo hoociti mo, jogorii mo 6iyum. <sup>22</sup> Hono non Muusaa janngiri annde Misirankooḅe fuu, o laatii barkaani haalaaji e gollleeji.

<sup>23</sup> Nde Muusaa heḁunoo duuḁi capande nay ndee, anniyii faabaade sakiraaḅe muuḁum 6iḁḁe Israa'iila. <sup>24</sup> O yii Misiranke ana tooḁa gooto maḁḁe, o yoḁtii ko nedḁo makko oo tooḁaa koo, o fii Misiranke oo, o wari ḁum. <sup>25</sup> O sikkuno sakiraaḅe makko 6ee paaman Laamḁo ana hisinira ḁum'en saabe makko, kaa 6e paamaali. <sup>26</sup> Janngo muuḁum o forri e didon maḁḁe ana kaḁa. O yidi rewrintinde 6e, o wii: «Gidiraaḅe am, onon, on sakiraaḅe! Ko waddondiri on?» <sup>27</sup> Non tooḁudo tanaa muuḁum oo dunyi mo, wii: «Homo wadu maa hooreejo naa caroowo amen?» <sup>28</sup> ḁum nee a muuyḁo warde kam no mbarduno-ḁaa Misiranke oo keeḁen nii?»<sup>†</sup> <sup>29</sup> Muusaa dogiri saabe konngol ngol, feri, yehi leydi Madiyan. O heḁi ton 6iḁḁe worḁe didon.

<sup>30</sup> Nde mo hiḁḁinnoo ton duuḁi capande nay ndee, malaa'ika 6anngani mo e ley metangal wuutuure huḁḁoore ley ladde jeereende banngae waamnde haayre wiyeteende Siinaayi. <sup>31</sup> Nde Muusaa yii ḁum ndee, haaynaa e ko yii koo. Omo battitoo faa mo yeewa, nii daande Joomiraaḁo wii: <sup>32</sup> «Miin woni Laamḁo njaatiraaḅe maa, Ibarahiima e Isiyaaka e Yaakuuba.» Muusaa darii ana siḁḁa, huli yeewde. <sup>33</sup> Joomiraaḁo wii mo: «Boorta paḁe maa, sabi nokku ḁo ndari-ḁaa ḁoo yo leydi seniindi. <sup>34</sup> Mi yii torra kewtiḁo yimḁe am 6ee to Misira, no ḁum foti naawde, mi nanii boytaali maḁḁe, mi jippiima faa mi tonngita 6e. Joonin, war mi nele Misira.»<sup>§</sup>

<sup>35</sup> Muusaa mo 6e calanii so 6e mbii: «Homo wadu maa hooreejo naa caroowo?» oo Laamḁo neli, so wadi ḁum ardiḁo e kisinoowo, saabe malaa'ika 6anngannooḁo ḁum e ley wuutuure oo. <sup>36</sup> Kanko yaltini 6e, o wadi kaayḁe e taagumansaaji ley leydi Misira e ley maayo Maaliya e ley ladde jeereende duuḁi capande nay. <sup>37</sup> Oo woni Muusaa biḁo 6iḁḁe Israa'iila: «Laamḁo nelan e mon annabaajo hono am, sakiike mon.» <sup>38</sup> Kanko wondi e malaa'ika kaaldunooḁo e makko to waamnde haayre wiyeteende Siinaayi,

<sup>†</sup> 7:28 Pergu 2.11-14    <sup>§</sup> 7:34 Pergu 3.1-10

kanko wondi e njaatiraaŋe meeden nde 6e mooŋtinoo ley ladde jeereende ndee, kanko heŋi konngi guurnooji faa o hokka en.

<sup>39</sup> Kaa njaatiraaŋe meeden njaŋaali dowaanaade mo. Be calanii mo, hakkillaaji maŋŋe mbirfii Misira, <sup>40</sup> 6e mbii Haaruuna: «Wadan en tooruuji ardotoodi en, sabi en anndaa ko hewtii Muusaa jaltinnoodo en leydi Misira oo.»\* <sup>41</sup> E ley deen jalaade 6e tafi tooru suuriindu suura gahel, 6e ngadani ndu sadaka, 6e ceyorii golle juude maŋŋe. <sup>42</sup> Laamdo duurtii 6e, yoppiri 6e rewde kooŋe kammu, hono no winndiraa e dewtere annabaabe nii:

«Hey suudu baaba Israa'iila!

Duubi capande nay di ngadu-don ley ladde jeereende dii,  
on ngadanii kam sadakaaji kirsamaaji naa?

<sup>43</sup> On ngadaali. On ndoondiima hukkuu tooru Moloko,  
kajum e hoodere tooru moodon Refan,  
nate de moyyin-don faa kujidanon dum'en!

Dum wadi so mido eggina on,  
faa naŋe-don caggal Baabila.»†

<sup>44</sup> Eciyen jokkini hen:

—Njaatiraaŋe meeden 6ee ana njoginoo hukkuu seedaaku ley ladde jeereende. Oon hukkuu moyyiniraama hono no Laamdo tinndiniri Muusaa nii. <sup>45</sup> Njaatiraaŋe meeden ndoni hukkuu oo. Be eggidi e makko wakkati mo Yosuwaa ardii 6e, 6e naanni mo leydi ndi 6e teeti lejii di Laamdo ribbi dii. Dum worri non faa jamaanu Daawuuda. <sup>46</sup> Daawuuda heŋii moyyere Laamdo, o jaagii dum yalla omo yarranee mo mahana Laamdo Yaakuuba hodorde. O heŋaali. <sup>47</sup> Suleymaana, kajum mahi ndu. <sup>48</sup> Kaa Laamdo Toowdo oo joodataako e cuudi di yimŋe ngolli, hono no annabaajo wiiri nii:

<sup>49</sup> «Joomiraado wii:

Kammu yo joodorgal am,  
leydi yo njaabirdi koyde am.

Suudu hondu mahanton kam?  
E nokku homo powtintoo-mi?

<sup>50</sup> Tama wanaa miin tagiri kulle dee fuu baawde am?»‡

<sup>51</sup> Eciyen jokkini hen, wii:

—Onon tiidube ko'e, yoorŋe berde, pahinkiniiŋe, abada odon calanii Ruuhu Ceniido oo hono no njaatiraaŋe moodon 6ee nii. <sup>52</sup> Homo woni annabaajo mo njaatiraaŋe moodon torraali dum? Be mbarii ardinoobe haalde haala garol Poocitiido, mo onon e ko'e mon njammbi-don, so mbar-don dum jooni oo, <sup>53</sup> onon heŋube Sariya Muusaa mo malaa'ika'en njippini so njokkaali dum 6ee.

### *No Eciyen wardiraa kaaye*

<sup>54</sup> Nde Saahiibe 6ee nannoo dii haalaaji ndee, 6e tikki faa 6e ndarii eŋe njattanoo mo eŋe picca pedeele. <sup>55</sup> Kaa kanko kebbinaado Ruuhu Ceniido oo, o tiggiti kammu, o yii teddeengal Laamdo, o yii Iisaa ana darii jaamo Laamdo.

<sup>56</sup> O wii:

—Yeewee! Mido yiya kammu ana udditii, Bii Neddo ana darii jaamo Laamdo!

<sup>57</sup> Be fuu 6e ngulli semmbe, 6e cukki noppi maŋŋe, 6e ndiirani mo, <sup>58</sup> 6e njaltini mo ngalluure ndee, 6e mbedii mo kaaye. Seedee'en 6ee boortii

\* 7:40 Pergu 32.1 † 7:43 Amos 5.25-27 ‡ 7:50 Esaaya 66.1-2

saayaaɗi muudum'en, njooyini bannge koyde jokolle biyeteedo Sool. <sup>59</sup> Ebe mbedoo Eciyen kaaye forri omo jaagoo Laamdo omo wiya:

—Iisaa Joomiraado, ja66a yonki am!

<sup>60</sup> Ndennoo, o diccii, o wulli faa toowi, o wii:

—Joomiraado, pati rewta 6e e dii luutti!

Nde o haalnoo dum ndee, o maayi.

## 8

<sup>1</sup> Sool ana yarii ko 6e mbari Eciyen koo.

Oon jalooma, torra mawdo hewtii deental goondin6e to Urusaliima too. Be fuu 6e caakii ley leyde Yahuudiya e Samariya, so wanaa nelaabe 6ee.

<sup>2</sup> Wor6e hul6e Laamdo iri Eciyen, mboyi dum bojji mawdi sanne. <sup>3</sup> Kaa Sool tewtii timminde deental goondin6e ngal. Omo naata cuudi, o nannga wor6e e rew6e, o daasa dum'en, o uddoya dum'en kasu. <sup>4</sup> Kaa saakinoobe 6ee naati e yiilaade ana mbaajoo Kabaaru Lobbo oo.

### *No Filipa waajorii Kabaaru Lobbo oo ley leydi Samariya*

<sup>5</sup> Filipa yehi e ngalluure wonnde ley leydi Samariya, waajii 6e haala Almasiihu. <sup>6</sup> Be fuu 6e kettinii ko Filipa waajotoo koo faa gasi, 6e njii taagumansaaji di o wadi dii. <sup>7</sup> Sabi laddaa6e heew6e, seydaani'en muudum'en njaltiri gullaali mawdi. Bonnguu6e heew6e e layoobe cellii. <sup>8</sup> Dum laatani ngalluure ndee seyo manngo.

<sup>9</sup> Gorko biyeteedo Simon ana wonnoo e ngalluure ndee. Omo gollannoo ndaggadaaku, omo haaydinannoo Samariyankoo6e sanne, omo jogorinoo hoore makko won no o foti. <sup>10</sup> Be fuu e6e njarranii mo, gila suka faa mawdo, 6e mbii:

—Oo gorko woni mo Laamdo lubii baawde biyeteede «Baawde mawde».

<sup>11</sup> Be njokkii mo ko 6ooyi saabe omo haaydinannoo 6e e bidiga makko. <sup>12</sup> Kaa nde Filipa waajinoo 6e Kabaaru Lobbo haala Laamu Laamdo e haala Iisaa Almasiihu ndee, 6e ngoondini, wor6e e rew6e fuu lootaa lootogal batisima. <sup>13</sup> Simon e hoore muudum goondini, kajum duu. Nde o batisaa ndee, o takkondiri e Filipa, o haaynaa nde o yiinoo taagumansaaji e kaayde mawde gadaade dee.

<sup>14</sup> Nelaabe won6e Urusaliima 6ee nani Samariyankoo6e ngoondinii kongol Laamdo. Be neli e muudum'en Piyeer e Yuhanna. <sup>15</sup> Nde been njottinoo ndee, nduwani 6e yalla e6e ke6a Ruuhu Ceniido, <sup>16</sup> sabi Ruuhu Ceniido jippaaki e fay gooto e ma66e tafon. Saabe Iisaa Joomiraado oo tan 6e mbatisiraa. <sup>17</sup> Nden Piyeer e Yuhanna pawu juude muudum'en dow ma66e so 6e ke6i Ruuhu Ceniido.

<sup>18</sup> Nde Simon yii Piyeer e Yuhanna ana pawu juude muudum'en dow ma66e ana ndokka 6e Ruuhu Ceniido ndee, waddani 6e kaalisi, <sup>19</sup> wii:

—Ndokkee kam miin duu deen baawde yalla mo paw-mi juude am e dow muudum fuu ana he6a Ruuhu Ceniido.

<sup>20</sup> Nii Piyeer jaabii mo, wii:

—Yo Laamdo halke, aan e kaalisi maa, sabi a miilli dokke Laamdo ana coottitiree kaalisi! <sup>21</sup> A walaa gedal, a walaa yolannde e ley haala kaa, sabi 6ernde maa foocitanaaki Laamdo. <sup>22</sup> Tuubu, iw e bonannda maa oo, jaagoda Joomiraado yaafe ko miilataa koo. <sup>23</sup> Sabi mi yii ma a 6aleejo yonki, bonannda maa jaalike ma.

<sup>24</sup> Simon jaabii, wii:

—Naagane kam Joomiraado pati fay huunde e ko mbii-don koo hewtoo kam.

<sup>25</sup> Caggal ko 6e ceettii so 6e mbaajii konngol Joomiraado ngol koo, Piyeer e Yuhanna mbirfitii Urusaliima. E laawol ngol, 6e mbaajii Kabaaru Lobbo oo e geelle Samariya keewde.

### *No Filipa batisiri howruujo kaananke Ecopii*

<sup>26</sup> Malaa'ika Joomiraado wii Filipa:

—Imma, yaaru 6aleeri, laawol iwrungol Urusaliima so ana fa'i Gaaja, kannngol ngol jeewnngol.

<sup>27</sup> O immii, o yehi. Nden o tawi gorko Ecopiyanke, howruujo kaananke debbo Ecopii biyeteedo Kandaake, yehiino Urusaliima juuroyaade. Kanko haybata beembal jawdi kaananke debbo oo. <sup>28</sup> Nde o wirfitinoo ndee, omo joodii e wotoro makko, omo jannga ley dewtere annabi Esaaya. <sup>29</sup> Ruuhu wii Filipa:

—Batta, sawnda wotoro oo.

<sup>30</sup> Filipa dogi hewtii mo, nani omo jannga dewtere annabi Esaaya, wii mo:

—Ada faama ko njannngataa koo naa?

<sup>31</sup> Gorko oo jaabii, wii:

—Hono paamiran-mi so fay gooto firritanaali kam?

O ndaardi Filipa nabba jooddoo e makko. <sup>32</sup> Dee aayaaaje o jannngannoo e dewtere ndee:

«O nabiraa hono no mbaalu kirsoyteeo nii.

E no njawdiri deyyirta yeeso kesoowo dum nii,

hono non o deyyiri.

<sup>33</sup> Leydinkinaare makko bonni sareede makko.

Homo waawi jantaade janta iwdi makko?

Sabi o mursinanaama yonki makko ga aduna gaa.»\*

<sup>34</sup> Howruujo oo wii Filipa:

—Mido ndaarde, haalanam homo annabaajo oo haalata haala muudum, hoore muudum naa goddo?

<sup>35</sup> Non Filipa jaabii, yeewi binndi dii, waajii mo Kabaaru Lobbo haala Iisaa.

<sup>36</sup> E6e njokki laawol ma66e ngol faa 6e njii ndiyam. Howruujo oo wii:

—Ndiyam annii! Ko hadata kam looteede lootogal batisima? [<sup>37</sup>†]

<sup>38</sup> O yamiri wotoro oo daroo. Be didon fuu 6e njippii, 6e ndegii e ndiyam dam. Filipa batisi mo. <sup>39</sup> Nde 6e yeentunoo ndiyam dam ndee, Ruuhu Joomiraado diwtii Filipa. Howruujo oo yiitaali mo kasen, jokkiri laawol muudum seyo. <sup>40</sup> Filipa tawoyaa Ajootus. Gila don faa Kaysariya, ngeenndi fuu ndi mo wari e muudum, o waajoto Kabaaru Lobbo oo.

## 9

### *No Sool tuubiri*

<sup>1</sup> Sool ana heddi e gidoraade taalibaabe Joomiraado 6ee waran 6e. O yehi to Jottinoowo Sadaka Mawdo. <sup>2</sup> O ndaardi dum talki yamiroore naannooji mo cuudi baajordi Yahuudiyankoo6e gondi Damas, yalla so o tawii ton yim6e jokku6e laawol Iisaa, wor6e naa rew6e, o nannga dum'en, o ha66a, o na6a Urusaliima. <sup>3</sup> Nde o yahunoo faa o 6adii Damas ndee, wakkati gooto fooyre iwri dow kammu filii mo. <sup>4</sup> O saami e leydi, o nani daande ana wiya mo:

\* **8:33** Esaaya 53.7-8 † **8:37** E dereeji 6ooydi dii, yoga ana 6eyda aaya 37:Filipa wii: —So tawii ada goondiniri bernde laa6unde, walaa ko hadete batiseede. O jaabii, o wii: —Mido goondini Iisaa Almasiihu woni Bii Laamdo.

—Sool, Sool, ko saabii so ada torra kam?

<sup>5</sup> O lamndii:

—Aan homo, gidu Laamdo?

Jaabu wari e makko:

—Miin Iisaa mo torru-daa oo. <sup>6</sup> Imma naatu e ley ngalluure ndee. Be kaalante ko kaan-daa wadude.

<sup>7</sup> Worbe wondube e makko bee, nanii daande ndee kaa njiyaali fay gooto. Be ndarii, be mugaa. <sup>8</sup> Sool immii e leydi, darii ana futtini gite muudum, kaa yiyataa fay huunde. Nden o dowaa, o naanna Damas. <sup>9</sup> O wadi balde tati o bumdo, o jaamaali o yaraali.

<sup>10</sup> Taalibbo biyeteedo Ananiyas ana wonnoo Damas. Joomiraado noddidum ley koydol, wii dum:

—Ananiyas!

O jaabii, o wii:

—Haa, Joomiraado.

<sup>11</sup> Joomiraado wii mo:

—Imma yaaru Bolol Dartingol, naataa galle Yahuuda, ndaartaa gorko biyeteedo Sool, jeyaafo Tarsus, sabi jooni omo wondi e wadude duwaawu.

<sup>12</sup> O yii e ley koydol gorko biyeteedo Ananiyas ana naata, ana fawa juude muudum e makko, yalla omo wumta.

<sup>13</sup> Ananiyas jaabii, wii:

—Joomiraado, mi narrii yimbe heewbe haala oo gorko e torraaji keewdi di o wadi seniibe maa wonbe Urusaliima bee. <sup>14</sup> O wardii doo e yamiroore hooreebe yottinoobe sadaka, faa o habba noddooebe innde maa fuu.

<sup>15</sup> Joomiraado wii mo:

—Yaa wadoy no mbii-mi nii, sabi oo gorko cubii-mi faa anndina yimbe innde am. O waajoo dum lepi e kaanankooebe, kapum e biibe Israa'iila. <sup>16</sup> Mi hollan mo no tilsiri mo torrree torraaji keewdi saabe am.

<sup>17</sup> Nden, Ananiyas yehi, naatoyi suudu nduu, fawi juude muudum e makko, wii:

—Sakiike am Sool, Joomiraado men Iisaa bannannoodo ma e laawol ngardanno-daa ngol oo, nelii kam faa mbumtaa, keewaa Ruuhu Ceniido.

<sup>18</sup> Oon wakkati fuu, huunde wa'unde no kobbaaje nii hobbitii e gite Sool, o wumti, o immii, o lootaa lootogal batisima. <sup>19</sup> O jaami, o warti e noone makko. O heddodii e taalibaabe wonbe Damas bee balde seeda.

### *No Sool waajorii kabaaru Iisaa ley Damas*

<sup>20</sup> Sool hepiti law fuddi waajaade haala Iisaa ley cuudi baajordi. O wii kapum jaati woni Bii Laamdo. <sup>21</sup> Hettintonooebe mo bee fuu kaaynaa, mbii:

—Wanaa kanko wonnoo torrannoodo goondinbe Iisaa wonbe ley Urusaliima bee naa? Wanaa faa o habba goondinbe o naba dum'en to hooreebe yottinoobe sadaka waddi mo doo naa?

<sup>22</sup> Ana booya fuu Sool ana beydoro soobee e ley waaju mum oo, faa dum wemmbi Yahuudiyankooebe wonbe Damas bee fuu, o labbinani be Iisaa woni Almasiihu oo.

<sup>23</sup> Nalaade njehi, ngarti, Yahuudiyankooebe ndawridi faa mbara Sool. <sup>24</sup> Sool humpitii dabare maabe oo. Jemma e jalooma ebe kayba dame ngalluure ndee pati o yalta, yalla ebe keba no be mbarda mo. <sup>25</sup> Jemma gooto taalibaabe makko gami mo, ngatti mo e sagiire, kabbi hen boggol, njawtini mo tatawol pilingol ngalluure ndee ngol.

### *No taalibaabe wonbe Urusaliima kebirii hoolaade Sool*

<sup>26</sup> Nde Sool warnoo Urusaliima ndee, yidi takkaade e taalibaa6e Iisaa 6ee, kaa 6e fuu e6e kula mo, 6e koolaaki yalla o laatike taalibbo Iisaa jaati jaati. <sup>27</sup> Nden Barnabas na6i mo to nelaabe 6ee too, haalani dum'en no o yiiri Joomiraado oo ana haalda e makko e laawol ngol, e no o waajorii haala Iisaa to Damas too e cuusal. <sup>28</sup> Caggal dum, Sool wondi e ma66e, ana naata ana yalta ley galleeji ma66e Urusaliima, ana waajoroo haala Joomiraado kaa cuusal. <sup>29</sup> Omo haalda e Yahuudiyankoo6e haalanno6e yunaninkoo6e 6ee, omo yeddondira e ma66e, jaka been ana tewtannoo no mbarda mo. <sup>30</sup> Nde deental goondin6e ngal annditinnoo dum ndee, na6i Sool Kaysariya. Caggal dum, 6e neli mo Tarsus.

<sup>31</sup> Nii deental goondin6e ngal he6iri jam ley Yahuudiya e Galili, kapum e Samariya fuu. Ngali ni6i, ngali wattiniri kulol Joomiraado, ngali beydorii heewde saabe ballal Ruuhu Ceniido.

### *No Piyeer golliri kaayde ley geelle biyeteede Lidda e Yoppe*

<sup>32</sup> Piyeer ana yiilotonoo e ley leydi ndii fuu, o jippanii seniibe won6e Lidda 6ee duu. <sup>33</sup> O tawi ton gorko jawdo mo terde muudum fuu mbaati, biyeteedo Ayneyas. Wadii duubi jetti ana lelii. <sup>34</sup> Piyeer wii mo:

—Ayneyas, Iisaa Almasiihu sellinii ma! Imma, moyyintin lelnde maa!

Oon wakkati fuu o immii. <sup>35</sup> Won6e Lidda e feeyo Saron fuu njii mo, tuubani Joomiraado.

<sup>36</sup> Taalibbo debbo biyeteedo Tabita ana wonnoo Yoppe. Tabita woni Dorkas e yunaninkoo6e, maanaa mum yo lewla. Omo golla gollleeji lobbi, omo wadana misikiina'en moyyere. <sup>37</sup> E deen balde o jawi, o maayi, o lootaa, o lelnea dow sooro tafon. <sup>38</sup> Nde wonnoo Yoppe woddondiraa e Lidda, taalibaa6e 6ee nani Piyeer ana ton, neli wor6e didon ndaarda mo o yottoo dum'en law. <sup>39</sup> Piyeer immii, yaadi e ma66e. Nde yottinoo ndee, 6e nabinni dum dow sooro too. Rew6e talka'en 6e wor6e mum'en maayi 6ee fuu battii dum ndarii ana mboya, ana kolla dum forgooji e dollokaaji di Dorkas no'unoo nde wondunoo e muudum'en ndee. <sup>40</sup> Piyeer yaltini yim6e 6ee fuu, diccii, ana duwoo. Caggal dum, yeecitii e maaydo oo, wii:

—Tabita, imma!

Non Tabita feerti gite muudum, yii Piyeer, joodii. <sup>41</sup> Piyeer nanngi junngo makko, immiini mo. Caggal dum, o noddi seniibe 6ee e rew6e talka'en 6ee, o holli dum'en Tabita yo guurdo. <sup>42</sup> Dum nanaa e ley Yoppe fuu, heew6e ngoondini Joomiraado. <sup>43</sup> Piyeer fa66i Yoppe balde kuurde e galle jabboowo guri biyeteedo Simon.

## 10

### *No Piyeer noddiraa to suudu Korneliyus too*

<sup>1</sup> Gorko biyeteedo Korneliyus ana wonnoo Kaysariya. O hooreejo konu biyeteedo Italiyanke. <sup>2</sup> O kuppiddo e diina, kanko e koreeji makko fuu 6e hul6e Laamdo. Omo sakkoo Yahuudiyankoo6e sadakaaji keewdi, omo jaagoo Laamdo wakkati fuu. <sup>3</sup> Kiikiide gooto hono wakkati sallifanaa buubudo, o he6i holleede, o yii malaa'ika ana naata ley suudu makko ana wiya mo:

—Korneliyus!

<sup>4</sup> O huli faa gite makko paapii, o wii dum:

—Gido Laamdo, kori jam?

Malaa'ika oo wii mo:



—Laamdo jaabanike ma duwaawuuji maa e sadakaaji maa. <sup>5</sup> Nel jooni worbe to ngeenndi Yoppe, nodda biyeteedo Simon, noddirteedo Piyeer. <sup>6</sup> Omo jippii galle jabboowo guri biyeteedo Simon, mo galle muudum heedi e maayo geeci.

<sup>7</sup> Nde malaa'ika kaaldannoodo e makko oo wittunoo ndee, o noddi golloofe makko didon e sordaasi gooto kuldo Laamdo jeyaafo e howruufe makko. <sup>8</sup> O haalani fe ko malaa'ika oo wii koo fuu, o neli fe Yoppe.

<sup>9</sup> Janngo muudum, ebe e laawol. Nde worbe taton fee battii ngeenndi ndii ndee, tawi Piyeer njabbii dow bene muudum wakkati hakkunde naange faa wada duwaawu. <sup>10</sup> O yolbi faa sanne, omo yidi jaamde. Nde fe moyyinanta mo jaamdu ndee, Laamdo holli mo, <sup>11</sup> o yii kammu udditike, huunde wa'unde no daddamaare mawnde, nde cobuli muudum nay fuu kabbaa, ana rennee faade e leydi. <sup>12</sup> Sii daabaaji fuu, di koyde nay e njarooji, kajum e sii pooli fuu ana e mayre. <sup>13</sup> Daande wii mo:

—Piyeer, imma, hirsu, jaam!

<sup>14</sup> Piyeer wii:

—Sawra Joomiraado! Abada mi jaamaali ko harmi naa ko sofi.

<sup>15</sup> Daande ndee wii mo kasen:

—Pati harmin ko Laamdo senni.

<sup>16</sup> Dum wadi non cili tati. Nden daddamaare ndee njabbintinaa dow kammu.

<sup>17</sup> Ko Piyeer hollaa koo, omo miiloo no dum waawi laatoraafe. Tawi e oon wakkati, worbe fe Korneliyus nelnoo fee, lamndike galle Simon. Be ngari, fe ndarii e damal ngal. <sup>18</sup> Be noddi, fe lamndii yalla Simon noddirteedo Piyeer don jippii. <sup>19</sup> Piyeer ana heddi miilde ko yii koo, faa Ruuhu wii dum:

—Worbe taton ana tewte. <sup>20</sup> Imma, jippa, njaadaa e ma66e tawa a sikkitaaki, sabi miin neli fe.

<sup>21</sup> Piyeer jippii, wii worbe fee:

—Mido nii, miin woni mo tewtaton oo. Kori jam waddi on?

<sup>22</sup> Be njaabii, fe mbii:

—Korneliyus hooreejo konu neli min. O gorko dartiido, kuldo Laamdo, mo lejol Yahuudiyankoo fe fuu seettanii moyyere. Malaa'ika ceniido yamirii mo min nodde, ngaraa suudu makko, yalla omo nana waaju maa.

<sup>23</sup> Piyeer noddi fe, silmini fe, jippini fe galle muudum.

Janngo muudum, o immii, o yaadi e ma66e. Yoga e sakiraafe jeyaafe Yoppe njaadi e makko. <sup>24</sup> Fa66i-janngo muudum fe njottii Kaysariya. Korneliyus ana tijjinoo fe, noddi sakiraafe muudum e yi66e muudum badii6e. <sup>25</sup> Nde Piyeer naatannoo ndee, Korneliyus ja66ii dum, sujidani dum. <sup>26</sup> Piyeer itti mo e sujuudu nduu, wii:

—Imma, sabi miin duu mi neddo tan.

<sup>27</sup> Piyeer ana haalda e makko, faa fe naati galle oo, tawi ton yim6e heew6e ana moo6tii. <sup>28</sup> O wii fe:

—Odon anndi dagantaako Yahuudiyanke jokkondira e mo wanaa Yahuudiyanke, naa naatude suudu muudum. Kaa Laamdo hollii kam pati mi nanngira fay gooto karmudo naa cobudo. <sup>29</sup> Dum wadi nde nelan-don kam ndee, mi warii, mi ujaaki. Dum nee, kaalanee kam, saabe kodum noddir-don kam?

<sup>30</sup> Korneliyus jaabii, wii:

—Hannde woni balde nay, mido wada duwaawu ley suudu am e oo doo wakkati, faa gorko mo kaddule jalbooje wari, darii yeeso am, <sup>31</sup> wii: «Korneliyus, Laamdo jaabanike ma duwaawuuji maa e sadakaaji maa. <sup>32</sup> Jooni, nel e ngeenndi mbiyeteendi Yoppe, noddane-daa gorko biyeteedo Simon,

noddirteedo Piyeer. Omo jippii galle jabboowo guri biyeteedo Simon, mo galle muudum heedi e maayo geeci.» <sup>33</sup> Dum wadi so nel-mi noddoye-daa oon wakkati fuu. Ko ngar-daa koo gasii sanne. Jooni min fuu miden nii yeeso Laamdo faa min kettinoo ko Joomiraado yamir maa mbaajo-daa fuu.

<sup>34</sup> Nden Piyeer fuddi waajaade, wii:

—Jooni mi yii goonga jaati Laamdo burdintaa yimbe. <sup>35</sup> Neddo kuloowo mo, gadoowo ko foocitii, o yidan dum ko lejol muudum tawaa fuu. <sup>36</sup> Odon anndi konngol ngol Laamdo neldi 6i66e Israa'iila ngol, ngol ceyniroowol jam hebiraama saabe Iisaa Almasiihu, kaɗum woni Joomiraado yimbe fuu. <sup>37</sup> Odon anndi ngol konngol kuuɓungol leydi Yahuudiya fuu, puɗɗirngol gila Galili, caggal Yaayaa waajike yo yimbe loote batisima. <sup>38</sup> Odon anndi no Laamdo suborii Iisaa Nasaraatunke oo, no jippiniri e muudum Ruuhu Ceniido e baawde. Odon anndi no Iisaa yiilorii e nokkuuje fuu ana golla golleeji lobbi, ana sellina wonnoobe e margal Ibiliisa fuu sabi Laamdo ana wondi e muudum. <sup>39</sup> Minen min seedee'en ko o golli Yahuudiya e ko o golli Urusaliima fuu. Be 6ili mo e leggal bardugal, 6e mbari mo, <sup>40</sup> kaa Laamdo wuurtinii mo ɗannde tataɓere, ɓanngintini mo hakkunde amen. <sup>41</sup> Kaa wanaa yimbe fuu o ɓanngani. O ɓannganii seedee'en 6e Laamdo adii suɓaade 6ee, minen ɗaamdube e makko so njardi e makko caggal wuurtugol makko 6ee. <sup>42</sup> O yamirii min mbaajoo yimbe, min ceettoo kanko woni mo Laamdo wadi caranoowo wuurbe e maaybe. <sup>43</sup> Annabaabe fuu ceettanike mo, mbii goondindo mo fuu heɓan yaafeede luutti muudum saabe makko.

<sup>44</sup> Nde Piyeer waajotoo waaju oo ndee, Ruuhu Ceniido jippii e hettintooɓe 6ee fuu. <sup>45</sup> Yahuudiyankooɓe goondinbe wardunoobe e Piyeer 6ee fuu kaaynaa, no dokkal Ruuhu Ceniido ngal saakorii e yimbe 6e nganaa Yahuudiyankooɓe nii. <sup>46</sup> Sabi eɓe nanannoo 6een yimbe ana kaala e demde janane ana njetta Laamdo. Nden, Piyeer jaabii, wii:

<sup>47</sup> —Yimbe 6ee keɓii Ruuhu Ceniido hono no meeden nii. Homo waawi haɗude 6e looteede lootogal batisima?

<sup>48</sup> O yamiri 6e mbatisiree e innde Iisaa Almasiihu. Caggal dum, 6e ndaardi mo o faɓɓana 6e balde.

## 11

### *No Piyeer jaaborii deental goondinbe gonngal Urusaliima*

<sup>1</sup> Nelaabe 6ee e sakiraabe wonnoobe Yahuudiya 6ee nani yimbe 6e nganaa Yahuudiyankooɓe 6ee duu keɓii konngol Laamdo. <sup>2</sup> Nde Piyeer ɗabbunoo Urusaliima ndee, goondinbe tilsinbe taadagol 6ee peli dum, <sup>3</sup> mbii:

—A jippike e yimbe 6e taadaaki, a ɗaamdii e muudum'en!

<sup>4</sup> Nden Piyeer haalani 6e ko wadi koo gila e puɗɗoode faa e timmoode, wii:

<sup>5</sup> —Ngeenndi Yoppe ngonnoo-mi, mido duwoo faa njii-mi huunde yellitike e am. Huunde wa'unde no daddamaare mawnde nde coɓɓuli muudum nay fuu kaɓɓaa, ana rennee iwde e kammu faade e am. <sup>6</sup> Taykitii-mi nde faa gasi, njii-mi daabaaji fuu, di koyde nay e kulle ladde e ɗaarooji e sii pooli fuu.

<sup>7</sup> Nanu-mi daande ana wiya kam: «Piyeer, imma, hirsu, ɗaam!» <sup>8</sup> Mbii-mi: «Sawra Joomiraado! Abada mi ɗaamaali ko harmi naa ko sobi.» <sup>9</sup> Daande dow kammu ndee jaabitii kam kasen, wii: «Pati harmin ko Laamdo senni.»

<sup>10</sup> Dum wadi non cili tati. Caggal mum, kulle dee fuu ɗabbintinaa dow kammu.

<sup>11</sup> E oon wakkati, worbe taton nelaabe e am iwde Kaysariya ngari e suudu do min ngonnoo doo. <sup>12</sup> Ruuhu Ceniido wii kam mi yaada e maɓɓe pati mi

sikkitoo fay huunde. Bee doo sakiraa6e njeegom njaadi e am, min naaddi suudu Korneliyus. <sup>13</sup> O haalani min no o yiiri malaa'ika darinoo6o suudu makko ana wiya mo: «Nel e ngeenndi mbiyeteendi Yoppe noddane-daa Simon noddirteedo Piyeer. <sup>14</sup> O waajete waaju kisiinoo ma, aan e koreeji maa fuu.» <sup>15</sup> Nde puddu-mi waajaade ndee, Ruuhu Ceniido jippii e ma66e hono no jipporinoo e meeden arannde nii. <sup>16</sup> Nden, micciti-mi ngol doo konngol ngol Joomiraado wiinoo: «Yaayaabatisirannoo ndiyam, kaa onon, on mbatisirte Ruuhu Ceniido.» <sup>17</sup> So Laamdo fonndii en e ma66e, hokkii 6e ko hokkunoo en koo nde ngoonfinno-den Joommen Iisaa Almasiihu ndee, ndenno miin, ko ngon-mi so mi hada Laamdo?

<sup>18</sup> Nde 6e nannoo dum ndee, 6e ndeyyini, e6e njetta Laamdo, e6e mbiya: —Laamdo tuubinii yim6e 6e nganaa Yahuudiyankoo6e duu yalla ana keba nguurndam ngoongaraajam.

### *No Kabaaru Lobbo waajiraa ley Antiyokiya*

<sup>19</sup> Yoga e saakii6e saabe torraaji gadu6i caggal maayde Eciyen 6ee, njehi faa Finikiya e Kiprus e Antiyokiya. Be mbaajaaki konngol ngol so wanaa Yahuudiyankoo6e. <sup>20</sup> Kaa yoga e goondin6e iwoo6e Kiprus e Sireene naati Antiyokiya ana mbaajoo Kabaaru Lobbo haala Iisaa Joomiraado oo hakkunde Yunaninkoo6e. <sup>21</sup> Baawde Joomiraado ana e ma66e. Yim6e heew6e ngoonfini, tuubi, ngarti e Joomiraado.

<sup>22</sup> Deental goondin6e won6e Urusaliima 6ee nani kabaaru gadu6o Antiyokiya oo, neli ton Barnabas. <sup>23</sup> Nde oon yottinoo so yii e ma66e moyyere Laamdo ndee, seyii, waajii 6e fuu 6e tiinoo 6e tabita e Joomiraado 6ernde laa6unde. <sup>24</sup> Barnabas yo gorko moyyo, kebbinaado Ruuhu Ceniido e goondinal. Jamaa keewdo goondini Joomiraado saabe makko.

<sup>25</sup> Caggal dum, Barnabas yehi Tarsus faa tewtoya Sool. <sup>26</sup> Nde o yiiti dum ndee, o na6i dum Antiyokiya. Be ngondii e deental goondin6e won6e ton 6ee hitaande hi66ere, 6e njannini yim6e heew6e. Taalibaa6e won6e Antiyokiya 6ee adii fuu wiyeede yim6e Iisaa.

<sup>27</sup> E deen balde, yim6e loowaabe konngol Laamdo iwru6e Urusaliima ngari Antiyokiya. <sup>28</sup> Gooto e ma66e biyeteedo Agabus, immii, darii, sapporii saabe Ruuhu yolbere mawnde wafan ley laamu Roma fuu. Nde wadi e laamu kaananke mawdo biyeteedo Kalawdiyus.\* <sup>29</sup> Taalibaa6e 6ee anniyii hawrintinde gooto fuu ko waawi, faa 6e nelda sakiraa6e ma66e won6e Yahuudiya 6ee paabitoroo. <sup>30</sup> Be ngadi dum, 6e neldi ballal ngal Barnabas e Sool tummba e juude maw6e deental ton.

## 12

### *No goondin6e torrira*

<sup>1</sup> Oon wakkati, kaananke biyeteedo Hirudus fuddi torrude yoga e deental goondin6e ngal. <sup>2</sup> O yamiri Yaakuuba sakiike Yuhanna oo wardee kaafaawi. <sup>3</sup> Nde o yiinoo edum weli Yahuudiyankoo6e ndee, o nanngi Piyeer duu. Dum hawri e wakkati iidi mo buuru yuufinaaka. <sup>4</sup> Nde o nanngunoo Piyeer ndee, o uddi dum, o yamiri pelle nay sordaasi'en loomtondira e haybugol mum, fedde fuu yim6e nayon. O anniyike na6ude dum yeeso yim6e fuu, so iidi

\* **11:28** Kalawdiyus yo kaananke Roma mawdo joya6o. O laamike hakkunde duufi 41 e 54 caggal pinaade Iisaa. Taariki oon jamaanu ana holla yolbere mawnde wadiino ley laamu Roma fuu hakkunde duufi 46 e 48 caggal pinaade Iisaa.

Paska oo ya66ike. <sup>5</sup> Dum wadi so Piyeer haybaa e ley kasu oo, kaa deental goondin6e ngal njoottaali jaaganaade mo Laamdo.

<sup>6</sup> Nde Hirudus anniyyinoo nabude mo ndee, oon jemma omo daaninoo hakkunde sordaasi'en didon, omo ha66iraa calali didi. Hayboo6e damal kasu oo 6ee duu ana kayba. <sup>7</sup> Nii malaa'ika Joomiraado wari e makko, suudu nduu fuu fooyni, memi mo, finndini mo, wii:

—Heja law, imma!

Non calali dii kumtii, iwi e juude makko, caami. <sup>8</sup> Malaa'ika oo wii mo:

—Huma kumorgol maa, 6oorna pade maa.

Piyeer wadiri non. Malaa'ika oo wii mo:

—Waanda suddamaare maa, njokkaa e am.

<sup>9</sup> Piyeer yalti, jokki e makko. O anndaa ko malaa'ika oo wadata, ana wa'ani mo hono no koydol nii, kaa dum goonga jaati. <sup>10</sup> Be 6ettii kayboowo arano oo, kaɗum e dida6o oo, 6e njottii damal njamndi pewtungal e ngalluure ndee ngal. Ngal udditi hoore maggal yeeso ma66e, 6e njalti, 6e njokki e laawol ngol. Oon wakkati, malaa'ika oo seerti e makko.

<sup>11</sup> Hakkille Piyeer warti, o wii:

—Jooni mi tayorii Joomiraado neli malaa'ika muudum, faa hisina kam e junngo Hirudus e ko Yahuudiyankoo6e njoonndorinoo mi wadete fuu.

<sup>12</sup> Nde hakkille makko jippitinoo ndee, o yehi galle Mariyama, inna Yuhanna nodditeedo Marka, ton yim6e heew6e moofotonoo ana ngada duwaawu. <sup>13</sup> Nde Piyeer tappunoo damal galle too ndee, golloowo debbo biyeteedo Rode wari e damal ngal faa humpitoo. <sup>14</sup> Nde o annditinnoo daande Piyeer ndee, o yeggiti udditinde damal ngal no o foti seyaade, o dogi o naatoyi, o humpiti 6e Piyeer darii damal sella too. <sup>15</sup> Be mbii mo:

—A kaahaango!

Kaa omo heddii nanngude dum Piyeer. Be mbii kasen:

—Dum yo malaa'ika makko.

<sup>16</sup> Kaa dum fuu Piyeer ana heddii tappude. Nde 6e udditinnoo so 6e njii mo ndee, 6e kaaynaa sanne. <sup>17</sup> O huncani 6e junngo yalla e6e ndeyyinoo, o jantanii 6e no Joomiraado yaltiniri mo kasu, o wii:

—Kaalaneé dum Yaakuuba, kaɗum e sakiraaf6e wo66e 6ee.

Caggal muudum, o yalti, o yehi nokku godfo.

<sup>18</sup> Nde finnoo beetee ndee, sordaasi'en 6ee ana lamndondira hoto Piyeer woni, 6e mbemmbaa faa hakkillaaji ma66e keli. <sup>19</sup> Nde Hirudus ndaarnoo faa nannga mo, so he6aali mo ndee, lamndii hayboo6e 6ee no laatii, yamiri 6e mbaree. Caggal dum, Hirudus regii Yahuudiya, yehi Kaysariya joodoyii ton.

### *No Hirudus maayiri maayde bonnde*

<sup>20</sup> Hirudus tikkani yim6e Tirus e Sidon. Been kaaldi, kawri, ngari e makko. Be adorii Bilastus howruujo makko oo, 6e ke6i hakkille muudum, 6e jaagii yalla dewral ana wada hakkunde ma66e, sabi leydi ma66e ndii e leydi Hirudus etata.

<sup>21</sup> Sarti ma66e oo yottii, Hirudus 6oornii kaddule kaananke, joodii dow bimmbeere laamu, haaldi e ma66e. <sup>22</sup> Yim6e 6ee ngulli, mbii:

—Dum daande laamdo, wanaa daande neddo!

<sup>23</sup> Oon wakkati fuu, malaa'ika Joomiraado fii Hirudus, sabi o jabii ted-dinireede o Laamdo, tawi o wanaa. O yumi gildi, o maayi.

<sup>24</sup> Kaa konngol Laamdo ngol ana yaara yeeso, ana feydoo saakaade. <sup>25</sup> Nde Barnabas e Sool tilinoo e golle muudum'en Urusaliima ndee, 6e mbirfodii e Yuhanna nodditeedo Marka.

## Dawol Pool aranol

### 13

#### *No Barnabas e Pool cubiraa so nelaa faa ngolla golle Laamdo*

<sup>1</sup> Annabaafe e jannginoofe ana e ley deental goondin6e gonngal Antiyokiya ngal. Kam6e ngoni Barnabas e Simeyon noddirteedo Baleejo e Lukiyus mo Sireene e Manahen, bammbidanoofdo e Hirudus hooreejo leydi oo, kaɓum e Sool. <sup>2</sup> Nannde wootere e6e ndewa Joomiraado tawi e6e ngoni e koorka, faa Ruuhu Ceniido wii 6e:

—Keertanee kam Barnabas e Sool saabe golle mo noddir-mi 6e oo.

<sup>3</sup> Caggal 6e koorii, 6e nduwike, 6e pawu juude ma66e e dow been, 6e njoppiti dum'en ndawi.

<sup>4</sup> Nii Ruuhu Ceniido neliri 6e, 6e ndegii e Selewkiya, 6e naati laana geeci 6e peewi Kiprus. <sup>5</sup> Nde 6e njottinoo Salamis ndee, 6e mbaajii konngol Laamdo ngol ley cuudi baajordi Yahuudiyankoo6e. E6e ngondi e Yuhanna (noddirteedo Marka) ana faaboo 6e. <sup>6</sup> Nde 6e taccunoo ruunde ndee so 6e njottii Pafos ndee, 6e tawi ton daggada Yahuudiyanke biyeteedo Bar-Iisaa, jaarooowo yo annabaja, <sup>7</sup> howruujo Segiyus Pool. Oon yo kaananke hakkilante, caahiido. O noddi Barnabas e Sool sabi ana yidi nande konngol Laamdo ngol. <sup>8</sup> Kaa Elimas daggada oo yo calaniido 6e, omo tewta bonnitidde goondinal kaananke oo. (Maanaa Elimas woni daggada.) <sup>9</sup> E ley dum, Sool biyeteedo kasen Pool kebbinaado Ruuhu Ceniido oo futtini mo gite, <sup>10</sup> wii:

—Bii Ibiliisa! Aan keewdo jamma e njiiddu, gaɓo ko moyyi fuu! A seerataa e oonude laawi Joomiraado poocciitii dɔi naa? <sup>11</sup> Jooni jukkungo Joomiraado saaman e maa, a wuman, a yiyataa naange faa sarti cartaado oo yottoo.

Oon wakkati fuu, gite makko ngadi mbumbaalu, de ni66i, omo wumm-biloo, omo tewta dowoowo. <sup>12</sup> Nde kaananke oo yiinoo ko wadi koo ndee, goondini Iisaa, haaynaa e ko nani haala Joomiraado kaa koo.

#### *No Pool waajorii ley ngalluure Antiyokiya ley leydi Pisidiya*

<sup>13</sup> Pool e yaadu6e e muudum naati laana geeci ngalluure wiyeteende Pafos, peewi Perge ley leydi Pamfiliya. Don Yuhanna Marka seerti e ma66e, wirfitii Urusaliima. <sup>14</sup> Be ya66ii Perge, 6e ngari Antiyokiya ley leydi Pisidiya. Be naati waajordunyaalaande fowteteende, 6e njoodii. <sup>15</sup> Caggal janngede Sariya Muusaa e annabaafe, hooree6e waajordu nduu 6ee neli e ma66e, mbii:

—Sakiraaf6e, so won ko mbaajoto-don yim6e 6ee, kaalee.

<sup>16</sup> Pool immii, hunci junngo muudum, wii:

—Israa'iilankoo6e e hul6e Laamdo wo66e, kettinee: <sup>17</sup> Laamdo Israa'iilankoo6e oo subiiima njaatiraa6e meeden, teddinii lejol ma66e nde ngol hodoyi leydi Misira ndee, kasen yaltiniri 6e ton baawde muudum. <sup>18</sup> O mupanii\* 6e ko foti duu6i capande nay e ley ladde jeereende. <sup>19</sup> Caggal o halkii leji jeddi e ley leydi Kanaana, o hokki ndi yim6e makko ndona ndi. <sup>20</sup> Edum waara e duu6i teemede nay e capande joy. Caggal dum, o hokki 6e saroo6e faa jamaanu annabi Samuyila. <sup>21</sup> Nde dum 6ettii ndee, 6e jaagii Laamdo hokka 6e kaananke. Laamdo hokki 6e Sawul 6ii Kis iwdo e lejol Benjamin. Oon laamii 6e duu6i capande nay.

<sup>22</sup> Nden Laamdo 6oorti Sawul, lammini Daawuuda, mo o haali haala muudum so o wii: «Mi hebii Daawuuda 6ii Yessa gorko buu6inoowo 6ernde

\* **13:18** Won binndande biideo jammirii 6e.

am, gaḍoowo sago am.» <sup>23</sup> E iwdi makko Laamḍo yaltini Iisaa, kisinoowo Israa'iila no fadirnoo nii. <sup>24</sup> Fade Iisaa warde, Yaayaa waajinoke lejol Israa'iila fuu yo tuubu, lootee lootogal batisima. <sup>25</sup> Kasen, nde Yaayaa timmintaa golle muudum ndee, wiino: «Mi wanaa mo miilatton ngon-mi oo. Kaa mo mi fotaa fay e humtude 6oggi pade muudum ana wara caggal am.»

<sup>26</sup> Sakiraaḍe, onon iwdi Ibarahiima e been hulḍe Laamḍo wonḍe hakkunde mon! Onon neldaa oo kabaaru kisinoowo. <sup>27</sup> Sabi wonḍe Urusaliima ḍee e hooreeḍe muudum'en fuu annditaali Iisaa. Kasen duu ḍe paamaali haalaaji annabaabe janngetenoodi jalaande fowteteende fuu dii. Kaa ḍe njottinii diin haalaaji nde ḍe carunoo mo ndee. <sup>28</sup> Fay so taweede ḍe kebaali feloore fay wootere nde ḍe pelira mo yalla omo maaya, ḍe ndaardii Pilaatu o waree. <sup>29</sup> Nde ḍe ngolli ko Binndi dii mbiinoo e makko koo faa hiḍḍi ndee, ḍe njippini mo leggal bardugal ngal, ḍe ngadi mo e yanaande. <sup>30</sup> Kaa Laamḍo wuurtinii mo. <sup>31</sup> Balde kuurde o ḍanngani wondunooḍe e makko ḍee gila Galili faa Urusaliima. Been ngoni seettantoobe mo yeeso yimḍe jooni. <sup>32</sup> Minen, miden ceynira on fodoore nde njaatiraaḍe meeden podanaa ndee, <sup>33</sup> Laamḍo hiḍḍinani en ḍum, enen hiḍḍe maḍḍe, nde wuurtinoo Iisaa ndee. No winndiraa kasen e jimol Jabuura diḍaḍol:

«Aan, a ḍiyam, hannde ndimu-maa-mi.»†

<sup>34</sup> Kasen, haala immitagol makko e hakkunde maayḍe e waasugol makko jolde, nii Laamḍo wii:

«Mi tabintinanan on podooje ceniide ḍe mbontataa,  
ḍe podannoo-mi Daawuuda ḍee.»‡

<sup>35</sup> Dum wadi so o wii e nokku goddo:

«A accataa Ceniido maa jola.»§

<sup>36</sup> Daawuuda wadi sago Laamḍo e jamaanu muudum. Caggal ḍum, o maayi, o mooḍtidaa e njaatiraaḍe makko, o joli. <sup>37</sup> Kaa mo Laamḍo wuurtini oo jolaali. <sup>38</sup> Sakiraaḍe, anndee saabe makko mbaajore-ḍon yaafeede luutti. <sup>39</sup> Sariya Muusaa waawaa wadude neddo poocciitido, kaa kanko, goondindo mo fuu, o nanngiran ḍum poocciitido. <sup>40</sup> Dum nee, kaybee pati ko annabaabe cappinoo koo hewto on:

<sup>41</sup> «Onon hoynuḍe,

yo on kaayne yo on kalko!

Sabi mido nii golla golle e ley wakkati moodon,

golle mo on ngoondintaa so neddo haalaniino on.»\*

<sup>42</sup> Caggal Pool e Barnabas njaltii waajordu nduu, jamaa oo ndaardi ḍe yo ḍe ngartu fowteteende waroore, yalla eḍe njokka e waaju maḍḍe oo. <sup>43</sup> Caggal mooḍtagol ngol, Yahuudiyankooḍe heewḍe e naatuḍe e diina maḍḍe njokki e Pool e Barnabas. Been diḍon duu ana kaalda e maḍḍe ana mbaajoo ḍe yo ḍe jiiḍu e moyyere Laamḍo.

<sup>44</sup> Fowteteende jokkunde hen ndee, ngalluure ndee fuu mooḍtii yalla ana hettinoo konngol Laamḍo. <sup>45</sup> Kaa nde Yahuudiyankooḍe ḍee njiinoo oo jamaa ndee, haasidaaku naati e muudum'en, eḍe njedda ko Pool waajotoo koo, eḍe njenna ḍum. <sup>46</sup> Nden Pool e Barnabas kaalaniri ḍe cuusal, mbii:

—Waajibi min adoo haalande on konngol Laamḍo ngol, kaa ko tippiti-ḍon ngol so car-ḍon ko'e moodon on kaandaa e nguurndam nduumiidam koo, min njahan to yimḍe ḍe nganaa Yahuudiyankooḍe. <sup>47</sup> Sabi ko Joomiraado yamiri en koo anni:

† 13:33 Jabuura 2.7 ‡ 13:34 Esaaya 55.3 § 13:35 Jabuura 16.10 \* 13:41 Habaakuk 1.5

«Mi darnii ma yalla ada laatanoo lepi dii fooyre,

faa kisinaa aduna oo fuu.»†

48 Nde yimbe lepi goddi dii nannoo dii haalaaji ndee, ceyii, teddini konngol Joomiraado ngol. Be Laamdo sufanii nguurdam nduumiidam bee fuu ngoondini.

49 Konngol Joomiraado ngol saakii e leydi ndii fuu. 50 Kaa Yahuudiyankooobe bee loofi rewbe rewoobe Laamdo saahiiobe, kajum e mawbe ngalluure ndee bee. Be ndoobi torra dow Pool e Barnabas, be njaltini dum'en leydi ma66e. 51 Been duu pididi e ma66e colla koyde muudum'en, peewti Ikoniya. 52 Taalibaabe bee kebbinaa seyo e Ruuhu Ceniido.

## 14

### *No Pool e Barnabas mbaajorii ley ngeenndi Ikoniya*

1 Ley Ikoniya duu Pool e Barnabas naati e ley waajorduYahuudiyankooobe. E6e mbaajoo faa Yahuudiyankooobe e yimbe lepi goddi heewbe ngoondini.

2 Kaa Yahuudiyankooobe saliiobe goondinde bee loofi lepi goddi dii, mbonni berde muudum'en yalla ana mbaana sakiraabe bee. 3 Dum e taweede hadaali 6e booyde ton, e6e pawii jikke ma66e e Joomiraado, e6e mbaajoroo cuusal. Joomiraado seettii konngol hinnee muudum, nde hokkunoo 6e baawde wadude taagumansaaji e kaayde dogooje e juude ma66e. 4 Yimbe ngeenndi ndii 6e peccii: yoga heedani Yahuudiyankooobe 6ee, yoga heedani nelaabe 6ee.

5 Yimbe lepi goddi e Yahuudiyankooobe e ardiibe muudum'en anniyii torude 6e e wardude 6e kaaye. 6 Nde 6e maatunoo dum ndee, 6e ndogani Listara e Derbe e geelle seraaji muudum'en ley leydi Likoniya, 7 e6e mbaajoo ton Kabaaru Lobbo oo.

### *No Pool e Barnabas mbaajorii ley ngeenndi Listara*

8 Gorko bonnguujoo, dimdaado e bonnguwaaku, mo meedaali daraade e koyde muudum, ana wonnoo Listara. 9 Omo hettinoo waaju Pool. Pool yeewi mo, yii goondinal makko sellinta mo, 10 haaldi semmbe, wii:

—Imma, dara e koyde maa!

Gorko oo gurbitii, darii, ana yaha. 11 Nde yimbe 6ee njii ko Pool wadi koo ndee, ngulliri gullaali likoniyankooobe, mbii:

—Laamdo'en nanndinkinike e yimbe, njippiima e meeden!

12 Be inndiri Barnabas «Jewus», 6e inndiri Pool «Hermes»,\* sabi Pool wonnoo kaaloowo. 13 Galle do Jewus rewete ana wonnoo to naatirde ngeenndi too. Jottinoowo sadaka o waddi ga'i pariraadi piindi e dame dee. Omo yidi wadude sadaka, kanko e yimbe 6ee. 14 Kaa nde Barnabas e Pool nannoo dum ndee, ceeki kaddule muudum'en, kepanii jamaa oo ana ngulla, 15 ana mbiya:

—Worbe, kodum ngadaton doo? Minen duu min yimbe hono moodon. Miden mbaajoo Kabaaru Lobbo oo faa tuubon, iwon e dii golleeji laaliidi, ngarton e Laamdo guurdo, tagudo kammu e leydi e geeci e ko woni e muudum'en fuu. 16 E jamaanuujii jawtudi dii o yoppii lepi dii fuu njokka laawi muudum'en. 17 Dum e taweede, omo golla ko moyyi faa dum seettanoo mo, omo hokka on to6o kammu, omo benndinana on namri e wakkati muudum, omo waaltinira hakkillaaji mon nguure e seyo.

18 Ko 6e mbaajii koo fuu, semmbe 6e kadiri jamaa oo hokkude 6e sadaka.

† 13:47 Esaaya 49.6

\* 14:12 E ley diina Yunaninkooobe Jewus woni hooreejo tooruujii, Hermes woni nelaado majji.



<sup>19</sup> Caggal dum, Yahuudiyankooɓe iwi Antiyokiya e Ikoniya. Be keɓi hakkil-laaji yimɓe ɓee, ɓeen mbedii Pool kaaye, ndaasi dum faa naɓi dum caggal ngeenndi ndii, sabi miilii mo maayɗo. <sup>20</sup> Kaa nde taalibaaɓe ɓee ngari pilii mo ndee, o immii, o naatti e ley ngeenndi ndii.

### *No Pool e Barnabas mbirfitorii Antiyokiya*

Janngo muudum, o yaadi e Barnabas ngeenndi mbiyeteendi Derbe. <sup>21</sup> Be mbaajii ton Kabaaru Lobbo oo, ɓe keɓi taalibaaɓe faa keewi. Caggal muudum, ɓe mbirfittii Listara e Ikoniya, kaɗum e Antiyokiya. <sup>22</sup> Eɓe cuusina yonkijji taalibaaɓe, eɓe mbaajoo dum'en yo jiiɓu e goondinal, eɓe mbiya:

—Kinaa tampen tampereɓi keewɗi so naaten e Laamu Laamɗo.

<sup>23</sup> E ley deente goondinɓe ɗee fuu, ɓe cubanii dum'en hooreeɓe. Caggal dum, ɓe koori, ɓe nduwii, ɓe kalfini dum'en Joomiraado mo ɓe ngoondini oo.

<sup>24</sup> Nde ɓe ceekunoo Pisidiya ndee, ɓe ngari Pamfiliya. <sup>25</sup> Be mbaajii konngol ngol ley ngeenndi Perge. Caggal muudum, ɓe njippoyii Attaliya. <sup>26</sup> Ton ɓe naati laana geeci, ɓe mbirfii Antiyokiya do ɓe kalfinanoo moyyere Laamɗo faa ɓe ngolla golle mo ɓe tilii jooni oo.

<sup>27</sup> Nde ɓe njottinoo ndee, ɓe mooɓti deental goondinɓe ngal, ɓe kaalani ngal ko Laamɗo wadidi e maɓɓe fuu, no o udditirani yimɓe ɓe nganaa Yahuudiyankooɓe damal goondinal. <sup>28</sup> Be ngondi don e taalibaaɓe ɓee faa ɓooyi.

## 15

### *Haala kawrital gadaangal Urusaliima*

<sup>1</sup> Yimɓe yogaaɓe iwi Yahuudiya ngari Antiyokiya, ana njanngina sakiraaɓe ɓee, ana mbiya:

—So on taadiraaka no Muusaa wiiri nii, on kisataa.

<sup>2</sup> Pool e Barnabas poodondiri e maɓɓe, nduddi e maɓɓe faa naawi. Dum wadi so ɓe tabintini nelde Pool e Barnabas e yimɓe woɓɓe faa Urusaliima, faade e nelaabe ɓee e hooreeɓe ɓee, saabe haala kaa. <sup>3</sup> Dum saabii so deental goondinɓe ngal neli ɓe. Be ceeki Finikiya e Samariya, eɓe kaalana dum'en haala tuubugol yimɓe ɓe nganaa Yahuudiyankooɓe. Dum laatanii sakiraaɓe ɓee fuu seyo manngo. <sup>4</sup> Nde ɓe njottinoo Urusaliima ndee, deental goondinɓe ngal e nelaabe ɓee e hooreeɓe ɓee njaɓɓii ɓe. Be kaalani dum'en ko Laamɗo wadani ɓe fuu.

<sup>5</sup> Kaa yoga e goondinɓe jeyaaɓe e fedde Farisa'en immii, mbii:

—Waajibi ɓe taadee, ɓe njamiree jokkude Sariya Muusaa oo.

<sup>6</sup> Nelaabe ɓee e mawɓe ɓee kawriti faa yeewa haala kaa. <sup>7</sup> Caggal haalihaalti keewɗo, Piyeer immii, wii ɓe:

—Sakiraaɓe, oɗon anndi Laamɗo subike kam e ley moodon gila ko ɓooyi, faa mi waajoo Kabaaru Lobbo oo hakkunde yimɓe ɓe nganaa Yahuudiyankooɓe, yalla eɓe nana ɓe ngoondina. <sup>8</sup> Laamɗo anndudo ɓerde oo hollii jabanii ɓe, nde hokki ɓe Ruuhu Ceniido oo hono no meeden nii. <sup>9</sup> Walaa fuu ko o seenndiri en e maɓɓe, nde wonnoo o laɓɓinirii ɓerde maɓɓe goondinal.

<sup>10</sup> Jooni, ko saabii so oɗon itta koro Laamɗo? Oɗon pawa e taalibaaɓe ɓee donngal, ngal enen e maamiraaɓe meeden en mbaawaa roondaade. <sup>11</sup> E moyyere Joomiraado men lissaa ngoondinir-ɗen so kisu-ɗen, hono non kamɓe duu.

<sup>12</sup> Deental ngal fuu deyyinii teen, ana hettinoo Barnabas e Pool ana njantoo no Laamɗo wadiri taagumansaaɓi e kaayɗe hakkunde leɓi godɗi. <sup>13</sup> Caggal ɓe ndeyyinike, Yaakuuba jaɓɓittii, wii:



—Sakiraaʼbe, kettinanee kam! <sup>14</sup> Simon humpitii en no Laamdo suʼborii gila e puddooʼde yimbe ʼbe nganaa Yahuudiyankooʼbe, faa wada dum'en yimbe muudum. <sup>15</sup> Dum hawri e haalaaji annabaaʼbe dii, hono no winndiraa nii:

<sup>16</sup> «Joomiraado wii:

Caggal dum, mi wartan,  
mi mahitoo suudu Daawuuda saamundu nduu,  
mi reentinan taye tuufeeje dee,  
mi darna ndu kasen,

<sup>17</sup> yalla yimbe heddiibe ʼbee ana tewta Joomiraado.

Dum woni, leji di innde am noddaa e muudum'en dii.

Joomiraado tabintindo deen kulle

<sup>18</sup> anndaade gila huunde fuu tagaaka,

wii non.»\*

<sup>19</sup> Dum saabii miin kaa ko njii-mi, pati tiidinanen yimbe leji goddi tuubuʼbe so ngarti e Laamdo ʼbee. <sup>20</sup> Kaa ko haani hen, nelen e maʼbbe ʼbe nantoo e ko tooruuji cobiini e jeenu e naamde jiibe e naamde yiiyam. <sup>21</sup> Gila e jamaanuuji ʼbooydi, Sariya Muusaa ana janngingee ley geelle dee fuu, eʼbe njangga mo jalaande fowteteende fuu ley cuudi baajordi.

### *Haala bataaki faade e goondinbe ʼbe nganaa Yahuudiyankooʼbe*

<sup>22</sup> Dum wadi so nelaabe ʼbee kaɽum e hooreeʼbe ʼbee e deental goondinbe ngal fuu ndawridi faa cuʼboo worʼbe e ley muudum'en faa nela dum'en Antiyokiya, ʼbe tawta Pool e Barnabas. ʼBe cuʼbii hooreeʼbe didon ley sakiraaʼbe ʼbee, Yahuuda noddirteedo Barasaba, kaɽum e Silas. <sup>23</sup> ʼBe ndokki dum'en oo doo bataaki:

Minen sakiraaʼbe moodon, nelaabe kaɽum e hooreeʼbe, miden njowta on, onon sakiraaʼbe amen leji goddi wonʼbe Antiyokiya e Siriya e Silisi.

<sup>24</sup> Min nanii yimbe iwii ga amen giryinirii on haalaaji, njiiʼbii hakkillaaji mon. Minen nee, min njamiraali ʼbe. <sup>25</sup> Min ndawridii, min kawrii, min cuʼbika worʼbe faa min nela dum'en e moodon, ʼbe tawta yiʼbbe amen Barnabas e Pool, <sup>26</sup> yeebiiʼbe yonkiiji muudum'en saabe Joommen Iisaa Almasiihu. <sup>27</sup> Dum wadi so min neli Yahuuda e Silas, pammina on ko min mbinndi e mon koo hunduko e hunduko. <sup>28</sup> Minen e Ruuhu Ceniido, min kawrii pati min njappa on ko teddi so wanaa ko tilsi koo: <sup>29</sup> nanto-don e kirsanaadi tooruuji e yiiyam e jiibudi e jeenu. So on ndeenii ko'e mon e majji, on ngadii ko moyyi. Yo Laamdo faabo en!

<sup>30</sup> ʼBe ndokkaa laawol, ʼbe njehi Antiyokiya. Nde ʼbe njottinoo ndee, ʼbe mooʼbti deental goondinbe ngal, ʼbe ndokki ngal bataaki oo. <sup>31</sup> Nde been janngunoo mo ndee, ceyyi sabi haalaaji dii ndokkii dum'en semmbe. <sup>32</sup> Yahuuda e Silas, Laamdo loowi e mum'en konngol mum faa ʼbe mbaajii sakiraaʼbe waajuuji keewdi, cuusini dum'en. <sup>33</sup> Caggal ʼbe paʼbbii ton, ʼbe ceerti e sakiraaʼbe ʼbee e dow jam, ʼbe mbirfitii to nelnooʼbe ʼbee too. [ <sup>34</sup> † ]

<sup>35</sup> Pool e Barnabas njoodii ley Antiyokiya ana njanngina ana mbaajoo konngol Joomiraado. Woʼbbe heewʼbe ana mballa ʼbe.

## **Dawol Pool dīdaʼbol**

### *No Pool e Barnabas ceertiri*

<sup>36</sup> Caggal balde seeda, Pool wii Barnabas:

\* <sup>15:18</sup> Amos 9.11-12 † <sup>15:34</sup> E deereji ʼbooydi dii, yoga ana ʼbeyda aaya 34:Kaa Silas, kaɽum kaa, heddi ton.

—Mbirfo-dēn e geelle de mbaajino-dēn konngol Joomiraado ngol dee fuu, njippano-dēn sakiraabe meeden bee, yeewen no be ngorri.

<sup>37</sup> Barnabas ana yidunoo be njaada e Yuhanna noddirteedo Marka. <sup>38</sup> Kaa dum welaali Pool sabi oon seeriino e ma66e Pamfiliya yaadaali e ma66e faa gollida e ma66e. <sup>39</sup> Barnabas e Pool mettondiri faa ceerti. Homo e ma66e fuu subii neddo goddo. Barnabas yaadi e Marka, naati laana geeci feewi Kiprus. <sup>40</sup> Pool subii Silas, yaadi e muudum caggal sakiraabe bee kalfinii dum e hinnee Joomiraado. <sup>41</sup> O seeki Siriya e Silisi, omo yaha omo hokka deente goondin6e dee semmbe.

## 16

### *No Timote yaadiri e Pool e Silas*

<sup>1</sup> Pool wari Derbe, caggal dum, o yottii Listara. Goondindo biyeteedo Timote ana wonnoo don. Inniiko yo Yahuudiyanke goondindo, kaa baam makko yo Yunaninke. <sup>2</sup> Sakiraabe won6e Listara e Ikoniya 6ee ana njetta mo. <sup>3</sup> Pool yidi naborde mo, taadi mo, nde wonnoo Yahuudiyankoo6e hodufe e deen leyde 6ee fuu ana anndi baam makko yo Yunaninke. <sup>4</sup> Ley geelle de be ceeki dee, e6e njottina goondin6e 6ee sariya mo nelaabe e maw6e won6e Urusaliima 6ee 6ami oo, e6e njamira 6een yo njokku mo. <sup>5</sup> Hono non, deente goondin6e dee ana beydoroos semmbe banngal goondinal, ana beydoo heewde jannde fuu.

### *No Pool noddiraa Makedoniya*

<sup>6</sup> Ruuhu Ceniido hadi be waajaade konngol ngol ley Asiya, saabe majjum 6e ceeki leydi Firigiya e leydi Galaatiya. <sup>7</sup> Nde 6e ngarnoo keerol Misiya ndee, 6e tewti yaade Bitiniya, kaa Ruuhu Iisaa yarranaaki 6e 6e naata. <sup>8</sup> E ley dum, 6e ya66ii Misiya, 6e ndegii e ngeenndi mbiyeteendi Torowas. <sup>9</sup> E ley jemmaaku muudum won ko yellitii e Pool. O yii gorko Makedoniyanke ana darii, ana ndaarda mo ana yiaa:

—Lummbu, ngaraa Makedoniya paabo-daa min!

<sup>10</sup> Nde Pool yiinoo won ko yellitii e mum ndee, oon wakkati fuu min ndaari yaade Makedoniya, min taylori Laamdo noddi min faa min mbaajoo 6e Kabaaru Lobbo oo.

### *No Lidiya goondiniri waaju Pool ley Filipa*

<sup>11</sup> Hono non, min naati laana geeci iwde Torowas, min paati ruunde Samotaras. Janngo muudum, min pahi Neyapolis. <sup>12</sup> Min iwi don, min pahi Filipa, ngeenndi burndi fuu teentilaade e leydi Makedoniya ndi Romankoo6e kumanii. Min ngadi don balde. <sup>13</sup> Nalaande fowteteende, min njaltiri ngeenndi ndii hedde daande maayo, ton Yahuudiyankoo6e mboownoo wadude duwaawu. Min tawi don rew6e ana moobtii, min njoodii, min mbaajii 6e. <sup>14</sup> Debbo dewoowo Laamdo, biyeteedo Lidiya, coottoowo kaddule bodeeje, jeyaado ngalluure wiyeteende Tiyatira, ana hettinoo. Joomiraado udditi bernde makko yalla omo goondina ko Pool waajotoo koo. <sup>15</sup> Kanko e koreeji makko fuu 6e lootaa lootogal batisima. Caggal dum, o jaagii min, o wii:

—So odon njogorii kam mi goondindo Joomiraado, njippee suudu am.

O tilsini min njippanoo mo.

### *No Pool e Silas ngattiraa ley kasu*

<sup>16</sup> Nannde wootere miden njahannoo to nokkuure wadirde duwaawu. Kordo debbo bataado anndudo ko warata hawriti e amen. Halfaa6e makko

paggike kaalisi keewfo e ndaggadaaku makko oo. <sup>17</sup> Mo jokki e amen, minen e Pool, omo wulla, omo wiya:

—Bee yimbe yo gollanoobe Laamdo Toowdo oo! Ebe mbaajoo on laawol kisindam.

<sup>18</sup> Balde kuurde omo wada non faa Pool mettaa, yeecitii, wii ladde ndee:

—Saabe Iisaa Almasiihu, yaltu e makko!

Ladde ndee yalti oon wakkati fuu. <sup>19</sup> Nde halfaabe 6ee anndunoo jikke muudum'en iwii e faggitoraade kordo oo ndee, nanngi Pool e Silas, ndaasi dum'en faa sakoro to sarooobe. <sup>20</sup> Non be nabi been to hooree6e ngeenndi ndii, mbii:

—Bee worbe didon be Yahuudiyankoo6e, e6e nii ngadda baasi e ngeenndi meeden ndii. <sup>21</sup> E6e mbaajoo aadaaji di ndagantaako en nja6en naa ngollen, enen Romankoo6e.

<sup>22</sup> Jamaa oo diirani 6e. Hooree6e 6ee njamiri kaddule ma66e ceekee, 6e piyee. <sup>23</sup> Be piyaa faa naawi, 6e uddaa ley kasu. Hooree6e 6ee njamiri kayboowo kasu oo hayba 6e faa gasa. <sup>24</sup> Oon nee, gila hebi ndee yamiroore, naanni 6e e ley suudu kasu hakkundeeru, o geyyii koyde mab6e geyyelle ledde.

<sup>25</sup> Nde hejjere jemma warnoo ndee, Pool e Silas ana ndewa Laamdo, e6e njaaroo dum. Kasunkoo6e wo66e 6ee ana kettinanoo 6e. <sup>26</sup> Oon wakkati fuu, leydi dimmbii dimmbagol manngol faa poo6e kasu dee njergi. Dame dee fuu udditii, geyyelle kasunkoo6e dee fuu kumtii. <sup>27</sup> Nde kayboowo oo finnoo so yii dame kasu dee ana udditii ndee, soorti kaafaawi muudum faa wartoo, miili kasunkoo6e 6ee ndogii. <sup>28</sup> Pool wulli faa toowi, wii mo:

—Pati wadu hoore maa fay huunde ko boni, min fuu miden doo!

<sup>29</sup> Nde o he6unoo fooyre ndee, o dogani kasu to Pool e Silas ngoni too, o sujidi, hedde omo sijnna. <sup>30</sup> Caggal dum, o yaltini 6e, o wii 6e:

—Baabiraa6e, hono fuu kaan-mi wadude yalla mido hisa?

<sup>31</sup> Be njaabii mo, 6e mbii:

—Goondin Iisaa Joomiraado oo faa kisaa, aan e koreeji maa.

<sup>32</sup> Be mbaajii mo konngol Joomiraado ngol, kanko e koreeji makko fuu.

<sup>33</sup> Oon jemma fuu o nabi 6e, o lootoyi barme mab6e. Oon wakkati fuu o lootaa lootogal batisima, kanko e koreeji makko fuu.

<sup>34</sup> O naanni Pool e Silas suudu makko, o hokki dum'en jaamdu. Kanko e koreeji makko fuu 6e ceyii sabi 6e kebii goondinde Laamdo. <sup>35</sup> Nde weetunoo ndee, hooree6e Romankoo6e 6ee neli laamunkoo6e mbiya kayboowo oo yoppa worbe didon 6ee. <sup>36</sup> Kayboowo oo haalanoyi dum Pool, wii:

—Hooree6e 6ee nelii njoppite-don. Njalton jooni, yo on njottoyo e jam.

<sup>37</sup> Pool jaabii, wii:

—Be njamirii min piyee yeeso yimbe tawee min caraaka, 6e naanni min e kasu. Minen worbe didon 6ee, min fuu min Romankoo6e. Jooni 6e yaltiniroo6e min cuucuukka naa? Patti, dum waawaa laataade. Kinna kambe e ko'e mab6e, 6e ngara 6e njaltina min!

<sup>38</sup> Laamunkoo6e 6ee kaaltani hooree6e Romankoo6e 6ee haala kaa. Been kuli nde nannoo Pool e Silas yo Romankoo6e ndee. <sup>39</sup> Be njehi, 6e curoyi been, 6e njaltini dum'en kasu oo. Be ndaardi dum'en njaltana 6e ngeenndi ndii. <sup>40</sup> Nde Pool e Silas njaltunoo e kasu oo ndee, naati galle Lidiya. Be njii sakiraa6e 6ee, 6e mbaaltini hakkillaaji mum'en. Caggal dum, 6e mbitti.

## 17

*No Pool e Silas mbaajorii ley Tesaloniiki*

<sup>1</sup> Pool e Silas ceeki Amfipolis e Apolloni, njottii Tesaloniiki, toon duu waajorduYahuudiyankoo6e won. <sup>2</sup> Pool wafi no woowri nii, naati e ley waajordu nduu. Nalaade powteteede tati omo liddondira e ma66e omo dallinoroo Binndi dii. <sup>3</sup> O fammini 6e, o holli 6e ana tilsi Almasiihu oo torree, immintinee e maayde. O wii 6e:

—Iisaa mo mbaajotoo-mi on haala muudum oo, kajum woni Almasiihu.

<sup>4</sup> Yoga e ma66e tayori dum goonga, njokki e Pool e Silas, kajum e Yunaninkoo6e rewo6e Laamdo heew6e e rew6e saahii6e yon6e. <sup>5</sup> Yahuudiyankoo6e 6e nganaa goondin6e 6ee konnii Pool e Silas, nanngi yim6e laalii6e yiilotoo6e ley sakoro, ndeentini dum'en. Be njirkiti ngalluure ndee fuu. Be naati e galle Yason, e6e tewta Pool e Silas faa 6e na6a dum'en to yim6e 6ee too. <sup>6</sup> Nde 6e ndonki yiitude 6een ndee, 6e ndaasi Yason e yoga e sakiraa6e 6ee faa to saranoo6e ngalluure ndee, e6e ngulla e6e mbiya:

—Yim6e imminoo6e baasi e aduna oo fuu ngarii doo, <sup>7</sup> Yason jippinii dum'en! Be fuu ko 6e ngadata koo ana luuttondiri e sariya kaananke Roma mawdo oo, e6e mbiya ana woodi kaananke goddo biyeteedo Iisaa.

<sup>8</sup> Diin haalaaji njirkiti jamaa oo e saranoo6e ngalluure ndee 6ee. <sup>9</sup> Yason e sakiraa6e 6ee njobi kaalisi, caggal muudum 6e njoppitaa.

*No yim6e Bereya nja66orii Kabaaru Lobbo oo soobe*

<sup>10</sup> Oon wakkati fuu e ley jemmaaku muudum, sakiraa6e 6ee neli Pool e Silas Bereya. Nde 6e njottii ndee, 6e njeji to waajorduYahuudiyankoo6e too. <sup>11</sup> Been furi Yahuudiyankoo6e won6e Tesaloniiki 6ee laa6ude 6ernde. Be nja66orii konngol ngol soobee, e6e mbi6oo Binndi dii nannde fuu faa 6e yeewa yalla ko Pool waajii koo yo goonga. <sup>12</sup> Heew6e e ma66e ngoondini, kajum e rew6e Yunaninkoo6e saahii6e e wor6e Yunaninkoo6e heew6e. <sup>13</sup> Nde Yahuudiyankoo6e Tesaloniiki 6ee anndunoo Pool waajike konngol Laamdo ngol ley Bereya ndee, 6e ngari ton, 6e njii6i jamaa oo. <sup>14</sup> Oon wakkati fuu, sakiraa6e 6ee neli Pool faa maayo geeci, Silas e Timote keddii don. <sup>15</sup> Liwndii6e Pool 6ee njaadi e muudum faa Ateena. Be ngarti, 6e ngaddani Silas e Timote nelal ngara to Pool law.

*No Pool waajorii ley ngalluure wiyeteende Ateena*

<sup>16</sup> Nde Pool doomannoo 6e Ateena fade ma66e warde ndee, yonki muudum nawi sanne ko yii no ngalluure ndee foti heewde tooruuji nii. <sup>17</sup> Dum wafi so o haaldi e Yahuudiyankoo6e e rewo6e Laamdo wo66e ley waajordu nduu, omo haalda e 6e o hawrannoo e mum nannde fuu ley sakoro 6ee duu. <sup>18</sup> Yoga e miijotoo6e wiyete6e Epikuri'en e Sitoyko'en njaabondiri e makko. Yogaa6e ana mbiya:

—Kodum oo ndoryoowo haalata?

Wo66e duu ana mbiya:

—Omo nanndi e baajotoodo haala tooruuji janani.

—Wala ko 6e mbiiri non so wanaa haala Iisaa kajum e immital maay6e o waajinoo 6e.

<sup>19</sup> Nden 6e 6ami Pool 6e na6i dum waamnde haayre wiyeteende Areyopagus,\* 6e mbii dum:

\* 17:19 Areyopagus yo deental burngal toowde deentinoowal ardiie6e ngalluure Ateena.

—Miden njidi anndude diina keso mo mbaajoto-daa oo. <sup>20</sup> Sabi a to66ii e noppi amen haalaaaji di min mboowaa nande. Miden njidi anndude maanaa majji.

<sup>21</sup> Tawi Ateenankoo6e e ho66e joodii6e ton 6ee ngollataa huunde fuu so wanaa haalde huunde heyre nde 6e nani.

<sup>22</sup> Nden Pool darii hakkunde Areyopagus, wii:

—Ateenankoo6e, mi yii e mon on diinankoo6e sanne, <sup>23</sup> sabi nde njiiinoomi e ngalluure moodon ndee, mi yii cuudi moodon dewirdi, mi tawii ana winndaa e ittirde sadaka wootere: «laamdo mo anndaaka».† Ndennoo, ko ndewaton ko on anndaa koo, dum mbaajotoo-mi on e muudum. <sup>24</sup> Laamdo tagodo aduna e ko woni e muudum fuu oo, kaɲum woni Jom kammu e leydi, o joodataako ley cuudi mahiraadi juude. <sup>25</sup> O hasindinaa e yim6e ngollana mo fay huunde, sabi kanko hokkata tageefu oo fuu nguurndam e yonki e foofaango e huunde fuu. <sup>26</sup> E neddo gooto Laamdo yaltini leɲi dii fuu, joyyini dum'en e aduna oo. Gila dum wadaali, o darnani dum'en jamaanuui e keeri hakkunde kodorde muudum'en, <sup>27</sup> yalla e6e tewta Laamdo, 6e moomoo faa 6e njiita dum. Dum e taweede o woddaaki fay gooto e meeden. <sup>28</sup> «Nguurndam e dillinaade e goodal, saabe makko ke6ir-den.» No yoga e yimoo6e moodon mbii: «Enen duu, en iwdi makko.»

<sup>29</sup> Nde wonnoo en iwdi makko, en kaanaa miijaade omo nanndi e tooru moyyiniraandu kanɲe naa kaalisi naa haayre sehaande, nde neddo moyyinirta neɲal e hakkille. <sup>30</sup> Laamdo rewtaaki yim6e nde ngonnoo e majjere ndee. Jooni, o yamirii yim6e fuu tuuba do tawaa fuu, <sup>31</sup> sabi o sartike wakkati mo o sarirta aduna oo e foocitaare, o sarira dum neddo mo o subii oo. O hollii yim6e fuu dum yo goonga nde o immintini oon neddo e maayde.

<sup>32</sup> Nde 6e nannoo Pool ana waajoo haala immital maay6e ndee, yoga ana uyyoo mo, yoga ana wiya:

—Min kettinante oo waaju nannde wonnde.

<sup>33</sup> Non Pool iwi hakkunde ma66e. <sup>34</sup> Yoga jokkii e makko, goondinii. Ana jeyaa e 6een biyeteedo Diyonisiiyus, jeyaado e deental Areyopagus, kaɲum e debbo biyeteedo Damaris, e wo66e kasen.

## 18

### *No Pool golliri ley ngalluure wiyeteende Korintu*

<sup>1</sup> Caggal dum, Pool iwi Ateena, yehi Korintu. <sup>2</sup> O tawi ton Yahuudiyanke biyeteedo Akilas, pindo leydi mbiyeteendi Ponta. Booyaali ko oon e jom suudu muudum biyeteedo Piriskilla iwi Italiya, sabi Kalawdiyus kaananke mawdo oo yamiriino Yahuudiyankoo6e fuu njalta Roma.\* Pool yehi yeewoyde 6e. <sup>3</sup> O woni don, omo gollida e ma66e sabi o moyyinoowo hukkum-maaji no ma66e nii. <sup>4</sup> Nalaande fowteteende fuu, Pool ana liddondira e Yahuudiyankoo6e e Yunaninkoo6e ley waajordu, yalla omo he6a hakkillaaji ma66e.

<sup>5</sup> Nde Silas e Timote iwnoo Makedoniya njottii Korintu ndee, Pool watti hakkille muudum fuu e waajaade, ana seettanoo Yahuudiyankoo6e 6ee Iisaa woni Almasiihu oo. <sup>6</sup> Kaa nde wonnoo e6e calanii mo, e6e njennannoo mo, o fiddi kaddule makko, o wii 6e:

† **17:23** Ateenankoo6e ngadi e rewruide innde laamdo mo anndaaka, yalla tooru fuu mo 6e njeggiti ana waasa mettinde. \* **18:2** Yamiroore Kalawdiyus ribbunde Yahuudiyankoo6e Roma ndee darnaama hitaande 49 naa 50 caggal pinaade Iisaa.

—Yo diina mon fiito on! Mi walaa hen hannde, mi walaa hen janngo. Gila jooni mi yahan to 6e nganaa Yahuudiyankoo6e.

<sup>7</sup> O iwi don, o yehi to gorko dewoowo Laamdo, biyeteedo Titus Yustus, mo galle muudum takkii e waajordu nduu. <sup>8</sup> Kirispus, hooreejo waajordu nduu oo, kajum e koreeji muudum fuu ngoondini Joomiraado. Heew6e e Korintunkoo6e hettintonoo6e 6ee ngoondini, lootaa lootogal batisima.

<sup>9</sup> Jemma gooto Joomiraado yellintini e Pool, wii:

—Pati hul, pati deyyina, waaja. <sup>10</sup> Mido wondi e maa. Fay gooto waawaa torrude ma, sabi yim6e am ana keewi ley ndee ngalluure.

<sup>11</sup> Pool joodii hakkunde ma66e hitaande e feccere, ana janngina 6e konngol Laamdo ngol.

<sup>12</sup> Nde Galliyon laaminoo leydi Akaya ndee, Yahuudiyankoo6e kaaldi, kawri, nanngi Pool, nabi dum sarirde, <sup>13</sup> kappi dum, mbii:

—Oo gorko yo yojjooowo yim6e yalla ana ndewra Laamdo ko waldaa e sariya oo.

<sup>14</sup> Pool anniyii faa haala, forri Galliyon wii Yahuudiyankoo6e 6ee:

—Yahuudiyankoo6e, so tawii toonange naa golle bondo, mi ja6anan on ko ngullani-don mo koo, <sup>15</sup> kaa nde wonnoo dum jeddi dow haalaaji diina moodon e inde, kajum e sariya moodon onon tan, dum onon e ko'e moodon carata. Miin, mi sarataa dee kudde!

<sup>16</sup> O yaltini 6e sarirde ndee. <sup>17</sup> Nden, 6e fuu 6e nanngi Sosteni, hooreejo waajordu nduu oo, 6e pii dum do yeeso sarirde doo. Kaa fuu Galliyon bilaaki hen fey.

### *No Pool wirfitorii Antiyokiya*

<sup>18</sup> Pool fa66i don balde kuurde. Caggal dum, o waynondiri e sakiraa6e 6ee, o naati laana, o feewi Siriya, kanko e Piriskilla e Akilas. Fade makko naatude, tawi o labii hoore makko nokku biyeteedo Kankiriya sabi o fodiino fodoore.

<sup>19</sup> Be njottii Efeesu, Pool yoppi don Piriskilla e Akilas, kajum naati waajordu ana liddondira e Yahuudiyankoo6e 6ee. <sup>20</sup> Be ndaardi mo o fa66ana 6e, kaa o jabaali. <sup>21</sup> Nde o waynondirta e ma66e ndee, o wii:

—Mi wartan e moodon so Laamdo ja6ii.

O naati laana, o iwi Efeesu, <sup>22</sup> o yottii Kaysariya, o njabbiti Urusaliima faa o jowta deental goondin6e ngal. Caggal dum, o yehi Antiyokiya.

## **Dawol Pool tata6ol**

<sup>23</sup> Caggal Pool wafii ton wakkati, o witti. O seeki leydi Galaatiya e leydi Firigiya, omo yaha omo beydana taalibaa6e cuusal.

### *No Apollos waajorii ley Efeesu e Korintu*

<sup>24</sup> Yahuudiyanke biyeteedo Apollos, pindo Aleksandiri, wari Efeesu. O gorko fasiilante haala, baawdo Binndi dii, <sup>25</sup> annudoo laawol Joomiraado. Omo waajoroo soobirantaaku e seyo, diina Iisaa kaa pay o jannginta. Kaa o anndaa so wanaa lootogal batisima Yaayaa ngal. <sup>26</sup> Omo waajoroo cuusal e ley waajordu nduu. Nde Piriskilla e Akilas kettinaninoo mo ndee, 6e nabi mo, 6e pirritani mo laawol Laamdo ngol faa 6uri no arannde nii laa6ude.

<sup>27</sup> Nde Apollos anniyinoo yaade leydi Akaya ndee, sakiraa6e 6ee mballi mo, 6e mbinndi e taalibaa6e won6e ton 6ee bataaki nja66oo mo faa gasa. Nde o yottii ton ndee, o walli goondin6e 6ee e dow moyyere Laamdo sanne. <sup>28</sup> Sabi o libii Yahuudiyankoo6e 6ee ngattu naawdo hakkunde yim6e, omo dallinoroo Binndi dii, omo tabintina Iisaa woni Almasiihu.

## 19

*No Pool hawrintiniri taalibaafe Yaayaa ley Efeesu*

<sup>1</sup> Nde Apollos wonnoo Korintu ndee, Pool jokki laawol haayre, yehi Efeesu.

O tawi ton taalibaafe, <sup>2</sup> o lamndii dum'en, o wii:

—Yalla on kebiino Ruuhu Ceniido oo nde ngoondin-don ndee naa?

Be njaabii mo:

—Min nanaali Ruuhu Ceniido ana woodi duu, sako min kefa.

<sup>3</sup> O lamndii 6e, o wii:

—Ndennoo, lootogal batisima hongal kebu-don?

Be njaabii, 6e mbii:

—Lootogal batisima Yaayaa ngal.

<sup>4</sup> Pool wii:

—Yaayaa batisima tuubugol batisannoo, ana wiya yimbe 6ee yo ngoondin garoowo caggal muudum oo, dum woni Iisaa.

<sup>5</sup> Nde 6e nannoo dum ndee, 6e mbatisiraa saabe Iisaa Joomiraado oo. <sup>6</sup> Nde Pool fawnoo juude muudum e ma66e ndee, Ruuhu Ceniido jippii e ma66e, e6e kaala e demde janane, e6e kaalta ko Laamdo loowi e ma66e koo. <sup>7</sup> E6e mbaara e yimbe sappo e didon.

<sup>8</sup> Pool naati e ley waajordu nduu, ana waajaroo 6e cuusal hakke lebbi tati, omo haalda e ma66e, omo liddondira e ma66e, omo habanoo famminde 6e haala Laamu Laamdo. <sup>9</sup> Kaa tiidu6e ko'e ngon e ma66e, calli goondinde, ana mbonnita laawol Joomiraado ngol yeeso yimbe fuu. Dum wadi so Pool seerti e ma66e, nabi taalibaafe 6ee feere, ana waajoo dum'en jannde fuu e ley janngirde neddo biyeteedo Tirannus. <sup>10</sup> O worri non faa hi66i duubi didi, faa hodunoo6e e Asiya 6ee fuu, gila e Yahuudiyankoo6e faa e Yunaninkoo6e, nani konngol Joomiraado ngol.

<sup>11</sup> Laamdo wadiri juude Pool kaayde mawde, <sup>12</sup> fay e sarbetiiji e kaddule memnoode terde makko ana nabe pawee e jaw6e, jawuujii muudum'en cella, seydaani'en njalta e muudum'en. <sup>13</sup> Yoga e Yahuudiyankoo6e yiilotoo6e faa ndibba seydaani'en, ndaarii ribbirde dum'en innde Iisaa, mbii:

—Alhorma Iisaa mo Pool waajotoo haala muudum oo, njaltee!

<sup>14</sup> Gooto e hooree6e yottinoo6e sadaka, Yahuudiyanke biyeteedo Sikewas, 6i66e muudum wor6e njeddin ngadii non, <sup>15</sup> faa seydaani jaabii dum'en, wii:

—Mido anndi Iisaa, mido anndi Pool, kaa onon, on ho6e?

<sup>16</sup> Neddo laddaado oo ha6i e ma66e, jaalii 6e, torri 6e faa 6e ndogi, 6e njaltiri galle oo terde teete e barme. <sup>17</sup> Kabaaru majjum saakii hakkunde Yahuudiyankoo6e e Yunaninkoo6e joodiibe Efeesu. Kulol nanngi 6e fuu, innde Iisaa Joomiraado oo teddinaa. <sup>18</sup> Heew6e e goondin6e 6ee ngari njaadiri, kaalti gollleeji di ngadunoo. <sup>19</sup> Bonjobii'en heew6e ndeentini dewte muudum'en, nduppi de yeeso yimbe fuu. Be kiisii coggu majje, 6e tawi ana foti ujunaaji capande joy kaalisi daneejo.\* <sup>20</sup> Hono nii, haala Joomiraado kaa beydorii saakaade e heewde semmbe.

*No fitina mawdo wadiri ley Efeesu saabe laawol Joomiraado*

<sup>21</sup> Caggal dum, Pool fellisi seekude Makedoniya e Akaya faade Urusaliima. O wii:

—So mi tilike ton, waajibi mi yaha Roma duu.

<sup>22</sup> O neli gollidoo6e makko didon, Timote e Erasta, njaha Makedoniya. Kanko, o fa66i Asiya. <sup>23</sup> E oon wakkati, fitina mawdo wadi sabaabu laawol

\* **19:19** Dum hawrata e golle jokolle duubi teemedere e capande joy.



Joomiraado ngol. <sup>24</sup> Baylo ndaneeri biyeteedo Demeteriyus ana tafa cuuroy kaalisi nanndukoy e rewruu tooru biyeteedo Artemis. Omo heba hen tino heewngo, kanko e golloobe makko. <sup>25</sup> O reentini been e wobbe be nanndi golle, o wii dum'en:

—Yi66e, odon anndi e oo doo golle kebal meeden ngal fawii. <sup>26</sup> Odon njija, odon nana Pool majjinii yimbe heewbe, wanaa ley Efeesu doo tan, ley leyde Asiya fuu. O haalani be kulle deweteede de yimbe moyyiniri juude mum'en dee nganaa deweteede. <sup>27</sup> So jokkii nii, yimbe mbonnan golle meeden. Wanaa dum tan, yimbe noottan teddinde rewruu Artemis nduu duu, tooru men mawdo mo hodube Asiya e aduna oo fuu ndewata oo.

<sup>28</sup> Nde be nani diin haalaaji ndee, be mettaa sanne, hedde ebe ngulla, ebe mbiya:

—Artemis Efeesunkoo6e yo mawdo! Artemis Efeesunkoo6e yo mawdo!

<sup>29</sup> Ngalluure ndee fuu jii6ii. Gooto fuu dogani boowal manngal ngal. Be ndaasi Gayus e Aristarka Makedoniyankoo6e, yaadube Pool 6ee. <sup>30</sup> Pool ana yidi naatude hakkunde jamaa oo, kaa taalibaa6e 6ee kadi mo dum. <sup>31</sup> Yoga e hooree6e leydi Asiya, yi66e makko, neli e makko ana ndaarda mo pati o naata boowal too. <sup>32</sup> E oon wakkati, jamaa oo ana jii6ii sanne. 'Bee ana ngullana dum doo, 6ee too ana ngullana dum gaa. Ko 6uri heewde e yimbe 6ee anndaa fay ko hawrintini dum'en. <sup>33</sup> Yoga e jamaa oo kaaltani haala kaa gorko biyeteedo Aleksandere mo Yahuudiyankoo6e 6ee ngadi kaaloowo muudum'en oo. Aleksandere huncani be junngo faa jinngana yimbe muudum 6ee. <sup>34</sup> Kaa nde be annditinnoo o Yahuudiyanke ndee, 6e fuu ebe ngulla ko waarata e leeruuji didi, ebe mbiya:

—Artemis Efeesunkoo6e yo mawdo!

<sup>35</sup> Nden binndoowo ngalluure ndee deyyini jamaa oo, wii:

—Onon Efeesunkoo6e, homo woni mo anndaa ngalluure Efeesu ndee woni hayboore rewruu Artemis deweteedo mawdo oo, kajum e natal muudum iwrungal dow kammu ngal? <sup>36</sup> Nde wonnoo fay gooto waawaa yeddude dum, odon kaani jippinde hakkillaaji moodon pati ngolliron fay huunde e hejaare. <sup>37</sup> Wor6e be ngaddu-don 6ee, nganaa wujjoobe kulle rewruu, nganaa yennoobe deweteedo meeden oo. <sup>38</sup> So tawii Demeteriyus e golloobe wondube e muudum 6ee won mo njidi wullanaade, palaade careteede ana ndarnaa, kaanankoo6e saroobe ana ngoodi, yo 6e noddondir! <sup>39</sup> Kaa so tawii won goddum ko ndaartaton, to deental saahiibe dum saroytee. <sup>40</sup> Eden mbaawi felireede murtere wadunde hannde ndee, sabi fitina baado nii walaa fay daliili gooto.

<sup>41</sup> Caggal dii haalaaji, o firriti jamaa oo.

## 20

### *No Pool dawiri yaade leyde Makedoniya e Yuunan*

<sup>1</sup> Nde fitina oo yawti ndee, Pool moo6ti taalibaa6e 6ee, waajii dum'en. Caggal dum, waynii dum'en, feewi Makedoniya. <sup>2</sup> O seeki ndiin leydi, omo waajoo yimbe 6ee haalaaji keewdi. Caggal dum, o yehi Yuunan. <sup>3</sup> O wadi ton lebbi tati. O lanndinii faa o naata laana faade Siriya. Kaa caggal nde Yahuudiyankoo6e ndawirii faa njammboo mo, o anniyii wirfitoraaade laawol Makedoniya. <sup>4</sup> Bee doo dwtunoo mo: Sopater 6ii Pirrus jeyaa6o Bereya, e Aristarka e Sekundus jeyaa6e Tesaloniiki, e Gayus jeyaa6o Derbe e Timote e Tikikus e Torofim jeyaa6e leydi Asiya. <sup>5</sup> Been ardii min, ndoomoyi



min Torowas. <sup>6</sup> Minen, min naati laana faade Filipa caggal iidi mo buuru yuufinaaka. E ley balde joy min kewtii 6e Torowas, min ngadi don yontere.

*No Pool wuurtiniri Ewtikus*

<sup>7</sup> Nannde aranndeere e yontere, tawi miden mooftii faa min taya buuru.\* Pool ana waajoo yimbe 6ee, nde wonnoo omo anniyii wittude janngo mum. O jokki e waaju oo faa hejjere jemma. <sup>8</sup> Lampaaji keewdi ana ngonnoo e ley suudu dowuuru ndu min mooftinoo e muudum nduu. <sup>9</sup> Suka jokolle biyeteedo Ewtikus ana joodii dow falanteere. Ko Pool juutini waaju muudum oo koo, Ewtikus daanii doyingol teddungol. O saami iwde e falanteere sooro tatabo ngoo. Nde 6e 6amti mo ndee, tawi o maayii. <sup>10</sup> Kaa Pool jippii, hippii e makko, bami mo e juude muudum, wii:

—Mbaaltee! Yonki makko wartii e makko!

<sup>11</sup> Nii Pool njabbiti, tayi buuru, naami. Caggal dum, o jokki waaju makko faa weendoogo, o witti. <sup>12</sup> Suka jokolle oo nabtaa ana wuuri. Dum buu6ini berde ma66e sanne.

*No Pool waynorii hooree6e goondin6e won6e Efeesu*

<sup>13</sup> Minen, min adii wirfitaade, min naati laana faade Assos do min kaani naatinde Pool, sabi o anniyiido yaarude ton koyde. <sup>14</sup> Nde min tawondiri Assos ndee, min naanni mo laana, min peewi Mitilene. <sup>15</sup> Min iwi don e laana, min njottoyii janngo mum yeeso ruunde Kiyos. Fa66i-janngo mum min ya66orii banngge ruunde Samos, fa66iti-janngo mum min njottii Miletus. <sup>16</sup> Pool fellisii ya66oraade Efeesu, sabi o yidaa neeptude e leydi Asiya ndii, omo hejoo yottaade Urusaliima nannde iidi Pantekot so tawii ana laatoo.

<sup>17</sup> Nde Pool wonnoo Miletus ndee, nelani hooree6e deental goondin6e Efeesu 6ee. <sup>18</sup> Nde 6e ngari ndee, o wii 6e:

—Odon anndi no ngorru-mi e moodon gila nannde koyngal am adii naatude e leydi Asiya ndii faa hannde. <sup>19</sup> Mi gollirani Joomiraado leydinkinaare fuu, kajum e gondi keewdi e torraaji Yahuudiyankoo6e kewtiidi kam dii. <sup>20</sup> Odon anndi mi suudaali on huunde fuu ko nafata on, mi waajike on, mi janningii on hakkunde yimbe kajum e ley galleeji moodon. <sup>21</sup> Mi tinndinii Yahuudiyankoo6e e Yunaninkoo6e fuu tuubana Laamdo, ngoondina Joomiraado meeden Iisaa. <sup>22</sup> Jooni, mido nii jokki e Ruuhu Ceniido, mido yaha Urusaliima, mi anndaa ko hewtoytooo kam ton, <sup>23</sup> so wanaa ko Ruuhu Ceniido oo hollata kam: ley geelle dee fuu ana wiya kam geyyelle e torra ana ndoomi kam. <sup>24</sup> Kaa miin, mi jataaki nguurdam am e maayde am fuu so mi he6ii yottinirde golle mo Iisaa Joomiraado halfini kam oo seyo. Oon golle woni seettaade Kabaaru Lobbo haala hinnee Laamdo.

<sup>25</sup> Jooni, mido anndi on njiitataa kam kasen, onon 6e ngondunoo-mi so mido waajoo dum'en haala Laamu Laamdo oo 6ee. <sup>26</sup> Dum wadi so mido seettanoo on hannde dum doo: so tawii gooto e moodon halkiima, wanaa sabaabu am. <sup>27</sup> Sabi mi waajike on anniyaaji Laamdo fuu, mi suudaali on fay huunde. <sup>28</sup> Ndeenee ko'e moodon, ndeenon sewre nde Ruuhu Ceniido oo daldi on ndee, laato-don duroo6e deental goondin6e Laamdo ngal, sabi yiyam makko o soottitorii ngal. <sup>29</sup> Miin, mido anndi caggal am yimbe bon6e cooroto e ley moodon hano no pobbi nii, kasen duu di njokkan e sewre ndee. <sup>30</sup> Fay e ley moodon dajon wor6e immiife ana mbaajoo waajuuji peneeji faa poofa taalibaa6e 6ee njokka caggal muudum'en. <sup>31</sup> Dum nee, njeerteel!

\* **20:7** Tayude buuru ana firrita rewirde Laamdo hiraande seniinde.

Miccito-don duubi tati, jemma e jalooma, mi njoottaali waajoraade gooto e moodon fuu gondi.

<sup>32</sup> Jooni, mi halfinii on Laamdo, kapum e konngol hinnee muudum baawn-gol nabude on yeeso e ley goondinal, hokka on ko resani sennaafe 6ee fuu.

<sup>33</sup> Abada mi muuyaali fay huunde e mon, wanaa kaalisi, wanaa kanje, wanaa kaddule. <sup>34</sup> Onon e ko'e moodon, odon anndi juude am dee kumti haajuuji am e haajuuji wondufe am. <sup>35</sup> Mi hollii on e kabaaruuji dii fuu, kinaa ngolliron non, mballon lo'ube tawa odon miccitoo dii doo haalaaji di Joomiraado men Iisaa haali kapum e hoore muudum: «Hokkude buri mbelko'aaku diina hokkoreede.»

<sup>36</sup> Nde Pool tilinoo haalde dum ndee, kapum e ma66e fuu 6e ndiccii, 6e nduwii. <sup>37</sup> Be fuu 6e mboyi bojji mawdi, 6e kippii e Pool, 6e ca66indii dum.

<sup>38</sup> Ko 6eydi sunlinde 6e ko o wii 6e njiitataa mo kasen koo. Caggal dum, 6e liwndii mo faa to laana too.

## 21

### *No Pool nabbitiri Urusaliima*

<sup>1</sup> Nde min ceerti e ma66e ndee, min naati laana geeci, min peewi ruunde Kos. Janngo mum, min njottii ruunde Rodusa, min iwi don, min peewi ngeenndi Patara. <sup>2</sup> Min kefi laana lummboowa yaade Finikiya, min naati hen, min 6ettii. <sup>3</sup> Nde min njahunoo faa min coynorii Kiprus banng e amen nano, min peewi Siriya, min njottoyii Tirus.

Don laana kaa jippinta kaaki muudum. <sup>4</sup> Min tawi don taalibaa6e, min ngonni don balde jeddi. E6e mbiira Pool ley Ruuhu Ceniido pati nabbita Urusaliima. <sup>5</sup> Nde yontere ndee hi66unoo ndee, min mbitti. Be fuu 6e liwndii min faa min njalti ngeenndi ndii, kam6e e rew6e e sukaa6e. Min ndiccii dow fonngo maayo geeci, min nduwii. <sup>6</sup> Nde min mbaynondirnoo ndee, minen min naati laana, kam6e 6e mbirfitii cuudi ma66e.

<sup>7</sup> Nde min naati laana Tirus ndee, min njottoyii Potolemayis. Min njowti sakiraa6e, min jallani 6e, min mbaali. <sup>8</sup> Janngo mum, min ndawi, min njottii Kaysariya, min naati suudu Filipa baajotoodo Kabaaru Lobbo oo, min njippanii dum. Kanko omo jeyaa e njeddon subaa6e Urusaliima 6ee.\* <sup>9</sup> Omo jogii bi66e rew6e nayon 6e bamaaka, haaltoobe ko Laamdo loowi e mum'en koo. <sup>10</sup> Nde min pa66unoo don ndee, gorko loowaado konngol Laamdo biyeteedo Agabus iwri Yahuudiya. <sup>11</sup> O wari e amen, o 6ami kumorgol Pool, o ha66i juude makko e koyde makko, o wii:

—Ruuhu Ceniido wii: nii Yahuudiyankoo6e won6e Urusaliima 6ee ka66irta jeydo ngol kumorgol oo, ngada dum e juude heefer6e.

<sup>12</sup> Nde min nani dum ndee, minen e jeyaa6e don 6ee fuu, min ndaardi Pool pati nabbita Urusaliima. <sup>13</sup> Pool jaabii, wii:

—Kodum wadi so odon mboya, odon taya bernde am? Miin, mido lanndinani ko wanaa ha66eede tan, mido lanndinani fay maayde Urusaliima saabe innde Iisaa Joomiraado oo.

<sup>14</sup> Nde min ndonkunoo waylitinde mo ndee, min celi e makko, min mbii:

—Yo muuyde Joomiraado laato!

### *No Pool yottorii Urusaliima e no hawritiri e Yaakuuba*

<sup>15</sup> Caggal deen balde, min lanndinii, min nabbiti Urusaliima. <sup>16</sup> Yoga e taalibaabe Kaysariyankoo6e njaadi e amen, nabi min galle gorko biyeteedo

\* 21:8 Golle Nelaafé 6.1-6; 8.5

Manason, jeyaado Kiprus, laatiido taalibbo gila ko 6ooyi, yalla miden jippanoo dum.

<sup>17</sup> Nde min njottii Urusaliima ndee, sakiraa6e 6ee nja66orii min weltaare.

<sup>18</sup> Janngo mum, min njaadi e Pool to Yaakuuba. Hooree6e deental goondin6e 6ee fuu ana tawanao ton. <sup>19</sup> Caggal ko o jowti 6e koo, o haalani 6e huunde fuu ko Laamdo wadani yim6e 6e nganaa Yahuudiyankoo6e saabe golle makko.

<sup>20</sup> Nde 6e nani dum ndee, 6e njetti Laamdo. Be mbii Pool:

—Sakiike, hono foti ujunaaji Yahuudiyankoo6e njii-daa ko ngoondini, haya faa hannde e6e tiinnii e jokkude Sariya Muusaa oo. <sup>21</sup> Be kaalanaama ada janngina Yahuudiyankoo6e won6e hakkunde lejii goddi njoppa Sariya Muusaa, mbii-daa pati taada sukaa6e muudum'en kasen, pati njokka neesu-uji dii kasen. <sup>22</sup> Ndennoo, hono ngadaten? Sabi min tayorii 6e nanan a warii. <sup>23</sup> Wadu ko min kaalante koo. Miden njogii doo wor6e nayon 6aman6e Laamdo fodoore. <sup>24</sup> Na6u 6e cennidaa hoore maa e ma66e, njoo6a ko 6e kaani yobude koo, yalla e6e mbaawa la6eede. Yim6e fuu anndan ko haaletenoo e maa koo fuu wanaa goonga, 6e anndan kasen aan e hoore maa, afa jokki Sariya Muusaa. <sup>25</sup> Goondin6e iw6e e lejii goddi 6ee, min mbinndii e mum'en ndeentoo e ko hirsanaa tooruuji e yiyam e jii budii, 6e jeenu.

<sup>26</sup> Pool 6ami na6i wor6e 6ee, yaadi e mum'en. Janngo mum, 6e cennidaa. O naati Suudu Dewal Mawndu nduu, o haalani yottinoobe sadaka palaade sennugol dee ki66ii, faa gooto e ma66e fuu wadanees sadaka.

### *No Pool nanngiraa ley Suudu Dewal Mawndu*

<sup>27</sup> Nde balde jeddi dee 6adinoo hi66ude ndee, yoga e Yahuudiyankoo6e leydi Asiya njii Pool e ley Suudu Dewal Mawndu nduu, 6e njirkiti yim6e 6ee fuu, 6e nanngi mo. <sup>28</sup> E6e ngulla, e6e mbiya:

—Israa'iilankoo6e, paabee min! Oo woni gorko jannginoowo yim6e e ley nokkuuje dee fuu ana bekkisoo yim6e lepol meeden, ana bekkisoo sariya meeden oo, ana bekkisoo nokku ceniido oo. Jooni kaa, o waddii fay Yunaninkoo6e e ley Suudu Dewal Mawndu nduu. O so6inii oo nokku ceniido!

<sup>29</sup> Walaa ko 6e mbiiri non so wanaa 6e njiino Torofim Efeesunke oo ana wondi e Pool ley ngalluure ndee. Be cikkiino Pool naanniino mo e ley Suudu Dewal Mawndu nduu.

<sup>30</sup> Jirkitagol ngol huu6i ngalluure ndee. Yim6e ana njaltira tatteeji dii fuu. Be nanngi Pool, 6e ndaasi dum faa 6e njaltini dum Suudu Dewal Mawndu nduu, 6e uddi dame dee oon wakkati fuu. <sup>31</sup> Nde 6e tewti faa 6e mbara Pool ndee, tawi hooreejo sordaasi'en oo humpitike Urusaliima fuu ana darorii koyngal gootal. <sup>32</sup> Don e don, o 6ami sordaasi'en e maw6e muudum'en, o dogani 6e. Nde yim6e 6ee njii mo kanko e sordaasi'en 6ee ndee, njootti fiide Pool. <sup>33</sup> O 6attii Pool, o yamiri Pool nanngee, o wii ha66iree calali didi, o lamndii kajum yo homo e kodum wadi? <sup>34</sup> Jamaa oo ana wulla. Bee ana ngulla gedel, 6ee too ana ngulla gonngel. Nde wonnoo jirkitaare ndee hadii mo faamde, o yamiri Pool na6ee to hu6eere too. <sup>35</sup> Nde Pool wari faa njabba kalikali hu6eere oo ndee, sordaasi'en 6ee ndoondii mo saabe jirkitaare jamaa oo, <sup>36</sup> sabi yim6e heew6e ana njokki e makko ana ngulla, ana mbiya:

—War mo!

### *No Pool jaaborii Urusaliimankoo6e*

<sup>37</sup> Nde 6e ngari faa 6e naanna mo e damal hu6eere ngal ndee, Pool wii hooreejo oo:

—Ana daganoo kam mi haalda e maa naa?

Oon wii mo:

—Ee? Adá waawi yunaninkoore naa? <sup>38</sup> Ndennoo wanaa aan woni Misiranke gadúdo murtere ko booyaaali, wardi e waroobe ko'e ujunaaji nayon, nafi düm'en ley ladde jeereende oo?

<sup>39</sup> Pool jaabii, wii:

—Miin, mi Yahuudiyanke pindo Tarsus ley leydi Silisi, e ndee ngalluure nde wanaa joobunde njeyaa-mi. Midó jaage ndunano-daa kam mi haalda e yimbe 6ee.

<sup>40</sup> O dunanii düm. Pool darii e dow njabbirde ndee, huncani yimbe 6ee junngo. Nde 6e ndeyyininoon ndee, o haali e ibaraninkoore, o wii:

## 22

<sup>1</sup>—Sakiraa6e e baabiraa6e, kettinee jooni faa mi fammina on mi wadaali ko boni.

<sup>2</sup> Nde 6e nani ibaraninkoore o haaldata e ma66e ndee, 6e ndeyyinii teen. O wii:

<sup>3</sup>—Mi Yahuudiyanke pindo Tarsus ley leydi Silisi. Kaa do Urusaliima doo mawnu-mi. Gamaliyel wonnoo moobbo am. Kanko janngini kam sariya njaatiraa6e meeden oo faa paamu-mi. Midó jootunoo e Laamdo hono no on fuu ngorru-don hannde nii. <sup>4</sup> Mi torrii jokku6e ngol doo Laawol 6ee faa maayi. Mi nanngii wor6e e rew6e, mi uddii düm'en kasu. <sup>5</sup> Jottinoowo Sadaka Mawdo e waalde Saahii6e 6ee fuu ana ceettanoo kam karum'en duu. Kefu-mi e ma66e kasen talki faa mi holla sakiraa6e ma66e won6e Damas 6ee, njaa-mi ha66oyde jokku6e laawol Iisaa won6e ton 6ee, faa mi wadda düm'en Urusaliima yalla ana caree.

<sup>6</sup> Njaa-mi faa 6adii-mi Damas, wakkati hakkunde naange, fooyre mawnde iwi dow kammu, yaayni, filii kam. <sup>7</sup> Caamu-mi e leydi, nan-mi daande ana wiya kam: «Sool, Sool, ko saabii so ada torra kam?» <sup>8</sup> Njaabii-mi, mbii-mi: «Aan homo, gidó Laamdo?» O wii kam: «Miin, Iisaa Nasaraatunke mo torru-daa oo.» <sup>9</sup> Wondu6e e am 6ee njii fooyre ndee, kaa 6e nanaali daande kaaldudo e am oo. <sup>10</sup> Nden, mbii-mi: «Joomiraado, kodum ngadan-mi?» Joomiraado wii kam: «Imma, yaa Damas, a haalante ton ko njamire-daa ngadaa koo fuu.» <sup>11</sup> Wondu6e e am 6ee dowi kam faa ley Damas, sabi fooyre ndee wumniino kam no nde sattiri yaaynude.

<sup>12</sup> Ananiyas yo gorko Laamdo, jokkudo Sariya Muusaa, mo Yahuudiyankoo6e hodufe ton fuu ceettii moyyo oo, <sup>13</sup> wari, darii yeeso am, wii kam: «Sool, sakiike, wumtu!» Don e don njii-moo-mi. <sup>14</sup> O wii: «Laamdo njaatiraa6e meeden oo subike ma yalla ada annda sago muudum, njiyaa Poocciitido oo, nanaa haala muudum. <sup>15</sup> Sabi aan seettantoo mo yeeso yimbe fuu ko njii-daa e ko nan-daa. <sup>16</sup> Jooni, kodum ndoomataa? Imma, loote-daa lootogal batisima, njaafire-daa luutti maa e noddude innde Joomiraado.»

<sup>17</sup> Caggal mi wirfitike Urusaliima, mido rewa Laamdo ley Suudu Dewal Mawndu nduu, faa won ko yellitii e am, <sup>18</sup> nden njii-mi Joomiraado, wii kam: «Heja law, yaltu Urusaliima, sabi 6e njabataa seedaaku mo ceettantoo-daa kam oo.» <sup>19</sup> Njaabii-mi, mbii-mi: «Joomiraado, e6e anndi mido yahanoo ley cuudi baajordi dii fuu, mido uddannoo mido fiyanoo goondin6e ma 6ee. <sup>20</sup> Nde yiyyam Eciyen seede maa oo yuppete ndee, mido darii, edum weli kam ko o waraa koo, miin haybannoo kaddule war6e mo 6ee.» <sup>21</sup> Joomiraado jaabii kam, wii: «Yaa, mi nelete to woddi to yimbe 6e nganaa Yahuudiyankoo6e.»

*No Pool wiiri yo Romanke*

<sup>22</sup> E6e kettinani mo faa o haali ngol konngol. Nden 6e ngulli, 6e mbii:

—Ittu mo e leydi ndii! Hono oo haanaa wuurde!

<sup>23</sup> E6e ngulla, e6e mbeeynaa saayaaji ma66e, e6e immina colla. <sup>24</sup> Hooreejo oo yamiri Pool na6ee to ley hu6eere too, lamndoree piide faa 6e annda ko saabii so jamaa oo ana wulla e makko hono nii. <sup>25</sup> Nde 6e ka66i mo faa 6e piya mo ndee, o wii mawdo gondo don oo:

—Ana daganoo on piyon Romanke sako mo saraaka naa?

<sup>26</sup> Nde mawdo oo nani dum ndee, haalanoyi hooreejo oo, wii:

—Ada anndi ko kosu-daa faa ngadfaa naa? Gorko oo yo Romanke non!

<sup>27</sup> Nden hooreejo oo yehi to Pool, lamndii dum, wii:

—Haalanam, soobee fuu a Romanke naa?

Pool jaabii, wii:

—Kajum!

<sup>28</sup> Hooreejo oo jaabii, wii:

—Miin, so wanaa njobu-mi kaalisi keewdo nde ke6u-mi laataade Romanke.

Pool wii mo:

—Miin, mi finii mi tawii mi kajum.

<sup>29</sup> Don e don anniyi6e fiide mo faa tilsina mo haaltude 6ee njalti. Hooreejo oo huli, sabi anndii Pool yo Romanke, ha66iino dum.

*No Pool nabiraa yeeso waalde Saahii6e*

<sup>30</sup> Janngo mum, kammari hooreejo oo ana yidunoo tayorde ko Yahu-diyankoo6e 6ee ngullanirii Pool, humti dum, yamiri hooree6e yottinoo6e sadaka e waalde Saahii6e ndee fuu kawrita. Caggal dum, o waddi Pool, o darni dum yeeso ma66e.

**23**

<sup>1</sup> Pool yeewi waalde Saahii6e 6ee, wii:

—Sakiraabe, hakkille baaltii6e nguurdu-mi yeeso Joomiraado gila pinu-mi faa yottaade jalooma hannde oo.

<sup>2</sup> Nii Ananiyas, Jottinoowo Sadaka Mawdo oo, yamiri darinoo6e banngemakko 6ee piya mo e hunduko. <sup>3</sup> Nden, Pool wii mo:

—Laamdo fiyete, aan kokowol dawninaangol! A joodoto faa cariraa kam Sariya Muusaa, ko njamir-daa mi fiyee koo a luuttii Sariya Muusaa.

<sup>4</sup> Darinoo6e don 6ee mbii Pool:

—A yennan Jottinoowo Sadaka Mawdo mo Laamdo subii oo naa?

<sup>5</sup> Pool jaabii, wii:

—Sakiraabe, mi anndaa o Jottinoowo Sadaka Mawdo, sabi mido anndi ana winndii: «Pati yennu hooreejo lejol maa!»\*

<sup>6</sup> Nde wonnoo Pool ana anndi yoga e Saahii6e 6ee yo Saduki'en, yoga mum'en yo Farisa'en, duki semmbe, wii:

—Sakiraabe, miin mi Farisanke, 6ii Farisanke. Saabe fawgol jikke e immital maay6e carirtee-mi.

<sup>7</sup> Nde o haalnoo dum ndee, Farisa'en 6ee e Saduki'en 6ee njeddondiri, deental ngal feccii. <sup>8</sup> Tawi Saduki'en ana mbiya immital walaa, malaa'ika'en ngalaa, ruuhuuji ngalaa, kaa Farisa'en ana ngoondini dum fuu. <sup>9</sup> Duko ngoo beydii mawnude. Yoga e dunkee'en Sariya heedan6e Farisa'en 6ee ndarii, immi duko manngo, ana mbiya:

\* 23:5 Pergu 22.27

—Walaa fuu ko boni ko min njii e oo gorko. Ana waawi taweede ruuhu naa malaa'ika haaldi e makko!

<sup>10</sup> Jeddi dii mawni faa hooreejo sordaasi'en oo huli pati Pool seekee. Dum wadi so o yamiri sordaasi'en njippoo to deental too, itta Pool e juude yimbe bee, nafta dum to huɓeere too.

<sup>11</sup> Jemma jokkudo hen oo, Joomiraado darii yeeso Pool, wii dum:

—Pati hul! No ceettanori-daa kam ley Urusaliima nii, ana haani ceettanoro-daa kam non Roma duu.

### *No Yahuudiyankooɓe ngadiri gaddal faa mbara Pool*

<sup>12</sup> Nde weetunoo ndee, Yahuudiyankooɓe bee ngadi gaddal, kunii naamataa njarataa gila doo faa mbara Pool. <sup>13</sup> Wannooɓe ngal gaddal bee ana ɓuri capande nayon gorko. <sup>14</sup> Be njehi to hooreeɓe yottinooɓe sadaka e mawɓe, ɓe mbii:

—Min kunike hunoore fay huunde min naamataa min njarataa gila doo faa min mbara Pool. <sup>15</sup> Jooni, onon e waalde Saahiibe ɓee, mbiyee hooreejo sordaasi'en oo waddana on Pool, mbiyon oɗon njidi faamtindaade ko o haalannoo koo. Minen, miden lanndinii faa min mbara mo gila mo yottaaki.

<sup>16</sup> Baadii Pool gorko nani haala gaddal ngal, yehi to huɓeere too, naati, humpiti Pool. <sup>17</sup> Pool noddi gooto e mawɓe sordaasi'en ɓee, wii dum:

—Naɓu oo suka gorko to hooreejo too, sabi won ko o yidi haalande dum.

<sup>18</sup> Mawɗo sordaasi'en oo naɓi mo to hooreejo muuɗum too, wii dum:

—Nanngaado biyeteedo Pool oo noddi kam, naagii kam mi wadda oo suka gorko to maa, sabi won ko oon yidi haalande ma.

<sup>19</sup> Hooreejo oo nanngi junngo makko, sawdintini mo, wii:

—Kodum kaalantaa kam?

<sup>20</sup> O wii dum:

—Yahuudiyankooɓe kaaldii, kawrii, ndaardete janngo yalla ada waddana dum'en Pool yeeso waalde Saahiibe ɓee, ɓe nanndinkinoo e yiɓɓe faamtindaade ko o haalannoo koo. <sup>21</sup> Pati njaɓanaa ɓe! Sabi ko ɓuri worɓe capande nayon e maɓɓe ana jugganii mo, kunike naamataa njarataa so mbaraali mo. Be lanndinike, eɓe ndoomi yamiroore maa.

<sup>22</sup> Hooreejo oo wii suka gorko oo:

—Pati haalan fay gooto a haalanii kam dum.

O yoppi dum witti.

### *No Pool neldiraa Kaysariya*

<sup>23</sup> Caggal dum, o noddi mawɓe sordaasi'en makko didon, o wii dum'en:

—Moobtee worɓe teemedede didon e waddiibe pucci capande njeddon, kajum e teemedede didon jom'en gaawe. On fuu, lanndinee yaade Kaysariya wakkati jeenaɓo jemma. <sup>24</sup> Kaɓɓee pucci faa naɓiron Pool e dow jam, to Filikus goforneer oo too.

<sup>25</sup> Hooreejo oo winndi oo ɓataaki:

<sup>26</sup> Miin, Kalawdiyus Lisiyas, mido jowte, aan Filikus goforneer tedduɗo oo.

<sup>27</sup> Gorko mo neldu-maa-mi oo, Yahuudiyankooɓe nanngunoo dum, an-niyii warde dum. Nde kumpitinoo-mi o Romanke ndee, naatu-mi hen, miin e fedde sordaasi'en ndee, mbiltu-moo-mi. <sup>28</sup> Nde wonnoo mido yidi faamde ko ɓe ngullanirii mo ndee, ngaddu-moo-mi yeeso waalde Saahiibe maɓɓe. <sup>29</sup> Taw-mi banngal sariya maɓɓe tan ɓe ngullanirii mo, kaa ko o wullanaa e muuɗum koo, saawaa waddande mo wareede naa uddeede.

<sup>30</sup> Caggal dum, martu-mi kumpa Yahuudiyankooɓe ndawridii faa nannga

mo. Dum wadi so neldu-maa-mi mo don e don, njamir-mi wullaniibe mo bee duu njaha to maa.

<sup>31</sup> Sordaasi'en bee ngadi ko njamiraa koo, 6ami Pool ley jemmaaku, nabi dum faa Antibatiris. <sup>32</sup> Janngo mum, sordaasi'en yaaranoo6e koyde bee mbirfitii to hu6eere too, daldi Pool waddiibe pucci bee njottinoya dum. <sup>33</sup> Nde been njottinoo Kaysariya ndee, ndokki goforneer oo bataaki oo, kolli dum Pool. <sup>34</sup> Nde kaananke oo janngi bataaki oo ndee, lamndii hoto o jeyaa. Nde o nani Silisi Pool jeyaa ndee, <sup>35</sup> o wii dum:

—So wullaniibe ma bee ngarii, mi nanan haala maa.

O yamiri oon mo6toyee to suudu laamordu Hirudus too.

## 24

### *No Pool wulliranaa to Filikus*

<sup>1</sup> Balde joy caggal muudum, Ananiyas Jottinoowo Sadaka Mawdo oo yottii Kaysariya ana wondi e yoga e maw6e bee, kaɗum e dunkee sariyaRo-mankoo6e biyeteedo Tartulus. Be ngullanii Pool to goforneer oo. <sup>2</sup> Nde Pool noddaa ndee, Tartulus fuddi wullanaade mo yeeso kaananke oo, wii:

—Filikus kaananke teddu6o, laamu maa waddanii min jam 6ooydo, kasen jeeɗal maa waylitii leɗol ngol sanne. <sup>3</sup> Dum fuu saabe maa min ke6iri tatteeji fuu, min njettii ma sanne. <sup>4</sup> Mi yidaa joonnde ndee juuta, kaa mido ndaarde saabe moyyuki maa, kettinano-daa min seeda. <sup>5</sup> Min tawii oo doo gorko yo bondo sanne, gaddoowo fitina hakkunde Yahuudiyankoo6e won6e e aduna oo bee fuu. O hooreejo diina Nasaraatunkoo6e oo. <sup>6</sup> O naatii e so6inde Suudu Dewal Mawndu nduu, dum nee min nanngii mo. [ 7\* ] <sup>8</sup> Aan e hoore maa, lamndo-daa mo, paamaa ko min ngullanirii mo koo fuu.

<sup>9</sup> Yahuudiyankoo6e tawdaa6e e makko bee mbii non jaati worri.

<sup>10</sup> Nde goforneer oo hokkunoo Pool haala ndee, jaabii:

—Mido anndi wadii duubi ada sara ngol leɗol. Dum wadi so mido seyoroo liddi am dii. <sup>11</sup> Buraa balde sappo e didi ko ngar-mi Urusaliima faa mi rewa Laamdo. So a taykiima, aan e hoore maa, a tawan hono non worri. <sup>12</sup> Fay gooto tawaali kam mido hiitondira e neddo naa mido jirkita jamaa, wanaa e ley Suudu Dewal Mawndu nduu, wanaa e ley cuudi baajordi, wanaa e ley ngalluure ndee. <sup>13</sup> Be mbaawaa tabintinde ko 6e ngullanirii kam e muudum jooni koo. <sup>14</sup> Kaa mido jabi yeeso maa: mido rewri Laamdo njaatiraabe meeden oo diina mo 6e mbiyata diina peneejo oo. Mido goondini ko winndaa e Tawreeta Muusaa koo e ko winndaa e dewte annabaa6e koo fuu. <sup>15</sup> Kasen duu mido fawi jikke am e Laamdo mo 6e pawii jikke ma66e e muudum kam6e duu oo, o wuurtinan foocitiibe e 6e poocitaaki fuu. <sup>16</sup> Dum saabii so tiinnitii-mi yalla ana laatanoo kam hakkille baaltii6o jannde fuu ko waldaa e feloore yeeso Laamdo e yeeso yim6e.

<sup>17</sup> Caggal duubi keewdi, ngartu-mi faa mi wadana yim6e am dokke, mi itta sadakaaji. <sup>18</sup> E ley majjum 6e tawi kam e ley Suudu Dewal Mawndu nduu caggal mi sennaama, mi waldaa e jamaa, mi waldaa e dillere. <sup>19</sup> Yoga e Yahuudiyankoo6e leydi Asiya wonnoo6e don, been kaannoo warde wullanaade kam yeeso maa, so tawii won ko 6e ngullantoo kam. <sup>20</sup> Naa 6ee doo, kaɗum e hoore mum'en kaala boofi di njii e am nde ndarinoo-mi yeeso

\* **24:7** E dereeji 6ooydi dii, yoga ana 6eyda aaya 7:Miden njidi sarde mo sariya amen, tawi Lisiyas hooreejo sordaasi'en oo ittirii mo e juude amen semmbe, yamiri wullaniibe mo 6ee ngara yeeso maa.



waalde Saahii6e ndee, <sup>21</sup> so wanaa konngol gootol ngol ndarii-mi so ngullu-mi, mbii-mi: «Saabe immital maay6e carirton kam hannde!»

<sup>22</sup> Nde Filikus nannoo dum ndee, riiwiti 6e e dow no mo anndiri diina oo. O wii:

—So Lisiyas hooreejo oo warii, mi saran haala moodon kaa.

<sup>23</sup> O yamiri mawdo sordaasi'en oo hayba Pool, wadana dum mosolaa, pati hada fay gooto e yi66e muudum 6ee gollande dum naa warde e muudum.

<sup>24</sup> Balde seeda caggal muudum, Filikus wardi e jom suudu muudum Yahuudiyanke biyeteedo Durusilla. O neli Pool waddoyee, o nanii ana haala haala goondinal Iisaa Almasiihu. <sup>25</sup> Kaa nde Pool haalannoo haala foocitaare e nantaare e sariya garoowo ndee, Filikus huli, wii:

—Jooni kaa, gasii, yaa! Nde ke6indii-mi fuu, mi nodditete.

<sup>26</sup> O miilii Pool hokkan mo kaalisi. Dum saabii so omo nodda dum cili keewdi faa 6e ngaajodoo.

<sup>27</sup> Kaa nde dum he6unoo duubi didi ndee, Porsiyus Festus loomtii Filikus, laatii kaananke. Nde wonnoo Filikus ana yidi seynude Yahuudiyankoo6e 6ee, yoppi Pool e ley kasu oo.

## 25

### *No Pool naagorii sariya mum nabe6e to kaananke Roma*

<sup>1</sup> Balde tati caggal ko Festus wari e ley leydi ndii koo, iwi Kaysariya, yehi Urusaliima. <sup>2</sup> Don, hooree6e yottinoobe sadaka e maw6e Yahuudiyankoo6e ngari to makko ngullitanii Pool. Be ndaardi mo soobe6e <sup>3</sup> o hokka 6e Pool, 6e ngadda dum Urusaliima, sabi e6e tewta no 6e njanira mo, 6e mbara mo. <sup>4</sup> Festus wii Pool ana uddii kasu Kaysariya too, kanko e hoore makko o birfitotoodo ton law. <sup>5</sup> O wii:

—Maw6e moodon ngara njaada e am Kaysariya, ngullanoo gorke oo so tawii won ko wadi.

<sup>6</sup> Festus fa66idaali e ma66e ko 6uri balde jetti naa sappo, caggal dum, o regii o feewi Kaysariya. Janngo mum, o joodoyii to sarirde too, o yamiri Pool waddee. <sup>7</sup> Nde Pool yottii ndee, Yahuudiyankoo6e iw6e Urusaliima 6ee piliu dum, kappi dum kudde bonde keewde, de ngalaa daliili. <sup>8</sup> Pool jaabii, ana wiya:

—Mi meedaali toonude, wanaa sariya Yahuudiyankoo6e oo, wanaa Suudu Dewal Mawndu nduu, wanaa kaananke Roma mawdo oo.

<sup>9</sup> Nde wonnoo Festus ana yidi seynude Yahuudiyankoo6e 6ee, lamndii Pool, wii:

—Ada jaba yaade Urusaliima faa miin e hoore e mi saroya ton kabaaru maa oo naa?

<sup>10</sup> Pool wii:

—E sarirde kaananke Roma mawdo ngon-mi, do kaan-mi sareede doo. Mi toonaali Yahuudiyankoo6e 6ee, no aan e hoore maa anndir-daa dum nii. <sup>11</sup> So tawii miin tooji, mi wadii ko foti warde kam, mi salataako warede. Kaa so fay huunde e ko 6e kappi kam koo wanaa goonga, fay gooto waawaa wattude kam e juude ma66e. Sariya am 6ettinee, yaha to kaananke Roma mawdo oo.

<sup>12</sup> Caggal nde Festus haaldi e howruu6e muudum, jaabii, wii:

—Sariya maa 6ettinee to kaananke Roma mawdo njid-daa, dum nee, a 6ettinte yaade to kaananke Roma mawdo!

### *No Pool waddiraa yeeso Agirippa e Barniki*



<sup>13</sup> Balde seeda caggal muudum, Agirippa kaananke oo e Barniki ngari Kaysariya jowtude Festus. <sup>14</sup> Nde 6e pa6bunoo don balde seeda ndee, Festus haalani kaananke oo haala Pool, wii:

—Won gorko mo Filikus yoppi doo e kasu. <sup>15</sup> Nde njaa-mi Urusaliima ndee, hooree6e yottinoobe sadaka e maw6e Yahuudiyankoo6e kaalanii kam haala makko, jaagiima mi sara mo. <sup>16</sup> Njaabii-mi 6e: Romankoo6e neesoraaki sarde neddo tawee jooddaaki e happu6e dum 6ee, jaaboo dum'en. <sup>17</sup> Nde 6e moobtinoo so 6e ngari doo ndee, miin nee, mi neemtinaali fay huunde. Janngo mum, njoodoyii-mi to sarirde too, njamir-mi gorko oo waddee. <sup>18</sup> Nde wullanii6e mo 6ee ndarii bannge makko ndee, ngaddaali fay feloore wootere e ko miilannoo-mi koo. <sup>19</sup> Be ngaddi e makko haalaaji banngal diina ma66e, kapum e gooto biyeteedo Iisaa maaydo, mo Pool wiyata ana wuuri oo. <sup>20</sup> Miin nii, haala wa'uka nii ana wemmbi kam, dum wadi so lamndi-moo-mi yalla omo ja6a saroyeede Urusaliima naa? <sup>21</sup> Kaa o jaagiima kabaaru makko watee e juude kaananke mawdo oo, ndennoo njamir-mi o haybee doo faa mi he6a neldude mo kaananke Roma mawdo oo.

<sup>22</sup> Agirippa wii Festus:

—Mido yidi hettinaade oo gorko, miin e hoore am.

Festus wii:

—A hettinto mo janngo.

<sup>23</sup> Janngo mum, Agirippa e Barniki ngardi e fuukinaare mawnde, naati e ley sarirdu nduu, kam6e e hooree6e sordaasi'en 6ee e maw6e ngalluure ndee. Festus yamiri Pool waddee. <sup>24</sup> Festus wii:

—Agirippa kaananke e deental tawaa6e doo! On njii oo gorko. Yahuudiyankoo6e fuu ngullanike mo ga am ley Urusaliima e doo fuu, e6e ngulla e6e mbiya o haanaa yoppeede o wuura. <sup>25</sup> Miin e hoore am, mi tawii o wadaali fay huunde ko haani warde mo. Kaa nde wonnoo kanko e hoore makko o jaagiima sariya makko bettinee, na6ee to kaananke Roma mawdo oo, mi fellisii neldude mo ton. <sup>26</sup> Mi walaa tayoral fuu e makko ko kaan-mi winndude e kaananke oo. Dum wadi so ndarnu-moo-mi yeeso moodon on fuu, faa dum teerja e maa, aan Agirippa kaananke oo, yalla so en kettinike haala makko, mido he6a ko mi winnda. <sup>27</sup> Sabi dum gasataa no kasunke neldirtee kaananke mawdo oo tawee ko nanngiraa koo hollitaaka faa laa6a.

## 26

<sup>1</sup> Agirippa wii Pool:

—A hokkaama haala, haal haala maa.

Nden, Pool hunci junngo, jaabii, wii:

<sup>2</sup>—Agirippa kaananke, mi seyorike hujjaade yeeso maa hannde ko Yahuudiyankoo6e ngullanirii kam koo fuu. <sup>3</sup> Sabi ada anndi neesuuji Yahuudiyankoo6e e haalaaji muudum'en fuu. Saabe majjum mido jaage, mujnaa, kettinano-daa kam.

<sup>4</sup> Yahuudiyankoo6e fuu ana anndi no nguurdu-mi gila mi cukalel tusukel. E6e anndi no ngorrnunoo-mi e ley suudu baaba am e ley Urusaliima fuu. <sup>5</sup> E6e anndi gila arannde, so 6e njabii seettaade: mido jokki laawol diina amen burngol tiidude ngol, mido hiisodaa e Farisa'en. <sup>6</sup> Jooni, mi darike faa mi saree saabe mi fawii jikke am dow fodoore nde Laamdo wadani njaatiraa6e meeden ndee. <sup>7</sup> Lepi meeden sappo e didi dii ana pawii jikke muudum e tabital fodoore ndee, ana ndewira soobee jemma e jalooma.

Kaananke, saabe oo jikke Yahuudiyankoo6e ngullanorii kam! <sup>8</sup> Ko saabii so onon Yahuudiyankoo6e miil-don Laamdo waawaa immitinde maay6e?

<sup>9</sup> Miin e hoore am, e bettaade mi tayoriino mido haani bonnude innde Iisaa Nasaraatunke oo, no laatorii fuu. <sup>10</sup> Dum woni ko ngadu-mi Urusaliima. Hoore6e yottino6e sadaka 6ee njarraninoo kam mi udda seniibe heew6e e kasu. Nde 6e caranoo 6e waretee6e ndee, mido yarii dum. <sup>11</sup> Mi torrii 6e cili keewdi e cuufdi baajordi dii fuu, mi tilsinii 6e mbonkoo Joomiraado. Torra am e ma66e ana mawnunoo sanne faa mido tawoyannoo 6e ley geelle janane.

<sup>12</sup> Hono non njaaru-mi Damas nde hooree6e yottino6e sadaka 6ee njar-ranii kam ndee. <sup>13</sup> Kaananke, mido e laawol wakkati hakkunde naange, njii-mi fooyre ana iwa dow kammu ana filoo kam, miin e yaadu6e e am 6ee fuu. Fooyre ndee ana 6uri naange jalbude. <sup>14</sup> Min fuu, min caami e leydi, nan-mi daande ana wiya kam e ley ibaraninkoore: «Sool, Sool, ko saabii so ada torra kam? So ndemoori wii saloto ko nanngudo ginol mum wadata fuu, beydan naawnaade.» <sup>15</sup> Njaabii-mi, mbii-mi: «Aan homo, gido Laamdo?» Joomiraado wii: «Miin, Iisaa mo torru-daa oo. <sup>16</sup> Imma dara, sabi mi bannganii ma mi subike ma faa ngollanaa kam, ceedano-daa kam ley ko njii-daa koo e ko anniyii-mi bannginanoyde ma caggal hannde. <sup>17</sup> Mi reenete e Yahuudiyankoo6e e yim6e lepi goddi, 6e nelan-maa-mi e muudum jooni 6ee, <sup>18</sup> yalla ada feerta gite ma66e, 6e iwa e nimre, 6e ngarta e fooyre, 6e iwa e junngo Ibiliisa, 6e ngarta e Laamdo, 6e ke6a yaafeede luutti, 6e ndonida e sennaabe 6ee saabe ko 6e goondini kam koo.»

<sup>19</sup> Kaananke Agirippa, dum wadi so mi salaaki dwtanaade ko njii-mi, ko iwrani kam dow kammu koo. <sup>20</sup> Be mido adoo waajaade fuu yo yim6e Damas e yim6e Urusaliima e piilol Yahuudiya fuu. Caggal dum, ngolla gollleeji kollitooji 6e tuubii. <sup>21</sup> Saabe dum Yahuudiyankoo6e nanngiri kam ley Suudu Dewal Mawndu nduu, tewti warde kam. <sup>22</sup> Kaa faa hannde, Laamdo ana reeni kam. Mido seettanoo teddu6e e lo'u6e. Mi waajataako fay huunde so wanaa ko annabaabe e Sariya Muusaa kaali waroyan koo: <sup>23</sup> Almasiihu torroto, adoo maay6e immitaade. Caggal dum, o waajoto fooyre, ko wanaa yim6e meeden tan, o waajoto lepi goddi duu.

<sup>24</sup> Nde Pool haalata dum ndee, Festus jahii jahaango manngo, wii:

—Pool, a haandi! Heewgol maa anndal ngol haandinii ma!

<sup>25</sup> Pool jaabii, wii:

—Teddudo, mi haandaali. Ko kaalan-mi koo yo haalaaji goonfudi, jogiidi maanaa. <sup>26</sup> Agirippa kaananke oo ana anndi kudde dee. Dum wadi so mido hoolii haalde dum yeeso makko. Sabi mido tayori fay huunde joo6anaali mo hen, sabi dum wadaali e cuucuukka. <sup>27</sup> Kaananke! Ada goondini annabaabe naa? Mido anndi ada goondini!

<sup>28</sup> Agirippa wii Pool:

—Seeda tan hadete wadude kam neddo Iisaa.

<sup>29</sup> Pool jaabii, wii:

—Yaawi taadi fuu, mi jaagoto Laamdo faa aan e hettintoo6e kam jooni 6ee fuu laato-don ko ngon-mi koo, tawee boggol e calali ngalaa e mon.

<sup>30</sup> Kaananke oo e gofornee oo e Barniki e jooddino6e e muudum'en 6ee fuu immii. <sup>31</sup> Nde 6e njalti suudu nduu ndee, e6e mbiyondira:

—O wadaali ko haani warde mo naa ko haani uddude mo kasu.

<sup>32</sup> Agirippa wii Festus:

—Omo waawnoo yoppiteede so o wiyaalino sariya makko bettinee nafee to kaananke Roma mawdo oo.

## 27

### *No Pool neldiraa Roma*

<sup>1</sup> Nde jaarugol amen Italiya laana tabitinnoo ndee, Pool e kasunkoo6e wo66e ngadaa e junngo mawdo sordaasi'en biyeteedo Yuliyus, jeyaado e fedde sordaasi'en kaananke Roma mawdo oo. <sup>2</sup> Min naati laana geeci iwka Adaramatiya njahoowa so ana faja ley leydi Asiya, min ndeerti. Miden ngondi e Aristarka gorko Makedoniyanke iwoowo Tesaloniiki. <sup>3</sup> Janngo mum, min njottii Sidon. Yuliyus wadani Pool mosolaa, dujanii dum yaha to yi66e mum yalla ana paaboroo dum ko hasindini e mum. <sup>4</sup> Nde min iwi don ndee, min battitii fonngo ruunde Kiprus, sabi e henndu min peewtunoo. <sup>5</sup> Min lumbbiri maayo geeci ngoo hedde Silisi e Pamfiliya, min njottii Mira ley leydi Lisiya. <sup>6</sup> Don, mawdo sordaasi'en oo he6ani min laana iwka Aleksandiri ana fa'i Italiya, naanni min hen.

<sup>7</sup> Balde kuurde laana amen kaa wadi ana yaara seese. Semmbe e doole min njottorii danjeere Kinidus. Nde wonnoo henndu nduu hadii min yawtude ndee, min lumbbiri Salmone. Gila don min takkii e fonngo ruunde Kereta. <sup>8</sup> Nde min ya66orinoo don semmbe e doole ndee, min ngari e nokku biyeteedo Hodorde Lobbere nde woddaa e ngeenndi Lasiya.

<sup>9</sup> Nde wonnoo min pa6bii sanne ndee, dawirde laana geeci hul6iniima sabi jannde hooreteende bettike, jaangol ngol duu fuddii. Pool ana jeertina 6e, <sup>10</sup> ana wiya:

—Sakiraa6e, mi yii ngol doo dawol yo keewoowol kunkooji e mursee, wanaa laana kaa e kaaki dii tan, ana waawi laataade yonkiiji men duu.

<sup>11</sup> Kaa mawdo sordaasi'en oo, haala mawdo laana oo kajum e joomiika 6uri hoolaade, diina ko Pool haali koo. <sup>12</sup> Danjeere nde 6e ngoni e muudum ndee, welaa dabbunde, dum wadi so bur6e heewde e won6e e laana 6ee mbii 6e njaha 6e tewta yottaade Feniksa, danjeere Kereta fewtunde e so66undu hiirnaange baleeri e so66undu hiirnaange saahal, yalla 6e ndabba ton.

<sup>13</sup> Nde henndu iwrundu baleeri fuddi mooyde ndee, 6e cikki 6e mbaawan yottinde faandaare ma66e ndee. Be njabbini torooje dee, 6e takkii e fonngo Kereta, 6e mbirfittii. <sup>14</sup> Kaa caggal dum seeda, henndu mawndu wiyeteendu henndu funnaange saahal iwri to ruunde too, jippii. <sup>15</sup> Laana kaa hayti, min ndonki hadude henndu nduu na6ude kaa. Dum wadi so min acci ka doya. <sup>16</sup> Nde min bettotoo duungel tusukel biyeteengel Kawda ndee, duungel ngel huuri min seeda e henndu, min cippiri don e laanawel tusukel ngel, min kewti ngel. <sup>17</sup> Nde 6e 6amtunoo ngel ndee, 6e 6ami 6oggi, 6e cacci e laana mawka kaa. Ko 6e kuli pati 6e njanoy e so66undu Sirta koo, 6e jippini wiir oo, 6e njoppi eka doya. <sup>18</sup> Henndu nduu wibbi semmbe. Dum wadi so janngo mum 6e pudfi tippaade donngal laana kaa. <sup>19</sup> E jalooma tata6o oo, 6e mbedorii juude ma66e kaaki laana dii. <sup>20</sup> Balde kuurde naange e koode fuu njiyataake. No henndu nduu foti mawnude, min tayi jikke amen fuu e hisude.

<sup>21</sup> Nde wonnoo yim6e 6ee pa6bii ke6aali ko jaama, Pool darii hakkunde ma66e, wii:

—So on njabiino haala am on iwaalino Kereta, dii kunkooji e oo mursee hewtataakono en. <sup>22</sup> Jooni, mido haalana on: ceyee, sabi fay gooto e moodon yonki muudum mursataake, laana kaa tan mursetee. <sup>23</sup> Jemma hanken,

malaa'ika iwrii to Laamdo mo ndewan-mi oo warii e am, <sup>24</sup> wii kam: «Pool, pati hul, a daroto yeeso kaananke Roma mawdo oo, Laamdo reenete aan e dawdufe e maa fee fuu.» <sup>25</sup> Ndennoo, tiinnee, sabi mido hoolii ko Laamdo haalani kam koo, hono non jaati worrata, <sup>26</sup> kaa waajibi en njanoyan e ruunde.

<sup>27</sup> E ley jemma sappo e nayafo oo, nde min ndoydata e geeci Adiriyatiki ndee, wakkati hejjere jemma donnoofe laana kaa fee cikki badike fanndude. <sup>28</sup> Be tippii boggol kabbaangol ko teddi, fe tawi luggeendi ndii yo hakke darde noogay. Be njehi yeeso seeda, fe tippii kasen, fe tawi luggeendi ndii yo hakke darde sappo e joy. <sup>29</sup> Ko fe kuli pati fe njanoy e kaaye koo, fe njippini torooje nay caggal laana kaa, efe ndoomi beete. <sup>30</sup> Nde wonnoo donnoofe laana kaa fee ana njidunoo sobbitaade, fe njippini laanawel pamarel ngel e ndiyam, fe mbii efe jiboya torooje to yeeso laana kaa too. <sup>31</sup> Pool wii mawdo oo e sordaasi'en fee:

—So yimbe fee keddaaki e ley laana kaa, onon, on ndadataa.

<sup>32</sup> Nden sordaasi'en fee tayi boggi nanngunoodi laanawel pamarel ngel dii, njoppi ngel doyi.

<sup>33</sup> Nde badinoo weetude ndee, Pool ndaardi fe fuu fe jaama, wii:

—Hannde woni balde sappo e nay odon kettii on jaamaali fay huunde.

<sup>34</sup> Dum wadi so mido ndaarda on jaamon, yalla odon ndada, sabi fay gooto e moodon leeol hoore muudum solataa so saama.

<sup>35</sup> Nde o haalnoo dum ndee, o 6ami buuru, o yetti Laamdo yeeso ma66e fe fuu, o helti, o fuddi jaamde. <sup>36</sup> Nden fe fuu fe ceyii, kambe duu fe 6ami fe jaami. <sup>37</sup> Minen wonbe ley laana kaa fee, min yimbe teemedde didon e capande njeddin e njeegom. <sup>38</sup> Nde fe jaamnnoo faa fe kaari ndee, fe 6ami caakuuji alkama gondi e laana kaa dii, fe tippii di ley geeci yalla edum hoyfina ka.

<sup>39</sup> Nde weetunoo ndee, fe coynii leydi, kaa fe annditaali ndi. Be njii sobbundu e fonngo muudum. Be kawri fe naban ton laana kaa so fe mbaawii. <sup>40</sup> Be tayi torooje dee, fe njoppi de ley ndiyam dam, fe njorjini boggi kummbeeje gurfirde dee. Caggal dum, fe piilti wiir oo, fe njabbini dum to hoore laana too, yalla henndu nduu ana dunyira ka yeeso. Be peewi fonngo ngoo. <sup>41</sup> Be porri e siwre, laana kaa higgs. Becce makka jibii e ley njaareendi ndii faa ka ronki dillinaade, bempjee keli laaci makka.

<sup>42</sup> Sordaasi'en fee anniyii warde kasunkoo6e fee pati fay gooto e ma66e yinoo so dogo. <sup>43</sup> Kaa nde wonnoo mawdo sordaasi'en oo ana yidi dandude Pool, hadi fe wadude anniya ma66e oo, yamiri waaw6e yinaade fee adoo fiyaade e ndiyam yeentoya, <sup>44</sup> heddi6e fee, yoga muudum'en nanngi bamuujje laana kaa, yoga nanngi taye makka. Hono nii fe fuu fe njottorii njoorndi e jam.

## 28

<sup>1</sup> Nde min ndadi ndee, min nani ruunde ndee Malta wiyetee. <sup>2</sup> Hodu6e don fee nja66orii min caahu mawdo. Nde wonnoo oon wakkati kammu ana to6a jaangol ana woodi, fe ku66i yiite, fe nja66ii min faa min yuwloo. <sup>3</sup> Pool moofi ledde, wedii e yiite ngee. Nguleefi kii yaltini e majje mboddi, ndi soppo junngo makko. <sup>4</sup> Nde hodu6e don fee njii mboddi ndii ana weelta e junngo Pool ndee, mbiyondiri e ko'e muudum'en:

—Tayoral oo gorko yo bardo hoore, taweede o dadii to geeci too fuu, hakkeji makko dii accataa mo wuura.

<sup>5</sup> O ficci mboddi ndii e yiite ngee, dum torraali mo fay huunde. <sup>6</sup> Be miili o buutan naa o saama don e don o maaya. Kaa nde be kettinoo faa 6ooyi ndee, be njii dum torriraali mo fay huunde, hakkillaaji ma66e mbaylitii e makko, be mbii o gooto e laamdo'en 6ee.

<sup>7</sup> Publiyu, hooreejo ruunde ndee oo, ngesa muudum ana e sera nokkuure ndee. O ja66iima min faa gasi, o jippini min, o saahii e amen, min ngadi to makko balde tati. <sup>8</sup> Hawri baaba Publiyu ana lelii sellaa, jontaafo, reedu muudum ana doga yiyyam. Pool yehi to makko, duwii, fawi juude muudum e makko, sellini mo. <sup>9</sup> Nde dum wadunoo ndee, jaw6e won6e e ruunde ndee 6ee ngari, cellinaa. <sup>10</sup> Be teddini min teddeengal manngal. Nde min njahata ndee, be njoo6ini min ko min kasindini e mum fuu.

### *No Pool dawiri iwde Malta yaade Roma*

<sup>11</sup> Caggal lebbi tati, min naati e laana iwka Aleksandiri, ndabbunooka e ruunde ndee kaa, min mbitti. Eka jɛnaa jɛngol Tooruuji Puneaji.\* <sup>12</sup> Min njottii ngeenndi mbiyeteendi Sirakusa, min ngadi don balde tati. <sup>13</sup> Min naati don, min takkii e fonngo geeci faa Regiyus. Janngo mum, henndu 6aleeri wifii. E ley balde didi min njottii Potiyoli. <sup>14</sup> Min tawi ton sakiraa6e, ndaardi min pa66ana dum'en yontere. Hono nii min njottorii Roma. <sup>15</sup> Nde wonnoo sakiraa6e won6e Roma 6ee nanii garol amen, ngarii faa sakoro Abiya e nokku biyeteedo Jippule Tati sakkitaade min. Nde Pool yiinoo 6e ndee, yetti Laamdo, 6eydorii cuusal. <sup>16</sup> Nde min njottii Roma ndee, Pool dujanaa jippoo feere muudum, kaɓum e sordaasi kayboowo dum oo.

### *No Pool waajorii ley Roma*

<sup>17</sup> Balde tati caggal muudum, Pool noddi maw6e Yahuudiyankoo6e. Nde 6e mo66tinoo ndee, o wii 6e:

—Sakiraa6e! Mi wadaali fay huunde ko luuttondirta kam e yim6e meeden 6ee naa aadaaji njaatiraa6e meeden dii, kaa mi nanngaama Urusalima, mi wattaama e juude Romankoo6e. <sup>18</sup> Nde 6een yeewi kabaaru am ndee, njidiino yoppude kam, sabi 6e tawaali e am fay daliili gooto kaando warde kam. <sup>19</sup> Kaa kammari Yahuudiyankoo6e 6ee caliima mi yoppitee, dum waddani kam jaagaade sariya am 6ettinee na6ee to kaananke Roma mawdo oo, tawee mi happaali lejol am ngol fay huunde. <sup>20</sup> Dum wadi so noddu-mi on yalla mido yiya on mi haalana on. Mido ha66orii dii calali saabe mo Israa'iilankoo6e pawii jikke e muudum oo.

<sup>21</sup> Be mbii mo:

—Min ke6aali 6ataaki iwdo Yahuudiya kaaloowo haala maa. Kasen duu fay gooto e sakiraa6e 6ee waraali humpita min naa haala ko boni ko ngad-  
daa. <sup>22</sup> Kaa miden njidi kaalanaa min ko njii-daa e hakkille maa, sabi miden anndi diina mo njokku-daa oo ana luurraa ley nokkuuje dee fuu.

<sup>23</sup> Be cartanii mo nde 6e ngartata. Nalaande ndee yottii, heew6e ngari kawriti to jippunde makko too. Gila beete kecco faa caggal kiraade omo waajoo 6e, omo fammina 6e haala Laamu Laamdo. Omo dallinoroo Tawreeta Muusaa e dewte annabaabe haala Iisaa. <sup>24</sup> Yoga e ma66e jabi ko o haali koo, yogaa6e nja6aali. <sup>25</sup> Nde 6e caakotoo, tawi 6e nganaa hawru6e ndee, Pool 6eydi hen konngol gootol, wii:

—Ruuhu Ceniido haalii goonga nde yottiniri haala annabi Esaaya, nde oon wii njaatiraa6e moodon:

\* **28:11** E oon jamaanu, summo6e laanaaji mbii kanji ndeenata dum'en.

<sup>26</sup> «Yaa to ngol lejol mbiyaa dum:

On kettinto faa palon noppi, kaa on paamataa.

On yeewan faa puttinon gite, kaa on njiyataa.

<sup>27</sup> Sabi ngol lejol bernde mum yoorii.

Be cukkii noppi ma66e, 6e mbumnii gite ma66e,

pati gite ma66e njiya, pati noppi ma66e nana,

pati hakkillaaji ma66e paama,

sako 6e ngarta mi sellina 6e.»<sup>†</sup>

<sup>28</sup> Pool jokkini hen, wii:

—Anndee, kisindam Laamdo neldaama 6e nganaa Yahuudiyankoobe.

Kam6e 6e kettinto! [<sup>29</sup> ‡]

<sup>30</sup> Pool wadii duubi didi ki66i e ley suudu hasunoo nduu. Don o silminannoo warannoobe yeewde mo 6ee fuu, <sup>31</sup> omo waajoo Laamu Laamdo, omo janninginira cuusal kabaaru Iisaa Almasiihu Joomiraafo oo, walaa kadufo mo.

---

<sup>†</sup> 28:27 Esaaya 6.9-10    <sup>‡</sup> 28:29 E dereeji 6ooydi dii, yoga ana 6eyda aaya 29:Nde Pool haalnoo dii haalaaji ndee, Yahuudiyankoobe 6ee mbitti ana ndukida hakkunde mum'en semmbe.

## **Bataaki Pool faade e Romankooŋe**

<sup>1</sup> Oo bataaki ga am iwri, miin Pool. Mi maccuŋo Iisaa Almasiihu, mi noddaaŋo faa mi laatoŋo nelaadŋo mum, mi cuŋaadaŋo faa mi yottina Kabaaru Laamŋo Lobbo oo. <sup>2</sup> Oon Kabaaru Lobbo, Laamŋo fodiriino mo gila arannde annabaabe mum e ley Binndi ceniidi dii. <sup>3</sup> Kabaaru oo haala Biyiiko haalata, iwŋo e Daawuuda banngal 6ii-aadamaaku mum, <sup>4</sup> banngal Ruuhu Ceniido oo holliraa mo 'Bii Laamŋo Jom Baawde ko o immitii e maayde koo. Kanko woni Joomiraado men Iisaa Almasiihu, <sup>5</sup> saabe makko kebir-mi moyyere laataade nelaadŋo faa goondinbe dwtaniibe mo kebee ley lepi dii fuu, yalla innde makko ndee ana teddinee. <sup>6</sup> Onon wonbe Roma bee duu, ofon njeyaa e maŋbe, onon be Laamŋo noddi faa kaŋŋo-don e Iisaa Almasiihu bee. <sup>7</sup> Midŋo jowta on fuu, onon be Laamŋo horsini, onon be Laamŋo noddi faa laato-don seniibe. Yo on kebu moyyere e jam iwde e Baabiraado men Laamŋo e Joomiraado men Iisaa Almasiihu.

### *No Pool yidiri yiide goondinbe wonbe Roma bee*

<sup>8</sup> Ko adii fuu, midŋo yetta Laamŋo e innde Iisaa Almasiihu saabe moodon on fuu, sabi haala goondinal mon haalaama e aduna oo fuu. <sup>9</sup> Laamŋo mo ndewiran-mi bernde laabunde e ley ko njottinan-mi Kabaaru Lobbo haala Biyiiko oo koo, o seede midŋo miccideo on wakkati fuu <sup>10</sup> e ley duwaawuuji am fuu. Midŋo jaagoo Laamŋo newnana kam laawol e ley muuyde muudum no mi warda to mon. <sup>11</sup> Sabi midŋo yidi yiide on sanne, yalla ana daja ko njottin-mi on e dokkal ngal Ruuhu hokkata ngal faa jiiŋina on. <sup>12</sup> Mi beyda hen: yalla goondinal ngal ndeentu-den e mum ngal ana hokka en fuu semmbe. <sup>13</sup> Sakiraaŋe, midŋo yidi anndon: cili kuurdi ngaŋu-mi anniya mi waran to mon, yalla ana daja be kebu-mi hakkunde mon no kebir-mi yimbe hakkunde lepi goddi dii nii, kaa faa jooni mi hebaali warde. <sup>14</sup> Waajibi mi yaha to yimbe fuu, joodiibe e ferbe, janngube e be njanngaali. <sup>15</sup> Dum saabanii kam yidude yottinde on, onon Romankooŋe bee duu Kabaaru Lobbo haala Almasiihu oo.

### *Haala baawde Kabaaru Lobbo oo*

<sup>16</sup> Mi yaagortaako Kabaaru Lobbo oo, sabi o baawde Laamŋo, omo waawi hisinde goondindo mo fuu: Yahuudiyankooŋe tafon, caggal dum, lepi goddi dii duu. <sup>17</sup> Sabi Kabaaru Lobbo oo bannginta no Laamŋo nangirita neddo poocitiido yeeso mum – goondinal tan wadata dum, iwde e fuddoode yaade e timmoode, no Binndi dii mbiiri nii: «Poocitiido wuurdan goondinal.»\*

### *Haala tikkere Laamŋo faade e yedduŋe*

<sup>18</sup> Tikkere Laamŋo ana bannga iwde dow kammu ana jippoo e yedduŋe e oopiibe fuu be oopaaŋe mum'en deddata goonga oo bee, <sup>19</sup> sabi ko neddo waawi anndude e Laamŋo koo ana laabani be, Laamŋo jaati bannginani be dum. <sup>20</sup> Sabi gila Laamŋo tagi aduna oo faa hannde, golle mum ana banngina sifa mum mo yiyataake oo faa laaba, dum woni baawde makko faa abada dee e allankaaku makko oo. Saabe dum, yedduŋe mo bee ngalaa dadirgal fey. <sup>21</sup> Fay so taweede ebe anndi Laamŋo, be teddiniraali dum no foti teddiniireede nii, be njettaali mo duu. Miilooji maŋbe dii laatike ŋoli, fay ko

\* 1:17 Habaakuk 2.4

6e anndi seeɗa koo duu ni66ii. <sup>22</sup> E6e njaara 6e hakkilante'en, kaa 6e kaandii. <sup>23</sup> Be loomtinirii teddeengal Laamɗo duumiido oo tooruuji nannduci e yim6e maayoobe e pooli e daabaaji di koyde nay e boggi leydi.

<sup>24</sup> Saabe dum, Laamɗo daldi 6e e cobe no yonkiiji ma66e dii njidiri nii faa 6e koyi terde ma66e, kam6e e ko'e ma66e. <sup>25</sup> Be loomtinirii Laamɗo goongaraajo oo fenaande, 6e teddini ko tagaa 6e ndewii dum, 6e njoppii Tagudo oo. Yo jettooje ngoodan mo faa abada! Aamiina. <sup>26</sup> Saabe dum, Laamɗo daldi 6e e gidaade yonki ma66e kersiniide. Rew6e ma66e bee njoppii leldi wor6e mum'en dee, ndeentii e rew6e hono mum'en faa woortondiri e no Laamɗo muuyrunoo dum nii. <sup>27</sup> Hono non wor6e 6ee duu njoppi waaldude e rew6e faa ngatti muuyondirde. Wor6e ana ngadondira ko hersinii. Be njukkaama kam6e e ko'e ma66e jaati hakke majjere ma66e.

<sup>28</sup> Saabe ko 6e miijinoo anndude Laamɗo walaa ko nafata koo, Laamɗo daldi 6e e majjere ma66e, faa 6e ngadi ko neddo haanaa wadude. <sup>29</sup> Be oopiibe, 6e falee6e yonki, e6e keewi jooto e comdam fuu, kaɗum e haasidaaku e war-hoore e poofondiral e jamma e anniya bonɗo. Be no'oo6e yim6e, <sup>30</sup> 6e niŋoo6e yim6e, 6e waju6e Laamɗo, 6e hoynoo6e yim6e, 6e mawninkiniibe, 6e mantotoo6e, 6e seeban6e ko boni, 6e murtir6e saaraa6e ma66e, <sup>31</sup> 6e ngalaa hakkille, 6e nganaa hoolniibe, 6e yoor6e berde, 6e ngalaa yurmeende. <sup>32</sup> Fay so taweede e6e anndi Laamɗo yamirii gadoowo hono dee kulle fuu ana haandi e maayde, 6e kaadataa e wadude de tan, e6e njabani duu gadoowo de fuu.

## 2

### *Haala jukkungo Laamɗo*

<sup>1</sup> Ndennoo, aan peloowo wo66e oo, ko mbaaw-ɗaa laataade fuu a walaa dadirgal. Sabi so a felii wo66e tawi golle moodon yo gooto, a li6ii hoore maa. <sup>2</sup> Eden anndi Laamɗo ana sarira golliroo6e hono dii golleeji 6ee ko waarata e goonga oo. <sup>3</sup> Hey! Aan peloowo golloo6e hono dii golleeji 6ee tawe hono non ngollirta, tama ada sikki a dadan sarri jukkungo Laamɗo ngoo? <sup>4</sup> Naa a jawɗo moyyuki Laamɗo mawki kii, kaɗum e mujal mum e sawraare mum? Tama a anndaa Laamɗo ana holle moyyuki mum yalla ada tuuba? <sup>5</sup> Kaa ko a joordo bernde a caliido tuubude koo, ada waddana hoore maa tikkere Laamɗo jannde Laamɗo bannginta tikkere mum e sariya mum poocitiido oo. <sup>6</sup> Sabi Laamɗo barjoto gooto fuu golle mum. <sup>7</sup> Tewtoo6e darja e teddeengal e ko duumotoo, tewtiroo6e dum mujal ley golle lobbo 6ee ke6an nguurndam nduumiidam. <sup>8</sup> Kaa haasidi'en salii6e goonga so ana ka66ii e bonannda 6ee, jukkungo naawngo ke6ata. <sup>9</sup> Torra e wemmberde ngoodanii gadoowo ko boni fuu: Yahuudiyankoo6e tafon, lepi goddi njokka hen. <sup>10</sup> Darja e teddeengal e jam ngoodanii gadoowo ko moyyi fuu, Yahuudiyankoo6e tafon, lepi goddi njokka hen. <sup>11</sup> Sabi Laamɗo burdintaa yim6e.

<sup>12</sup> Laamɗo jukkan luuttoo6e 6e nganaa Yahuudiyankoo6e, fay so 6e anndaa Sariya Muusaa oo. Kasen duu luuttoo6e so tawi ana anndi Sariya Muusaa oo, carirte Sariya oo. <sup>13</sup> Neddo nanngirtaake poocitiido yeeso Laamɗo e hettinaade Sariya tan, jokkude Sariya oo wadata so nanngiree poocitiido.

<sup>14</sup> Be nganaa Yahuudiyankoo6e 6ee, kam6e e waasude anndude Sariya Muusaa oo fuu, so 6e ngadirii no Sariya Muusaa oo wiiri nii, 6e kollii e6e njogii sariya e ley hakkillaaji ma66e kam6e e ko'e ma66e fay so 6e ngalaa Sariya Muusaa oo. <sup>15</sup> Be kollii ko Sariya Muusaa oo yamiri koo ana winndaa e berde ma66e. Hakkillaaji ma66e ceediima dum, wakkatiiji e6e anndi ley



miilooji ma66e 6e ngadii ko boni, wakkatiiji e6e anndi 6e ngadii ko moyyi. <sup>16</sup> Dum woni ko 6anngoyta ɲannde Laamdo yamirta Iisaa Almasiihu sara ko suudii ley berde koo, sarira dum no Kabaaru Lobbo mo mbaajotoo-mi oo wiiri nii.

### *No Yahuudiyankoo6e ngorri e Sariya Muusaa*

<sup>17</sup> Aan, so a wii a Yahuudiyanke, a tuugike Sariya Muusaa oo, a mantorike Laamdo, <sup>18</sup> ada anndi sago Laamdo, a jannginaado Sariya Muusaa oo faa mbaaw-daa subaade ko moyyi, <sup>19</sup> a tayorii a dowoowo wumbe, a fooyre won6e e nimre 6ee, <sup>20</sup> ada waajoo 6e njanngaali 6ee, ada janngina sukaabe saabe ko njogi-daa anndal e goonga faa hi66i e ley Sariya Muusaa oo koo – <sup>21</sup> ada tinndina wo66e, ndennoo a tinndintaa hoore maa naa? Ada waajoo pati wujjee, a wujjataa naa? <sup>22</sup> Ada wiya pati jeenee, a jeenataa naa? Ada harmina tooruuji, a wujjataa ley to di ndewetee too naa? <sup>23</sup> Aan mantortoodo Sariya Muusaa oo, a luuttataa mo koynaa innde Laamdo ndee naa? <sup>24</sup> Dum wadi so Binndi dii mbii: «Onon ngadi so 6e nganaa Yahuudiyankoo6e 6ee ana mbonkoo innde Laamdo ndee.»\*

<sup>25</sup> Sabi taadagol ana waawi nafude ma so ada haybi Sariya Muusaa oo, kaa so a yaafii Sariya Muusaa oo, a laatike hono mo taadaaki nii. <sup>26</sup> So mo taadaaki haybii jamirooje Sariya Muusaa dee, yalla waasude taadaade makko hiisataake no o taadiido nii naa? <sup>27</sup> Mo taadaaki kaybudo Sariya Muusaa oo ana sare aan luuttudo Sariya oo, fay so a taadiido anndudo Binndi dii. <sup>28</sup> Sabi wanaa ko yiyetee koo wadata neddo Yahuudiyanke jaati, wanaa ko golletee e terde koo woni taadagol. <sup>29</sup> Ko yiyataake koo wadata neddo Yahuudiyanke jaati, taadagol duu ley bernde neddo tawetee. E Ruuhu oo dum fawii, wanaa e binndi dii. Neddo baado non, wanaa yimbe njettata dum, Laamdo yettata dum.

## 3

<sup>1</sup> Ndennoo, kofum Yahuudiyanke 6urdi leɲi goddi dii? Kofum woni nafaa taadagol? <sup>2</sup> Nafaa taadagol ana heewi e alhaaliiji dii fuu. Ko adii fuu, Yahuudiyankoo6e kalfinaa konngol Laamdo ngol. <sup>3</sup> Kaa so yoga ma66e nganaa hoolniibe, dum ana waawi bonnude ko Laamdo yo koolniido koo naa? <sup>4</sup> Waawaa! Fay so yimbe fuu yo fenoo6e, Laamdo kaa yo goongirante. Sabi nii winndorii:

«Fooccitaare maa ana annditee  
e ko kaalataa koo,

so a sardaama a li6an.»\*

<sup>5</sup> Doo mido haalda no yimbe nii: so oonaare men ana beyda 6annginde fooccitaare Laamdo ndee, dum ana wada so mbiyen Laamdo yo oopiido so jippinii e men tikkere mum naa? <sup>6</sup> Fes! Sabi so Laamdo yo oopiido, hono o sarirta aduna oo? <sup>7</sup> So tawii fenaande am ana beyda 6annginde goonga Laamdo oo edum teddina mo, saabe kofum carirtee-mi mi luuttoowo? <sup>8</sup> Won ɲo'oo6e en wiyoo6e eden mbiya: «Ngaden ko boni yalla ko moyyi ana funta hen.» Been yimbe, jukkungo mum'en ana foti e gollleeji mum'en.

### *No yimbe fuu ndonkiri laataade fooccitiibe*

<sup>9</sup> Ndennoo, enen Yahuudiyankoo6e 6ee, eden 6uri heddiibe 6ee naa? En 6uraa. Sabi mi hollii Yahuudiyanke e mo wanaa Yahuudiyanke fuu e ley luutti ngoni, <sup>10</sup> no Binndi dii mbiiri nii:

\* **2:24** Esaaya 52.5      \* **3:4** Jabuura 51.6

«Walaa fuu pooccitiido, fay gooto,

<sup>11</sup> fay gooto walaa faamu,  
fay gooto tewtataa Laamdo.

<sup>12</sup> Yimbe fuu yo majju6e, fuu yo bon6e,

walaa fuu ga6oowo ko moyyi, fay gooto.»<sup>†</sup>

<sup>13</sup> «Kundude ma66e ana mba'i no janaale udditiide nii,  
demde ma66e ana mbowla pene bonde.

Toni ma66e ana caawi tooke posoke.»<sup>‡</sup>

<sup>14</sup> «Haala ma66e fuu yo kuddi e konngi mettudi.»<sup>§</sup>

<sup>15</sup> «Koyde ma66e ana njaawani yuppude yiyiam,

<sup>16</sup> bonannda e kunkoo ana jokki e ma66e to 6e njahata fuu,

<sup>17</sup> 6e anndaa laawol jam.»<sup>\*</sup>

<sup>18</sup> «Kulol Laamdo walaa e berde ma66e fey.»<sup>†</sup>

<sup>19</sup> Eden anndi huunde fuu ko Sariya Muusaa oo wii, won6e e ley mum 6ee haaldi, yalla kundude fuu ana mu66oo, yimbe aduna fuu paama potii e jukkungo Laamdo. <sup>20</sup> Sabi fay gooto nanngirtaake pooccitiido yeeso Laamdo saabe haybude mum Sariya Muusaa oo, sabi walaa ko Sariya Muusaa oo waawi so wanaa anndinde yimbe ko woni luuttal.

### *No yimbe laatortoo fooccitiibe yeeso Laamdo*

<sup>21</sup> Kaa jooni Laamdo 6annginii no nanngirta yimbe fooccitiibe ko wanaa haybude mum'en Sariya Muusaa – no Sariya oo e dewte annabaa6e dee ceedorii nii: <sup>22</sup> o nanngiran goondin6e 6ee fuu fooccitiibe saabe goondinal mum'en Iisaa Almasiihu. Sabi walaa ko 6urdini yimbe: <sup>23</sup> yimbe fuu luuttii, ngalaa ngedu e annoora Laamdo. <sup>24</sup> Kaa Laamdo nanngirii 6e fooccitiibe meere meere kammari hinnee mum. O wadii dum saabe Iisaa Almasiihu coottitiido 6e oo. <sup>25</sup> Oon Laamdo fodi hokkitirde yonki mum faa yaafoo luutti goondin6e dum, saabe yiyiam mum dam. Hono non Laamdo holliri fooccitaare mum, fay so jukkaalino luuttoo6e arannde <sup>26</sup> saabe mujal mum. O wadirii dum faa o 6anngina fooccitaare makko wakkati mo ngon-den e mum oo, yalla omo holla o pooccitiido, kasen neddo fuu goondindo Iisaa, o nanngiran dum pooccitiido.

<sup>27</sup> Ndennoo, kodum fuu woni daliili wasu mo neddo heddorii? Fay gooto! Haybude Sariya Muusaa oo saabii dum naa? Wanaa! Goondinal tan saabii dum! <sup>28</sup> Sabi miden anndi neddo goondinal mum nanngirtee pooccitiido, wanaa saabe haybugol mum Sariya Muusaa oo. <sup>29</sup> Naa Laamdo yo Laamdo Yahuudiyankoo6e tan? Wanaa kanko woni Laamdo leji goddi dii duu naa? Kanko jaati woni Laamdo leji goddi dii duu, <sup>30</sup> sabi Laamdo gooto woodi, nanngiroowo taadiibe 6ee fooccitiibe saabe goondinal mum'en, 6e taadaaki 6ee duu o nanngiran dum'en fooccitiibe saabe goondinal mum'en. <sup>31</sup> Ndennoo, min ittiroo6e Sariya Muusaa oo goondinal naa? Fes! Min ittaali mo, min tabintin6e mo!

## 4

### *Haala goondinal Ibarahiima*

<sup>1</sup> Kodum mbiyaten e Ibarahiima njaati men oo? <sup>2</sup> So tawiino nii mo laatike pooccitiido saabe gollleeji makko dii, nden omo waawi mantaade. Kaa

<sup>†</sup> 3:12 Jabuura 14.1-3; 53.2-4    <sup>‡</sup> 3:13 Jabuura 5.10    <sup>§</sup> 3:14 Jabuura 10.7    <sup>\*</sup> 3:17 Esaaya 59.7-8

<sup>†</sup> 3:18 Jabuura 36.2

mo waawaa mantaade yeeso Laamdo. <sup>3</sup> Sabi Binndi dii mbii: «Ibarahiima goondinii Laamdo, Laamdo jatorike mo saabe majjum mo pooccitiido.»\*

<sup>4</sup> Golloowo, njoŋdi mum jatortaake wadaneede moyyere, dum tilsudum.

<sup>5</sup> Kaa mo fawataa jikke mum e golleeji mum lobbi, pawoowo jikke oo e goondinde Laamdo baawdo nanngirde yedduŋe fooccitiŋe oo, kanko, Laamdo jatorito mo saabe goondinal makko ngal mo pooccitiido. <sup>6</sup> Nii Daawuuda siforii mbelko'aaku neddo mo Laamdo jatorii pooccitiido tawi walaa golleeji lobbi:

<sup>7</sup> «Be boofi mum'en njaafaa,  
ŋe luutti mum'en tosa,  
mbelii hoore.

<sup>8</sup> Neddo mo Joomiraado hiisaaki luutti mum,  
welii hoore.»†

<sup>9</sup> Tama taadiŋe Ƌee tan njeŋ oon mbelko'aaku? Tama Ƌe taadaaki Ƌee ngalaa hen? Tama wanaa saabe goondinal Laamdo jatorii Ibarahiima yo pooccitiido? <sup>10</sup> Ndennoo, hono Ibarahiima worrunoo nde nanngiraa pooccitiido ndee? O taadiido naa o wanaa? O nanngiraama o pooccitiido gila o taadaaki. <sup>11</sup> Taadagol makko duu yo maande holloore fooccitaare makko ndee saabe goondinal o heŋiri gila o taadaaki. Hono non, o laatorii njaati goondinŋe Ƌe taadaaki Ƌee fuu, yalla Ƌeen duu ana njatoree yo fooccitiŋe. <sup>12</sup> Kasen kanko woni baaba taadiŋe Ƌe kaadaali e taadagol tan, jokkuŋe laawol makko, kanko baaba men Ibarahiima goondindo Laamdo gila taadaaki oo.

### *Haala ko Laamdo fodani Ibarahiima*

<sup>13</sup> Laamdo fodanii hokkude Ibarahiima e iwdi mum aduna oo. Wanaa kammari Ibarahiima ana jokki Sariya oo Laamdo fodiri dum, o fodirii dum kammari fooccitaare nde o hokkiri Ibarahiima saabe goondinal mum ndee.

<sup>14</sup> Sabi so tawii jokkude Sariya ana heya neddo faa hokkee ko foda a koo, goondinal laatike meere, fodoore ndee duu nafataa. <sup>15</sup> Sabi Sariya oo jukkungo Laamdo waddata, kaa do sariya walaa, boofi duu ngalaa.

<sup>16</sup> Ndennoo, fodoore Laamdo ndee e goondinal fawii, yalla ende laatoo moyyere makko, nde tabitana iwdi Ibarahiima fuu, wanaa jokkuŋe Sariya Ƌee tan, nde tabitana goondinirŋe no Ibarahiima goondiniri nii Ƌee fuu. Kanko woni njaati meeden en fuu <sup>17</sup> yeeso Laamdo, no winndorii nii: «Mi wadii ma baaba leŋi keewdi.»‡ Ibarahiima goondinii Laamdo guurtinoowo maayŋe, biyoowo ko woodaa yo laato. <sup>18</sup> Do Ibarahiima haannoo tayude jikke doo, don fawii jikke goondini, nii laatorii baaba leŋi keewdi no Laamdo wiirunoo mo nii: «Hono nii iwdi maa fotata.»§ <sup>19</sup> Ibarahiima duubi mum ana mbaara e teemedere, kaa goondinal makko lo'aali nde o yiinoo terde makko naywii, Saaratu jom suudu makko oo duu naywii yawtii rimde. <sup>20</sup> O sikki-taaki fodoore Laamdo ndee, ko laatii dee, goondinal makko Ƌeydi hebude semmbe, mo teddini Laamdo, <sup>21</sup> sabi o tayorii Laamdo ana waawi tabintinde fodoore mum. <sup>22</sup> Saabe dum, «Laamdo jatorii mo o pooccitiido.» <sup>23</sup> Ko Binndi dii mbii «Laamdo jatorii mo o pooccitiido» koo, wanaa kammari makko tan winndorii, <sup>24</sup> ana winndorii kammari meeden enen duu, enen warooŋe jatoreede en fooccitiŋe, goondinŋe Laamdo guurtindo Joomiraado men Iisaa

\* 4:3 Puɖɖooɖe 15.6 † 4:8 Jabuuraa 32.1-2 ‡ 4:17 Puɖɖooɖe 17.5 § 4:18 Puɖɖooɖe 15.5

e hakkunde maayŋe oo, <sup>25</sup> oon bardaado saabe luutti men, guurtiniraado yalla eden nanngiree en fooccitiibe.

## 5

### *Haala jam hakkunde men e Laamdo*

<sup>1</sup> Nde wonnoo en nanngiraama fooccitiibe saabe goondinal, jam wadii hakkunde men e Laamdo kammari Joomiraado men Iisaa Almasiihu.

<sup>2</sup> Kanko udditani en damal hinnee Laamdo mo ngon-den e mum jooni oo, dum laatorike saabe goondinal men ngal. Eden ceyoroo jikke hebuude ngedu e annoora Laamdo. <sup>3</sup> Wanaa dum tan, eden ceyoroo torraaji men duu sabi eden anndi torraaji ndimata mujal, <sup>4</sup> mujal ngal rima neddaaku, neddaaku oo rima jikke. <sup>5</sup> Jikke oo noo fuurataa, sabi Ruuhu Ceniido mo ndokke-den oo hebbinanii en jilli Laamdo dŋi.

<sup>6</sup> Sabi nde en ngalaano semmbe ndee, nden Almasiihu maayani en, enen yeddube Laamdo, e ley wakkati mo Laamdo subii oo. <sup>7</sup> Ana tiidi neddo jaba maayande goddo fay so oon yo pooccitiido, ana moyya neddo jaba maayande neddo moyyo. <sup>8</sup> Kaa Laamdo tabintinanii en jilli mum e men ko Almasiihu maayani en gila en luuttoobe koo. <sup>9</sup> Jooni ko nanngira-den en fooccitiibe saabe yiyam makko dam koo, tayoral en ndadan e jukkungo Laamdo ngoo saabe makko. <sup>10</sup> Sabi nde ngonno-den en konnee'en Laamdo ndee, Laamdo rewrintinii en e mum saabe maayde Biyum oo ndee. Ko ndewrintina-den e makko jooni koo, tayoral en kisinirte saabe nguurndam Biyiiko oo dam. <sup>11</sup> Kasen duu eden ceyoroo Laamdo saabe Joomiraado men Iisaa Almasiihu, dewrintindo en e Laamdo oo.

### *No Aadama nannditirta e Almasiihu garoynoodo oo*

<sup>12</sup> Jooni, saabe neddo gooto luutti naatiri e aduna oo, kasen duu luutti dŋi ngaddi maayde. Non maayde ndee yottorii yimbe fuu, sabi 6e fuu 6e luuttii.

<sup>13</sup> Gila Sariya Muusaa oo jippinaaka, luutti ana ngoodi e aduna oo, kaa so sariya walaa, luutti kiisataake. <sup>14</sup> Gila e Aadama faa e Muusaa, walaa fuu mo maayde heerii. Fay 6e luuttiraali no Aadama luuttudo yamiroore Laamdo 6ee nii duu maayan. Oon Aadama ana nanndita e garoyoowo oo.

<sup>15</sup> Kaa en kaanaa fonndude luuttal Aadama e dokkal Laamdo. Goonga, yimbe heewbe maayii saabe luuttal neddo gooto, kaa hinnee Laamdo buri fuu mawnude, kajum e moyyere nde o wadani yimbe heewbe saabe neddo gooto ndee, dum woni Iisaa Almasiihu. <sup>16</sup> Kasen duu en kaanaa fonndude ko dokkal Laamdo waddata koo e ko luuttal neddo gooto waddata koo. Sabi sariya banngal luuttal neddo gooto jukkungo waddi, kaa moyyere Laamdo mawnde caggal luutti keewdi wadi faa yimbe nanngiraa fooccitiibe.

<sup>17</sup> Ko luuttal neddo gooto (dum woni Aadama) waddani maayde laamaade yimbe koo, tayoral heboobe hinnee Laamdo keewdo hokkaaŋe fooccitaare bee, kajum'en laamoto ley nguurndam saabe neddo gooto (dum woni Iisaa Almasiihu).

<sup>18</sup> Ndennoo, no luuttal neddo gooto waddirani yimbe fuu jukkungo nii, hono non kasen golle pooccitiido mo neddo gooto golli wadirta yimbe fuu nanngiree fooccitiibe hokka dum'en nguurndam. <sup>19</sup> No salaare neddo gooto wadiri yimbe heewbe luuttoobe nii, hono non dowtaare neddo gooto duu wadiroyta heewbe nanngireede fooccitiibe.

<sup>20</sup> Sariya Muusaa oo wardii faa luutti beyda annditeede, kaa do luutti keewi fuu, don hinnee Laamdo burata fuu heewde. <sup>21</sup> Hono no luuttal

laamorii saabe maayde ndee nii, hono non hinnee Laamdo oo duu laamoroy-too saabe fooccitaare ndee faa na6a en to nguurndam nduumiidam dam Joomiraado men Iisaa Almasiihu hokkata en dam.

## 6

### *Haala maaydude e Almasiihu e wuurtidinde e mum*

<sup>1</sup> Ndennoo, kodum mbiyaten? En keddoto e luuttal yalla hinnee Laamdo oo ana beydoo naa? <sup>2</sup> Dum waawaa laataade! En maay6e banngal luutti, dum woni en ceertii e majji. Ndennoo hono mbaawraten kasen wuurde e ley luutti? <sup>3</sup> Odon anndi lootogal men batisima kab6ungal en e Iisaa Almasiihu ngal ha66ii en e maayde mum duu. <sup>4</sup> Ndennoo, e ley batisima oo en maaydii e makko en irdaama e makko, yalla no Almasiihu wuurtiri e hakkunde maay6e saabe baawde Baabiraado teddude dee nii, enen duu eden nguurda non nguurndam kesam. <sup>5</sup> E ley dum, no ndeentir-den e makko maayde nanndunde e nde makko ndee nii, hono non ndeentirten e makko immital nanndungal e ngal makko ngal. <sup>6</sup> Sabi eden anndi ko hiiddi ko woni ley men koo tontidaama e makko dow legal bardugal, yalla terde men luuttooje dee ana kalkoo, tonngite-den iwde e tonngoode luuttal. <sup>7</sup> Sabi maaydo tonngitaama iwde e tonngoode luuttal, nanngiraama poocciido. <sup>8</sup> Ko maaydu-den e Almasiihu koo, eden koolii en nguurdan e makko duu, <sup>9</sup> sabi eden anndi ko Almasiihu wuurti e hakkunde maay6e koo, maayataa kasen, maayde duu jaalataako mo kasen. <sup>10</sup> Sabi nde o maayi ndee, o tayii tonngoode luuttal cilol gootol keyoowol yim6e jamaanuui dii fuu. Jooni e nguurndam makko dam, Laamdo o wuurani. <sup>11</sup> Hono non, onon duu, laatee no maay6e nii banngal luuttal, no wuuran6e Laamdo nii e ha66agol mon e Iisaa Almasiihu ngol.

<sup>12</sup> Ndennoo, pati accee luuttal jaaloo terde mon maayooje dee faa njokkon gidaade majje. <sup>13</sup> Pati ndokkee caldi mon dii luuttal, pati ngadon di kaborde oonaare. Ndokkee ko'e mon Laamdo. Kammari on maaynoo6e, jooni kaa on wuur6e, ngadon caldi moodon dii kaborde fooccitaare. <sup>14</sup> Luuttal jaalataako on kasen, sabi on njootii taweede e ley Sariya oo, ko ngon-don e mum dee, e ley hinnee Laamdo.

### *No yim6e laatortoo golloo6e dwtaniibe fooccitaare*

<sup>15</sup> Kodum hen, ndennoo? En luuttan saabe e ley hinnee ngon-den wanaa e ley Sariya naa? Dum waawaa laataade! <sup>16</sup> Odon anndi so on ngadii ko'e mon e gollande neddo faa dwtano-don dum, on laatiima maccu6e mo dwtantodon oo. Ndennoo, naa on laatiima maccu6e luutti na6ooji on e maayde, naa on dwtaniima Laamdo na6oowo on e fooccitaare. <sup>17</sup> Kaa jettooje ngoodanii Laamdo! Arannde e tonngoode luuttal ngonno-don, kaa jooni odon nii dwtorii berde laabude laawol ngol njannge-don ngol. <sup>18</sup> On tonngitaama iwde e tonngoode luuttal, on laatike golloo6e dwtaniibe fooccitaare ndee. <sup>19</sup> Mido haalda doo no yim6e paamirta nii kammari on njaawaali faamde. No ngadirno-don caldi mon dii e maral tuundi e oonaare faa ngollu-don ko boni nii, jooni ngadirno non caldi mon dii e maral fooccitaare faa ngollon ko senii.

<sup>20</sup> Nde ngonno-don e tonngoode luuttal ndee, on laatanooki golloo6e dwtaniibe fooccitaare. <sup>21</sup> Kodum kebuno-don e majjum? Fay huunde, so wanaa ko kersirton hannde koo, sabi battane majjum yo maayde. <sup>22</sup> Kaa jooni, on tonngitaama iwde e tonngoode luuttal, on laatike gollanoo6e

Laamdo, odon nguura e senaare. Battane majjum yo nguurndam ndu-umiidam. <sup>23</sup> Sabi mbarjaari luuttal yo maayde, kaa moyyere nde Laamdo hokkata ndee yo nguurndam nduumiidam e ley ha66agol men e Joomiraado men Iisaa Almasiihu.

## 7

### *No yimbe tonngitirtee iwde e tonngoode Sariya*

<sup>1</sup> Sakiraa6e, mido haaldana on no yimbe anndu6e Sariya Muusaa oo 6ee nii. Odon anndi faa laa6i paca neddo e ley Sariya tawetee so nii ana heddi wuurde. <sup>2</sup> Hono nii debbo bamaado, sariya tonngi dum e gorum oo so nii gorko oo ana wuuri. Kaa so gorko oo maayii, mo tonngitaama iwde e sariya tonngunoodo mo oo. <sup>3</sup> So goddo 6amii mo e ley nguurndam goriiko oo, wiyete mo jeenoowo. Kaa so goriiko oo maayii, sariya oo yoppitan mo, mo wiy-ataake jeenoowo so mo 6amondirii e gorko goddo. <sup>4</sup> Sakiraa6e am, onon duu on maayanii Sariya Muusaa, on iwii e ley mum kammari maayde Almasiihu ndee, on jeyaama e goddo, dum woni Almasiihu mo Laamdo wuurtini e hakkunde maay6e oo yalla eden ngolla ko welata Laamdo. <sup>5</sup> Wakkati nde ngonno-d6n e hiini hoore men ndee, gidaade yonki bonde de Sariya Muusaa oo tekkini dee ana ngolla e terde men faa naba en to maayde. <sup>6</sup> Kaa jooni, en tonngitaama iwde e tonngoode Sariya Muusaa, sabi en maayii banngal Sariya tonngunoodo en oo faa mbaawen gollande Laamdo ley nguurndam kesam tuugiidam e Ruuhu oo, tawee dam tuugaaki e Sariya kiiddo binndaado oo.

### *No Sariya Muusaa anndiniri ko woni luuttal*

<sup>7</sup> Ndennoo, kodum mbiyaten? Sariya Muusaa oo yo luuttal naa? Wanaa! Kaa noo, Sariya oo anndini kam ko woni luuttal. Sabi mi anndataano ko woni tuuyo so Sariya oo wiyaalino: «Pati tuuye-daa!» <sup>8</sup> Luuttal ngal tuugike kadaadi dii, wadi e am sii tuuyooji fuu. Sabi so Sariya walaa, luutti dii yo baatudii. <sup>9</sup> Arannde, nde mi anndaano Sariya oo ndee, miin, mido wuurnoo, kaa ko kadaadi dii ngari koo, luuttal laattii guurngal, <sup>10</sup> miin, maay-mi. Jamirooje kaannoodo waddande kam nguurndam dee, laatii na6ooje kam to maayde. <sup>11</sup> Sabi luuttal ngal tuugike kadaadi dii, yojjii kam, wardi kam di. <sup>12</sup> Ndennoo, Sariya Muusaa yo ceniido, jamirooje dee duu yo ceniide yo poocitiide yo moyyude.

<sup>13</sup> Jooni, ko moyyi waddanii kam maayde naa? Waddanaali! Luuttal woni ko waddani kam maayde. Hono nii ngal annditirtee ngal luuttal jaati, sabi ngal nawtorike ko moyyi faa rima e am maayde. Ndennoo, saabe jamirooje dee luuttal ngal 6ann6ii ngal luuttal ya66itiingal.

### *No yimbe njogoraaki sembe ha6ude e luutti*

<sup>14</sup> Eden anndi Sariya Muusaa oo to Ruuhu Ceniido iwi. Kaa miin mi neddo lo'udo mo luutti njaalii. <sup>15</sup> Sabi mi faamaali ko ngadan-mi koo: ko njidu-mi wadude koo, mi wadataa dum, kaa ko mba6u-mi koo, dum ngadan-mi. <sup>16</sup> So mido wada ko mi yidaa koo, dum ana holla mi jabii Sariya Muusaa oo ana moyyi. <sup>17</sup> Joonnoo, wanaa miin wadirta non, luuttal gonngal e am ngal wadirta non. <sup>18</sup> Mido anndi e ley am, dum woni e ley terde am, ko moyyi walaa e mum. Yidude wadude ko moyyi ana e am, kaa mi waawaa wadude dum. <sup>19</sup> Mi wadataa ko moyyi ko njidu-mi koo, ko boni ko mi yidaa koo ngadan-mi. <sup>20</sup> Kaa so mi wadii ko mi yidaa, wanaa miin gollirta non, luuttal gonngal e am ngal gollirta non. <sup>21</sup> Ko taykii-mi hen dee: wakkati fuu mido yidi wadude ko moyyi, kaa ko boni koo hu6indii kam. <sup>22</sup> To ley hakkille am

too, Sariya Laamdo oo ana weli kam jaati, <sup>23</sup> kaa mido maata neesu bondo e ley terde am, ana haŋa e sariya gondo ley hakkille am oo. Neesu bondo oo ana wada kam maccudo luuttal gonngal e terde am ngal. <sup>24</sup> Hee mido yurminii! Homo waawi ittude kam e dee terde naŋooje kam to maayde? <sup>25</sup> Jettooje ngoodanii Laamdo saabe Joomiraado men Iisaa Almasiihu!

Ndennoo miin, e ley hakkille am mi gollanoowo Sariya Laamdo, kaa e terde am mi gollanoowo luuttal.

## 8

### *Haala nguurndam kaŋbiidam e Ruuhu Laamdo*

<sup>1</sup> Jooni kaa, jukkungo fuu walaa e haŋbiibe e Iisaa Almasiihu 6ee, <sup>2</sup> sabi baawde Ruuhu dokkooje en nguurndam saabe Iisaa Almasiihu dee ittii en e baawde luuttal, kaŋum e maayde fuu. <sup>3</sup> Ko Sariya Muusaa ronki timminde saabe loore terde men koo, dum Laamdo timmini. Faa o tosa luutti o neldi Biyiiko jaati dow mbaadi nanndundi e ndi biibe aadama luuttoobe ndii. E mum o jukki luuttal golloowal e ley terde men ngal. <sup>4</sup> Dum fuu yalla laaŋal ngal Sariya oo yamiri ngal ana hiibe e meeden, enen jokkuŋe Ruuhu 6e njokkaali e gidaade yonki mum'en 6ee. <sup>5</sup> Haŋbiibe e gidaade yonki 6ee, gidaade yonki miilata, kaa haŋbiibe e Ruuhu 6ee, ko Ruuhu jey koo miilata. <sup>6</sup> Miilde gidaade yonki mum tan, maayde waddanta neddo, kaa noo, miilde ko Ruuhu jey koo, nguurndam e jam waddanta neddo. <sup>7</sup> Sabi miiloowo gidaade yonki mum tan yo gaŋo Laamdo, sabi joomum dowaantaako Sariya Laamdo oo, ko selli hen dee, waawaa jaati. <sup>8</sup> Haŋbiibe e gidaade yonki 6ee mbaawaa welde Laamdo.

<sup>9</sup> Kaa onon, on kaŋbataako e gidaade yonki so Ruuhu Laamdo ana e mon, e Ruuhu oo kaŋboto-don. Neddo fuu mo walaa Ruuhu Almasiihu oo, waldaa e Almasiihu. <sup>10</sup> Kaa so Almasiihu wonii e mon, fay so taweede terde mon dee yo maayde saabe luuttal ngal, wonkiiji mon dii kaa yo guurdi kammari on nanngiraama foocitiibe. <sup>11</sup> Laamdo guurtindo Iisaa Almasiihu e hakkunde maaybe oo, so Ruuhu mum ana e mon, kaŋum jaati hokkata terde mon maayooje dee nguurndam, o hokkiran dum Ruuhu makko gondo e mon oo.

<sup>12</sup> Jooni kaa, sakiraaŋe, so won ko tilsinte-den, wanaa jokkude gidaade yonki tilsinte-den. <sup>13</sup> So on nguurdii no gidaade yonki ngorri nii fuu, on maayan. Kaa so on mbardii gidaade dee Ruuhu Laamdo oo, on nguuran. <sup>14</sup> Be Ruuhu Laamdo oo dowata 6ee yo biibe Laamdo. <sup>15</sup> Sabi Ruuhu mo Laamdo hokki on oo wadataa on maccuŋe faa wartira on e kulol. Ko kebu-don dee, Ruuhu gaŋoowo on biibe Laamdo. Kanko wadata en noddiren Laamdo «Abba». <sup>16</sup> Ruuhu oo jaati, kaŋum e berde men dee ana ceedoo en biibe Laamdo. <sup>17</sup> So en biibe, en ronoobe duu. So en ronoobe ko Laamdo fodi koo, en rondoobe e Almasiihu. So eden torridee e makko, en keŋidan e makko teddeengal duu.

### *Haala teddeengal garoyoowal*

<sup>18</sup> Mido anndi torraaji meeden hannde dii mbaawaa fonndeede e teddeengal ngal Laamdo 6annginanta en janngo ngal. <sup>19</sup> Tagoore ndee fuu ana heppi jalaande nde Laamdo 6annginta teddeengal biibe mum ndee. <sup>20</sup> Sabi tagoore ndee, baawde naŋooje nde e meere laamotoo nde. Wanaa e sago mayre dum wadaa, Laamdo muuyrunoo dum non. Kaa jikke ana woodi, <sup>21</sup> sabi tagoore ndee tonngitete iwde e tonngoode nolgol, soottitee heŋa ngedu e teddeengal ngal biibe Laamdo 6ee keŋata ngal. <sup>22</sup> Sabi eden anndi, faa jooni tagoore ndee fuu ana uuma ana tampi e naawalla ŋatawera. <sup>23</sup> Wanaa dum



tan, enen hebir6e Ruuhu Laamdo oo no dokkal Laamdo adiingal nii 6ee duu eden uuma, sabi eden keppi Laamdo soottitaaki terde men dee wada en 6i66e mum. <sup>24</sup> Sabi e ley jikke kisina-den. Kaa jikke kebaado noottii laataade jikke, sabi neddo fawataa jikke e ko hebi. <sup>25</sup> Kaa so eden pawa jikke e ko en kebaali tafon, en ndoomiran dum sawraare.

<sup>26</sup> Hono non Ruuhu oo waran walla en e loore men duu, sabi en anndaa no kaan-den wadirde duwaawu nii. Kaa Ruuhu oo e hoore mum jaaganto en Laamdo, jaagoroo uumaali di mbaawaa sifeede e haalaaji. <sup>27</sup> Laamdo kumpitiido ko woni ley berde men oo duu ana anndi anniya Ruuhu, sabi e sago makko Ruuhu oo jaagirantoo seniibe 6ee.

<sup>28</sup> Eden anndi, yidu6e Laamdo noddiraabe anniya makko 6ee, Laamdo ana wada huunde fuu gollida faa laatanoo dum'en ko moyyi. <sup>29</sup> Sabi 6e Laamdo anndi gila tagaaka 6ee, o hoddiranii dum'en nanndude e Biyiiko oo, yalla Biddo oo ana laato hammadiijo sakiraa6e heew6e. <sup>30</sup> Kasen duu 6e o hoddirani 6ee, o noddii dum'en, 6e o noddi 6ee, o nanngirii dum'en foocitiibe, 6e o nanngiri foocitiibe 6ee, o hokkii dum'en ngedu mum'en e teddeengal makko.

### *Haala jilli Almasiihu*

<sup>31</sup> Caggal dum fuu, kodum mbiyaten? So Laamdo ana wondi e men, homo waawi honude en? <sup>32</sup> Kanko, fay Biyiiko oo e hoore mum mo hadaali en, o hokkitirii dum kammari men en fuu. Fay huunde hadataa mo hokkude en ko moyyi fuu, o hokkida en dum e mum. <sup>33</sup> Homo nabata 6e Laamdo subii 6ee sariya? Fay gooto, sabi Laamdo nanngirii 6e foocitiibe! <sup>34</sup> Homo waawi lifude 6e e sariya? Wala, sabi Iisaa Almasiihu maayanii en, ko 6uri dum fuu, o wuurtanii en. Omo joodii jaamo Laamdo omo jaaganoo en. <sup>35</sup> Kodum waawi seenndude en e jilli di Almasiihu yidi en dii? Billaare naa, wemmbere naa, torra naa, yobere naa, kolndam naa, farati naa, naa kaafaawi? <sup>36</sup> Nii Binndi dii mbiiri:

«Saabe maa miden nii kosa maayde  
jaande fuu,

miden nanngiraa no baali kirsoyteedi nii.»\*

<sup>37</sup> Dum fuu e taweede, eden kebira jaalogal manngal saabe jiddo en oo. <sup>38</sup> Sabi mido tayori, wanaa maayde, wanaa nguurdam, wanaa malaa'ika'en, wanaa laamu, wanaa ko wari jooni, wanaa ko waroyta, wanaa semmbe, <sup>39</sup> wanaa baawde gonde dow, wanaa gonde ley, wanaa huunde fuu ko tagaa, fay huunde waawaa seenndude en e jilli di Laamdo wadi e men dii e ley ha66agol men e Joomiraado men Iisaa Almasiihu.

## 9

### *Haala lepol ngol Laamdo subii*

<sup>1</sup> Ko kaalan-mi doo koo yo goonga, sabi ko ngon-mi e Almasiihu koo kaaliran-mi, mi fenataa. Hakkille am mo Ruuhu Ceniido dowata oo, ana seedanoo kam <sup>2</sup> mboy-yonki cattudo, kajum e naawalla duumiido ana e am <sup>3-4</sup> saabe Israa'ilankoo6e sakiraa6e am 6ee. Mido yelinoo laataade kudaado mi seerta e Almasiihu miin e hoore am so ana nafannoo lepol am ngol. Kam6e ngoni 6e Laamdo wadi 6i66e mum, holli 6e teddeengal mum. Kam6e nje y aadiiji dii e Sariya Muusaa oo. Kasen duu Laamdo anndinii 6e no rewirtee, wadanii 6e podooje mum. <sup>5</sup> Lepol am yo iwidi maamiraabe

\* 8:36 Jabuura 44.23



Israa'iila aranndeeŋe 6ee, Almasiihu duu banngal 6ii-aadamaaku mum e lejol ngol iwi, kanko woni Laamdo, o tiimdo huunde fuu, yo o yette faa abada. Aamiina.

<sup>6</sup> Dum wanaa wiide konngol Laamdo ngol laatike meere. Sabi wanaa iw6e e Israa'iila 6ee fuu ngoni Israa'iilankooŋe, <sup>7</sup> wanaa iw6e e Ibarahiima 6ee fuu ngoni 6i66e mum jaati. Sabi Laamdo wii Ibarahiima: «Iwdi Isiyaaka ndii, kayri innditortoo innde maa.»\* <sup>8</sup> Dum woni: wanaa 6i66e Ibarahiima rimiraabe no yim6e fuu ndimirtee nii ngoni 6i66e Laamdo, rimiraabe saabe fodoore ndee 6ee nanngiraa no iwdi makko jaati nii. <sup>9</sup> Sabi Laamdo fodii dŋi konngi wii: «Mi wartan e hono oo wakkati mawuuri, Saaratu heban 6iddo gorko.»† <sup>10</sup> Wanaa dum tan. Rebekka duu 6amii reedu funeeŋe. Baaba ma66e yo Isiyaaka, maama men oo. <sup>11-12</sup> Gila 6i66e 6ee ndimaaka sako 6e ngada ko moyyi naa ko boni, nden Laamdo wii Rebekka: «Mawniraado oo laatoto maccudo mijiraado oo.»‡ O wadiri non faa anniya makko banngal subagol tabita, dum woni: subagol makko ngol fawaaki e golle yim6e, e Laamdo noddooŋo oo ngol fawii <sup>13</sup> no Binndi dŋi mbiiri nii: «Yaakuuba korsin-mi, Iisuwa koynu-mi.»§

<sup>14</sup> Ndennoo, kodum mbiyaten? Laamdo yo oojiido naa? Fes! <sup>15</sup> Annii ko o wii Muusaa:

«Mi hinnoto mo muuy-mi hinnaade,

mi yurmoto mo muuy-mi yurmaade.»\*

<sup>16</sup> Ndennoo, subagol makko fawaaki e sago neddo naa e golle mum, ko fawii e mum dee, dow Laamdo jurmotoodo oo. <sup>17</sup> Sabi e ley Binndi dŋi, Laamdo wii Fira'awna: «Ko ngadir-maa-mi kaananke dee, faa mi hollira baawde am e maa, kasen duu faa innde am ooynee e aduna oo fuu.»† <sup>18</sup> Ndennoo, Laamdo yurmoto mo muuyi, yoornan 6ernde mo muuyi.

<sup>19</sup> Ana moyya daja biido kam: «So non dum worri, kodum Laamdo felirta yim6e so fay gooto waawaa salaade muuyde makko dee?» <sup>20</sup> Aan neddo oo, kodum ngon-daa faa njeddaa Laamdo? Loonde mahaande ana wiya mahudo dum oo: «Ko saabii so mahir-daa kam nii?» <sup>21</sup> Mahoowo loode ana waawi wadude e loope dee ko yidi fuu: e loopal gootal o maha loonde nde gollirtaake so wanaa e dow ko hensaa, o maha wonnde gollirteende ko wanaa ko hensaa. <sup>22</sup> Haya, fay so taweede Laamdo muuyii 6annginde tikkere mum kajum e baawde mum, o mujanii 6e o tikkani 6ee mujal cattungal, dum woni haandu6e e halkaade 6ee. <sup>23</sup> O wadirii nii faa o 6anngina annoora makko mawdo dow 6e o yurmotoo 6ee, 6e o lanndinonii gila ko fooyi yalla ana ke6a ngedu e annoora makko. <sup>24</sup> Been yim6e ngoni enen 6e o noddi 6ee, wanaa ley Yahuudiyankooŋe 6ee tan, ley lepi goddi dŋi duu. <sup>25</sup> Nii Laamdo wiiri dum e dewtere annabi Hosee'a:

«Lejol ngol wanaa lejol am ngol,

mi noddiroyan ngol lejol am,

yim6e 6e korsinaaka 6ee,

mi noddiroyan 6e yim6e am horsu6e.

<sup>26</sup> Kasen duu do 6e mbiyetenoo 6e nganaa yim6e am doo,

don 6e mbiyoytee 6i66e Laamdo guurdo oo.»‡

\* 9:7 Puddooŋe 21.12 † 9:9 Puddooŋe 18.10,14 ‡ 9:11-12 Puddooŋe 25.23 § 9:13 Malakiya 1.2-3 \* 9:15 Pergu 33.19 † 9:17 Habaakuk 9.16 ‡ 9:26 Hosee'a 2.25; 2.1

27 Annabi Esaaya duu haalii haala Israa'iilankoo6e, wii: «Fay so 6i66e Israa'iila keewiri no njaareendi geeci nii, seeda ma66e tan hisintee, 28 sabi Joomiraado tabintinan konngol mum faa hi66a e leydi ndii ko yaawi.»<sup>§</sup>

29 Kasen duu nii Esaaya wiirunoo gila arande:

«Sinndo Joomiraado Jom Semmbe oo daldaalino en iwdi, tawanno en laati ke no ngeenndi Sodooma nii, en nanndii e ngeenndi Gomoora.»\*

*No Laamdo nanngirta goondinbe Iisaa bee fooccitiibe*

30 Ndennoo, kodum mbiyaten? Ko mbiyaten annii: yim6e 6e nganaa Yahuudiyanoo6e 6e tewtaalino nanngireede fooccitiibe yeeso Laamdo 6ee, 6een ke6i fooccitaare, dum woni fooccitaare saabe goondinal. 31 Israa'iilankoo6e tewtunoo6e nanngireede fooccitiibe yeeso Laamdo saabe jokkude Sariya 6ee ndonkii he6ude nanngireede fooccitiibe. 32 Ko saabii? Saabe 6e tewtiraali dum goondinal, golle ma66e 6e tewtiri dum faa 6e pergittii e «haayre fergitoore ndee»<sup>33</sup> no haala kaa hippiraa ley Binndi dii nii:

«Mi fawan e Siyona haayre nde yim6e pergitoo e mum so li6a dum'en.

Kaa goondindo nde fuu hersataa abada!»<sup>†</sup>

## 10

1 Sakiraabe, ko njidumu e bernde am jaati, e ko jaagotomum Laamdo: Israa'iilankoo6e kisinee. 2 Midoo seedanoo 6e e6e kirana Laamdo sanne, kaa kiram ma66e dam waldaa e faamu. 3 Be paamaali fooccitaare nde Laamdo hokkata neddo ndee, faa 6e piyani ko'e ma66e dabare laataade fooccitiibe. Hono nii 6e dwtanaaki sariya mo Laamdo darni faa nanngira neddo poocciido oo. 4 Sabi Almasiihu woni timmoode Sariya Muusaa oo, yalla goondindo Almasiihu fuu ana nanngiree poocciido.

*No kisindam woodirani goondindo Almasiihu fuu*

5 Ko Muusaa winndi banngal fooccitaare iwnde e Sariya ndee annii: «Neddo fuu jokkudo Sariya oo, wuurdan saabe Sariya oo.»\* 6 Kaa ko fooccitaare iwnde e goondinal ndee wii koo: pati wii e bernde maa «Homo jabbata dow kammu?» Dum woni faa jippina Almasiihu, 7 naa «Homo yahata laakaraa?» Dum woni faa immintina Almasiihu e hakkunde maay6e. 8 Ndennoo, kodum fooccitaare iwnde e goondinal wiyata? Dum doo nde wiyata: «Konngol Laamdo ana badi maa, engol e hunduko maa, engol e bernde maa.»<sup>†</sup> Ngol konngol woni kabaaru goondinal ngal min mbaajotoo ngal. 9 So a seedorike hunduko maa Iisaa yo Joomiraado, a goondinii e bernde maa Laamdo wuurtinii mo e hakkunde maay6e, a hisinte. 10 Sabi goondindo e ley bernde mum, Laamdo nanngiran dum poocciido, ceedorido hunduko mum, Laamdo hisinan dum 11 no Binndi dii mbiiri nii: «Goondindo mo fuu hersataa.» 12 Jooni, walaa ko seenndi Yahuudiyanke e mo wanaa Yahuudiyanke, 6e fuu 6e Joomiraado gooto, o kebbinoowo moyyereji makko e noddoo6e mo 6ee fuu. 13 Sabi «neddo fuu noddudo innde Joomiraado, hisinte.»<sup>†</sup>

14 Kaa hono 6e mbaawiri noddude mo so 6e ngoondinaali mo? Hono 6e mbaawiri goondinde mo so 6e nanaali kabaaru makko? Hono 6e mbaawiri

§ 9:28 Esaaya 10.22-23 \* 9:29 No Sodooma e Gomoora kalkiraa nii winndaama e ley Puddoo6e

19.1-29 † 9:33 Esaaya 28.16 \* 10:5 Lewinkoo6e 18.5 † 10:8 Fillitagol Tawreeta 30.12-14

† 10:13 Yo'ila 3.5

nande kabaaru makko so baajotoodo walaa? <sup>15</sup> Hono yimŋe mbaawiri waajaade so nelaaka? Binndi dii mbii: «Huunde fuu ɓuraa yiigol warooŋe yottinde Kabaaru Lobbo ɓee ngol woodude.»<sup>§</sup> <sup>16</sup> Kaa wanaa yimŋe fuu njaŋani Kabaaru Lobbo oo. Annabi Esaaya wii: «Joomiraado, homo goondini waaju amen oo?»\* <sup>17</sup> Hono nii goondinal heɓiraa e nande waaju, waaju duu heɓiraa e konngol Almasiihu.

<sup>18</sup> Kaa mido lamndoo dum doo: Israa'iilankooŋe nanaali naa? ʼBe nanii jaati! Nii Binndi dii mbii:

«Daade maɓŋe nanaama e aduna oo fuu,  
konngi maɓŋe njottiima faa hoore leydi.»†

<sup>19</sup> Mido lamndoo kasen: Israa'iilankooŋe paamaali naa? Ley Tawreeta Muusaa Laamdo wii tafon:

«Mi wadan kiron ɓe laataaki leɗol ɓee,  
mi wadan tikkanon leɗol ngol walaa hakkille.»‡

<sup>20</sup> Nden kaa, annabi Esaaya hulaali wiide caggal mum:  
«Be tewtaalino kam ɓee tawii kam,  
ɓe lamndanaaki kam ɓee,

mi ɓannganii dum'en.»§

<sup>21</sup> Kaa banngal Israa'iila, Laamdo wii:

«Nannde fuu mido lanndinii jaɓŋaade leɗol caliingol jeddungol ngol.»\*

## 11

### *No Laamdo holliri ana yurmoo Israa'iilankooŋe*

<sup>1</sup> Ndennoo, mido lamndoo: Laamdo yoppii yimŋe mum Israa'iilankooŋe ɓee naa? O yoppaali! Sabi miin e hoore am mi Israa'iilanke, mi iwdi Ibarahiima, e suudu baaba Benjamin njeɓaa-mi. <sup>2</sup> Laamdo yoppaali yimŋe mum ɓe subinoo gila arande ɓee. Tama on anndaa ko Binndi dii mbii nde annabi Iliyaasa wullantonoo Israa'iilankooŋe ɓee to Laamdo, wii: <sup>3</sup> «Joomiraado, ɓe mbarii annabaaɓe maa, ɓe ngurjinii ittirde maa sadaka, miin tan gooto heddii, eɓe ndaara no ɓe mbarda kam.» <sup>4</sup> Kodum Laamdo jaabii mo? Dum doo: «Mi moobtanii hoore am ujunaaji njeddon gorko ɓe kujidanaali tooru wiyeteendu Ba'ala.» <sup>5</sup> Hono non, hakkunde yimŋe hannde ɓee, ana woodi yimŋe seeda ɓe Laamdo suborii saabe hinnee mum. <sup>6</sup> Kaa so o suborike ɓe hinnee, anndan o suboraaki ɓe saabe golle maɓŋe. So wanaa dum, hinnee Laamdo oo heddataako laataade hinnee hankasen.

<sup>7</sup> Ndennoo, hono laatii? Ko laatii dee, Israa'iilankooŋe ɓee keɓaali ko ndaartunoo koo, ɓe Laamdo subii ɓee nii keɓi dum. Wobbe ɓee, ɓerde mum'en mbumnaa <sup>8</sup> no winndorii nii:

«Laamdo uddii hakkillaaji maɓŋe,

wumnii gite maɓŋe, faadinii noppi maɓŋe.

Faa hannde non worri.»\*

<sup>9</sup> Daawuuda duu wii:

«Yo rewgol maɓŋe bonngol ngol laatano ɓe piccal kaɗum e yammbuure,  
laatanoo ɓe fergitere yalla eɓe njukkee.

<sup>10</sup> Yo gite maɓŋe niɓɓine pati ɓe njiya,  
yo cagge maɓŋe ture faa abada!»†

§ 10:15 Esaaya 52.7 \* 10:16 Esaaya 53.1 † 10:18 Jabuura 19.5 ‡ 10:19 Fillitagol Tawreeta 32.21 § 10:20 Esaaya 65.1 \* 10:21 Esaaya 65 \* 11:8 Fillitagol Tawreeta 29.3, Esaaya 29.10

† 11:10 Jabuura 69.23-24

11 Ndennoo, mido lamndoo: ko Yahuudiyankooŋe 6ee pergiti koo, yalla faa 6e caama faa abada naa? Wanaa! Kaa saabe luutti ma66e dii, yim6e 6e nganaa Yahuudiyankooŋe 6ee keŋiri kisindam dam, yalla Yahuudiyankooŋe 6ee ana kira. 12 So luutti ma66e dii ngaddanii aduna oo ko moyyi, so waasude ma66e goondindee lissaa duu waddanii 6e nganaa Yahuudiyankooŋe 6ee ko moyyi, wanaa haala so Yahuudiyankooŋe 6ee fuu tuubii.

### *Haala hisineede 6e nganaa Yahuudiyankooŋe*

13 Jooni, onon 6e nganaa Yahuudiyankooŋe 6ee kaaldan-mi: ko laatii-mi nelaaŋo e moodon koo, mido mantaroo golle mo ndokkaa-mi oo 14 yaama mi he6a waddude kiram e ley leŋol am, faa mi hisina yoga e ma66e. 15 So woddineede Yahuudiyankooŋe rewrintinii aduna oo e Laamdo, hono laatoytoo so 6e nja66oyaama? Walaa fuu no laatoytoo so wanaa iwde e maayde so naata e nguurndam.

16 So tamre nandeere sakkaama Laamdo, tame keddiide dee duu cakkaama. So dadi lekki cakkaama Laamdo, ca6e dee duu cakkaama. 17 Jonnoo, Israa'iilankooŋe ana mba'i no maangoroowi tutaaki ki ca6e mum yogaaje caltaa. Aan mo wanaa Yahuudiyanke nanndudo e ca6al maangoroowi ki tutaaka, a waddaama a dobaama e maangoroowi kii. Nii keŋir-ŋaa ngedu e ko iwata e dadi maangoroowi tutaaki kii no ca6e godde dee keŋiri nii. 18 Kammari majjum, pati manta yeeso ca6e caltaade dee. Kaa so ada mantoo, anndaa wanaa aan wuurni dadi dii, dadi dii nguurnu maa. 19 Ana moyya tawee ada wiya: «Ca6e caltaama yalla mido dobee do de ngonnoo doo.» 20 Ana selli! Kaa ko de caltiraa dee, rafi goondinal majje, aan ada heddi e dobeede saabe goondinal maa. Ndennoo, pati mawninkina, tawde-ŋaa e kulol Laamdo. 21 Sabi so Laamdo dalaali ca6e layliije dee, dalataa ma aan duu. 22 Ndennoo, taykita moyyuki Laamdo e janngere mum fuu: omo janngana saam6e 6ee, kaa omo moyya e maa so nii ada jii6i e kii moyyuki. So wanaa dum, aan duu a saltete. 23 Israa'iilankooŋe duu, so 6e jii6aali e salaare ma66e ndee, 6e ndoboyte, sabi Laamdo ana waawi dobirde 6e e maangoroowi kii no 6e caltiranoo nii. 24 Ndennoo aan iwdo e maangoroowi ki tutaaka kii oo, so a saltaama iwde e makki a dobaama e maangoroowi tutaaki kii, haala walaa ca6e iwde e lekki tutaaki kii, so caltanooma ana mbaawi dobeede e inna mum'en.

### *No Laamdo yurmortoo yim6e fuu*

25 Sakiraa6e, mido yidi anndinde on oo doo sirri, pati yeewron ko'e mon on hakkilante'en: yoga e Israa'iilankooŋe, ko'e mum'en tiidinaa faa nde 6e nganaa Yahuudiyankooŋe goondinoyoo6e 6ee fuu kisinaa. 26 Hono non Israa'iilankooŋe 6ee fuu kisinirtee, no Binndi dii mbiiri nii:  
«Kisinoowo oo Siyona iwrata,

mo ittan iwdi Yaakuuba fuu e geddi Laamdo.»†

27 «Dum woni aadi am e ma66e

wakkati mo tosoyan-mi luutti ma66e dii fuu.»§

28 Ko 6e calii Kabaaru Lobbo oo koo, Yahuudiyankooŋe 6ee laatorii konnee'en Laamdo kammari mon. Kaa ko Laamdo subii 6e koo, 6e laatike yi66e mum saabe maamiraa6e ma66e. 29 Sabi mimsee walaa e dokkal Laamdo, kajum e noddaango mum. 30 No calorino-don Laamdo arannde, ke6u-don jooni yurmeende saabe salaare Yahuudiyankooŋe nii, 31 hono non, jooni 6e calorii mo yalla e6e ke6a yurmeende kam6e duu saabe yurmeende nde

† 11:26 Esaaya 59.20 § 11:27 Yeremiya 31.33-34

ngadana-don ndee. <sup>32</sup> Sabi Laamdo uddii yim6e fuu e ley salaare, yalla omo yurmoo 6e fuu.

<sup>33</sup> Hee ngalu Laamdo ana mawni! Hakkilantaaku makko e anndal makko ana luggidi! Fay gooto waawaa anndude anniyaaji makko. Fay gooto waawaa faamde laawi makko. <sup>34</sup> Sabi nii winndorii: «Homo anndi miilooji Joomiraado?

Naa homo waawi laataade howruujo makko?»\*

<sup>35</sup> «Homo adii hokkude mo sako o yo6a dum?»†

<sup>36</sup> Sabi, huunde fuu e makko iwi, huunde fuu saabe makko woodiri, huunde fuu kanko woodani. Yo teddeengal woodan mo faa abada! Aamiina!

## 12

### *No goondin6e Iisaa kaani wuurdude*

<sup>1</sup> Ndennoo sakiraa6e, mido ndaarda on saabe yurmeende Laamdo ndee, cakkee ko'e mon laatoo sadaka guurdo, ceniido, beldo Laamdo. Dum woni dewal ngal kaan-don rewirde mo ngal. <sup>2</sup> Pati jemmbee aduna, kaa dalee Laamdo heydintina hakkilaaaji mon yalla berde mon ana mbaylitoo. Nden, on mbaawan anndude muuyde Laamdo: ko moyyi e ko weli mo e ko hi66i.

<sup>3</sup> Saabe moyyere nde Laamdo hokki kam ndee, mido wiya gooto e mon fuu: pati na6ee ko'e mon to on njottaaki. Ko kaan-don wadude dee, yeewron ko'e mon miilooji hakkilantaaku baarooji e goondinal ngal Laamdo etani on ngal. <sup>4</sup> Gooto e men fuu ana jogii caldi keewdi, kaa caldi dii fuu ngal daa golle. <sup>5</sup> Hono non, enen e heewde fuu, en neddo gooto e ley ha66agol men e Almasiihu, en fuu eden njeydaa no gooto fuu jeydiri e goddo nii.

<sup>6</sup> En ndokkaama dokke ceertude de Laamdo hokkiri en moyyere mum. Dokkaado haaltude konngol ngol Laamdo loowi e mum, haaltira ngol no hawwirra e goondinal nii. <sup>7</sup> Dokkaado gollande deental goondin6e Laamdo, golla. Dokkaado tinndinde tinndina. <sup>8</sup> Dokkaado waajaade waajoo. Dokkitiroowo oo hokkira bernde laa6unde. Hooreejo fuu ardoroo soobee. Jurmoodo yurmoroow neddo dow seyo.

<sup>9</sup> Jilli mon dii laatoo di ngal daa e naafigaaku. Ngoddee ko boni, tiidee e ko moyyi. <sup>10</sup> Njidondiree jilli sakiraagu, gooto fuu teddina banndum faa burna dum hoore mum. <sup>11</sup> Pati laatee nattube, laatee soobirante'en, ndewiron Joomiraado berde laa6ude, <sup>12</sup> mbeltee e ley jikke oo, mujee torra, pati ceeree e duwaawu. <sup>13</sup> Mballee seniibe Laamdo 6ee e haajuuji mum'en dii, laatee jippinoobe ho66e, <sup>14</sup> nduwanee torroobe on 6ee, nduwo-don, pati kudon. <sup>15</sup> Mbeltodee e weltotoobe 6ee, mboydee e woyoo6e 6ee. <sup>16</sup> Laatodee miilooji gooti, laatee leydinkiniibe, pati mawninkinee, pati njogoree ko'e mon on hakkilante'en. <sup>17</sup> So won gadudo on ko boni, pati njobetee dum. Ndaaree wadude ko yim6e fuu miilii ana moyyi. <sup>18</sup> Nguurdee e yim6e fuu dow jam so ana waawi laataade, dow no mbaawru-don. <sup>19</sup> Sakiraa6e horsu6e, pati njobetanee ko'e mon, ko kaan-don wadude dee, dalee tikkere Laamdo ndee yobtanoo on. Sabi e ley Binndi dii Joomiraado wii: «Miin yobtoytoo mi yoboyan 6e.»\* <sup>20</sup> Nii winndorii kasen: «So gapo maa yolbii jamminaa dum, so domdii njarnaa dum. So a wadii nii, a wadan o yaagoo saabe ko o wadi ko boni koo.»† <sup>21</sup> Pati dal ko boni jaale, jaalora ko boni koo moyyere.

\* **11:34** Esaaya 40.13 † **11:35** Ayyuuba 41.3 \* **12:19** Fillitagol Tawreeta 32.35 † **12:20** Tinndi 25.21-22

## 13

*Haala dōwtanaade laamiibe*

<sup>1</sup>Yo gooto fuu dōwtano laamiibe ɓee, sabi laamu walaa so wanaa iwruɗo to Laamɗo oo, kasen duu laamiibe ɓee Laamɗo lammini dūm'en. <sup>2</sup>Saabe dūm, neddo fuu calaniido laamu saliima yamiroore Laamɗo, caliido yamiroore Laamɗo nee jukkete. <sup>3</sup>Gaɗoowo ko moyyi walaa ko huldata hooreeɓe ɓee, kuloowo ɓe dee, gaɗoowo ko boni. Ada yidi wasude hulde laamu naa? Ndennoo, waɗu ko moyyi, o yette. <sup>4</sup>Sabi laamu yo gollanoowo Laamɗo faa nafe. Kaa so tawii ko boni ngadataa, hul, sabi wanaa meere laamu wakkorii kaafaawi, o gollanoowo Laamɗo faa o tabintina jukkungo mum faade e gaɗoowo ko boni fuu. <sup>5</sup>Ndennoo, waajibi dōwtano-don laamiibe ɓee, wanaa saabe hulde jukkeede tan, pati hakkillaaji mon niŋa on duu. <sup>6</sup>Dum saabii so oɗon njoɓa lampo, sabi laamiibe ɓee e ley golle mum'en nanngugol lampo ngol, ɓe gollanoobe Laamɗo. <sup>7</sup>Ndokkee ɓe fuu hakkeji maɓɓe. Ndokkee lampo mo kaan-don hokkude lampo, ndokkon usuru mo kaan-don hokkude usuru, kulon mo kaan-don hulde, teddinon mo kaan-don teddinde.

<sup>8</sup>Pati jamaande fuu ɓiloo hakkunde mon so wanaa jamaande jilli. Homo fuu rewa banndum jilli. Sabi jiddo neddo hono mum fuu, tabintinii Sariya Muusaa oo. <sup>9</sup>E ley dūm, dii doo kadaadi: «Pati jeenu, pati jaadu hoore, pati wujju, pati tuuye-daa», kanji e jamirooje godde dee fuu ede kawriti e ndee doo yamiroore wootere: «Njidiraa tanaa maa no njidir-daa hoore maa nii.»

<sup>10</sup>Jiddo tanaa mum gollataa dūm ko boni, ndennoo, jilli tabintinta Sariya oo.

<sup>11</sup>Oɗon anndi wakkati mo ngon-don e mum. Wakkati mo kaan-don finde oo yonii. Sabi jooni kisindam ɓuri badaade en diina nde naatuno-don e goondinal ndee. <sup>12</sup>Jemma oo woddiiima, jalooma oo battiima. Ndennoo, njoppen gollude golleeji nimre dii, ɓamen kabitorde fooyre, <sup>13</sup>nguurdan no haaniri, no wonɓe e fooyre jalooma nii, tawee wanaa e ley wanngiyaare e sigiro e ko sofi e njaahilaaku e poodondiral e haasidaaku. <sup>14</sup>Boornoree Joomiraado men Iisaa Almasiihu no kaddungal nii, pati kiinnee gidaade yonki mon, pati njokkon de.

## 14

*Haala tewtude ko nabata deental goondinɓe yeeso*

<sup>1</sup>Njaɓɓee mo goondinal mum lo'i tawa on niŋiraali dūm ko woni e hakkille mum. <sup>2</sup>To banngal jaamdu, oo ana tawree goondinal faa waawa jaamde huunde fuu, tawee ootoo goondinal mum ana lo'i faa waasa jaamde tew. <sup>3</sup>Jaamoowo tew oo pati yawa mo jaamataa tew oo. Mo jaamataa tew oo pati niŋa jaamoowo tew oo, sabi Laamɗo jaɓɓiima mo. <sup>4</sup>Aan, kodum ngon-daa faa niŋaa gollanoowo goddo? Mo heddo tarsinaade naa mo saama, yo donngal kalfaado makko oo. Kaa mo tarsinto faa gasa, sabi Joomiraado ana waawi niɓinde mo.

<sup>5</sup>To banngal jalaaɗe, oodoo ana jogorii jalaaɗe dee ana ɓurdi moyyude, ootoo ana jogorii jalaaɗe dee fuu potu. Gooto fuu yo heɓu tayoral e ley hakkille mum. <sup>6</sup>Burdindo jalaaɗe dee oo waɗirii dūm kammari Joomiraado. Kasen duu, jaamoowo ko yidi fuu oo waɗirii dūm kammari Joomiraado, sabi o yettan Laamɗo. Mo jaamataa tew oo waɗirii dūm kammari Joomiraado, o yettan Laamɗo kanko duu. <sup>7</sup>Sabi fay gooto e men wuuranaali hoore mum, kasen duu fay gooto e men maayanaali hoore mum. <sup>8</sup>So en nguurii, Joomiraado oo nguuran-don, so en maayii, Joomiraado oo maayan-don. So en

nguur naa so en maay, Joomiraado oo jey en. <sup>9</sup> Sabi Almasiihu maayii, kasen duu wuurtii faa laatanoo wuurŋe e maayŋe fuu Joomiraado.

<sup>10</sup> Aan, ko wadi so ada jiŋa sakiike maa goondindo oo? Naa aan, ko wadi so ada yawa sakiike maa goondindo oo? En fuu, en ndaroyto yeeso sarirde Laamdo, <sup>11</sup> sabi ana winndii:

«Joomiraado wii:

< Mi hunorike baawde am:

Koppi fuu kofanto kam,

gooto fuu sellinan miin woni Laamdo. > »\*

<sup>12</sup> Nden gooto men fuu jaabanto hoore mum yeeso Laamdo.

<sup>13</sup> Dum nee, pati pelondiren e ko'e men hankasen, bamee anniya reentaade e huunde fuu ko waawi fergitinde sakiike mon liŋa dum. <sup>14</sup> Saabe Joomiraado men Iisaa mido taylori jaamdu fuu harmaa e hoore mum. Kaa so neddo miilii won harmundu, dum harmanan dum kaŋum. <sup>15</sup> So a torrii sakiike maa goondindo oo saabe jaamdu maa, a jokkaali laawol jilli. Pati halku mo Almasiihu maayani oo saabe jaamdu maa nduu. <sup>16</sup> Ndennoo, ko keŋu-don so taw-don ana moyyi koo, pati waddana yimŋe haalde haala mbonka. <sup>17</sup> Sabi Laamu Laamdo fawaaki e jaamdu naa e yardu, ko fawii e mum dee, foocitaare e jam e seyo e ley haŋŋagol men e Ruuhu Ceniido oo. <sup>18</sup> Golliranoowo Almasiihu hono non fuu, Laamdo welete dum, yimŋe 6ee duu teddinin dum. <sup>19</sup> Ndennoo, tewten beydude jam hakkunde men, kasen duu homo fuu tewta ko nabata banndum yeeso e ley goondinal.

<sup>20</sup> Pati bonnitin golle Laamdo saabe jaamdu. So goonga, jaamdu fuu ana dagii, kaa so jaamdu ndu jaamataa nduu ana liŋa sakiike maa, jaamde ndu moyyaa. <sup>21</sup> Ko moyyi dee, waasude jaamde tew e waasude yarde doro, kaŋum e waasude wadude huunde fuu ko fergitata sakiike mum.

<sup>22</sup> Huunde fuu ko ngoondin-daa hen, yo laato hakkunde maa e Laamdo. Mo sikkitataako ko woni e hakkille mum, welii hoore! <sup>23</sup> Kaa neddo fuu cikkitiido e ko jaamata, jukkete, sabi joomum jaamirtaa goondinal. Huunde fuu ko waldaa e goondinal yo luuttal.

## 15

<sup>1</sup> Enen selluŋe goondinal 6ee, eden kaani wallude 6e goondinal mum lo'i 6ee, mbaasen tewtude ko weli en tan. <sup>2</sup> Gooto e men fuu yo tewtu ko welata tanaa mum, faa oon yaara yeeso e ley goondinal. <sup>3</sup> Sabi Almasiihu tewtaalino ko weli dum, kaa o wii no winndorii nii: «Bonkaaji bonkiibe ma dii e am njani.»\* <sup>4</sup> Ko winndanoo arande e ley Binndi dii koo fuu, faa janngina en winndiraa, yalla mujal e berde buuŋude de Binndi dii ndokkata en dee ana laatanoo en jikke. <sup>5</sup> Yo Laamdo Jom mujal, buuŋinoowo berde oo, hokku on laataade miilo wooto no Iisaa Almasiihu anndiniri on nii, <sup>6</sup> faa teddinin Laamdo anniya gooto e daande wootere. Sabi kanko Laamdo woni Baaba Iisaa Almasiihu Joomiraado men oo.

<sup>7</sup> Njaŋŋondiree no Almasiihu jaŋŋorii on nii, faa Laamdo teddinee. <sup>8</sup> Mido wiya on: Almasiihu warii gollande Yahuudiyankooŋe faa hollita Laamdo yo koolniido. Sabi Almasiihu tabintinii podooje de Laamdo wadannoo njaatiraabe Yahuudiyankooŋe dee <sup>9</sup> yalla leŋi goddi dii duu ana teddinira Laamdo saabe yurmeende mum, no Binndi dii mbiiri nii:

«Saabe dum, mi jaarete hakkunde leŋi,

\* 14:11 Esaaya 45.23 \* 15:3 Jabuura 69.10



mi yimete faa teddina innde maa.»†

10 Binndi dīi mbii kasen:

«Leñi, mbeltodee e yimbe Joomiraado bee.»‡

11 Kasen:

«Onon leñi dīi fuu, njettee Joomiraado,

yo yimbe fuu njettu mo.»§

12 Annabi Esaaya duu wii:

«Iwdo e Yessa waroyan,

oon immoytoo faa laamoo leñi dīi,

dī pawoyan jikke majji e makko.»\*

13 Yo Laamdo Jom jikke oo hebbin on seyo e jam fuu e ley goondinal mon, yalla odon beydoo heewde jikke saabe baawde Ruuhu Ceniido oo!

### *No Pool haaldi kabaaru golle mum*

14 Sakiraaŋe am, miin jaati mido taylori odon moyyi sanne, odon keewi andal, kasen duu odon mbaawi waajondirde. 15 Kaa ley bataaki oo mido suusi haalande on haalaaji yogaaji faa laaba faa mi miccintina on dī. Mi haaldii non saabe moyyere nde Laamdo hokki kam 16 nde wadi kam gollanoowo Iisaa Almasiihu e ley be nganaa Yahuudiyankooŋe ndee. Ko mbaajotoo-mi Kabaaru Lobbo oo koo yo golle ceniido yalla be nganaa Yahuudiyankooŋe bee ana laatoo sadaka beldo Laamdo mo Ruuhu Ceniido oo senni. 17 Ndennoo, e haŋŋagol am e Iisaa Almasiihu, mido waawi mantoraade golleeji dī ngollanmi Laamdo dīi. 18 Sabi walaa fuu ko cuusu-mi haalde so wanaa ko baawde Almasiihu tabintini e ley golle am faa waddana be nganaa Yahuudiyankooŋe bee dwtanaade Laamdo. Haala am e golle am duu, 19 Laamdo tabintinirii dum baawde taagumansaaji e kaayde e ley baawde Ruuhu Laamdo oo. Hono non njottinir-mi Kabaaru Lobbo haala Almasiihu oo nokkuuje dee fuu gila Urusaliima e seraaji mum faa leydi Illiriya. 20 Kasen duu, gila arande anniya am yo waajaade Kabaaru Lobbo oo do innde Almasiihu ndee yottanooki pati mi maha dow maadi neddo goddo, 21 no Binndi dīi mbiiri nii:

«Be njottinanooka haala makko bee njiyoyan,

be nanaalino kabaaru makko ana haalee bee paamoyan.»†

### *Haala anniyaaji Pool*

22 Golle am oo hadi kam warde to moodon too cili keewdi. 23 Kaa jooni golle oo huubii dee doo leyde, kasen duu ko njidu-mi warde to moodon koo wadii duubi kuurdi jooni. 24 Mido yidi fanude to mon so mido yaha Espaniya, mi wonda e moodon seeda, njooŋinon kam ko kasindinan-mi e laawol am ngol.

25 Kaa jooni Urusaliima njahan-mi faa mi walla seniibe wonbe ton bee. 26 Sabi deente goondinbe gonde Makedoniya e Akaya dee anniye hawrintinde kaalisi faa mballa misikiina'en jeyaaŋe e seniibe Urusaliima bee. 27 Be anniyoorii dum berde laaŋude, kaa ebe kaani wadande been dum duu. Sabi tawii be nganaa Yahuudiyankooŋe bee kebii ngedu e moyyereji dī Ruuhu oo hokki Yahuudiyankooŋe bee dīi, ndennoo, e be nganaa Yahuudiyankooŋe bee duu ana kaani feccude jawle mum'en e Yahuudiyankooŋe bee. 28 So dum yawtii, so mi hokkii be ko hawrintinaa koo, mi yaŋŋorto to moodon too so mido yaha Espaniya. 29 Mido anndi so mido wara to moodon, mi wardan e barke Almasiihu kiŋŋudo oo.

† 15:9 2 Samuyila 22.50, Jabuura 18.50 ‡ 15:10 Fillitagol Tawreeta 32.43 § 15:11 Jabuura

117.1 \* 15:12 Esaaya 11.10 † 15:21 Esaaya 52.15



<sup>30</sup> Sakiraa6e, saabe Joomiraado men Iisaa Almasiihu e saabe jilli di Ruuhu oo hokkata dii, mido ndaarda on: kabodo-don e am e ley duwaawuuji mon faade e Laamdo saabe am, <sup>31</sup> yalla mido dada e 6e ngoondinaali won6e Yahuudiya 6ee, kasen seniibe won6e Urusaliima 6ee nja66oo ballal ngal na6anan-mi dum'en ngal. <sup>32</sup> Hono non, so Laamdo muuyii, mi yottorto on weltaare, kasen duu mi fowta hakkunde mon. <sup>33</sup> Yo Laamdo gaddoowo jam oo wonda e mon, on fuu. Aamiina!

## 16

### *Jowtaali*

<sup>1</sup> Mido haalana on kabaaru banndii men debbo biyeteedo Febe, gollanoowo deental goondin6e gonngal ley Kankiriya oo. <sup>2</sup> Nja66oro-don mo e dow innde Joomiraado no seniibe 6ee kaani wadu6e nii, kasen duu mballee mo e huunde fuu ko mo hasindini e mum, sabi kanko duu o wallii heew6e, miin e hoore am mido hen. <sup>3</sup> Mido jowta Piriskilla e Akilas, gollidoo6e e am golle Iisaa Almasiihu 6ee. <sup>4</sup> Sabi 6e kosii mursude yonkijji ma66e faa 6e ndannda yonki am. Wanaa miin tan yettata 6e, deente goondin6e 6e nganaa Yahuudiyankoo6e dee fuu ana njetta 6e. <sup>5</sup> Mido jowta deental goondin6e kawroowal galle ma66e ngal fuu. Mido jowta Epaynetus, gido am korsudo oo. Kanko adii goondinde Almasiihu ley leydi Asiya fuu. <sup>6</sup> Mido jowta Mariyama tampan6o on sanne oo. <sup>7</sup> Mido jowta Andoronikus e Yuniyas, suudu baabaabe am wor6e 6e uddidanoo-mi kasu 6ee. Be nelaabe teddinaa6e, kasen duu kam6e adii kam goondinde Almasiihu.

<sup>8</sup> Mido jowta Ampiliyatus mo korsinir-mi saabe Joomiraado oo. <sup>9</sup> Mido jowta Urbanus, gollidoowo e men golle Almasiihu oo, kaɽum e Estakis gido am korsudo oo. <sup>10</sup> Mido jowta Apelles mo goondinal mum Almasiihu horaa so tawaa ana laabi oo. Mido jowta galle Aristobil. <sup>11</sup> Mido jowta Herodiyon suudu baabaajo am oo. Mido jowta yim6e galle Narsisi ha66iibe e Joomiraado 6ee. <sup>12</sup> Mido jowta Tirifena e Tirifosa, 6een yo rew6e gollanoo6e Joomiraado. Mido jowta Persis mo korsin-mi, oon yo debbo tampudo sanne e ley gollande Joomiraado. <sup>13</sup> Mido jowta Rufus mo Joomiraado subii oo, mido jowta inna makko mo nanngir-mi no innam nii, miin duu. <sup>14</sup> Mido jowta Asinkiriti e Felegon e Hermes e Patorobas e Hermasa e goondin6e Iisaa wonda6e e ma66e 6ee. <sup>15</sup> Mido jowta Filolog e Yuliya, mido jowta Nere e banndum debbo, kaɽum e Olimpas, mido jowta seniibe wonda6e e ma66e 6ee fuu. <sup>16</sup> Gooto gooto mon fuu jowtira sakiike mum jowtaango wondungo e jilli. Deente goondin6e Almasiihu dee fuu ana njowta on.

<sup>17</sup> Sakiraa6e, mido ndaarda on, ndeento-don e waddoo6e ceeraagu e pergite saabe salagol mum'en jannde nde ke6u-don ndee, ngoddee 6e! <sup>18</sup> Sabi yim6e wa'u6e non ngollantaa Joomiraado men Almasiihu, ko 6e ngollanta dee, deedi ma66e dii. Haalaaji ma66e beldi e manooje ma66e jaayde 6e majjinirta hakkillaaji yim6e 6e yoyaa 6ee. <sup>19</sup> Kaa onon, kabaaru dowaare mon yottike yim6e fuu. Saabe dum mido weltanii on, kaa mido muuyani on laato-don hakkilante'en banngal ko moyyi, laato-don laabu6e banngal ko boni. <sup>20</sup> Laamdo gaddoowo jam oo wadan niison Ibiliisa ley teppe mon booyataa. Yo hinnee Joomiraado men Iisaa wonu e mon!

<sup>21</sup> Timote gollidiido am oo ana jowta on. Lukiyus e Yason e Sosipatoros suudu baabaabe am 6ee ana njowta on. <sup>22</sup> Miin, Tertiyus, binndando Pool oo bataaki oo, mido jowta on saabe ha66agol meeden e Joomiraado. <sup>23</sup> Gayus, njaatigi am mo deental goondin6e ngal hawrata galle mum oo, ana jowta

on. Erasta kalfinaaŋo kaalisi ngeenndi ndii oo ana jowta on, kaŋum e Kartus sakiike men oo. [ 24\* ]

### *Jettooje*

<sup>25</sup>Jettooje ngoodanii Laamŋo baawŋo hokkude on semmbe oo. O hokkiran on ŋum Kabaaru Lobbo haala Iisaa Almasiihu mo mbaajii-mi oo. Oon Kabaaru Lobbo yo ɓanngugol sirri Laamŋo cuuŋanooŋo gila arande <sup>26</sup>kaa jooni o ɓannginaama. Dewte annabaaŋe anndinii ŋum leŋi ŋii fuu no Laamŋo duumiido oo yamiri nii, faa ŋi ngoonŋina Laamŋo ŋi ŋowntanoo ŋum. <sup>27</sup>Yo teddeengal woodan Laamŋo gooto hakkilante oo faa abada saabe Iisaa Almasiihu. Aamiina!

---

\* **16:24** E dereeji ɓooyŋi ŋii, yoga ana ɓeyda aaya 24:Yo hinnee Joomiraaŋo men Iisaa Almasiihu wonu e mon, on fuu. Aamiina!

## Bataaki Pool arano faade e Korintunkooŋe

<sup>1</sup> Oo bataaki ga amen iwri, miin Pool, kaŋum e sakiike men Sosteni. Miin Pool, mi noddiraado sago Laamdo faa mi laatoon nelaado Iisaa Almasiihu. <sup>2</sup> Miden njowta deental goondinŋe Laamdo gonngal ngalluure Korintu.\* Laamdo labbinirii on saabe Iisaa Almasiihu, noddii on faa laato-don yimbe mum, onon e noddooŋe innde Joomiraado men Iisaa Almasiihu do mbaawi wonde fuu. Sabi Iisaa yo Joomiraado maŋbe, yo Joomiraado men. <sup>3</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

### *No Pool yettiri Laamdo banngal Korintunkooŋe*

<sup>4</sup> Midon yetta Laamdo saabe mon wakkati fuu dow moyyere makko nde ndokkire-don Iisaa Almasiihu ndee. <sup>5</sup> Saabe makko on kebiin aruku fuu e ley haala e ley anndal fuu. <sup>6</sup> Seedaaku amen haala Almasiihu niibiin e mon jaati, <sup>7</sup> dum wadi so on jakoraaka fay dokkal Laamdo gootal e ley doomugol mon Joomiraado men Iisaa Almasiihu faa warta. <sup>8</sup> Kanko hokkata on semmbe faa do aduna haadi, yalla odon laatoon ŋe ngalaa niŋe nannde gartol makko, kanko Joomiraado men Iisaa Almasiihu. <sup>9</sup> Laamdo yo koolniido, kanko noddii on kabŋo-don e Biyiiko Iisaa Almasiihu Joomiraado men oo.

### *Haala poodondiral hakkunde goondinŋe*

<sup>10</sup> Sakiraaŋe, midon ndaarda on dum doo e innde Joomiraado men Iisaa Almasiihu: nanngondiree, laato-don daande wootere, pati ceerton, laato-don hakkille gooto e anniya gooto. <sup>11</sup> Sakiraaŋe am, mi narrii yimbe suudu Kolowe poodondiral won hakkunde mon. <sup>12</sup> Ko njidu-mi wiide dee, yogaaŋe mon ana mbiya ana ngoodani Pool, woŋbe ana mbiya ana ngoodani Apollos,† woŋbe duu ana mbiya ana ngoodani Piyeer, woŋbe kasen duu ana mbiya ana ngoodani Almasiihu. <sup>13</sup> Tama Almasiihu yo pecciido? Tama Pool maayani on dow leggal bardugal, naa e innde Pool lootira-don lootogal batisima? <sup>14</sup> Mi yettirii Laamdo ko mi lootaali fay gooto e won lootogal batisima koo, so wanaa Kirispus e Gayus. <sup>15</sup> Non, fay gooto waawaa wiide e innde am lootira-don lootogal batisima. <sup>16</sup> Ooho, goonga mi batisiino kasen duu galle Istifanas. Ko yawti dum, mi anndaa yalla mi batisii goddo. <sup>17</sup> Sabi Almasiihu nelaali kam mi batisa, ko mo neli kam dee, mi haala Kabaaru Lobbo oo, tawa mi haaliraali dum neenal haala, pati maayde makko dow leggal bardugal ndee laatoon meere.

### *No Almasiihu holliri baawde Laamdo e hakkilantaaku Laamdo*

<sup>18</sup> Haala maayde Iisaa dow leggal bardugal yo safiyaaku banngal halko-tooŋe ŋee, kaa banngal men enen hisinteeŋe ŋee, ka baawde Laamdo. <sup>19</sup> Sabi ana winndii: «Mi bonnitan hakkilantaaku hakkilante'en ŋee, mi jiiŋan faamu faamuŋe ŋee.»‡

<sup>20</sup> Ndennoo, hakkilante won ko woni naa? Dunkee Sariya won ko woni naa? Baawdo haala e oo jamaan won ko woni naa? Wanaa Laamdo waylitii hakkilantaaku oo aduna wadii dum majjere naa? <sup>21</sup> Yimbe aduna oo e

\* 1:2 Golle Nelaabe 18.1-17 † 1:12 Golle Nelaabe 18.24-28 ‡ 1:19 Esaaya 29.14

hakkilantaaku mum'en fuu annditaali no Laamdo holliri hoore mum e ley hakkilantaaku mum nii. Dum saabii so Laamdo yidi hisinirde goondinbe dum 6ee waaju amen nanndudo e safiyaaku oo. <sup>22</sup> Yahuudiyankooŋe ana ndaarta kaayde, Yunaninkooŋe ana njidi kaŋum'en hakkilantaaku. <sup>23</sup> Kaa enen, kabaaru tonteede Almasiihu e leggal bardugal mbaajoto-den. Banngal Yahuudiyankooŋe dum metti, banngal leji goddi dum safiyaaku. <sup>24</sup> Kaa banngal noddaaŋe 6ee, Yahuudiyankooŋe e leji goddi fuu potu, Almasiihu yo baawde Laamdo yo hakkilantaaku Laamdo. <sup>25</sup> Sabi golle Laamdo mo yimbe njogorii yo safiyaaku oo ana 6uri hakkilantaaku neddo, kasen duu ko 6e njogorii yo loore Laamdo koo ana 6uri semmbirantaaku neddo.

<sup>26</sup> Yeewee ko'e mon, onon sakiraaŋe 6e Laamdo noddii: banngal yimbe, hakkilante'en keewaa e ley mon, jom'en semmbe keewaa e ley mon, iwbe e leji tedduŋi keewaa e ley mon. <sup>27</sup> Kaa Laamdo suŋike ko aduna jogorii yo safiyaaku koo faa hoyna hakkilante'en 6ee, ko aduna jogorii yo loore koo faa o hoyna ko jogii semmbe koo. <sup>28</sup> O suŋike ko hoyi, ko yawonii, ko jataaka e aduna oo koo faa o wada ko jataa koo yo meere, <sup>29</sup> yalla 6ii-aadama fuu ana ronka mantaade yeeso Laamdo. <sup>30</sup> Kanko ha66i on e Iisaa Almasiihu faa Iisaa laatanii en hakkilantaaku iwdo e Laamdo, laatanii en foocitaare e senaare e coottitaari <sup>31</sup> faa «mantotoodo fuu mantoroŋe golle Joomiraado» hono no winndorii nii.

## 2

### *Haala hakkilantaaku Laamdo*

<sup>1</sup> Sakiraaŋe, miin, nde ngarnoo-mi to mon faa mi waajoo on goonga Laamdo tedduŋo oo ndee, mi waajoraaki on haalaaji beldi, mi waajoraaki on hakkilantaaku yimbe. <sup>2</sup> Sabi mi fellisiino mi waajataako on fay huunde so wanaa haala Iisaa Almasiihu e tonteede mum e leggal bardugal. <sup>3</sup> Nde ngondunoo-mi e mon ndee, mido lo'i, mido huli, mido sijnna sanne. <sup>4</sup> Haala am e waaju am fawanooki e ɲeɲal haala jaalotoongal neddo. Ko dum fawinoo e mum dee, baawde de Ruuhu Ceniido hollata dee <sup>5</sup> pati goondinal mon fawoo e hakkilantaaku yimbe, fawoo e baawde Laamdo.

<sup>6</sup> Dum e taweede, miden mbaajoo hakkilantaaku hakkunde jii6uŋe e ley goondinal. Wanaa hakkilantaaku oo doo aduna min mbaajotoo naa hakkilantaaku jom'en baawde halkotooŋe e ley oo doo jamaanu – <sup>7</sup> hakkilantaaku Laamdo min mbaajotoo. Hakkilantaaku oo yo goonga tedduŋo cuudaado yimbe mo Laamdo fodani en gila aduna tagaaka faa naaten e teddeengal mum. <sup>8</sup> Fay gooto e adunankooŋe laamiibe 6ee anndaa oo hakkilantaaku, sabi sinndo ebe anndunoo mo, 6e tontataano Joomiraado tedduŋo oo. <sup>9</sup> Kaa nii winndorii:

«Ko yitere yiyaali nowru nanaali,  
e ko hakkille waddaali abada,

dum jaati woni ko Laamdo moyyinani yidufuŋe dum.»\*

<sup>10</sup> Kaa enen, Laamdo hollirii en dum Ruuhu Ceniido. Oon Ruuhu ana yiya fuu, fay ko luggidi to Laamdo. <sup>11</sup> Homo waawi anndude neddo faa laa6a so wanaa yonki wonki e mum kii? Laamdo duu hono non, fay gooto anndaa mo faa laa6a so wanaa Ruuhu gondo e makko oo. <sup>12</sup> Enen, wanaa adunanakaaku ke6-den, Ruuhu iwdo e Laamdo oo ke6-den, yalla eden annda moyyere nde Laamdo wadani en ndee fuu. <sup>13</sup> So miden mbaajoo dum, min nawtortaako haalaaji di hakkilantaaku 6i66e aadama waajotoo min dii – haalaaji di

\* 2:9 Esaaya 64.3

Ruuhu oo waajotoo d̄ii min nawtortoo. Hono non min pamminirta hebuŋe Ruuhu 6ee goongaaji Ruuhu d̄ii. <sup>14</sup> Mo hebaali Ruuhu Laamdo oo waawataa ja66aade kulle oon Ruuhu, sabi de safiyaaku do joomum. O waawataa faamude de, sabi Ruuhu oo tan waawi hollude no kulle dee carirtee. <sup>15</sup> Neddo kebuŋe Ruuhu oo, ana waawi sarde fuu, kaa fay gooto waawaa sarde dum.

<sup>16</sup> Sabi nii Binndi d̄ii mbiiri:

«Homo anndi anniya Joomiraado oo?

Homo waawi waajaade dum?»†

Kaa enen, anniya Almasiihu oo njogi-den.

### 3

#### *Haala gollanoobe Laamdo*

<sup>1</sup> Miin noo, sakiraabe, mi waawaa haalirande on hono no on hebuŋe Ruuhu Ceniido nii. No kaaliran-mi on dee, hono no on adunankooŋe nii, hono no on cukaloy keccoy e ley goondinal Almasiihu ngal nii. <sup>2</sup> Biraadam ndokkumi on, wanaa jaamdu tekkundu, sabi on mbaawanaano ndu. Fay jooni duu, on mbaawanaa ndu, <sup>3</sup> sabi adunankaaku tan nguurdu-don tafon. Ko haasidaaku e poodondiral woni hakkunde mon koo, wanaa dum ana holla e oo doo aduna njeya-don? Wanaa edum holla nguurndam 6ii-aadama nguurdon naa? <sup>4</sup> So gooto e mon wii Pool woodani, goddo kasen wii Apollos woodani, wanaa dum ana holla miilooji oo doo aduna njokku-don?

<sup>5</sup> Ko Apollos woni? Ko Pool woni? Min gollanoobe Laamdo tan, gooto fuu ko Joomiraado hokki dum. E juude amen ngoonfin-don. <sup>6</sup> Miin, mi tutii, Apollos yarnii, kaa Laamdo woni mawninoowo. <sup>7</sup> Hono non, tutudo oo e jarnudo oo fuu nganaa hen fay huunde, Laamdo mawninoowo oo tan woni fuu. <sup>8</sup> Tutudo oo e jarnudo oo fuu potu, homo e ma66e fuu barjete ko waarata e tampere mum. <sup>9</sup> Sabi minen min gollidoobe e Laamdo, onon on ngesa Laamdo, on maadi Laamdo.

<sup>10</sup> Kammari moyyere nde Laamdo wadani kam ndee, mi asii gasol no mahoowo hakkilante wadata nii, mi wadii mahol aranol. Jooni goddo ana maha e maggol. Kaa gooto fuu wada hakkille e no mahirta nii. <sup>11</sup> Sabi fay gooto waawaa wadude mahol gonngol so wanaa aranol ngol, kanngol woni Iisaa Almasiihu. <sup>12</sup> Neddo ana jiba e maadi aranndeeri ndii kanje naa cardi naa kaaye dime naa ledde naa hudo naa gawye. <sup>13</sup> Nannde gartol Almasiihu, neddo fuu sariya bannginan fayda golle mum, sabi nden, neddo fuu yiite bannginan golle mum, holla gooto fuu fayda golle mum. <sup>14</sup> Mo golle mum heddii daraade dow mahol aranol ngol, he6an mbarjaari. <sup>15</sup> Kaa mo yiite ngee jaami golle mum, waasii mbarjaari mum, kaa kajum hisinte, ana wa'i no cob6itiido e yiite nii.

<sup>16</sup> Tama on anndaa on suudu Laamdo, kasen Ruuhu Laamdo oo ana e mon? <sup>17</sup> Ndennoo, neddo fuu kalkudo suudu Laamdo nduu, Laamdo halkan dum. Sabi suudu Laamdo nduu yo seniindu, kasen duu onon ngoni suudu nduu.

<sup>18</sup> Pati fay gooto jaayra hoore mum. Miildo e mon yo hakkilante e oo aduna fuu yo laato safi, yalla ana laato hakkilante jaati. <sup>19</sup> Sabi hakkilantaaku e oo aduna yo safiyaaku yeeso Laamdo. Sabi ana winndii: «Laamdo nanngiran hakkilante'en 6ee hiila mum'en.»\* <sup>20</sup> Ana winndii kasen: «Joomiraado ana anndi miilooji hakkilante'en 6ee, omo anndi di meere.»† <sup>21</sup> Ndennoo, pati fay gooto mantorooyim6e, sabi onon nje y fuu: <sup>22</sup> Pool e Apollos e Piyeer, kajum

† 2:16 Esaaya 40.13 \* 3:19 Ayyuuba 5.13 † 3:20 Jabuura 94.11

e aduna oo, nguurndam e maayde, hannde e janngo, fuu onon njeý. <sup>23</sup> Onon, Almasiihu jey on, Almasiihu duu, Laamdo jey dum.

## 4

### *Haala golle nelaar6e Almasiihu e tampereji mum'en*

<sup>1</sup> Ndennoo, njogoree min min gollanoobe Almasiihu, njogoree min min halfinaabe goongaaji Laamdo teddudi cuudaadi dii. <sup>2</sup> Kalfinaado, hoolaare tan ndaardaa. <sup>3</sup> Jooni, banngal am, so on pelii kam naa so mi darnaama e sarirde bi66e aadama wiyoo6e mi wanaa koolniido, walanaa kam baasi. Mi felataa hoore am duu jaati. <sup>4</sup> So goonga nii, fay so mi walaa ko mi felda hoore am, dum wadataa kam mi poocciitido. Joomiraado woni caroowo kam. <sup>5</sup> Saabe dum, pati pelee fay gooto fade wakkati oo yottaade, fade Joomiraado oo warde. Kanko yaltinta ko suudinoo e nimre, kanko bannginta ko woni e berde yim6e. Nannde nden, gooto fuu he6an e Laamdo jettooje de foti he6ude.

<sup>6</sup> Sakiraa6e, haalaaji dii fuu mi fawii dum dow amen miin e Apollos kammari moodon, yalla miden laatanoo on misaalu, paamon pati njawton ko winndii koo, tawa on mawninkinaaki e ja6ande oodoo e salanaade ootoo.

<sup>7</sup> Ndennoo hoo burnu maa wob6e 6ee? Kodum njogi-daa ko a hokkaaka? Ko njogi-daa fuu a dokkaado, ko wadi so ada mantoroo dum hono dum wanaa dokke Laamdo?

<sup>8</sup> Woy on kaarii, woy on ke6ii arsuku, woy on laamiima, minen min laamaaki! Haya miden njidi laamo-don jaati, yalla miden mbaawa laamodaade e mon minen duu! <sup>9</sup> Sabi ana nanndani kam, minen nelaar6e 6ee, Laamdo heedini min caggal no saraa6e waretee6e nii. Sabi min laatike fijirtee6e yeeso aduna oo fuu: yeeso malaa'ika'en e yim6e fuu. <sup>10</sup> Min majju6e saabe Almasiihu, onon on hakkilante'en e ha66agol mon e Almasiihu. Min lo'ube, onon on jom'en semmbe. Min hoynaa6e, onon on teddinaa6e. <sup>11</sup> Fay wakkati mo ngon-den e mum jooni oo, min ceeraali e yolbere e domka e kolndam e fiyeede, ka6um e yiilaaru, <sup>12</sup> miden tiinnitoo wuurdude semmbe terde amen. So min njennaama, min nduwoto. So min torraama, min mu6an. <sup>13</sup> So min jo'aama, min mbaaltinan hakkillaaji joomum'en. Faa jooni miden njogoraa no mbuuwdi nii ley aduna oo, hono tuundi ndi yim6e fuu mbedotoo.

<sup>14</sup> Mi winndiraali dum faa mi hersina on, ko mbinndir-mi dum dee, faa mi jannginira on no sukaa6e am horsube nii. <sup>15</sup> Fay so taweede e ley ha66agol mon e Almasiihu odon njogii dowoo6e ujunaaji ujunaaji, on keewaa baabiraa6e kaa. Sabi e ha66agol mon e Almasiihu, miin laatii baaba mon nde mbaajii-mi on Kabaaru Lobbo oo ndee. <sup>16</sup> Dum wadi so mido ndaarda on jemmbon kam. <sup>17</sup> Dum wadi duu so nel-mi e mon Timote 6iyam korsudo koolniido e ley ha66agol mum e Joomiraado. O miccintinan on laawi di njokku-mi saabe Almasiihu e no mbaajortoo-mi diin laawi nii nokku fuu e ley deente goondin6e dee fuu. <sup>18</sup> Won e mon mawninkiniibe dow jikkude mi warataa to mon. <sup>19</sup> Kaa 6ooyataa mi waran to mon so Joomiraado jabii. Nden mi humpitoto ko wanaa haala mawninkiniibe 6ee tan, mi humpitoto baawde mum'en duu. <sup>20</sup> Sabi Laamu Laamdo wanaa haala tan, yo baawde. <sup>21</sup> Hono njid-don mi warda e mon? Sawru naa jilli e newaare?

## 5

### *Haala ko yaannii hakkunde goondin6e*

<sup>1</sup> Haya, ko sobi nanaama wadii hakkunde mon. Hono ndee somnde wadaali fay hakkunde heefer6e: gooto e mon ana wondi e jom suudu baam

mum! <sup>2</sup> Kasen duu oŋon mantoroŋo dum! Ko kaanno-ŋon waŋuŋe dee, metteede dum, yalla oŋon itta gaŋuŋo oo golle bonŋo e hakkunde mon.

<sup>3</sup> Miin, miŋo woŋŋori on banngal terde, kaa miŋo ɓattorii on e hakkille. Gila jooni hono no mi tawaado ton nii, mi sarii gaŋuŋo golle oo. <sup>4</sup> So on kawritii e dow innde Joomiraado men Iisaa, hakkille am ana tawŋe e mon, baawŋe Joomiraado men Iisaa duu ana e men, <sup>5</sup> yo oon nedŋo waŋe e juuŋe Ibiliisa, terde mum kalkee, yalla yonki mum ana hisinee ɓannde gartol Joomiraado.

<sup>6</sup> So goonga dee, on ngalaa ko mantoro-ŋon fey! Tama on anndaa yuufinirdi seeda ana yuufina conndi farani njiibaandi fuu? <sup>7</sup> Laɓɓinee ko'e mon, itton yuufinirdi kiinndi ndii hakkunde mon, yalla oŋon laatoŋo conndi farani njiibaandi keyri ndi walaa yuufinirdi. Non ngorru-ŋon jaati, sabi layyaari men iidi Paska ndii hirsaa, dum woni Almasiihu. <sup>8</sup> Ndennoo, teddiniren iidi oo ko wanaa luutti e bone hono no yuufinirdi kiinndi naa yuufinirdi coɓundi naa mbonndi. Teddiniren mo buuru mo walaa yuufinirdi, buuru laaɓal kaɓum e goonga.

<sup>9</sup> E ɓataaki mo mbinndunoo-mi e mon oo, mi wii on e ley makko pati nawtondiron e soɓuŋe. <sup>10</sup> Nde mbiinoo-mi non ndee, mi faandoraakino soɓuŋe wonŋe e oo doo aduna ɓee fuu, naa haasidi'en fuu naa wuyŋe fuu naa rewoŋe tooruuji fuu. So non fii worri, waajibi njalton aduna oo. <sup>11</sup> Ko njidunoo-mi wiide on, pati nawtondiron e innditortooŋo sakiike tawee yo coɓuŋo naa haasidi naa dewoowo tooruuji naa ɓo'ooŋo yimŋe naa jaroowo doro naa gujjo. Baado hono non, pati ɓaamdon e mum duu. <sup>12-13</sup> Sabi ɓe ngalaa e ley deental goonɗinŋe Laamŋo ngal ɓee, wanaa miin sarata ɓe, Laamŋo sarata ɓe. Kaa wonŋe ley deental goonɗinŋe Laamŋo ngal ɓee, onon carata dum'en. Sabi nii winndorii: «Ittee nedŋo bonŋo oo e ley mon.»\*

## 6

### *Haala gullondiral hakkunde sakiraaɓe goonɗinŋe*

<sup>1</sup> So luurral waŋii hakkunde mon, hono joomum'en cuusirta wullitaade oɓiiŋe ɓee njoppa foocciitiibe ɓee? <sup>2</sup> Tama on anndaa foocciitiibe ɓee caroyta aduna oo? Ndennoo, so onon foocciitiibe ɓee caroyta aduna oo, hono ndonkirton sarde kulle pamare dee? <sup>3</sup> Tama on anndaa enen caroyta malaa'ika'en ɓee? Sako kulle dam doo nguurndam! <sup>4</sup> Ndennoo, so luurral waŋii hakkunde mon banngal kulle aduna, ko saabii so oŋon ngullitoyoo ɓe deental goonɗinŋe ngal jataaki ɓee? <sup>5</sup> Faa njaago-ŋon mbiiru-mi non. Tama on ngalaa fay hakkilante gooto baawŋo sarde sakiraaɓe luurruŋe? <sup>6</sup> Ee, goonɗindo wullanoŋo goonɗindo bannndum, tawa to ɓe ngoonɗinaali!

<sup>7</sup> Haya, ko cardaton e mum hakkunde mon koo duu yo ayiibe bonŋo jaati. Ko saabii so on cuɓaaki muɓuŋe toɓanngŋe? Ko saabii so on cuɓaaki muɓuŋe boleede? <sup>8</sup> Kaa onon toɓnata, onon ɓolata fay sakiraaɓe mon.

<sup>9</sup> Tama on anndaa oɓiiŋe naatataa e Laamu Laamŋo oo? Pati njaayree ko'e mon: soɓuŋe e rewoŋe tooruuji e jeenoŋe e luudunkooŋe <sup>10</sup> e wuyŋe e haasidi'en e yaroŋe doro e ɓo'ooŋe yimŋe e yanoŋe, fay gooto e ɓee naatataa e Laamu Laamŋo oo. <sup>11</sup> Yoga mon laatinoke hono non, kaa jooni on lootaama on laaɓii, on nanngiraama foocciitiibe saabe innde Joomiraado men Iisaa Almasiihu, kaɓum e Ruuhu Laamŋo men oo.

### *No goonɗinŋe kaaniri teddinirde Laamŋo terde mum'en*

\* **5:12-13** Fillitagol Tawreeta 13.6; 17.7

<sup>12</sup> Odon mbiya: «Huunde fuu ana daganii kam.» Ooho, kaa wanaa fuu nafata. So goonga «huunde fuu ana daganii kam», kaa mido salii huunde fuu mara kam. <sup>13</sup> Odon mbiya: «Naamdu jey reedu, reedu jey naamdu.» Ooho, kaa Laamdo halkan di didi fuu. Terde bii-aadama tagiraaka kammari ko sobi, ko de tagiraa dee, faa de ndewa Joomiraado, Joomiraado duu hayba de. <sup>14</sup> Laamdo immintindo Joomiraado men iwde e maayde oo, immintiniran en enen duu e baawde mum. <sup>15</sup> Tama on anndaa terde mon ngoni caldi Almasiihu? Ndennoo, ana dagoo mi bama caldi Almasiihu dii mi wada dum caldi debbo coottoowo hoore mum? Abada! <sup>16</sup> Tama on anndaa piilondirdo e debbo coottoowo hoore mum fuu, laatodike e mum terde goote? Sabi ana winndii: «Be didon fuu be laatoto neddo gooto.»\* <sup>17</sup> Kaa ka66ondirdo e Joomiraado laatodike e mum ruuhu gooto. <sup>18</sup> Ndogee ko sobi! Luuttal fuu ngal neddo luutti, takkataako e terde mum. Kaa cobindo hoore mum toonii terde mum. <sup>19</sup> Tama on anndaa terde mon dee ngoni suudu Ruuhu Ceniido gondo e mon mo Laamdo hokki on oo? Wanaa onon njey ko'e mon, <sup>20</sup> sabi Laamdo soottitorii on coggu tiidudo. Ndennoo, teddiniree Laamdo terde mon dee.

## 7

### *Haala dewgal*

<sup>1</sup> Jooni kaa mido yidi jaabaade lamndi di mbinndan-don kam dii. Goonga, ana moyyi e gorko waasude bamde debbo. <sup>2</sup> Kaa pati fijirde wada, gorko fuu yo tawre debbo, debbo duu tawree gorko. <sup>3</sup> Yo gorko hokku genndum hakke gum, debbo duu hokka gorum hakke mum. <sup>4</sup> Debbo jeyaa terde mum, gorum jey de. Gorko duu hono non, jeyaa terde mum, genndum oo jey de. <sup>5</sup> Pati fay gooto e mon salanoo goddo so wanaa tawee e dow kawral mon wakkati keertaado faa kebon no jaagoro-don Laamdo. Kaa caggal dum, keddo-don wuurdude no haaniri nii pati mbaason nantaade so Ibiliisa seytoo on. <sup>6</sup> Ko kaalan-mi on doo koo, wanaa ko tilsii, mi kolludo on laawol lobbol nii. <sup>7</sup> Miin, mido yidi yimbe fuu laatoo hono am, kaa gooto fuu no Laamdo hokkiri dum: yoga hokkiraa nii enne, yoga hokkiraa nii too.

<sup>8</sup> Faade e be bamaali e be bamaaka, kapum e rewbe be worbe mum'en maayi, mido wiya worrude no am nii buri moyyude e mum'en. <sup>9</sup> Kaa so tawii be mbaawaa nantaade, be ndewla, sabi dum buri joodoraade nii tan ana maaya muuyo.

<sup>10</sup> Wonbe e dewle bee, mido yamira dum'en ndee yamiroore nde iwaali e am, iwnde e Joomiraado: debbo haanaa seerde gorum. <sup>11</sup> So taweede mo seerii oon yo heddoro non, naa duu o warta e mum. Gorko duu haanaa seerde genndum.

<sup>12</sup> Kaa wobbe bee, miin e hoore am haalanta dum'en, wanaa Joomiraado: so goondindo iisaa ana jogii debbo mo goondinaali tawee debbo oo ana yarii wondude e makko, pati o seera dum. <sup>13</sup> Naa so debbo goondindo ana dewlaa gorko mo goondinaali tawee gorko oo yarii wondude e makko, pati o seera dum. <sup>14</sup> Sabi gorko mo goondinaali oo ana la66iniree genndum, kasen duu debbo mo goondinaali oo ana la66iniree gorum. So wanaa dum, bibbe mon laatoto be anndaa Laamdo, tawee nee be seniibe. <sup>15</sup> Kaa mo goondinaali, so yidii seerde goondindo oo, yo seer. Goondindo oo kaa, so debbo so gorko, tilsinaaka e dewgal ngal, sabi Laamdo noddii en faa nguuren e jam. <sup>16</sup> Debbo

\* 6:16 Puddoode 2.24



goondindo, hono anndirtaa ada waawi hisinde gora? Gorko goondindo, hono anndirtaa ada waawi hisinde gennda?

### *No gooto fuu haani worrude no Joomiraado feccirani dum nii*

<sup>17</sup> Dum nee, yo gooto fuu wuurdu no Joomiraado feccirani dum nii, no worrunoo nde Laamdo noddii dum ndee. Dum njamir-mi deente goondinbe dee fuu. <sup>18</sup> Tawaado yo taadiido nde Laamdo noddii dum ndee, pati tewta bonnitidde ko taadaa koo. Noddaado so tawi taadaaki, pati taado. <sup>19</sup> Taadaade e waasude taadaade fuu walaa ko nafata, ko nafata dee, jokkude jamirooje Laamdo. <sup>20</sup> Yo gooto fuu heddero no worrunoo wakkati nde Laamdo noddata dum ndee. <sup>21</sup> Nde noddete-daa ndee, so tawii a diimaajo, pati dum laatane sugulla. Kaa so a hebii laawol no ndimdíraa, rimdu. <sup>22</sup> Sabi maccudo mo Joomiraado noddii, laatike coottitaado Joomiraado. Dimo noddaado duu, laatike diimaajo Almasiihu. <sup>23</sup> On coottitoraama coggu tiidudo, ndennoo pati laatee maccube yimbe. <sup>24</sup> Sakiraa6e, gooto fuu no worrunoo nde noddete ndee, yo heddero non yeeso Laamdo.

### *Haala dewlude e waasude dewlude*

<sup>25</sup> Banngal yimbe 6e ndewlaali 6ee, mi walanaa 6e yamiroore iwnde to Joomiraado, kaa mi haalan ko woni miilo am, miin mo yurmeende Joomiraado wadi koolniido oo: <sup>26</sup> saabe torraaji jooni dii, mido miila neddo hedderoo no worri nii 6uri moyyude e mum. <sup>27</sup> So dewgal won hakkunde maa e debbo, pati tewtaa tayude ngal. So dewgal walaa hakkunde maa e debbo, pati tewtaa debbo. <sup>28</sup> Kaa so a 6amii duu, a luuttaali. Mboomri duu so 6amaama, luuttaali. Kaa naatu6e e dewle 6ee 6illoto e nguurdam mum'en, mi yidanaa on dum. <sup>29</sup> Sakiraa6e, ko kaalunoo-mi koo annii: wakkati oo 6adike. Jooni, yo 6am6e 6ee mba'u no 6amaali nii, <sup>30</sup> woyoo6e mba'a no mboyaali nii, weltiibe mba'a no mbeltaaki nii, soodo6e mba'a no njogaaki nii, <sup>31</sup> he6oo6e e oo doo aduna mba'a no meedaali hebude e makko nii. Sabi oo doo aduna no wa'i nii, annii yawta.

<sup>32</sup> Ko njidu-mi dee, ceerton e sugulla. Mo dewlaali, hakkille mum to kulle Joomiraado yahata, ko welata Joomiraado tewtata. <sup>33</sup> Kaa dewludo, hakkille mum to kulle aduna yahata, ko welata genndum tewtata, <sup>34</sup> joomum fecciima. Hono non, mo 6amaaka, kaɽum e mboomri, hakkille mum to kulle Joomiraado yahata, yalla terde mum e yonki mum fuu ana cenoo. Kaa 6amaado, hakkille mum to kulle aduna yahata, ko welata gorum tewtata. <sup>35</sup> Faa nafa on mbiiru-mi non, wanaa faa tonnga on. Mido yidi nguurdon no kaan-don wurdude nii, ka66o-don e Joomiraado, tawa hakkillaaji mon peccaaki.

<sup>36</sup> So muuyo mawnii e neddo sanne faa huli pati ronka nantaade e cabaado mum, miila dewgal ngal ana haani timmineede, yo ngal timminee no joomum yidiri nii, luuttaali. <sup>37</sup> Kaa so gorko fellisii e 6ernde mum fuu tawa tilsinaaka, faa 6ami anniya huurtintaa cabaado mum, so ana waawi nantaade, wadii ko moyyi. <sup>38</sup> E ley dum, kuurtindo cabaado mum wadii ko moyyi, kaa mo huurtinaali cabaado mum 6uri wadude ko moyyi.

<sup>39</sup> Debbo 6amaado yo ka66aado so nii gorum ana heddi wuurde. Kaa so goriiko oo yawtii, mo o yidi fuu ana waawi 6amde mo, yo tawe e laawol Joomiraado ngol tan. <sup>40</sup> Dum nee, so o heddiima e ngoortaalaaku o 6urata welde hoore. Dum woni miilo am, kasen duu mido miila miin duu, mi hebii Ruuhu Laamdo.

## 8

*Haala tew cakkanaado tooruuji*

<sup>1</sup> Jooni mido jaaboo lamndal mon banngal tew cakkanaado tooruuji dhi. Eden tayori «en fuu eden njogii anndal». «Anndal» nee waddan mawninkinaare, jilli ngoni ko nabata deental goondin6e ngal yeeso. <sup>2</sup> Neddo fuu miiludo ana anndi huunde, anndaa tafon no haani anndirde. <sup>3</sup> Kaa neddo fuu jiddo Laamdo, Laamdo ana anndi dum.

<sup>4</sup> Ndennoo e banngal naamugol tew cakkanaado tooruuji, eden anndi «so goonga, ley aduna, tooru wanaa fay huunde», «Laamdo walaa so wanaa gooto oo». <sup>5</sup> Sabi fay so ko yim6e mbiyata rewetee6e koo ana ngoodi dow kammu e dow leydi – so goonga, wiyetee6e «rewetee6e» e «joomiraabe» keewii – <sup>6</sup> enen, banngal men, Laamdo gooto tan woodi, Baabiraado tagudo huunde fuu mo nguuran-den oo. Kasen Joomiraado gooto tan woodi, Iisaa Almasiihu mo huunde fuu laatorii oo, mo kefir-den nguurdam oo.

<sup>7</sup> Kaa wanaa yim6e fuu paami dum tafon. Yogaa6e woownoo6e rewde tooruuji, faa hannde e6e naamama tew cakkanaado tooruuji e miilde tew oo tooruuji jaati njei dum. Dum wadata so e6e miila 6e co6an, tawi 6e mbaawaa seenndude goonga e pene. <sup>8</sup> Tayoral, naamdu 6attintaa en Laamdo. So en naamii, nafataa en fay huunde, so en naamali, bonnantaa en fay huunde. <sup>9</sup> Goonga, en ndokkaama laawol faa mbaawon naamde huunde fuu. Kaa ndeentee pati ngol laawol li6a 6e jii6aali e ley goondinal 6ee. <sup>10</sup> Sabi aan annudoo goonga oo, so lo'udo yii ma ada naamama ley suudu tooru, hakkille mum hokkataa dum naamde tew cakkanaado tooruuji ka6um duu naa? <sup>11</sup> Hono non, oon sakiike men lo'udo mo Almasiihu maayani oo, halkortoo saabe anndal maa ngal. <sup>12</sup> So on toojirii non sakiraabe 6e jii6aali e ley goondinal 6ee, so on njii6ii hakkillaaji ma66e, on luuttii Almasiihu. <sup>13</sup> Dum nee, so tawii naamdu ana li6a sakiike am, mi naamataa kasen tew abada, pati mi li6a sakiike am.

## 9

*Haala ko nelaado foti wadaneede*

<sup>1</sup> Mi jeyaa hoore am naa? Mi laataaki nelaado naa? Mi yiyaali Joomiraado men Iisaa naa? Goondinal mon, wanaa e ley golle mo ngollan-mi Joomiraado oo iwi naa? <sup>2</sup> Fay so banngal yogaa6e mi wanaa nelaado, banngal mon onon mi nelaado, sabi ko ngoondin-don Iisaa koo ana holla Joomiraado neli kam jaati.

<sup>3</sup> Anni ko mbiyan-mi feloo6e kam 6ee: <sup>4</sup> min kaandaa e hebude naamdu e yardu e ley golle amen naa? <sup>5</sup> Min kaandaa e na6orde rew6e amen no nelaabe wob6e 6ee nii naa? No mijiraabe Joomiraado 6ee nii, ka6um e Piyeer? <sup>6</sup> Naa miin e Barnabas tan ngoni haan6e gollude faa ke6a no nguurda? <sup>7</sup> Homo e mon yii sordaasi joboowo hoore mum? Homo woni demoowo mo naamataa ko hetti e ngesa mum? Homo woni duroowo mo yarataa kosam sewre mum?

<sup>8</sup> Ko kaalan-mi koo, e dow miilooji yim6e tan fawii naa? Sariya oo yaamiraali dum naa? <sup>9</sup> Sabi nii winndiraa e Sariya Muusaa: «A hadataa ngaari aloori tappoori gawri muudude gawri.»\* Ga'i alooji dhi tan ngoni ko Laamdo wattani hakkille naa? <sup>10</sup> Tama wanaa saabe men o haalirta? Goonga, enen

\* 9:9 Fillitagol Tawreeta 25.4

mbinndanaa ngol konngol, sabi demoowo e tappoowo fuu ana ngollira jikke he6ude ngedu mum'en. <sup>11</sup> Min aawii e mon kulle ruuhunkooje. So min kettii e mon kulle adunankooje, yalla miden kaawanee dum naa? <sup>12</sup> So wo66e ana kaandi e he6ude jaamdu e junngo mon, wanaa minen 6uri haandude hen?

Kaa minen, min njokkaali ngol laawol. Miden mujaa huunde fuu pati min kada Kabaaru Lobbo haala Almasiihu oo yaade yeeso. <sup>13</sup> Tama on anndaa golloo6e e ley Suudu Dewal Mawndu 6ee ana nguuri e kulle de yim6e ndokkata Suudu nduu dee? Tama on anndaa halfinaa6e golle ittirde sadaka 6ee ana ke6a ngedu mum'en e mayre? <sup>14</sup> Hono non, Joomiraado yamirii waajotoo6e Kabaaru Lobbo 6ee nguura e Kabaaru Lobbo oo.

<sup>15</sup> Kaa miin, mi jokkaali hen fay laawol gooto, kasen duu mi winndiraali dum faa mi he6a huunde. Maayde burani kam jaagaade huunde. Sabi dum woni ko mantortoo-mi, mi jabataa fay gooto itta kam e majjum duu. <sup>16</sup> Sabi waajaade Kabaaru Lobbo oo manataa kam, dum tilsudum kam. Bone woodanii kam so mi waajaaki Kabaaru Lobbo oo! <sup>17</sup> Sinndo mi golliriino oo golle saabe mido fellisinnoo dum miin e hoore am, nden kaa mi he6anno njo6di. Kaa laatike tilsere ngolliran-moo-mi, mo golle mo kalfinaa-mi. <sup>18</sup> Ndennoo kodum woni njo6di am? Njo6di am, dum woni seyo am ko mbaajotoo-mi Kabaaru Lobbo meere meere koo, tawti e ko mi lamndataako ko waajotoo6e Kabaaru Lobbo oo 6ee poti he6ude.

<sup>19</sup> Mi walaa e margal fay gooto, kaa mi wadii hoore am maccudo yim6e fuu, yalla mido he6a ko 6uri heewde e ma66e. <sup>20</sup> E ley Yahuudiyankoo6e, mi wadii hoore am Yahuudiyanke, yalla mido he6a 6e. E ley jokku6e Sariya Muusaa, mi wadii hoore am jokku6e Sariya Muusaa, yalla mido he6a 6e, fay so wanaa waajibi mi jokka Sariya oo. <sup>21</sup> E ley 6e ngalaa e Sariya Muusaa 6ee, mi wadii hoore am mo walaa e Sariya oo, yalla mido he6a 6e, fay so miin e hoore am, mi waasaali taweede e sariya Laamdo oo, sabi ley sariya Almasiihu ngonmi. <sup>22</sup> E ley lo'ube, mi wadii hoore am mi lo'udo, yalla mido he6a 6e. Walaa fuu no mi wadaali hoore am kammari yim6e fuu, yalla ana dajaa 6e kisinmi. <sup>23</sup> Ko ngadan-mi fuu, mi wadiran dum kammari Kabaaru Lobbo oo yalla mido he6a hen ngedu.

<sup>24</sup> Tama on anndaa dadondirtee6e 6ee fuu yo dogoo6e, kaa gooto tan he6ata deesewal? Ndennoo, ndogiree he6ude ngal. <sup>25</sup> Lanndinantoo6e ndaggu fuu, mbiiran terde mum'en biirugol cattungol. Ko 6e ngadirta dum dee, faa 6e ke6a deesewal ngal duumataako. Enen nee, faa ke6en deesewal duumotoongal. <sup>26</sup> Saabe majjum mi dogiraali meere, mi wa'aali no ka6oowo e henndu nii. <sup>27</sup> Kaa mido biira terde am no naawiri mido jaalii de, yalla miin baajotoodo wo66e Kabaaru Lobbo oo, pati mi waasa yarraneede.

## 10

### *Haala waasude rewde tooruuji*

<sup>1</sup> Sakiraa6e, mido yidi paamon faa gasa ko hewtii maamiraabe men jaamanu Muusaa koo. Be fuu 6e ngoniino e ley luurde ndee, 6e fuu duu 6e lummbiino geeci oo. <sup>2</sup> E ley ha66agol ma66e e Muusaa 6e fuu 6e ke6ii lootogal batisima e ley luurde ndee, kaajum e ley geeci oo. <sup>3</sup> Kasen duu 6e fuu 6e jaamdii jaamdu wooturu ruuhunkooru, <sup>4</sup> 6e fuu 6e njardii njaram ngootam ruuhunkoojam, sabi e6e njarannoo dam e haayre ruuhunkoore jokkunoonde e ma66e ndee. Nden haayre woni Almasiihu. <sup>5</sup> Kaa ko 6uri

heewde e maŋŋe, Laamdo welaaka dum'en. Dum saabii so 6e kalkii ley ladde jeereende ndee.

<sup>6</sup> Dum fuu edum holla en pati njokken gidaaŋe yonki bonde no maŋŋe nii. <sup>7</sup> Pati laatee rewooŋe tooruuji no yoga maŋŋe nii, hono no winndorii nii: «Yimbe 6ee njoodiima ana jaama ana njara, kasen immii ana mboma.»\* <sup>8</sup> Pati naaten e fijirde no yogaabe e maŋŋe naatiri e fijirde nii. Dum saabii so ujunaaji noogay e taton neddo maayi jaanne wootere. <sup>9</sup> Pati itten koro Almasiihu no yoga maŋŋe nii. Dum saabii so bolle kalki dum'en. <sup>10</sup> Pati nermitee no yoga maŋŋe nii. Dum saabii so malaa'ika baroowo oo halki 6e. <sup>11</sup> Dum fuu wadii yalla ana laatanoo en misaalu, dum winndiraama faa dum waajoo en, enen wonŋe e cakite jamaanu 6ee. <sup>12</sup> Dum nee, miiloowo ana darii fuu, wada hakkille pati boŋŋoo e leydi. <sup>13</sup> Walaa torra ittoowa koro hebuka on ka hebaali 6i6ee aadama. Laamdo yo koolniido, o dalataa torra koroowa burka on semmbe fawee e mon. Torra fuu koroowa on, o hokkan on no mbaawron mujude dum, o hokkan on laawol no njaltiron e mum.

<sup>14</sup> Saabe dum, sakiraabe am horsuŋe, ngoddee dewal tooruuji. <sup>15</sup> Mido haalirana on hono no on hakkilante'en nii, caree onon e ko'e mon ko mbii-mi koo. <sup>16</sup> Horde hiraande seniinde nde njettaten Laamdo kammari mum ndee, so en njarii nde, tama en ndeentaali e yiyam Almasiihu dam? Buuru mo tayaten oo, so en jaamii mo, tama en ndeentaali e terde Almasiihu dee? <sup>17</sup> Tawi buuru oo yo gooto, enen duu, enen e heewde fuu, en terde goote, sabi eden njogii ngedu e oon buuru gooto. <sup>18</sup> Taykee lepol Israa'iila ngol: tama yimbe maŋŋe jaamoobe sadakaaji 6ee ndeentaali e Laamdo gadanaado ittirde sadaka ndee oo? <sup>19</sup> Mido yidi wiide tew cakkanaado tooruuji won ko woni naa? Naa tooru e hoore mum won ko woni? <sup>20</sup> Walaa! Ko njidumi wiide dee, ko heeferŋe 6ee cakkotoo koo, sakkete seydaani'en, wanaa Laamdo. Mi yidaa ndeenton e seydaani'en. <sup>21</sup> On mbaawaa yarde e horde Joomiraado ndee njaron kasen e horde seydaani'en, on mbaawaa jaamde e la'al Joomiraado ngal jaamon kasen e la'al seydaani'en 6ee. <sup>22</sup> Naa iirtude tikkere Joomiraado njid-den? Naa en miilii eden buri mo semmbe?

### *Haala ngadiiree huunde fuu faa Laamdo teddinee*

<sup>23</sup> Mbii-don: «Huunde fuu ana dagii.» Ooho, kaa wanaa fuu nafata. So goonga, «huunde fuu ana dagii», kaa wanaa fuu naŋata deental goondinŋe ngal yeeso. <sup>24</sup> Pati fay gooto laato hammadi haaje mum tan, ndaarta nafaa wobŋe 6ee duu. <sup>25</sup> Tew cootteteedo luumo fuu, odon mbaawi jaamirde dum hakkillaaji di jinjataa on tawa on lamndaaki yalla dum tew cakkanaado tooruuji naa wanaa. <sup>26</sup> Sabi «leydi e ko woni e mum fuu Joomiraado woodani.»† <sup>27</sup> So neddo mo goondinaali noddii on, on njaŋii nootaade, jaamon ko ndokke-don fuu, tawa hakkillaaji mon jinjataa on. <sup>28</sup> Kaa so won biido on: «Dum ko sakkanaa tooruuji», nden, pati jaamee dum saabe biido non oo e saabe hakkille mum jinjoowo dum. <sup>29</sup> Wanaa ko wartata e hakkillaaji mon onon kaalan-mi doo, ko wartata e hakkille biido non oo kaalan-mi.

Kaa fotaa ko hakkille neddo goddo sara ndimaaku am. <sup>30</sup> So mido yetta Laamdo e dow ko jaaman-mi, ko wadi so mido bonkee e nduun jaamdu ndu njettu-mi Laamdo kammari mum?

<sup>31</sup> Ndennoo, so on jaaman, so on njaran naa ko ngadaton fuu, ngadiiree dum faa Laamdo teddinee. <sup>32</sup> Pati laatanee fay gooto fergitere, wanaa Yahuudiyankoobe wanaa 6e nganaa Yahuudiyankoobe wanaa deental goondinŋe

\* 10:7 Pergu 32.6 † 10:26 Jabuura 24.1

Laamdo ngal. <sup>33</sup> Ngolliree no am nii, sabi mido tewta ko welata yimbe fuu e dow huunde fuu, tawee mi tewtaali nafaa am miin tan, ko nafata heewbe tewtan-mi, yalla ebe kisinee.

## 11

<sup>1</sup> Nembee kam no nemmbiran-mi Almasiihu nii.

### *Haala banngal soomugol hoore*

<sup>2</sup> Mido yetta on ko micciti-don kam e huunde fuu koo, e ko njokku-don waajuuji di mbaajii-mi on dii koo. <sup>3</sup> Kaa noo, mido yidi paamon Almasiihu woni hooreejo gorko fuu, gorko woni hooreejo debbo, kasen duu Laamdo woni hooreejo Almasiihu. <sup>4</sup> Ndennoo, gorko fuu kippiido kufina so ana duwoo naa so ana haalta konngol ngol Laamdo loowi e mum ngol, hoyonii hooreejo mum oo. <sup>5</sup> Kaa debbo fuu mo soomaaki so ana duwoo naa so ana haalta konngol ngol Laamdo loowi e mum ngol, hoyonii hooreejo mum oo, sabi omo wa'i hono no o labiido nii. <sup>6</sup> Sabi so debbo soomaali hoore mum, yo mesu sukundu mum. Kaa so nii mesude hoore mum naa lafude nde ana yaannoo debbo, yo soomu hoore mum. <sup>7</sup> Gorko noo haanaa hippaade kufina, sabi yo mbaadi Laamdo, katum e darja mum. Kaa debbo yo darja gorko. <sup>8</sup> Sabi wanaa gorko ittaa e debbo, debbo ittaa e gorko. <sup>9</sup> Wanaa gorko taganaa debbo, debbo taganaa gorko. <sup>10</sup> Saabe dum ana wajibii e debbo soomude e hoore mum taagumansa baawde saabe malaa'ika'en. <sup>11</sup> Kaa dum e taweede, e ley ha66agol men e Joomiraado, debbo ana ha66ii e gorko, gorko duu ana ha66ii e debbo. <sup>12</sup> Sabi no debbo ittiraa e gorko nii, hono non debbo duu rimirta gorko. Kaa dum fuu, to Laamdo dum iwi. <sup>13</sup> Caree onon e ko'e mon: yalla ana njardi e debbo rewa Laamdo tawa soomaaki? <sup>14</sup> Wanaa neesu oo e hoore mum ana anndina on sukundu juutundu ana yaaginii e gorko, <sup>15</sup> kaa e debbo, yo darja? Sabi o hokkiraama sukundu juutundu yalla ana sudda hoore ndee. <sup>16</sup> Muuydo yeddude dum fuu yo anndu en ngalaa oon aada, wanaa minen, wanaa deente goondinbe Laamdo dee.

### *Haala hiraande seniinde*

<sup>17</sup> Won ko njidu-mi yamirde on kasen, haala no kawritirton. Haala majjum mi waawaa yettude on, sabi kawrite mon dee nabataa on yeeso, to boni de nabataa. <sup>18</sup> Ko adii fuu, mi nani so on kawritii, luurral ana hakkunde mon, kasen duu won ko ngoondin-mi hen. <sup>19</sup> Ana tilsii pelle-pelle ngada hakkunde mon, yalla hoolniibe jaati wonbe e ley mon bee ana annditee. <sup>20</sup> So on kawritii e nokku gooto, wanaa hiraande Joomiraado ndee jaamaton. <sup>21</sup> Sabi gooto gooto mon fuu hejoto jaamde hiraande mum faa bee doo njolba, bee too cigira. <sup>22</sup> Tama on ngalaa cuudi do kaan-don jaamde e yarde? Naa on yawbe deental goondinbe Laamdo ngal? Naa odon njidi hoynude be ngalaa ko njogii bee? Ko mbiyan-mi on? Mi yetta on naa? Mi waawataa yettude on e dum.

<sup>23</sup> Sabi miin, e Joomiraado kebu-mi ko njottin-mi on koo: e ley jemma mo Joomiraado men Iisaa jammaa e mum oo, o bami buuru, <sup>24</sup> o yetti Laamdo, o heli buuru oo, o wii: «Dum yo terde am keliraade kammari mon. Ngadee dum faa micciti-don kam.» <sup>25</sup> Hono nii, nde be tilii hiraande ndee, o bami horde peguujam, o wii: «Ndee doo horde woni aadi keyri tabintiniraandi yiyam am. Faa nde njaraton fuu, micciti-don kam.» <sup>26</sup> Sabi nde jaamaton oon buuru e nde njaraton nden horde peguujam fuu, odon mbaajoo haala maayde Joomiraado faa nde o warti.

<sup>27</sup> Dum nee, neddo fuu naamirɔdo buuru Joomiraado no haanaa, yardi horde makko no haanaa, oon luuttii terde Joomiraado dee e yiyam makko dam fuu. <sup>28</sup> Ndennoo, gooto fuu yo yeewto hoore mum fade mum naamde oon buuru naa yarde nden horde. <sup>29</sup> Sabi neddo fuu naamdo buuru oo so yari horde ndee, so miilaaki dum terde Joomiraado dee, jukkete saabe ko naami koo e ko yari koo. <sup>30</sup> Dum saabii so jawbe e lo'ube ana keewi e mon, kasen duu won yawtuŋe. <sup>31</sup> Sinndo eden yeewtonoo ko'e men, en yeewtatanooke. <sup>32</sup> Kaa Joomiraado ana sara en faa ne'a en, pati njukkide-ŋen e aduna oo.

<sup>33</sup> Ndennoo sakiraabe am, so odon kawrita faa naamdon hiraande Joomiraado ndee, ndoomondiree. <sup>34</sup> So tawii won jolbuɔdo e mon, yo naamu to suudu mum too, pati kawrite mon dee laatanoo on jukkungo. Kaa ko heddi koo mi biltan dum so mi warii.

## 12

### *Haala dokke Ruuhu Ceniido*

<sup>1</sup> Haala dokke de Ruuhu Ceniido hokkata dee, sakiraabe, mido yidi paamon de faa gasa. <sup>2</sup> Nde ngonno-ŋon heeferbe ndee, odon anndi no tooruuji muumi dii majjiniri on. <sup>3</sup> Dum wadi so njiɔu-mi paamon dum doo: fay gooto waawaa wiide «lisaa yo kudaado» so Ruuhu Laamdo ana e mum, kasen duu fay gooto waawaa wiide «lisaa yo Joomiraado» so Ruuhu Ceniido walaa e mum.

<sup>4</sup> Dokke de Ruuhu Ceniido hokkata en dee ana ceerti sifaaji, kaa Ruuhu oo yo gooto. <sup>5</sup> Gollanoobe deental bee ana ceerti sifaaji, kaa Joomiraado oo yo gooto. <sup>6</sup> Gollleeji ana ceerti sifaaji, kaa Laamdo gooto oo kaɔum gollata di fuu ley yimbe bee fuu. <sup>7</sup> Ruuhu Laamdo oo ana banngina e gooto fuu dokkal nafaawal deental ngal fuu. <sup>8</sup> O hokka oodoo waaju kebbinaado hakkilantaaku, o hokka ootoo waaju kebbinaado anndal. <sup>9</sup> Kanko Ruuhu gooto oo hokkata oodoo goondinal, ootoo sellinde jawbe. <sup>10</sup> O hokka oodoo wadude kaayde, ootoo haaltude konngol ngol Laamdo loowi e mum ngol, oodoo seenndude ko woni seydaani'en e Ruuhu goonga oo, ootoo haalirde demde Ruuhu Ceniido, o hokka goddo duu maandinde deen demde. <sup>11</sup> Ruuhu gooto oo tan gollata dum fuu, feccirana gooto fuu dokkal ngal muuyi.

### *Haala caldi keewdi di neddo gooto*

<sup>12</sup> E ley dum, no neddo gooto jogorii caldi keewdi nii, e no caldi dii e heewde fuu laatorii neddo gooto nii, hono non Almasiihu duu wa'i. <sup>13</sup> Sabi en fuu en mbatisiraamaRuuhu gooto faa laato-ŋen neddo gooto, so en Yahuudiyankooŋe naa so en nganaa Yahuudiyankooŋe, so en rimbe naa so en riimaybe, kasen duu en fuu en njarnaama Ruuhu gooto oo.

<sup>14</sup> Neddo wanaa salndu wooturu, yo caldi keewdi. <sup>15</sup> So koyngal wii: «Nde mi wanaa junngo, mi jeyaaka e neddo oo», dum hadataa ngal jeyeede e makko. <sup>16</sup> Naa so nowru wii: «Nde mi wanaa yitere, mi jeyaaka e neddo oo», dum hadataa ndu jeyeede e makko. <sup>17</sup> So caldi dii fuu yo gite, hono neddo oo nanirta? Naa so di fuu di noppi, hono neddo oo maatirta ko uurata e ko luubata? <sup>18</sup> Kaa noo, Laamdo reentini caldi dii fuu e neddo gooto hono no muuyiri nii. <sup>19</sup> Salndu wooturu laataaako neddo. <sup>20</sup> Ndennoo, caldi dii ana keewi, kaa neddo oo yo gooto. <sup>21</sup> Yitere waawaa wiide junngo: «Haaje am walaa e maa.» Hoore duu waawaa wiide koyde: «Haaje am walaa e mon.» <sup>22</sup> Kaa noo, caldi neddo nanndufi e burdi lo'ude dii, diin ngoni kasindinaadi sanne. <sup>23</sup> Di nanngir-ŋen burdi jaasude dii, diin bur-ŋen teddinde. Burdi gaccinaade dii, diin bur-ŋen suudude, <sup>24</sup> sabi caldi men goddi dii kasindinaa

e suudeede. Laamdo reentini caldi fuu, hokki caldi lo'udi dii teddeengal, <sup>25</sup> pati ceeraagu wada e neddo oo, yalla caldi dii fuu ana tiidondira. <sup>26</sup> So tawii salndu wooturu naawii, goddi dii fuu naawdan e mum. So salndu wooturu teddinaama, goddi dii fuu mbeltidoto e mum.

<sup>27</sup> Onon, on fuu on terde Almasiihu, gooto e mon fuu yo salndu e caldi makko dii. <sup>28</sup> Nii Laamdo darniri deental goondinŋe ngal: ko adii fuu o joyyini nelaaŋe, o jokkini hen haaltoŋe konngol ngol Laamdo loowi e mum'en, o jokkintini hen janninoŋe, caggal dum, wadoŋe kaayde e sellinoŋe jawŋe e faabotoŋe e ardotoŋe, kapum e haaliroŋe demde Ruuhu. <sup>29</sup> Yimbe fuu yo nelaaŋe naa? Naa haaltoŋe konngol ngol Laamdo loowi e mum'en? Naa janninoŋe? Yimbe fuu ngadata kaayde naa? <sup>30</sup> Yimbe fuu ndokkaa sellinde jawŋe naa? Naa haalirde demde Ruuhu? Naa maandinde deen demde? <sup>31</sup> Hono non, tiinne, poodanee dokke burde heewde nafaa dee.

Kaa jooni mi hollan on laawol burngol fuu moyyude ngol.

## 13

### *Haala jilli*

<sup>1</sup> So kaalir-mi demde yimbe e demde malaa'ika'en, kaa fuu so jilli ngalaa e am, mi lennguru senyooru naa mi mbaggu dinndoowo tan. <sup>2</sup> So Laamdo loowii kam konngol mum mi annda sirriiji fuu e annde fuu, naa so tawraa-mi goondinal faa mi sottina baamle kaaye, kaa fuu so jilli ngalaa e am, mi wanaa fay huunde. <sup>3</sup> So ndokku-mi jawdi am fuu misikiina'en naa so ndokkitir-mi tew am duppee, kaa fuu so jilli ngalaa e am, nafataa kam fay huunde.

<sup>4</sup> Jilli ana njogii mujal, ana njogii moyyuki. Di ngaldaa e haasidaaku, di ngaldaa e haawtaare, mawninkinaare duu waldaa e majji. <sup>5</sup> Jilli ngaddataa ko yaannii, nganaa hammadi haaje mum, edi caloo metti, di caawataa rikke. <sup>6</sup> Jilli kuyantaa ojaare, goonga di kuyanta. <sup>7</sup> Jilli ana njaafoo fuu, ana kooloo fuu, ana njoonndoroo fuu, ana mujal fuu.

<sup>8</sup> Jilli mbonataa abada. Haaltude ko Laamdo loowi e men koo ana timma, demde ana timma, anndal ana timma. <sup>9</sup> Sabi anndal men ana jaki, looweede men konngol Laamdo ana jaki, <sup>10</sup> kaa so ko hi66i koo warii, ko jaki koo fuu wittan. <sup>11</sup> Nde mi cukalel ndee, no cukalel haaldata nii kaaldan-mi, no cukalel miilortoo nii miilortoo-mi, no cukalel yiirata nii njiiran-mi. Kaa ko mawnu-mi koo, mi seerii e golle cukaaku. <sup>12</sup> Jooni en njiyataa kulle dee faa laa6a, ko wa'i hono no timtorgal ni66ungal nii njiiraten. Kaa wakkati waran en njiiran de gite men jaati. Jooni anndal am hi66aali, kaa wakkati waran nde anndan-mi faa hi66a, no Laamdo anndiri kam faa hi66i nii.

<sup>13</sup> Ndennoo, kulle tati ngoni duumotoode: goondinal e jikke e jilli. Kaa jilli buri de fuu teddude.

## 14

### *Haala dokke Ruuhu Ceniido*

<sup>1</sup> Ndennoo, poodanee jilli no mbaawru-don fuu, tewton kasen dokke Ruuhu Ceniido dee. Ko bur-don fuu haande tewtude e majje, haaltude konngol ngol Laamdo loowi e mon ngol. <sup>2</sup> Sabi kaaliroowo demde Ruuhu e Laamdo haaldata, wanaa e yimbe. Sabi fay gooto faamataa ko joomum haalata, Ruuhu oo hokkata joomum haalde goongaaji Laamdo teddufi cuudaadi dii. <sup>3</sup> Kaa loowaado konngol Laamdo oo, yimbe haalanta, faa na6a dum'en yeeso e ley goondinal, hokka dum'en semmbe, buu6ina berde mum'en. <sup>4</sup> Kaaliroowo



demde Ruuhu, hoore mum nabata yeeso, loowaado konngol Laamdo oo noo, deental goondinbe nabata yeeso. <sup>5</sup> Mido yidi kaaliron demde Ruuhu on fuu, kaa ko burani kam, kaalton konngol ngol Laamdo loowi e mon ngol. Sabi kaaltoowo konngol ngol Laamdo loowi e mum buri kaaliroowo demde Ruuhu, so wanaa tawa neddo ana waawi maandinde, yalla deental goondinbe ngal ana yaara yeeso.

<sup>6</sup> Ndennoo sakiraaŋe, so mi wariino to mon mi haalirananno on demde Ruuhu, so haala am waddanaalino on ko Laamdo bannginani kam koo, naa anndal, naa konngol ngol Laamdo loowi kam ngol, naa waaju, kodum dum fuu dum nafata on? <sup>7</sup> Tayko-den kaaki wanngiyaare hono sereendu naa hoddu. So di piyaaka faa laaŋa, hono annditirten ko sereendu nduu fiyata naa ko hoddu nduu hodata? <sup>8</sup> Naa so puufoowo buutatal wolde fuufaali faa laaŋa, homo lanndinantoo wolde ndee? <sup>9</sup> Hono non, onon duu, so on njottinirii kabaaru oo demde Ruuhu tawa ko famminii fuu walaa hen, hono paamirte-don? On tippike haala mon! <sup>10</sup> No demde dee keewiri e no ceertiri e aduna oo nii fuu, walaa haala ka nanataake hen. <sup>11</sup> Kaa so neddo haaldii e am demngal ngal mi nanataa, mi laatike janano mum, laatike janano am. <sup>12</sup> Hono non, onon duu e ley foodanagol mon dokke Ruuhu dee, tewtee dokke naŋooje deental goondinbe ngal yeeso dee, tewtee de faa sanne.

<sup>13</sup> Dum nee, kaaliroowo demde Ruuhu fuu jaagoo Laamdo waawde maandinde de. <sup>14</sup> Sabi so mido jaagoroo Laamdo demde Ruuhu, goonga, yonki am ana e duwaawu, kaa mi faamataa miin e hoore am. <sup>15</sup> Ndennoo, hono ngadan-mi? Mi jaagorto yonki am, mi jaagorto hakkille am. Mi yimiran yonki am, mi yimiran hakkille am. <sup>16</sup> So wanaa dum, so a yettirii Laamdo demde Ruuhu tan, hono tawaado ton mo woowaa dum waawirta wiide «Aamiina» e yettugol maa ngol? Sabi joomum nanataa ko kaalataa koo. <sup>17</sup> Fay so yettugol maa ngol ana woodi sanne, ngol nafataa joomum. <sup>18</sup> Mido yetta Laamdo, ko bur-mi on on fuu heewde haalirde demde Ruuhu koo. <sup>19</sup> Kaa e ley deental goondinbe, haalde konngi joy pamminiidi baajotoodi heddiibe bee, burani kam haalirde konngi ujunaaji ujunaaji demde Ruuhu.

<sup>20</sup> Sakiraaŋe, pati laatee 6e ngalaa hakkille no cukaloy nii. Laatee cukaloy banngal bone, kaa laatee baaliki'en banngal hakkille. <sup>21</sup> Nii winndorii e Sariya:

«Yimbe 6e demde godde,  
 kapum e kundude wobbe  
 kaaliranani-mi yimbe am 6ee.

Dum fuu e taweede,

6e kettintaako kam.»\*

Hono non Joomiraado wiiri.

<sup>22</sup> Hono non, demde Ruuhu dee yo maande do 6e ngoondinaali 6ee, kaa do goondinbe 6ee, wanaa non worri. Haaltude konngol ngol Laamdo loowi e mum duu yo maande do goondinbe 6ee, kaa do 6e ngoondinaali 6ee, wanaa non worri. <sup>23</sup> Ndennoo, so yimbe deental goondinbe ngal fuu njoodiima, so 6e fuu 6e naatii e haalirde demde Ruuhu, so yimbe 6e mboowaa dum naa 6e ngoondinaali ngarii, joomum'en mbiyataa on haanduŋe naa? <sup>24</sup> Naa so gooto e been yimbe warii, tawii yimbe fuu ana kaalta konngol ngol Laamdo loowi e mum'en ngol, ko o nanata koo fuu ana fammina mo luutti makko, ana sara mo duu, <sup>25</sup> sirriiji 6ernde makko bannginee, o diccoo o sujidana Laamdo, o wiya: «So goonga nii, Laamdo ana wondi e mon.»

\* 14:21 Esaaya 28.11-12



### *No deental goondin6e haani worrude*

<sup>26</sup> Ndennoo sakiraa6e, hono wadatee? So on kawritii, dokkaa6o yimre e dokkaa6o janngingol e dokkaa6o ko Laam6o 6annginani d6m e dokkaa6o haalirde dem6e Ruuhu e dokkaa6o maandinde 6e, fuu yo wadire faa na6a deental goondin6e ngal yeeso. <sup>27</sup> So dem6e Ruuhu kaalirtee, di6on naa taton so heewii kaani wadude d6m, gooto fuu e wakkati mum. Yo gooto mon maandin. <sup>28</sup> Kaa so maandinoowo walaa, joomum deyyinoo e ley deental ngal, gunndoo e ley 6ernde mum, haalda e Laam6o. <sup>29</sup> Di6on naa taton kaalta konngol ngol Laam6o loowi e mum'en, heddi6e 6ee cara haala ma66e kaa. <sup>30</sup> Kaa so won ko Laam6o 6annginani gooto e joodi6e 6ee, yo kaaloowo arano oo deyyino. <sup>31</sup> Sabi on fuu, o6on mbaawi haaltude konngol ngol Laam6o loowi e mon ngol, tawa gooto gooto kaaldaton, yalla deental ngal fuu ana he6a anndal e cuusal. <sup>32</sup> Haalto6e konngol ngol Laam6o loowi e mum'en 6ee ana poti waawde jogaade konngol mum'en ngol, <sup>33</sup> sabi Laam6o wadataa ko jii6ata kawrital, o Laam6o gaddoowo jam.

No worri e deente seni6e dee fuu nii, <sup>34</sup> yo rew6e ndeyyino ley deente dee, sabi 6e ndu6anaaka haalde ley hen. Yo 6e dowtoro no sariya oo wiiri nii. <sup>35</sup> So tawii won ko 6e nji6i faamtiinaade, yo 6e accu faa 6e koota, 6e lamndoo jom'en cuudi ma66e. Sabi konngol debbo nanee ley deental goondin6e ana yaaginii. <sup>36</sup> Naa o6on miila konngol Laam6o ngol to mon iwi? Naa onon tan ke6i ngol? <sup>37</sup> Ned6o fuu miiludo ana waawi haaltude konngol ngol Laam6o loowi e mum ngol naa miiludo yo ke6udo Ruuhu Ceni6o, ana haani annditidde ko mbinndan-mi faade e mon koo yo yamiroore joomiraa6o. <sup>38</sup> Mo annditaali d6m fuu, Laam6o annditataa joomum. <sup>39</sup> Ndennoo sakiraa6e, poodanee looweede konngol Laam6o, kasen duu pati ka6ee dem6e Ruuhu haalireede. <sup>40</sup> Kaa huunde fuu yo wadire no haaniri, tawee jii6aaki.

## 15

### *Haala immital Almasiihu*

<sup>1</sup> Sakiraa6e, mido miccintina on Kabaaru Lobbo mo njottin-mi on, mo nja6u-6on, mo jii6u-6on e mum oo. <sup>2</sup> Saabe oon Kabaaru kisinirte-6on so tawii on nanngirii mo no kaalanir-mi on nii. So wanaa d6m, goondinal mon laatoto meere.

<sup>3</sup> Mi yottinii on kabaaru 6ur6o faydinde mo ke6u-mi oo, d6m woni: Almasiihu maayirii saabe luutti men, no Binndi d6i mbiiri nii, <sup>4</sup> o iraama, o immitike e jalooma tata6o oo no Binndi d6i mbiiri nii, <sup>5</sup> o 6anngani Piyeer, caggal d6m, o 6anngani taalibaa6e sappo e di6on 6ee, <sup>6</sup> caggal d6m, o 6anngani ko 6uri sakiraa6e teemed6e njoyon darannde wootere. Ko 6uri heewde e ma66e ana nguuri faa jooni, kaa won yawtu6e e ma66e. <sup>7</sup> Jokkiti hen kasen, o 6anngani Yaakuuba, o 6anngani nelaa6e 6ee fuu. <sup>8</sup> Ko sakitii koo, o 6anngani kam miin baado mo 6inngel ngel lebbi mum ki66aali nii. <sup>9</sup> Sabi miin 6uri nelaa6e 6ee fuu famdude, mi fotaa fay noddireede nelaado, sabi mi torriino deental goondin6e Laam6o ngal. <sup>10</sup> Jonnoo, saabe moyyere Laam6o ndee laatorii-mi ko ngon-mi koo. Moyyere nde mo wadani kam ndee duu laatanaaki kam meere, sabi miin 6uri nelaa6e 6ee fuu gollude. So goonga, wanaa miin gollata, moyyere Laam6o wonnde e am ndee gollata. <sup>11</sup> Kaa so miin so kam6e, fuu fotu, hono non min mbaajorii, hono non ngoondinir-6on.

### *Haala immital maay6e*

<sup>12</sup> Jooni, miden mbaajoo Almasiihu immitike e maayde. Ndennoo, hono yoga mon wiirata maayŋe immitataako? <sup>13</sup> Sinndo immital maayŋe walaa, Almasiihu e hoore mum immitaaki, <sup>14</sup> so Almasiihu immitaaki, waaju amen yo meere, goondinal mon duu yo meere. <sup>15</sup> Eŋum holla duu ko min kaali haala Laamŋo koo yo fenaande, sabi min mbii Laamŋo immintinii Almasiihu, tawi wanaa goonga so maayŋe immitataako. <sup>16</sup> Sabi so maayŋe immitataako, Almasiihu e hoore mum immitaaki, <sup>17</sup> so Almasiihu immitaaki, goondinal mon yo meere, oŋon ngondi e luutti mon faa jooni, <sup>18</sup> maaynooŋe e ley goondinal Iisaa Almasiihu 6ee duu kalkike. <sup>19</sup> So jikke men e Almasiihu e ley ŋam doo nguurdan tan nafannoo, enen 6urannoo yimŋe fuu yurmi-naade.

<sup>20</sup> Kaa jooni, Almasiihu immintinaama e maayde, laatike arano e immi-totooŋe. <sup>21</sup> Sabi no nedŋo gooto sabinbiniri maayde nii, hono non kasen nedŋo gooto sabinbiniri immital e maayde. <sup>22</sup> No yimŋe fuu maayirta saabe Aadama nii, hono non kasen yimŋe fuu immintinirtee saabe Almasiihu, <sup>23</sup> kaa gooto fuu e wakkati mum immitotoo. Dum woni Almasiihu woni arano oo, caggal dum, 6e o jey 6ee njokka hen ɲanne gartol makko. <sup>24</sup> So dum 6ettike, darngal daroo, Almasiihu halka kaanankaaku e baawŋe e semmbe fuu, totta Laamŋo Baabiraado men oo Laamu oo. <sup>25</sup> Sabi ana tilsi Almasiihu laamoo faa nde Laamŋo wadi o ya66a wayŋe 6ee fuu. <sup>26</sup> Gaɲo cakitotoodo halkeede oo yo maayde, <sup>27</sup> sabi ana winndii: «Laamŋo wadii huunde fuu ley koyŋe makko.»\* Kaa so wiyaama non, tayoral Laamŋo gaŋuŋo huunde fuu ley koyŋe makko oo walaa hen. <sup>28</sup> So huunde fuu heedii ley Bajjo oo, Bajjo oo e hoore mum heedan ley gaŋuŋo huunde fuu ley makko oo faa Laamŋo laamoo huunde fuu e nedŋo fuu.

<sup>29</sup> Haya, won yogaaŋe ja6uŋe lootireede lootogal batisima saabe maayŋe. So tawii maayŋe immitataakono, koŋum wadi so yimŋe ana mbatisiree saabe ma66e? <sup>30</sup> Enen e ko'e men, ko wadi so eden njarroo wakkati fuu naatude e farati? <sup>31</sup> Sakiraaŋe, ɲanne fuu mido hosa maayde saabe golleeji am dii. Mido haalana on dum kammari ko mantortoo-mi on saabe ha66agol mon e Joomiraado men Iisaa Almasiihu koo. <sup>32</sup> So no nedŋo wa'i nii tan miilortonoomi ko ka6annoo-mi e waasooji ley Efeesu koo, koŋum dum nafata kam? So maayŋe immitataakono, ngaden no wiiraa nii: «Naamen njaren, sabi en maayoŋe ɲanngo.» <sup>33</sup> Pati njaayree ko'e mon: «Yaadude e bonŋe ana bonna needi.» <sup>34</sup> Ngartiree hakkillaaɲi mon e ko haani, pati luuttee. Sabi yoga mon annɲaa Laamŋo. Ko mbiiru-mi non yalla oŋon njaagoo.

<sup>35</sup> Kaa ɲanɲan lamndiiŋo: «Hono maayŋe immitortoo? Terŋe hode 6e tawretee?» <sup>36</sup> Pamaro hakkille! Aawdi ndi aaw-ɲaa fuu, sinaa waata so fuda. <sup>37</sup> Aawdi ndi aaw-ɲaa fuu, so gawri so goddum yo wabbere tan, a aawataa wullere ndee e hoore mum. <sup>38</sup> Caggal dum, Laamŋo waɲata ndi sii wullere nde muuyi, aawdi fuu e sii wullere mum. <sup>39</sup> Kulle jogiŋe yonki duu ngalɲaa terŋe: yimŋe terŋe mum, daabaaji terŋe mum, pooli terŋe mum, liddi terŋe mum. <sup>40</sup> Ana woodi terŋe kammunkooje e terŋe leydinkooje. Kammunkooje ɲee e ɲari mum, leydinkooje ɲee e ɲari mum. <sup>41</sup> Naange e jalbugol mum, lewru e jalbugol mum, kooɲe e jalbugol mum. Fay kooɲe ɲee e ko'e mum'en jalbugol mum'en ana seerti.

<sup>42</sup> Immital maayŋe duu hono non worri. Ko iretee koo ana ɲola, ko immitotoo koo ɲolataa. <sup>43</sup> Ko iretee koo ana hoyi, ko immitotoo koo ana

\* 15:27 Jabuura 8.7

teddi. Ko iretee koo ana lo'i, ko immitotoo koo ana jogii semmbe. <sup>44</sup> Ko iretee koo yo terde leydinkooje, ko immitotoo koo yo terde ruuhunkooje. Terde leydinkooje ana ngoodi, ndennoo terde ruuhunkooje duu ana ngoodi. <sup>45</sup> Dum wadi so ana winndii: «Neddo arano oo, dum woni Aadama, laatii yonki wuurki.» Aadama cakito oo noo yo Ruuhu dokkoowo nguurndam. <sup>46</sup> Wanaa ko jeyaa e Ruuhu koo ardii warde, ko jeyaa e leydi koo ardii warde, caggal dum, ko jeyaa e Ruuhu koo jokki hen. <sup>47</sup> Neddo arano oo e leydi iwi, leydi moyyiniraa. Neddo dida6o oo e kammu iwi. <sup>48</sup> No iwdo e leydi oo wa'i nii, hono non iw6e e leydi 6ee duu mba'i. No iwdo dow kammu oo wa'i nii, hono non iw6e dow kammu 6ee duu mba'ata. <sup>49</sup> Hono no nanndir-d6n e iwdo e leydi oo nii, hono non nanndirten e iwdo dow kammu oo duu. <sup>50</sup> Sakiraa6e, ko kaalunoo-mi koo annii: tew e yiyyam mbaawataa naatude e Laamu Laamdo oo, kasen duu ko ɔolata waawataa tawreede ko ɔolataa.

<sup>51</sup> Mid6 bannginana on sirri: en maayataa en fuu, kaa en fuu en mbaylitete <sup>52</sup> e wakkati gooto, no himyaango yitere nii, so buututal cakite jamaanu ngal fuufii. Sabi ngal fuufan, maay6e 6ee immitotoo 6e ɔolataa, enen, mbayliteden. <sup>53</sup> E ley dum, ana tilsi terde ɔolooje dee 6oornoo ko ɔolataa, terde maayooje dee duu 6oornoo ko maayataa. <sup>54</sup> So terde ɔolooje dee 6oornike ko ɔolataa, maayooje dee 6oornike ko maayataa, e oon wakkati, ngol konngol binndaangol tabitan: «Jaalogal modii maayde.»†

<sup>55</sup> «Maayde, hoto jaalogal maa woni?

Maayde, hoto semmbe maa woni?»‡

<sup>56</sup> Maayde, e luuttal hebata semmbe, luuttal duu e Sariya oo hebata baawde. <sup>57</sup> Kaa jettooje ngoodanii Laamdo dokkiroowo en jaalogal saabe Joomiraado men Iisaa Almasiihu.

<sup>58</sup> Ndennoo sakiraa6e am horsu6e, laatee joottii6e 6e ndimbataako, beydo-don ɔannde fuu soobaade e golle Joomiraado oo, sabi odon anndi ko ngollaton e ha66agol mon e Joomiraado koo wanaa meere.

## 16

### *Haala wallugol seniibe won6e ngalluure Urusaliima*

<sup>1</sup> Jooni kaa, haala ballal mon faade e seniibe won6e ngalluure Urusaliima 6ee, onon duu ngadon no njamir-mi deente goondin6e gonde leydi Galaatiya dee nii. <sup>2</sup> Alan fuu, gooto e mon fuu moobta ko waawi, pati ndoomon faa mi wara, kawrinon ballal ngal. <sup>3</sup> So mi warii, mi waddanan 6e cu6oto-don 6ee bataakiiji anndinooji ko 6e ngoni, faa 6e na6a ballal mon ngal Urusaliima. <sup>4</sup> So ana foti ko mi yaha miin duu, min njaadan.

### *Haala anniyaaji Pool*

<sup>5</sup> Mi garoowo to mon so mi iwii leydi Makedoniya, sabi ton ya66ortoo-mi. <sup>6</sup> Ana moyya mi fa66a to mon seeda naa mi dabba ton jaati. E ley dum odon mbaawi yoo6inde kam faa mi yaha to njahan-mi fuu. <sup>7</sup> Sabi e ngol laawol, mi yidaa fanude on tan so mi ya66oo, mido yidi fa66ude to mon seeda so Joomiraado jabii. <sup>8</sup> Kaa mi fa66an do Efeesu doo faa iidi Pantekot, <sup>9</sup> sabi mi hebii doo laawol manngol no mi gollira golle nafaowo, way6e duu ana keewi. <sup>10</sup> So Timote warii e mon, njab6ee dum faa gasa pati hula, sabi Joomiraado o gollanta no am nii. <sup>11</sup> Ndennoo, pati fay gooto yawa mo. Njo66inee mo

† 15:54 Esaaya 25.8 ‡ 15:55 Hosee'a 13.14

e laawol ngol yalla omo warta e am e jam, sabi mido doomi mo, kanko e sakiraaŋe 6ee.

<sup>12</sup> Haya, sakiike men Apollos, mi ndaardii mo cili keewdi o yaada e sakiraaŋe 6ee to mon, kaa faa hannde o jaŋaali fey. O waran so o hebindiima.

### *Baynondiral*

<sup>13</sup> Njeertee, jiiŋee e ley goondinal, laatee worŋe, beydoro-don semmbe.

<sup>14</sup> Ko ngadaton fuu, ngadiiree dum jilli.

<sup>15</sup> Odon anndi Istifanas e koreeji mum. Kaŋum'en adii fuu goondinde ley leydi Akaya, 6e tiinnike e gollande seniibe 6ee. Sakiraaŋe, mido waajoo on: <sup>16</sup> njarranee yimŋe wa'uŋe non, kaŋum e gollidooŋe e maŋŋe, tiinniibe e golle oo fuu. <sup>17</sup> Mido weltii e garol Istifanas e Fortunatus e Akaykus ngol. Be ngadanii kam ko onon on mbaawaa wadande kam saabe waasude mon taweede. <sup>18</sup> Be mbaaltinii hakkille am, kaŋum e hakkillaaji mon fuu. Teddinee hono maŋŋe.

<sup>19</sup> Deente goondinŋe gonde leydi Asiya dee ana njowta on. Akilas e genndum Piriskilla e deental goondinŋe kawroowal galle maŋŋe ngal ana njowta on sanne e innde Joomiraado. <sup>20</sup> Sakiraaŋe 6ee fuu ana njowta on. Gooto gooto mon fuu jowtira sakiike mum jowtaango wondungo e jilli.

<sup>21</sup> E junngo am jaati mbinndiran-mi ngoo doo jowtaango: miin Pool mido jowta on. <sup>22</sup> Neddo fuu mo yidaa Joomiraado, kuɗdi woodanii dum! Joomiraado amen Iisaa, war! <sup>23</sup> Yo hinnee Joomiraado men Iisaa wonu e mon! <sup>24</sup> Jilli am ana e mon on fuu saabe haŋŋagol men e Iisaa Almasiihu.

## Bataaki Pool dīdabo faade e Korintunkooŋe

<sup>1</sup> Oo bataaki ga am iwri, miin Pool nelaado Iisaa Almasiihu e sago Laamdo, kaŋum e sakiike men Timote. Miden njowta deental Laamdo gonngal Korintu ngal, miden njowta seniife wonbe leydi Akaya bee fuu. <sup>2</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

### *No Pool yettiri Laamdo*

<sup>3</sup> Jettooje ngoodanii Laamdo Baaba Joomiraado men Iisaa Almasiihu. Kanko woni Baabiraado jom yurmeende, o Laamdo buuŋinoowo berde faade e huunde fuu. <sup>4</sup> Kanko buuŋinta berde men e ley torraaji men fuu, yalla enen duu, eden mbaawa buuŋinde berde wonbe e sii torraaji fuu no kanko o buuŋinirta berde men nii. <sup>5</sup> Sabi, no njogori-den ngedu e torraaji Almasiihu keewdi dīi nii, hono non Almasiihu duu buuŋinirta berde men. <sup>6</sup> So min torraama, dum faa kisine-don, berde mon buuŋa. So berde amen buuŋinaa minen, dum yalla berde mon ana buuŋa, mbaawon mujude sii torraaji di min torretee minen e ko'e amen dīi. <sup>7</sup> Jikke amen e moodon ana selli, sabi miden anndi no njogori-don ngedu e torraaji amen dīi nii, hono non kasen njogori-don ngedu e buuŋinegol berde ngol min ndokkaa ngol duu.

<sup>8</sup> Sakiraabe, miden njidi anndinde on torraaji kewtiidi min e leydi Asiya dīi. Torraaji kewtiidi min ton dīi ana yaŋbitii sanne faa min tayi jikke fay e yonkijji amen. <sup>9</sup> Ana wa'annoo min hono no min saraabe sariya wareede. Kaa noo, dum wadirii pati min pawa jikke amen e ko'e amen, kaa min pawa de e Laamdo immintinoowo maaybe oo. <sup>10</sup> Kanko danndi min e nden maayde, o danndan min kasen duu. E makko jaati min pawu jikke o danndan min kasen <sup>11</sup> e ley ko mballirton min duwaawuuji mon koo, yalla moyyere nde min kebirta duwaawuuji yimbe heewbe ndee ana wada heewbe njetta Laamdo saabe amen.

### *Haala bantugol Pool*

<sup>12</sup> Senaare e laabal berde iwngal to Laamdo min nguurdi e aduna oo, sako hakkunde mon. Dum woni ŋaayo amen, kasen duu berde amen ana mbaaltii e majjum. Min njokkaali hakkilantaaku biŋbe aadama, hinnee Laamdo dowi min. <sup>13</sup> Sabi ko min mbinndanta on koo, fay huunde wala ley hen so wanaa ko njanngaton so paamon. Midu yidi paamon <sup>14</sup> ko puddu-don faamude jooni koo faa laaba: ŋannde gartol Joomiraado men Iisaa min mantorto on hono no onon duu mantorto-don min nii.

<sup>15</sup> Saabe nden hoolaare anniyorinoo-mi arannde warde to mon yalla odon ceyoo cili didi. <sup>16</sup> Ko njidunoo-mi dee, mi faŋa to mon, mi yaha leydi Makedoniya, caggal dum, mi warta to mon kasen lanndinano-don kam mi yaha leydi Yahuudiya. <sup>17</sup> Nde mbiyan-mi mi waran to mon too ndee, mi soobaaki naa? So mi fellisii huunde, tama muuyde am tan ngadan-mi faa dum waddana ooho e a'aa fuu taweede e am? <sup>18</sup> No Laamdo laatorii koolniido nii, hono non konngol ngol min kaalani on ngol waasiri laatoraade ooho e a'aa. <sup>19</sup> Sabi Iisaa Almasiihu Bii Laamdo oo wanaano ooho e a'aa: ooho tan woni e makko. Kanko woni mo miin e Silas e Timote min mbaajji kabaaru mum to mon too oo. <sup>20</sup> Sabi podooje Laamdo dee fuu tabitii e ley makko. Ndennoo enen duu, kanko mbiiraten Aamiina faa Laamdo teddinee.

<sup>21</sup> Laamdo jaati niibini min, minen e mon fuu, ha66agol men e Almasiihu. Kanko jaati subii en. <sup>22</sup> Kasen kanko wadi maande makko e men, o loowi Ruuhu makko e berde men laatoo pi6iraado moyyereji di o moo6tani en dii.

<sup>23</sup> Laamdo ceenu-mi, yurmaade on hadi kam wirfitaade Korintu. <sup>24</sup> Wanaa yidude dawrande goondinal moodon – sabi odon tabiti e goondinal ngal – ko min njidi dee, wallondirde e moodon faa ceyo-don.

## 2

<sup>1</sup> Dum nee, mi fellisiino mi wirfataako to mon, pati mi waddana on sugulla kasen. <sup>2</sup> Sabi so mi sunjlinii on, homo seynata kam so wanaa onon 6e cujlin-mi 6ee? <sup>3</sup> Dum wadi so mbinndir-mi no mbinndir-mi nii e ley bataaki am oo. Mi yidaano warde to mon so fotube seynude kam 6ee cujlina kam. Mido hoolii on fuu seyo am yo seyo mon on fuu. <sup>4</sup> Ruubu e bernde mettunde e gonfi keewdi mbinndiran-mi on. Mi yidaa sunjlinde on, ko njidu-mi dee, anndinde on no jilli am poti mawnude e mon on fuu.

### *No Poolyaaforii toonudo oo*

<sup>5</sup> So gooto e mon laatike sabaabu sunu, wanaa miin o suni, on fuu – naa yoga e moodon, pati mi yawta goonga. <sup>6</sup> Jukkungo ngo bur6e heewde e mon njukki joomum ngoo heyii, <sup>7</sup> jooni kaa, ko 6uri moyyude dee: njaafodon mo, koomton mo pati mboy-yonki jaaloo mo. <sup>8</sup> Ndennoo, mido ndaarda on tabintinon jilli mon e makko. <sup>9</sup> Sabi ittude koro mon saabanii kam windande on kasen faa mi annda odon downtanii kam. <sup>10</sup> Mo njaafi-don fuu mi yaafoto dum miin duu. Banngal am, ko njaafotoo-mi koo – so won ko kaan-mi yaafaade mo – mi yaafoto dum yeeso Almasiihu faa nafa on <sup>11</sup> pati Ibiliisa jammboo en, sabi eden anndi anniyaaji mum.

### *Haala jaalogal Almasiihu*

<sup>12</sup> Nde njaa-mi Torowas faa mi waajoo Kabaaru Lobbo haala Almasiihu oo ndee, mi tawii Joomiraado udditanii kam ton damal <sup>13</sup> kaa hakkille am waaltaaki, sabi mi tawaali ton Titus sakiike am oo. E oon wakkati, mbaynii-mi sakiraabe 6ee, paa-mi leydi Makedoniya.

<sup>14</sup> Kaa jettooje ngoodanii Laamdo dokkoowo en jaalogal wakkati fuu saabe ha66agol men e Almasiihu. Laamdo hokki min saakude anndal Almasiihu nokku fuu hono no uurdi mbelndi nii. <sup>15</sup> E ley dum, do Laamdo, min uurdi Almasiihu e ley hisintee6e 6ee e halkotoo6e 6ee. <sup>16</sup> Do halkotoo6e 6ee, min kaccol maayde na6oowol 6e e maayde, do hisintee6e 6ee, min uurdi nguurndam na6oori 6e e nguurndam.

Homo foti gollude oo golle? <sup>17</sup> Min nganaa julortoo6e konngol Laamdo ngol no heew6e ngadata nii, sabi min nelaa6e Laamdo, miden kaalda berde laa6ude yeeso Laamdo ley ha66agol amen e Almasiihu.

## 3

### *Haala gollanoo6e aadi keyri*

<sup>1</sup> Kori min pu6ditaali mantaade kasen? Naa miden kaajaa bataakiiji anndinooji ko min ngoni paadi e mon naa iwdi e mon hono no yim6e yogaabe kaajiraa nii naa? <sup>2</sup> Onon jaati ngoni bataaki amen binndaado e berde amen, mo yim6e fuu mbaawi anndude e janngude. <sup>3</sup> Sabi ana tayoraa on bataaki Almasiihu saabe golle amen. Bataaki oo winndiraaka dawa, Ruuhu Laamdo guurdo o winndiraa. Kasen duu mo winndaaka e alluuje kaaye, do mo winndaa e mum dee, e berde yim6e.

<sup>4</sup> Miden njogii hoolaare mawnde e Laamdo saabe Almasiihu. <sup>5</sup> Minen min ngalaa baawde faa min ngolla oo golle. Baawde amen to Laamdo iwri. <sup>6</sup> Kanko wadi min fotube laataade gollanoobe aadi keyri. Ndiin aadi fawaaki e Sariya binndaado, e Ruuhu Ceniido ndi fawii. Sabi Sariya binndaado oo ana naba yimbe to maayde, kaa Ruuhu oo to nguurndam nabata yimbe.

<sup>7</sup> Sariyaaji binndaadi e alluujje kaaye, nabooji yimbe to maayde dii, ana njogii darja faa Israa'iilankooŋe ndonki yeewde yeeso Muusaa saabe darja gondo hen oo, fay so taweede o jifoowo. <sup>8</sup> Kaa golle Ruuhu oo buri darja! <sup>9</sup> Golle liboowo oo ana jogii darja, sako golle fooccitaare oo. <sup>10</sup> Eden mbaawi fay wiide ko joginoo darja arande koo majjii kammari darja garɗo jooni mo walaa nanndo oo. <sup>11</sup> Ko jifata koo ana waawi jogaade darja, kaa ko jiiɓata faa abada koo buri fuu jogaade darja.

<sup>12</sup> Nde wonnoo miden njogii oo jikke, ngorgu min kaaldata. <sup>13</sup> Min ngadataa no Muusaa nii, gadunooɗo heedoode e yeeso mum pati Israa'iilankooŋe keddooye yeewde darja jifoowo oo faa timma. <sup>14</sup> Kaa berde ma66e mbumii. Sabi faa hannde so ebe keddi jannugude aadi kiinndi ndii, heedoode ndee ana heddi e geese ma66e. Nde huncaaka tafon, sabi e ka66iido e Almasiihu tan nde huncetee.\* <sup>15</sup> Goonga, faa e jalooma mo ngonɗen e mum jooni oo, so Tawreeta Muusaa ana janngee, heedoode ndee ana heddi huurde hakkillaaji ma66e. <sup>16</sup> Kaa so neddo warti e Joomiraado fuu, heedoode ndee huncete iwde e mum. <sup>17</sup> Sabi Joomiraado woni Ruuhu oo, kasen do Ruuhu Joomiraado oo woni fuu, don ndimaaku duu woni. <sup>18</sup> Enen 6e geese mum'en cudditaa 6ee fuu, darja Joomiraado oo ana bannga e meeden no e timtorgal nii. Omo nii waylita en faa nannden e makko mbaadi, darja makko beydoo e meeden. Dum woni golle Joomiraado, kanko woni Ruuhu oo.

## 4

### *Haala jawdi ley loode*

<sup>1</sup> Ndennoo, min kaabataa, sabi Laamdo hokki min oo golle kammari yurmeende mum. <sup>2</sup> Min calike kulle cuudiide kersinooje dee. Min yonnataa yimbe, min mbaylitataa konngol Laamdo ngol. Ko min ngadata dee, e ley banngingol amen goonga ngol miden tewta heɓude hakkillaaji yimbe fuu yeeso Laamdo. <sup>3</sup> So Kabaaru Lobbo mo min mbaajii oo suudaama, halkotoobe 6ee tan o suudantee. <sup>4</sup> Been ngalaa goondinal, sabi Ibiliisa wumni hakkillaaji ma66e pati 6e njiya fooyre Kabaaru Lobbo kolloowo darja Almasiihu jogiido mbaadi Laamdo oo. <sup>5</sup> Sabi wanaa kabaaru amen min mbaajotoo, ko min mbaajotoo dee, kabaaru Iisaa Almasiihu, Joomiraado men oo. Minen, saabe makko min laatorii maccube moodon. <sup>6</sup> Sabi Laamdo biido: «Yo fooyre yaaynu e ley nimre» oo, katum yaayni fooyre mum e ley berde amen, faa hokka min anndal darja mum jiyeteedo e yeeso Almasiihu oo.

<sup>7</sup> Miden njogorii ndiin jawdi mawndi e ley amen hono no ley loode de ngalaa semmbe nii, yalla ana anndee deen baawde mawde e Laamdo iwi, wanaa e amen. <sup>8</sup> E huunde fuu miden nii 6illee, kaa min kalkaaki, miden nii e wemmbere wakkati fuu, kaa min tayaali jikke, <sup>9</sup> miden nii torree, kaa Laamdo yoppaali min, miden nii tippee e leydi, kaa min maayaali. <sup>10</sup> Wakkati

\* **3:14** Yogaabe ana paamira aaya oo hono nii: Sabi faa hannde so ebe keddi jannugude aadi kiinndi ndii, heedoode ndee ana heddi e geese ma66e, 6e paamaali aadi ndii huncaama saabe Almasiihu.

fuu, maayde Iisaa ndee ana e terde amen, yalla nguurndam Iisaa dam duu ana yiyee e terde amen. <sup>11</sup> Fay so miden nguuri, miden kosa maayde wakkati fuu saabe ko min mbaajotoo kabaaru Iisaa koo, yalla nguurndam Iisaa dam ana yiyee e terde amen maayooje dee. <sup>12</sup> Hono nii, maayde gollirta e amen, nguurndam gollirta e mon.

<sup>13</sup> Ana winndii: «Mi goondinii Joomiraado, dum wadi so mido waajoo.»\* Minen duu min goondinbe hono no makko nii, dum wadi so miden mbaajoo.

<sup>14</sup> Sabi miden anndi immintindo Joomiraado men Iisaa e maayde oo immintinidan min e makko minen duu, kasen duu waddan min yeeso makko, minen e moodon fuu. <sup>15</sup> Ko hewtii min fuu yo kammari moodon yalla mooyere Laamdo ndee ana yottoo yimbe heewbe. Hono nii yimbe heewbe njettirta Laamdo faa Laamdo beydoo teddineede.

### *Haala teddeengal manngal dumiingal*

<sup>16</sup> Dum wadi so min kaaɓataa. Fay so terde amen dee yo kalkotoode, yonkiiyi amen dii ana keydintinee jannde fuu. <sup>17</sup> Sabi torraaji amen hannde dii ana kakindii ana njawta, kasen duu di lanndinanto min teddeengal manngal ngal timmataa, burngal diin torraaji abada. <sup>18</sup> Sabi wanaa e ko yiyetee min ngatti hakkillaaji amen, e ko yiyataake min ngatti hakkillaaji amen. Sabi ko yiyetee koo, yawtan, kaa ko yiyataake koo, heddoto faa abada.

## 5

### *No ndarorto-den yeeso Almasiihu*

<sup>1</sup> Eden anndi so suudu leydiiru ndu kodu-den e mum jooni nduu wurji-naama, dum woni terde men, Laamdo darnanii en suudu dow kammu ndu junngo darnaali, darotoondu faa abada. <sup>2</sup> Eden nii caɓbitoo saabe heppugol men naatude e ley suudu men dow kammu nduu, eden boornoro ndu no kaddungal nii, <sup>3</sup> yalla so en boorniima ndu pati tawe-den en wuttiniiɓe. <sup>4</sup> Sabi e ley nduu suudu, en tampii en ottii. En njidaa foortaade ndu, ko njid-den dee, boornaade wonndu dow mayru, yalla nguurndam dam ana moda ko halkotoo ko woni e men koo. <sup>5</sup> Laamdo jaati lanndinanii en e kabaaru majjum, mo loowi en Ruuhu makko laatoɓ piɓiraado mooyereiji desanaafi en dii.

<sup>6</sup> Ndennoo, eden njogii hoolaare wakkati fuu, fay so eden anndi so nii eden keddii e dee doo terde, eden ngoddi suudu Joomiraado nduu tafon. <sup>7</sup> Sabi ko ngoondin-den nguurdu-den, wanaa ko njiyaten nguurdu-den. <sup>8</sup> Ndennoo eden njogii hoolaare, kaa ko burani en, eggude e dee doo terde kammari faa kodoyen banng Joomiraado. <sup>9</sup> Kaa wadude ko welata mo woni ko bur-den fuu tewtude, hodude doo e eggude doo fuu fotu. <sup>10</sup> Sabi ana tilsi en fuu ndaroden yeeso Almasiihu faa care-den, yalla gooto fuu ana yobee golle mum mo wadunoo e aduna, so golle lobbo naa so golle bondo.

### *No Iisaa hawrintiniri en e Laamdo*

<sup>11</sup> Ndennoo, tawee min anndii ko woni hulde Joomiraado, min tewtan heɓude hakkillaaji yimbe ɓee. Laamdo ana anndi min, mido joonndorii onon duu oɗon anndi min e ley berde mon. <sup>12</sup> Min njidaa mantaade yeeso mon. Ko min njidi dee, hokkude on daliili no mantoro-don min, yalla oɗon keɓa ko njaabo-don mantortooɓe kulle gonde sella, ɓe mantortaako kulle gonde e berde. <sup>13</sup> So min njogoraama min haanduɓe, dum saabe Laamdo. So min njogoraama min yeedduɓe, dum kammari moodon. <sup>14</sup> Sabi jilli Almasiihu

\* 4:13 Jabuura 116:10



njaalike min, sabi min tayorii, gooto maayanii yim6e fuu, ndennoo yim6e fuu maayii. <sup>15</sup> O maayanii yim6e fuu, yalla wuur6e 6ee ana ɲootta wuurande ko'e mum'en, mo 6e nguuranta dee, maayando 6e so wuurtani 6e oo.

<sup>16</sup> Ndennoo, gila jooni, walaa fuu mo min njogorii no 6ii-aadama jogortoo neddo nii. So min njogorikeno non Almasiihu, jooni min ɲoottii jogoraade mo non. <sup>17</sup> So neddo ha66ike e Almasiihu, tagitaama tagu keso. Ko hiidfi koo yawtii, hankasen kabaaru oo fuu heyditii. <sup>18</sup> Dum fuu to Laamdo iwri, kanko neli Almasiihu faa rewrintina en e makko, o halfini min golle rewrintingol hakkunde makko e yim6e. <sup>19</sup> Sabi Laamdo wonnoo e ley Almasiihu faa rewrintina yim6e aduna fuu e mum e waasude jataade luutti mum'en. Kanko halfini min kabaaru rewrintingol ngol. <sup>20</sup> Ndennoo, min daraniibe Almasiihu, hono no Laamdo jaati waajortoo ko iwata e kundude amen koo. Miden ndaarda on dum doo e innde Almasiihu: ngartee e Laamdo! <sup>21</sup> Almasiihu meedaali luuttude abada. Kaa Laamdo fawii luutti men fuu dow makko, yalla ha66agol men e Almasiihu ana wada en fooccitii6e yeeso Laamdo.

## 6

### *No Pool'en golliranta Laamdo*

<sup>1</sup> Minen, kammari min gollidoo6e e Laamdo, miden ndaarda on pati pijiran moyyere Laamdo nde ke6-don ndee. <sup>2</sup> Sabi o wii: «Mi hettindanike ma wakkati lobbo,

mi faabike ma jalaande kisindam.»\*

Jooni jaati woni wakkati lobbo, jooni woni jalaande kisindam. <sup>3</sup> Min njidaa wadude fay huunde ko fergitata yim6e so feloore tawee e golle amen. <sup>4</sup> Kaa e huunde fuu, min kolliran miden kaandi e laataade gollanoo6e Laamdo ley tiinnitaare mawnde, ley torraaji, ley cadeele, ley wemmbere, <sup>5</sup> ley piide, ley kasu, ley murtere, ley tampere, ley rafi doyngol, ley yolbere, <sup>6</sup> ley laa6al, ley anndal, ley muɲal, ley moyyuki, ley Ruuhu Ceniido, ley jilli di ngaldaq e naafigaaku, <sup>7</sup> ley konngol goonga, ley baawde Laamdo, e ka6orde fooccitaare gonde e juude amen nane e jaame, <sup>8</sup> ley teddeengal, ley koyeendam, ley ko yim6e ɲo'ata min, kaɲum e ko njettata min. Miden kolla yim6e min gollanoo6e Laamdo ley ko min njogoraa min majjinoo6e tawee min goongirante'en, <sup>9</sup> ley ko min njogoraa min anndaaka tawee min anndaabe, ley ko min njogoraa min maayoo6e jooni tawee min wuur6e, ley ko min njogoraa min jukkaabe tawee min maayaali, <sup>10</sup> ley ko min njogoraa min sunaabe tawee min seyotoo6e wakkati fuu, ley ko min njogoraa min misikiina'en tawee miden ngada heew6e arsukunte'en, ley ko min njogoraa min ngalaa fay huunde tawee minen njeɲ fuu.

<sup>11</sup> Korintunkoo6e, min kaaldanii on laa6al reedu, min njaajinanii on berde amen. <sup>12</sup> Minen, min paadinanaali on berde amen, onon paadinani ko'e mon berde mon. <sup>13</sup> Jooni mido haaldira e moodon no kaaldoowo e 6ikkoy mum nii: njaajinee berde moodon.

### *No laatori-den suudu Laamdo guurdo*

<sup>14</sup> Pati ka66ondiree e 6e ngoondinaali 6ee, sabi edum wa'i hono no reentinde daabaaji didi di ngaldaq faa ndemda. Won ko reentini fooccitaare e oojaare naa? Won ko reentini fooyre e nimre naa? <sup>15</sup> Won ko reentini Almasiihu e Ibiliisa naa? Won ko reentini goondindo e mo goondinaali naa?

\* 6:2 Esaaya 49.8

16 Aadi won hakkunde suudu Laamdo nduu e tooruuji dñi naa? Anndee, enen ngonni suudu Laamdo guurdo oo. Sabi Laamdo wii:

«Mi hodidan e ma66e,  
mi yiilodoto e ma66e,  
mi laato Laamdo ma66e,  
6e laatoo yim6e am.»†

17 Dum saabii so Joomiraado wii kasen:

«Iwee hakkunde ma66e!

Ceertee e ma66e!

Pati memee ko sobi!

Nden, mi ja66oto on.‡

18 Mi laatanto on baaba,

laatano-don kam bi66e rew6e e wor6e.

Dum Joomiraado Jom Baawde oo wii.»§

## 7

1 Sakiraa6e horsu6e, en ngadanaama dee podooje fuu, ndennoo la66inen ko'e men iwde e tuundi ngonndi e terde men e yonkijji men fuu, tabintinen senaare men e ley kulol Laamdo.

### *Haala sunu e seyo*

2 La66inanee min berde moodon! Min toojaali fay gooto, min mbonnanaali fay gooto, min jaamaali jawdi fay gooto. 3 Mi haaldaali dum faa laatanoo on jukkungo. Sabi mi haaliino gila naanen: miden njidi on sanne, fay huunde seenndataa en, wanaa nguurndam wanaa maayde. 4 Mido hoolii on sanne, mi hebii jaati no mi mantoro saabe moodon, on buu6inii bernde am sanne, mido heewi seyo e ley tampereejji amen dñi fuu.

5 Sabi, fay nde min njottii leydi Makedoniya ndee, min powtinaaki fey, torraaji tan min njii, gila e kulol ley berde faa e sippirooji. 6 Kaa Laamdo buu6inoowo berde sunaa6e oo, buu6inirii berde amen garol Titus. 7 Wanaa garol makko ngol tan wadi dum, ko buu6inno-don bernde makko koo waalini hakillaaji amen, kaɓum e ko mo wii odon njidi yiide kam sanne e ko o haalani min haala sunu mon kammari ko wadi koo e haala tiinnaare mon e am, dum buri fuu beydude seyo am. 8 So bataaki am oo sunjiniino on, mi mimsitaali dum jooni. Fay so mi mimsitiino – sabi mi yii bataaki oo sunjiniino on fay so e wakkatiwel gootel – 9 mido seyii jooni. Wanaa ko cunluno-don koo waddani kam seyaade, ko sugulla moodon waddani on tuubude koo. Sabi sugulla kewtinoodo on oo ana hawri e sago Laamdo, hono non, walaa ko min mbonnanno on. 10 Sabi sugulla kawroowo e sago Laamdo oo waddata tuubugol, tuubugol ngol waddata kisindam, mimsee walaa e majjum. Kaa sugulla aduna, maayde waddata. 11 Ndennoo, yeewee sugulla kawroowo e sago Laamdo oo ko waddani on: o waddanii on soobaade, o wallii on daranaade ko'e mon, o waddanii on metteede e gadu6e bone oo, kaɓum e kulol, o waddanii on yeeweede kam, kaɓum e tiinnaade, o wallii on jukkude bon6o oo. E huunde fuu on kollii odon laa6i e oon kabaaru. 12 Ndennoo so mi winndanii on, wanaa saabe tooɓudo mbinndir-mi, wanaa saabe toojaado duu mbinndir-mi, ko mbinndiran-mi on dee, yalla odon 6annginanee soobe mo njogani-don min oo yeeso Laamdo. 13 Hakillaaji amen mbaaltorike saabe majjum.

† 6:16 Lewinkoo6e 26.12, Esekiyel 37.27

‡ 6:17 Esaaya 52.11

§ 6:18 2 Samuyila 7.14, Esaaya

Ko jokkiti hen kasen, seyo Titus ngoo beydi waaltinde hakkillaaji amen, sabi on fuu on buuŋinii bernde makko. <sup>14</sup> So mi mantorike on seeda yeeso makko duu, on kersinaali kam. Kaa no min kaalanirta on goonga wakkati fuu nii, hono non ko min mantorii on e yeeso Titus koo laatorii goonga. <sup>15</sup> Bernde makko beydoto yidude on so o miilike no dowtiri-don on fuu e no njaŋŋori-don mo kulol e siŋnugol nii. <sup>16</sup> Mido seyii ko kebu-mi e mon hooolaare e dow huunde fuu koo.

## 8

### *Haala wallugol seniife wonbe Urusaliima*

<sup>1</sup> Sakiraabe, miden njidi anndinde on moyyere Laamdo jippiinde e deente goondinbe Iisaa gonde leydi Makedoniya dee. <sup>2</sup> Kambe e horireede billaare sattunde fuu, keewal maŋbe seyo waddanii be hokkitirde ko heewi, fay so ebe e talkaaku cattudo. <sup>3</sup> Mi seedee: be ndokkitirii ko be mbaawi fuu fay ko buri baawde maŋbe, berde laabude tal be ndokkiri. <sup>4</sup> Be ndaardii min sanne yalla ebe keba laawol wadude juude maŋbe e wallugol seniife wonbe Urusaliima bee. <sup>5</sup> Be ngadii ko buri miilo amen. Ko adii fuu, be ndokki ko'e maŋbe Joomiraado, caggal dum, e sago Laamdo be ndokki min ko'e maŋbe minen duu. <sup>6</sup> Dum wadi so min ndaardi Titus timmintinoya to moodon ngal dokkal no fuddirnoo ngal nii. <sup>7</sup> On arsukunte'en e huunde fuu – goondinal e waaju e anndal, odon njogii soobee dow huunde fuu, odon korsini min duu. Tiinno-don faa arsinkinire-don non e ngal dokkal duu.

<sup>8</sup> Wanaa kammari tilsere wadi so mbii-mi non, ko mbiiru-mi non dee, faa mi hokka on laawol hollude jilli mon dii ana celli. <sup>9</sup> Sabi odon anndi moyyere Joomiraado meeden Iisaa Almasihu: kanko arsukunte oo, o wadii hoore makko talka kammari mon yalla odon laatoroo arsukunte'en talkaaku makko oo. <sup>10</sup> Mido haalana on ko woni miilo am haala wallugol seniife wonbe Urusaliima bee, sabi dum buri nafude on: rowanen onon adii fiide dabare wallude be, onon adii fuddude golle oo duu. <sup>11</sup> Jooni noo, kiŋŋinee dum. No tiinnori-don fiide dabare nii, tiinnoree non gollude dum duu, ndokkiron no baawde mon mbaarata. <sup>12</sup> Sabi so neddo anniyike wadude moyyere, Laamdo jabanam dum hakke ko jogii koo, wanaa hakke ko jogaaki. <sup>13</sup> Mi wiyaali naaton e billaare yalla woŋbe bee ana powta, yimbe fuu pota njidu-mi. <sup>14</sup> Jooni dum forran onon on keŋii faa heewi faa mbaawon wallude wonbe e baasal bee. Caggal jooni, so tawii onon on ngonii ley baasal, kambe be keŋii ko heewi faa be mbaawa wallude on. Hono nii yimbe potirta, <sup>15</sup> no winndorii nii: «Moobtunoodo ko heewi oo yaŋŋintinaali, moobtunoodo seeda oo jakoraaka.»\*

### *Kabaaru Titus e yaaduŋe mum*

<sup>16</sup> Jettooje ngoodanii Laamdo e ko wadi e bernde Titus sii soobee mo min njoganii on oo. <sup>17</sup> Titus jaŋii ko min jaagii dum wirfitaade to mon koo. Ko buri dum fuu, soobirantaaku mawdo e bernde laabunde tal o wirfitorii faade to moodon. <sup>18</sup> Miden neldida e makko sakiike men jetteteedo e deente goondinbe dee fuu saabe golle mo o gollani Kabaaru Lobbo oo. <sup>19</sup> Wanaa dum tan, deente goondinbe dee cuŋii mo, yalla omo laaroo jaado amen faa min naŋa dokkal ngal Urusaliima. Ngal dokkal ana teddina Joomiraado, ana banngina anniya amen lobbo duu. <sup>20</sup> Miden ngada ko min mbaawi fuu pati min keba feloore e ndiin jawdi keewndi ndi min ndaranii. <sup>21</sup> Sabi wanaa

\* 8:15 Pergu 16.18

ko woodi yeeso Joomiraado tan min tewtata, miden tewta ko woodi yeeso yimbe duu. <sup>22</sup> Miden neldida e didon bee sakiike meeden mo min taykitii soobee mum wakkatijii keewdi e kulle keewde. Jooni mo ŋuri fuu tiinnaade e golle oo kammari hoolaare mawnde nde mo joganii on ndee. <sup>23</sup> Titus duu yo gondiido am yo gollidiido am kammari moodon. Sakiraaŋe men wondube e makko bee yo nelaabe deente goondinbe dee, be teddeengal Almasiihu. <sup>24</sup> Ndennoo jooni, kollee be jilli moodon, kollee be kambe e deente goondinbe dee fuu miden njogii daliili e mantoraade on.

## 9

### *No Laamdo yidiri dokkiroowo seyo*

<sup>1</sup> Fotaa ko mi winndana on banngal wallugol seniibe wonbe Urusaliima bee, <sup>2</sup> sabi mido anndi on muuyii wallude be sanne. Mi mantorike on dum yeeso Makedoniyankooŋe, mbii-mi be: Akayankooŋe lanndiniima gila rowanen wallude. Tiinnaare moodon soobini ko ŋuri heewde e maŋbe. <sup>3</sup> Kaa mido nela e moodon bee sakiraaŋe pati ko min mantorii on koo laato meere, kaa tawee odon lanndinii no mbiiru-mi nii. <sup>4</sup> So wanaa dum, so Makedoniyankooŋe ngardii e amen to moodon tawi on lanndinaaki, hoolaare nde min njoginoo e moodon ndee laatanto min gacce, kasen duu onon ŋurata fuu hersude. <sup>5</sup> Dum nee, ko njii-mi hen ana tilsi mi ndaarda sakiraaŋe bee ardoo kam to moodon, ndaranoo ballal ngal poduno-don ngal. Nden so mi warii fuu mi tawan engal hawriti, ngal laato ballal bernde laaŋunde tal, tawee wanaa tilsere. <sup>6</sup> Taykee: aawudo seeda, seeda hettata, aawudo ko heewi, ko heewi hettata. <sup>7</sup> Gooto fuu yo hokku ko anniyii e bernde mum, tawa wanaa dow metti, wanaa e tilsere. Sabi Laamdo ana yidi dokkiroowo seyo. <sup>8</sup> Laamdo ana waawi hokkude on sii moyyereji fuu, yalla e huunde fuu odon keŋa ko heyata on wakkati fuu, keddoro-don ko heewi kammari golle lobbo fuu, <sup>9</sup> hono no winndorii nii: «Omo saaka moyyere makko e ley talka'en,

moyyuki makko duumoto faa abada.»\*

<sup>10</sup> Laamdo dokkoowo demoowo aawdi hokka dum nguure oo, hokkan on aawdi heyoori on onon duu, o funnan ndi, yalla moyyuki mon ana rima faa heewa. <sup>11</sup> Sabi o arsinkinana on e huunde fuu, faa mbaawon hokkitirde wakkati fuu. Nden heewbe njettan Laamdo e ko mballir-don dum'en ko iwri e juude amen koo. <sup>12</sup> Sabi ngal ballal wanaa faa nafa seniibe bee tan wadira, ko ngal wadira dee, faa ngal waddana heewbe yettude Laamdo. <sup>13</sup> So be yeewii ballal moodon ngal, be teddina Laamdo saabe dowtaare mon nde ceertorto-don Kabaaru Lobbo haala Almasiihu, be teddina mo duu saabe ko caakaton jawdi mon e maŋbe, kambe e yimbe fuu. <sup>14</sup> Be kolliran korsa maŋbe faade e moodon duwaawuuji di be nduwantoo on dii saabe moyyere mawnde nde Laamdo wadani on ndee. <sup>15</sup> Jettooje ngoodanii Laamdo saabe dokkal mum daŋungal sifa!

## 10

### *No Pooljaaborii felube dum*

<sup>1</sup> Miin Pool biyeteedo lo'udo so mido hakkunde moodon kaa cuuso so mido woddi on oo, mido waajoroo on newaare e moyyuki Almasiihu, <sup>2</sup> mido ndaarda on: pati ngadee so mi garjoo on nde ngaroy-mi to mon fuu.

\* 9:9 Jabuura 112.9

Sabi banngal wiyoo6e miden ngollana muuyooji bii-aadama 6ee anniyii-mi gollirde ngorgu. <sup>3</sup> Goonga, min 6i66e aadama tan, kaa no min ka6irtee nii wanaa no 6i66e aadama ka6irtee. <sup>4</sup> Sabi ka6orde de min ka6ortoo dee nganaa de bii-aadama, semmbe majje to Laamdo iwri faa de mbaawi wurjinge tataaji e leydi. Minen, min wurjinoo6e miilooji way6e e leydi <sup>5</sup> kajum e mawninkinaare fuu ha6oore yim6e annudude Laamdo. Kasen min nanngoo6e miilo fuu faa min ngartira dum e dowtanaade Almasiihu. <sup>6</sup> So dowtaare moodon hi66ii, min lanndiniima jukkude neddo fuu mo dowtaaki.

<sup>7</sup> Yeewree kudde dee no ngorri nii – so won e moodon kooliido yo neddo Almasiihu, yo miccito dum doo duu: no joomum laatorii neddo Almasiihu nii, minen duu, min min laatorii yim6e Almasiihu. <sup>8</sup> Joomiraado men lissaa hokkii min baawde faa min na6a goondinal mon yeeso, wanaa faa min ngurjina ngal. Fay so mantii-mi hen faa kosu-mi ya66itaade, dum hersintaa kam. <sup>9</sup> Mi yidaa miilon mi tewtoowo hul6inde on e 6ataakiiji am dii. <sup>10</sup> Sabi ana wiyee 6ataakiiji am dii ana teddi, ana njogii semmbirantaaku, kaa so mido hakkunde mon, mido lo'i, haala am ana yawonii. <sup>11</sup> Neddo fuu biyoowo non, yo anndu ko min mbinndata so miden ngoddi on koo, dum min ngollata so min ngondii e moodon duu. <sup>12</sup> Min cuusaa fonndude ko'e amen e mantotoo6e 6ee. Min nanndaa e ma66e duu. Kam6e, e6e ponnda ko'e ma66e e etirdum ma66e, 6e nanndintaa ko'e ma66e e fay gooto so wanaa e ko'e ma66e tan! Be ngalaa hakkille.

<sup>13</sup> Minen noo, min njidaa mantaade faa ya66itoo keerol, miden kaafa e keerol ngol Laamdo darnani min ngol, faa min njottii on onon duu. <sup>14</sup> So min njottanooki to mon, min ya66itinoke keerol e manti amen. Kaa min ya66itaaki keerol, sabi minen adii waddude e mon Kabaaru Lobbo haala Almasiihu oo. <sup>15</sup> Min mantortaako golle wo66e mo walanaa min. Kaa no goondinal moodon beydortoo nii, miden njikkii beydoraade non teddungal e hakkunde moodon, tawee min ya66itaaki ko Laamdo darnani min koo. <sup>16</sup> Nii wadata so min ke6a no min mbaajoroo Kabaaru Lobbo oo e nokkuuje gonde caggal moodon dee, min mbaasa mantoraade golle gollaado faa timmi e ley nokkuuje de wo66e kalfinaa. <sup>17</sup> Ana winndii: «Mantotoodo fuu, yo mantoro golle Joomiraado.»\* <sup>18</sup> Sabi wanaa manoowo hoore mum woni jabaado, jabaado dee, mo Joomiraado mani.

## 11

### *No Pool feliri nelaabe peneebe*

<sup>1</sup> Jooni kaa dalee kam mi haaldana on no 6adiido haandude nii. Mido jaagii on mujanon kam. <sup>2</sup> Mido joganii on kiram iwru6am to Laamdo jaati, sabi mi ha66ii dewgal mon e gorko gooto, dum woni Almasiihu. Mido yidi na6ude on to makko no mboomri ceniindi nii. <sup>3</sup> Kaa mido huli pati hakkillaaji mon mbaayite, nanndon e Hawwaa mo mboddi yoyundi ndii yojni oo faa njoppon hoolaare mon laa6unde sellunde wonnde e Almasiihu ndee. <sup>4</sup> Mido huli dum sabi so won gardo waajaade on lissaa goddo mo waldaa e mo min mbaajii e ley moodon oo, naa so on ke6ii ruuhu goddo naa kabaaru lobbo mo waldaa e mo ke6uno-don e amen oo, on nja66oto dum sanne. <sup>5</sup> Kaa mido miila diin kalahali mawdi, dum woni nelaabe moodon 6ee, walaa fuu ko burdi kam. <sup>6</sup> Ana waawi taweede mi wanaa faasilante banngal haala, kaa mi wanaa baaydo anndal, min kollii on dum faa laa6i wakkati fuu e ley huunde fuu.

\* 10:17 Yeremiya 9.23

<sup>7</sup> Nde kaalan-mi on Kabaaru Laamdo Lobbo oo tawi on njoŋaali ndee, mi leydinkinike kammari teddinde on, mi mboofii e ley majjum naa? <sup>8</sup> Deente goondinŋe godde ndokki kam ko mi wuurda faa mi gollana on. <sup>9</sup> Nde ngonnoo-mi to moodon too ndee tawi mido hasindini, mi fawaaki e dow fay gooto e mon. Sabi sakiraaŋe iwŋe Makedoniya 6ee ngaddanii kam ko jakiranoo-mi koo. E oon wakkati, mido wajunoo laatanaade on donngal. Non worri faa hannde duu. <sup>10</sup> Goonga Almasiihu gonŋo e am oo kaalanami on: ley leydi Akaya ndii fuu fay gooto waawaa haŋude kam mantoraade ko mi laatanaaki on donngal koo. <sup>11</sup> Ko saabii so ngadir-mi non? Saabe mi yidaa on ngadir-mi non naa? Laamdo ana anndi mido yidi on!

<sup>12</sup> No ngorrunoo-mi nii, mi heddoto e worruude non. Sabi yogaaŋe ana tewta laawol mantoraade ko 6e ngorri no amen nii koo. Ngol laawol, mido yidi haŋude 6e ngol. <sup>13</sup> Been yo nelaaŋe peneeŋe yo gollooŋe jammbootooŋe yo 6oorniiŋe saaya nelaaŋe Almasiihu. <sup>14</sup> Dum haaynaaki, sabi fay Ibiiliisa ana 6oornoo saaya malaa'ika jom fooyre. <sup>15</sup> Ndennoo haaynaaki duu so gollanooŋe Ibiiliisa 6oorniima saaya gollanooŋe foocitaare. Kaa jukkungo maŋŋe laatoto hakke golle maŋŋe.

### *Haala torraaji kewtiidi Pool*

<sup>16</sup> Mi haalanii on naanen, mido wiya on kasen duu: pati fay gooto e moodon nanngira kam kaahaango. Kaa fay so on nanngirii kam non, njaŋee kaandi am dii, yalla miin duu mido mantoo seeda. <sup>17</sup> Nde mantortoo-mi nii ndee, wanaa no gollanoowo Laamdo nii kaaldan-mi, no kaandudo nii kaaldan-mi. <sup>18</sup> Sabi heewŋe ana mantoro kulle aduna, miin duu, mido waawi mantaade. <sup>19</sup> Sabi onon jogoriibe ko'e mum'en yo hakkilante'en 6ee, odon njarranii haandube 6ee no weliri on. <sup>20</sup> Goonga, odon muja nelaaŋe peneeŋe 6ee maccina on, jaama jawdi mon, njana on, pamdina on, piya on banaaje. <sup>21</sup> Mido yaagoo wiide on miden lo'unoo e majjum sanne.

Tawee nee, huunde fuu ko 6e cuusi mantoraade kamŋe, mido suusi mantoraade dum miin duu. Mido haalda doo hono no mi kaandudo nii. <sup>22</sup> So 6e Yahuudiyankooŋe, miin duu mi Yahuudiyanke. So 6e Israa'iilankooŋe, miin duu mi Israa'iilanke. So 6e iwdi Ibarahiima, miin duu mi iwdi Ibarahiima. <sup>23</sup> So 6e gollanooŋe Almasiihu, miin 6uri 6e fuu laataade dum – doo kaaldanmi hono no mi kaandudo nii. Miin 6uri 6e tiinnaare, 6uri 6e uddeede kasu, 6uri 6e fiyeede. Wakkati fuu, mido hosa maayde. <sup>24</sup> Cili joy Yahuudiyankooŋe ana piya kam, cilol fuu dorrii capantati e jeenay. <sup>25</sup> Cili tati Romankooŋe ana piya kam cabbi. Mi wedaama kaaye cilol gootol. Cili tati mido naata laana ana mutida e am, mi doyii jemma e jalooma ley geeci. <sup>26</sup> Mido e laawol wakkati fuu, mido e farati banngal maaje e banngal yanooŋe, banngal lejol am e banngal leji goddi, mido e farati e ley geelle e ley ladde jeereende, ley geeci e ley sakiraaŋe peneeŋe. <sup>27</sup> Mi gollii faa mi tampii, wakkati fuu mi daanataako doyngol juutungol. Mi yolbii, mi domdii, wakkati fuu mido hoora, mi jaangaama, mi holii. <sup>28</sup> Mi haalaali ko heddii koo so wanaa huunde wootere: pannde fuu milooji banngal deente goondinŋe dee fuu ana kabfi hoore am. <sup>29</sup> So won lo'udo, loore mum ana hewta kam. So won pergitiido, ana jawna yonki am.

<sup>30</sup> So ana tilsi mi mantoo, loore am ndee mantortoo-mi. <sup>31</sup> Laamdo ana anndi mi fenaali. Jettooje ngoodanii mo kanko Baaba Iisaa Joomiraado men oo faa abada. <sup>32</sup> Nde ngonnoo-mi Damas ndee, battaa kaananke biyeteedo Aretas joyyiniino yimŋe faa kayba ngeenndi ndii yalla ana nannga kam,

33 kaa ngadaa-mi e ley sagiire, ndiwniraa-mi e falanteere tatawol ngeenndi ngol, njippinaa-mi caggal mayri, teetori-moo-mi.

## 12

### *Haala ko Laamdo bannginani Pool*

<sup>1</sup> Ana tilsi mi mantoo fay so gasaa. Dum e taweede, mi haalan ko yellitii e am, kajum e ko Joomiraado bannginani kam koo. <sup>2</sup> Ana foti duubi sappo e nay, gorko gooto mo anndu-mi, kabbiido e Almasiihu, njabbinaama faa dow kammu burdo fuu toowde. Mi anndaa yalla terde makko duu njabbinaama naa njabbinaaka, Laamdo tan anndi. <sup>3-4</sup> Mido anndi oon gorko naannaama alijenne – omo heddorii terde makko dee naa mo heddoraaki de? Mi anndaa, Laamdo anndi – o nani ton haala daduka hakkille ka gii-aadama fotaa haaltude. <sup>5</sup> Kanko mantortoo-mi, mi mantortaako hoore am so wanaa e loore am. <sup>6</sup> Fay so mi muuyiino mantaade, mi haandaali, sabi goonga kaalannoo-mi. Kaa mido nanta hoore am e majjum, pati yimbe miila mido buri ko njii mido wada naa ko nani mido haala. <sup>7</sup> Ko Laamdo loowi e am koo ana dadi hakkille, kaa pati mi mawninkinoroo dum, ko wa'i hono gi'al suufaama e terde am, dum woni nelaafo Ibiliisa ana fiya kam faa hada kam mawninkinaare fuu. <sup>8</sup> Cili tati mido jaagoo Joomiraado yo doofanam ngal, <sup>9</sup> kaa o wii kam: «Hinnee am oo heyii ma, sabi baawde am e loore ki66irta.» Saabe dum mi beydiima seyaade e mantaade dow loore am ndee, yalla baawde Almasiihu dee ana tawee e am. <sup>10</sup> Dum saabii so mido seyoroo loore e jennooje e cadeele e torraaji e wembere fuu kammari Almasiihu. Sabi nde lo'u-mi fuu, nden keban-mi semmbe.

### *No Pool sujliri banngal Korintunkoo6e*

<sup>11</sup> Mi haaldii hono no mi kaandudo, kaa onon ngaddani kam haalirde non. Onon kaannoo jinngande kam, sabi fay so mi wanaa fay huunde, kalahali moodon mawdi dii, dum woni nelaafe moodon 6ee, burdaali kam fay huunde. <sup>12</sup> Golleeji mawdi e kaayefiiji e taagumansaaji kollooji mi nelaafo ngollaama to mon, kaaddi mujal duu di ngolliraa. <sup>13</sup> Kodum deente goondin6e Iisaa godde dee burdi on, so wanaa ko mi fawaaki e mon koo? Njaafee kam e oon toojanngel!

<sup>14</sup> Jooni, mi lanndiniima warde to mon cilol tata6ol, mi fawataako e mon. Wanaa jawdi moodon tewtan-mi, onon e ko'e mon tewtan-mi. Sabi wanaa 6i66e kaani fagganaade saaraabe mum'en jawle, saaraabe kaani fagganaade 6i66e mum'en jawle. <sup>15</sup> Miin, mi seyorto hokkude on ko njogii-mi fuu, mi seyorto hokkude on fay hoore am, yalla mido walla on. So mi mawninii jilli am e moodon, on buytoto e yidude kam naa? <sup>16</sup> Ndennoo en kawrii mi fawanooki e dow mon, kaa wiyaama mi yonjii on, mi hebirii on hiila. <sup>17</sup> Won nelaafe am 6e nelir-mi faa mi jaama jawdi mon naa? <sup>18</sup> Titus jaagii-mi yo yaa to moodon, neldidin-mi e mum sakiike men oo. Titus jaamaali jawdi moodon, goonga naa pene? Wanaa minen ngoni miilo wooto e laawol gootol naa?

<sup>19</sup> Booyii odon miila min la66inoo6e ko'e amen yeeso moodon. Kaa ko min ngadata dee, miden kaalda yeeso Laamdo ley ha66agol amen e Almasiihu. Sakiraabe horsufe, ko min ngadata koo fuu, yalla odon njaara yeeso. <sup>20</sup> Mido hula, so mi warii to moodon, pati mi tawira on no mi yidaa, tawiron kam no on njidaa. Mido huli pati mi tawda on e poodondiral e haasidaaku e konnaagu e tikkere e nijondiral e joore e mawninkinaare e fitina. <sup>21</sup> Mido hula, so mi wirfitiima to moodon, pati Laamdo hoyna kam hakkunde mon kasen, mi

sunja saabe heewŋe luuttunooŋe 6e tuubaali iwde e tuundi mum'en e fijirde mum'en e njaahilaaku mum'en.

## 13

### *Baynondiral*

<sup>1</sup> Mido wara to mon jooni cilol tataŋol. «Huunde fuu ko neddo happaa ana hasindini e seedaaku yimŋe didon naa taton.»\* no winndorii nii. <sup>2</sup> Mi haalaniino luuttunooŋe nde ngonnoo-mi to mon cilol didaŋol ndee, jooni duu ko mi walaa to mon koo, mido haaltana 6e kasen kamŋe e heddiife 6ee fuu: so mi wartii, mi yurmataako fay gooto. <sup>3</sup> Onon, odon tewta finnde holloore Almasiihu oo e am haalirta haala mum. On keban finnde ndee duu. Almasiihu lo'aali banngal moodon, mo cemmibidido e moodon. <sup>4</sup> Sabi o tontiraama e leggal bardugal dow loore makko, kaa omo wuurdi baawde Laamdo. E ley haabagol amen e makko, min lo'ube, kaa min kollan on, miden nguurdira e makko dow baawde Laamdo.

<sup>5</sup> Yeewtee ko'e mon faa njiyon so odon ngoondini, taykitee ko'e moodon. Tama on maataali Iisaa Almasiihu ana e moodon? So on maataali, yeewtagol mon ngol ana holla on ngalaa e goonga. <sup>6</sup> Kaa mido joonndorii on anndan minen banngal amen miden e goonga. <sup>7</sup> Miden jaagoo Laamdo pati ngadon fay huunde ko boni, wanaa faa holla minen miden e goonga, faa ngollon ko moyyi, fay sinndo tawii minen banngal amen, min laatii hono 6e ngalaa e goonga. <sup>8</sup> Sabi min mbaawaa yeddude goonga oo, ko min mbaawi dee, daranaade mo. <sup>9</sup> So min lo'ii tawi onon odon njogii semmbe, miden ceyii hen, min jaagoto Laamdo faa laato-don hiŋŋube. <sup>10</sup> Saabe dum, mido winndana on dum gila mi waraali tafon, yalla so mi warii, pati mi bonna e moodon hakke baawde de Joomiraado oo hokki kam dee. Ko ndokkiraa-mi de, faa yaara yeeso, wanaa faa wurjina.

<sup>11</sup> Sakiraaŋe, walaa ko heddii so wanaa waynaade. Poodanee hiŋŋube, njabee waajeede, njogee miilo wooto, nguuree e jam. Nden, Laamdo Jom jilli e jam oo wondan e moodon. <sup>12</sup> Yo gooto e moodon fuu jowtir bannidum jowtaango wondungo e jilli. Seniife 6ee fuu ana njowta on.

<sup>13</sup> Yo hinnee Joomiraado men Iisaa Almasiihu e jilli Laamdo e deental moodon e Ruuhu Ceniido oo ngonu e moodon, on fuu!

---

\* 13:1 Fillitagol Tawreeta 19.15



## Bataaki Pool faade e Galaatiyankooŋe

<sup>1</sup> Oo bataaki ga am iwri, miin Pool nelaado oo. Wanaa yimbe neli kam, mi neliraaka saabe neddo fuu, Iisaa Almasiihu jaati neli kam, kaŋum e Laamdo Baabiraado men immintindo mo e maayde oo. <sup>2</sup> Miin e sakiraaŋe wondube e am bee fuu, miden mbinnda oo bataaki faade e mon, onon deente goondinbe Iisaa gonde leydi Galaatiya dee. <sup>3</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu. <sup>4</sup> Almasiihu hokkitirii hoore mum kammari luutti men yalla ana dannda en e oo jamaanu bondo. Nii o wadiri sago Laamdo Baabiraado men. <sup>5</sup> Yo teddeengal woodan Laamdo faa abada abadin. Aamiina.

### *No Kabaaru Lobbo oo laatorii gooto*

<sup>6</sup> Ana haayni kam sanne no njaawir-don yoppude Laamdo, noddirdo on moyyere Almasiihu oo, so njokku-don kabaaru lobbo goddo. <sup>7</sup> Wanaa wiide kabaaru lobbo goddo won, kaa yimbe ana njiiba on, ana njidi waylitinde Kabaaru Lobbo haala Almasiihu oo. <sup>8</sup> So neddo waajike on ko seerti e Kabaaru Lobbo mo min mbaajii on oo, fay so minen e ko'e amen naa so malaa'ika iwdo dow kammu, yo kuddi wonu e joomum. <sup>9</sup> Min kaalaniino on dum, jooni duu mido haaltana on: so neddo waajike on ko seerti e Kabaaru Lobbo mo ke6-don oo, yo kuddi wonu e mum.

<sup>10</sup> Dum nee, yarraamuya yimbe ndaaran-mi naa yarraamuya Laamdo? Tama ko welata yimbe ndaaran-mi? So faa jooni mi ndaarannoodo ko welata yimbe, mi laatataakono maccudo Almasiihu.

### *No Pool laatorii nelaado*

<sup>11</sup> Sakiraaŋe, mido yidi paamon: Kabaaru Lobbo mo mbaajotoo-mi oo, wanaa e neddo iwi. <sup>12</sup> Sabi wanaa neddo hokki kam mo, wanaa neddo jangini kam mo, Iisaa Almasiihu bannginani kam mo. <sup>13</sup> On nanii no ngorrunoo-mi arande e ley diina Yahuudiyankooŋe oo. Mi torririi deental goondinbe Iisaa ngal no mbaawru-mi fuu, mi siinii wurjinde ngal. <sup>14</sup> Mido burnoo heewbe e waaldeeŋe am Yahuudiyankooŋe jokkude diina Yahuudiyankooŋe, kaŋum e hirande neesuui njaatiraaŋe amen. <sup>15</sup> Kaa Laamdo subike kam gila mi finaali, noddi kam saabe moyyuki mum nde muynoo ndee, <sup>16</sup> o bannginani kam Biyiiko yalla mido waajoo kabaaru mum ley heeferbe. Oon wakkati, mi lamndondiraali e fay gooto, <sup>17</sup> mi yahaali Urusaliima to adibe kam laataade nelaabe bee, njaa-mi don e don leydi Arabiya, ngartu-mi Damas. <sup>18</sup> Duubi tati caggal mum, njaa-mi Urusaliima yalla mido anndondira e Piyeer. Ngondum e makko balde sappo e joy. <sup>19</sup> Mi yiyaali nelaado fay gooto, so wanaa Yaakuuba mijii Joomiraado oo. <sup>20</sup> Ko mbinndan-mi on doo koo, hakkunde am e Laamdo mbinndir-mi, mi fenaali. <sup>21</sup> Caggal dum, njaa-mi leydi Siriya e leydi Silisi. <sup>22</sup> E oon wakkati, deente kabbiide e Almasiihu gonde leydi Yahuudiya dee meedaali yiirude kam gite mum'en. <sup>23</sup> Be nananno tan ana wiyee: «Neddo torrannoodo en nden oo, ana waajoo jooni diina ka siinunoo jifude kaa.» <sup>24</sup> Ebe teddinannoo Laamdo saabe am.

## 2

*No nelaar6e njabirani Pool*

<sup>1</sup> Duu6i sappo e nay caggal mum, njabbitin-mi kasen Urusaliima, miin e Barnabas. Titus duu ana wondi e amen. <sup>2</sup> Mi yaarii ton saabe ko Laamdo bannginani kam koo. Mi hawritii ton e maw6e deental goondin6e, miin tan e ma66e, mi anndinii 6e Kabaaru Lobbo mo mbaajii-mi 6e nganaa Yahuudiyankoo6e oo. Sabi mi yidaa golle am ya66iido oo e mo jooni oo fuu laato meere. <sup>3</sup> Kaa fay Titus jaado am oo, kaɓum e taweede yo Yunaninke fuu, tilsinaaka taadeede. <sup>4</sup> Dum e taweede sakiraa6e penee6e coorike e deental goondin6e ngal. Ko 6e ndaarti dee, anndande ndimaaku mo ke6-den e ley ha66agol men e Iisaa Almasiihu oo faa 6e ngartira en e maccungaaku. <sup>5</sup> Min njabanaali 6e fay wakkati gooto yalla goonga Kabaaru Lobbo oo ana heddanoo on. <sup>6</sup> Haya, jogoraa6e maw6e 6ee, no 6e njogoranoo nii, miin walaa ko hilli kam e majjum, sabi Laamdo 6urdintaa yim6e. Been maw6e tilsinaali min goddum fey. <sup>7</sup> Be paamii Laamdo halfini kam waajaade Kabaaru Lobbo oo faade e 6e nganaa Yahuudiyankoo6e, hono no halfiniri Piyeer waajaade Yahuudiyankoo6e 6ee nii. <sup>8</sup> Sabi no Laamdo neliri Piyeer hakkunde Yahuudiyankoo6e 6ee nii, non o neliri kam miin duu hakkunde heefer6e. <sup>9</sup> Yaakuuba e Piyeer e Yuhanna, nuyde deente goondin6e teddi-naade dee, nde njiinoo moyyere nde Laamdo hokki kam ndee, 6e ndokki kam miin e Barnabas fuu juude faa tabintina kawral hakkunde amen. Ndennoo minen, min njaha to heefer6e, kam6e 6e njaha to Yahuudiyankoo6e. <sup>10</sup> Ko 6e naagii min tan, min miccitoloo misikiina'en 6ee. Mi tiinnike e majjum jaati.

*No Pool njiniri Piyeer to Antiyokiya too*

<sup>11</sup> Kaa nde Piyeer wari e ngeenndi mbiyeteendi Antiyokiya ndee, mi jinii dum yeeso yim6e sabi o boofudo. <sup>12</sup> Sabi fade nelaar6e Yaakuuba 6ee warde, omo ɓaamdannoo e goondin6e Iisaa 6e nganaa Yahuudiyankoo6e. Kaa nde been ngarnoo ndee, o wodditii 6e nganaa Yahuudiyankoo6e 6ee, o njooti ɓaamdude e mum'en, hultude jokku6e sariya taadagol 6ee. <sup>13</sup> Yahuudiyankoo6e goondin6e Iisaa wo66e duu tawti mo faa na6i fay Barnabas e naafigaaku mum'en. <sup>14</sup> Nde njiinoo-mi no 6e ngorri nii dar-taaki, e6e ngoorti goonga gon6o e Kabaaru Lobbo oo, mbii-mi Piyeer yeeso yim6e fuu: «Aan Yahuudiyanke, a worraano doo hono no Yahuudiyankoo6e ngorri nii, no lepi goddi dii ngorri nii ngorrno-daa. Hono mbaawru-daa tilsinirde yim6e 6e nganaa Yahuudiyankoo6e 6ee kinaa laato hono no Yahuudiyankoo6e nii?»

*No Laamdo hisinirta yim6e saabe goondinal*

<sup>15</sup> Minen, min iwdi Yahuudiyankoo6e, min njeyaaka e lepi goddi luuttooji dii. <sup>16</sup> Tawee nee, miden anndi neddo nanngirtaake poocciitido saabe jokku-gol Sariya Muusaa oo, e goondinal mum Iisaa Almasiihu nanngirtee pooc-citiido. Minen duu min ngoodnini Iisaa Almasiihu, yalla miden nanngiree foocciiti6e saabe goondinal amen Almasiihu, tawee wanaa jokkugol Sariya Muusaa. Sabi fay gooto nanngirtaake poocciitido saabe jokkugol Sariya Muusaa. <sup>17</sup> Minen, miden ndaarta nanngireede foocciiti6e saabe ha66agol amen e Almasiihu. E ley majjum so min tawaama min luuttoo6e minen duu hono no 6e nganaa Yahuudiyankoo6e 6ee nii, dum ana holla Almasiihu yo daraniido luuttal naa? O wanaa! <sup>18</sup> Sabi so mi wii mi maatoto ko ngurjinnoo-mi, mi tabintinanno mi bofoowo. <sup>19</sup> Kaa banngal Sariya Muusaa, miin mi maaydo, Sariya oo jaati wadi dum, yalla mido wuurana Laamdo. Mi

tontidaama e Iisaa Almasiihu dow leggal bardugal, <sup>20</sup> mi wuuraa miin e hoore am, Almasiihu wuuri ley am. Nguurndam neddo dam nguuran-mi jooni dam, e ley goondinal Bii Laamdo nguuran-mi dam, oon jiddo kam so hokkitiri hoore mum saabe am. <sup>21</sup> Mi tippitataako moyyere Laamdo ndee. Sabi so tawii jokkude Sariya oo wadata neddo pooccitiido, Almasiihu oo maayii meere.

### 3

#### *Haala jokkude Sariya Muusaa naa goondinde Iisaa*

<sup>1</sup> Eehey Galaatiyankooŋe, woy odon pamdi hakkille! Homo dawri on? On cifanaama faa laaŋi paca no Iisaa Almasiihu tontiraa e leggal bardugal. <sup>2</sup> Njaabee kam dum doo tan: saabe jokkude mon Sariya Muusaa kebir-don Ruuhu Ceniido oo, naa on kebirii mo saabe on nanii Kabaaru Lobbo oo, on ngoondinii? <sup>3</sup> Kodum famdiniri on nii hakkille? On puddirii sembe Ruuhu Laamdo oo, hono njidir-don jooni timminirde tiinnaare mon jaati? <sup>4</sup> Ko hewtii on koo fuu laatike meere naa? Dum waawaa laataade meere. <sup>5</sup> Dokkoowo on Ruuhu so wada kaayde hakkunde mon oo, dum nee saabe odon njokki Sariya o wadirta dum naa saabe on nanii Kabaaru Lobbo on ngoondinii?

<sup>6</sup> Nii winndorii: «Ibarahiima goondinii Laamdo, Laamdo jatorii mo saabe majjum mo pooccitiido.»\* <sup>7</sup> Ndennoo anndee: goondinbe 6ee, kaŋum'en jaati ngoni iwdi Ibarahiima. <sup>8</sup> Sappaama e ley Binndi, Laamdo nanngiran 6e nganaa Yahuudiyankooŋe 6ee fooccitiioe saabe goondinal mum'en. Dum saabii so Binndi ddi mbiyani Ibarahiima oo kabaaru lobbo gila wadaali tafon: «Lepi ddi fuu kebiran barke saabe maa.»† <sup>9</sup> Ndennoo, goondinbe fuu keban barke no Ibarahiima goondindo oo heŋiri barke nii. <sup>10</sup> Kaa fawbe jikke mum'en e jokkude Sariya Muusaa, yo hudaabe. Sabi ana winndii: «Kuddi woodanii neddo fuu mo jokkaali faa hiŋbi ko woni e dewtere Sariya ndee fuu.»‡ <sup>11</sup> Tayoral, fay gooto nanngirtaake pooccitiido yeeso Laamdo saabe Sariya oo. Sabi ana winndii: «Pooccitiido wurdan goondinal.»§ <sup>12</sup> Sariya oo noo fawaaki e goondinal, sabi ana winndii: «Jokkudo Sariya oo wurdan saabe Sariya.»\* <sup>13</sup> Almasiihu soottitike en iwde e kuddi ndi Sariya oo fawi e men ndii, ko mo roondanii en ndi koo. Sabi ana winndii: «Bilaado e leggal bardugal fuu yo kudaado.»† <sup>14</sup> Dum Iisaa wadi yalla 6e nganaa Yahuudiyankooŋe 6ee duu ana kefa barke mo Ibarahiima hebi oo saabe Iisaa Almasiihu, kebiran Ruuhu podaado oo e ley goondinal.

#### *Haala Sariya e fodoore*

<sup>15</sup> Sakiraabe, mido sifanoo on ko woodi nannde fuu koo: so neddo moyyini talkuru ndonu no sariya laamu jabiri nii, fay gooto waawaa imminde dum, waawaa beydude hen fay huunde. <sup>16</sup> Laamdo wadani Ibarahiima e iwdo e mum podooje. Binndi ddi mbiyaali: «Iwbe e mum», hono no di cappike heewbe, gooto nii di cappii nde di mbii: «Iwdo e maa». Dum woni Almasiihu oo. <sup>17</sup> Ko njidu-mi wiide koo annii: aadi ndi Laamdo fibi ndii, Sariya gardo duubi teemedē nay e capantati caggal mum oo fibataa dum, bonnataa fodoore Laamdo ndee. <sup>18</sup> Sabi so ndonu mo Laamdo fodunoo oo e Sariya

\* 3:6 Puɗɗooɗe 15.6 † 3:8 Puɗɗooɗe 12.3 ‡ 3:10 Fillitagol 27.26 § 3:11 Habaakuk 2.4

\* 3:12 Lewinkooŋe 18.5 † 3:13 Fillitagol Tawreeta 21.23

oo fawinoo, mo fawatanooko e fodoore ndee. Kaa noo, saabe fodoore ndee Laamdo hokkiri moyyere mum ndee Ibarahiima.

<sup>19</sup> Ndennoo, ko Sariya Muusaa nafata? O waddiraama faa o ɓanngina luutti faa nde iwdo e Ibarahiima podanaado fodoore ndee oo wari fuu. Laamdo hokki yimbe Sariya oo, o hokkiri ɓe malaa'ika'en, kaɗum e curoowo.

<sup>20</sup> Kaa so gooto tan curoowo nafataa. Fodoore ndee, Laamdo tan fodi.

<sup>21</sup> Ndennoo, Sariya oo ana luuttondiri e podooje Laamdo dee naa? Luuttondiraa! Sinndo sariya baawdo hokkude yimbe nguurndam jippinanooma, foocitaare iwanno e sariya oo jaati. <sup>22</sup> Kaa Binndi dii mbii aduna oo fuu, luutti mari dum, yalla goondinbe ɓee fuu ana ndokkee ko podanaa koo saabe goondinal mum'en Iisaa Almasiihu.

<sup>23</sup> Fade wakkati goondinal warde, en kawjanooma ley hawju Sariya faa goondinal ngal ɓannginaa. <sup>24</sup> Honon Sariya oo laatorii dowoowo en faa wakkati mo Almasiihu wari e mum oo, yalla eden nanngiree foocitiibe saabe goondinal ngal. <sup>25</sup> Jooni ko wakkati goondinal ngal wari koo, en njaltii e maral dowoowo oo.

<sup>26</sup> Jonnoo, on fuu on ɓiɓɓe Laamdo saabe goondinal mon Iisaa Almasiihu. <sup>27</sup> On fuu on kaɓɓike e Almasiihu saabe looteede mon lootogal batisima. Honon nii ɓoornori-don mo no kaddungal nii. <sup>28</sup> Ndennoo, ceenndiigu walaa hakkunde Yahuudiyanke e Yunaninke, naa dimo e diimaajo, naa gorko e debbo, on fuu on gootum e haɓɓagol mon e Iisaa Almasiihu. <sup>29</sup> So tawii Almasiihu jey on, on iwdi Ibarahiima, on ndonan ko Laamdo fodunoo koo.

## 4

<sup>1</sup> Mido wafana on misaalu: so nii donoowo yo cukalel, walaa fuu ko seenndata dum e maccuɗo, tawee nee kaɗum jey jawdi ndii fuu. <sup>2</sup> Mo heddoto ley hawju haybooɓe mo e dawranooɓe jawdi makko faa sarti mo baaba makko sartanii mo oo yottoo. <sup>3</sup> Enen duu, nde en sukaabe ndee, en maccuɓe semmbeeki aduna dii. <sup>4</sup> Kaa nde wakkati cartaaɗo oo hiɓɓi ndee, Laamdo neli Bajjo muudum mo debbo rimi, dowtaniido Sariya Muusaa, <sup>5</sup> yalla omo soottitoo wonbe e ley Sariya ɓee, keɓen laataade ɓiɓɓe Laamdo. <sup>6</sup> Kammari on ɓiɓɓe makko, Laamdo nelii RuuhuBiyum oo e ley ɓerde men. Ruuhu oo wadata so noddiren Laamdo «Abba». <sup>7</sup> Hankasen, en nganaa maccuɓe, en ɓiɓɓe. Kammari en ɓiɓɓe, Laamdo duu wadii en ronooɓe.

### *No Pool hultirani Galaatiyankooŋe*

<sup>8</sup> Nden, nde on anndaano Laamdo ndee, oɗon ngonnoo e maral reweteɓe ɓe nganaa reweteɓe jaati ɓee. <sup>9</sup> Kaa jooni ko anndu-don Laamdo koo, naa mido haannoo wiide jooni ko Laamdo anndi on koo: hono mbaawirton wirfitaade e semmbeeki aduna lo'udi di ngalaa nafaa dii? Ko saabii so oɗon njidi laataade maccuɓe majji kasen? <sup>10</sup> Oɗon teddini jalaade yogaaje e lebbi yogaaji e wakkatiiji yogaaji e kitaale yogaaje. <sup>11</sup> Mido huli pati golle mo ngollan-mi on oo fuu mursee.

<sup>12</sup> Sakiraaɓe, mido ndaarda on, mba'ee no am nii, sabi miin duu mi laatinoke hono mon. On ngadaali kam baasi fuu, <sup>13</sup> sabi oɗon anndi raficellal waddani kam haalande on arannde Kabaaru Lobbo oo. <sup>14</sup> Naw am oo ittii koro mon, dum fuu e taweede on njawaali kam on nefaali kam kammari jaw oo. Ko ngadu-don dee, on njaɓɓorike kam no malaa'ika Laamdo nii, naa hono mi Iisaa Almasiihu. <sup>15</sup> Oon wakkati, oɗon keewnoo seyo sanne! Mido waawi seettanaade on: so oɗon mbaawnoo, on doofanno gite mon ndokkon kam. Ndennoo hono seyo mon ngoo laatii? <sup>16</sup> Mi laatike gajo mon

saabe mido haalana on goonga naa? <sup>17</sup> Anniya mo been yimbe njoganii on oo moyyaa. Ko be njidi dee, seenndude on e am yalla odon ndaranoo be. <sup>18</sup> Sikke walaa, daranaade neddo ana moyyi so faa moyya, kasen duu waajibi dum wadee wakkati fuu, wanaa yeeso am tan. <sup>19</sup> Sukaaŋe am, kammari mon mido naawaa kasen naawalla naawdo hono no njatawera nii, faa mbaadi Almasiihu tawee e mon. <sup>20</sup> Hee mi yidii tawdeede e mon jooni yalla mido heba haaldude e mon ko wanaa no kaaldirannoo-mi e mon nii, sabi kabaaru mon ana wemmbinii kam sanne.

### *Haala aadi kiinndi e aadi keyri*

<sup>21</sup> Onon yidube jokkude Sariya Muusaa, mido lamndoo on: on nanaali ko Sariya wii naa? <sup>22</sup> Ana winndii: Ibarahiima ana joginoo bi66e wor6e didon, gooto o he6di dum e kordo, goddo oo o he6di dum e dimo. <sup>23</sup> Bii kordo oo rimiraama no yimbe fuu ndimirtee nii, kaa bii dimo oo rimiraama saabe fodoore Laamdo. <sup>24</sup> Won ko saawii e ley kaa janta. Rew6e didon bee ana capporaa aadiiji didi. Ngootiri, ndi Haajara ndii yo aadi waamnde haayre wiyeteende Siinaayi ndii. Kayri, maccungaaku ndi rimata. <sup>25</sup> Haajara yo waamnde haayre wiyeteende Siinaayi wonnde Arabiyya ndee, ende sapporaa ngalluure Urusaliima hannde ndee. Sabi Urusaliima e hodube e mum bee fuu e margal ngonni. <sup>26</sup> Kaa Urusaliima gondo dow kammu oo yo dimo, kanko woni inna men. <sup>27</sup> Sabi ana winndii:

«Aan dimaro mo meedaali rimude,  
welta!  
Aan mo anndaa naawalla njatawera,  
ilina gullaali seyo!  
Sabi debbo jeebaado heban sukaaŋe

faa fura debbo kaybaado gorum.»\*

<sup>28</sup> Kaa onon sakiraaŋe, on bi66e hebaaŋe dow fodoore Laamdo ndee hono no Isiyaaka nii. <sup>29</sup> Nden, dimiraado no yimbe ndimirtee nii, ana torra dimiraado Ruuhu Laamdo oo. Fay hannde duu non worri. <sup>30</sup> Kaa kodum Binndi dii mbii? Di mbii: «Ribbu kordo oo e biyum, sabi bii kordo oo rondataa e bii dimo oo abada.»† <sup>31</sup> Ndennoo sakiraaŋe, en nganaa bi66e kordo oo, en bi66e dimo oo.

## 5

### *Haala ndimaaku goondinbe Iisaa*

<sup>1</sup> Almasiihu rimdinii en yalla eden ndimda dor. Dum nee, tiinne pati on ngartire e maccungaaku. <sup>2</sup> Kettinane kam! Miin Pool, mido wiya on: so on njabii taadeede, Almasiihu nafataa on fay huunde. <sup>3</sup> Kasen mido haalana neddo fuu jabuudo taadeede: ana tilsi e mum jokkude Sariya Muusaa oo fuu. <sup>4</sup> Onon tewtoobe nanngireede fooccitiibe saabe Sariya bee, on seertube e Almasiihu, on ngodditiima moyyere Laamdo ndee. <sup>5</sup> Kaa minen, kammari goondinal miden pawa jikke amen e Laamdo nanngiroowo en fooccitiibe oo. Dum woni ko min njoonndorii saabe Ruuhu oo. <sup>6</sup> Sabi ka66iidu e Iisaa Almasiihu, taadagol e waasude taadagol fuu fotu, ko nafata tan, goondinal tabintinoawal jilli.

<sup>7</sup> On puddirii no woodi. Homo hadi on jokkude goonga? <sup>8</sup> Ko wayliti hakkille mon ko iwraali to Laamdo noddudo on oo. <sup>9</sup> Ana wiyee: yuufinirdi seeda ana yuufina conndi farani njiibaandi fuu. <sup>10</sup> Dum fuu e taweede

\* 4:27 Esaaya 54.1 † 4:30 Puddoode 21.10

Joomiraado hokkii kam hoolaare e mon, mi tayorii miilo mon seerataa e miilo am. Kaa jii6oowo on oo, ko waawi laataade fuu, jukkete. <sup>11</sup> Kaa miin sakiraa6e, so tawii faa hannde mido waajoo kinaa neddo taadee, ko saabii so mido torree faa jooni? Sinndo dum mbaajotonoo-mi, waaju am haala maayde Iisaa dow leggal bardugal mettataano fay gooto. <sup>12</sup> Jii6oo6e on 6ee, yo 6e der ko'e mab6e.

<sup>13</sup> Sakiraa6e, on noddaama faa ndim-don. Jonnoo, pati ngadee so ndi-maaku mon laatanoo on sabaabu faa njokkon gidaade yonki. Ko kaan-don wadude dee, homo fuu gollana goddo e dow jilli. <sup>14</sup> Sabi Sariya oo fuu wadaama e ley ndee yamiroore wootere: «Njidiraa tanaa maa no njidir-daa hoore maa nii.»\* <sup>15</sup> Kaa so odon njatondira, odon jaamondira hono no dawaadi nii, njeertee pati on timmondir.

### *Haala Ruuhu Ceniido, kaɗum e gidaade yonki*

<sup>16</sup> Ndennoo, mido wiya on: dalee Ruuhu Ceniido dowa on, nden on njokkataa gidaade yonki mon. <sup>17</sup> Sabi gidaade yonki ana ka6a e Ruuhu oo, Ruuhu oo duu ana ha6a e gidaade yonki dee. Hongel e majji fuu ana ha6a e gonggel faa mbaasu-don gollude ko muuy-don. <sup>18</sup> So Ruuhu dowata on, on ngalaa e ley Sariya Muusaa oo hankasen.

<sup>19</sup> Ko gidaade yonki 6annginta yo tuundi e ko so6i e njaahilaaku <sup>20</sup> e dewal tooruuji e mbonobaaku e konnaagu e poodondiral e kiram e tikkere e haawtaare e luurral e rafi-kawral <sup>21</sup> e haasidaaku e sigiro e wanngiyaare e ko nanndi e mum'en. Mido jeertina on dum doo no njeertinirnoo-mi on dum nii, golloo6e kulle baade non 6ee naatataa e Laamu Laamdo oo. <sup>22</sup> Kaa ko Ruuhu Ceniido rimata e men koo woni jilli e seyo e jam e mujal e moyyuki e yurmeende e goondinal <sup>23</sup> e leydinkinaare, kaɗum e nantaare. Tayoral, Sariya oo hadataa kulle baade non. <sup>24</sup> Jeyaa6e e Iisaa Almasiihu 6ee tippitorike himmeeki mum'en e gidaade yonki mum'en fuu caggal, ana wai hono no 6e tontii de e leggal bardugal nii.

<sup>25</sup> Kammari Ruuhu oo ke6ir-den nguurndam kesam dam, ndennoo njokken e Ruuhu, <sup>26</sup> pati mawninkino-den, pati tojondiren, pati haasi-daaku tawee hakkunde men.

## 6

### *No goondin6e kaaniri wallondirde*

<sup>1</sup> Sakiraa6e, so won tawaado ana wada ko boni, onon jogiibe Ruuhu 6ee kaani ooncude dum, tawee e needi. Kaa gooto mon fuu hayba hoore mum pati seyte kaɗum duu. <sup>2</sup> Mballondiree roondaade donnge mon teddude, hono non ki66inirton sariya Almasiihu oo. <sup>3</sup> So neddo miilii won ko woni, tawi walaa ko woni, yojjii hoore mum. <sup>4</sup> Yo gooto fuu yeewto golle mum. So won ko waawi mantoraade, mantorto golle mum jaati, fotaa ko nanndina dum e golle neddo goddo. <sup>5</sup> Sabi gooto fuu donngal mum roondotoo.

<sup>6</sup> Janninteedo konngol Laamdo ngol ana haani fecondirde e janninoowo dum ko he6i ko woodi fuu.

### *No gooto fuu hettirta ko aawi*

<sup>7</sup> Pati njaayree ko'e mon, Laamdo jabataa yaweede. Gooto fuu, ko aawi koo hettata. <sup>8</sup> Aawdo ko welata yonki mum, hettan maayde. Kaa aawdo ko welata Ruuhu Ceniido, hettan hen nguurndam nduumiidam. <sup>9</sup> Pati kaa6en gollude

\* 5:14 Lewinkoo6e 19.18

ko moyyi. Sabi so en kaaŋaali, en kettan so wakkati oo warii. <sup>10</sup> Ndennoo, e ley wakkati keddaniido en oo, ngadanen yimbe fuu moyyere, burbe fuu haandude hen, sakiraaŋe men goondinbe Iisaa Almasiihu be.

### *Baynondiral*

<sup>11</sup> Yeewee dii binndi butti di mbinndiran-mi on junngo am. <sup>12</sup> Tilsinbe on taadeede be, tewtooŋe yalla ana manee. Walaa ko be ngadiri non so wanaa pati be torriree saabe leggal bardugalAlmasiihu ngal. <sup>13</sup> Sabi fay kambe taadaabe be, be njokkataa Sariya. Ko be njidiri taado-don dee, faa be mantoroŋ dum. <sup>14</sup> Miin e hoore am kaa, mi mantortaako kinaa leggal bardugal Joomiraado men Iisaa Almasiihu ngal. Saabe ngal bardugal mi hillaaka e kabaaru aduna, aduna duu hillaaka kam. <sup>15</sup> Sabi taadaade naa waasude taadaade, fayda walaa hen. Ko jogii fayda dee, tagiteede tagu keso. <sup>16</sup> Jokkuŋe ngol laawol fuu, yo kebu jam e hinnee, kambe e Israa'iilankooŋe Laamdo be fuu.

<sup>17</sup> Hankasen fay gooto pati tampina kam, sabi terde am ngadii batitande saabe Iisaa.

<sup>18</sup> Sakiraaŋe, yo hinnee Joomiraado men Iisaa Almasiihu wonu e mon! Aamiina.

## **Bataaki Pool faade e Efeesunkoo6e**

<sup>1</sup> Oo bataaki ga am iwri miin Pool nelaado Iisaa Almasiihu e sago Laamdo. Mido jowta seniibe hoolniibe e ley ha66agol mum'en e Iisaa Almasiihu 6ee. <sup>2</sup> Yo on ke6u moyyere e jam iwde e Baabiraado men Laamdo e Joomiraado men Iisaa Almasiihu.

### *No Laamdo hokkirta yim6e moyyere saabe Almasiihu*

<sup>3</sup> Jettooje ngoodanii Laamdo Baaba Joomiraado men Iisaa Almasiihu gadando en barkeji di Ruuhu oo hokkata dii fuu to dow kammu too saabe ha66agol men e Almasiihu. <sup>4</sup> Sabi fade aduna oo tageede, Laamdo subiima en saabe Almasiihu, yalla eden laato seniibe 6e ngalaa feloore yeeso makko. Saabe jilli makko <sup>5</sup> o hoddiranii en gila arande laato-den bi66e makko saabe Iisaa Almasiihu. Dum woni ko o yidani en saabe moyyuki makko <sup>6</sup> yalla omo yettiree moyyere makko mawnde nde walaa do haadi ndee. Nden moyyere o hokki en saabe Biyiiko korsudo oo. <sup>7</sup> E ha66agol men e makko coottitira-den yiyyam makko dam, luutti meeden njaafaa ko waarata e keewal makko hinnee. <sup>8</sup> Oon hinnee o wayli e meeden, o hokki en hakkilantaaku ki66udo e anndal ki66ungal, <sup>9</sup> mo anndini en sago makko suudinoongo ngoo. Gila arande mo anniyorii tabintinirde ngo Biyiiko oo saabe moyyuki makko. <sup>10</sup> Sago ngoo yo hawrintinde huunde fuu e hawju hooreejo gooto, dum woni Almasiihu, wanaa ko woni dow kammu wanaa ko woni e leydi. Laamdo timminan sago mum ngoo so wakkati hi66ii.

<sup>11-12</sup> E ley ha66agol men e makko, en cubaama, enen faw6e jikke men e Almasiihu gila jooni 6ee. Laamdo tabintiniroowo huunde fuu no muuyiri oo, hoddiranii en laataade sabaabu mawnineede teddeengal mum.

<sup>13</sup> Saabe Almasiihu, onon duu, on nanii konngol goonga ngol, dum woni Kabaaru Lobbo kisindo on oo. Nde ngoondin-don Almasiihu ndee, Laamdo wadii e mon maande mum nde loowi e mon Ruuhu Ceniido podanoodo oo ndee. <sup>14</sup> Oon Ruuhu Ceniido woni pi6iraado moyyereji desanaadi en, faa jannde kabatan soottiteede. Hono non Laamdo yettirtee saabe teddeengal muudum.

### *Haala duwaawu Pool*

<sup>15</sup> Kammari majjum, gila nan-mi kabaaru goondinal moodon Joomiraado men Iisaa, kajum e jilli di njogani-don seniibe 6ee fuu dii, <sup>16</sup> mi seerataa e yettude Laamdo kammari moodon nde jaagantoo-mi on Laamdo fuu. <sup>17</sup> Mido jaagoo Laamdo Joomiraado meeden Iisaa Almasiihu oo, Baabiraado Jom darja, hokka on Ruuhu mum Ceniido gadoowo on hakkilante'en, bannginanoowo on Laamdo faa anndon dum. <sup>18</sup> Kasen duu mido jaagoo Laamdo uddita berde moodon faa paamon jikke mo o hokki on nde o noddii on ndee, paamon no moyyereji desanaadi seniibe dii keewiri e no teddiri, <sup>19</sup> paamon kasen no baawde makko mawde de ngalaa kaaddi dee ngorri e meeden, enen goondin6e 6ee. Deen baawde keewde semmbe <sup>20</sup> o holli e ley Almasiihu nde o wuurtini dum e hakkunde maay6e so o joyyini dum jaamo makko dow kammu, <sup>21</sup> ton o burni dum laamu e baawde e semmbe e kaanankaaku fuu, kajum e inde fuu baawde inndeede, wanaa de hannde dee tan, de jango dee duu. <sup>22</sup> Laamdo fawii Almasiihu dow huunde fuu, hokkii mo laataade hooreejo deental goondin6e, hokkii mo burde huunde



fuu. <sup>23</sup> Deental goondinŋe ngal yo terde Almasiihu. Ngali hebbinaama mo kanko keewoowo huunde fuu e yimbe fuu oo.

## 2

### *No kisindirte-den saabe hinnee Laamdo*

<sup>1</sup> Onon, on maaynoobe saabe junuubaaji moodon e luutti moodon, <sup>2</sup> on jukkunoobe laawol bonngol ngol aduna oo jokki ngol, on dowaaninoobe laamiido baawde gonde dow mbeeyu dee oo. Laamiido oo yo Ibiliisa golloowo faa hannde ley yimbe saliibe Laamdo bee. <sup>3</sup> En fuu e ma66e njeyanoden, e gidaade yonki men ngonno-den, en jukkunoobe gidaade dee, en jukkunoobe miilooji men bondi. No ngorrundo-den nii jaati, eden kaandunoo e jukkungo Laamdo ngoo no ma66e nii. <sup>4</sup> Kaa Laamdo yo keewdo yurmeende. Saabe jilli mawdi di mo yidi en dui <sup>5</sup> mo wuurtindinii en e Almasiihu, enen maaynoobe saabe luutti men bee. Goonga, saabe hinnee Laamdo oo kisindiradon. <sup>6</sup> E ley ha66agol men e Iisaa Almasiihu, Laamdo wuurtindinii en e makko, joyyindinii en e makko to dow kammu too. <sup>7</sup> Hono nii o bannginirta no hinnee makko burdi huunde fuu mawnude. Jamaanuui garooji dui fuu njiyan moyyuki makko ki o wadani en e Iisaa Almasiihu. <sup>8</sup> Saabe hinnee Laamdo oo kisindiradon e dow hoolaade mon Almasiihu. Dam kisindam, wanaa e golle moodon ha66ii, ko dam ha66ii e mum dee, e dokkal Laamdo. <sup>9</sup> Dam wanaa njo6di golle neddo pati fay gooto he6a mantoraade dam. <sup>10</sup> Sabi Laamdo wadi en ko ngon-den jooni koo: e ley ha66agol men e Iisaa Almasiihu o tagiri en faa ngollen gollleeji lobbi di o lanndinanii en gila arande dui.

### *No Almasiihu wadiri en lejol gootol*

<sup>11</sup> Jooni mido haalda e mon onon heefordirnoobe arande bee. Mantoroobe yo «taadiibe» ana koyna on noddira on «yimbe 6e taadaaki» fay so taadagol ma66e ngol ko junngo bii-aadama gollata e terde tan. Ndennoo onon, micitee ko ngonno-den arande koo: <sup>12</sup> oon wakkati, on ngalaano Almasiihu, on jananbe woddiiibe lejol Israa'iila ngol Laamdo subii ngol, on ngalaano e aadiiji pawidi e fodoore Laamdo dui, on nguurdiino on ngalaano jikke, on ngalaano Laamdo e ley aduna oo. <sup>13</sup> Kaa jooni, e ha66agol moodon e Iisaa Almasiihu, onon woddunoobe arande bee on battiniraama saabe yiyam makko dam.

<sup>14</sup> Sabi kanko Almasiihu, kanko woni jam meeden ko o wadi Yahuudiyankoobe e leji goddi fuu lejol gootol koo. Nde o hokkitirnoo hoore makko ndee, nden o wurjini kokowol palaangol ngol, dum woni o ittii nganaandi hakkunde leji dui. <sup>15</sup> O ittii jamirooje e kadaadi Sariya Muusaa fuu faa o wadi Yahuudiyankoobe e leji goddi lejol gootol kesol e ley ha66agol mum e makko. Nii mo wadiri jam oo. <sup>16</sup> E maaygol makko dow leggal bardugal o ittiri nganaandi ndii, mo reentini leji dui laatii terde goote, mo rewrintini de e Laamdo. <sup>17</sup> O warii waajaade on jam onon woddunoobe bee, o warii waajaade badinoobe bee duu jam. <sup>18</sup> Sabi kammari makko en fuu kebirten laawol yottaade Baabiraado saabe Ruuhu Ceniido gooto oo.

<sup>19</sup> Ndennoo, on nganaa jananbe hankasen, on nganaa ho66e duu, ko ngon-den dee, on wondube e seniibe, on jeyaa6e e suudu Laamdo. <sup>20</sup> On mahaama e dow ko nelaabe e annabaabe ni6i, Iisaa Almasiihu e hoore mum woni haayre doofiraande maadi ndii. <sup>21</sup> Kanko wadata maadi ndii fuu nanngondira, faa ndi toowa ndi laato suudu Joomiraado seniindu. <sup>22</sup> Ley ha66agol mon e makko on mahondiraama faa laati-don hodorde Laamdo do o hodiri Ruuhu makko doo.

### 3

#### *No Pool halfniraa golle banngal 6e nganaa Yahuudiyankoo6e*

<sup>1</sup> Saabe dum mido diccanoo Laamdo, miin Pool uddaado kasu saabe Iisaa Almasiihu mo ngollanan-mi hakkunde mon onon 6e nganaa Yahuudiyankoo6e 6ee. <sup>2</sup> Tayoral on nanii kabaaru golle mo Laamdo halfini kam e ley moyyuki mum faa nafa on oo ana haalee. <sup>3</sup> Sabi o 6annginanii kam sirri makko. Mi winndanii on haala majjum no ra66idiri, <sup>4</sup> so on njanngii dum on anndan no paamir-mi sirri haala Almasiihu oo. <sup>5</sup> Oon sirri anndinanooka 6i66e aadama ley jamaanuui jawtudi dii, kaa jooni Laamdo 6annginirii mo Ruuhu Ceniido oo faa nelaarabe mum e annabaa6e mum seniibe fuu paami mo. <sup>6</sup> Annii no sirri oo worri: saabe Kabaaru Lobbo oo, 6e nganaa Yahuudiyankoo6e 6ee ke6iri nge6u e moyyere6eji desaadi dii no Yahuudiyankoo6e 6ee ke6iri nii, kasen duu 6e ndeentii e mum'en terde goote, 6e ndeentii e mum'en fodoore nde Laamdo fodi saabe ha66agol ma66e e Iisaa Almasiihu.

<sup>7</sup> Oon Kabaaru Lobbo laatii-mi golloowo mum. Golle oo yo moyyere nde Laamdo wadirani kam baawde mum. <sup>8</sup> Miin burdo seniibe 6ee fuu famdude oo, mi wadanaama moyyere faa mi waajoo 6e nganaa Yahuudiyankoo6e barke6eji gon6i e Almasiihu di ngalaa do kaadi dii. <sup>9</sup> Mi wadanaama kasen famminde yim6e fuu no Laamdo tagudo huunde fuu oo tabintinirta sirri mum cuudinoo6o gila arande oo, <sup>10</sup> yalla laamu e baawde gon6e e mbeeyu de njiyataake dee fuu ana paama no anndal Laamdo yaajiri e huunde fuu, paamira dum kammari deental goondin6e ngal <sup>11</sup> ko waarata e anniya 6ooydo mo Laamdo tabintiniri Joomiraado men Iisaa Almasiihu. <sup>12</sup> E ley ha66agol men e makko kanko Almasiihu eden mbaawi 6adoraade Laamdo hoolaare saabe ko ngoondin-den mo koo. <sup>13</sup> Saabe dum, mido ndaarda on pati tayon jikke saabe torraaji kewtotoodi kam kammari moodon dii, sabi diin torraaji yo teddeengal moodon.

#### *Haala jilli di Almasiihu yidi en*

<sup>14</sup> Saabe majjum, mido nii diccanoo Baabiraado <sup>15</sup> jeydo lejol gonngol dow kammu e gonngol e leydi fuu oo. <sup>16</sup> Mido jaagoo mo kanko jom teddeengal manngal oo o hokka on semmbe saabe Ruuhu makko Ceniido oo <sup>17</sup> faa Almasiihu wona e ley berde moodon ko ngoondin-don mo koo. Mido jaagoo mo kasen o nii6ina on e ley jilli, o tabintina on ley majji. <sup>18</sup> Non paamirton, onon e seniibe 6ee fuu, no jilli Almasiihu dadudi hakkille dii poti mawnude faa ngalaa do di kaadi, <sup>19</sup> anndon di yalla odon keewa ki66al Laamdo ngal.

<sup>20</sup> Tayoral, Laamdo gollirido ley meeden baawde mawde oo ana waawi gollude ko 6uri duwaawuui men e miilooji men. <sup>21</sup> Yo teddeengal woodan mo ley deental goondin6e saabe Iisaa Almasiihu e ley jamaanuui dii fuu faa abada abadin! Aamiina.

### 4

#### *No goondin6e Iisaa 6ee laatorii terde goote*

<sup>1</sup> Miin uddaado kasu saabe gollande Joomiraado oo, mido ndaarda on: nguuron nguurndam kawroojam e noddaango ngo Laamdo noddii on e mum ngoo <sup>2</sup> tawee e leydinkinaare e newaare e mujal. Tii6ondiron e ley jilli. <sup>3</sup> Ruuhu Ceniido wadirii on gooto e jam ka66ondirido on oo. Tiinno-don e heddaade ley oon ngootummaaku. <sup>4</sup> On terde goote, odon njogii Ruuhu gooto, no jikke mo Laamdo noddii on faade e mum oo yo gooto nii. <sup>5</sup> Kasen Joomiraado gooto woodi, goondinal gootal woodi, batisima gooto woodi,

6 kaɽum e Laamɔ gooto Baaba yimbe fuu, tiimɔ be fuu, golliroowo be fuu, gondo e maɓbe be fuu.

7 Homo e men fuu hebii moyyere Laamɔ ko waarata no Almasiihu hokkiri dum nii. 8 Sabi nii winndorii:

«O ɽabbii dow, o naɓorii honaaɓe heewbe,

o hokkii yimbe dokke.»\*

9 Kodum woni maanaa «o ɽabbii»? Walaa ko woni maanaa majjum, so wanaa o jippinoke e nokkuuje ɓurde fuu leyɗude e leydi ndii. 10 Jippinoɔdo oo, kaɽum e hoore mum woni ɽabbudo faa tiimi kammuuji dii fuu, yalla ana heewa aduna oo fuu. 11 Dokke makko dee annii: o wadi yogaabe nelaaɓe, yogaabe haaltoobe konngol ngol Laamɔ loowi e mum'en, yogaabe waajotoobe, yogaabe duroobe yimbe kaɽum e jannginoobe. 12 Ko o wadiri non, faa o lannina seniibe bee faa mbaawa gollande deental goondinbe, yalla terde Almasiihu dee – dum woni deental goondinbe ngal – ana yaara yeeso e ley goondinal, 13 laato-den daande wootere e ley goondinal meeden e annugol meeden 'Bii Laamɔ oo, kasen duu laato-den hiɓɓube, njotto-den darnde Almasiihu hiɓɓunde ndee. 14 Ndennoo, en laatataako sukaaɓe naɓiraabe bempeeje e kenuuli no laana nii. Jannde yimbe yiduɓe naɓude woɓbe ley majjere yonɽataa en hankasen. 15 Ko laatoto-den dee, haaloobe goonga ley jilli, yaarooɓe yeeso e huunde fuu faade e Almasiihu, oon laatiiɔdo hooreejo oo. 16 Kanko waddani terde dee fuu nanngondirde faa gasa saabe jokkalde de de ndokkaa dee. Hono non, so tergal fuu gollii golle mum, nden terde dee mawnan, njahan yeeso ley jilli.

#### *Haala nedɗaaku keso ley Almasiihu*

17 Ndennoo, ko jokkata koo mbiyan-mi on: mido ndaarda on yeeso Joomiraado pati nguurdon hankasen no heeferbe nii, sabi miilooji maɓbe dii yo ɓoli, 18 hakkillaaji maɓbe njiɓike, be njeyaaka e nguurdam dam Laamɔ hokkata dam saabe majjere maɓbe e tiidugol maɓbe ko'e. 19 Be ngalaa yaage, be ngadii ko'e maɓbe jaahili'en, be noottataa gollude kudde cobude. 20 Kaa onon, wanaa non njanngir-don haala Almasiihu. 21 Tayoral, on nanii kabaaru makko, on njanngii goonga gondo e makko oo. 22 Ndennoo, itte ko hiidɗi ko woni ley mon koo, njoppee nguurdam moodon aranam bonniraadam muuyooji jaayrooji dam, 23 dalon yonkiiji mon e hakkillaaji mon keyɗintinee. 24 Njogitee nedɗaaku keso mo Laamɔ tagi dow mbaadi mum ley senaare e foocitaare goongaraare.

25 Ndennoo, celon fenaande, homo fuu haalda e tanaa mum goonga, sabi homo e men fuu ana jeydaa e goddo no caldi neddo gooto njeydiiri nii. 26 So on mettaama, pati luuttee. Pati janal naange tawdu on e tikkere. 27 Pati ndokkon Ibiliisa laawol e ley mon. 28 Yo gujjo noottu wujjude, ko haani wadude dee, wuura e semmbe terde mum, yalla ana waawa wallude hasindinbe. 29 Pati konngol bonngol yaltu e kundude mon, ko kaan-don wadude tan yo haalde haalaaji nafooji baawɗi naɓude woɓbe bee yeeso e ley goondinal, yalla oɗon ngadana hettintoobe on bee ko moyyi. 30 Pati cunlinee Ruuhu Laamɔ Ceniido oo, kanko wadi maande makko e mon kammari jannde coottitaari mon ndee. 31 Ittee metti fuu e berde moodon, ceeron e konnaagu e tikkere e dukooji e noore, kaɽum e ko boni fuu. 32 Moyyondiree e ko'e mon, njurmondiron, njaafondiron no Laamɔ yaaforii on e ley haɓɓagol mon e Almasiihu nii.

\* 4:8 Jabuura 68.19

## 5

*Haala wuurde e ley fooyre*

<sup>1</sup> Ndennoo, laatee jemmboo6e Laamdo kammari on 6i66e makko 6e o horsini. <sup>2</sup> Nguurdon e yidondirde, no Almasiihu yidiri en so hokkitiri hoore mum saabe men no layyaari nii, no sadaka beldo Laamdo nii. <sup>3</sup> Ko on seniibe Laamdo koo, on kaanaa fay haalde haala huunde fuu ko wartata e fijirde e ko sobi e jooto. <sup>4</sup> Pati kaalee haalaaji bondi naa 6oli naa cobudi, sabi hono majji kaanaa taweede e mon. Ko kaan-don wadude dee, njetton Laamdo. <sup>5</sup> Paamee dum doo faa gasa: pijoowo e cobudo e jootaado, dum woni dewoowo tooruuji, kambe 6e ngalaa ngedu e laamu Almasiihu e Laamdo oo. <sup>6</sup> Pati fay gooto jaayrira on haalaaji 6oli, sabi hono majji cabinbinta tikkere Laamdo e dow saliibe mo 6ee. <sup>7</sup> Ndennoo, pati njokkondiree e 6een. <sup>8</sup> Arannde e nimre njeyanon-don, kaa jooni e ha66agol mon e Joomiraado e fooyre njeya-don. Ndennoo nguurdee no 6i66e fooyre nii, <sup>9</sup> sabi fooyre rimata moyyuki e foocitaare e goonga fuu. <sup>10</sup> Tewton faamude ko welata Joomiraado. <sup>11</sup> Pati ngadon juude mon e golleeji di ngalaa nafaa golleteedi e ley nimre, ko haani dee, njaltinon di. <sup>12</sup> Ko 6een yimbe ngadata e cuucuukka koo, ana yaannii fay jantaade. <sup>13</sup> Kaa huunde fuu ko yaltinaa, 6anngan ley fooyre, <sup>14</sup> huunde fuu ko 6annginaa fooynan. Dum wadi so ana wiye:

«Aan daaniido, fin!

Imma e hakkunde maay6e,

fooyre Almasiihu ndee yaaynan e maa.»

<sup>15</sup> Ndennoo, ngadee hakkille faa sanne no nguurdaton nii, tawee wanaa no nuykaa6e nii, no hakkilante'en nii. <sup>16</sup> Wakkati fuu mo ke6-don, nawtoro-don dum, sabi jamaanu oo yo bondo. <sup>17</sup> Saabe dum, pati laatee 6e ngalaa hakkille, paamee ko woni sago Joomiraado. <sup>18</sup> Pati njaree doru faa cigiron, sabi dum naannan on e laalu. Ko haani dee, keewee Ruuhu, <sup>19</sup> mbaajondiron jime Jabuura e jettooje e jime de Ruuhu hokkata on dee, njimanon Joomiraado, njettiron mo berde laa6ude. <sup>20</sup> Njetton Baabiraado men Laamdo wakkati fuu dow huunde fuu saabe Joomiraado men lisaa Almasiihu. <sup>21</sup> Homo e mon fuu downtanoo bannum saabe teddinde Almasiihu.

*Haala rew6e e wor6e mum'en*

<sup>22</sup> Onon rew6e, downtano-don wor6e mon no downtiranto-don Joomiraado nii. <sup>23</sup> Sabi gorko woni hoore jom suudu mum no Almasiihu woniri hoore deental goondin6e ngal nii, dum woni terde mum de hisini dee. <sup>24</sup> No deental goondin6e ngal downtiranii Almasiihu nii, hono non debbo fuu haani downtiranaade jom suudu mum e huunde fuu. <sup>25</sup> Onon wor6e, njidiree rew6e mon no Almasiihu yidiri deental goondin6e ngal so hokkitiri hoore mum saabe maggal <sup>26</sup> faa senna ngal nii, caggal o la6binirii ngal lootogal e haala makko, <sup>27</sup> yalla omo darna deental goondin6e ngal yeeso makko tawee ngal teddinaangal, ngal ceniingal, ngal walaa ayiibe naa tuundi naa jooofi-jooofi naa ko nanndi e mum fuu. <sup>28</sup> Hono non, ana tilsi e wor6e njida rew6e mum'en no njidiri terde mum'en nii. Neddo fuu jiddo jom suudu mum, hoore mum yidi. <sup>29</sup> Sabi fay gooto wajanaa caldi mum, ko wadata dee, jamminan di, hinnoo di no Almasiihu hinnortoo deental goondin6e ngal nii, <sup>30</sup> sabi en caldi terde makko dee. <sup>31</sup> Binndi dii mbii: «Dum wadi so gorko yoppa inna mum e baam mum, nanngondira e jom suudu mum, 6e didon fuu 6e laato neddo gooto.»\*

\* 5:31 Puudfoode 2.24

<sup>32</sup> Dum yo sirri mawdo. Mido wiya on: sirri oo, ko woni hakkunde Almasiihu e deental goondinbe ngal koo haalata. <sup>33</sup> Kaa no waawi laataade fuu, gorko fuu yidira jom suudu mum no yidiri hoore mum nii. Debbo duu teddina gorum.

## 6

### *Haala biŋbe e saaraabe*

<sup>1</sup> Onon biŋbe, dōwtanee saaraabe moodon saabe Joomiraado, sabi dum woni ko dartii. <sup>2</sup> «Teddin inna maa e baam maa.» Ndee woni yamiroore arandeere nde fodoore haŋŋii e mum. <sup>3</sup> Fodoore ndee woni: «yalla ada heba moyyere, balde maa njuuta e leydi ndii.»\* <sup>4</sup> Onon saaraabe, pati jaanginee biŋbe mon, ko kaan-don dee, biirdude be dow yamiroore Joomiraado e needi mum.

### *Haala maccube e halfaabe*

<sup>5</sup> Onon maccube, dōwtanee halfaabe moodon dow kulol e sijnugol tawee e berde laabude no dōwtiranto-don Almasiihu nii. <sup>6</sup> Dōwtanee be tawa wanaa yeeso maŋbe tan yalla biŋbe aadama ana njetta on. Ko haani dee, dōwtanee be no maccube Almasiihu ngollirta muuyde Laamdo berde laabude nii. <sup>7</sup> Ngollirane be anniya lobbo faa wa'a no Joomiraado ngollanton, wanaa yimbe, <sup>8</sup> sabi odon anndi neddo fuu golludo ko moyyi, so dimo so diimaajo, Joomiraado yofan dum hakke golle mum oo. <sup>9</sup> Onon halfaabe, ngorree non e maccube moodon. Pati ngidee be, anndon Kalfaaado moodon onon e maŋbe fuu ana dow kammu, kasen duu oon burdintaa yimbe.

### *Haala kaŋorde de Laamdo hokkata faa Ibiliisa jaaloree*

<sup>10</sup> Walaa ko heddi so wanaa wiide on keewon semmbe e ley haŋŋagol mon e Joomiraado, tuugo-don baawde makko mawde dee. <sup>11</sup> Bamee kaŋorde de Laamdo hokki on dee fuu, yalla odon mbaawa daraade faa cakko-don dabareeji Ibiliisa dii. <sup>12</sup> Sabi wanaa yimbe kaŋaten, ko kaŋaten dee, laamu e baawde e hooreyaaku ley oo doo aduna niŋŋudo, kaŋum e seydaani'en bonbe wonbe e mbeeyu be. <sup>13</sup> Saabe dum, bamee kaŋorde de Laamdo hokki on dee fuu, yalla odon mbaawa haŋaade nde jalaande bonnde ndee warii, keŋon kasen niŋŋude caggal nde kaŋi-don fuu faa timmi.

<sup>14</sup> Ndennoo, ndaree, kumo-don goonga, boorno-don foocitaare no saaya ndeenaagu nii. <sup>15</sup> Lanndinaade waajaade Kabaaru Lobbo gaddoowo jam oo laatano on pade. <sup>16</sup> Wakkati fuu yo goondinal laatano on wawaade nde mbaaw-don sakkoraade kure kuŋŋooje de Bondo oo wedotoo on dee fuu. <sup>17</sup> Yo kisindam laatano on kufina njamndi, nanngon kaafaawi ki Ruuhu Ceniido hokkata kii, kanki ki konngol Laamdo. <sup>18</sup> Wakkati fuu ngadee duwaawuuji e jaagundeeji ley haŋŋagol mon e Ruuhu Ceniido. Kakkilee pati on njoottu jaaganaade seniibe be fuu Laamdo. <sup>19</sup> Jaagano-don kam miin duu newnaneede konngol, yalla nde muŋŋitin-mi hunduko am fuu, mido anndinira cuusal goonga tedduŋo gondo e Kabaaru Lobbo <sup>20</sup> mo ndarantoomi ley geyyelle am dee oo. Naagane kam mi waajoroo dum cuusal, no tilsiri kam nii.

### *Baynondiral*

<sup>21</sup> Tikikus, sakiike men korsudo gollanoowo Joomiraado koolniido, humpitan on dum fuu, yalla onon duu odon njoota humpeede kam anndon no

\* 6:3 Fillitagol Tawreeta 5.16

ngorru-mi. <sup>22</sup> Mi nelii mo e moodon yalla odon annda no min ngorri e yalla omo waaltina hakkillaaji mon.

<sup>23</sup> Sakiraa6e, yo Baabiraado men Laamdo e Joomiraado men Iisaa Almasiihu ngadan on jam e jilli gondudi e goondinal. <sup>24</sup> Yidu6e Joomiraado men Iisaa Almasiihu jilli di timmataa 6ee fuu, yo hinnee Laamdo wonu e mum'en.

## Bataaki Pool faade e Filipiyankoo6e

<sup>1</sup> Miin Pool e Timote, maccu6e Iisaa Almasiihu, mbinndi oo 6ataaki faade e deental goondin6e Iisaa gonngal ngeenndi Filipa. Min njowtii on, onon hooree6e e gollanoo6e deental ngal, min njowtii on fuu, onon seniibe ha66iibe e Iisaa Almasiihu 6ee. <sup>2</sup> Yo on ke6u moyyere e jam iwde e Baabiraado men Laamdo e Joomiraado men Iisaa Almasiihu.

### *No Pool yettirta Laamdo kammari Filipiyankoo6e*

<sup>3</sup> Mido yetta Laamdo nde miccittii-mi on fuu. <sup>4</sup> Wakkati fuu nde jaagantoo-mi on Laamdo on fuu, e seyo jaagirantoo-mi on, <sup>5</sup> sabi gila jaannde ngoondindon Kabaaru Lobbo haala Iisaa faa jooni odon ndarodii e am. <sup>6</sup> Mido tayori Laamdo puddu6o golle lobbo e mon oo, o jokkan dum faa dum hi66a e ley gartol Iisaa Almasiihu. <sup>7</sup> Ana haani mi miilana on diin miilooji on fuu, sabi hakkille am ana e mon. On fuu on ndeentii e am moyyere nde Laamdo hokki kam nde ngeyyaa-mi e nde ndaranii-mi tabintinde Kabaaru Lobbo oo ndee. <sup>8</sup> Mido horsiniri on fuu korsa Iisaa Almasiihu, Laamdo ana seedii. <sup>9</sup> Ko jaagantoo-mi on Laamdo annii: yo jilli mon beydo jaarude yeeso, beydoro6o anndal, beydoro6o seenndude pene e goonga, <sup>10</sup> yalla odon mbaawa subaade ko moyyi. Nden on laatoto laabu6e 6e ngalaa niije jaannde gartol Iisaa Almasiihu. <sup>11</sup> On laatoto duu hebbinaa6e golleeji poocitiidi iwdfi e Iisaa Almasiihu, yalla Laamdo ana teddinee, yettee.

### *No uddeede Pool na6iri Kabaaru Lobbo oo yeeso*

<sup>12</sup> Sakiraa6e, ko nji6u-mi anndon dee, torra ke6udo kam oo waddanii Kabaaru Lobbo oo jaarude yeeso <sup>13</sup> faa hayboo6e galle kaananke oo e heddiibe 6ee fuu tayori ko ngeyyiraa-mi koo yo saabe Iisaa Almasiihu. <sup>14</sup> Ko 6uri heewde e sakiraa6e 6ee duu, geyyelle am dee beydaniidum'en hoolaade Joomiraado. Dum saabii so e6e mbaajoro6o konngol Laamdo ngol rafi kulol.

<sup>15</sup> Goonga, yogaa6e ana mbaajoro6o kabaaru Iisaa Almasiihu oo haasi-daaku e poodondiral, kaa wo66e ana e anniyaaji lobbi. <sup>16</sup> Been ngolliranta Almasiihu jilli, sabi e6e anndi Laamdo hokki kam daranaade Kabaaru Lobbo oo. <sup>17</sup> Kaa 6ee too ko mbaajorto6o kabaaru Almasiihu faa nafa dum'en kajum'en tan, anniyaaji ma66e moyyaa, kasen duu ko 6e miilotoo dee, beydude torra am ley geyyeede am oo. <sup>18</sup> Dum kaa bonnataa fay huunde! Ko waawi laataade fuu, so Iisaa Almasiihu inndaama hen tan ana heya, so laatii anniyaaji bondi naa anniyaaji lobbi fuu mido seyii.

Goonga, mi seyoto caggal mum duu <sup>19</sup> sabi mido anndi saabe duwaawuuji mon e ballal Ruuhu Iisaa Almasiihu, dum fuu dum sakitanto kam kisindam. <sup>20</sup> Mido joonndorii e hakkille am fuu, mi hersataa e dow fay huunde. Mido hoolii Almasiihu teddinte saabe ko hewtii kam koo gila jooni faa abada, nguur-mi maay-mi fuu. <sup>21</sup> Sabi banngal am, Almasiihu yo yonki am, maayde duu yo tino am. <sup>22</sup> Kaa so mi wuurii, ana moyya nguurndam am waddana kam gollude golle nafaowo. Ndennoo mi anndaa ko cuboto6o-mi. <sup>23</sup> Hakkille am feccike pece didi: ko 6ur-mi yi6ude, yaade mi joo6odoyoo e Almasiihu, dum jaati 6uri moyyude. <sup>24</sup> Kaa mi heddoo wuurde 6uri nafude on, onon. <sup>25</sup> Mido tayori dum, mido anndi mi heddoto e aduna mi wonda e mon on fuu,

yalla oḁon njaara yeeso, ceyo-ḁon ley goondinal <sup>26</sup> faa gartol am hakkunde mon beydana on mantoraade haḁḁagol mon e Iisaa Almasiihu kammari am.

*Haala daranaade Kabaaru Lobbo oo*

<sup>27</sup> Onon, nguuree nguurndam kawroojam e Kabaaru Lobbo haala Iisaa Almasiihu, yalla so mi warii tuumtaade on naa so mi waraali, mi nana kabaaru mon, mi annda oḁon tabiti e anniya gooto, oḁon ndarodii gootal e haḁanaade goondinal Kabaaru Lobbo oo, <sup>28</sup> tawa on accataa konnee'en 6ee kulḁina on e dow fay huunde. Banngal maḁḁe, ḁum yo maande halkagol, kaa onon, ḁum maande kisindam mon. Dum to Laamḁo iwrata. <sup>29</sup> Sabi onon ndokkaa moyyere Laamḁo saabe Almasiihu. Wanaa faa ngoondinon mo tan ndokkire-ḁon, on ndokkaama ḁum kasen faa torrire-ḁon kammari makko, <sup>30</sup> kaḁum e daranaade haḁo ngo njii-ḁon mido haḁee, ngo nan-ḁon mido haḁee faa jooni ngoo.

## 2

*Haala leyḁinkinaare Almasiihu e teddeengal mum*

<sup>1</sup> Ko Iisaa Almasiihu heddii hokkude on semmbe e suusinde on ley jilli koo, ko ndeentu-ḁon e Ruuhu Ceniḁo so njidondir-ḁon njurmondird-ḁon, <sup>2</sup> kiḁḁiniree seyo am ko laati-ḁon daande wootere e jilli gooti e 6ernde wootere e anniya gooto koo. <sup>3</sup> Pati ngolliree huunde fuu haasidaaku naa haawtaade dow pene, ngolliree leyḁinkinaare, yalla gooto fuu ana jogoroo hoore mum banndum ana 6uri ḁum. <sup>4</sup> Pati fay gooto laatoo hammadi haaje mum tan, ndarta nafaa woḁḁe 6ee duu. <sup>5</sup> Yo anniya Iisaa Almasiihu tawe e mon:

<sup>6</sup> Kanko, fay so taweede mbaadi Laamḁo ana e makko,  
o tuugaaki e majjum faa o heddo fotude e Laamḁo,

<sup>7</sup> o famḁinii hoore makko,  
o 6ami mbaadi maccuḁo,  
o laatii hono nedḁo.

O jogoraa o nedḁo

<sup>8</sup> o leyḁinkinii,  
o dḁwtanii Laamḁo faa o maayi,  
o maayi e dow leggal bardugal.

<sup>9</sup> Saabe ḁum kasen, Laamḁo toownii mo faa sanne,  
hokki mo innde 6urnde inde fuu,

<sup>10</sup> yalla koppi fuu ana koforoo saabe innde makko to tawaa fuu,  
so dow kammu so dow leydi so ley leydi,

<sup>11</sup> yalla gooto fuu ana sellina  
Iisaa Almasiihu woni Joomiraado,  
faa Baabiraado men Laamḁo teddinee.

*No goondinḁe pooynirta ley aduna*

<sup>12</sup> Dum e taweede, sakiraaḁe am horsuḁe, nde ngondunoo-mi e mon ndee, oḁon dḁwtanii Laamḁo wakkati fuu. Sako jooni nde ngodḁitii-mi, nden kaan-ḁon 6urde dḁwtanaade mo. Njirwiniron hono non kisindam ḁam Laamḁo hokki on ḁam, ngadiron ḁum kulol e siḁḁugol. <sup>13</sup> Sabi Laamḁo ana golla e mon faa muuyon ko weli ḁum, ngollon ḁum.

<sup>14</sup> E ko ngollaton fuu, pati ḁermondiree pati ndukidee, <sup>15</sup> yalla oḁon laatoo laaḁuḁe 6e ngalaa niḁe, laato-ḁon 6iḁḁe Laamḁo 6e ngalaa ayiibe hakkunde yimḁe hannde oḁniḁe bonḁe. On pooynan hakkunde maḁḁe hono no koode pooyniri ley aduna nii <sup>16</sup> ko nanngu-ḁon konngol nguurndam ngol faa gasi



koo. Nii wadata so mi mantaroo on jannde gartol Iisaa Almasiihu. Sabi mi don-donnaali meere, mi tampaali meere. <sup>17</sup> Fay so dum yaadi e yonki am mi laatoto sadaka mbayleteedo dow sadaka mo goondinal mon sakkantoo Laamdo oo, mi seyoto, mi weltodoto e mon. <sup>18</sup> Onon duu ceyoree hono non, mbeltodo-den.

### *Haala gollidiibe didon hoolniibe*

<sup>19</sup> So Joomiraado men Iisaa jabii, mi nelan Timote e mon ko booyataa, yalla so mi humpitike kabaaruuji mon dii ana waaltina hakkille am. <sup>20</sup> Sabi kanko tan woni gondudo e am anniya gooto, kasindindo e kabaaru mon, <sup>21</sup> heddiibe 6ee fuu hammadi haaje mum'en tan, wanaa saabe Iisaa Almasiihu. <sup>22</sup> Kaa Timote, odon anndi no holliri neddaaku mum, sabi mo wallii kam waajaade Kabaaru Lobbo oo no giddo wallirta baaba mum nii. <sup>23</sup> Kanko anniyii-mi nelude wakkati mo paamu-mi no alhaali am laatotoo fuu. <sup>24</sup> Kaa Joomiraado hokkii kam tayoral, booyataa mi waran to mon, miin e hoore am.

<sup>25</sup> Hono non mi yii tilsii mi nela e mon sakiike men Epaforodit, gollidiido am oo. O wallii kam habanaade Kabaaru Lobbo oo. Kanko woni mo neluno-don faa walla kam e haaje oo. <sup>26</sup> Omo yeewaa on fuu, kasen o wemmbanooma sanne ko nan-don o sellaaano koo. <sup>27</sup> Tayoral, o jawiino faa o hosi maayde. Kaa Laamdo yurmike mo, yurmike kam miin duu, pati mi heba sugulla dow sugulla. <sup>28</sup> Dum saabii so keñii-mi law faa mi nela mo e mon, yalla so on njiitii mo odon ceyoo, miin duu sugulla am buytoo. <sup>29</sup> Ndennoo, njab6oree mo saabe Joomiraado seyo manngo. Teddinee yimbe wa'ube non fuu. <sup>30</sup> sabi kanko kammari gollande Iisaa Almasiihu o hosiri maayde, mo hokkitiri yonki makko faa o waddana kam ballal ngal ndonkuno-don waddande kam onon e ko'e mon ngal.

## 3

### *Haala anndude Iisaa Almasiihu*

<sup>1</sup> Caggal dum, sakiraabe am, ceyoree Joomiraado. Winnditanaade on kulle dee tampintaa kam, sabi kanje ndokkata on hoolaare: <sup>2</sup> ndeentodon e dawaadi – dum woni golloo6e ko boni, waajotoo6e haala taadagol penewol 6ee! <sup>3</sup> Sabi enen ngoni taadiibe jaati 6ee, eden ndewira Ruuhu Laamdo, eden mantaroo Iisaa Almasiihu, en pawaali jikke men e dow ko'e men. <sup>4</sup> Haya, miin mido waawnoo fawde jikke am dow hoore am. So wo66e miilii ana mbaawi fawde jikke mum'en dow ko'e mum'en, miin buri haandude e majjum, <sup>5</sup> sabi mi taadaama gila e jalooma jetta6o mo pinumi e mum oo, mi Israa'ilaanke iwdo e suudu Benjamin, mi Yahuudiyanke fii Yahuudiyanke. E banngal Sariya Muusaa mido jeyaa e waalde Farisa'en, <sup>6</sup> mido hirana Sariya oo sanne faa mido torrannoo deente goondin6e Iisaa dee, fay gooto waawaano ninjude kam banngal fooccitanaade Sariya oo. <sup>7</sup> Kaa ko njogorinoo-mi yo tino am koo fuu, saabe Iisaa Almasiihu mi tawii yo mursee. <sup>8</sup> Goonga, mido jogorii dum fuu yo mursee saabe anndude Joomiraado am Iisaa Almasiihu buri kulle dee fuu. Saabe makko njarrii-mi mursude ko njogii-mi, mido jogorii huunde fuu yo mbuuwdi yalla Almasiihu ana laatanoo kam tino, <sup>9</sup> mi heba tawdeede e mum. Mi walaa fooccitaare nde mbaaw-mi hebude miin e hoore am e jokkulugol am Sariya oo, mi poocciitido saabe fooccitaare iwrannde kam e hoolaade Almasiihu, kayre woni fooccitaare nde Laamdo hokki goondin6e mo 6ee. <sup>10</sup> Sago am mi annda mo kanko Iisaa Almasiihu, mi annda baawde de Laamdo wuurtiniri mo dee,

mi reenta e makko torra, mi nannda e makko maayde, <sup>11</sup> yalla miin duu mido heba immintineede hakkunde maay6e nannde darngal.

<sup>12</sup> Mi wiyaali mi he6ii dum gila jooni naa mi ki66udo, kaa mido wondi e dogude hono no dadondirteedo nii yalla mido heba dum, sabi miin e hoore am, Iisaa Almasiihu he6ii kam. <sup>13</sup> Goonga sakiraa6e, mi wiyaali mi he6ii dum. Kaa mido wada huunde wootere: mido yeggita ko ya66ii, mido foodanoo ko warata. <sup>14</sup> Mido dogana haattirde, faa mi heba mbarjaari dow kammu ndi Laamdo noddada en e mum saabe Iisaa Almasiihu. <sup>15</sup> Enen hakkilante'en 6ee fuu, miiloro-den hono non. So odon miiloo huunde wonnde, Laamdo 6annginanen on dum. <sup>16</sup> Kaa no wa'i fuu, do tawe-den fuu, njokken laawol no ngorru-den jooni nii.

<sup>17</sup> Sakiraa6e, on fuu nemmbee kam, yeewee worru6e no njii-don miden ngorri nii 6ee. <sup>18</sup> Sabi heew6e laatike konnee'en leggal bardugal Iisaa Almasiihu. Mi haalanii on dum cili kuurdi, mi haaliranen on jooni duu e bojji. <sup>19</sup> Kam6e, battane ma66e yo halkere, deedi ma66e ngoni laamdo'en ma66e, hersa ma66e 6e naayirta, aduna tan 6e ka6anta. <sup>20</sup> Kaa enen, dow kammu njeje-den, eden keppe kisinoowo men iwoowo ton oo, dum yo Joomiraado men Iisaa Almasiihu. <sup>21</sup> Kanko, o waylitan terde men lo'ude dee faa de ke6a teddeengal no terde makko dee nii, sabi omo jogii baawde faa o wada huunde fuu downtanoo mo.

## 4

### *Haala seyoraade Joomiraado*

<sup>1</sup> Sakiraa6e am horsu6e, on njeewnii kam sanne, on laatike seyo am e deesewal am. Gidira6e am, tabitee e Joomiraado.

<sup>2</sup> Mido ndaarda banndiraa6e am rew6e, dum woni Ewodi e Sintis, yo 6e laato daande wootere saabe Joomiraado. <sup>3</sup> Aan Sinsigis, gollidiido am koolniido oo duu, mido ndaarde paabo-daa 6e, sabi 6e mballii kam ha6anaade Kabaaru Lobbo oo, kam6e e Keleman e gollidiio6e am wob6e, 6e inde mum'en mbinndaa e dewtere nguurndam 6ee.

<sup>4</sup> Ceyoree Joomiraado wakkati fuu. Mido wiya on kasen, ceyee! <sup>5</sup> Yo yim6e fuu anndu newaare mon. Joomiraado ana 6adii. <sup>6</sup> Pati fay huunde sunlina on abada, ko haani dee: naagoree Laamdo haajuuji mon fuu duwaawu gondudo e jettooje. <sup>7</sup> Nden, Laamdo hokkan on jam dadudo hakkille, jii6inan berde mon e hakkillaaji mon e Iisaa Almasiihu.

<sup>8</sup> Haya, sakiraa6e, tiidee e ko moyyi e ko haani yetteede fuu, dum woni teddungal e goonga, kajum e fooccitaare e senaare e ko haani yiidee e ko haani teddineede. <sup>9</sup> Ngolliree ko pammin-mi on e ko ke6-don e am, ko narrudon kam e ko njiiiru-don kam. Nden Laamdo gaddoowo jam oo tawdete e mon.

### *No Pool barkiniri dokkal Filipiyankoo6e*

<sup>10</sup> Mido seyorii Joomiraado seyo manngo sabi jooni on keydintinii ballal mon faade e am. Tayoral, hakkillaaji mon ana ngonnoo e am, kaa on ke6aali yottinde ballal ngal. <sup>11</sup> Wanaa saabe won ko kaajaa-mi wadi so mbii-mi non, sabi mi woowtinike hejnitiraade no tawraa-mi fuu. <sup>12</sup> Mido waawi wuurdude e baasal, mido waawi wuurdude e ke6al. E no waawi worrude fuu, mi biirorike haarande e yolbere, mi biirorike hebbinde e nakoreede, <sup>13</sup> mido waawi fuu e ley ha66agol am e Iisaa Almasiihu dokkoowo kam semmbe oo. <sup>14</sup> Kaa dum e taweede, on ngadii ko moyyi ko mballu-don kam e ley torra am oo koo.

<sup>15</sup> Filipiyankoo6e, o6on anndi e ley pu66oo6e mon nande Kabaaru Lobbo oo, nde iw-mi leydi Makedoniya ndee, fay deental goon6in6e gootal wal-londiraali e am, so wanaa ngal mon ngal. <sup>16</sup> Nde ngonnoo-mi Tesaloniiki ndee duu, on neldii kam ko kasindin-mi e mum jaati, wanaa fay nde wootere, cili kuurdi! <sup>17</sup> Wanaa dokkal tewtan-mi – faa tino golle mon lobbo oo 6eydoo tewtan-mi. <sup>18</sup> Ko neldu-6on Epaforodit koo yottike faa gasi, humtii haajuuji am fuu, mi he6ii faa heewi. Dokkal mon ngal laatike uurdi mbelndi, no sadaka bel6o Laam6o ja6aado nii. <sup>19</sup> Laam6o teddu6o jom ngalu oo humtiran haajuuji mon fuu saabe Iisaa Almasiihu. <sup>20</sup> Yo teddeengal woodan Baabiraado men Laam6o faa abada abadin. Aamiina.

### *Baynondiral*

<sup>21</sup> Njowtanee kam seniibe ha66ii6e e Iisaa Almasiihu fuu. Sakiraabe wondube e am 6ee ana njowta on. <sup>22</sup> Seniibe 6ee fuu ana njowta on. Be ana adoo jowtude on fuu won6e ley galle kaananke Roma maw6o oo 6ee.

<sup>23</sup> Yo hinnee Joomiraado men Iisaa Almasiihu wonu e mon!

## Bataaki Pool faade e Koloosiyankoo6e

<sup>1</sup> Oo 6ataaki ga am iwri miin Pool nelaado Iisaa Almasiihu e sago Laamdo, kajum e sakiike men Timote. <sup>2</sup> Min njowtii on onon seniibe won6e Koloosi, sakiraa6e hoolniibe ha66iibe e Almasiihu. Yo Baabiraado meeden Laamdo wadan on moyyere e jam!

### *No Pool yettirta Laamdo kammari Koloosiyankoo6e*

<sup>3</sup> Min ceerataa e yettude Laamdo, Baaba Joomiraado men Iisaa Almasiihu, nde min jaagantoo on Laamdo fuu, <sup>4</sup> sabi min kaalanaama kabaaru goondinal mon Iisaa Almasiihu, kajum e jilli di njogani-don seniibe 6ee fuu <sup>5</sup> saabe jikke mo ndesana-don dow kammu oo. On ke6ii oon jikke nde nandon konngol goonga ngol ndee, dum woni Kabaaru Lobbo oo. <sup>6</sup> Oon Kabaaru Lobbo yottoriima on no mo yottorii aduna oo fuu nii, omo wa'i no lekki mawnoowi ndimoowi 6idde mum nii. Hono non Kabaaru Lobbo oo worri hakkunde mon onon duu, gila jannde ke6-don hettinaade haala hinnee Laamdo oo so paamu-don no mo wa'i jaati nii. <sup>7</sup> Dum woni ko Epafaras gollidiido amen korsudo waajii on, kanko gollanoowo Almasiihu koolniido hakkunde mon oo. <sup>8</sup> O haalani min duu jilli di Ruuhu oo hebbini e mon dii.

<sup>9</sup> Saabe dum, minen duu, gila min nani dum, min ceeraali e jaaganaade on Laamdo. Miden jaagoo mo o hebbina on hakkilantaaku e faamu mo Ruuhu hokkata oo, yalla o6on annda ko woni sago makko faa gasa. <sup>10</sup> Hono non, ke6on wuurde nguurdam belo6am Joomiraado kawro6am e muuyde mum e dow huunde fuu, tabiton e golle lobbo fuu, beydo-don annude Laamdo. <sup>11</sup> Miden jaaganoo on Laamdo kasen hokka on semmbe mawdo no baawde mum teddude dee mawniri nii, yalla o6on tawree tiinnitaare e mujal fuu. <sup>12</sup> Njettiree Baabiraado oo seyo, sabi o wadii on fotu6e he6ude nge6u e moyyereji desanaadi seniibe gondi e fooyre dii. <sup>13</sup> Kanko yaltini en e baawde nimre, so o naanni en e laamu Biyiiko korsudo <sup>14</sup> coottitiido en so yaafii luutti meeden oo.

### *Haala teddungal Almasiihu*

<sup>15</sup> Kanko Almasiihu o mbaadi Laamdo mo yiyataake oo. Kanko woni hammadi e dow tagoore ndee fuu.

<sup>16</sup> Sabi huunde fuu saabe makko tagiraa,  
ko woni dow kammu e ko woni e leydi fuu,  
ko yiyetee e ko yiyataake fuu,  
dum woni bimmbeeje laamu naa kaanankaaku naa hooreyaaku naa  
baawde,  
dum fuu kanko tagiraa, kanko taganaa.

<sup>17</sup> O woodii gila fay huunde woodaa,  
huunde fuu ana yu66ondiri saabe makko.

<sup>18</sup> Kanko woni hoore terde,  
dum woni kanko woni hoore deental goondin6e ngal.

Kanko woni fuddoode,  
kanko woni hammadiijo e wuurtu6e hakkunde maay6e,  
yalla omo 6ura huunde fuu.

<sup>19</sup> Sabi Laamdo muuyi ko woni e mum koo fuu

wona e makko kanko Almasiihu.

<sup>20</sup> E oon Bajjo mo rewrintiniri huunde fuu e makko ko o waddani 6e jam saabe yiyam mum juppiidam dow leggal bardugal koo.

Ko woni dow kammu e ko woni dow leydi fuu rewrintinaama e makko.

<sup>21</sup> Arannde, on fuu on woddiiḑe Laamḑo, on laatinoke wayḑe makko saabe miilooji mon e golleeji mon bondi. <sup>22</sup> Kaa jooni, mo rewrintinii on e makko saabe maayde nde 'Biyiiko laatiidḑo nedḑo oo maayi ndee, yalla omo darna on yeeso makko tawee on seniibe on ngalaa ayiibe on ngalaa niḑe. <sup>23</sup> Kaa noo, kinaa keddo-don e goondinal, jiiḑon e ley maggal, laato-don joottiibe 6e ndimmbataako 6e iwataa e jikke mo Kabaaru Lobbo hokkata oo. Oon Kabaaru Lobbo, on nanii mo, sabi tagoore ndee fuu waajaama mo. Kanko ngollanan-mi miin Pool.

### *No Pool haḑorii banngal deental goondinḑe Iisaa*

<sup>24</sup> Midḑo seyii jooni saabe torraaji di keḑu-mi kammari ko ngollan-mi on koo. Hono non, ko heddii e torraaji Almasiihu koo, ḑum kiḑḑiniran-mi caldi am kammari terḑe makko ḑee, ḑum woni deental goondinḑe ngal. <sup>25</sup> Kanngal laatii-mi golloowo mum. Laamḑo halfini kam oo golle, yalla midḑo waajoo on haala makko kaa fuu. <sup>26</sup> Kaan haala yo sirri cuudaninooḑo jamaanuuji gila arannde, kaa jooni Laamḑo bannginanii mo seniibe mum. <sup>27</sup> Sabi been Laamḑo anniyii anndinde sirri mum goodando leji fuu, no sirri oo teddiri e no mawniri nii. Oon sirri annii: Almasiihu ana e moodon, ḑum hokki on jikke heḑude ngeḑu e annoora Laamḑo. <sup>28</sup> Oon Almasiihu min kaalata haala mum, miden mbaajoo yimḑe fuu, miden anndinira ḑum'en hakkilantaaku fuu yalla miden njottina nedḑo fuu yeeso Laamḑo tawa yo kiḑḑuḑo e ley haḑḑagol mum e Almasiihu. <sup>29</sup> Saabe ḑum midḑo golla midḑo sooboroo baawḑe makko gollirooje semmbe e ley am ḑee.

## 2

<sup>1</sup> Midḑo yidi anndon haḑo naawngo ngo kabetee-mi saabe moodon, onon e yimḑe wonḑe Lawdikiya e woḑḑe 6e meedaali yiide kam 6ee fuu, <sup>2</sup> yalla 6erde mon ana buuḑa, laato-don gooto saabe jilli, keewon hakkilantaaku kiḑḑuḑo faa paamon sirri Laamḑo oo, ḑum woni Almasiihu <sup>3</sup> mo ngalu Laamḑo fuu suudii e mum oo. Ngalu oo yo hakkilantaaku e anndal. <sup>4</sup> Ko kaalanir-mi on ḑum, pati kiilire-don haalaaji belḑi. <sup>5</sup> Sabi fay so taweede midḑo woddiri on terḑe, hakkille am kaa ana wondi e moodon, midḑo seyoroo gondal mon lobbal ngal, kaḑum e no tiidir-don e goondinal mon e Almasiihu ngal nii.

### *Haala jokkude e Almasiihu*

<sup>6</sup> Jooni, ko njaḑu-don Iisaa Almasiihu laatoḑ Joomiraadḑo moodon koo, njokkon e makko, <sup>7</sup> jiiḑon e makko, accon o naḑa on yeeso e ley goondinal, keddo-don e ngal goondinal ko waarata e jannde nde keḑ-don ndee, njetton Laamḑo sanne.

<sup>8</sup> Ndeentee pati fay gooto hiilira on haalaaji luggi e haalaaji 6oli iwdi e neesuuji 6iḑḑe aadama kaḑum e semmbeeji aduna dii. 'Deen geḑe iwaali e Almasiihu. <sup>9</sup> Sabi ko woni e Laamḑo fuu ana e Almasiihu, e ley terḑe mum jaati. <sup>10</sup> Onon duu, on keḑii ko woni e Laamḑo koo fuu e ley haḑḑagol mon e Almasiihu, kanko tiimudḑo laamu e baawḑe fuu oo. <sup>11</sup> E makko on taadanooma, kaa wanaa taadagol ngol yimḑe ngadata ngol, ḑum taadagol iwngol e Almasiihu ngol nde o itti on e terḑe 6ii-aadamaaku luuttooje

dee ndee. <sup>12</sup> E ley ko loota-don lootogal batisima koo, on irdanooma e makko, kasen, on nguurtindinanooma e makko saabe on ngoondinii baawde Laamdo guurtindo mo oo. <sup>13</sup> On maaynoo6e saabe junuubaaji moodon e saabe on laatanooki yim6e Laamdo. Kaa Laamdo wuurtindinii on e Almasiihu,

yaafike en luutti men fuu,

<sup>14</sup> tosii derewol kiiti jinooji en dii,

ittii ngol, tontii ngol dow legal bardugal.

<sup>15</sup> O 6oorti laamu e baawde,

o hersini dum'en yeeso yim6e fuu

nde o jaalorii dum'en maayde Almasiihu ndee.

<sup>16</sup> Ndennoo, pati fay gooto jinir on dow ko jaamaton e ko njaraton naa saabe teddingol jalaade yogaa6e e darde lewru e jalaade powteteede. <sup>17</sup> Dum fuu dum cappotoodum kudde garoyooje tan, kaa goonga oo e Almasiihu woni. <sup>18</sup> Pati accon rewoo6e malaa'ika'en wiyoo6e yo leydinkiniibe pela on. Been yim6e ana ka66ii e ko njii ley koydi, kasen e6e mawninkinii e dow meere saabe miilooji ma66e aduna, <sup>19</sup> 6e njokkaali ha66aade e Almasiihu hooreejo oo. Oon hokkata terde dee fuu ko kaajaa, hawrintinira de jokkolde e dadi. Kasen duu saabe makko terde dee ana mawnira no Laamdo muuyiri nii.

### *Haala maaydude e Almasiihu e wuurdude e mum*

<sup>20</sup> On maaydii e Almasiihu, on iwii e semmbeeji aduna oo dii. Ndennoo, kodum wadi so odon nguurda no jeyaa6e e oo doo aduna nii? Kodum wadi so odon njaba daaleede: <sup>21</sup> «Pati 6amu, pati meedu, pati memu»? <sup>22</sup> Dum fuu dum kadaadum dow meere, dum fuu dum waaju iwdo e yim6e tan. Laamdo tagii kulle dee fuu faa nawtoro-don dum'en sakitoo jola. <sup>23</sup> So goonga, yim6e ana miila kadaadi dii yo hakkilantaaku, sabi wiyeteno kinaa yim6e kujidira no semmbe mum'en foti, kinaa yim6e leydinkinoo, kinaa yim6e mbiira caldi mum'en. Kaa noo, tawaama diin kadaadi fuu paabataako yim6e jaalaade gidaade yonki.

## 3

<sup>1</sup> Ndennoo, ko nguurtindina-don e Almasiihu koo, tewtee kudde gonde dow kammu to Almasiihu joodii jaamo Laamdo too. <sup>2</sup> Ngattee hakkillaaji moodon e kudde gonde dow kammu, pati ngattee di e kudde gonde e leydi. <sup>3</sup> Sabi on maayii, nguurndam dam ke6-don jooni dam ana suudidada e Almasiihu to Laamdo. <sup>4</sup> So Almasiihu laatiido nguurndam moodon oo 6anngii, on 6anngidan e makko onon duu, ke6on ngedu e teddeengal makko.

### *Haala ko hiidfi e ko heydi*

<sup>5</sup> Ndennoo, mbaree kulle adunankooje gonde e moodon dee, ko wa'i hono ko sobi, kapum e fijirde e gidaade yonki e muuyooji bondi, kapum e joote, sabi joote yo rewde tooruuji. <sup>6</sup> Diin luutti kapum'en njippinta tikkere Laamdo e dow salii6e goondinde mo 6ee. <sup>7</sup> Onon duu, hono non ngorrundo-don arande, hono non nguurduno-don e diin luutti. <sup>8</sup> Kaa jooni, njoppee dee doo kulle: tikkere e janngere e ko boni e mbonka, kapum e wulde hunduko. <sup>9</sup> Pati fay gooto e moodon fenana bannum, sabi on ittii ko hiidfi ko wonnoo ley mon koo, kapum e golleeji mum fuu, <sup>10</sup> on laatike yim6e hey6e. Laamdo tagudo ko heydi ko woni ley mon oo seerataa e heydintinde dum faa dum nannda e muudum, yalla odon ke6a anndal ki66ungal. <sup>11</sup> Ndennoo jooni, walaa ko seenndi Yahuudiyanke e Yunaninke, taadiido e mo taadaaki. Jooni

wanaa mo janngaali, wanaa neddo ladde, wanaa dimo, wanaa diimaajo, sabi Almasiihu woni fuu, woni e ma66e 6e fuu.

<sup>12</sup> Ndennoo, saabe Laamdo su6ike on, sennii on, horsinii on, tawre-don jilli e yurmeende e moyyuki e leydinkinaare e newaare kaɗum e muɗal. <sup>13</sup> Muɗondiree, so yoga moodon ana jogii ko niɗira goddo, njaafondiron. No Joomiraado yaaforii on nii, njaafondiron. <sup>14</sup> E ley dum fuu, berde moodon keewa jilli, sabi jilli nju66ata huunde fuu faa gasa. <sup>15</sup> Accon jam Almasiihu oo laamoo miilooji mon, sabi Laamdo noddii on faa ngondon e jam laato-don terde goote. Njetton Laamdo sanne. <sup>16</sup> Yo konngol Almasiihu ngol heew e moodon. Yo gooto e moodon fuu waajo goddo oo, jeertinira dum hakkilantaaku. Njimanee Laamdo e ley berde laabude, njettiree mo Jabuura e jaarooje, kaɗum e jime de Ruuhu Ceniido oo hokkata on dee. <sup>17</sup> Ko ngadaton fuu, so haala so golle, ngadiree dum fuu e innde Joomiraado men Iisaa, njetton Baabiraado men Laamdo saabe makko.

### *No jokku6e Almasiihu poti wuurdude*

<sup>18</sup> Onon rew6e, dowtano-don wor6e moodon no rew6e woodan6e Joomiraado poti waɗude nii. <sup>19</sup> Onon wor6e, njidee rew6e moodon, pati ɗanngon e ma66e.

<sup>20</sup> Onon sukaa6e, dowtano-don saaraa6e moodon e huunde fuu, sabi dum woni ko welata Joomiraado. <sup>21</sup> Onon saaraa6e, pati ɗannginee sukaa6e moodon so berde mum'en metta.

<sup>22</sup> Onon maccu6e, dowtano-don halfaa6e moodon e huunde fuu, tawa wanaa yeeso ma66e tan yalla bi66e aadama ana njetta on. Ko haani dee, dowtiranee 6e berde laabude e ley kulol Joomiraado. <sup>23</sup> Huunde fuu ko ngollanton, ngadiron dum berde laabude, sabi Joomiraado ngollanton, wanaa yim6e ngollanton, <sup>24</sup> anndon Joomiraado barjoto on, hokkan on moyyereji desanaadi yim6e mum. Sabi kalfaado mo ngollanton oo yo Almasiihu. <sup>25</sup> Gaɗoowo ko boni fuu, he6an mbarjaari golle mum bono oo, sabi Laamdo burdiinta yim6e.

## 4

<sup>1</sup> Halfaa6e, njogoree maccu6e moodon 6ee jogaade lobbe e dow foocci-taare, anndon onon duu odon njogii kalfaado dow kammu.

<sup>2</sup> Nduumee e duwaawu, tawee odon njeertii odon njetta Laamdo. <sup>3</sup> Nduwane min minen duu, yalla Laamdo ana udditana min damal faa min mbaajoo konngol mum ngol, yalla miden mbaawa saakude goonga tedduɗo kaaloowo haala Almasiihu oo. Saabe makko jaati uddiraa-mi jooni e ley kasu. <sup>4</sup> Naagee Laamdo yalla mido waajoroo oon goonga tedduɗo no haaniri nii.

<sup>5</sup> Laatee hakkilante'en hakkunde yim6e 6e ngoondinaali 6ee. Nde ke6-don wakkati fuu, nawtoro-don dum. <sup>6</sup> Haala mon ana haani laataade haala mbelka ngadaaka lamdam, yalla odon annda no kaan-don jaaboraade gooto fuu.

### *Baynondiral*

<sup>7</sup> Tikikus, sakiike men korsuɗo gollidiido am koolniido e ley golle Joomiraado oo, humpitan on kabaaruuji am dii fuu. <sup>8</sup> Ko wadi so nel-moo-mi e moodon, yalla odon annda no min ngorri e yalla omo waaltina hakkillaaji mon. <sup>9</sup> Mido neldida e makko Onesim, jeyaado e moodon oo. Oon yo sakiike amen korsuɗo koolniido. Kam6e didon, 6e kumpitan on ko wadi gaa koo fuu.

<sup>10</sup> Aristarka mo uddidaa-mi oo ana jowta on, kaɗum e Marka sakiike Barnabas mo mbiinoo-mi so warii to moodon njaɓɓo-ɗon ɗum oo. <sup>11</sup> Iisaa nod-dirteedo Yustus oo duu ana jowta on. Kambe tan ngoni Yahuudiyankooŋe gollidoobe e am kabaaru Laamu Laamɗo oo. Ebe mballa kam sanne.

<sup>12</sup> Epafaras, gollanoowo Iisaa Almasiihu oo, ana jowta on. Kanko duu e moodon o jeyaa. Wakkati fuu omo soobii e duwaawu saabe moodon yalla oɗon jiiɓa e ley kiɓɓal, timminon muuyɗe Laamɗo fuu. <sup>13</sup> Mido seedanoo mo omo tampani on, onon e Lawdikiyankooŋe e Hiyerapolisankooŋe fuu.

<sup>14</sup> Luuka cawroowo mo korsin-mi oo, kaɗum e Demas ana njowta on.

<sup>15</sup> Miden njowta sakiraaɓe men wonɓe Lawdikiya ɓee, miden njowta Nimfa e deental goonɗinɓe kawroowal galle mum ngal. <sup>16</sup> Nde on njanngii oo ɓataaki, ngadee dabare faa deental goonɗinɓe Lawdikiya ngal jannga mo. Onon duu, njanngon ɓataaki garoowo iwrande on Lawdikiya oo. <sup>17</sup> Mbiyee Arkippa yo tiinno e timminde golle mo Joomiraaɗo halfini ɗum oo.

<sup>18</sup> E junngo am jaati mbinndiran-mi ngoo ɗoo jowtaango: miin Pool mido jowta on. Pati njeggitee e geyyelle ngon-mi.

Yo hinnee Laamɗo wonu e moodon!



## **Bataaki Pool arano faade e Tesaloniikiyankoo6e**

<sup>1</sup> Oo bataaki ga am iwri, miin Pool, kaɗum e Silas e Timote. Miden njowta deental goondin6e gonngal Tesaloniiki ka66iingal e Baabiraado men Laamdo e Joomiraado men Iisaa Almasiihu. Yo on kebu moyyere e jam.

### *Goondinal Tesaloniikiyankoo6e*

<sup>2</sup> Miden njetta Laamdo wakkati fuu saabe moodon on fuu, sabi min ceerataa e miccitaade on e ley duwaawuuji amen. <sup>3</sup> Miden miccitoroo on wakkati fuu yeeso Laamdo Baabiraado men, miden miccitoroo on gollleeji di ngollir-don saabe goondinal, miden miccitoroo on tiinnitaare moodon saabe jilli, miden miccitoroo on mujal moodon saabe fawgol mon jikke e Joomiraado men Iisaa Almasiihu.

<sup>4</sup> Sakiraa6e amen 6e Laamdo yidi, miden anndi Laamdo su6ike on. <sup>5</sup> Sabi ko min mbaajii on Kabaaru Lobbo oo koo laataaki haala 6ola, baawde duu ana e makko, sabi Ruuhu Ceniido hokki on tayoral ki66ungal e ko min mbaajii koo yo goonga. Odon anndi no min ngorrunoo hakkunde moodon duu. Kammari moodon tan min ngolliri.

<sup>6</sup> On jemmibii min, on jemmibii Joomiraado sabi on nja6ii konngol Laamdo fay e ley torraaji mawdi, nja66ori-don ngol seyo ngo Ruuhu Ceniido waddata ngo. <sup>7</sup> Nii wadi so kollu-don goondin6e won6e ley leyde Makedoniya e Akaya fuu no kaani worrude. <sup>8</sup> Sabi on mbaajike konngol Joomiraado ngol, on caakii ngol, wanaa ley leyde Makedoniya e Akaya tan, goondinal mon Laamdo nanaama e nokkuuje dee fuu. Fotaa ko min 6eyda hen haala ngokka. <sup>9</sup> Kam6e goondin6e 6ee jaati kumpitata min no nja66ori-don min arannde, no njoppir-don tooruuji so ngartu-don e Laamdo faa ngollanon Laamdo guurdo goongaraajo oo, <sup>10</sup> faa ndoomon Biyiiko iwoowo dow kammu. Kanko woni Iisaa mo o immintini hakkunde maay6e, kisinoowo en e jukkungo waroowo ngoo.

## **2**

### *No Pool golliri ley Tesaloniiki*

<sup>1</sup> Sakiraa6e, onon Tesaloniikiyankoo6e 6ee, odon anndi ko min ngari e mon koo laataaki meere. <sup>2</sup> Fade amen warde, miin torraama, min koynaama ley ngeenndi Filipa, hono no anndir-don nii. Kaa Laamdo men hokki min ngorgu min mbaajoroo Kabaaru Lobbo oo soobee. <sup>3</sup> Sabi waaju amen fawaaki dow majjere, fawaaki dow fugaaraaku, dum wanaa hiila duu. <sup>4</sup> No Laamdo hordi min faa halfini min Kabaaru Lobbo oo nii, hono non min mbaajortoo, wanaa ko welata yim6e min tewtata, ko welata Laamdo kumpitiido berde amen oo min tewtata. <sup>5</sup> Hono no anndir-don nii, abada min mbaajoraaki haalaaji beldi, min daminaaki e kaalisi. Laamdo ana seedii.

<sup>6</sup> Min tewtaali faa 6i66e aadama teddina min, wanaa onon wanaa wo66e. <sup>7</sup> Kaa fay so e doole min ngardunoo duu, min mboofaali sabi min nelaa6e Almasiihu. Kaa bele tan min ngardi. Miden kinnorii on hono no inna hinnortoo 6i66e muudum nii. <sup>8</sup> Sabi korsa amen e moodon ana satti sanne, min njarrike hokkude on ko wanaa Kabaaru Lobbo haala Laamdo tan, miden njarrii hokkude on fay yonkiiji amen, sabi on laatike sakiraa6e amen horsu6e.

<sup>9</sup> Sakiraa6e, nde min mbaajotonoo on Kabaaru Lobbo haala Laamdo oo ndee, odon miccadoo min ngolliino sanne, min tampii sanne duu. Min ngollii jemma e jalooma fuu faa min njogoo ko'e amen, pati min laatanoo on donngal. <sup>10</sup> Odon ceedanii min, Laamdo ana seedanii min, no min ngorri hakkunde mon nii, onon goondin6e 6ee. Miden cenii, miden poocciitii, min ngalaa jinjoore fuu. <sup>11</sup> Gooto gooto mon fuu min ngolliranii dum no baaba golliranta bi66e mum, hono no anndir-don nii.

<sup>12</sup> Min mbaajike on, min mbaaltinii hakkillaaji mon, min ndaardii on nguurdon nguurdam kawroojam e muuyde Laamdo, noddoowo on faa naaton e Laamu mum teddu6o oo.

<sup>13</sup> Kasen won ko saabani min yettude Laamdo wakkati fuu: nde nan-don konngol Laamdo ngol e kundude amen ndee, on nja66oraaki ngol konngol yim6e. Ko nja66ori-don ngol dee, konngol Laamdo. Ngol kaɗum jaati. Kanngol gollata e ley moodon, onon goondin6e 6ee. <sup>14</sup> Sakiraa6e, ko hewtii deente goondin6e Laamdo gon6e Yahuudiya jii6ude e Iisaa Almasiihu dee koo, hewtike on onon duu. Sabi onon duu on mujii torraaji di 6e mujunoo dii, yim6e moodon jaati torrata on, hono no Yahuudiyankoo6e torriri 6e nii. <sup>15</sup> Kam6e mbari Joomiraa6o men Iisaa. Be mbari annabaa6e. Haya, 6e torriri min minen duu. E6e ngolla ko welaa Laamdo, 6e konnee'en yim6e fuu. <sup>16</sup> Sabi e6e njidi hadude min waajaade leji goddi yalla ana kisa. Nii wadata so luutti ma66e ki66a, kaa jukkungo Laamdo sakitike hewtaade 6e.

### *No Pool yidirnoo wirfitoraade Tesaloniki*

<sup>17</sup> Kaa minen, sakiraa6e, min ceerii e moodon wakkatiwel gootel e jiile gite wanaa 6erde. Min tiinnike sanne yalla miden ke6a yiide on. Miden njeewaa on sanne sanne. <sup>18</sup> Saabe majjum, miin Pool, mi muuyino warde to mon cili kuurdi, kaa Ibiliisa hadi kam. <sup>19</sup> Homo woni jikke amen e seyo amen e deesewal amen yeeso Joomiraa6o men Iisaa nde wartoyii? Wanaa onon naa? Jaati! <sup>20</sup> Sabi onon ngoni teddeengal amen e seyo amen.

## 3

<sup>1</sup> Dum wadi nde wonnoo min mbaawaa kaariya mon, walanaa min baasi minen tan min keddo ley ngalluure Ateena. <sup>2</sup> Min nelii sakiike amen Timote gollidoowo e Laamdo saakude Kabaaru Lobbo haala Almasiihu oo, yalla omo hokka on semmbe, o jii6ina on saabe goondinal mon. <sup>3</sup> Dum fuu walaa ko wadi dum, so wanaa e ley dii torraaji pati fay gooto e mon yeryerta, sabi odon anndi en fodanaa6e dum. <sup>4</sup> Gila nde min ngondunoo e moodon ndee, miden kaalanannoo on torraaji kewtotoodi en. Non dum laatorii hono no anndir-don nii. <sup>5</sup> Dum saabii so ndonku-mi waawde kaariya mon, nel-mi faa mi annda yalla odon coobii e goondinal ngal, naa ceytotoodo seytike on, golle amen laatike meere. <sup>6</sup> Kaa jooni Timote iwii to mon, wartii e amen. O seynirii min goondinal mon e jilli mon sabi odon miccadoo min wakkati fuu, odon njidi yiide min sanne, hono no minen duu min njidiri yiide on nii. <sup>7</sup> Sakiraa6e, ko tawde-don e goondinal koo, waaltinii min e ley billaare amen e ley torra amen. <sup>8</sup> Jooni min nguurtii kammari odon jii6i e Joomiraa6o. <sup>9</sup> Jettooje fuu de min mbaawi yettirde Laamdo kammari moodon, min njettiran dum saabe seyo amen fuu ngo ceynir-don min yeeso makko. <sup>10</sup> Jemma e jalooma miden ndaarda Laamdo yiide on faa min ki66intina ko paki e goondinal mon.

### *No Pool duwanorii deental goondin6e gonngal Tesaloniki*

<sup>11</sup> Yo Laamdo Baabiraado men e Joomiraado men Iisaa newnan min laawol faa min njaha to mon. <sup>12</sup> Yo Joomiraado beydu jilli hakkunde moodon faa sanne, njidondiron, njidon yimbe fuu hono no min njidiri on nii, <sup>13</sup> faa o hokka on semmbe, laato-don yimbe be ngalaa jinjoore, wonbe ley senaare yeeso Laamdo Baabiraado men e ley gartol Joomiraado men Iisaa katum e seniibe mum fuu.

## 4

### *Haala nguurdam dam Laamdo yidi*

<sup>1</sup> Caggal dum, sakiraa6e, min njannginii on no kaan-don worrude faa wela Laamdo. Odon ngada dum jaati. Kaa miden ndaarda on saabe Joomiraado men Iisaa tiinno-don, beydon soobee. <sup>2</sup> Sabi odon anndi jamirooje de min ndokki on iwde e Joomiraado men Iisaa dee. <sup>3</sup> Ko woni sago Laamdo dee, senaare moodon. Nanto-don e njaahilaaku. <sup>4</sup> Homo e mon fuu reena terde mum\* reenira de laa6al e teddeengal, <sup>5</sup> pati jokka gidaade yonki hono no heeferbe be anndaa Laamdo fay seeda nii. <sup>6</sup> Fay gooto pati yaha naato bannum, pati toona dum, sabi dee kudde fuu Joomiraado woni jobtotoodo de, hono no min kaalanirnoo on gila arannde e no min njeertirnoo on nii. <sup>7</sup> Sabi Laamdo noddiraali en faa cofen, ko mo noddiri en dee, faa nguuren e senaare.

<sup>8</sup> Ndennoo, caliido ko haalaa jooni koo fuu, wanaa neddo salanii. Laamdo dokkudo on Ruuhu mum Ceniido oo o salanii. <sup>9</sup> Kaa bannal jilli hakkunde sakiraa6e, fotaa ko min mbinndana on, sabi onon e ko'e moodon, Laamdo anndini on no njidondirton. <sup>10</sup> Hono non ngollirton hakkunde sakiraa6e wonbe ley leydi Makedoniya fuu. Sakiraa6e, miden ndaarda on beydon soobe. <sup>11</sup> Tiinno-don ndeeyon, kiinno-don haaju mon, homo fuu wuura e semmbe terde mum, hono no min mbiirunoo on nii. <sup>12</sup> Nden be ngoondinaali Iisaa bee njogorto on yimbe, on kasindintaa e neddo fuu fay huunde.

### *Haala gartol Joomiraado*

<sup>13</sup> Sakiraa6e, miden njidi paamon faa gasa ko wartata e bannal maay6e, pati cunjiree hono no yimbe be ngalaa jikke 6ee nii. <sup>14</sup> So nii en ngoondinii Iisaa maayii, wuurtii, hono non Laamdo hawrindinirta maay6e goondinnoobe 6ee duu e makko. <sup>15</sup> Miden kaalana on ko Joomiraado wii: enen wuurbe forru6e e gartol Joomiraado 6ee, en ardataako maay6e 6ee nabeede to makko. <sup>16</sup> Sabi Joomiraado e hoore mum jippoto iwde dow kammu dow ooynaango manngo, nde eewnaango hooreejo malaa'ika'en nanatee e nde buutotal Laamdo fuufetee ndee. Nden maay6e goondinnoobe Almasiihu 6ee adotoo fuu immiade. <sup>17</sup> Caggal dum, enen wuurbe hed-dinoobe 6ee, en fuu en mbeewtidinte e ma6be, nabide-den ley duule, faa kawren e Joomiraado ley mbeeyu. Hono nii ngondirten e makko faa abada. <sup>18</sup> Dum saabii homo e mon fuu waaltinira hakkille bannum diin haalaaji.

## 5

<sup>1</sup> Sakiraa6e, fotaa ko min mbinndana on haala jamaanuui e wakkatiiji gartol Joomiraado oo. <sup>2</sup> Sabi onon, odon anndi tuur jannde gartol Joomiraado ndee wardan no gujjo wardata ley jemma nii. <sup>3</sup> Wakkati nde yimbe miilataa njaalataa, nde mbiyata jam tan e hoolaare woodi, nden kunkoo

\* **4:4** Yogaabe ana paamira aaya oo hono nii: Homo e mon fuu wada suudu, jogoroo ndu laa6al e teddeengal.

saamata e mum'en, hono no n̄atawera juhirta haamili nii. Be mbaawaa dadude e oo kunkoo fey. <sup>4</sup> Kaa sakiraa6e, onon on ngalaa ley nimre, dum hadata jalaande ndee juhude on no gujjo juhirta nii. <sup>5</sup> On fuu on bi66e fooyre, on yim6e jalooma. En njeyaaka e jemma, en njeyaaka e nimre. <sup>6</sup> Ndennoo pati daano-den hono no wo66e 6ee nii. Mbaalen e jeerngo, ndeento-den. <sup>7</sup> Sabi daanotoo6e jemma daanotoo, sigiroo6e jemma cigirta. <sup>8</sup> Kaa enen yim6e jalooma 6ee, ndeento-den. Boorno-den goondinal e jilli, dum yo saaya men ndeenaagu. Jikke he6ude kisindam duu laatanoo en kufina ndeenaagu. <sup>9</sup> Sabi Laamdo yidanaa en jukkungo mum, ko o yidani en dee, ke6iren kisindam saabe Joomiraado men Iisaa Almasiihu, <sup>10</sup> maayru6o kammari men yalla en fuu eden nguurda e mum so wartii, tawe-den en wuur6e tawe-den en maay6e fuu fotu. <sup>11</sup> Dum saabii homo e mon fuu waaltina hakkille bannum, gooto fuu faaboo goddo banngal goondinal, hono no ngollirton nii.

### *No deental goondin6e haani worrude*

<sup>12</sup> Sakiraa6e, miden ndaarda on anndanon golloo6e hakkunde mon 6ee. E6e dowa on faade e Joomiraado, e6e mbaajoo on. <sup>13</sup> Teddiron 6e sii teddeengal fuu, njidiron 6e saabe golle ma66e.

Ngondon gondal sabu Laamdo hakkunde moodon. <sup>14</sup> Miden ndaarda on, sakiraa6e, njeertinin nattu6e, maalto-don hul6e, paabo-don lo'u6e, tawde-don e mujal hakkunde yim6e fuu, <sup>15</sup> tiinno-don pati fay gooto yo6too so won ko bannum wadi dum. Wakkati fuu tewton wadondirde ko moyyi, ngadanon yim6e fuu hono non.

<sup>16</sup> Ceyo-don wakkati fuu, <sup>17</sup> pati ceeron e duwaawu, <sup>18</sup> njetton Laamdo no ngorru-don fuu. Sabi dum woni ko Laamdo muuyani on, onon niibu6e e Iisaa Almasiihu 6ee.

<sup>19</sup> Pati kadon Ruuhu Ceniido gollude hakkunde moodon, <sup>20</sup> pati koynon waaju annaba6e, <sup>21</sup> kaa tayko-don huunde fuu, nanngon ko moyyi e muudum. <sup>22</sup> Ngoddo-don sii bone fuu.

### *Bayondiral*

<sup>23</sup> Yo Laamdo gaddoowo jam oo e hoore mum sennu on senaare hi66unde, reena gooto gooto mon fuu ndeenaagu timmu6o faa laato-don yim6e 6e ngalaa jinjoore nannde gartol Joomiraado men Iisaa Almasiihu. <sup>24</sup> Noddu6o on oo yo koolniido, kasen duu kanko tabintinoyta dum.

<sup>25</sup> Sakiraa6e, miden jaagoo on duwaawu.

<sup>26</sup> Njottinin sakiraa6e 6ee fuu calmaali amen e jilli amen.

<sup>27</sup> Mido tilsinira on saabe Joomiraado, njannganon sakiraa6e 6ee fuu oo bataaki.

<sup>28</sup> Yo hinnee Joomiraado men Iisaa Almasiihu wonu e mon.

## **Bataaki Pool diɗabo faade e Tesaloniikiyankoo6e**

<sup>1</sup> Oo bataaki ga am iwri, miin Pool, kaɗum e Silas e Timote. Miden njowta deental goondin6e gonngal Tesaloniiki, ka66iingal e Baabiraado men Laamdo e Joomiraado men Iisaa Almasiihu. <sup>2</sup> Yo on kebu moyyere e jam iwde e Baabiraado men Laamdo e Joomiraado men Iisaa Almasiihu.

### *No Laamdo sarirta yimbe wakkati gartol Iisaa*

<sup>3</sup> Sakiraa6e, waajibii min njetta Laamdo wakkati fuu saabe mon. Edum foti jaati, sabi goondinal mon ana beydoo yaarude yeeso, kasen duu jilli hakkunde mon ana beydoo soobaade e gooto gooto mon fuu. <sup>4</sup> Dum saabii so miden mantaroo on e deente goondin6e Laamdo dee. Miden mantaroo on saabe mujal mon e goondinal mon e ley torraaji e billaareeji di pawe-don dii fuu. <sup>5</sup> Ko torri-don saabe Laamu Laamdo koo, Laamdo wadan on fotube hebude Laamu Laamdo. Dum fuu edum holla Laamdo ana sarira no foocci-torii. <sup>6</sup> Sabi Laamdo yo poocciido, o yobiran torru6e on bee torra, <sup>7</sup> kaa onon torrii6e jooni 6ee, o fowtindinan on e amen. O wadan dum so Joomiraado men Iisaa gondo dow kammu oo wartii, ana wondi e malaa'ika'en mum anndinoo6e baawde makko 6ee. <sup>8</sup> O banngan ley metangal yiite faa o jukka 6e anndaa Laamdo, 6e nja6aali Kabaaru Lobbo haala Joomiraado men Iisaa 6ee. <sup>9</sup> Jukkungo waroowo e ma66e ngoo yo halkere duumiinde, 6e ngoddiinee Joomiraado e darja mum e semmbe mum fuu. <sup>10</sup> Dum waroyan jannde Joomiraado wartoyii faa teddiinee hakkunde seniibe mum, goondin6e dum bee kaaydiinee e mum. Onon duu, odon njeyaa e ma66e, sabi on ngoondinii waaju mo min mbaajii on oo. <sup>11</sup> Kammari dum, miden nduwanoo on wakkati fuu, yalla Laamdo ana wada on fotube hebude nguurndam dam noddii on e mum dam. Miden jaagoo Laamdo yo wallir on semmbe mum faa njottinon golleeji lobbi di njid-don gollude dii fuu saabe odon ngoondini mo. <sup>12</sup> Hono nii, innde Joomiraado men Iisaa teddinirtee e ley mon, onon duu teddinire-don saabe makko e dow moyyere makko, kanko Laamdo men e Joomiraado men Iisaa Almasiihu.

## 2

### *Haala gartol Joomiraado e ko ardii ngol*

<sup>1</sup> Sakiraa6e, miden njidi haalande on haala gartol Joomiraado men Iisaa Almasiihu e deental men e makko. Miden ndaarda on: <sup>2</sup> pati hakkillaaji mon njaawa jii6aade, naa kulon saabe wiyegol jannde gartol Joomiraado ndee yottiima. Pati kulon fay so goddo wii on Laamdo loowi dum kaan haala, wanaa so on narrii dum waajotoo6e, wanaa so on kaalanaama minen mbinndi dum e bataaki. <sup>3</sup> Pati fay gooto he6a no yoyyira on e fay huunde. Sabi nden jalaande warataa so wanaa yimbe heew6e murtira Laamdo, Neddo Bondo oo bannga, dum woni yiitenke oo, <sup>4</sup> konnee, pawdo hoore mum e dow huunde fuu ko wiyetee laamdo naa ko sujidantee, faa joodoyii ley suudu Laamdo, wii hoore mum yo Laamdo. <sup>5</sup> Tama on miccitaaki mido haalanannoo on dum nde ngondunoo-mi e mon ndee? <sup>6</sup> Jooni kaa odon anndi ko faddii Neddo Bondo oo warde, kaa mo banngan nde wakkati makko yottike. <sup>7</sup> Sabi gila jooni baawde Bondo cuudaade dee ana ngolla e aduna oo, kaa paddiido de oo ana doo tafon. So oon iwii doo tan, <sup>8</sup> Neddo Bondo

oo banngan, kaa Joomiraado men Iisaa wardan mo henndu hunduko mum, halkira mo fooyre garol mum. <sup>9</sup> Neddo Bondo oo wardan e doole Ibiliisa, warda e semmbe mawdo e kaayefiiji e taagumansaaji peneeji, <sup>10</sup> kajum e oopaare fuu faa jaayra halkotoo6e 6ee, sabi 6e nja6aali yidude goonga baawdo hisinde 6e oo. <sup>11</sup> Saabe dum, Laamdo hokki 6e semmbe majjinoowo, faa waddana 6e goondinde fenaande <sup>12</sup> yalla 6e ngoondinaali goonga oo so ana mbeltoroo oopaare 6ee fuu ana njukkee.

### *No goondinbe kaaniri niibude e Iisaa Almasiihu*

<sup>13</sup> Sakiraa6e 6e Laamdo horsini, minen, waajibi min njetta Laamdo wakkati fuu saabe mon, sabi Laamdo subike on gila fuddoode faa hisinira on ko Ruuhu Ceniido wadi on seniibe e ko ngoondin-don goonga oo koo. <sup>14</sup> Dum o noddiri on e Kabaaru Lobbo mo min kaalani on oo, yalla odon ke6a ngedu mon e darja Joomiraado men Iisaa Almasiihu. <sup>15</sup> Sakiraa6e, ndennoo tiinnee, niibe e ko min anndini on koo so e haala amen e so bataaki amen.

<sup>16</sup> Joomiraado men Iisaa Almasiihu kajum e Laamdo Baabiraado men njidi en so buufini berde men faa abada, ndokki en jikke lobbo saabe moyyere mum'en. <sup>17</sup> Yo 6e ndokku on semmbe, 6e niifina on e golle lobbo e haala lobba fuu.

## 3

### *No Tesalonikiyankoo6e kaaniri jaaganaade Pool Laamdo*

<sup>1</sup> Caggal dum, sakiraa6e, jaagano-don min Laamdo, yalla konngol Joomiraado ngol ana yaawa saakaade, kasen duu ngol teddinee hono no to mon nii, <sup>2</sup> yalla miden kisa e yimbe oonibe, bonbe. Sabi wanaa yimbe fuu ngonni goondinbe. <sup>3</sup> Kaa Joomiraado yo koolniido, mo hokkan on semmbe, mo reena on e Bondo oo. <sup>4</sup> Joomiraado hokki min tayoral e mon, sabi jooni odon njokki jamirooje de min ndokki on dee, kasen duu on keddoto jokkude de. <sup>5</sup> Yo Joomiraado men wadu berde mon keewa jilli Laamdo, keewira mujal no Almasiihu heewiri mujal nii!

### *No tilsiri gooto fuu golla*

<sup>6</sup> Sakiraa6e, miden njamira on e innde Joomiraado men Iisaa Almasiihu, ngoddito-don sakiraa6e nattu6e 6e njokkaali waaju mo narri min oo 6ee. <sup>7</sup> Onon e ko'e mon, odon anndi no min kaani jemmbireede, sabi min ngondiraali e mon dow nattere. <sup>8</sup> Walaa fuu mo min jaamani meere meere, jemma e jalooma fuu min ngollii faa min tampi pati min laatanoo on donngal. <sup>9</sup> Miden mbaawnoo ndaardude on nguure, kaa min ngadiraali non, yalla miden ngada e ko'e amen misaalu faa jemmbon min. <sup>10</sup> Sabi nde min ngonnoo to mon ndee, miden mbiyannoo on dum doo: mo jabataa gollude, pati jaama. <sup>11</sup> Walaa ko min mbiiri non, so wanaa min nanii yoga e mon ana natti, ngollataa fayhuunde so wanaa naatude e ko walanaa dum'en. <sup>12</sup> Miden njamira been yimbe, miden mbaajoo dum'en e innde Joomiraado men Iisaa Almasiihu 6e ngollira deeyere, 6e nguura e semmbe terde ma66e.

<sup>13</sup> Kaa onon sakiraa6e, pati kaabee wadude ko moyyi. <sup>14</sup> So won caliido jokkude ko min kaali e oo doo bataaki koo, ngattanee joomum hakkille, ngoddo-don dum, yalla ana hersa. <sup>15</sup> Kaa noo, pati nanngiree joomum yo gano. Njeertiniree dum no sakiike nii.

### *Bayondiral*

<sup>16</sup> Joomiraado gaddoowo jam oo, yo wadan on jam wakkati fuu e ley huunde fuu. Yo Joomiraado wundu e mon, on fuu.

<sup>17</sup> E junngo am jaati mbinndiran-mi ngo doo jowtaango no mboowru-mi nii: miin Pool mido jowta on. Nii ngadiran-mi maande am ndee e bataakiiji am fuu. <sup>18</sup> Yo hinnee Joomiraado men Iisaa Almasiihu wonu e mon, on fuu!

## Bataaki Pool arano faade e Timote

<sup>1</sup> Oo bataaki ga am iwri, miin Pool nelaado Iisaa Almasiihu e dow yamiroore Laamdo kisinoowo en oo e dow yamiroore Iisaa Almasiihu jikke men oo. <sup>2</sup> Aan Timote, a biyam jaati e ley goondinal, mido jowte. Yo Baabiraado men Laamdo e Joomiraado men Iisaa Almasiihu njurme, ndokke moyyere e jam.

### *Haala fammingol ngol walaa nafaa*

<sup>3</sup> Timote, hedda ngeenndi Efeesu hono no njamir-maa-mi nde njahan-mi Makedoniya ndee nii, yalla ada hada yogaabe jannginde ko luuttondiri e waaju men oo <sup>4</sup> hono taali e mantoragol dammbe ngol walaa do haadi. Dee kulle jeddi tan ngaddata, nafataa no Laamdo fudirnoo hisinirde yimbe e ley goondinal nii. <sup>5</sup> Sabi faandaa yamiroore ndee yo jilli iwooji e bernde laabunde e hakkille baaltiido kajum e goondinal ngal waldaa e naafigaaku. <sup>6</sup> Won yogaabe celii e faandaa oo, njokkii haalaaji boli. <sup>7</sup> He6ude laataade jannginoobe Sariya Laamdo tan 6e tewtata, kaa 6e paamataa, wanaa ko 6e kaalata koo wanaa ko 6e tilsinta koo.

<sup>8</sup> Eden anndi Sariya oo ana moyyi, so golliraama golle Sariya. <sup>9</sup> Paamen Sariya Laamdo oo wanaa fooccitiibe 6ee wadanaa. ʼBe o wadanaa dee, bon6e e salii6e, yeddoobe e luuttoobe, 6e teddinaali ko senii e 6e teddinaali Laamdo, waroobe inna mum'en e abba mum'en e yuppoobe yiyyam yimbe wo66e <sup>10</sup> e jeenoobe e luudunkoobe e soodoobe yimbe so cootta dum'en e fenoo6e e hunotoobe dow pene – Sariya oo darniraama faa sakkoo huunde fuu ko luuttondirta e waaju celludo oo. <sup>11</sup> Oo waaju ana hawra e Kabaaru Lobbo mo kalfinaa-mi 6anngindo teddeengal Laamdo Jom mbelko'aaku oo.

### *No Pool yettiri Joomiraado*

<sup>12</sup> Mi yettii Joomiraado men Iisaa Almasiihu dokkudo kam semmbe oo saabe ko o jogorii kam mi koolniido o watti kam e golle makko koo. <sup>13</sup> Arannde mido bonkotonoo mo, mido torrannoo yimbe makko, mido hoynannoo mo. Kaa Joomiraado men oo yurmike kam sabi mi anndaano ko ngollannoo-mi e ley waasude am goondinde. <sup>14</sup> Moyyere makko heewi e am sanne, hokki kam goondinal e jilli kebirteedi saabe Iisaa Almasiihu. <sup>15</sup> Mido haalane haala koolniika ka yimbe fuu kaani yarraade: Iisaa Almasiihu warii e aduna oo faa hisina luuttoobe, miin woni burdo bonde e ma66e. <sup>16</sup> Kaa ko njurmiraami, miin burdo bonde oo, yalla Iisaa Almasiihu ana wadira kam misaalu munal mum kib6ungal, yalla waroobe goondinde mo 6ee fuu ana ke6a nguurndam nduumiidam. <sup>17</sup> Laamdo gooto, laamiido duumiido e laamu mum, mo maayataa yiyataake oo yo darja e teddeengal ngoodan mo faa abada abadin. Aamiina!

<sup>18</sup> Biyam Timote, waaju mo kalfinan-maa-mi oo annii: miccito-daa ko Laamdo loowi yimbe haala maa koo. E ley majjum ka6o-daa hono no sordaasi cuuso haortoo nii <sup>19</sup> tawee e ley goondinal e hakkille mo piijaali ma. Won yoppube oon hakkille, goondinal ma66e heli hono no laana helirta nii. <sup>20</sup> Himene e Aleksandere ana njeyaa e ma66e. Mi wadii 6e fuu e junngo Ibiiliisa faa 6e annda 6e kaanaa bonkaade Laamdo.



## 2

### *Haala duwaawu*

<sup>1</sup> Annii ko adotoo-mi waajaade goondin6e: 6e ngadana yim6e fuu duwaawuuji e jaagundeeji e jettooji. <sup>2</sup> Nduwano-den kaanankoo6e e jom'en doole duu, yalla eden nguurda deeyere e waaltaare e neddaaku e kulol Laamdo e dow huunde fuu. <sup>3</sup> Dum woni ko moyyi ko welata Laamdo kisinoowo en, <sup>4</sup> jiddo yim6e fuu kisa, ke6a annudde goonga. <sup>5</sup> Sabi Laamdo yo gooto, gooto duu woni curoowo hakkunde makko e yim6e, oo woni lisa Almasiihu neddo oo <sup>6</sup> dokkitirido hoore mum faa soottitoo yim6e fuu. Hono nii o famminiri nde wakkati oo yottinoo, Laamdo ana yidi yim6e fuu kisa. <sup>7</sup> Dum Laamdo wadiri kam baajotoodo e nelaado faa mi fammina yim6e 6e nganaa Yahuudiyankoo6e 6ee goondinal e goonga. Goonga kaalan-mi, mi fenaali.

<sup>8</sup> Ndennoo, mido yidi do wor6e kawriti faa ngada duwaawu fuu kuncira juude mum'en berde laabude, tawee ngaldaq e tikkere naa jeddondiral.

### *No rew6e kaaniri jokkirde Laamdo*

<sup>9</sup> Rew6e duu paroroo kaddule jottiide, tawee e needi e leydinkinaare. Pati 6e codoroo moollu e kan6e naa jaaye, pati 6e paroroo bagiiji tiidudi coggu, <sup>10</sup> yo 6e paroro gollleeji lobbi. Sabi dum woni ko hawrata e rew6e hul6e Laamdo. <sup>11</sup> Yo debbo nantu hunduko mum, tawree dowtaare timmunde wakkati nde jannintee ndee. <sup>12</sup> Mi jabanaali debbo jannginge naa ardaade gorko. Ko wajibii e mum dee, tiidude e hunduko mum. <sup>13</sup> Sabi Aadama adii Hawwaa tageede. <sup>14</sup> Kasen duu wanaa Aadama Ibiliisa yoyyi, debbo oo o yoyyi so luutti yamiroore Laamdo. <sup>15</sup> Kaa dum fuu debbo ana hisinee e beynugol, so ana heddii e goondinal e jilli e senaare e leydinkinaare.

## 3

### *No hoore6e deental goondin6e kaani worrude*

<sup>1</sup> Kaa haala ana hoolnii: muuydo laataade hooreejo deental goondin6e fuu, muuyii golle lobbo jaati. <sup>2</sup> Ndennoo, ana tilsi hooreejo oo laaoto neddo mo walaa ni6e, jom debbo gooto, nantiido, hakkilante, jom needi, jippinoowo ho66e, baawdo jannginge, <sup>3</sup> tawee wanaa jaroowo doro, wanaa kabeteedo, laaoto newiido, jaajudo bernde, kaariyante e jawdi janandi, <sup>4</sup> kawjiido koreeji mum faa gasi, biirudo bi66e mum faa 6e dowlanii dum e dow teddeengal. <sup>5</sup> Sabi so neddo waawaali hawjaade koreeji mum, hono hinnortoo deental goondin6e Laamdo ngal? <sup>6</sup> Pati tawee joomum yo tuubudo ko 6ooyaali nde mawninkinoo so jukkiree no Ibiliisa jukkirtee nii. <sup>7</sup> Ana tilsi kasen won6e sella 6ee ceettanoo mo ko moyyi, pati o he6a gacce so piccal Ibiliisa nannga mo.

### *No gollanoo6e deental goondin6e kaani worrude*

<sup>8</sup> Gollanoo6e deental goondin6e ngal 6ee duu ana kaani taweede yo teddu6e, ngalaa berde didi, njabataa doro jaaloo dum'en, jaamataa ribaa, <sup>9</sup> tawa e6e kaybira goonga teddu6e gondo e goondinal oo hakkillaaji dijinjataa 6e. <sup>10</sup> Arael hen fuu, 6e yeewee kori 6e ngalaa ni6e. So tawii 6e ngalaa ni6e, nden kaa e6e mbaawi fudfude laataade gollanoo6e deental goondin6e lisa. <sup>11</sup> Hono non rew6e 6ee duu tawree teddeengal, tawa 6e nganaa jo'oo6e yim6e, 6e nantii6e, hoolnii6e e banngal huunde fuu. <sup>12</sup> Gollanoowo deental pati dewla ko 6uri debbo gooto, hawjoo koreeji mum faa gasa. <sup>13</sup> Gollan6e

deental goondinbe ngal faa moyyi fuu keban teddeengal, kasen duu keban cuusal ki66ungal ley goondinal mum'en Iisaa Almasiihu.

### *Haala sirri diina men*

<sup>14</sup> Mido yidi warde to maa ko 6ooyataa. Kaa ko waddani kam winndude e maa oo bataaki, <sup>15</sup> yalla fay so 6ooyii mi waraali, ada annda no kaan-den worrude e ley suudu Laamdo. Suudu nduu yo deental goondinbe Laamdo guurdo oo jaati. Deental ngal jaati woni nuygal goonga. <sup>16</sup> Sikke fuu walaa, sirri diina men oo ana mawni:

O 6anngirii e suura 6ii-aadama,  
Ruuhu oo 6annginii fooccitaare makko,  
malaa'ika'en nji mo,  
o ooynaama ley leji,  
o goondinaama ley aduna,  
o njabbintinaama dow kammu,  
o hebii teddeengal Laamdo.

## 4

### *Haala jannde majjinoore*

<sup>1</sup> Ruuhu Ceniido oo haalii faa laabi nde o wii cakite jamaanu dapan yimbe yoppube goondinal, njokka e caggal seydaani'en majjinoobe, kajum e waaju seydaani'en. <sup>2</sup> Be njokkan naafigaaku fenoobe 6e berde mum'en mbaati faa niije naawataa dum'en, hono berde dee cumiraade njamndi ngulndi taw. <sup>3</sup> Been yimbe ana karmina dewle, ana kada kulle yogaaje naameede, tawee kanje nee ko Laamdo tagiri de yalla goondinbe anndube goonga 6ee fuu ana naama de, njettira de Laamdo. <sup>4</sup> Sabi ko Laamdo tagi fuu ana moyyi, walaa fuu ko haani duniyiteede, so neddo hemrii dum jettooje Laamdo. <sup>5</sup> Sabi konngol Laamdo e duwaawu ana la66ina huunde fuu.

### *Haala laataade gollanoowo Iisaa lobbo*

<sup>6</sup> So a waajike dum sakiraa6e men 6ee, a laatoto gollanoowo Iisaa Almasiihu lobbo, sabi a waajitorike konngi goondinal e waaju lobbo mo njokku-daa faa gasi oo. <sup>7</sup> Kaa taali 6oli di kawrataa e diina dii, woddiita di. Eeltir hoore maa kulol Laamdo. <sup>8</sup> Sabi eeltude caldi mum ana nafa e kulle yogaaje, kaa kulol Laamdo ana nafa e huunde fuu, sabi e maggol kebu-den tayoral e nguurdam jooni dam, podane-den garoyoojam dam duu. <sup>9</sup> Kaa haala hoolnii, huunde fuu 6uraa ka haande yarreede! <sup>10</sup> Saabe majjum eden ngolla, eden tiinnitoo, sabi eden pawii jikke men e Laamdo guurdo, kisinoowo yimbe fuu sako goondinbe. <sup>11</sup> Dum woni ko kaan-daa yamirde, dum woni ko kaan-daa waajaade.

<sup>12</sup> Pati fay gooto yawore a suka, laatano-daa goondinbe misaalu haala e golle, jilli e goondinal, kajum e laabal. <sup>13</sup> Fade am warde, tiidaa e jannande yimbe Binndi dii, mbaajo-daa 6e, pamminaa 6e. <sup>14</sup> Pati yeeba dokkal Ruuhu Ceniido ngal ndokke-daa nde Laamdo loowi yimbe haala maa, mawbe duu pawnoo juude mum'en dow maa ndee. <sup>15</sup> E deen kulle kaan-daa tiinnaade, yalla yimbe fuu ana njiya no beydorto-daa yaarude yeeso. <sup>16</sup> Haybu hoore maa, kaybaa ko njannngintaa koo, tiidaa e majjum. Sabi so a tiidii e majjum, a hisinan hoore maa, a hisinan hettinantoobe ma 6ee fuu.

## 5

### *Waajuuji Pool faade e goondinbe Iisaa*

<sup>1</sup> Pati fel gorko mawdo, waajora dum needi no baaba maa nii. Waajora jokolbe no mijiraaŋe maa nii, <sup>2</sup> mbaajoro-daa debbo mawdo no inna maa nii, mbaajoro-daa sukaaŋe rewŋe no banndiraaŋe maa rewŋe nii, tawee e dow laaŋal e nantaare.

<sup>3</sup> Teddin rewŋe be worŋe mum'en maayi, dum woni rewŋe maayiraaŋe be ngaldaa e fay gooto be. <sup>4</sup> Kaa so debbo mo gorum maayi ana jogii biŋŋe naa taaniraaŋe, ko ana adoo fuu wajibaade e biŋŋe be, be pamminee no Laamdo huldete e ley cuudi maŋŋe, be mbarjoo saaraaŋe maŋŋe mbarjaari lobbiri. Sabi dum woni ko welata Laamdo. <sup>5</sup> Debbo mo gorum maayi mo walaa doondiido dum mo waldaa e fay gooto, fawii jikke mum e Laamdo. Omo duumoo e duwaawu jemba e jalooma, omo jaaganoo yimbe Laamdo. <sup>6</sup> Kaa maayraado kaŋanoowo aduna tan, yo maaydo fay so maayaali. <sup>7</sup> Dum kaan-daa yamirde be pati be keŋa feloore. <sup>8</sup> Mo hinnaaki sakiraaŋe mum, wanaa haala be wondi galle, oon yo jankirido goondinal, omo buri fay mo goondinaali oo bonde.

<sup>9</sup> Mo kaan-daa tonngude innde mum e ley dewal rewŋe maayraaŋe haanbe walleede, ko famdi fuu sinaa joomum heba duubi capande jeegom, tawee duu gorko gooto dewlunoo dum. <sup>10</sup> O seettanee golle lombo ko wa'i hono ne'ude sukaaŋe, jippinde kodo, lootude koyde seniibe, weemtinde beemudo e gollude huunde fuu ko moyyi. <sup>11</sup> Kaa haabuuŋe be worŋe mum'en maayi be, pati winndu inde maŋŋe. Sabi so muuyooji maŋŋe ndunyii be e yidude bameede, nden kaa be kuuccan Iisaa Almasiihu, <sup>12</sup> sariya Laamdo dogo dow maŋŋe, sabi be mbonnii aadi maŋŋe aranndeeri ndii.\* <sup>13</sup> E ley dum be ngontan laaliibe, be naata e nduu suudu nii, be njalta be naata e nduu. Kaa ko buri fuu bonde kasen, be laatike heewbe haala, haaltoobe sirri, eŋe kaala haalaaji di ngalanaa be. <sup>14</sup> Dum saabii so mido yidi haabuuŋe rewŋe maayraaŋe be ndewlee, beyna, kayba cuudi mum'en, yalla gajo oo ana ronka damal no bonnira inde men. <sup>15</sup> Sabi jooni yoga e maŋŋe njoppii laawol ana njokki e Ibiliisa jaati. <sup>16</sup> Debbo goondindo fuu mo rewŋe maayraaŋe ngoni ley galle mum yo wallu dum'en, pati ngal donngal fawoo e deental goondinbe ngal. Hono non wadata so deental ngal waawa wallude rewŋe maayraaŋe be ngaldaa e fay gooto be.

<sup>17</sup> Hooreeŋe deental goondinbe dawranooŋe faa gasa be ana kaani teddi-neede teddeengal manngal. Burbe fuu haandude e teddeengal manngal yo tampitotooŋe dow waaju e jannde be. <sup>18</sup> Sabi Binndi dii mbii: «A hadataa ngaari aloori tappoori gawri muudude gawri.»† Di mbii kasen: «Golloowo ana haandi e njobdi mum.»‡ <sup>19</sup> Pati jabu felde mawdo deental goondinbe so wanaa dow seedaaku yimbe didon naa taton. <sup>20</sup> Niibuŋe e luuttal, fel dum'en yeeso yimbe fuu, yalla ana laatanoo heddiibe be kulol. <sup>21</sup> Mido ndaarde yeeso Laamdo e yeeso Iisaa Almasiihu e yeeso malaa'ika'en be o subii be, downtano-daa deen jamirooje, tawee a jinngantaa fay gooto, a burdintaa yimbe duu. <sup>22</sup> Pati yaaw fawde juude maa dow hoore fay gooto faa kalfinaa dum golle deental goondinbe. Pati reentu e luutti woŋŋe, jogora hoore maa laaŋal.

<sup>23</sup> Hankasen, pati yar ndiyam bolam tan, njaraa peguujam seeda kammari reedu maa nduu e jawuujj keewdi ngar-ngartooji e maa dii.

\* **5:12** So debbo mo gorum maayi winndaama ley dewal rewŋe maayraaŋe fuu, 6amii aadi jokkan Iisaa tan, 6amataake kasen. † **5:18** Fillitagol Tawreeta 25.4 ‡ **5:18** Luuka 10.7

<sup>24</sup> Luutti yimbe yogaa6e banngan gila caraaka. Kaa luutti yogaa6e dñi, caggal sareede dñi banngata. <sup>25</sup> Dum e taweede gollleeji lobbi dñi njiyete faa laaba pacaa. Fay dñi njiyataake law dñi duu keddadataako ana cuudñi.

## 6

<sup>1</sup> Goondin6e won6e e maccungaaku fuu, yo njogoro halfaa6e mum'en haandu6e e teddungal ki66ungal pati innde Laamdo ndee e diina kaa mbonkee. <sup>2</sup> Kasen duu tawaa6e ana njogii kalfaa6o goondindo fuu, pati miila o sakiike mum'en so njaworoo mo dum. Yo 6e ngolliran mo soobee faa bura no 6ee too nii, sabi o goondindo, kasen duu o korsudo. Pamminaa dee kudde, mbaajo-daa de.

### *Haala jannde peneere e jooto jawdi*

<sup>3</sup> Baajotoodo goddum mo jokkaali haala Joomiraado men Iisaa Almasiihu selluka hawroowa e kulol Laamdo kaa, <sup>4</sup> oon yo mawninkiniido mo anndaa fay huunde, o kaahaango keewdo duko e jeddi. Dum waddata haasidaaku e poodondiral e mbonka e sikkitaare bonnde. <sup>5</sup> Dum waddata dukooji dñi ngalaa do kaadi hakkunde yimbe 6e hakillaaji mum'en mbitti. Been yimbe njoppii goonga, njogorike kulol Laamdo ana hokka jawdi. <sup>6</sup> Goonga, kulol Laamdo yo jawdi mawndi, so neddo hejnitonike ko jogii. <sup>7</sup> Sabi juude 6ole ngardu-den e aduna oo, kasen duu juude 6ole kootirten. <sup>8</sup> Ndennoo, so en kebii nguure e koltal tan hejnitonoro-den dum. <sup>9</sup> Kaa yidu6e jawdi sanne 6ee ceytete, njomoo e piccal, njumpa e gidaade yonki keewde laaliide majjinooje, joolooje yimbe e ley halkere mawnde. <sup>10</sup> Sabi jooto jawdi woni inna bonanndaa dñi fuu. Yoga yaari banngal jawdi faa majji laawol goondinal, ngaddani ko'e mum'en torraaji keewdi.

### *Haala haybude ko yamiraa*

<sup>11</sup> Kaa aan neddo Laamdo oo, wodda dee kudde, tewtu foocitaare e kulol Laamdo e goondinal e jilli e mujal e leydinkinaare. <sup>12</sup> Wadu ko mbaaw-daa fuu faa kebaa jaalaade golle Ibiliisa e ley goondinal, nanngaa nguurndam nduumiidam dam. E majjam Laamdo noddu maa, saabe majjam njaadir-daa goondinal maa no woodiri yeeso yimbe heew6e. <sup>13</sup> Mido yamire yeeso Laamdo guurnoowo huunde fuu oo, e yeeso Iisaa Almasiihu ceettiido no woodiri yeeso Pontiyu Pilaatu kaananke oo, <sup>14</sup> haybu ko njamira-daa koo tawa tuundi walaa hen nñe ngalaa hen, faa nannde gartol Joomiraado men Iisaa Almasiihu. <sup>15</sup> Gartol ngol wadan e wakkati mum. Kanko woni gooto oo, Jom mbelko'aaku, Jom Baawde, Kaananke kaanankoo6e, Joomiraado joomiraa6e. <sup>16</sup> Kanko tan woni Bajjo duumotoodo, gondo ley fooyre nde fay gooto waawaa badaade. Kanko woni mo neddo fuu yiyaali, waawaa yiide mo duu. Yo teddeengal e baawde duumiide ngoodan mo. Aamiina.

### *Baynondiral*

<sup>17</sup> Yamir arskunte'en e oo aduna pati mawninkinoo, pati pawa jikke mum'en e jawle de niibataa. Ko 6e kaani wadude dee, 6e pawa jikke ma66e e Laamdo dokkoowo en huunde fuu faa heewa yalla eden neemoo hen, <sup>18</sup> 6e ngolla ko moyyi, arsuku ma66e laato gollleeji lobbi, 6e laato saahii6e tawa wakkati fuu e6e mballa wo66e e ley jawle ma66e. <sup>19</sup> Nii 6e pagganortoo ko'e ma66e jawle ko waroyta, faa 6e keba nguurndam jaati dum.

<sup>20</sup> Timote, haybu ko kalfine-daa koo, wodda haalaaji cobudi 6oli dñi, kapum e miilooji biyeteedi anndal dñi. <sup>21</sup> Yogaa6e ana mantoroo ngal anndal, faa celi e goondinal.

Yo hinnee Laamdo wonu e mon.

## Bataaki Pool didaabo faade e Timote

<sup>1</sup> Oo bataaki ga am iwri, miin Pool nelaado Iisaa Almasiihu e sago Laamdo faa mi fammina yimbe haala nguurndam dam Laamdo fodani en ngondam e Iisaa Almasiihu dam. <sup>2</sup> Mi jowtii ma, aan Timote biyam korsudo oo. Yo Baabiraado men Laamdo e Joomiraado men Iisaa Almasiihu njurme, ndokke moyyere e jam!

### No Pooljeertiniri Timote

<sup>3</sup> Mido yetta Laamdo mo ngollanan-mi oo. Hakkille mo jinjaali kam ngolliranan-moo-mi, hono no maamiraabe am bee ngadirnoo nii. Jemma e jalooma fuu mi seerataa e miccitaade ma e ley duwaawuuji am, <sup>4</sup> sabi mido miccitoo gondi maa. Mido yidi yiide ma sanne yalla seyo am ana hi66a. <sup>5</sup> Mido miccitoo goondinal maa ngal waldaa e naafigaaku ngal maama maa debbo Loyis e inna maa Enis njoginoo, mido tayori aan duu kanngal njogidaa. <sup>6</sup> Dum saabii so mido miccintine: heydintin kasen dokkal ngal Laamdo hokku maa nde paw-mi juude am dow maa ndee. <sup>7</sup> Sabi Laamdo hokkiraali en Ruuhu faa kulen yimbe. Ko o hokkiri en dee, faa Ruuhu hokka en semmbe e jilli e nantaare.

<sup>8</sup> Ndennoo, pati yaaga waajaade kabaaru Joomiraado men oo, pati yaagora duu ko uddiraa-mi kasu saabe makko koo. Reentu e am torraaji saabe Kabaaru Lobbo haala Iisaa, tawa a pawiidu e dow baawde Laamdo. <sup>9</sup> Kanko o hisinii en, o noddii en faa laato-den yimbe makko seniibe. Wanaa saabe golle men o noddiri en, ko o noddiri en dee, saabe ko o anniyii hisinde en koo e saabe hinnee makko mo o wayli e men oo kammari Iisaa Almasiihu gila e al'ajal. <sup>10</sup> Kaa jooni moyyere ndee bannginiraama saabe banngugol kisinoowo en, Iisaa Almasiihu kalkudo maayde, banngindo nguurndam e duumagol e ley Kabaaru Lobbo oo. <sup>11</sup> Saabe oon Kabaaru Lobbo Laamdo wadiri kam baajotoodo e nelaado e jannginoowo. <sup>12</sup> Dum saabii so mido torree diin torraaji, kaa mi yaagaaki fey, sabi mido anndi mo ngoondin-mi oo, mido tayori omo waawi reenude ko kalfinaa-mi koo faa janne gartol makko. <sup>13</sup> Jogora haalaaji celludi di narru-daa kam dii misaalu e ley goondinal e jilli di ke6u-den e ley ha66agol men e Iisaa Almasiihu dii. <sup>14</sup> Oo kaaliifa moyyo, haybir dum Ruuhu Ceniido jippiido e men oo.

<sup>15</sup> Ada anndi Asiyankoo6e fuu celi e am, Fijela e Hermoseena ana njeeyaa e ma66e. <sup>16</sup> Yo Joomiraado neemin koreeji Onesifoor, sabi o 6uu6inii 6ernde am cili keewdi, kasen duu geyyelle am dee njaaginaaki mo. <sup>17</sup> Ko 6uri dum fuu, nde mo warnoo Roma ndee, mo tewtirii kam soobee faa mo yiiti kam. <sup>18</sup> Yo Joomiraado yo6u mo o he6a yurmeende janne darngal. Ko mo gollani kam ley ngeenndi Efeesu koo, ada anndi dum sanne.

## 2

### Haala laataade gollanoowo Iisaa koolniido

<sup>1</sup> Ndennoo aan biyam, semmbindinira moyyere wonnde e Iisaa Almasiihu ndee. <sup>2</sup> Ko kaalan-maa-mi yeeso seede'e'en heew6e koo, halfin dum yimbe hoolniibe waaw6e famminde wo66e. <sup>3</sup> Torride-daa e am no sordaasi Iisaa Almasiihu lobbo nii. <sup>4</sup> Walaa fuu sordaasi cunjanoowo ko wanaa ha6o so

mawdo mum welee dum. <sup>5</sup> Dadondirteeɗo doddu duu heɓataa deesewal sinaa jokkira no yamiraa nii. <sup>6</sup> Kasen duu demoowo golludo faa tampi, kajum haani adaade heɓude ngeɗu mum e ko hettaa koo. <sup>7</sup> Miila ko kaalanan-maa-mi koo, sabi Joomiraado udditan hakkille maa faa paamaa huunde fuu.

<sup>8</sup> Miccita Iisaa Almasiihu immintinaado e maayde, mo leɗol Daawuuda, no Kabaaru Lobbo mo mbaajotoo-mi oo famminiri nii. <sup>9</sup> Saabe makko torriraami faa kaɓɓaa-mi hono no mi janoowo nii, kaa konngol Laamdo ngol kajum kaa haɓɓaaka. <sup>10</sup> Dum wadi so mido muja huunde fuu saabe subaabe ɓee, yalla kambe duu eɓe keɓa kisindam iwɗam e Iisaa Almasiihu ɗam, ɓe naata e teddeengal mum faa abada. <sup>11</sup> Haala kaa ana hoolnii:

So en maaydii e makko,  
en nguurdan e makko.

<sup>12</sup> So eden muja torraaji,  
en laamodoto e makko.

So en mbii en anndaa mo,  
o wiyen o anndaa en enen duu.

<sup>13</sup> So en laataaki hoolniibe,  
kanko omo heddi o koolniido,  
sabi o waawaa yeddude hoore makko.

### *Haala golloowo mo Laamdo yarii*

<sup>14</sup> Dum woni ko kaan-ɗaa miccintinde goondinɓe. Njeertinaa ɓe yeeso Laamdo pati ɓe poodondira e haalaaji ɗi nafataa fay huunde so wanaa bonnitidde hettintooɓe. <sup>15</sup> Tiinna, yalla so a darike yeeso Laamdo, aɗa laato golloowo jarranaado mo golle mum hersinaali, laato-ɗaa naftortooɗo konngol goonga ngol no haaniri nii. <sup>16</sup> Sel haalaaji cobudi ɓoli, sabi wondube e hono ɗii haalaaji ɓee ittiraaka so wanaa ɓeydude woddaade Laamdo. <sup>17</sup> Haala maɓɓe ana lajira no uubere lajooɓe nii. Himene e Filitus ana njeyaa e maɓɓe. <sup>18</sup> Been woortube goonga ana mbiya immital ɓettiike, ana mbonnitira non goondinal yogaaɓe. <sup>19</sup> Kaa Laamdo wadii nuygal cellungal, ana winndii dow maggal: «Joomiraado ana anndi yimbe mum.» Ana winndii kasen: «Noddoowo innde Joomiraado fuu woddoo ko boni.»

<sup>20</sup> Wanaa kanje e card tan ngoni kaaki defirdi ley galle jom jawdi, leddeeji e loopeji duu ana hen. Ardiidi ɗii ngollirtaake so wanaa e dow ko hensaa, goddi ɗii ana ngolliree ko wanaa ko hensaa. <sup>21</sup> Ndennoo, so neddo laɓɓini hoore mum e gollleeji bonɗi ɗii fuu, laatoto hono no kaakol keertaangol, ceniingol nafaowol joomum, lanndinanaangol faa golliree golle lobbo fuu.

<sup>22</sup> Dogu fijirde cukaaku. Ndaartu fooccitaare e goondinal e jilli e jam, aan e noddirooɓe Joomiraado ɓerde laaɓude ɓee fuu. <sup>23</sup> Wodɗita jeddi haalaaji laaliidi ɗi ngalaa ko nafata, aɗa anndi dukooji tan ɗi ngaddoyta. <sup>24</sup> Sabi maccudo Joomiraado haanaa dukideede, ko haani tan laataade newaniido yimbe fuu, baawdo jangginde, jom muja, <sup>25</sup> ne'iroowo yeddooɓe ɓee jam-jam miilde Laamdo hokka ɓe no ɓe tuubira, ɓe paama goonga, <sup>26</sup> faa hakkillaaji maɓɓe ngarta, ɓe kisa e piccal Ibiliisa nanngudo ɓe so ana gollina ɓe muuyde mum oo.

<sup>1</sup> Anndu, ley cakite jamaanu tiidallaaji ngadan, <sup>2</sup> sabi yimbe laatoto yidube ko'e mum'en, jootube e jawdi, mantotoobe, mawninkiniibe, bonkotoobe Laamdo, murtiroobe saaraabe mum'en, bonnoobe moyyere, 6e teddintaa ko senii, <sup>3</sup> yoorbe berde, 6e njaafataako, no'ooobe yimbe, 6e ngalaa nantaare, 6aleebe yonki, warube ko moyyi fuu, <sup>4</sup> jammbotoo6e, wul6e, haawtiibe, 6e joote aduna burani dum'en Laamdo. <sup>5</sup> Be nanndinkinto e hul6e Laamdo, kaa e6e njedda baawde mum. Woddiita been yimbe. <sup>6</sup> Won e ma66e naatoo6e e galleeji, ke6a hakkillaaji ndewoy luuttoowoy sanne njokkoowoy sii gidaade yonki fuu. <sup>7</sup> Wakkati fuu ekoy njidi faamude, kaa abada koy mbaawataa faamude goonga. <sup>8</sup> Been wor6e naatoo6e e galleeji njeddii goonga hono no Yannes e Yamberes njeddirnoo Muusaa nii. Be ngalaa hakkille, goondinal ma66e walaa ko nafata. <sup>9</sup> Kaa 6e njaarataa yeeso, sabi yimbe fuu annditan 6e ngalaa hakkille no Yannes e Yamberes nii.

### *Haala Binndi ceniidi dii*

<sup>10</sup> Kaa aan a yii fammingol am e neesu am e anniyaaji am e goondinal am e mujal am e jilli am e tiinnitaare am <sup>11</sup> e torraaji am e tampere am. A yii duu ko hewtii kam Antiyokiya e Ikoniya, kajum e Listara koo fuu, a yii no mujir-mi torraaji kewtiidi kam dii. Kaa Joomiraado biltii kam e majji di fuu. <sup>12</sup> Goonga, ka66iido e lissaa Almasiihu fuu so yidii wuurdude e kulol Laamdo, torrete. <sup>13</sup> Kaa yimbe bon6e hiiloobe yimbe 6ee beydorto bone. E6e majjina wob6e, e6e majjina ko'e ma66e duu. <sup>14</sup> Kaa aan, jiiibu e ko njangu-daa ko njarri-daa faa laabi koo, ada anndi janggin6e ma 6ee. <sup>15</sup> Gila a suka ada anndi Binndi ceniidi dii. Kanji mbaawi famminde ma laawol kisindam kebirteedam goondinal lissaa Almasiihu. <sup>16</sup> Binndi ceniidi dii fuu Laamdo loowi di winndube 6ee, nafaa majji yo jangginde, kajum e 6annginande neddo boofi mum, ooncude en e ne'ude en ley nguurdam poocitiidam <sup>17</sup> yalla neddo Laamdo fuu ana hi66a, lanndinanoo golle lobbo fuu.

## 4

### *Haala tiidude e waaju*

<sup>1</sup> Mido ndaarde saabe Laamdo e saabe lissaa Almasiihu caroyoowo wuur6e e maay6e oo, mido ndaardire saabe gartol makko kajum e Laamu makko: <sup>2</sup> mbaajo-daa konngol Laamdo ngol yaafu maa tiidu maa fuu, hollitin 6e boofi ma66e, fel 6e, hokku 6e semmbe e kaaddi mujal maa e waaju maa fuu. <sup>3</sup> Sabi wakkati waran nde 6e calotoo nande waaju celludo oo, 6e njokka muuyooji ma66e faa 6e 6amana ko'e ma66e jangginoo6e ko 6e njidi nande koo, <sup>4</sup> 6e cukka noppi ma66e pati 6e nana goonga, 6e mbaylitoo e taali. <sup>5</sup> Kaa aan, nanto-daa e huunde fuu, mujaa torra, mbaajo-daa Kabaaru Lobbo oo, timminaa golle mo ngollantaa Laamdo oo faa laaba.

<sup>6</sup> Kaa miin, yiyam am 6adike laataade no sadaka kirsamaajo nii sabi wakkati am 6adike. <sup>7</sup> Mi wadii ko mbaaw-mi fuu faa mi he6a jaalaade golle Ibiliisa e ley goondinal, mi yottinii do kaan-mi haafude, mi haybii goondinal ngal. <sup>8</sup> Gila jooni mido resanaa deesewal foocitaare ngal Joomiraado poocitiido caroowo oo hokkata kam janne darngal. Wanaa miin tan hokkete ngal, miin e heppu6e gartol makko 6ee fuu.

### *Haala waajuuji cakitiidi*

<sup>9</sup> Tiinna ngaraa e am law. <sup>10</sup> Sabi Demas yoppii kam saabe yidude mum aduna, fa'ii Tesaloniiki. Keresna yehii Galaatiya, Titus duu fa'ii Dalmaatiya,



<sup>11</sup> Luuka tan wondi e am. Fañu Marka ngardaa e mum, sabi omo waawi faabaade kam sanne e ley golle oo. <sup>12</sup> Tikikus, mi nelii ñum Efeesu. <sup>13</sup> So ada wara, ngaddanoraa kam saaya am ka njoppunoo-mi Torowas ley galle Karapo kaa, kañum e dewte ñee. Ko ñur-mi yidude ngaddanaa kam, dewte guri ñee. <sup>14</sup> Aleksandere baylo oo wadii kam ko naawi kam sanne. Joomiraado yoban mo ko waarata e golle makko. <sup>15</sup> Aan duu, reenta e makko, sabi o yeddii waaju amen sanne.

<sup>16</sup> Nannde ndarnaa-mi arande yeeso caroowo faa mi bilta hoore am ndee, fay gooto faabaaki kam, ñe fuu ñe celu e am. Pati Laamdo nanngir ñe ñum! <sup>17</sup> Kaa Joomiraado faabike kam, hokki kam semmbe yalla mido ooynoo waaju makko, faa leñi ñii fuu nana. Nii woni no kisiniraa-mi e hunduko rawaandu ladde. <sup>18</sup> Joomiraado ittan kam e bone fuu, hisina kam faa mi hewta laamu mum dow kammu oo. Yo teddeengal woodan mo faa abada abadin. Aamiina!

### *Baynondiral*

<sup>19</sup> Mido jowta Piriskilla e Akilas, mido jowta koreeji Onesifoor. <sup>20</sup> Erasta ana heddii Korintu, Torofim, mi yoppii ñum Miletus sabi wanaa celludo. <sup>21</sup> Tiinno-ñaa ngaraa gila dabbunde waraali. Ebulus e Pudes e Lina e Kalawdiya e sakiraañe ñee fuu, ana njowte.

<sup>22</sup> Yo Joomiraado tawde e maa! Yo hinnee Laamdo wonu e mon.

## Bataaki Pool faade e Titus

<sup>1</sup> Oo bataaki ga am iwri, miin Pool. Mi maccudo Laamdo, mi nelaado Iisaa Almasiihu faa mi wada subaafe Laamdo fee ngoondina dum, kasen duu fe anna goonga gondo e kulol Laamdo, <sup>2</sup> fe pawa jikke ma66e e nguurndam nduumiidam. Laamdo mo bonnataa aadi oo fodiino dam nguurndam gila e al'ajal. <sup>3</sup> Nde sarti makko oo yottinoo ndee, kanko Laamdo kisinoowo en oo, o 6anngini konngol makko ngol, kasen duu o yamirii mi halfinee waajaade ngol. <sup>4</sup> Titus, mi jowtii ma. A biyam jaati kammari goondinal Iisaa ngal ndeentu-den e mum jooni ngal. Yo Laamdo Baabiraado men e Iisaa Almasiihu kisinoowo en ngadane moyyere e jam!

### No Titus golliri ley Kereta

<sup>5</sup> Mi dalii ma ruunde Kereta faa njokkito-daa ko heddiino e golle oo koo, kasen duu cubano-daa ngeenndi fuu maw6e deental goondin6e hono no njamir-maa-mi nii. <sup>6</sup> Tawee mawdo cubaado oo walaa feloore, jom debbo gooto, tawee bi66e mum yo goondin6e fe yim6e mbaawaa jinjirde dum'en neetaraaku naa salaare. <sup>7</sup> Sabi hooreejo deental goondin6e, Laamdo halfini dum golle oo, ndennoo ana tilsi joomum tawee walaa feloore, wanaa mawninkiniido, wanaa guldo bernde, wanaa jaroowo doro, wanaa ka6eteedo, wanaa jaamoowo ribaa. <sup>8</sup> Joomum ana haani laataade jip-pinoowo ho66e, jiddo ko moyyi, hakkilante, poocitiido, kuldo Laamdo, nantiido, <sup>9</sup> tawa joomum ana dwtanii konngol goongaraawol ngol no ngol waajoraa nii. Hono non joomum waawirta hokkude wo66e fee sembe e ley waaju celludo oo, kasen duu waawa li6ude yeddoobe dum fee.

<sup>10</sup> So goonga dee, heew6e calike jokkude goonga, sako hakkunde Yahu-udiyankoo6e tilsin6e goondin6e Iisaa fuu taadee fee. Kam6e fe laatike haaloobe haalaaji 6oli, yonnoobe yim6e. <sup>11</sup> Ana tilsi mu66aa kundude ma66e, sabi e6e nii mbonnira galleeji kuurdi waaju mo haanaa waajeede, faa fe ke6ira dum kaalisi no harmiri.

<sup>12</sup> E ley keretankoo6e, gooto ma66e mo fe njogorii yo hakkilante, wii: «Keretankoo6e yo fenoobe wakkati fuu, fe daabaaji bondi, fe nattu6e him-mir6e e deedi mum'en.» <sup>13</sup> Ko keretanke oo wii koo yo goonga. Dum nee, dartin 6e, yalla e6e ke6a goondinal cellungal, <sup>14</sup> fe nootta jokkude taali Yahu-udiyankoo6e kajum e jamirooje yim6e yoppube goonga fee. <sup>15</sup> Laa6u6e, huunde fuu ana daganii dum'en. Kaa sobu6e kajum e 6e nganaa goondin6e 6ee, fay huunde daganaaki dum'en, sabi miilooji ma66e e hakkillaaji ma66e fuu ana cobi. <sup>16</sup> E6e mbiya e6e anndi Laamdo, kaa gollleeji ma66e ana kollita fe anndaa mo. Be wanaa6e, murtu6e, fay golle lobbo gooto fe mbaawaa gollude.

## 2

### Haala waaju celludo

<sup>1</sup> Kaa aan, waaja ko hawrata e waaju celludo oo. <sup>2</sup> Wor6e naye6e, wii fe laatoo kaariyante'en, 6e ne'oo, 6e nantoo, 6e laatoo sellu6e goondinal e jilli e mujal. <sup>3</sup> Rew6e naye6e duu nguurda e senaare, mbaasa laataade no'oo6e yim6e, caloo doro jaaloo dum'en. Be laatoo famminoo6e ko moyyi, <sup>4</sup> yalla e6e

mbaajoo sukaa6e rew6e 6ee yidude wor6e mum'en e sukaa6e mum'en. <sup>5</sup> Be mbaajoo been laatoo nantii6e, laa6u6e, hiinnii6e cuudi mum'en, moyyu6e, downtantoo6e wor6e mum'en, pati konngol Laamdo ngol bonkee. <sup>6</sup> Sukaabe wor6e duu, waajora dum'en non yalla e6e nantoo e <sup>7</sup> huunde fuu. Aan e hoore maa, laatana 6e misaalu e ley golle lobbo fuu, mbaajoro-daa laa6al e teddeengal <sup>8</sup> e haala selluka ka yeddataako, yalla way6e men ana kersa, ndonka he6ude e men feloore. <sup>9</sup> Maccu6e, waaja dum'en downtanoo halfaabe mum'en e huunde fuu, mbelna 6erde ma66e, mbaasa yeddude 6e, <sup>10</sup> wanaa haala wujjude 6e. Be laatoo hoolnii6e hi66u6e, faa yim6e fuu teddina waaju haala Laamdo kisinoowo en oo.

<sup>11</sup> Laamdo bannginii moyyere mum faa yim6e fuu kisa. <sup>12</sup> Nden moyyere ekkintinta en no ceerdaten e geddi Laamdo, kaɓum e gidaade yonki oo aduna. Kayre moyyere ndee ekkintinta en kasen no laatorto-den nantii6e, foocitii6e, hul6e Laamdo e oo doo aduna, <sup>13</sup> tawa eden ndoomti jikke belnoowo en hoore oo e wakkati mo teddeengal Laamdo mawdo oo banngata kaɓum e teddeengal Iisaa Almasiihu kisinoowo en oo. <sup>14</sup> Kanko Iisaa Almasiihu woni dokkitirdo yonki mum kammari men, yalla omo soottito en e bone fuu, o la66inana en hoore makko, laato-den lejol makko kanko tan, tiinniingol e gollude gollleeji lobbi.

<sup>15</sup> Dum kaan-daa jannginde, dum kaan-daa waajaade e felirde hettintoo6e ma 6ee no baawde maa poti. Pati fay gooto yawe.

### 3

#### *No goondin6e Iisaa poti worrude*

<sup>1</sup> Miccintin goondin6e 6ee leydinkinanoo kaanankoo6e, 6e downtanoo dum'en, 6e lanndinanoo golle lobbo fuu. <sup>2</sup> Pati 6e mbonkoo fay gooto, pati 6e laatoo habete6e, 6e newoo, 6e kolla yim6e fuu leydinkinaare hi66unde. <sup>3</sup> Sabi arande enen duu en laalinoo6e, salinoo6e, majjunoo6e. En laatinoke maccu6e gidaade yonki, kaɓum e dakameeji di ngalaa sii. Eden ngondunoo e ngaraandiiji e haasidaaku, eden mbananoo eden mbanondirnoo e ko'e men. <sup>4</sup> Kaa nde Laamdo kisinoowo en oo bannginnoo moyyuki mum e jilli mum ndee, <sup>5</sup> o hisinii en. Wanaa saabe golle men lobbo o hisiniri en, saabe yurmeende makko o hisiniri en. O hisinirii en lootogal ndimtotoongal en, keydintiniroowal en saabe Ruuhu Ceniido <sup>6</sup> mo o loowiri en kammari Iisaa Almasiihu kisinoowo en oo faa keew-den. <sup>7</sup> O wadirii dum yalla eden nanngiree foocitii6e kammari hinnee makko, ndonen nguurndam nduumiidam dam paw-den jikke men e mum dam. <sup>8</sup> Kanka woni haala hoolniika.

Mido yidi tilsinaa kulle dee, yalla goondin6e Laamdo 6ee ana jii6a e golle lobbo. Dum woni ko moyyi, ko nafata yim6e. <sup>9</sup> Kaa wodfita jeddi 6oli e mantaragol dammbe e poodndiral e duko banngal Sariya oo. Diin gollleeji ngalaa fayda, walaa ko di nafata. <sup>10</sup> Ceenndoowo yim6e fuu, daala dum faa hi66a cili didi. So joomum jabanaali ma, celaa e mum. <sup>11</sup> Anndaa baado hono non yo majjudo yo luuttoowo, hono non sariri hoore mum.

#### *Baynondiral*

<sup>12</sup> So mi neli e maa Aretemas naa Tikikus, njaawno-daa ngaraa tawaa kam Nikopolis, sabi ton anniyii-mi dabbude. <sup>13</sup> Tiinno-daa mballaa Jenas jannugudo sariya laamu oo kaɓum e Apollos e dow dawol mum'en ngol, pati

6e jakoree fay huunde. <sup>14</sup>Yim6e men 6ee duu ekkitoo gollude golle lobbo, 6e mballa hasindin6e e walleede 6ee pati nguurndam ma66e laatoo meere.

<sup>15</sup> Wondii6e am 6ee fuu ana njowte. Miden njowta gidiraa6e men goondin6e Iisaa 6ee fuu.

On fuu, yo hinnee Laamdo wonu e mon.

## Bataaki Pool faade e Filemon

<sup>1</sup> Oo bataaki ga amen iwri, miin Pool, kaɲum e sakiike men Timote. Miin Pool, mi uddiraado kasu sabaabu waajaade kabaaru Iisaa Almasiihu. Miden njowte, aan Filemon gollidiido amen korsudo oo. <sup>2</sup> Miden njowta duu deental goondinbe Iisaa gonngal galle maa ngal kaɲum e Appiya sakiike amen debbo oo e Arsippa balludo kam haɓanaade Kabaaru Lobbo oo. <sup>3</sup> Yo Baabiraado men Laamdo e Joomiraado men Iisaa Almasiihu ngadan on moyyere e jam.

### Haala jilli Filemon e goondinal mum

<sup>4</sup> Filemon, mi seerataa e yettude Laamdo nde jaaganto-maa-mi Laamdo fuu, <sup>5</sup> sabi mi nanii jilli di njid-ɗaa seniibe ɓee dii e goondinal maa Joomiraado men Iisaa. <sup>6</sup> Mido jaagoo Laamdo yo deental maa e amen ley goondinal nafu faa pamminaa yimbe moyyere fuu nde keɓaten saabe Iisaa Almasiihu. <sup>7</sup> Sakiike, mi seyike sanne, hakkille am duu waaltike saabe jilli gondi e maa dii, sabi a ɓuubinii berde seniibe ɓee.

### No Pool surirani Onesim

<sup>8</sup> Kammari dum, fay so taweede mido jogii baawde saabe Iisaa Almasiihu yamirde ma ko wajibii e maa, <sup>9</sup> ko ɓurani kam mi ndaarde saabe jilli. Miin Pool nayeejo oo, kasen duu jooni mi uddaado kasu saabe Iisaa Almasiihu, <sup>10</sup> mido jaage haala Onesim\* laatiido ɓiyam e laawol Iisaa e ley do ngeyyaami doo. <sup>11</sup> Arannde, walaano ko mo nafete, kaa jooni, o nafan en sanne, miin e maa fuu. <sup>12</sup> Mido neltire mo, anndaa o feccere yonki am. <sup>13</sup> Ko ɓurannoo kam, nanngude mo bannge am, o walla kam no kaanno-ɗaa wallirde kam nii e oo doo wakkati mo ngon-mi e geyyelle sabaabu Kabaaru Lobbo oo. <sup>14</sup> Kaa mi yidaa wadude fay huunde tawa en mbaddaali, sabi mi yidaa tilsinde ma wadude moyyere, ko njidu-mi dee, ngadiraa nde sago maa.

<sup>15</sup> Ana moyya tawee ko Onesim seenndiranoo e maa wakkatiwel seeda faa o wonda e maa faa abada, <sup>16</sup> tawa wanaa no maccudo nii tan, ko ɓuri maccudo, hono no sakiike men korsudo nii. Miin, mido horsini mo sanne, kaa aan ɓuri horsinde mo, sabi ada horsiniri mo o maccudo maa, kaɲum e ko o laatii sakiike maa saabe Joomiraado koo. <sup>17</sup> Ndennoo, so nii ada nanngiri kam deento maa, jaɓɓora mo no kaan-ɗaa jaɓɓoraade kam miin nii. <sup>18</sup> So tawii won ko o wadu maa, naa won ko ndewataa mo, faw dum fuu e dow am. <sup>19</sup> Miin Pool winndiri junngo am mi yobete, miin e hoore am, fotaa ko mi miccintine mido rewe nguurndam maa dam. <sup>20</sup> Goonga sakiike, mido ndaarde dum doo saabe Joomiraado: ɓuubiniraa bernde am deental men e Iisaa Almasiihu.

<sup>21</sup> Kammari mido tayori dowtaare maa saabanii kam winndude e maa, anndude a wadan ko ɓuri ko jaagi-maa-mi koo. <sup>22</sup> Kasen duu, fewjanam jippunde, sabi mido jikki njaabane-ɗon duwaawuuji mon mi wara to mon.

### Baynondiral

<sup>23</sup> Epafaras mo uddidaa-mi saabe Iisaa Almasiihu oo ana jowte.

<sup>24</sup> Gollidiibe am ɓee doo ana njowte: Marka e Aristarka e Demas e Luuka.

<sup>25</sup> Yo hinnee Joomiraado men Iisaa Almasiihu wonu e mon!

\* **1:10** Maanaa Onesim woni «Nafaa».

## Bataaki faade e Ibaraninkoo6e

### *No Laamdo haaldiri e men Biyum*

<sup>1</sup> Laamdo haaldiino e njaatiraa6e men gila ko 6ooyi cili keewdi e sifaaji keewdi, o haaldiri e ma66e annabaa6e. <sup>2</sup> Kaa e ley dee jalaa6e cakitotoode o haaldirii e men Biyiiko mo o tagiri aduna oo fuu, mo o wadi donoowo huunde fuu oo. <sup>3</sup> Kajum woni jalbugol annoora teddeengal Laamdo, kajum nanndi e Laamdo jaati, omo tammborii huunde fuu konngol makko jogiingol semmbe. Caggal nde o tilii la66inde luutti yim6e dii ndee, o joodii jaamo Laamdo Toowdo oo to dow kammu too. <sup>4</sup> Dum burni mo malaa'ika'en teddude fotude e innde nde Laamdo hokki mo burnde inde ma66e dee.

### *Haala Biddo burdo malaa'ika'en*

<sup>5</sup> Fay gooto e malaa'ika'en 6ee Laamdo wiyaali:

«Aan a Biyam,

hannde laatii-mi baam maa.»\*

Naa kasen:

«Mi laato Baaba mum,

laato Biyam.»†

<sup>6</sup> Kasen duu, nde o nelata hammadiijo makko oo e aduna oo ndee, o wii:

«Yo malaa'ika'en Laamdo fuu kujidana dum.»‡

<sup>7</sup> Laamdo wii banngal malaa'ika'en 6ee:

«O wadii malaa'ika'en makko kenuuli,

o wadii kaadime'en makko lewle yiite.»§

<sup>8</sup> Kaa banngal Biddo oo, mo wii:

«Laamu maa, aan Laamdo, woodan faa abada abadin!

Fooccitaare yo tuugorde laamu maa.

<sup>9</sup> Ada yidi fooccitaare,

ada waji oonaare,

saabe dum, Laamdo Joomiraado maa su6ori maa,

hokku maa seyo burngo ngo wondii6e maa ngoo.»\*

<sup>10</sup> O wii kasen:

«Gila e fuddfoode, Joomiraado,

aan tabintini leydi,

juude maa tagir-daa kammuuji dii,

<sup>11</sup> kanji di timman, kaa aan, a heddoto,

di fuu di kiiddiran no kaddule nii,

<sup>12</sup> a sowiran di no saaya nii,

di mbattitoroo no neddo wattitortoo e saayaaaji mum nii.

Kaa aan, a wattitataako,

nguurndam maa duu timmataa.»†

<sup>13</sup> Fay nde wootere, Laamdo wiyaali gooto e malaa'ika'en:

«Jooda jaamo am,

faa mi wada nja66aa way6e maa.»‡

\* 1:5 Jabuura 2.7 † 1:5 2 Samuyila 7.14 ‡ 1:6 Fillitagol Tawreeta 32.43 § 1:7 Jabuura 104.4

\* 1:9 Jabuura 45.7-8 † 1:12 Jabuura 102.26-28 ‡ 1:13 Jabuura 110.1

14 Malaa'ika'en 6ee fuu yo ruuhuuji gollanooji Laamdo, di mo nelata faa ngollana hefoo6e kisindam 6ee.

## 2

### *Haala kisindam mawdam*

1 Ndennoo, eden kaani wattude hakkillaaji men sanne e ko nan-den koo, pati en cerindo goonga so majjoyen. 2 Nelal Laamdo ngal malaa'ika'en 6ee njottini ngal yo goonga, luuttu6e naa yeddu6e mo fuu, ke6ii jukkungo ngo kaandi. 3 Hono ndadirten enen so en njeebiima hono dam kisindam mawdam? Dam kisindam, Joomiraado men jaati ardinoo haalde haala majjam, kasen duu hettininoo6e mo 6ee cellini haala makko. 4 Laamdo beydi e dow seedaaku ma66e oo kasen maandeeji e taagumansaaji e kaayde mawde, kaɓum e dokke Ruuhu Ceniido de o fecciri muuyde makko dee.

### *Haala dowudo en faade e kisindam*

5 E ley dum, wanaa malaa'ika'en 6ee Laamdo hokki laamaade aduna garoowo mo kaalaten haala mum oo. 6 Mo o hokki laamaade oo – won do Binndi dii ceettii, mbii:

«Kodum fuu yim6e ngoni sako ada wadana dum'en hakkille?  
Kodum bi66e aadama ngoni sako ada hayba dum'en?»

7 A lo'inii 6e wakkatiiwel seeda e ley malaa'ika'en,  
a filkii 6e pilki darja e teddungal,

8 a wadii huunde fuu e ley hawju ma66e.»\*

So wiyaama Laamdo wadii huunde fuu ley hawju ma66e, dum ana holla o lamminii dum'en huunde fuu, fay huunde heddaaki ko dwtanaaki 6e. Kaa so goonga, wanaa kulle dee fuu dwtanii 6e tafon. 9 Ko njii-den koo yo Iisaa leydinkiniido ley malaa'ika'en wakkatiiwel seeda, jooni omo filkaa darja e teddungal saabe ko o yii torra maayde koo. Hono non, saabe hinnee Laamdo, o maayanii yim6e fuu.

10 E ley dum, ana haani tagudo huunde fuu mo huunde fuu woodani, anniyiido naannude yim6e heew6e e darja mum oo, wadii Iisaa buuwudo laawol kisindam oo ki66udo, o hi6binirii dum torraaji. 11 Sabi Iisaa cennoowo goondin6e oo kaɓum e sennaabe 6ee yo iwdi ngootiri, o yaagortaako noddirde 6e sakiraa6e. 12 Omo wiya Laamdo:

«Mi haalanan sakiraa6e am 6ee innde maa ndee,

mi manete hakkunde kawrital ma66e.»†

13 O wii kasen:

«Mi fawan jikke am e Laamdo.»

Kasen duu o wii:

«Mido nii, miin e koreeji di Laamdo hokki kam dii.»‡

14 Hono non, nde wonnoo dii koreeji yo tew e yiyam, Iisaa duu reentii e majji ndiin mbaadi faa o jaaloo laamiido maayde oo, dum woni Ibiliisa. O jaaloroo dum maayde makko 15 faa o rimdina worrunoo6e hono maccu6e saabe kulol maayde 6ee – kulol ngol nanngunoo 6e e ley nguurdam ma66e fuu. 16 Sabi eden taylori wanaa malaa'ika'en o wari wallude. Ko o wari wallude dee, iwdi Ibarahiima. 17 Ndennoo ana wajibii o nannda e sakiraa6e makko 6ee e huunde fuu, yalla omo laatanoo 6e Jottinoowo Sadaka Mawdo jom yurmeende koolniido e golle Laamdo. Dum o wadi yalla o ittana 6e e jukkungo ngo 6e kaandi saabe luutti ma66e. 18 Nde wonnoo kanko e hoore

\* 2:8 Jabuura 8.5-7 † 2:12 Jabuura 22.23 ‡ 2:13 Esaaya 8.17-18

makko o torraama nde Ibiliisa tewti seytaade mo ndee, saabe dum, omo waawi faabaade wob6e tewtete6e faa ceYTEE 6ee duu.

### 3

#### *No Iisaa burdi annabi Muusaa teddude*

<sup>1</sup> Onon sakiraa6e seniibe jeydu6e noddaango Laamdo 6ee, nde wonnoo Iisaa Almasiihu faabike on, ngadee hakkillaaji mon e makko, kanko mo ceettorto-den bernde wootere yo nelaado, yo Jottinoowo Sadaka Mawdo. <sup>2</sup> Oon yo koolniido banngal Laamdo cubiido dum oo hono no Muusaa laatorii koolniido ley suudu Laamdo nduu fuu nii. <sup>3</sup> E ley dum, Laamdo jatorii teddeengal Iisaa buri ngal Muusaa ngal, no teddeengal mahoowo suudu burdi maadi mum nii. <sup>4</sup> Sabi suudu fuu ana woodi moyyindo dum, moyyindo huunde fuu oo yo Laamdo. <sup>5</sup> Muusaa laatike koolniido e suudu Laamdo nduu fuu, o maccudo Laamdo. Golle makko laatike seedaaku, omo sappoo ko Laamdo bannginta caggal makko. <sup>6</sup> Kaa Almasiihu yo koolniido e suudu Laamdo nduu no biddo nii. Enen ngoni suudu makko nduu, so tawii en tiidii e hoolaare e jikke ko mantorto-den koo.

#### *Haala naatude e ley fowtere Laamdo*

<sup>7</sup> Saabe dum, no Ruuhu Ceniido oo wiiri nii:  
«Hannde, so on nanii daande makko,  
<sup>8</sup> pati tiidinee ko'e mon hono no njaatiraa6e mon ngadunoo so murti nii,\*  
jannde 6e itti koro Laamdo ley ladde jeereende ndee.  
<sup>9</sup> Ton 6e itti koro am faa 6e kumpitoo kam,  
fay so taweede 6e njii golleeji am ko foti duubi capande nay.  
<sup>10</sup> Saabe dum tikkiran-mi yim6e oo jamaanu,  
mbii-mi: wakkati fuu, 6erde ma66e ana ndunya 6e faade e majjere,  
6e anndaa laawi am fey!  
<sup>11</sup> Faa kunii-mi ley tikkere am, mbii-mi:  
Be naatataa ley fowtere am abada.»†  
<sup>12</sup> Ndennoo sakiraa6e, kaybee pati fay gooto e mon tawree bernde bonnde nde wanaa goondinnde, murtannde Laamdo guurdo oo. <sup>13</sup> Nde Laamdo wiinoo «hannde» ndee, o sappike wakkati moodon, ndennoo mballondiron jannde fuu pati luuttal hoomta on, so yoorna berde mon. <sup>14</sup> So en tiidii e hoolaare nde kebu-den gila puddoode ndee, so en keddike e mayre faa timmoode, nden kaa en ndeentii e Almasiihu. <sup>15</sup> Nii Binndi dii mbii naanen:  
«Hannde, so on nanii daande makko,  
pati tiidinee ko'e mon hono no njaatiraa6e mon ngadunoo so murti nii.»  
<sup>16</sup> Ho6e ngoni murtu6e fay so taweede nanii daande Laamdo 6ee? Tama wanaa yim6e 6e Muusaa dowi iwde leydi Misira 6ee? <sup>17</sup> Ho6e ngoni 6e Laamdo tikkani ko foti duubi capande nay? Tama wanaa luuttu6e so kalkii e ley ladde jeereende 6ee? <sup>18</sup> Ho6e ngoni 6e o hunanii naatataa e fowtere makko 6ee? Tama wanaa murtir6e mo 6ee? <sup>19</sup> En njii 6e kebaali naatude e fowtere makko saabe 6e ngoondinaali.

### 4

<sup>1</sup> Nde wonnoo fodoore naatugol e ley fowtere Laamdo ndee ana heddi, kulen pati fay gooto e men waasa naatude. <sup>2</sup> Sabi enen duu en mbaajiraama

\* **3:8** Dum yim6e Israa'iila murtirnoo6e annabi Muusaa so mbii ana mbirfitoo leydi Misira. † **3:11** Jabuura 95.7-11



kabaaru lobbo no njaatiraa6e men mbaajiraano nii. Kaa kam6e, waaju mo 6e nani oo nafaali 6e sabi 6e kettinoraaki mo goondinal. <sup>3</sup> Kaa enen goondin6e 6ee, en naatan e fowtere Laamdo ndee. Kayre woni nde o wii banngal murtu6e 6ee:

«Ley tikkere am kunii-mi, mbii-mi:

‘Be naatataa ley fowtere am abada!»\*

Dum e taweede, golleeji Laamdo tilike gila nde o tagi aduna ndee. <sup>4</sup> Sabi nokku gooto e ley Binndi dii haalii haala jalaande jedda6erde ndee, wii:

«Laamdo fowtii e golleeji mum fuu e ley jalaande jedda6erde ndee.»†

<sup>5</sup> O wii kasen:

«Be naatataa ley fowtere am abada.»

<sup>6</sup> Adii6e nande kabaaru lobbo oo 6ee naataali e ley ndee fowtere saabe 6e calike goondinde. Kasen, edum holla ana woodi fodanaa6e naatude. <sup>7</sup> Ley majjum, Laamdo wadiri sarti goddo biyeteedo «hannde», dum woni mo cifiden dow too oo. Caggal duu6i keewdi, o yottiniri haala makko Daawuuda, o wii:

«Hannde, so on nanii daande makko,

pati tiidinee ko'e mon.»‡

<sup>8</sup> Be ke6aali fowtere Laamdo nde Yosuaa dowunoo 6e faade e mum ndee. So 6e ke6iino dum, Laamdo haalataano caggal dum haala sarti goddo.

<sup>9</sup> Jonnoo, yim6e Laamdo 6ee ana keddorii fowtere hono nde Laamdo fowti ley jalaande jedda6erde ndee. <sup>10</sup> Sabi naatudo e fowtere Laamdo, kajum duu fowtiran no Laamdo fowtiri e golleeji mum nii. <sup>11</sup> Ndennoo, waajibi tiinnito-den no mbaawru-den fuu naatude e fowtere Laamdo ndee pati fay gooto saamira no salanii6e Laamdo 6ee caamiri nii.

<sup>12</sup> Konngol Laamdo ngol ana wuuri ana jogii barke. Engol 6uri kaafaawi ki banngeeji mum didi fuu mbelnaa welde, engol sooroo hakkunde yonki e hakkille, hakkunde gi'e e mbuso, ngol seennda dum'en. Engol itta koro miilooji e anniyaaji gondi e 6ernde. <sup>13</sup> Walaa fuu ko tagaa ko suudanii Laamdo, huunde fuu ana 6annginaa yeeso makko kanko mo ngaraten daraade yeeso mum oo.

### *No Iisaa laatorii Jottinoowo Sadaka Mawdo*

<sup>14</sup> Ndennoo tiiden e goondinal men ngal ceedori-den 6ernde wootere ngal, sabi en ke6ii Jottinoowo Sadaka Mawdo jottiido nokku Laamdo, dum woni Iisaa Bii Laamdo oo. <sup>15</sup> Eden njogii Jottinoowo Sadaka Mawdo mo waasaali yurmaade en e loore men ndee. Sabi o tewtaama seytoorede no he6iraa fuu no ceytora-den nii, kaa noo he6aaka, nde wonnoo o luuttaali. <sup>16</sup> Ndennoo, 6adaro-den bimmbeere Jom moyyere oo hoolaare, yalla eden ke6a yurmeende e moyyere faa paabe-den nde kasindin-den fuu.

## 5

### *No Iisaa laatorii jottinoowo sadaka kib6udo*

<sup>1</sup> So neddo su6aama hakkunde yim6e honoroo6e mum faa laato Jottinoowo Sadaka Mawdo, halfinte golle Laamdo, yalla ana yottina sadakaaji namri e kirsamaaji faa tosa luutti. <sup>2</sup> Joomum ana waawi yurmaade 6e anndaa Sariya Laamdo so majji 6ee, sabi kajum e hoore mum yo lo'udo no ma66e nii. <sup>3</sup> Saabe nden loore omo haani yottinde sadakaaji kammari

\* 4:3 Jabuura 95.11 † 4:4 Pudfoode 2.2 ‡ 4:7 Jabuura 95.7-8

luutti makko kanko e hoore makko e kammari luutti yim6e 6ee fuu. <sup>4</sup> Fay gooto waawaa hokkude hoore mum darja Jottinoowo Sadaka Mawdo, sinaa so Laamdo sufii dum no su6orii Haaruuna nii.

<sup>5</sup> Almasiihu duu, wanaa kapum hokki hoore mum darja Jottinoowo Sadaka Mawdo, dokkudo mo oo yo Laamdo. Kapum wii mo:  
«Aan a Biyam,

hannde laatii-mi baam maa.»\*

<sup>6</sup> O wii e ley nokku goddo:

«A jottinoowo sadaka faa abada

no Malkisedeke† nii.»‡

<sup>7</sup> Nde Iisaa wonnoo e leydi ndii ndee, jaagoriima gullaali cattudi e gondi, jaagundeeji faade e Laamdo baawdo hisinde mo e maayde oo. Laamdo jabanii mo saabe ko o downtanii dum koo. <sup>8</sup> Fay so taweede kanko woni Biddo oo, tampereeri makko ekkintinii mo dowaare. <sup>9</sup> Caggal nde o hi6binnoo golle makko fuu, o laatanike downtani6e mo 6ee fuu sewnde kisindam faa abada, <sup>10</sup> sabi Laamdo wadii mo Jottinoowo Sadaka Mawdo no Malkisedeke nii.

### *Haala ko na6ata goondinal yeeso*

<sup>11</sup> Miden njogii haalaaji keewdi e oo kabaaru, kaa firritande on dum ana tiidi sabi on paamataa law. <sup>12</sup> Odon kaannoo laataade jannginoobe 6ooyii, kaa faa jooni odon kaani janngineede puddoode konngi Laamdo dii. Odon kaannoo taweede jaamdu tekkundu jaamatan, kaa faa jooni e muynam ngon-don. <sup>13</sup> Muynoowo fuu seenndataa ko boni e ko moyyi, sabi yo baddo. <sup>14</sup> Kaa hillifaa6e 6ee njejj jaamdu tekkundu nduu, biiru6e hakkillaaji mum'en so mboowni dum'en seenndude ko boni e ko moyyi 6ee.

## 6

<sup>1</sup> Ndennoo, njaaren yeeso faade e ko maw6e anndintee, pati keddo-don e ko fuddoobe anndintee e ley goondinal mum'en Almasiihu. Fotaa ko ngarten e haala tuubude iwde e gollleeji na6ooji in to maayde, e haala goondinde Laamdo. <sup>2</sup> Fotaa ko ngarten e haala lootogal batisima, e hono fawugol juude dow neddo faa duwanoo dum, e immital maay6e, kapum e jukkungo duumiingo. <sup>3</sup> Njaaren yeeso! Non ngadaten so Laamdo ja6ii. <sup>4</sup> Won fuu no murtu6e so iwi e laawol Laamdo 6ee tuubirta kasen naa? 'Be njii fooyre Laamdo, 6e ke6ii moyyere Laamdo, 6e ke6ii ngedu e Ruuhu Ceniido, <sup>5</sup> 6e meedii haala Laamdo moyyuka kaa e kaayde wakkati garoyoowo oo. <sup>6</sup> Dum fuu e taweede hadaali 6e saamde. 'Be mbaawaa tuubineede kasen, ana nanndi hono kam6e e ko'e ma66e e6e tontitoo 'Bii Laamdo oo e dow leggal bardugal, e6e kersina dum. <sup>7</sup> Tayko-don leydi: so ndi haarii yiiwoole tawtawtondirde, so ndi funnii nguure nafaowo remu6e 6ee, ndiin leydi he6ii barke iwru6e to Laamdo. <sup>8</sup> Kaa so ndi funnii kebbe e tuppe, ndi walaa nafaa, 6ooyataa ndi hudee, sakitoo ndi duppee.

<sup>9</sup> Kaa onon, sakiraa6e am horsu6e, fay so min kaaldii nii, miden tayori e laawol lobbol ngon-don, dum woni laawol kisindam ngol. <sup>10</sup> Sabi Laamdo wanaa oopiido sako yeeboo golle moodon naa jilli di kollu-don dum nde ngollan-don seniibe 6ee ndee e no ngadaton faa jooni nii. <sup>11</sup> Kaa miden muuya gooto e moodon fuu holla soobee mum faa do maayi, yalla odon tayora jikke mo ke6u-don oo tabitan. <sup>12</sup> Min njidaa laato-don waamu6e, ko min njidi dee, jemmbon he6oobe podooje Laamdo 6ee saabe goondinal e mujal.

\* 5:5 Jabuura 2.7 † 5:6 Yeew 7.1-10 ‡ 5:6 Jabuura 110.4

### *Haala podooje Laamdo cellude*

<sup>13</sup> Nde Laamdo fodanta Ibrahiima ndee, hoore mum hunorii, sabi fay gooto fotaa mo kanko e hoore makko teddeengal faa mo hunoroo dum. <sup>14</sup> O wii: «Mi hunike, mi wafan e maa barke, mi hebbinan iwdi maa faa heewa!»\* <sup>15</sup> Dow dum, Ibrahiima muji faa hefi ko Laamdo fodunoo hokkude dum koo. <sup>16</sup> Yim6e ana kunoroo burdo dum'en teddude, hunoore ndee ana tabintina haala mum'en, itta jeddi gondi hakkunde mum'en fuu. <sup>17</sup> Banngal heboo6e fodoore Laamdo ndee 6ee, Laamdo yidunoo keba tayoral anniya mum waylitataako fey, dum saabii so Laamdo 6eydi hunoore e dow fodoore mum ndee. <sup>18</sup> Dee kudd6e didi, dum woni hunoore ndee e fodoore ndee, mbyalitataako abada sabi Laamdo fenataa. Ndennoo, enen tuugi6e e Laamdo 6ee, edum 6uubina 6erde men, yalla eden keddoo e jikke mo ndokkad6en oo. <sup>19</sup> Oon jikke yo juggal cellungal koolniingal e yonkiiji men. Omo dowa en faa njawten heedoode faliinde e nokku burdo fuu senaade to dow kammu too. <sup>20</sup> Iisaa seekani en laawol naatirgol ton, sabi mo laatanike en Jottinoowo Sadaka Mawdo faa abada no Malkisedeke nii.

## 7

### *Kabaaru jottinoowo sadaka biyeteedo Malkisedeke*

<sup>1</sup> Malkisedeke oo laatinoke kaananke ngalluure wiyeteende Salaam, o jottinoowo sadaka Laamdo Toowdo oo. Kanko hawritoynoo e Ibrahiima wakkati wartannoo wolde tawi jaaliido kaanankoo6e, mo duwanii dum.\* <sup>2</sup> Ibrahiima hokki mo sappo6erde huunde fuu ko he6unoo e wolde ndee. Maanaa innde Malkisedeke woni: «kaananke poocitiido». Nde wonnoo o kaananke Salaam duu, maanaa mum yo «kaananke jom jam». <sup>3</sup> Binndi dii cifaaki baabiiko naa inniiko naa dammbe makko fey. Di cifaaki pinaade makko naa battane makko. Edi nanndina mo e Bii Laamdo oo: o heddoto o jottinoowo sadaka faa abada. <sup>4</sup> Yeewee no teddeengal Malkisedeke foti mawnude, sabi fay Ibrahiima njaati men oo hokkii mo sappo6erde ko he6unoo e wolde ndee fuu. <sup>5</sup> Kasen duu, yottinoo6e sadaka iw6e e Lewi† 6ee njamiraa e ley sariya nanngude sappo6erde e Israa'iilankoo6e fuu, fay so taweede 6een yo iw6e e Ibrahiima no ma66e nii. <sup>6</sup> Kaa fay so Malkisedeke jeyanooka e iwdi Lewi, nanngii sappo6erde jawdi Ibrahiima, duwanii dum, kajum ke6udo podooje Laamdo oo. <sup>7</sup> Jeddi fuu ngalaa, mo duwaawu iwri e mum ana 6uri duwanteedo oo teddude. <sup>8</sup> Banngal iw6e e Lewi, yim6e maayo6e 6ee ke6ata sappo6erde ndee, kaa Malkisedeke yo guurdo no Binndi dii ceedorii nii. <sup>9</sup> Kasen duu eden mbaawi wiide: ko Ibrahiima hokki sappo6erde ndee koo, Lewi mo iwdi mum nanngata sappo6erde oo, kajum duu hokkii nde. <sup>10</sup> Sabi fay so taweede o rimaaka tafon, e caldi njaatiiko Ibrahiima o wonnoo nde Malkisedeke jab6ii dum ndee.

<sup>11</sup> Sariya dokkaado Israa'iilankoo6e oo tuugike yottingol sadakaaji Lewinkoo6e ngol. Jonnoo, so tawiino nii ngol yottingol sadakaaji ana hi66unoo, garol jottinoowo sadaka goddo no Malkisedeke nii, mo wanaa iwdo e Haaruuna, hasindintaakeno. <sup>12</sup> Sabi so yottingol sadakaaji waylitiima, waajibi sariya duu waylitoto. <sup>13</sup> E ley dum, Joomiraado men mo haala mum haalet6e doo oo jeyaaka e iwdi Lewi, e suudu baaba wonndu jeyaa, ndu fay gooto e mum wadaali junngo mum e golle yottinirde sadakaaji

\* 6:14 Puddoode 22.16-17

\* 7:1 Yeew Puddoode 14.17-20

† 7:5 Lewi woni njaati Muusaa e

ndee. <sup>14</sup> Sabi en fuu en anndii, Joomiraado men oo e suudu baaba Yahuuda iwi, kaa Muusaa haalaali huunde fuu e mayru e banngal yottingol sadakaaji.

*No Iisaa laatorii jottinoowo sadaka no Malkisede ke nii*

<sup>15</sup> Ko jottinoowo sadaka goddo nanndudo e Malkisede ke 6anngi koo, 6eydii la66inde ko njidu-mi hollude on koo. <sup>16</sup> Wanaa saabe sariyaaji kawrooji e lejol makko ddi o su6oraa o jottinoowo sadaka, ko o su6oraa dee, saabe nguurndam njogiidam semme dam timmataa dam. <sup>17</sup> Sabi Binndi ddi mbii: «A jottinoowo sadaka faa abada

no Malkisede ke nii.»

<sup>18</sup> Hono nii sariyaaji aranndeeji ddi njoppiraa saabe loore mum'en e famdude mum'en nafaa. <sup>19</sup> Sabi e ley Sariya Muusaa oo fay gooto laataaki ki66udo. Jooni kaa en pawii jikke men e ko buri Sariya Muusaa oo moyyude koo, e oon jikke battorto-den Laamdo.

<sup>20</sup> Kasen duu, Laamdo wadii Iisaa jottinoowo sadaka e dow hunoore muudum. Lewinkoo6e 6ee nee, Laamdo hunanaaki dum'en. <sup>21</sup> Kaa Iisaa laatorike jottinoowo sadaka e dow hunoore Laamdo biido nii oo:

«Joomiraado hunike, mimsitataa:

A jottinoowo sadaka faa abada.»<sup>†</sup>

<sup>22</sup> Hono nii Iisaa laatorii tolma aadi burndi moyyude ndii.

<sup>23</sup> Ko jokkiti hen kasen, yottinoo6e sadaka 6ee ana keewnoo yalla so gooto maayii ana daja loomtiido dum. <sup>24</sup> Kaa Iisaa woni jottinoowo sadaka mo walaa loomtotoodo fey, sabi o duumoto faa abada. <sup>25</sup> Dum wadi so mo waawi hisinde battorii6e Laamdo saabe makko 6ee kisindam ki66udam. Omo heddo e surande 6e sabi o guurdo duumiido.

<sup>26</sup> Iisaa woni Jottinoowo Sadaka Mawdo porroowo e ko kasindin-den koo: o ceniido, o walaa jinjoore, ko sobi fuu walaa e makko. O seenndaama e luuttoo6e 6ee, kasen duu o hokkaama nokku burdo fuu teddude dow kammu. <sup>27</sup> Mo nanndaali e 6ee too yottinoo6e sadaka maw6e hasindin6e e ittude sadakaaji nannde fuu. Be ittana luutti ma66e sadaka kam6e e ko'e ma66e tafon, caggal majjum, 6e ittana luutti yim6e 6ee sadaka. Kaa Iisaa ittani luutti yim6e sadaka cilol gootol keyoowol yim6e jamaanuujii ddi fuu nde o hokkitiri hoore makko no layyaari nii ndee. <sup>28</sup> Sariya Muusaa oo ana darnana yim6e lo'u6e Jottinoowo Sadaka Mawdo, kaa hunoore nde Laamdo hunii caggal Sariya oo ndee darnii Biddo ki66inaado faa abada oo.

## 8

*No Iisaa laatorii curoowo ley aadi burndi moyyude ndii*

<sup>1</sup> Haala 6urka faydinde e ley ko kaalaten koo annii: en ke6ii Jottinoowo Sadaka Mawdo, oon woni joodiido jaamo bimbbeere Jom manngu wonnde dow kammu. <sup>2</sup> Omo golla golle makko e ley nokku dewal ceniido, dum woni hukkum goongaraajo mo Joomiraado darni, wanaa mo neddo darni. <sup>3</sup> Jottinoowo sadaka fuu ana su6oraa faa yottina Laamdo sadakaaji namri e kirsamaaji. Dum nee, waajibi Iisaa laatantoodo en Jottinoowo Sadaka Mawdo oo duu he6a huunde nde yottina. <sup>4</sup> Sinndo ga leydi gaa o wonnoo, o laatataako jottinoowo sadaka sabi yottinoo6e sadaka hawroo6e e Sariya Muusaa ana ngoodi. <sup>5</sup> Been yottinoo6e sadaka ana ngollana Laamdo ley nokku dewal cappotoodo goongaraajo gondo to dow kammu too oo, kanko o nanndinaado tan. Nde Muusaa anniyinoo darnude hukkum seedaaku

<sup>†</sup> 7:21 Jabuura 110.4

oo ndee, Laamdo jeertini mo, wii: «Tiinno-daa, ngadira huunde fuu dow nju66uki ki kollu-maa-mi dow haayre kii.»<sup>6</sup> Kaa jooni, Almasiihu hebii golle dewal burdo mo ma66e oo moyyude, sabi o curanoowo yim6e ley aadi burndi moyyude ndii. Ndiin aadi waldaa e aranndeeri ndii, o fawii ndi e podooje burde moyyude dee.<sup>7</sup> E ley dum, sinndo aadi aranndeeri ndii walaano ella, hasindintaako e aadi ngonndi.<sup>8</sup> Kaa Laamdo felii ndi nde wii:

«Miin Joomiraado mido wiya jalaade ana ngara  
de ngadidan-mi e Israa'iilankoo6e e Yahuudiyankoo6e aadi keyri.

<sup>9</sup> Ndi waldaa e aadi ndi ngadidinnoo-mi e njaatiraa6e ma66e  
nde dow-mi dum'en faa mi yaltina dum'en leydi Misira ndee.

Ko kam6e e ko'e ma66e 6e mbonni aadi am koo,  
miin duu mi duurtiima 6e.

Non mbii-mi, miin Joomiraado.»

<sup>10</sup> O wii kasen:

«Ndiin aadi woni ko ngadidan-mi e Israa'iilankoo6e caggal deen jalaade:

Mi wadan sariyaaji am e hakkillaaji ma66e,

mi winnda di e berde ma66e,

mi laato Laamdo ma66e,

6e laato yim6e am.

<sup>11</sup> Hankasen fay gooto hasindinaa e tinndinde jeydaa6e e leydi ngootiri,

wanaa haala sakiike mum faa waajoo dum, yo anndu Joomiraado,

sabi yim6e fuu anndan kam,

lo'u6e e teddu6e fuu.

<sup>12</sup> Sabi mi yaafoto oonaare ma66e,

mi ittan luutti ma66e e hakkille am fey.»<sup>†</sup>

<sup>13</sup> Ko mo haali kabaaru aadi keyri ndii koo, o hiidini aadi aranndeeri ndii.

Jooni kaa, ko naywi faa joo66ii koo yonii sawndintineede.

## 9

### *Haala sadakaaji ley aadi kiinndi ndii*

<sup>1</sup> Aadi aranndeeri ndii ana joginoo sariyaaji kawjordi dewal Laamdo,

kanum e nokku dewal ceniido gondo ga leydi gaa.<sup>2</sup> Oon nokku yo hukkum

mo cuudi didi: aranndeeru nduu suudu seniindu wiyete, don moottila

kaa e taabal ngal e buuru cakkaado oo ngonnoo.<sup>3</sup> Yeesooru nduu woni

caggal heedoode faliinde ndee, endu wiye nokku burdo fuu senaade.

<sup>4</sup> Ley mayru urirde kanjeere ndee e keesuwal aadi muumdiniraangal kanje

ngal ngonnoo. Ana e ley keesuwal ngal loongel kanje keewngel jaamdu

wiyeteendu «maan», kanum e sawru Haaruuna wilitinnoendu nduu e allu-

uje de aadi ndii winndaa e mum dee.<sup>5</sup> Ana to dow keesuwal too kudde didi

jemmbinaade hono malaa'ika'en biyeteede cerubin, de finnde teddeengal

Laamdo. Biifoole majje ana kuuri nokku do yiyam dam yuppetee faa luutti

njaafee doo. Kaa e mbaawaa sifaade deen kudde faa laa6a e oo wakkati.

<sup>6</sup> Dee kulle fuu e yu66ondirde hono nii, yottinoofe sadaka 6ee jannde fuu

ana naata ana njalta to suudu aranndeeru too faa ngolla golle mum'en dewal

Laamdo.<sup>7</sup> Kaa suudu yeesooru nduu, Jottinoowo Sadaka Mawdo oo tan

naatata e mayru hitaande fuu cilol gootol. Kasen duu o naatataa tawee o

na6oraali yiyam faa o ittana hoore makko sadaka, o ittana duu boofi di yim6e

6ee ngadi tawi anndanaali dii sadaka.<sup>8</sup> Dum Ruuhu Ceniido sappotoo faade

\* 8:5 Pergu 25.40 † 8:12 Yeremiya 31.31-34

e nokku burdo fuu senaare: damal naarrugal e makko banngintaake so nii hukkum ceniido oo ana heddii nawtoreede. <sup>9</sup> Dum yo taagumansa wakkati men jooni faa holla dum doo: sadakaaji namri e sadakaaji kirsamaaji jottinaadi Laamdo dii mbaawaa labbinde neddo dewiroowo nii Laamdo faa hakkille mum waalto. <sup>10</sup> Dewal gorrungal nii ana ha6baa e sariyaaji keertiidi namdu e yardu e lootogal, dewal baawngal yiyeede tan, sariyaaji kaandi jokkeede faa namnde Laamdo tabintini huunde heyre.

### *Haala sadaka ley aadi keyri ndii*

<sup>11</sup> Kaa jooni, Almasiihu banngii, laatike Jottinoowo Sadaka Mawdo gadudo moyyereji. O naatii e hukkum burdo teddude burdo hi6bude, mo junngo neddo darnaali, kasen duu hukkum oo jeyaaka e leydi ndii. <sup>12</sup> O naatii ley nokku burdo fuu senaade oo, o naaddaali e yiyam damkoy e ga'oy, ko o naaddi dee, yiyam makko jaati. Hono nii o soottitorii en faa abada cilol gootol keyoowol yim6e jamaanuujii dii fuu. <sup>13</sup> E ley Sariya Muusaa, so yiyam damdi e ga'i kajum e ndoondi nale duppaange wiccaama cobudo oo, labbinan joomum banngal diina. <sup>14</sup> Yiyam Almasiihu dam buri dum waawde labbinde hakkillaaji men iwde e golleeji nabooji en to maayde dii, yalla eden ndewa Laamdo guurdo oo. Sabi e baawde Ruuhu duumiido oo, Iisaa hokkii hoore mum Laamdo no layyaari ndi walaa ella nii.

<sup>15</sup> Dum waddani mo laataade curoowo hakkunde yim6e e Laamdo ley aadi keyri ndii, yalla noddaa6e 6ee ana ke6a ndonu keddotoodo faa abada mo Laamdo fodi oo. Sabi kanko maayiri faa mo soottitoo mboofube e ley aadi aranndeeri ndii 6ee. <sup>16</sup> So neddo maayiri, yoppii wasu. Wasu yo aadi hakkunde basiido e donoowo, ana tabita caggal maayde basiido oo. <sup>17</sup> Waajibi wasu tabita caggal maayde, sabi o tabitataa sinaa so joomum maayi. <sup>18</sup> E ley dum, fay aadi aranndeeri ndii tabitaali so wanaa yiyam yuppaa. <sup>19</sup> Caggal nde Muusaa holliti yim6e 6ee jamirooje gonde e Sariya dee fuu ndee, 6ami yiyam ga'oy e damkoy, jillondiri dam e ndiyam e haabu mbaalu wodeewo e ca6e hisopi, wicci dewtere Sariya ndee e yim6e 6ee fuu. O wii: <sup>20</sup> «Dum woni yiyam tabintinooram aadi ndi Laamdo yamiri on dowto-don ndii.»\* <sup>21</sup> Hono non kasen, o wicciri yiyam e dow hukkum ceniido oo, kajum e kaaki dewirdi Laamdo dii fuu. <sup>22</sup> So goonga, banngal Sariya oo ana wa'i hono yiyam labbinta huunde fuu! Kasen duu, so sadaka yiyam wadaaka, yaafaamuya walaa.

### *No Iisaa Almasiihu laatorii kirsamaari kibbundi*

<sup>23</sup> Dee kudde ngonni nate kollitooje kudde gonde dow kammu dee, ede kasindini e labbinireede yiyam daabaaji. Kaa kudde kammunkooje dee, kajum'en jaati, ana kasindini e sadakaaji burdi dii too moyyude. <sup>24</sup> Sabi Almasiihu naataali e nokku dewal ceniido mo junngo jibi. Oon yo nanndoore goongaraajo gondo dow kammu oo. Ko Almasiihu wadi dee, to kammu too jaati o naati faa o heya en jooni yeeso Laamdo. <sup>25</sup> O naatiraali ton faa o itta hoore makko sadaka cili keewdi, no Jottinoowo Sadaka Mawdo naatirta hitaande faa hitaande e ley nokku burdo fuu senaade oo nabora yiyam daaba nii. <sup>26</sup> So tawiino nii, Almasiihu torreteno cili keewdi gila e puddoode aduna faa jooni, kaa dum laatoraaki non. O banngii cilol gootol keyoowol yim6e jamaanuujii dii fuu, yalla omo hokkitira hoore makko hono no layyaari nii faa o tosa luutti yim6e. <sup>27</sup> Battane 6ii-aadama yo maayde cilol gootol, caggal dum, saree. <sup>28</sup> Hono non, Almasiihu duu hokkitiri hoore mum hono no

\* 9:20 Pergu 24.8

layyaari nii cilol gootol faa roondoo luutti yim6e heew6e. O 6anngan cilol dīdā6ol, kaa wanaa faa o roondoo luutti, faa o waddana yim6e doomoo6e garol makko 6ee kisindam.

## 10

<sup>1</sup> Sariya Muusaa oo yo mbeelu moyyereejii garoojii dīi, wanaa mbaadi majji jaati. Dum saabii fay e ley sadakaajii jottinteedi hitaande faa hitaande dīi, o waawaa wadude rewoo6e 6ee hi66u6e. <sup>2</sup> So omo waawnoo dum, yottingol sadakaajii yoppeteno, sabi rewoo6e 6ee fuu la66inteno cilol gootol timmungol, hakkillaajii ma66e nijataa 6e banngal luutti hankansen. <sup>3</sup> Kaa wanaa non laatorii. Hitaande faa hitaande dīin sadakaajii miccintinan yim6e luutti mum'en. <sup>4</sup> Sabi yīiyam ga'i e damdi dam waawaa ittude luutti fey.

<sup>5</sup> Dum saabii, nde Almasiihu 6adinoo warde e aduna ndee, wii Laamdo: «A yīdāa sadakaajii kirsamaajii e sadakaajii jamri, kaa a wadānii kam terde.

<sup>6</sup> Sadakaajii duppamaajii e sadakaajii banngal luutti, a seyortaako dum.»

<sup>7</sup> E ley dum, Almasiihu wii:

«Midō nii, mi warii faa mi wada sago maa, aan Laamdo,

no kabaaru am winndiraa e ley dewtere maa Sariya nii.»\*

<sup>8</sup> Arannde, o wii: «A yīdāa sadakaajii kirsamaajii, a yīdāa sadakaajii jamri kaṅum e sadakaajii duppamaajii e sadakaajii banngal luutti, a seyortaako dī.» Dum fuu e taweede, dīin sadakaajii no Sariya oo yamiri nii ngadīraa. <sup>9</sup> Caggal dum, o wii: «Midō nii, mi warii faa mi wada sago maa.» Hono nii Laamdo ittiri nju66uki sadaka arano oo tabintini dīdā6o oo. <sup>10</sup> Saabe ngoon sago cenniraden e sadaka terde līsaa Almasiihu cilol gootol keyoowol yim6e jamaanuujii dīi fuu.

<sup>11</sup> E ley nju66uki sadaka arano oo, jottinoowo sadaka fuu yo daraniido golle mum pannde fuu, ana yottina sadakaajii dīi wakkati fuu, kaa dī mbaawaa ittude luutti fey. <sup>12</sup> Kaa Almasiihu yottinii sadaka gooto ittoowo luutti keyoowo yim6e jamaanuujii dīi fuu, caggal dum, o joodii jaamo Laamdo. <sup>13</sup> Don mo doomata faa Laamdo wada mo ya66a way6e makko. <sup>14</sup> E sadaka gooto oo, faa abada o hi66inirii 6een 6e luutti mum'en la66intee 6ee. <sup>15</sup> Dum woni ko Ruuhu Ceniido oo duu seedantoo en. Sabi o wii tafon:

<sup>16</sup> «Joomiraado wii:

Ndii aadi ngadīdan-mi e ma66e  
caggal dee palaade:

Mi wadan sariyaajii am e berde ma66e,  
mi winnda dī e hakkillaajii ma66e.»

<sup>17</sup> O jokkintini hen kasen, o wii:

«Mi ittan e hakkille am luutti ma66e e boofi ma66e fey.»†

<sup>18</sup> Ndennoo do luutti njaafaa, sadaka ittoowo luutti hasindintaake don hansen.

### *No kaan-den 6adoraade Laamdo*

<sup>19</sup> Ndennoo sakiraabe, yīiyam līsaa njuppaadam dam hokki en laawol naatude e nokku burdo fuu senaade oo dow hoolaare. <sup>20</sup> O udditanii en laawol kesol guurngol jawtirngol heedoode ndee, kannngal woni terde makko dee. <sup>21</sup> Nde wonnoo jottinoowo sadaka mawdo ardinaado suudu Laamdo

\* 10:7 Jabuura 40.7-9 † 10:17 Yeremiya 31.33-34



nduu njogi-dɛn, <sup>22</sup> ndennoo, ɓadoro-dɛn Laamɗo ɓerɗe ɗe ngalaa naafigaaku jogiɗe goondinal ngal sikke fuu walaa e mum. Sabi luutti ɗi ɓerɗe men caawunoo ɗii fuu ittaama, calɗi men duu lootiraama ndiyam laaɓudam. <sup>23</sup> Beyden jikke men dow ko ceedori-dɛn ɓernde wootere koo, sabi podando en oo yo koolniido. <sup>24</sup> Ngattondiren hakkille faa tiidondiren e ley jilli e golleeji lobbi. <sup>25</sup> Pati njoppen hawritidde no yogaaɓe ngadata nii, beydo-dɛn waajondirde nde wonnoo oɗon njiya jalaande Joomiraado oo ana wara warde.

<sup>26</sup> So en murike en keddike e luutti caggal ko annu-dɛn goonga oo faa laaɓi koo, annden sadaka ittoowo luutti heddaaki hankasen. <sup>27</sup> Ko heddi ɗee, doomugol kulbiniingol jannɗe kiiti, kaɗum e yiite jaaamoowe yedduɓe Laamɗo ɓee ngee. <sup>28</sup> So neddo bonnii Sariya Muusaa oo e dow seedaaku yimɓe ɗiɗon naa taton, yurmataake, warete! <sup>29</sup> Kaa walaa fuu ɓurɗo haandude e jukkungo ko foti so neddo yaaɓii Bii Laamɗo, sobinii yiyyam aadi cennudam ɗum ɗam, hoynii Ruuhu gaddoowo moyyere oo. <sup>30</sup> Sabi eden anndi Laamɗo wii:

«Miin yoɓtoytoo mi yoɓoyan ɓe.»

O wii kasen:

«Joomiraado saran yimɓe mum.» †

<sup>31</sup> Hee, naatude e junngo Laamɗo guurɗo oo ana hulbinii!

<sup>32</sup> Miccitee jalaade mon arane ɗee, caggal nde hakkillaaji mon njaaynaa, hee on tiinnitike ley torraaji e mujal. <sup>33</sup> Wakkatiiji oɗon koyniree jennooje e toonange hakkunde yimɓe, wakkatiiji oɗon ndeenta e woɓɓe wadaaɓe non.

<sup>34</sup> On cunodike e uddaaɓe kasu, kasen duu nde teeta-dɗon ko njogi-dɗon koo fuu ndee, on njogorike ɗum seyo, sabi oɗon anndi onon njogii jawɗi ɓurndi fuu, ndi timmataa. <sup>35</sup> Ndennoo, pati njoppee hoolaare mon sabi ende jogii mbarjaari mawndi. <sup>36</sup> E ley ɗum, oɗon kaani mujude, yalla oɗon ngada sago Laamɗo, keɓon mo o fodani on oo, <sup>37</sup> sabi ana winndii:

«Doo e yeeso seeda,  
kaando warde oo waran, o taadataa.»

Laamɗo wii:

<sup>38</sup> «Pooccitaniido kam wuurdan goondinal, §

kaa so wirfitiima,

ɓernde am yarrataako ɗum.»

<sup>39</sup> Enen noo, en njeyaaka e wirfitotooɓe faa kalkoyoo ɓee, ɓe njeye-dɛn e mum ɗee, goondinɓe faa yonkiiji mum'en kisinee ɓee.

## 11

### *Haala goondinal*

<sup>1</sup> Goondinal yo taylorde heɓan ko fawi jikke e mum e hoolaade ko yiyaali ana woodi. <sup>2</sup> Saabe maggal, njaatiraabe men keɓiri seedaaku lobbo yeeso Laamɗo.

<sup>3</sup> Saabe goondinal, paamir-dɛn aduna oo e koode ɗee fuu konngol Laamɗo tagiraa, ko yiyetee koo tagiraa ko yiyataake koo.

<sup>4</sup> Saabe goondinal, Haabiila ittiranii Laamɗo sadaka ɓurɗo mo Kaabiila oo, goondinal saabii so Laamɗo jatorii mo o poocitiido nde jaɓani mo sadakaaji makko. Kasen, fay so taweede o maayii, goondinal makko ana heddi waajaade en faa jooni.



<sup>5</sup> Saabe goondinal, Henok ḡabbindiraa dow kammu fay meedaali maayde. Fay gooto yiitaali mo kasen sabi Laamdo ḡabbini mo. Kaa fade makko ḡabbineede o seedanaama omo wela Laamdo. <sup>6</sup> So goondinal walaa, fay gooto waawaa welde Laamdo. Sabi neddo jiddo badaade Laamdo waajibi goondina omo woodi, goondinan o barjoto tewtooe mo bee.

<sup>7</sup> Saabe goondinal, Nuuhu sehiri laana faa dannda koreeji mum dii. O dwtanii Laamdo jeertindo mo ko warata, ko yiyaaka tafon koo. Ko o goondini Laamdo koo, o sariri aduna oo fuu. E ley dum, Laamdo jatorii mo o poocitiido.

<sup>8</sup> Saabe goondinal, Ibarahiima nootorii noddaango Laamdo, yalti faade e leydi ndi Laamdo fodi mo heban ndii, o yalti tawi kanko nee o anndaa to o yahata. <sup>9</sup> Saabe goondinal, o joodorinoo no kodo nii e leydi o fodanaa ndii. Isiyaaka e Yaakuuba duu njoododike e makko e ley hukkummaaji, kambe duu ngoni hebidoobe e makko fodoore wootere ndee. <sup>10</sup> Sabi omo foodanoo ngalluure jiiḡunde duumiinde nde Laamdo diidi so mahi ndee.

<sup>11</sup> Saabe goondinal, Ibarahiima hokkiraa hebude sii, fay so taweede o naywiino, genndiiko Saaratu duu yo dimaro wnonoo. Sabi Ibarahiima ana jogorii podando dum oo yo koolniido. <sup>12</sup> Dum wadi so gooto naywudo faa badii maayde hebi sii potudo kooe kammu heewde mo waawaa limeede no njaareendi maayo waawiraaka limeede nii.

<sup>13</sup> Been yimbe fuu maaydii e goondinal mum'en tawi podooje Laamdo dee tabitaali, kaa be coyniima dum be kuyanii dum duu, be njarriima duu be hoḡbe, be warwarbe e aduna oo. <sup>14</sup> Yarroriiḡe hono nii bee kollii faa laaḡi paca ana tewtana ko'e mum'en leydi ndi njei. <sup>15</sup> Kasen duu so nii hakkillaaji maḡbe ana ngonnoo e leydi ndi be njaltunoo e mum ndii, ebe mbaawnoo wirfitaade ton. <sup>16</sup> Kaa so goonga, ebe poodanoo leydi burndi moyyude, dum woni ngonndi dow kammu ndii. Saabe dum, Laamdo yaagortaako noddireede Laamdo maḡbe, o moyyinanii be ngalluure.

<sup>17</sup> Saabe goondinal, Ibarahiima jaḡiri ittude Isiyaaka sadaka no layyaari nii nde Laamdo itti koro makko ndee. Fay so taweede Laamdo fodanii mo lejol makko heewan, o lanndinike ittude biyiiko korsudo oo sadaka, <sup>18</sup> mo Laamdo wii e mum oo: «Iwdi Isiyaaka ndii, kayri innditortoo innde maa.»\* <sup>19</sup> Ibarahiima ana jogorii Laamdo ana waawi fay immintinde biyiiko Isiyaaka e maayde. Saabe nden hoolaare, o wartiranaa biyiiko ana wa'i hono immitiido e maayde nii.

<sup>20</sup> Saabe goondinal, Isiyaaka duwanorii Yaakuuba e Iisuwa dow moyyereeji garoyooji dii.

<sup>21</sup> Saabe goondinal, Yaakuuba duwanorii gooto fuu e biḡbe Yuusufu didon bee, nde o badinoo maayde ndee. O tuugii sawru makko, o turii omo teddina Laamdo.

<sup>22</sup> Saabe goondinal, Yuusufu sapporii pergu biḡbe Israa'ila iwde leydi Misira nde badinoo maayde ndee. E ley majjum, o wasii be be naḡora ḡ'e makko.

<sup>23</sup> Saabe goondinal, saaraaḡe Muusaa cuufiri dum lebbi tati caggal rimeede mum, sabi be njii o cukalel moy-ḡarel, kasen, be cuusii woortude yamiroore kaananke oo ndee.

<sup>24</sup> Saabe goondinal, nde Muusaa mawni ndee, salorii wiyeeede taanii Fira'awna. <sup>25</sup> O suḡike reentude e yimbe Laamdo bee e ley torraaji diina weltoraade wakkatiwel seeda ley luuttal. <sup>26</sup> Omo jatorii hoynireede no

\* 11:18 Puḡḡooḡe 21.12

Almasiihu hoynirtee nii 6uri moyyude diina jawle Misira dee, sabi omo fawli jikke makko e mbarjaari waroyoori ndii.

<sup>27</sup> Saabe goondinal, o yaltiri leydi Misira tawi o hulaali tikkere kaananke oo, o fellisi yaade hono omo yiya Laamdo mo yiyataake oo nii. <sup>28</sup> Saabe goondinal, o adorii fuddude iidi Paska, o yamiri yiyam wujee e dame galleeji pati malaa'ika baroowo oo mema hammadiibe Israa'ilankoo6e 6ee.

<sup>29</sup> Saabe goondinal, Israa'ilankoo6e tacciri Maayo Maaliya ngoo dow leydi njoorndi. Kaa Misirankoo6e ndaarunoo6e taccirde non 6ee fuu njoorii.

<sup>30</sup> Saabe goondinal, tataaji piliidi Yeriko dii caamiri ko Israa'ilankoo6e ngadi balde jeddi ana piltoo di koo.

<sup>31</sup> Saabe goondinal, Rahab debbo pijoowo oo waasiri halkodaade e heefer6e 6ee, sabi o jab6iima Israa'ilankoo6e soorotoo6e e leydi ndii faa kora ndi 6ee, o jippinirii dum'en dow teddeengal.

<sup>32</sup> Kodum mbiyan-mi kasen? Wakkati oo heyataa kam faa mi haala kabaaru Gedeyon e Barak e Samson e Yefte e Daawuuda e annabi Samuyila, kajum e annabaa6e wo66e 6ee. <sup>33</sup> Been yim6e fuu, goondinal waddani dum'en jaalaade kaanankoo6e e laamoraade foocitaare e hebude podooje Laamdo. Kanningal waddani 6e mu66ude kundude dawaadi ladde <sup>34</sup> e jifude giteeli gujitooji e dadude e kaafaawi mbelki. Fay so taweede 6e lo'unoo6e, 6e ke6ii semmbe, 6e worwor6e e golowole, 6e cayfitii konuuji gardi e ma66e dii.

<sup>35</sup> Saabe goondinal, yoga e rew6e ke6iri maay6e mum'en nguurtinaa.

Saabe goondinal, yim6e wo66e torraama faa maayi, calii heefidirde sako cootitee, yalla ana ke6a wuurtugol 6urngol moyyude ngol. <sup>36</sup> Wo66e kasen njaayraa, piyaa dorri, e ko 6uri dum ngeyyaa na6aa ley kasu. <sup>37</sup> Yoga ma66e mbedaa kaaye faa maayi, yoga tayiraa ngarjaawi, yoga wardaa kaafaawi. E6e njiiloo e6e 6oornii guri be'i e baali, 6e misikiina'en, 6e torraa6e, 6e jukka6e jukkungo naawngo. <sup>38</sup> Been yim6e, yiilotoo6e e ley laddeji, njaboo6e kaaye, soorotoo6e e luurooji kaaye, naatoo6e e gayde, 6e kaandaano e oo aduna.

<sup>39</sup> Be fuu 6e ke6ii seedaaku lobbo yeeso Laamdo saabe goondinal ma66e. Dum fuu e taweede, 6e ke6aali ko Laamdo fodi koo, <sup>40</sup> sabi o fodanii en ko moyyi ko 6uri ko ma66e koo. O muuyi 6e laatataako hi66u6e so wanaa 6e tawdee e men.

## 12

### *No ne'ugol Joomiraado hollirta jilli mum*

<sup>1</sup> Ndennoo enen, so nii seede'en banngal goondinal potu6e nii heewde ana pili en, ceerten e donngal fuu e luuttal lo'ortoongal en no yaafiri ngal, njaaren yeeso dow mujal no dadondirteedo nii, <sup>2</sup> tawee hakkillaaji men ana e lisaa ardiido wadude goondinal e berde men oo, o tabantinoowo ngal duu. Kanko subii mujude leggal bardugal ngal dow seyo wonngo yeeso makko ngoo, o yawi hersa maggal. Jooni, o joodoyii naamo Laamdo dow bimmbeere mum ndee.

<sup>3</sup> E ley dum, ngattanee hakkille oon mujudo konnaagu luuttoo6e 6ee, yalla odon mbaasa tampude, mbaason tayude jikke e goondinal mon. <sup>4</sup> Odon caloo luuttal odon ka6a e mum, kaa on kabaaki faa yiyam dogi tafon. <sup>5</sup> Kasen duu on njeggitii oo doo waaju mo Laamdo haaldiri e moodon no 6i66e mum nii oo:

«Biyam, pati yaw ne'ugol Joomiraado ngol,  
kasen duu, pati tayu jikke so mo nijii ma.

6 Sabi Joomiraado ne'an mo horsini fuu,

kasen duu fiyan mo nanngiri biyum fuu.»\*

7 Muɲee ne'ugol ngol, anndon Laamdo nanngiri on 6i66e mum. Homo woni biddo mo baam mum ne'ataa dum? 8 So on ngalaa e ne'ugol ngol 6i66e 6ee fuu ne'etee ngol, on nganaa 6i66e laabu6e, on nganaa 6i66e halal. 9 Baabiraa6e men aduna 6ee ana ne'annoo en, en teddini 6e. Ko hadata en dɔwtanaade Baabiraado men dow kammu oo faa 6ura no ma66e nii yalla eden nguura? 10 Baabiraa6e men ana ne'irannoo en no miilorii ana woodi e wakkatiwel seeda. Kaa Laamdo kammari faa nafa en ne'irta en, yalla eden ndeenta e mum ley senaare mum. 11 Ne'ugol fuu e ley oo wakkati yoomre waddata, seynataa. Kaa caggal dum, engol waddana jabu6e ne'eede 6ee fooccitaare e jam.

12 Ndennoo 6amtee juude mon ɲoodude dee, cemmbintinee e koppi mon di ngalaa semmbe dii. 13 Njokkee laawi poocitiidi, pati koyngal layoowal seeltu, ko haani dee, ngal sella.

### *No njeertinirta-den pati en mbaasu moyyere Laamdo*

14 Tiinnee ndaaree wondirde e yim6e fuu dow jam, tewton senaare, sabi so on ngalaa nde on njiyataa Joomiraado. 15 Njeertee pati fay gooto waasa moyyere Laamdo ndee, pati fay gooto e mon laatoo hono no haako haaduko willirta nii, so raabira yim6e heew6e haadugol mum. 16 Njeertee pati fay gooto e mon laatoo jaahili naa adunanke no liisuwa nii, coottudo hammadiyaaku mum faa he6a ko ɲaama wakkatiwel gootel tan. 17 Odon anndi caggal dum, nde o yidi he6ude duwaawu baam makko ndee, o tippitaama. O 6ami nii faa o woyi kaa o hebaali dabare fuu no o waylitira ko wadaa koo.

18 Onon, on ngardaali to Laamdo hono no yim6e Israa'iila ngardunoo to haayre Siinaayi nii. Kam6e 6e ngarii to huunde waawnde memeede nde yiite hu66ata e mum. Be ngari e ley nimre ni66unde tika e henndu mawndu. 19 Be nanii fuufaango buututal ngoo, kaɲum e daande toownde iwnde dow kammu ndee. Nanunoo6e nden daande 6ee fuu ɲaagike Laamdo pati 6eydaneen hen fay konngol gootol no poti hulde. 20 Sabi 6e ndonkii waawtude ndee doo yamiroore: «Ko memi nden waamnde haayre fuu, fay so daaba, wardete kaaye.» 21 Goonga, ko yim6e 6ee njii koo ana hul6inii faa Muusaa e hoore mum wii: «Mi hulii sanne faa mido siɲɲa.»

22 Kaa onon, on ngarii e haayre Siyona ndee, kaɲum e ngalluure Laamdo guurdo oo, dum woni Urusaliima dow kammu oo, to malaa'ika'en ujunaaji ujunaaji kawriti so ana mbeltoo. 23 On ngarii e kawrital hammadi6e 6e inde mum'en mbinndaa dow kammu 6ee, on ngarii e Laamdo caroowo yim6e fuu oo, on ngarii e yonkiiji foocciiti6e laati6e hi66u6e 6ee. 24 On ngarii e liisaa curoowo hakkunde yim6e e Laamdo ley aadi keyri ndii oo. On ngarii e yiyam makko la66inoojam, ngaddudam kabaaru burdo kabaaru yiyam Haabiila juppiidam oo moyyude.

25 Ndennoo tiinneen pati calo-don Laamdo kaaldoowo e moodon oo, sabi salinoo6e jeertingol makko dow leydi gaa 6ee ndadaali, wanaa haala enen so en calanike jeertingol iwrungol dow kammu. 26 Arannde, daande makko dimmbii leydi ndii. Jooni kaa, o fodii dum doo, o wii: «Mi dimmban ndi cilol gonngol kasen, wanaa leydi tan, kammu e leydi fuu.»† 27 Ko o wii «cilol gonngol kasen» koo ana holla ko moyyinaa fuu dimmboto faa saama, yalla ko dimmbataako koo ana heddo kaɲum tan. 28 Saabe dum, nde wonnoo laamu

\* 12:6 Tinndi 3.11-12 † 12:26 Haggay 2.6

mo dimmbataako ke6aten, njetten hen Laam6o, ndewren mo no weldata mo tawee e leydinkinaare e kulol, <sup>29</sup> sabi Laam6o meeden oo ana wa'i no yiite halkoowe nii.

## 13

### *Haala waajuuji cakitiidi*

<sup>1</sup> Keddo-don e yidondirde, sabi on sakiraa6e. <sup>2</sup> Pati njeebee jippinde ho66e, sabi wo66e njippinii malaa'ika'en tawi anndaa ko 6e ngoni. <sup>3</sup> Miccitee uddaa6e 6ee hono no onon e ko'e mon odon uddidaa e ma66e nii. Miccitee torraa6e torra cattudo hono no onon e ko'e mon odon torridaa e ma66e nii. <sup>4</sup> Yo yim6e fuu teddin dewgal, pati jeenoyee so ngarton e leld e mon. Sabi Laam6o saran fijo6e won6e e dewgal e 6e ngalaa e dewgal fuu. <sup>5</sup> Joote jawdi haanaa taweede e mon. Kejjitoree ko njogi-don, sabi Laam6o jaati wii:

«Mi teelnataa ma, mi yoppataa ma abada!»\*

<sup>6</sup> Saabe majjum, eden mbaawi haalde dum doo dow hoolaare:

«Joomiraado woni paabotoodo kam,  
mi hulataa.

Kodum fuu neddo waawi wafude kam?»†

<sup>7</sup> Miccitee ardiibe dowde on so kaalani on konngol Laam6o 6ee. Ngattee hakkillaaji mon e battane nguurndam ma66e dam, jemmbon goondinal ma66e ngal.

<sup>8</sup> Iisaa Almasiihu waylitataako: no worrunoo keejen nii, worri hannde, non worrata faa abada duu. <sup>9</sup> Pati nja6ee waajuuji goddi di on mboowaa nande nafa hakkillaaji mon. Ko buri moyyude, berde mon kefa semmbe e ley moyyere, ko wanaa jokkude sariyaaji keertiidi jaamdu. Jokku6e diin sariyaaji 6ee fay huunde ke6aali hen.

<sup>10</sup> Yottino6e sadaka gollu6e ley hukkum ceniido 6ee ndannanaaka jaamde sadaka pawiiido e ittirde sadaka men ndee. <sup>11</sup> Sabi e ley nju66uki Sariya Muusaa, Jottinoowo Sadaka Mawdo waddata yiyam kirsamaaji ley nokku burdo fuu senaade oo itta dam sadaka kammari luutti, kaa tewuuji majji dii, to caggal daaka too sumetee. <sup>12</sup> Dum wadi so Iisaa duu maayoyi caggal ngeenndi faa sennira yim6e yiyam mum. <sup>13</sup> Ndennoo, njalten tawoyen mo to caggal ngeenndi too, ndoondo-don hersa ka yim6e ndonndini mo kaa! <sup>14</sup> Sabi ga aduna gaa en ngalaa ngeenndi nduumotoondi, kaa eden tewta ngeenndi ngaroyoori ndii.

<sup>15</sup> Iisaa ana yottinana en sadaka men jettirde Laam6o. Njettiren kundude men innde makko wakkati fuu. <sup>16</sup> Kaa pati njeebe wafude ko moyyi, ndeenton e huunde fuu, sabi diin sadakaaji ana mbela Laam6o.

<sup>17</sup> Downtano-don dowo6e on, leydinkinano-don 6e, sabi e6e kaybi yonkiiji mon dii, nde wonnoo 6e kaaltoyan dum yeeso Laam6o. Accee 6e ngollira golle oo e seyo tawee wanaa e metti, sabi so 6e ngadirii dum metti nafataa on.

<sup>18</sup> Miden jaagoo on duwaawu, sabi miden anndi hakkillaaji amen jinjaali min, nde wonnoo sago amen woni yaarude no woodi e huunde fuu. <sup>19</sup> Mido jaagoo on sanne nduwano-don kam, yalla Laam6o ana hokka kam laawol mi warta e moodon law.

### *Baynondiral*

<sup>20-21</sup> Laam6o gaddoowo jam guurtindo Joomiraado meeden Iisaa, yo wadu on hi66u6e e huunde fuu ko moyyi ko kaaje-don, yalla odon ngada sago

\* 13:5 Fillitagol Tawreeta 31.6 † 13:6 Jabuura 118.6

mum. Yo o wadu e meeden muuyde makko saabe Iisaa Almasiihu. Iisaa woni duroowo baali lobbo oo, tabintiniroowo aadi nduumiindi ndii yiyam mum. Yo teddeengal woodan mo faa abada abadin. Aamiina.

<sup>22</sup> Sakiraa6e, mido jaagoo on kettiniree dii waajuuji mujal, sabi ko kaal-mi koo yo seeda.

<sup>23</sup> Mido anndina on sakiike meeden Timote yoppitaama. So o yaawii yottaade gaa, min ngardan to mon.

<sup>24</sup> Miden njowta hooree6e mon 6ee e senii6e 6ee fuu. Iw6e Italiya 6ee duu ana njowta on.

<sup>25</sup> Yo hinnee Laamdo wonu e moodon, on fuu!

## Bataaki Yaakuuba

### *Jowtaango*

<sup>1</sup> Oo bataan ga am iwri, miin Yaakuuba maccudo Laamdo, maccudo Joomiraado men Iisaa Almasiihu, faade e cuudi baaba sappo e didi caakiidi e nokkuuje dee fuu dii. Onon e jam!

### *Haala goondinal e hakkilantaaku*

<sup>2</sup> Sakiraa6e am horsu6e, nde torraaji di ngaladaa sii ngarii ittude koro mon, njogoree dum fuu seyo, <sup>3</sup> sabi odon anndi itteede koro goondinal mon rimata mujal. <sup>4</sup> Kaa noo, kinaa mujal mon satta, yalla odon laatoos hi66u6e, huunde fuu jakataa on.

<sup>5</sup> Ndennoo, so gooto mon ana jakoraa hakkille, yo jaago Laamdo dokkoowo fuu oo, hokkan mo. Sabi Laamdo yo dokko mo mimsataa, mo hiitataako. <sup>6</sup> Kaa joomum jaagoroo e goondinal tawee sikkitaaki, sabi cikkitotoodo ana nanndi e bempeeje de henndu saawii e mum, so ana sogga dum yaade. <sup>7</sup> Neddo baado nii pati miila he6ude e Joomiraado fay huunde. <sup>8</sup> Neddo gadudo berde didi, anndaa ko yidi: hannde too, jannoo gaa.

### *Haala talkaaku e ngalunkaaku*

<sup>9</sup> Sakiraado goondindo so tawi yo talka, yo seyo sabi yeeso Laamdo o tedduo. <sup>10</sup> Kaa so tawii yo galo, ana wajibii e mum seyoo sabi Laamdo leydinii dum. Hono no piindi booyataa ley ngesa nii, arsukuntaaku duu non wa'i. <sup>11</sup> So naange wulii, yooraa funngooji dii, piindi ndii saama, jari mum fuu yalta. Hono non jaati arsukunte oo saamirra, kabaaruuji mum fuu mbona.

### *Haala torraaji e jarribaaji*

<sup>12</sup> Neddo fuu tiinnitiido ley torraaji ittooji koro mum welii hoore. Sabi nde tiinnitaare makko ndee tabiti fuu, mo he6an teddeengal gondugal e nguurndam nduumiidam, dam Laamdo fodani yi66e muudum dam. <sup>13</sup> So neddo jarribaama, pati wiya: «Laamdo jarribini kam.» Sabi fay gooto waawaa jarribinde Laamdo bone, kasen duu Laamdo jarribintaa fay gooto. <sup>14</sup> Kaa jarribaaji ana nannga neddo so tuuyooji mum poodii dum, nabii dum. <sup>15</sup> Caggal dum, so tuuyooji bondi cowiima, ndiman luuttal. Nde luuttal benndi fuu, kajarum rimata maayde.

<sup>16</sup> Sakiraa6e am horsu6e, pati on njaayre. <sup>17</sup> Moyyere fuu nde ndokke-den, kulle lobbe fuu de ndokke-den, to kammu too iwranta en. Dum fuu to Laamdo tagudo naange e kooode dum iwranta en. Laamdo waylitataako, ko ni66i fuu walaa e makko. <sup>18</sup> Kanko muuyi so o wadi en bi66e makko, o rimtiri en konngol makko, konngol goongaraawol, yalla eden laatoos dikkuruu6e e tagoore makko ndee.

### *Haala nande konngol Laamdo so jokka*

<sup>19</sup> Sakiraa6e am horsu6e, ngadee hakkille e dum doo: kettinee tafon, taadon haalde, taadon tikkude. <sup>20</sup> Sabi neddo tikkudo waawaa gollude ko foocitii yeeso Laamdo. <sup>21</sup> Ndennoo, njoppee huunde fuu ko tuunni e ko satti bonde, nja66oro-don konngol ngol Laamdo tuti e berde moodon ngol leydinkinaare. Engol waawi hisinde yonkiiji moodon.

<sup>22</sup> Ngadee ko konngol ngol wii on, pati kaadee e hettinaade ngol tan. So wanaa dum, on tawan on njaayrii ko'e moodon. <sup>23</sup> Sabi kettintoodo konngol so waasa jokkude ngol, ana wa'i hono no yeewoowo hoore mum e tintorgal so yiya no yeeso mum tagiraa. <sup>24</sup> Caggal o yii hoore makko, o wittii, oon wakkati fuu o yeggitata no o wa'i. <sup>25</sup> Kaa oon yeewoowo sariya ki6budo dimdinoowo oo, so tiinnike e mum, so tuugike dum, laatoto hono golliroowo konngol ngol, wanaa hono nanoowo tan so yeggita. Laamdo wadan barke e golle makko fuu.

<sup>26</sup> Neddo fuu jogoriido hoore mum yo diinanke lobbo, so tawii waawanaa demngal mum, jaayrii hoore mum, diina mum kaa duu nafataa fay huunde.

<sup>27</sup> Diina laabuka seniika do Laamdo Baabiraado men kajum woni: faabaade rew6e talka'en 6e wor6e mum'en maayi e atiime'en ley billaare mum'en, e haybude hoore mum e tuundi aduna.

## 2

### *No arsukunte e misikiino fuu potiri e men*

<sup>1</sup> Sakiraabe am, onon goondin6e Joomiraado meeden Iisaa Almasiihu Jom teddeengal, pati burdinee bi66e aadama. <sup>2</sup> So arsukunte gadudo care kanje pariido warii do mbataton doo jooni, e so misikiino boorniido kaddule tuunnude kajum duu warii, <sup>3</sup> so on njii boorniido kaddule lobbe oo, ngadanon dum hakkille, njoyyinon dum e joonnde teddunde, mbiyon dum «Jooda», mbiyon misikiino oo «Dara too enne» naa «Jooda e leydi», <sup>4</sup> so on ngadirii non, on ceendaali ko'e moodon naa? On laatike saroo6e 6e miijooji bondi. <sup>5</sup> Sakiraabe am horsu6e, kettinee! Misikiina'en aduna oo 6ee wanaa Laamdo subike 6e faa hokka 6e arsukuntaaku goongaraajo, ke6aado e goondinal, 6e naata e Laamu Laamdo mo Laamdo fodani yi66e dum oo naa? <sup>6</sup> Kaa onon, on koynii misikiina'en 6ee. Tama wanaa arsukunte'en 6ee torrata on, so na6a on laamu? <sup>7</sup> Wanaa kam6e mbonkotoo Iisaa mo njogi-don innde mum lobbere oo naa?

<sup>8</sup> Goonga, so tawii on njokkii sariya Laamu Laamdo no Binndi dii mbiiri nii: «Njidiraa tanaa maa no njidir-daa hoore maa nii»,\* so on njokkii dum, on ngadii ko moyyi. <sup>9</sup> Kaa so on burdinii bi66e aadama, on luuttii, sariya oo hollii on wofoo6e. <sup>10</sup> Sabi so neddo woofii wootere e jamirooje sariya dee, fay so jokkii keddiide dee fuu, luuttii sariya oo fuu. <sup>11</sup> Sabi Laamdo biido «Pati jeenu», kajum wii kase «Pati jaadu hoore.» Jooni, fay so a jeenaali, so a jaadii hoore, a laatike boofudo sariya oo. <sup>12</sup> Kaaldee, ngolliree hono no yim6e sardete6e sariya dimdinoowo nii. <sup>13</sup> Caroowo mo yurmataako, Laamdo yurmataako dum. Kaa jurmotoodo, walaa fuu ko o huldata sariya.

<sup>14</sup> Sakiraabe am, tama won biyoowo e moodon «Mido goondini Laamdo.» Kodum fuu dum nafata so golle makko hollataa omo goondini? Ngal goondinal ana waawi hisinde mo naa? <sup>15</sup> So tawii ada jogii sakiraado gorko naa banndiraado debbo 6e laatii hasindin6e sanne sanne kotal e jaamdu jannde mum, <sup>16</sup> so gooto mon wii 6e: «Yo on tawoy jam, kolton kolte tekkude, jaamon faa kaaron» tawee on ndokkaali 6e ko 6e kasindini e mum koo, kotal e nguure, kodum dum nafata? <sup>17</sup> Goondinal e hoore mum duu non worri: so ngal waldaa e golle lobbo, ngal waatii, ngal nafataa.

<sup>18</sup> Kaa so won biido ma: «Aan, a jom goondinal, miin, mi jom golle», nden, mi jaaboto joomu: «Hollam goondinal maa tawee waldaa e golle lobbo so

\* 2:8 Lewinkoo6e 19.18

ada waawi. Miin duu mi hollirte gollleeji am mi goondindo.»<sup>19</sup> Ada goondini Laamdo yo gooto naa? Gasii! Kaa fay seydaani'en ana ngoondini dum faa ebe cijna no be poti hulde!<sup>20</sup> Jaaydo! Kinaa mi holle goondinal ngal waldaa e golle nafaa fuu walaa e mum.<sup>21</sup> Hono njaati men Ibarahiima wadi so nanngiraa poocciido, wanaa golle muudum naa? O fawi biyiiko Isiyaaka e ittirde sadaka ndee faa o hirsaa dum.<sup>22</sup> A yii goondinal Ibarahiima e golle mum fuu ana hawri, kasen duu golle makko hi66ini goondinal makko.<sup>23</sup> Hono nii ko Binndi dii mbii koo tabitiri: «Ibarahiima goondinii Laamdo, Laamdo jatorii mo saabe majjum mo poocciido»,† faa o noddiraa gidoo Laamdo.<sup>24</sup> Ndennoo on njii, e golle neddo nanngirtee yo poocciido, wanaa goondinal mum tan.<sup>25</sup> Hono non Rahab, debbo pijoowo oo duu. O nanngiraa mo poocciido kammari golle lobbo mo gollunoo oo, nde o ja66inoo nelaa6e 6ee so o walli dum'en hootirde laawol gonngol ndee.<sup>26</sup> Jooni nee, hono no caldi neddo maayirta so foofaango iwii e mum nii, hono non goondinal waatirta so golle lobbo iwii e mum.

### 3

#### *Haala biirude demngal mum*

<sup>1</sup> Sakiraa6e am, pati heew6e e moodon tewta laataade jannginoobe. Sabi odon anndi enen jannginoobe, so en ngadii ko boni en carete sariya naawdo faa 6ura yim6e wo66e 6ee.<sup>2</sup> En fuu eden mboofa e nokkuuje keewde. So tawii won mo mboofataa so ana haala, oo laatii neddo ki66o, baawdo durde caldi mum fuu.<sup>3</sup> No ngadirten labaale e kundude pucci yalla ana dowtanoo en nii, hono non nabirten caldi majji duu.<sup>4</sup> Yeewee laanaaji geeci dii no di poti manngu e no kene mawde nabirta di. Kaa dum fuu e taweede gurfirgel tusukel dirnata di, marsoowo di oo naba di do yidiri fuu.<sup>5</sup> Demngal duu hono non. Demngal yo salndu famardu e caldi neddo kaa engal mantoro kulle mawde. Yeewee! Ladde no foti mawnude nii fuu, pettel yiite ana waawi sumude nde fuu.

<sup>6</sup> Demngal duu yo yiite. Engal lommbii hakkunde terde, engal moo6i boneeji fuu, engal sobina terde fuu. Engal hu66iree yiite jahannama, engal suma nguurndam meeden fuu.<sup>7</sup> Bi66e aadama mbiirii sii daabaaji fuu, iwde waasooji ladde e pooli e ladi faa yottaade ko woni ley ndiyam fuu.<sup>8</sup> Kaa demngal, fay gooto waawaa biirude dum. Demngal haadataa haannde mum, ngal kasaara bondo, keewngal tooke bondo.<sup>9</sup> Kanngal njetirten Baabiraa6o men Joomiraa6o, kanngal duu kudirten yim6e, tawi Laamdo tagi 6e so nanndini 6e e muudum.<sup>10</sup> Jettooje e kuddi fuu ley hunduko wooto koo nii njaltata. Sakiraa6e am, wanaa non dum haani worrude.<sup>11</sup> Tama ndiyam mbeldam e ndiyam kaadudam ana mbaawi ildude e sewnde wootere? <sup>12</sup> Sakiraa6e: ibbi ana waawi rimde 6ohe naa? Maangoroowi ana waawi rimde ibbe naa? Ndennoo, sewnde haadunde yaltintaa ndiyam mbeldam.

#### *Haala hakkilantaaku iwru6o to Laamdo*

<sup>13</sup> Hakkilante naa paamdo ana e moodon naa? Joomum hollira dum caahu e gollleeji gadiraa6i sawraare e hakkilantaaku.<sup>14</sup> Kaa so tawii kirondiral bonngal naa haasidaaku ana e berde moodon, pati mantoro-don on hakkilante'en, dum yo yeddude goonga oo.<sup>15</sup> Oon hakkilantaaku iwataa to Laamdo. Do aduna doo o iwata, e gidaade yonki o iwata, e seydaani

† 2:23 Pudfoode 15.6



o iwata. <sup>16</sup> Sabi do kiram e haasidaaku ngoni fuu, njii6u e boneeji duu don tawetee. <sup>17</sup> Kaa hakkilantaaku iwdo to Laamdo, la66inan bernde tafon. Caggal dum, o wadda jam. Omo heewi sawraare, omo heewi newaare, omo heewi yurmeende, omo wada gollleeji lobbi. O seenndataa 6i66e aadama. Naafiigaaku walaa e makko. <sup>18</sup> Yi66e jam 6ee, jam aawata, fooccitaare mawnde yaltanta 6e hen.

## 4

### *No yidugol aduna laatorii wajuugol Laamdo*

<sup>1</sup> Hoto golowole e ha6ooji gondi e ley moodon dii iwi? Tama wanaa e jooteeji moodon ka6ooji e ley berde moodon dii di iwi? <sup>2</sup> So on tuuyaama huunde on ke6ataa, dum wadi on mbaran ko'e. Odon kaasidoo on ke6ataa sago mon, dum wadi on nduddan ka6on. On ke6aali, sabi on jaagaaki Laamdo. <sup>3</sup> Odon jaagoo mbaason hebude, sabi anniya bondo woni ko jaagorto-don, yalla odon ke6a gidaade yonki mon tan. <sup>4</sup> Odon nanndi e jeenoobe. Tama on anndaa yidude aduna yo konnaagu Laamdo? Ndennoo, anniyiido laataade gid6 aduna fuu, wadii hoore mum konnee Laamdo. <sup>5</sup> Pati miilee Binndi dii meere kaalata: «Laamdo ana horsini ruuhu mo wadi e meefen oo sanne.» <sup>6</sup> Kaa noo, Laamdo wadanii en mooyere burnde mawnude kasen. Sabi dum Binndi dii mbiyata: «Laamdo salanto mawninkinii6e, hinnoto leydinkinii6e 6ee.»\*

<sup>7</sup> Ndennoo, njabanee Laamdo. Ka6on e Ibiliisa o dogan o woddo on. <sup>8</sup> Battitee Laamdo, kanko duu o battoto on. Onon luuttu6e 6ee la66inee juude mon, onon wadu6e berde didi 6ee, la66inee berde moodon! <sup>9</sup> Noornee, cunlee, mbooyee, ngadee jaleede moodon bojji, ngadee weltaare moodon sugulla. <sup>10</sup> Leydinkinee e yeeso Joomiraado, o toowan on.

<sup>11</sup> Sakiraa6e, pati fay gooto e moodon no'a bannum. Neddo fuu no'udo bannum naa hiitii dum, bonkiima sariya Laamdo oo, hiitike sariya oo. So a wadii nii, a wadii hoore maa kiitotoodo sariya oo, a downtaako mo. <sup>12</sup> Gooto woni darnudo sariya, oo woni Laamdo Caroowo oo: kanko tan woni baawdo hisinde naa halkude. Aan, ko ngon-daa faa kiitoo-daa tanaa maa?

### *No neddo haaniri wakkilde e Laamdo*

<sup>13</sup> Onon wiyoo6e: «Hannde naa janngo, min njahan ngalluure maaniire e maaniire, min ngada ton hitaande miden njaagoo, min ke6a tino», ngadee hakkille! <sup>14</sup> On anndaa ko wadata janngo. Kodum woni nguurndam mon? Dum cuurki 6annguki wakkatiiwel gootel tan so majji. <sup>15</sup> Hono nii kaannodon wiide: «So Joomiraado muuyii, min nguuran, min ngolla huunde maani e huunde maani.» <sup>16</sup> Kaa jooni, on mawninkinike, on kaawtike. Haawtaare hono nii fuu, ana boni. <sup>17</sup> Dum nee, anndudo gollude golle lobbo, so gollaali dum, luuttii.

## 5

### *Haala arsukunte'en bon6e golle*

<sup>1</sup> Jooni nanee onon arsukunte'en, mbooyee, ngadee woonda saabe torraaji kewtotoodi on. <sup>2</sup> Jawle moodon mbonii, kaddule moodon mooyii. <sup>3</sup> Kanje moodon e cardi moodon sugii. Ngol sugugol laatantoo on seedaaku boneeji mon, jaama tew mon no yiite nii. Aduna warii e timmude, faa hannde odon

\* 4:6 Tinndi 3.34

paggoo jawle. <sup>4</sup> Njɔɔdi gollooɔe hettuɔe gese moodon ndi cali-don yɔɔude ndii wullata. Joomiraado Jom Sembe oo nanii gullaali hettuɔe ɔee dii. <sup>5</sup> On njootaama, on mbeltike ley oo doo aduna, on paynii ko'e moodon saabe jannde kirsete-don. <sup>6</sup> On carii poocciitiido mbar-don dum, tawi waawaa daranaade hoore mum.

*No nafaa mujal mawniri*

<sup>7</sup> Haya, sakiraaɔe, mujee faa Joomiraado oo wara. Hono no demoowo doomirta faa leydi hokka dum kettal lobbal, o mujan faa o heɔa yiiwoonde aranndeere e sakitotoonde, <sup>8</sup> onon duu mujee, tiinnitee, sabi gartol Joomiraado oo battiima. <sup>9</sup> Sakiraaɔe, pati jinɔndiree yalla oɔon mbaasa sareede. Miccitee wakkati fuu Carooowo oo ana ɔadii sanne, omo darii damal! <sup>10</sup> Sakiraaɔe, miccitee annabaaɔe wowlunooɔe innde Joomiraado ɔee mujii torra. Onon duu mujiree no maɔɔe nii. <sup>11</sup> Eden mbiya tiinnitiibe ɔee mbeli hoore. On nanii tiinnitaare Ayyuuba ana haalee, kasen on njii ko Joomiraado oo faandinoo hen, sabi Joomiraado yo keewɔo yurmeende sanne, jom hinnee.

<sup>12</sup> Kaa ko adii huunde fuu, sakiraaɔe am, pati kunee: wanaa hunoraade kammu,\* wanaa hunoraade leydi, wanaa huunde wonnde. So goonga, mbiyon goonga, so pene, mbiyon pene pati Laamɔo sara on.

*Haala jaagoraade Laamɔo dow goondinal*

<sup>13</sup> Won torriido e moodon naa? Duwoo! Won ceyiido e moodon naa? Yettira Laamɔo jime. <sup>14</sup> Won jawɔo e moodon naa? Nodda mawɔe deental goondinɔe, ɔe ngujira dum nebam e innde Joomiraado, ɔe nduwanoo dum. <sup>15</sup> Duwaawu duworaado goondinal, kaɔum sellinan jawɔo oo, non Joomiraado imminan dum. So joomum luuttiino duu, yaafete. <sup>16</sup> Ndennoo, gooto fuu haalana godɔo luutti muudum, jaaganee banndiraaɔe moodon Laamɔo, yalla oɔon cellinee. Naagunde Laamɔo nde nedɔo poocciitiido jaagii ana jogii baawɔe waɔde kulle mawɔe. <sup>17</sup> Annabi Iliyaasa yo nedɔo hono men. O ndaardi Laamɔo o duwii pati kammu toɔa. Duubi tati e lebbi jeegom, waadere tollaaki e leydi. <sup>18</sup> Caggal dum, o jaagii Laamɔo kasen kammu oo toɔa. Nden Laamɔo jippini toɔo, leydi fudini ko hettete.

<sup>19</sup> Sakiraaɔe, so gooto e mon majjii laawol goonga, so godɔo wartirii dum, <sup>20</sup> anndee gartirdo luuttudo iwde e laawol majjere hisinii yonki iwde e maayde, saabe dum, luutti keewɔi ana njaafee.

\* 5:12 Hunoraade kammu woni hunoraade Laamɔo.

## Bataaki Piyeer arano

<sup>1</sup> Miin Piyeer nelaado Iisaa Almasiihu winndi oo doo bataaki faade e mon, onon 6e Laamdo subii, laatiife ho66e e ley aduna oo, saakiibe e dee doo leyde: Ponta e Galaatiya e Kappadokiya e Asiya e Bitiniya. <sup>2</sup> Laamdo Baabiraado men subike on hono no anndirnoo dum nii, non Ruuhu mum wadi on yimbe Laamdo, faa downtano-don Iisaa Almasiihu, yalla yiyyam mum dam ana la66ina on. Yo Laamdo beydan on moyyere e jam!

### *Haala jikke nguurndam nduumiidam*

<sup>3</sup> Jettooje ngoodanii Laamdo Baaba Joomiraado men Iisaa Almasiihu. Dow yurmeende makko mawnde ndee o rimtorii en rimtegol dida6ol saabe immitagol Iisaa Almasiihu e hakkunde maay6e faa ke6en jikke duumotoodo.

<sup>4</sup> Non eden mbaawi fawde jikke men dow moyyereji di Laamdo resani en dow kammu dii. Kanji, di mbonataa, di tuunnataa, di buytataako. <sup>5</sup> Laamdo reeniri on goondinal mon e ley baawde makko, faa hisina on. O lanndinike 6annginde dam kisindam e wakkati cakite aduna oo.

<sup>6</sup> Odon nii ceyii hen seyo manngo, fay so jooni ana haani ley wakkatiwel gootel torraaji di ngaldaa sii itta koro mon. <sup>7</sup> Dii torraaji kollata cellal goondinal mon. Hono no kanje wadirtee e yiite faa yeewee yalla o dimo, onon duu hono non korirte-don. Goondinal mon duu ana buri kanje sabi kanje heddataako. Ndennoo on njettete, on ke6an darja e teddeengal kammari goondinal mon ngal 6annde Iisaa Almasiihu 6anngii. <sup>8</sup> Iisaa, on njiyaali dum kaa odon njidi dum. On njiyataa mo jooni, kaa odon ngoondini mo. Dum hebbini on seyo, seyo manngo dadungo hakkille, <sup>9</sup> sabi odon ke6a tino goondinal mon, dum woni kisindam yonkiiji mon.

<sup>10</sup> Annabaabe sappiibe ko fa'i e moyyere nde podana-don ndee, yeewii kasen duu tewtii faamude dam kisindam. <sup>11</sup> Ruuhu Almasiihu gondo e ma66e oo anndinii 6e gila wakkati majjum waraali, torraaji kewtotoodi Iisaa Almasiihu e teddeengal jokkoawal hen. Annabaabe 6ee tewtii faamude nde dum wadata e no dum wadirta. <sup>12</sup> Kaa Ruuhu oo hollitiino 6e oon kabaaru wanaa ko'e ma66e 6e mbaajantoono, onon 6e mbaajantoo. Joonoo, waajotoo6e Kabaaru Lobbo 6ee njottinii on oon kabaaru dow baawde Ruuhu Ceniido iwdo dow kammu. Oon kabaaru, malaa'ika'en hoore ana njidi annandande dum faa sanne.

### *Haala nguurndam ceniidam*

<sup>13</sup> Dum nee, tawa odon lanndinii, odon kakkili, odon peerti gite mon! Pawon jikke moodon fuu dow moyyere nde Laamdo hokkoyta on 6annde Iisaa Almasiihu 6anngoyii ndee. <sup>14</sup> Bikkoy downtaniibe Laamdo, pati njokkee e gidaade yonki de ngonno-don e mum arande dee. Nden, on anndaalino goonga. <sup>15</sup> Jooni, laatee seniibe e huunde fuu ko ngollaton, hono no Laamdo noddudo on oo seniorii nii. <sup>16</sup> Sabi Binndi dii mbii: «Laatee seniibe, sabi miin mi ceniido.»\*

<sup>17</sup> Odon noddira Laamdo Baabiraado moodon, kanko woni cariroowo gooto fuu e golle mum, o burdintaa yimbe. Ndennoo ley ko ngollaton fuu, kulee mo faa do kodaaku moodon haadi e aduna. <sup>18</sup> Odon anndi on coottitaama yalla odon tonngitee iwde e tonngoode nguurndam mon meereejam dam tawru-don baabiraabe moodon. Ndi coottitaari wanaa

\* 1:16 Lewinkoo6e 11.44-45; 19.2

huunde timmoore hono cardi naa kanje. <sup>19</sup> Iisaa Almasiihu soottitirii on yiyiam mum teddudam, Almasiihu nanndudo e njawdiri ndi walaa ella ndi walaa tuundi. <sup>20</sup> Laamdo subike Almasiihu gila aduna oo tagaaka, kaa e cakite jamaanu Laamdo bannginii mo saabe moodon. <sup>21</sup> On ngoondinirii Laamdo saabe Iisaa Almasiihu mo o immintini e maayde so o hokki dum teddungal, faa goondinal mon e jikke mon fuu fawoo e Laamdo.

<sup>22</sup> Jooni, caggal on cennirii ko'e moodon dwtanaade goonga faa njidon goondinbe 6ee sakiraa6e moodon, njidon 6e jilli di ngaladaa e naafigaaku. Ndenoo njidondiree jilli mawdi dow bernde laa6unde. <sup>23</sup> Laamdo wadi aawdi e berde mon so ndimta-don rimtegol dida6ol. Ndiin aawdi wanaa timmoori, ndiin woni konngol Laamdo guurngol duumiingol ngol. <sup>24</sup> Sabi, «Bii-aadama yo hudo,

dawla muudum yo piindi.

Hudo yooran, piindi solan,

<sup>25</sup> kaa konngol Joomiraado ngol

duumoto faa abada.»†

Ngol konngol woni Kabaaru Lobbo mo mbaaja-don oo.

## 2

<sup>1</sup> Saabe majjum, njoppon ko boni fuu: jamma e naafigaaku e haasidaaku e noore fuu. <sup>2</sup> No cukaloy keccoy muuyirta kosam endi inniraa6e mum'en nii, hono non onon duu muuyiron non konngol Laamdo laa6ungol ngol, yalla odon mawnira saabe maggol kison, <sup>3</sup> sabi Binndi dii mbii: «on meedii hinnee Joomiraado.»

*Haala haayre wuurnde, kanum e yimbe seniibe*

<sup>4</sup> Ngaree e Joomiraado, sabi kanko woni haayre wuurnde nde yimbe tippitii, kaa Laamdo subike nde, teddinii nde. <sup>5</sup> Onon duu odon mba'i hono no kaaye guurde mahirteede suudu duumiindu nii. On yottinoobe sadaka seniibe, waddanoobe Laamdo sadakaaji ruuhunkooji di mo jaabortoo saabe Iisaa Almasiihu. <sup>6</sup> Sabi Binndi dii mbii:

«Mi fawan e Siyona haayre doo6orde,

haayre subaande, horsunde,

kasen duu goondindo nde fuu

hersataa abada.»\*

<sup>7</sup> Onon goondinbe 6ee, nden haayre ana horsi e mon. Kaa 6e ngoondinaali 6ee, Binndi dii mbiyanii 6e:

«Haayre nde mahoo6e 6ee tippitii ndee,

kanum laatii haayre burnde fuu teentilaade e maadi ndii,†

<sup>8</sup> nden haayre yimbe pergitotoo,

so nde li6a dum'en.»‡

Saliibe rewde konngol ngol ana pergitoo e mayre no 6e podiranaa dum nii.

<sup>9</sup> Kaa onon, on lejol cubaangol, on yottinoobe sadaka gollanoobe Kaananke oo, on jaalejol ceniingol, on yimbe 6e Laamdo subanii hoore mum, faa kaalon haala golleeji makko lobbi, kanko woni noddudo on iwde e nimre faade e fooyre mum haayniinde! <sup>10</sup> Arannde on nganaano yimbe Laamdo, kaa jooni on yimbe makko. On kebaalino yurmeende makko, kaa jooni on ke6ii yurmeende makko.

*Haala dwtanaade hooree6e 6ee*

† 1:25 Esaaya 40.6-8 \* 2:6 Esaaya 28.16 † 2:7 Jabuura 118.22 ‡ 2:8 Esaaya 8.14

<sup>11</sup> Sakiraaḅe am horsuḅe, on nganaa so wanaa hoḅḅe e yimḅe jananḅe e aduna oo. Saabe majjum, mido yaggina on, ngoddito-don gidaade yonki, sabi wakkati fuu eḅe ndaarta halkude yonkiiji moodon. <sup>12</sup> Maree needi hakkunde yimḅe ḅe ngoondinaali ḅee, yalla fay so ḅe kappiri on bone, eḅe njiya golle moodon lobbo, ḅe teddina Laamḅo jannḅe ḅannngani ḅe.

<sup>13</sup> Njabanee kaanankoḅe ḅee fuu saabe Joomiraado, gila e kaananke burḅo toowde, <sup>14</sup> faa e wakiilu mum nelaado faa jukka waḅooḅe ko boni, yetta waḅooḅe ko moyyi. <sup>15</sup> Sabi ko woni sago Laamḅo dee, muḅḅiron kundude nuykaaḅe majjuḅe ḅee golle moodon lobbo. <sup>16</sup> Onon jey ko'e mon, kaa kayḅee pati ḅum laatanoo on sabaabu faa ngollon golle bonḅo. Ngorron no maraaḅe Laamḅo nii. <sup>17</sup> Teddinee yimḅe fuu, njidee sakiraaḅe goonḅinḅe ḅee, kulee Laamḅo, teddinee kaananke mawḅo oo.

### *Haala jokkude Iisaa Almasiihu*

<sup>18</sup> Maccuḅe, dowtanee halfaaḅe moodon teddinon ḅum'en, wanaa halfaaḅe moyyuḅe newiiḅe ḅee tan, fay oḅjiiḅe ḅee duu dowtanee ḅum'en, <sup>19</sup> sabi nedḅo mo toḅjaali, so torraama muḅiri saabe Laamḅo, wadii ko moyyi. <sup>20</sup> So tawii a toḅuḅo a jukkaama batte majjum, fay so a muḅii, teddeengal hongal keḅataa? Kaa so on muḅii torraaji kewtiidi on ley golle mon lobbo oo, Laamḅo ana yidi ḅum. <sup>21</sup> Dum Laamḅo noddori on, sabi Almasiihu torriiraama saabe mon. O hollii on laawol yalla oḅon njokka koyḅe makko. <sup>22</sup> Aḅada mo luuttaali, fay gooto nanaali fenaande e hunduko makko. <sup>23</sup> Nde ḅe njennunoo mo ndee, o yennitaaki ḅe, nde ḅe kollunoo mo bone ndee, o giidaaki ḅe. O doomtirii ḅe Laamḅo cariroowo jaadiral oo. <sup>24</sup> Iisaa Almasiihu e hoore mum roondike luutti meeden e caldi mum dow legal bardugal, faa maayanen luutti, nguuranen foocitaare. On cellinaama kammari barmanḅe makko. <sup>25</sup> Arannde, on baali majjudi, kaa jooni, on ngartiraama e duroowo kayboowo yonkiiji moodon.

## 3

### *Haala moyyondiral ḅamruḅe*

<sup>1</sup> Hono non onon rewḅe duu, dowtanee worḅe mon. Fay so worḅe mon nganaa jokkuḅe konngol Laamḅo, golle mon ana waawi waylitinde ḅe, tawee fay haala wadaali hen. <sup>2</sup> Be njiyan no gollleeji mon laaḅiri e no teddinir-don worḅe mon. <sup>3</sup> Pati pare moodon laatoḅ pare jaayirḅe: moorli, sodaade e ḅoornaade kaddule jaayirḅe. <sup>4</sup> Tiidee e coḅaari cuudiindi yalla ḅerḅe mon ana coḅoroḅ sawraare e deeyere, ḅum woni coḅaari ndi timmataa. Kayri woni coḅaari teentiliindi ndi Laamḅo yidi. <sup>5</sup> Arannde, non rewḅe seniḅe parortonoo, fawḅe jikke mum'en e Laamḅo ḅee. Been njabani worḅe mum'en, <sup>6</sup> hono no Saaratu dowtanirii jom suudu mum Ibarahiima faa ana noddira ḅum kalfaaḅo nii. Onon duu, so on ngollii golle lobbo tawi kulol fuu imminaali hakkillaaji moodon, on ḅiḅḅe makko, kanko Saaratu.

<sup>7</sup> Onon worḅe ḅee duu, tiidee e rewḅe mon e gondal mon ley suudu. Anndon debbo fotaa gorko doole. Teddinee ḅe sabi onon e maḅḅe fuu on reentḅe e moyyere wootere, ḅum woni nguurndam ngoongaraajam ḅam. Ngadiron non, pati fay huunde e duwaawuuji mon cagga e laawol.

### *Haala torrreede saabe laawol lobbol*

<sup>8</sup> Ko selli hen dee, on fuu laatee hakkille gooto, nawtondiron, gooto gooto mon fuu yida goḅḅo oo jilli sakiraagu, kinnondiree, leyḅinkino-don. <sup>9</sup> Bone, pati njobiree ḅum bone, pati njennitee jennuḅo on. Ko kaan-don waḅude dee,

nduwano-don joomum, sabi kammari dum Laamdo noddiri on, yalla odon ndokkee moyyere. <sup>10</sup> Sabi Binndi dii mbii:

«Muuydo dammitoraade nguurndam lobbam

e jalaafe belde fuu,

yo nantu demngal mum e ko boni,  
nannga hunduko mum e pene,

<sup>11</sup> duurtoo ko boni wada ko moyyi,  
ndaarta jam tiida e muudum.

<sup>12</sup> Sabi Joomiraado ana yeewa foocitiibe bee,  
ana hettindoo duwaawuujii mum'en,

kaa omo salanoo wadoobe ko boni bee.»\*

<sup>13</sup> Homo torraa on so on tiinnike e ko moyyi? <sup>14</sup> Kaa so tawii on torriraama saabe foocitaare, on mbelii hoore. Pati kulee yimbe bee kasen duu pati hakkillaaji moodon njiibo! <sup>15</sup> Teddinee Iisaa Almasiihu e berde moodon: o ceniido, o Joomiraado men. Wakkati fuu, tawa odon lanndinii jaabaade neddo fuu lamndiido on daliili jikke mo ngon-don e mum oo. <sup>16</sup> Njaaboree be sawraare e needi, tawee walaa fuu ko hakkille mon jirata on. Nden, fay so won ko be no'i on, naa be njenni on kammari odon njokki laawol Almasiihu lobbol ngol, yenkoobe on bee tan kersata dow majjum.

<sup>17</sup> Torreede e ley golle lobb, so tawii dum Laamdo muuyi, buri torreede e ley golle bondo. <sup>18</sup> Sabi Iisaa Almasiihu e hoore mum maayii cilol gootol keyoowol yimbe jamaanuujii dii fuu kammari luutti biibe aadama. Poocitiido oo maayiri saabe be poocitaaki bee, faa mo battina en Laamdo. O maayii ko yiyam makko yuppaa koo, kaa Ruuhu Ceniido immintini mo o guurdo. <sup>19</sup> E oo Ruuhu jaati Iisaa yaari gila ko booyi waajoyii yonkiiji uddaadi ley kasu. <sup>20</sup> Kanji luutti Laamdo e jamaanu Nuuhu, Laamdo mujanii di ko booyi, nde Nuuhu sehannoo laana mum mawka kaa ndee. Yimbe seeda naatunoo ley laana kaa so kisi e ndiyam dam, yimbe njetton tan. <sup>21</sup> Dum hollitinnoo lootogal batisima gila waraali. E ley maggal on kisi. Lootogal batisima ngal wanaa faa itta tuundi caldi dum wadira. Ko dum wadira dee, faa nootorodon Laamdo e hakkille mo jiraaali on. E immitagol Iisaa Almasiihu Laamdo hisinirta on. <sup>22</sup> Mo njaboyii dow kammu, kanko jooni omo joodii jaamo Laamdo. Malaa'ika'en e kaanankooobe e jogiibe baawde fuu tilsinaama e rewde konngol makko ngol.

## 4

### *Haala nguurndam kesam*

<sup>1</sup> Nde Iisaa Almasiihu wonnoo ley aduna oo ndee, torraabi. Onon duu bamon anniya hono no makko nii, lanndinane torra. Sabi torraado ley aduna seerii e luutti. <sup>2</sup> Gila jooni faa do nguurndam mon haadi, njokkon muuyde Laamdo, celon e gidaade yonki. <sup>3</sup> Nguurndam mon bettiidam dam heyii on, on ngadiino ko heeferbe bee njidi fuu: nde nguurno-don njaahilaaku e gidaade yonki e sigiro e wanngiyaare e yaraawo bonngo e dewal tooruujii karmungal. <sup>4</sup> Ko noottu-don tawdeede e mabbe e oo njaahilaaku cattudo koo, haaynii be sanne, dum saabii so ebe no'a on. <sup>5</sup> Kaa be ndaroto yeeso Laamdo, lanndiniido sarde wuurbe e maaybe oo. <sup>6</sup> Dum wadi so yimbe be nguuraa jooni bee kaalanaa Kabaaru Lobbo oo, yalla fay so be cariraama

\* 3:12 Jabuura 34.13-17

no yim6e fuu carirtee nii e ley caldi ma66e, e6e mbaawa wuurdude no Laamdo nii ley ruuhu.

<sup>7</sup> Timmoode huunde fuu 6adike. Nantee, kakkilee ndennoo, yalla odon keddoo e wadude duwaawu jannde fuu. <sup>8</sup> Ko ardii dum fuu, njidondiron no mbaawru-don fuu sabi kammari jilli luutti keewdi ana njaafee. <sup>9</sup> Nde on njahondirii, homo fuu teddina bannndum, ko waldaa e njurjurtondirde.

<sup>10</sup> Ko gooto e moodon fuu hebi dokke Laamdo koo, yo nafir de wo66e, hono no kawjotoodo lobbo, kalfinaado moyyere Laamdo heewnde sifa nii. <sup>11</sup> Kaaloowo fuu, ana haani haaldude haala Laamdo. Golloowo fuu, ana haani gollirde semmbe mo Laamdo hokki dum oo. Dum yalla Laamdo ana teddinee e ley huunde fuu, teddiniree saabe Iisaa Almasiihu. Yo teddungal e daawee ngoodan Iisaa Almasiihu faa abada abadin! Aamiina!

### *Haala seyoraade torra*

<sup>12</sup> Sakiraabe am horsu6e, pati torra ittoowa koro mon naawnoowa hono no yiite nii haayno on, hono no huunde nde haanaa wardi e mon nii. <sup>13</sup> Mido haalana on ceyee sabi ko ndeentir-don e Iisaa Almasiihu torraaji jooni koo, yalla odon ceyoo sanne ley ilinaali nde teddeengal makko 6annngii.

<sup>14</sup> So on koyniraama saabe innde Iisaa Almasiihu, on mbelii hoore. Sabi Ruuhu teddeengal, dum woni Ruuhu Laamdo, ana jippoo e moodon. <sup>15</sup> Pati fay gooto e moodon jukkiree war-hoore e nguyka e njangu naa naatude e ko walanaa dum. <sup>16</sup> Kaa so gooto mon torriraama saabe yo neddo Iisaa, pati yaagoroo dum, njettee Laamdo saabe nden innde.

<sup>17</sup> Jooni wakkati oo yottike nde Laamdo fuddata sarde yim6e. To yim6e rewo6e mo 6ee o fuddirta. So sariya oo fuddirii en enen, hono timmirta e dow 6e njokkaali Kabaaru Laamdo Lobbo 6ee? <sup>18</sup> Binndi dii mbii: «So hisinde fooccitiibe tiidii,

kodum hewtotoo yeddu6e Laamdo e luuttoo6e?»\*

<sup>19</sup> Ndennoo so nii fii worri, neddo fuu torraado so tawii dum Laamdo muuyi, yo faw jikke mum e Tagudo koolniido oo, heddo e wadude golle lobbo.

## 5

### *Haala waaju faade e maw6e*

<sup>1</sup> Mido waajoo maw6e wondufe e moodon 6ee dum doo, sabi miin duu mi mawdo, mi seedinokke torraaji Iisaa Almasiihu dii, mi tawdete e teddungal 6annnginoyteengal ngal. <sup>2</sup> Tiidee e sewre nde Laamdo halfini on ndee. Pati ndurdon nde tilsera, ndurdon nde 6ernde laa6unde no Laamdo yidiri nii. Pati ndurdon nde kammari kaalisi, ndurdon nde soobee. <sup>3</sup> Pati kayyinee sewre nde Laamdo halfini on ndee, kaa ngadanon sewre ndee misaalu nde njokka e mon. <sup>4</sup> Nden so Duroowo Mawdo oo 6annngoyii, on ke6an deesewal teddeengal ngal bontataa abada.

<sup>5</sup> Hono non onon sukaa6e jokol6e, nja6ee yamiroore maw6e. On fuu, kollondiree leydinkinaare ley gollidal mon, sabi Binndi dii mbii:

«Laamdo salanto mawninkiniibe,

hinnoto leydinkiniibe 6ee.»\*

<sup>6</sup> Ndennoo, leydinkinane Laamdo Jom Semmbe oo, yalla omo toowna on so wakkati cu6aado oo yottike. <sup>7</sup> Tippee sugullaaji moodon dii fuu yeeso Laamdo, sabi omo wadani on hakkille.

\* 4:18 Tinndi 11.31 \* 5:5 Tinndi 3.34

<sup>8</sup> Kakkilee, mbaalon e jeerngo! Sabi gajo moodon Ibiliisa ana wada yaha-warta no laddeeru yobundu nii, ana ndaara mo fadda faa jaama. <sup>9</sup> Kabitodon, tiidon e goondinal moodon, sabi odon anndi sakiraaɓe moodon saakiibe e aduna oo ɓee, kajum'en duu ana ngondi e diin torraaji.

<sup>10</sup> Torraaji mon ɓooyan seeda. Kaa Laamɗo cattudo hinnaade en oo noddii en faa naaten e teddeengal mum duumiingal e Iisaa Almasiihu. Nden, Laamɗo bilta on, jiiɓina on, hokka on semmbe, darna koyɗe mon. <sup>11</sup> Yo baawɗe ngoodan mo faa abada! Aamiina.

### *Baynondiral*

<sup>12</sup> Silas mo anndu-mi yo sakiraaɗo koolniido wallii kam winndande on oo ɓataaki daɓɓo, waajaade on e seedanaade on: kabaaru hinnee Laamɗo goongaraajo oo, ana worri no mbinndir-mi nii. Keddodee hen!

<sup>13</sup> Deental goondinɓe gonngal Baabila, ngal Laamɗo subii no suborii on nii, engal salmina on. Marka ɓiyam oo duu ana salmina on. <sup>14</sup> Calmondiree salminaango wondungo e jilli.

On fuu yo on keɓu jam onon yimɓe Iisaa Almasiihu ɓee!



## Bataaki Piyeer dīaḅo

<sup>1</sup> Oo gataaki ga am iwri, miin Simon Piyeer. Mi maccudo Iisaa Almasiihu mi nelaado mum. Mi jowtii on, onon hebuḅe goondinal hono ngal amen ngal saabe fooccitaare Iisaa Almasiihu, Laamdo meeden kisinoowo en oo. <sup>2</sup> Yo Laamdo hebbinir on moyyere e jam e ley ko anndu-don mo koo, e ko anndu-don Joomiraado meeden Iisaa koo.

### *No goondinḅe kaaniri wuurdude e kulol Laamdo*

<sup>3</sup> E ley baawde Laamdo dee Iisaa hokkii en huunde fuu ko kaaja-den faa nguurden e kulol Laamdo. Iisaa wallii en anndude Laamdo, noddirdo en darja mum e moyyuki mum oo. <sup>4</sup> E ley darja makko e moyyuki makko o fodanii en moyyereji korsudi, mawdi sanne. O fodii di faa ndadon sarri bonannda mo gidaade yonki ndimi gondo e aduna oo, yalla odon ndeenta e Laamdo tagu. <sup>5</sup> Saabe dum, coobee, beydon e dow goondinal moodon ngal moyyuki, e dow moyyuki kii anndal, <sup>6</sup> e dow anndal ngal nantaare, e dow nantaare ndee mujal, e dow mujal ngal kulol Laamdo, <sup>7</sup> e dow kulol Laamdo ngol yidugol sakiraabe, e dow yidugol sakiraabe ngol jilli goongaraaji. <sup>8</sup> So dii sifaaji lobbi ana ngoodi e mon, tawee duu edi beydoo, di ngadan on beydotoobe yaade yeeso nafaobe e ley anndugol mon Joomiraado men Iisaa Almasiihu. <sup>9</sup> Sabi neddo fuu mo diin sifaaji ngalaa e mum yo bumdo naa pamduo jiile, sabi yeggitii Laamdo laḅbini dum e luutti mum yaḅḅiidi dii.

<sup>10</sup> Kaa onon sakiraabe, cooboree no mbaawru-don fuu e tabintinde noddaango ngo Laamdo noddi on faade e mum ngoo e ko o subii on koo. Sabi so on ngadii dum on pergitataako abada! <sup>11</sup> Hono nii Laamdo yaajiniranta on damal naarrugal e laamu duumiido oo, laamu Joomiraado men Iisaa Almasiihu kisinoowo en oo.

<sup>12</sup> Ndennoo, fay so tawii odon anndi deen kulle odon jiiḅi e goonga mo keḅu-don oo, mi miccintinan on de wakkati fuu. <sup>13</sup> Mi yii ana tilsi mi finndina hakkillaaji mon faa miccito-don dum so mido heddi foofude. <sup>14</sup> Sabi mido anndi mi booyataa e aduna hankasen, dow no Joomiraado men Iisaa Almasiihu holliri kam nii. <sup>15</sup> Kaa mi wadan ko mbaaw-mi fuu, yalla so mi iwii doo, odon mbaawa miccitaade kulle dee wakkati fuu.

### *No haala annabaabe tabitiri e Almasiihu*

<sup>16</sup> Nde min anndini on garol Joomiraado men Iisaa Almasiihu e baawde mum ndee, min njokkaali fillaaji jeeḅudi iwdi e yimbe. Gite amen jaati min njiiri manngu makko! <sup>17</sup> O hokkaama teddeengal e darja iwde e Laamdo Baabiraado oo wakkati nde daande Laamdo jom darja mawdo oo wii: «Oo doo yo Biyam korsudo mo ceyortoo-mi.» <sup>18</sup> Nden daande woni nde min nani iwnde dow kammu, minen e ko'e amen, sabi miden ngondunoo e makko to dow haayre seniinde too.

<sup>19</sup> Dum fuu beydani min kasen tayorde ko annabaabe ḅee kaalnoo koo. Odon nii ngada ko moyyi e wattude hen hakkillaaji moodon, sabi konngi maḅḅe ana wa'i no lampa pooynoowa ley nimre, faa nde fajiri fooynata, hoodere fajiri jalban ley berde moodon.\* <sup>20</sup> Kaa aranel hen fuu, anndee ko winndaa ley dewte annabaaku koo annabaajo oo loowaali dum hoore mum. <sup>21</sup> Fay nde wootere Laamdo loowaali konngol mum e ḅii-aadama dow

\* **1:19** Hoodere fajiri ndee woni Almasiihu, jaaynoowo ley berde goondinḅe dum. Yeew Banngingol Yuhanna 22.16

sago bii-aadama, kaa Ruuhu Ceniido wadi so annabaabe bee kaalti konngol iwrungol to Laamdo ngol.

## 2

### *Haala annabaabe peneebe e halkaare mum'en*

<sup>1</sup> No annabaabe peneebe ngorrunoo e ley lejol Israa'iila ngol nii, hono non waajotoobe fenoo6e ngorroya e ley moodon. Be cooran e ley moodon jannde peneere halkoore. Be njeddan fay Kalfaado ma66e coottitinoodo 6e oo. Hono non 6e poodiranta ko'e ma66e halkaare yaawnde. <sup>2</sup> Heew6e njokkan e njaahilaaku ma66e oo, 6aman faa laawol goonga ngol bonkee kammari been waajotoobe. <sup>3</sup> Joote ma66e waddanan 6e haalde pene faa 6e jaagoroo on, kaa jukkungo ma66e saraama 6ooyii, halkere ma66e ana doomi 6e.

<sup>4</sup> Miccitoro-don no Laamdo so66intinaali malaa'ika'en luuttunoo6e 6ee nii. Ko o wadi dee, o geyyori 6e calali o wedii 6e ley nimre jahannama faa jannde dargal. <sup>5</sup> Miccitoro-don duu no o so66intiniraali aduna arano oo nii, ko o wadi dee, o reeni Nuuhu baajotoodo fooccitaare oo e njeddon wob6e, o wayli e dow yeddoobe Laamdo 6ee ilam tuufaanu. <sup>6</sup> Laamdo sarii geelle didi Sodooma e Gomoora, o halkirii dum'en yiite faa laatii ndoondi, yalla ede laatanoo yeddoobe Laamdo waroo6e 6ee misaalu. <sup>7</sup> E ley hen, o danndii Luudu poocciitido cunjudo sanne saabe njaahilaaku bon6e 6ee.

<sup>8</sup> Oon poocciitido koddunoodo e ma66e, 6ernde mum moyyunde ndee ana mettannoo jalooma beetudo fuu saabe golleeji ma66e bondi di mo yiyata e di mo nanata.

<sup>9</sup> Dum fuu ana holla, Joomiraado ana waawi reenude downtaniibe dum 6ee iwde e torraaji ittooji koro ma66e, ana waawi kasen resande oopiibe 6ee jukkungo faa jannde dargal, <sup>10</sup> wanaa haala dogoo6e caggal gidaade yonki cobude, hoynu6e hooreyaaku Joomiraado 6ee.

Been waajotoobe fenoo6e kulataa gacce, ana kaawtii, ana mbonkoo teddu6e won6e dow kammu 6ee. <sup>11</sup> Kaa malaa'ika'en 6ee e burde 6e semmbe e baawde fuu mbonkataako 6e faa kiitoo 6e yeeso Joomiraado. <sup>12</sup> Kaa been yim6e, 6e ngalaa hakkille no daabaaji ladde njogoraaki hakkille nii, dimiraadi faa loohee mbaree. E6e mbonkoo ko 6e anndaa, dum wadi so 6e kalkirte no daabaaji mbardetee nii. <sup>13</sup> Hono non 6e ke6irta njo6di oopaae ma66e. Be gacce moodon, 6e ella moodon, sabi fay fijirde bonnde jalooma ana wela 6e. So 6e njooddike e moodon e ley kawrital jaamdu, e6e mbelee e jamma ma66e. <sup>14</sup> Be kaafataa yeewde rew6e janan6e, 6e njootataa wadude junuubu, koydo yonki fuu 6e koomtan dum. Berde ma66e yo mboownaade e joote, 6e hudaa6e Laamdo. <sup>15</sup> Be celii laawol pooccingol ngol, 6e majjii saabe ko 6e njokki laawol Balaama\* bii Bosora koo, ja6udo oopaae saabe joote jawdi. <sup>16</sup> Oon annabaajo felaama dow luuttal mum wakkati nde ndakiwa mum haaldiri e num daande neddo, hadi dum wadude ko nuykaado wadata.

<sup>17</sup> Waajotoobe fenoo6e 6ee yo bulli di ngalaa ndiyam, 6e duule de henndu soggata, nimre burnde fuu ni6bude 6e ndesanaa. <sup>18</sup> Be ndaarii seytoraade yim6e e dow konngi mawdi 6oli. Be mbirfintinii yaltu6e ko 6ooyaali hakkunde majju6e 6ee faa 6e njokkintina dum'en gidaade njaahilaaku gonde e yonki. <sup>19</sup> E6e podana been ndimaaku tawee kam6e e ko'e ma66e 6e maccu6e

\* **2:15** Balaama janngini kaananke ngeenndi mbiyeteendi Mo'ab oo seytaade Israa'iilankoo6e faa 6e naata e jeenu kaɓum e dewal tooruujj.

bonannda, sabi gooto fuu yo maccudo ko jaalii dum. <sup>20</sup> So tawii e anndal Joomiraado men Iisaa Almasiihu kisinoowo en oo 6e ndadiri e tuundi aduna, so 6e mbiriftiima e mayri kasen faa ndi jaalike 6e, no 6e mbattinirta nii ana buri no arannde nii bonde. <sup>21</sup> Tawee 6e anndaalino laawol fooccitaare ngol fey buri anndude ngol faa gasa so duurtoo yamiroore seniinde nde 6e ndokkanoo ndee. <sup>22</sup> Ko hewtii 6e koo sellinii dii tinndi: «Rawaandu jaamtan tuurre mum.» Wiyaama kasen: «Ngiroowu lootaado talloto e loope.»

### 3

#### *Haala gartol Joomiraado*

<sup>1</sup> Sakiraa6e am horsu6e, oo woni bataaki dida6o mo mbinndan-mi on. E ley didi dii fuu, mido yidi heydintinde e hakkillaaji mon anniyaaji lobbi faa miccito-don, <sup>2</sup> haalaaji di annabaabe seniife kaalnoo gila ko booyi, kajum e ko Joomiraado men kisinoowo oo yamiri, ko nelaabe e mon anndini on koo. <sup>3</sup> Adee anndude dum doo: e jalaade cakitotoode dee, jaayroobe yim6e jokku6e gidaade yonki mum'en 6ee ngaroyan. Be njaayran on, <sup>4</sup> 6e mbiya: «Hono fodoore gartol makko ndee laatii? Sabi gila e njaatiraa6e faa jooni, huunde fuu ana worri e alhaali mum hono no worrunoo gila e fuddoode aduna nii.» <sup>5</sup> E6e ndaara yeggitidde Laamdo tagiri kammu e leydi fuu konngol muudum. O tagiri leydi ndii ndiyam, ndi yaltii ley ndiyam, <sup>6</sup> e majjam kasen, aduna oo halkorii ilam tuufaanu. <sup>7</sup> E konngol makko ngol kasen, kammu e leydi jamaanu kawru-don oo ndesanaama yiite faa jannde darnagal, nde yeddu6e Laamdo 6ee kalketee ndee.

<sup>8</sup> Sakiraa6e am horsu6e, pati njeggiton oo goonga: to Joomiraado, jalooma gooto ana wa'i hono no duu6i ujunere nii, kaa duu duu6i ujunere ana mba'ani mo hono no jalooma gooto nii. <sup>9</sup> Joomiraado taadintaa tabintinde fodoore mum no yoga yim6e paamirta taadugol nii, o mujando on tan sabi o yidaa fay gooto halkoo. Ko o yidi dee, yim6e fuu ngarta e makko, tuuba. <sup>10</sup> Kaa jannde gartol Joomiraado ndee juhuran en no gujjo juhirta nii. Oon wakkati, dillere mawnde wadan, kammu oo timman. Kudde kammunkooje fuu kalkoto ley yiite. Leydi ndii e gollleeji gonfi e mum fuu bannginte sarete.

<sup>11</sup> Haya so tawii dum fuu hono non dum halkortoo, odon kaani jokkude laawol ceniingol! Odon kaani wurdude kulol Laamdo <sup>12</sup> so tawee odon ndooma odon ngolla faa jalaande Laamdo ndee warda no yaawiri nii! Oon wakkati, kammu hu66an halkoo, kudde kammunkooje fuu taayan ley yiite. <sup>13</sup> Kaa eden ndoomiri no Laamdo fodiri nii: kammu keso e leydi keyri do fooccitaare tawetee.

<sup>14</sup> Tawee deen kulle ndoomaten, sakiraa6e am horsu6e, coobee yalla Joomiraado ana tawa on e jam, tawa on ngalaa tuundi on ngalaa ella. <sup>15</sup> Paamon mujal Joomiraado meeden ngal ana newnana on kisindam. Non sakiike men Pool korsudo oo winndirani on, no Laamdo hokkiri mo hakkilantaaku nii. <sup>16</sup> Non o winndiri dum e bataakiiji makko dii fuu. Bataakiiji makko dii ana njogii konngi di maanaa mum tiidi faamude, di yim6e famar6e jannde e hoy6e yonki ley goondinal mbaylitata koro mum, hono no 6e ngadirta e nokkuuje godde ley Binndi dii duu nii. Kam6e ngaddanta ko'e mab6e halkaare. <sup>17</sup> Kaa onon sakiraa6e am horsu6e, nde wonnoo on kumpitaama dum gila jooni, ndeentee pati bon6e 6ee na6ora on e majjere mum'en so njoppon do tabitinno-don doo. <sup>18</sup> Mawniron e ko anndu-don

Joomiraado men Iisaa Almasiihu kisinoowo en oo koo e ko kebu-don moyyere  
mum koo! Yo teddeengal woodan mo gila jooni faa abada! Aamiina!

## Bataaki Yuhanna arano

### *Haala Konngol dokkoowol yimbe nguurdam*

<sup>1</sup> Miden mbinndana on haala neddo goodudo gila puɗɗoode.\* Min nanii haala makko, min njiirii mo gite amen, min taykike mo, min memirii mo juude amen. Kanko woni Konngol dokkoowol yimbe nguurdam. <sup>2</sup> Nguurdam dam ɓannginaama min njii dam, ɗum saabii so miden kaalana on haala majjam. Dam nguurdam nduumiidam ngondam do Baabiraado dam min ɓannginanaa, dam min kaalanta on haala mum jooni. <sup>3</sup> Ndennoo, ko min njii e ko min nani min kaalanta on onon duu, yalla oɗon ndeentira e amen hono no min ndeentiri e Baabiraado e Biyum Iisaa Almasiihu nii. <sup>4</sup> Dum min mbinndanta on, yalla seyo men ana hiɓɓa.

### *No Laamɗo holliri yo fooyre*

<sup>5</sup> Kabaaru mo min narri Almasiihu, mo min kaalanta on haala mum oo, annii: Laamɗo yo fooyre, nimre fuu walaa e mum. <sup>6</sup> So en mbii eden ndeentii e makko, kaa tawee e nimre ngon-ɗen, en penii, goonga walaa e golle men. <sup>7</sup> Kaa so e fooyre nguur-ɗen no o worri e fooyre kanko e hoore makko nii, nden en ndeentii enen e ko'e men, kasen duu yiyyam Biyiiko Iisaa laɓɓinan en e tuundi fuu. <sup>8</sup> So en mbii en luuttaali, en njaayrii ko'e men, en ngalaa e goonga. <sup>9</sup> Kaa so en njaadiranii Laamɗo luutti men, o yaafoto en, o laɓɓina en e tuundi fuu. Sabi kanko, o koolniido, o poocciido. <sup>10</sup> So en mbii en luuttaali, en njogorike Laamɗo yo penoowo, konngol makko naataali e men.

## 2

### *No Almasiihu laatorii ballo men*

<sup>1</sup> Sukaabe am, mi winndanii on ɗum, pati on luuttu. Kaa so won luuttudo, eden njogii balloowo do Baabiraado, oo woni Iisaa Almasiihu poocciido oo. <sup>2</sup> Kanko hokkitiri yonki makko yalla luutti men ana njaafee, wanaa luutti men enen tan, luutti aduna oo fuu.

### *Haalayidondirde*

<sup>3</sup> Ko anndinta en eden anndi Laamɗo dee, haybude jamirooje mum. <sup>4</sup> Biido «mido anndi mo», tawa haybataa jamirooje makko, joomum yo penoowo, walaa e goonga. <sup>5</sup> Kaa kaybudo konngol Laamɗo ngol, jilli Laamɗo ana kiɓɓi e mum jaati. Nii anndirten eden jiibi e makko. <sup>6</sup> Biido ana jiibi e makko, ana haani wuurda no Almasiihu wuurdunoo nii.

<sup>7</sup> Sakiraabe am horsuɓe, ko mbinndan-mi on koo wanaa yamiroore heyre, yo yamiroore ɓooynde nde keɓ-ɗon gila arannde. Nden yamiroore ɓooynde woni konngol ngol nan-ɗon ngol.\* <sup>8</sup> Dum e taweede, yamiroore ɓooynde nde mbinndan-mi on ndee, nde heyre duu, goonga mayre ana ɓannga e Almasiihu, ana ɓannga e mon, onon duu. Sabi nimre ana timma, fooyre jaati ndee tawi fudɗii yaaynude. <sup>9</sup> Biido e fooyre woni, tawi ana waji sakiike mum, oo kaa e nimre woni faa hannde. <sup>10</sup> Jidɗo sakiike mum e fooyre woni, walaa ko fergitata ɗum. <sup>11</sup> Bajudo sakiike mum e nimre woni ana wummbiloo, anndaa to yahata sabi nimre wumnii ɗum.

\* **1:1** Goodudo gila puɗɗoode oo yo Iisaa. (Yeew Linjiila ngedu Yuhanna 1.1-18 duu.)  
Yamiroore ndee yo yidondirde.

\* **2:7**

### *Haala waasude yidude aduna*

<sup>12</sup> Sukaabe, mido winndana on  
sabi luutti mon njaaforaama saabe Almasiihu.

<sup>13</sup> Baabiraa6e, mido winndana on  
sabi odon anndi goodudo gila e puddoode oo.

Jokol6e, mido winndana on  
sabi on njaalike Ibiliisa Bondo oo.

<sup>14</sup> Sukaabe, ko mbinndiran-mi on dee,  
saabe odon anndi Baabiraado.

Baabiraa6e, ko mbinndiran-mi on dee,  
saabe odon anndi goodudo gila e puddoode oo.

Jokol6e, ko mbinndiran-mi on dee,  
saabe odon njogii semmbe,  
konngol Laamdo ngol jii6ii e mon,  
kasen duu on njaalike Bondo oo.

<sup>15</sup> Pati njidee aduna, kajum e ko woni e mum fuu. Sabi jiddo aduna waawaa yidude Baabiraado. <sup>16</sup> Sabi huunde fuu ko woni e aduna banngal gidaade yonki e ko darii e yitere e haawtaade banngal jawdi, jeyaaka e Baabiraado, dum fuu e aduna jeyaa. <sup>17</sup> Aduna e muuyooji mum fuu timman, kaa gaadoowo sago Laamdo duumoto faa abada.

### *Jeertaango dow konnee'en Almasiihu*

<sup>18</sup> Sukaabe am, timmoode aduna oo 6adike. On nanii konnee-Almasiihu waran. Haya, jooni konnee'en-Almasiihu heewe6e annii. Dum anndir-don timmoode dee. <sup>19</sup> E men jaati 6e iwata, kaa 6e njeyanooka e men. Sabi kam6e, sinndo e men 6e njeyanoo, 6e keddodotono e men. Kaa dum hollata kam6e 6e fuu 6e njeyanooka e men. <sup>20</sup> Kaa onon, Almasiihu hokkii on Ruuhu Ceniido, on fuu odon anndi goonga. <sup>21</sup> Mi winndiranaali on saabe on anndaa goonga. Ko mbinndiran-mi on dee, saabe odon anndi goonga. Kasen duu odon anndi fenaande fuu walaa e goonga. <sup>22</sup> Ndennoo, homo woni penoowo? Jeddudo Iisaa yo Almasiihu, kajum woni penoowo.† Jeddudo Baabiraado e Bajjo oo fuu yo konnee-Almasiihu. <sup>23</sup> Sabi jeddudo Bajjo oo walanaa Baabiraado oo, ceedaniido Bajjo oo fuu ana woodani Baabiraado oo duu. <sup>24</sup> Onon, tiidee e ko nan-don gila arannde koo. Haala ka nan-don gila arannde kaa, so jii6ii e mon, onon duu on jii6an e Bajjo oo, on jii6an e Baabiraado oo. <sup>25</sup> Kasen duu, ko Almasiihu fodani en dee, nguurdam nduumiidam.

<sup>26</sup> Mi winndanii on dum banngal yim6e majjinoobe on. <sup>27</sup> Kaa onon, Ruuhu Ceniido mo o hokki on oo, ana jii6i e mon, fotaa ko njangine-don. Sabi Ruuhu makko oo jannginta on huunde fuu, kanko Ruuhu oo goonga o jannginta on, wanaa fenaande. Ndennoo, jii6ee e Almasiihu no Ruuhu mum oo jannginiri on nii.

### *No laatori-don 6i66e Laamdo*

<sup>28</sup> Jooni sukaabe am, jii6ee e Almasiihu, yalla eden ndardoo yeeso makko rafi kulol, pati kersen jannnde gartol makko. <sup>29</sup> So on anndii Laamdo yo poocciido, tayoree mo gollleeji mum poocciitii fuu yo 6iyiiko.

† 2:22 So neddo yeddii Iisaa yo Almasiihu, yeddii o kaananke, yeddii o kisinoowo duu.

## 3

<sup>1</sup> Yeewee no Baabiraado foti yidirdede en, faa noddire-den 6i66e Laamdo. En 6i66e mum jaati. Ko hadi aduna oo anndude en dee, o anndaa Baabiraado. <sup>2</sup> Sakiraa6e am horsu6e, jooni en 6i66e Laamdo. Ko laatoto-den koo, 6aanginaaka tafon. Kaa eden anndi nde Almasiihu 6aangii, en nanndan e mum, sabi en njiyan mo kanko e hoore makko no o worri nii jaati. <sup>3</sup> Joonndoriido dum e makko fuu, la66iniran hoore mum no Almasiihu laa6iri nii.

<sup>4</sup> Golludo ko boni fuu, luuttii Sariya Laamdo. Sabi gollude ko boni yo luuttude Sariya. <sup>5</sup> Odon anndi Almasiihu 6aangirii faa roondanoo en luutti men. Kajum, luutti ngalaa e mum. <sup>6</sup> Nii6udo e makko fuu, heddataako e luutti. Luuttoowo fuu, yiyaali mo, anndaa mo.

<sup>7</sup> Sukaabe am, pati fay gooto majjina on! Golloowo ko foocitii yo poocitiido, hono no Almasiihu worri yo poocitiido nii. <sup>8</sup> Kaa luuttoowo yo neddo Ibiliisa, sabi Ibiliisa ana luutta gila e puddoode. Saabe majjum Bii Laamdo oo wardi faa halka gollleeji Ibiliisa. <sup>9</sup> Laatiido gii Laamdo fuu heddataako luuttude, sabi Ruuhu Laamdo ana jii6i e mum. Joomum waawaa heddaade luuttude, sabi yo gii Laamdo. <sup>10</sup> Ko seenndata 6i66e Laamdo e 6i66e Ibiliisa dee, mo gollataa ko foocitii fuu, wanaa neddo Laamdo. Mo yidaa sakiraa6e mum duu, hono non worri.

*Haala jilli*

<sup>11</sup> Oo woni kabaaru mo nan-don gila arannde oo: njidondiren. <sup>12</sup> En kaanaa wa'ude no Kaabiila jokkudo Ibiliisa Bondo oo so wari mijum nii. Kodum wadi so o wari dum? O wardii dum kammari golle makko yo bondo, mo mijiiiko oo kaa yo lobbo. <sup>13</sup> Ndennoo sakiraa6e, pati kaayne-don so aduna oo wajii on. <sup>14</sup> Ko njid-den sakiraa6e men koo, 6aanginani en en njaalike maayde, en naatii e nguurndam. Mo yidaa sakiike mum fuu, heddiike yo maaydo. <sup>15</sup> Neddo fuu bajudo sakiike mum, jaadii hoore. Odon anndi jaadudo hoore, nguurndam nduumiidam walanaa dum.

<sup>16</sup> No anndirten ko woni jilli dee, Almasiihu hokkitirii yonki mum kammari men. Ndennoo enen duu, eden kaani hokkitirde yonkii men kammari sakiraa6e men. <sup>17</sup> So jogiido nguure hitaande yii sakiike mum yo kasindindo, yurmaaki dum, hono jilli Laamdo mbaawiri jii6irde e mum? <sup>18</sup> Sukaabe am, pati jilli men laato haala 6ola tan, njidiren golle e goonga. <sup>19-20</sup> Nii anndirten e goonga ngon-den. Kasen duu so berde men pelii en, en mbaaltinan de yeeso Laamdo, sabi Laamdo 6uri de manng, kanko woni anndudo huunde fuu.

<sup>21</sup> Ndennoo sakiraa6e am horsu6e, so nii berde men pelaali en, en tawdataake e kulol yeeso Laamdo, <sup>22</sup> o hokkan en ko jaagi-den mo fuu, sabi en kaybii jamirooje makko, eden ngada ko weli mo. <sup>23</sup> Yamiroore makko yo goondinde Iisaa Almasiihu Biyiiko oo, kajum e yidondirde hono no o yamiri en nii. <sup>24</sup> Kayboowo jamirooje Laamdo fuu, ana jii6i e Laamdo, Laamdo duu ana jii6i e mum. Ruuhu mo o hokki en oo, kajum anndinta en omo jii6i e men.

## 4

*Haala Ruuhu goonga e ruuhu majjere*

<sup>1</sup> Sakiraa6e am horsu6e, baajotoodo fuu biido Ruuhu Laamdo ana e mum, pati ngoondinee dum faa koron yalla Ruuhu Laamdo jaati woni e mum naa wanaa. Sabi annabaabe penee6e heewe6e caakike e aduna oo. <sup>2</sup> Annii no anndirten Ruuhu Laamdo ana e neddo: ja6udo Iisaa Almasiihu warii laatike

neddo fuu, oon, Ruuhu Laamdo ana e mum. <sup>3</sup> Kaa mo jaɓanaali Iisaa fuu, Ruuhu Laamdo walaa e mum. E konnee-Almasiihu iwi. On nanii haala garol konnee-Almasiihu oo. Oon, ana ley aduna oo gila jooni. <sup>4</sup> Sukaaɓe am, onon, on yimɓe Laamdo, on njaalike annabaabe peneeɓe ɓee. Sabi Ruuhu gondo e mon oo furi semmbe diina gondo e aduna oo. <sup>5</sup> Been annabaabe peneeɓe, ɓe adunankooɓe. Saabe majjum, haala mbonka ɓe kaalata, aduna oo ana hettinanoo ɓe. <sup>6</sup> Enen, en yimɓe Laamdo, anndudo Laamdo fuu hettinanto en. Mo wanaa neddo Laamdo hettinantaako en. Nii ceenndirten Ruuhu goonga e ruuhu majjere.

### *Haala jilli Laamdo*

<sup>7</sup> Sakiraabe am horsuɓe, njidondiren, sabi jilli e Laamdo iwi. Mo jilli ngoni e mum fuu yo ɓii Laamdo, ana anndi Laamdo. <sup>8</sup> Mo jilli ngalaa e mum oo anndaa Laamdo, sabi Laamdo e hoore mum jaati anndini en ko woni jilli. <sup>9</sup> Ko Laamdo ɓannginirani en jilli mum dee, ko o neli Biyiiko Bajjo ley aduna oo koo, yalla eden keɓira nguurndam saabe mum.

<sup>10</sup> Ko njidu-den Laamdo koo anndintaa en jilli. Ko anndinta en jilli dee, Laamdo yidi en. E ley jilli makko dii o nelii Biyiiko faa hokkitira yonki mum yalla luutti men ana njaafee. <sup>11</sup> Sakiraabe am horsuɓe, ko Laamdo yidiri en nii koo, enen duu, eden kaani yidondirde. <sup>12</sup> Fay gooto yiyaali Laamdo abada. So en njidondirii, Laamdo jiiɓan e men, kasen duu jilli mum kiɓɓii e men.

<sup>13</sup> Hono anndirten eden jiiɓi e makko, kanko duu omo jiiɓi e men? Ko o hokki en Ruuhu makko oo koo. <sup>14</sup> Minen e ko'e amen, min njii Bajjo oo, miden kaalana on Baabiraado oo neli mo faa o hisina aduna oo. <sup>15</sup> Jaɓudo Iisaa yo Bii Laamdo fuu, Laamdo jiiɓan e mum, kaɗum duu jiiɓan e Laamdo. <sup>16</sup> Enen, en anndii jilli di Laamdo yidi en dii, en koolike di. Laamdo e hoore mum jaati anndini en ko woni jilli. Niiɓudo e jilli fuu, e Laamdo jiiɓi. Laamdo duu jiiɓan e mum. <sup>17</sup> No Almasiihu wa'i nii, hono non enen duu kaan-den wa'ude e oo doo aduna. Nii woni no jilli dii kiɓɓiri e men, pati kulen ɓannde dargal. <sup>18</sup> Kulol walaa ley jilli, jilli kiɓɓudi ittan kulol. Sabi kulol yo jukkungo doomi, kasen duu gondudo e kulol fuu, jilli Laamdo kiɓɓaali e mum. <sup>19</sup> Enen, ko o adii yidude en koo, wadi so njidondir-den. <sup>20</sup> Biido «mido yidi Laamdo», so tawi ana waji sakiike mum, yo penoowo. Sabi mo yidaali sakiike mum mo yiyata, waawaa yidude Laamdo mo yiyaali. <sup>21</sup> Jiddo Laamdo fuu, yo yidu sakiike mum duu. Ndee doo yamiroore, Almasiihu waddani en dum.

## 5

### *Haala goondinde Bii Laamdo*

<sup>1</sup> Goondindo Iisaa woni Almasiihu fuu laatike ɓii Laamdo. Jiddo saaraa fuu, yidan ɓiyiiko duu. <sup>2</sup> No anndirten eden njidi ɓiɓɓe Laamdo dee, ko njid-den Laamdo so njokku-den jamirooje mum koo. <sup>3</sup> Sabi haybude jamirooje makko woni yidude mo. Jamirooje makko nganaa donngal, <sup>4</sup> sabi ko iwi e Laamdo fuu, jaaloto gidaade yonki. Goondinal men njaalorto-den de.

<sup>5</sup> Homo jaalotoo gidaade yonki? Walaa fuu jaalotoodo gidaade yonki so wanaa goondindo Iisaa woni Bii Laamdo. <sup>6</sup> Oon woni Iisaa Almasiihu gardudo e ndiyam e yiyam.\* Wanaa e ndiyam tan o wardi, o wardii e ndiyam e yiyam fuu. Ruuhu oo duu hollata dum, sabi Ruuhu oo woni goonga. <sup>7</sup> Sabi kulle tati ana kolla Iisaa woni Almasiihu, <sup>8</sup> dum woni Ruuhu e ndiyam e

\* 5:6 Ndiyam dam woni ndiyam lootogal batisima. Yiyam dam ana hollita maayde Iisaa.



yiiyam, seedaaku majje oo duu yo gooto. <sup>9</sup> Efen nja6a seedaaku yim6e, kaa seedaaku Laamdo oo furi semmbe. Sabi kanko woni mo Laamdo haali haala Biyum. <sup>10</sup> Goondindo Bii Laamdo, hebii oon seedaaku e ley bernde mum. Mo goondinaali Laamdo, kapum jogorike Laamdo yo penoowo, sabi jabaali seedaaku mo Laamdo haali haala Biyum oo. <sup>11</sup> Dum woni seedaaku oo: Laamdo hokkii en nguurndam nduumiidam, dam nguurndam ana e Biyiiiko oo. <sup>12</sup> Goodando Bii Laamdo oo fuu, hebii nguurndam dam. Mo walanaa dum, hebaali dam.

### *Baynondiral*

<sup>13</sup> Onon goondin6e Bii Laamdo oo bee, mi winndanii on dum, yalla ofon taylora on kebii nguurndam nduumiidam. <sup>14</sup> Efen njogii ndee hoolaare do makko: so en nduworike huunde hakke muuyde makko, o jaabanto en. <sup>15</sup> Efen anndi en kebii ko nduwi-d'en koo, nde wonnoo eden anndi omo jaabanoo en duwaawu men.

<sup>16</sup> Ndennoo, so won jiid'o sakiike mum ana luutta luuttal ngal waddantaa neddo maayde, o jaaganoo dum Laamdo, Laamdo duu hokkan dum nguurndam. Kaa won luuttal gaddoowal maayde. Mi wiyaali jaagoro-don saabe ngal luuttal. <sup>17</sup> Oojaare fuu yo luuttal, kaa wanaa luuttal fuu waddata maayde.

<sup>18</sup> Eden anndi bii Laamdo fuu heddataako e luutti, sabi Bii Laamdo oo ana hayba neddo oo, Ibiliisa Bondo oo memataa mo.

<sup>19</sup> Eden anndi en yim6e Laamdo, aduna oo fuu annii e maral Bondo oo.

<sup>20</sup> Eden anndi Bii Laamdo warii, hokkii en hakkille mo anndiren dewetedo goongaraajo oo. Jooni eden njeyaa e goongaraajo oo, sabi eden jii6i e Biyiiiko Iisaa Almasiihu. Kanko woni Laamdo goongaraajo oo, kanko woni nguurndam nduumiidam. <sup>21</sup> Sukaa6e am, ndeenee ko'e mon e dewetedo goddo.

## Bataaki Yuhanna dīdaḅo

<sup>1</sup> Miin mawḁo deental goonḁinḅe winndi oo ḅataaki faade e debbo tedduḁo\* mo Laamḁo subii. Mido jowte, aan e ḅiḅḅe maa fuu, onon ḅe njidiri-mi goonga. Wanaa miin tan yidi on, annduḅe goonga oo ḅee fuu ana njidiri on <sup>2</sup>saabe goonga gonḁo e men, duumotooḁo e men faa abada oo. <sup>3</sup>Laamḁo Baabiraado men e Biyum Iisaa Almasiihu yurmoto en, hokkan en moyyere e jam kammari goonga e jilli.

### *Haala goonga e jilli*

<sup>4</sup> Mi seyike sanne ko kumpitii-mi won ḅiḅḅe maa jokkirḅe goonga oo no Baabiraado yamiri en nii. <sup>5</sup> Jooni, debbo tedduḁo, mido ndaarde, njidondiren. Ko mbinndanana-maa-mi koo wanaa yamiroore heyre, ḁum yamiroore nde keḅu-ḁen gila arannde. <sup>6</sup> Ko woni jilli dee, haybude jamirooje Laamḁo. Nden yamiroore woni nde kaan-ḁon haybirde no nanir-ḁon ḁum gila arannde nii. <sup>7</sup> Sabi majjinooḅe heewḅe caakike e aduna oo. Be njaḅaali Iisaa Almasiihu warii laatike nedḁo. Baado no maḅḅe nii fuu yo majjinoowo yo konnee-Almasiihu. <sup>8</sup> Kaybee ko'e mon, pati golle mo ngollu-ḁon oo mursee, keḅon mbarjaari kiḅḅundi. <sup>9</sup> Sabi mo jiiḅaali e laawol Almasiihu ngol, walanaa Laamḁo. Jiiḅuḁo e maggol ana woodani Baabiraado e Bajjo oo fuu. <sup>10</sup> So won garḁo e mon ana waajoo ko waldaa e laawol ngol, pati njaḅḅee ḁum e ley galleeji mon, pati fay njowtee ḁum. <sup>11</sup> Sabi jowtuḁo mo fuu, kaḅum e makko laatike gootum.

### *Baynondiral*

<sup>12</sup> Ko kaan-mi haalande on koo ana heewi, mi yidaa winndande on ḁum fuu e ḁerewol. Kaa mido yeloo warde to mon, kaalden hunduko e hunduko, yalla seyo men ana hiḅḅa.

<sup>13</sup> Haya, ḅiḅḅe sakiike maa debbo mo Laamḁo subii oo ana njowte.

---

\* 1:1 Debbo tedduḁo oo e ḅiḅḅe mum yo deental goonḁinḅe gootal.

## Bataaki Yuhanna tatabo

<sup>1</sup> Miin mawdo deental goondinbe winndi oo bataaki faade e Gayus sakiike am korsudo mo njidir-mi goonga oo.

<sup>2</sup> Sakiike am korsudo, mido yeloo kefaa neema e cellal, no hakkille maa deeyiri e Laamdo nii. <sup>3</sup> Hee mi seyike nde yoga e sakiraaɓe ngari kaalani kam no tiinnori-daa e goonga e no njokkir-daa mo nii. <sup>4</sup> Seyo fuu buranaa kam ko nan-mi biɓɓe am ana njokki goonga oo koo.

### *Haala ballal faade e sakiraaɓe*

<sup>5</sup> Sakiike am korsudo, golle lobbo mo ngollantaa sakiraaɓe ɓee, fay ɓe a anndaa ɓee,\* ana hollita a koolniido. <sup>6</sup> Be kaalii haala jilli maa yeeso deental goondinbe. So a jokkii yooɓinde ɓe ko ɓe kasindini e laawol maɓɓe, no hawwirta e muuyde Laamdo nii, a wadan ko moyyi. <sup>7</sup> Sabi kamɓe, saabe Almasiihu ɓe immorii laawol ngol. Be ndaardaali yimɓe ɓe ngoondinaali Iisaa ɓee fay huunde. <sup>8</sup> Ndennoo, enen goondinbe Iisaa, eden kaani wallude hono been yimɓe, yalla eden ngollida e maɓɓe goonga.

### *No Diyoterefes e Demeteriyus ngorri*

<sup>9</sup> Won ko mbinndu-mi faade e deental goondinbe ngal, kaa Diyoterefes, muuydo arinde hoore mum oo, jaɓantaa kam. <sup>10</sup> Saabe dum, so mi warii, mi hollan ko o wadata koo e no o bonkorto min nii. Wanaa dum tan: o jaɓɓataako sakiraaɓe hoɓɓe ɓee, kasen duu yidube jaɓɓaade ɓe ɓee, o hadan dum, o ribba dum'en e deental goondinbe ngal.

<sup>11</sup> Sakiike am korsudo, pati jemmibu ko boni, jemmibu ko moyyi. Gadoowo ko moyyi fuu yo neddo Laamdo. Gadoowo ko boni anndaa Laamdo. <sup>12</sup> Demeteriyus yo neddo lobbo sabi omo jiiɓi e goonga. Yimɓe fuu ana kaala haala makko lobba. Minen duu, miden njaɓi dum, ada anndi seedaaku amen yo goonga.

### *Baynondiral*

<sup>13</sup> Ko kaan-mi haalande ma koo ana heewi, mi yidaa winndude dum fuu e derewol. <sup>14</sup> Mido yeloo yiide ma ko ɓadii, kaalden hunduko e hunduko.

<sup>15</sup> Gidiraaɓe maa wonɓe doo ɓee ana njowte. Mido jowta gidiraaɓe ɓee fuu, gooto gooto. Aan e jam!

\* 1:5 Sakiraaɓe ɓee yo saakoobe Kabaaru Lobbo oo.

## Bataaki Yahuuda

<sup>1</sup> Oo bataaki ga am iwri, miin Yahuuda, maccudo Iisaa Almasiihu mi mijjii Yaakuuba. Mi jowtii on, onon noddaabe horsuube e Laamdo Baabiraado men bee, onon reenaabe faa gartol Iisaa Almasiihu. <sup>2</sup> Yo Laamdo hebbin e mon yurmeende mum e jam mum e jilli mum!

### *Jeertaango dow jannginoobe fenoobe*

<sup>3</sup> Sakiraaabe am horsuube, mido yidunoo faa sanne winndande on banngal kisindam dam ndeentu-den e mum en fuu dam. Kaa jooni mi yii ana tilsi mi winnda faa mi suusina on kaano-don laawol goondinal dokkaangal seniibe fuu cilol gootol keyoowol yimbe jamaanuujii dii fuu. <sup>4</sup> Sabi won sooriibe e deental ngal, be jukkungo mum'en winndaa gila ko booyi. Be yeddoobe Laamdo, be waylitoobe moyyere Laamdo ndee faa laatooyamiroore njaahi-laaku, be yeddoobe Joomiraado men Iisaa Almasiihu Kalfaaado men gooto oo.

<sup>5</sup> Jooni, mido yidi miccintinde on dum doo, fay so taweede on kumpitaama faa laafi: ko Joomiraado dandii yimbe mum to leydi Misira too koo, o saktike halkude be ngoondinaali e ley maabe bee. <sup>6</sup> Miccitoro-don duu no yoga e malaa'ika'en bee keddaaki do njamiranoo doo nii, ko be ngadi dee, be njoppu darde maabe. Saabe dum Joomiraado heddi be ley nimre faa kiiti jannde darngal, geyyii be geyyelle duumiide. <sup>7</sup> Kasen duu, Sodooma e Gomoora e geelle piliide dum'en ngadirii njaahilaaku no malaa'ika'en bee ngadirii nii, de nguurdiino e tuuyooji di kaanaa wadeede. E ley dum de laatanike yimbe fuu jeertaango jukkungo yiite duumiinge ngee.

<sup>8</sup> Dum e taweede, sooriibe e mon tuugiiibe ko njii e ley koydi mum'en bee, ana cobina caldi mum'en, ana koyna hooreyaaku Joomiraado, ana mbonkoo teddube wonbe dow kammu bee. <sup>9</sup> Jaka fay Miikaa'iilu, mawdo malaa'ika'en oo, bonkaaki Ibiliisa nde be nduddunoo banngal ireede tew Muusaa oo ndee. O jabaali bonkaade Ibiliisa faa o wullanoo dum, ko o wii dum dee: «Yo Joomiraado hiite.» <sup>10</sup> Kaa been yimbe ana mbonkoo kuddde de be anndaa dum'en, ko be anndi koo jaati woni ko halkata be. Dum woni tuuyooji maabe, ana wa'i hono tuuyooji daabaaji ladde nii. <sup>11</sup> Kaari! Be njokkii laawol Kaabiila.\* Be ngadii ko'e maabe e majjere Balaama,† yalla ebe keba jawdi. Be kalkoto e murtugol maabe no Koora‡ halkorii nien. <sup>12</sup> Kambe ngoni ella kawrital naamdu moodon, sabi ayiibe be naamirta, kasen duu ko'e maabe tan be killaa. Be duule de ngalaa ndiyam de kenuuli coggata, be ledde yaawnde de ngalaa ko tebetee, doofaade, baatudde fey. <sup>13</sup> Ebe yufina gacce maabe no bempjee geeci piyotoode yufinirta ngufo nii, be koo de jiilotode, nimre burnde fuu niibude be ndesanaa faa abada.

<sup>14</sup> Henok taanii Aadama jeddaabo oo sappinoke kabaaru maabe gila ko booyi, wii:  
«Yeewee Joomiraado ana warda e malaa'ika'en mum seniibe ujunaaji uju-naaji

<sup>15</sup> faa sara yimbe fuu.

O hollitan bonbe bee golle mum'en fuu no foti bonde,  
o hollitan be geddi fuu di been luuttoobe yeddoobe Laamdo kaali.»

\* **1:11** Kaabiila yo bardo mijjum Haabiila. † **1:11** Yeew 2 Piyeer 2.15 ‡ **1:11** Gorko biyeteedo Koora murtini yimbe Israa'ila nde Muusaa haybannoo be ley ladde ndee.

<sup>16</sup> Been yimbe yo bonnoobe moyyere, woytotoobe, jokkoobe gidaade yonki mum'en, ebe mantoo, ebe mana wobbe yalla ebe keba ko be njidi.

*Haala jibude nguurndam dow goondinal*

<sup>17</sup> Kaa onon sakiraaɓe am horsuɓe, miccilee konngi di nelaaɓe Joomiraado men Iisaa Almasiihu ɓee cappinoo dii. <sup>18</sup> Nii ɓe mbiiri on: «E cakite jamaanu, jaayroobe yimbe, jokkuɓe gidaade yonki mum'en bonɗe ngaroyan.» <sup>19</sup> Kambe ngoni seenndoobe yimbe, miilooji adunankooji ɓe njogii, Ruuhu Laamɗo oo walaa e maɓɓe. <sup>20</sup> Kaa onon sakiraaɓe am horsuɓe, mahee nguurndam mon dow goondinal moodon cattungal senaade ngal, keddee e jaagaade Laamɗo e dow baawɗe Ruuhu Ceniido. <sup>21</sup> Keddee e jilli Laamɗo tawa oɗon ndoomti yurmeende Joomiraado meeden Iisaa Almasiihu naɓoore on to nguurndam nduumiidam. <sup>22</sup> Njurmee yoga yimbe wonɓe e sikke, <sup>23</sup> ndiwtee yoga maɓɓe iwde e yiite, ndanndon ɓe. Wobbe ɓee noo, njurmoro-ɗon ɓe e dow jeertagol, nefon fay saaya ka terɗe maɓɓe comni kaa.

<sup>24-25</sup> Laamɗo ana waawi reenude on e tarataraade, ana waawi darnude on yeeso teddeengal mum, tawee jijoore walaa e mon, on seyiiɓe. Yo teddeengal e manngu e semmbe e laamu ngoodan mo, kanko Laamɗo gooto kisinirdo en Iisaa Almasiihu Joomiraado meeden oo, gila huunde fuu tagaaka faa jooni, faa abada abadin. Aamiina!

## Banngingol ngol Iisaa Almasiihu 6annginani Yuhanna

<sup>1</sup> Dewtere ndee ana mooḡti kulle de Iisaa Almasiihu 6anngini. Laamḡo 6annginani mo dee kulle faa o holla maccuḡe mum 6ee ko warata 6ooyataa. Iisaa neli malaa'ika mum faa humpita ḡum maccuḡo makko Yuhanna. <sup>2</sup> Oon duu seettiima huunde fuu ko yii, ḡum woni, o haalii konngol Laamḡo ngol, o seedii e dow Iisaa Almasiihu oo huunde fuu ko o yii. <sup>3</sup> Nedḡo fuu jannguḡo ndee dewtere annabaaku welii hoore. Nedḡo fuu kettiniḡo nde so jokki ko winḡaa e mayre koo welii hoore, sabi wakkati mo kulle dee ngadata oo 6adiima.

### *Misaalu faade e deente goonḡinḡe jedḡi*

<sup>4</sup> Miin Yuhanna winḡi oo ḡoo 6ataaki faade e deente jedḡi goonḡinḡe gonḡe e leydi Asiya dee. Yo on keḡu moyyere e jam iwde e Laamḡo gooduḡo, goodunooḡo, garooḡo oo, iwde e ruuhuuji jedḡi gonḡi e yeeso bimmbeere makko laamu ndee ḡii, <sup>5-6</sup> iwde e Iisaa Almasiihu, seedee koolniḡo e dow kulle dee oo, arano e wuurtineede hakkunde maayḡe, laamiḡo kaanankooḡe aduna oo.

Yo teddeengal e baawḡe ngoodan Iisaa faa abada, kanko yiḡi en so o yuppi yiyyam makko, o tonngiti en iwde e tonngoode luuttal, o waḡi en jeyaabe e laamu, o waḡi en yottinooḡe sadaka faa ngollanen Laamḡo Baabiraado makko oo! Aamiina.

<sup>7</sup> Taykee, omo wara e duule.

Yimḡe fuu njiyan mo,  
fay yuwnooḡe mo 6ee,  
lepi aduna fuu cuḡlan saabe makko.  
Hono non laatorḡoo! Aamiina.

<sup>8</sup> Joomiraado men Laamḡo, gooduḡo, goodunooḡo, garooḡo, Jom Baawḡe oo, wii:

—Miin woni arano, miin woni cakito.

### *No Yuhanna yiiri Almasiihu ana teddiniree*

<sup>9</sup> Miin woni Yuhanna sakiike mon deentuḡo e mon torraaji, deentuḡo e mon laamu Iisaa Almasiihu, e muḡidiḡo e mon muḡal makko. Mi rib-banooma yaade ruunde wiyeteende Patamos saabe ko mbaajii-mi konngol Laamḡo ngol e ko ceedanii-mi Iisaa koo.

<sup>10</sup> E ley Nalaande Joomiraado ndee,\* keew-mi Ruuhu, nan-mi caggal am daande tekkunde no daande buuttal nii <sup>11</sup> ana wiya:

—Ko njiyataa koo, waḡu ḡum dewtere, neldaa nde deente goonḡinḡe jedḡi dee: deental Efeesunkooḡe e deental Simirnankooḡe e deental Pergamenkooḡe e deental Tiyatirankooḡe e deental Sardesankooḡe e deental Filadelfinkooḡe e deental Lawdikiyankooḡe.

<sup>12</sup> Njeeyii-mi yalla miḡo yiya kaalḡoowo e am oo, njii-mi moottilaaji kanḡe jedḡi, <sup>13</sup> nanḡoore nedḡo ana hakkunde majji, ana 6oornii saaya, ana haḡḡi ganḡdilaawol kanḡe e becce mum. <sup>14</sup> Leeḡi hoore makko ana ndawni far no haabu, naa no 6iraadaḡam nii, gite makko ana njaaynira no metangal yiite nii, <sup>15</sup> koyḡe makko ana ḡelkira no jakawalle jalbirta so wadaama e yiite faa woji

\* **1:10** Nalaande Joomiraado ndee woni panḡde alan.

coy nii, kasen duu daande makko ana wa'i no dillere ndiyam keewdam nii. <sup>16</sup>Omo jogii e junngo makko jaamo ngoo koode jeddi, kaafaawi ki banngееji mum didi fuu mbeli ana yalta e hunduko makko, yeeso makko ana delkira no naange jalbirta hakkunde naange nii.

<sup>17</sup>Nde njii-moo-mi ndee, caamu-mi yeeso makko mbaa-mi no maaydo nii. O fawi junngo makko jaamo e am, o wii:

—Pati hul! Miin woni arano, miin woni cakito, <sup>18</sup>miin woni guurdo oo. Mi maayiino, kaa mido nii wuuri faa abada. Miin jogii baawde dow maayde e baawde dow laakaraa. <sup>19</sup>Ndennoo, winndu ko njiyataa koo, dum woni ko wadata jooni koo e ko waroyta caggal mum koo. <sup>20</sup>Anni sirri koode jeddi de njiyataa e junngo am jaamo dee, kanum e moottilaaji kanje jeddi: koode jeddi dee yo malaa'ika'en deente goondinbe jeddi dee, moottilaaji kanje jeddi dii yo deente goondinbe jeddi dee.

## 2

### *Haala bataakiiji faade e deente goondinbe jeddi*

#### *Bataaki faade e Efeesunkoo6e*

<sup>1</sup>—Winndu faade e malaa'ika deental goondinbe won6e Efeesu, mbiyaa: «Anni haalaaji jogiido koode jeddi e junngo mum jaamo, jahoowo hakkunde moottilaaji kanje jeddi:

<sup>2</sup>Mido anndi golleeji maa e mujal maa ley tampere. Mido anndi a hokkataa bon6e bee laawol, a ittii koro innditirtee6e nelaa6e bee a tawii 6e feno6e. <sup>3</sup>A jom mujal, a torraama saabe innde am, dum e taweede yonki maa jawaali. <sup>4</sup>Kaa mido felire dum doo: a yoppii jilli maa di njogino-daa arannde dii. <sup>5</sup>Ndennoo miccitta no ngorruno-daa gila a saamaali. Tuubu, ngolliraa no ngollirno-daa arannde nii! So wanaa dum, so a tuubaali, mi waran e maa mi itta moottila maa e nokku mum.

<sup>6</sup>Kaa mido yarrani maa dum doo: ada waji golleeji jokku6e Nikola no mbajir-mi di nii. <sup>7</sup>Jogiido noppi fuu, yo nanu ko Ruuhu haalanta deente goondinbe dee koo! Jaaliido fuu, mi hokkan dum jaamde 6i66e lekki nguurndam ndariiki e alijenne Laamdo kii.»

#### *Bataaki faade e Simirnankoo6e*

<sup>8</sup>—Winndu faade e malaa'ika deental goondinbe won6e Simirna, mbiyaa: «Anni haalaaji biyeteedo arano e cakito, maaynoodo so wuurti oo:

<sup>9</sup>Mido anndi torra maa e baasal maa, tawee nee a arsukunte. Mido anndi bonno6e innde wiyoo6e e ko'e mum'en 6e Yahuudiyankoo6e tawee 6e nganaa. Ko 6e ngoni dee, 6e deental rewoo6e Ibiliisa. <sup>10</sup>Pati hul torra badiido hewtude ma. Tayka, yoga mon Ibiliisa wedoto dum ley kasu faa tewta seytaade on. On torrete balde sappo. Yo a laato koolniido faa maayde tawe hen, mi hokke teddeengal gondungal e nguurndam nduumiidam.

<sup>11</sup>Jogiido noppi fuu, yo nanu ko Ruuhu haalanta deente goondinbe dee koo! Jaaliido fuu, maayde dido6ere ndee memataa dum fey.»

#### *Bataaki faade e Pergamenkoo6e*

<sup>12</sup>—Winndu faade e malaa'ika deental goondinbe won6e Pergame, mbiyaa:

«Anni haalaaji jogiido kaafaawi ki banngееji mum didi fuu mbeli:

<sup>13</sup>Mido anndi nokku do kodu-daa, do Ibiliisa laamii doo. Ada tiidi e innde am, a yankiraali goondinal maa e am fay wakkati nde Antipas seede am koolniido oo waraa ley mon ndee, dum woni do Ibiliisa hodi doo.

<sup>14</sup> Kaa won pelooje seeda de njogani-maa-mi: ada mujana yimbe wonbe hakkunde mon nanndube e Balaama. Kanko janngini Balaka seytaade Israa'iilankoo6e faa jeena kapum e jaamde tewuuji cakkanaadi tooruji. <sup>15</sup> Nii, jokku6e yimbe Nikola ngorri hakkunde mon, jannde ma66e e golleeji ma66e fuu potu. <sup>16</sup> Ndennoo tuubu, so wanaa dum, mi waran e maa jooni, mi ha6ira e ma66e kaafaawi ngonki e hunduko am kii. <sup>17</sup> Jogiido noppi fuu, yo nanu ko Ruuhu haalanta deente goondinbe dee koo! Jaaliido fuu, mi hokkan dum jaamdu suudiindu wiyeteendu < maanu >, mi hokkan dum kaayel danewel binndaangel innde heyre nde fay gooto anndaa so wanaa dokkaado dum.»

### *Bataaki faade e Tiyatirankoo6e*

<sup>18</sup>—Winndu faade e malaa'ika deental goondinbe wonbe Tiyatira, mbiyaa: «Annii haalaaji Bii Laamdo mo gite mum njalbiru no metangal yiite, mo koyde mum delkirta no jakawalle jarnaado nii:

<sup>19</sup> Mido anndi golleeji maa e jilli maa e goondinal maa e ballal ngal ngadan-daa wob6e, kapum e mujal maa. Mido anndi golleeji maa cakitii dii buri aranndeeji dii heewde. <sup>20</sup> Kaa mido felire dum doo: ada mujana Yesabel, oo debbo biyoowo hoore mum annabaajo. Omo hoomta maccu6e am omo janngina dum'en fijirde e jaamde tewuuji cakkanaadi tooruji. <sup>21</sup> Mi hokkii mo wakkati no mo tuubira, kaa o ja6aali tuubude iwde e fijirde makko ndee. <sup>22</sup> Saabe majjum mi wedoto mo dow leeso naawalla. Fijidoobe e makko 6ee duu, so tuubaali iwde e laawol makko ngol, torrete torraaji mawdi, <sup>23</sup> mi halkan 6i66e makko duu. Deente goondinbe dee fuu annan miin woni ittoowo koro hакkillaa6i e berde, kase duu mi yoban gooto e mon fuu hakke golle mum. <sup>24</sup> Kaa onon Tiyatirankoo6e heddi6e 6e njokkaali ngol laawol 6ee, 6e ngolliraali ko yoga inndirta < sirriiji Ibiliisa luggi >, mido wiya on: walaa donngal gonngal ngal pawan-mi e mon <sup>25</sup> so wanaa yo on tiidu e ko njogi-don koo faa nde ngar-mi fuu. <sup>26-28</sup> Jaaliibe – dum woni wadoobe sago am faa timmoode 6ee – mi hokkan dum'en baawde de ke6u-mi e Baabiraado am dee, faa 6e ndurda jaale6i dii loocol naawngol, 6e pusira di no mahoowo loode fusirta loode nii. Mi hokkan 6e hoodere fajiri ndee duu. <sup>29</sup> Jogiido noppi fuu, yo nanu ko Ruuhu haalanta deente goondinbe dee koo! »

## 3

### *Bataaki faade e Sardesankoo6e*

<sup>1</sup>—Winndu faade e malaa'ika deental goondinbe wonbe Sardes, mbiyaa: «Annii haalaaji jogiido ruuhu6i Laamdo jeddi e koo6e jeddi:

Mido anndi golleeji maa, ada wiyee a guardo, tawee nee a maaydo. <sup>2</sup> Jeerta cemmbindinaa seeda mo njogi-daa oo gila waataali, sabi mi tawaali fay gooto e golleeji maa ana hi66i yeeso Laamdo am. <sup>3</sup> Ndennoo, miccita no ke6ir-daa e no nanir-daa Kabaaru Lobbo oo, tuubu ngolliraa mo. So a jeertaaki, mi wardan no gujo nii, kase duu a anndataa wakkati mo ngaran-mi ma66ude ma. <sup>4</sup> Kaa noo, ada jogii do Sardes doo yimbe 6e tuunninaali kaddule mum'en. Be 6oornotoo kaddule daneeye 6e njaada e am, sabi e6e kaandi hen. <sup>5</sup> Hono non, jaaliido fuu 6oornortoo kaddule daneeye. Abada mi tosataa innde mum e dewtere nguurndam ndee. Mi seedoto omo jeydaa e am yeeso Baabiraado am e malaa'ika'en mum. <sup>6</sup> Jogiido noppi fuu, yo nanu ko Ruuhu haalanta deente goondinbe dee koo!»



*Bataaki faade e Filadelfinkoo6e*

7—Winndu faade e malaa'ika deental goondin6e won6e Filadelfi, mbiyaa: «Annii haalaaji ceniido goongirante, mo cokitirgal Daawuuda kaananke oo woni e junngo mum. So o udditii fay gooto uddataa, so o uddii fay gooto udditataa.

8 Mido anndi gollleeji maa. Tayka, mi udditii damal yeeso maa ngal fay gooto waawaa uddude. Aan e famdude semmbe fuu, a haybii konngol am, a yankiraali innde am. 9 Haya, mi neldete jeyaa6e e deental rewoo6e Ibiliisa wiyoo6e e ko'e mum'en 6e Yahuudiyanloo6e tawee 6e feno6e, 6e nganaa. Mi dooldinan 6e 6e ngara 6e kujidoaya e koyde maa. Nden 6e paaman mi yidii ma. 10 Ko njamir-maa-mi mujaa koo, a mujii sanne. Saabe dum, mi reenete e wakkati nde billaare warata horde aduna faa itta koro yim6e fuu. 11 Mi 6adike warde. Tiidu e ko njogi-daa koo pati fay gooto teeta deesewal maa jaalogal. 12 Jaaliido fuu, mi wadan dum nuygal ley suudu Laamdo am seniindu, o yaltataa e mayru abada. Mi winndan e mum innde Laamdo am e innde ngalluure Laamdo am, dum woni Urusaliima keso iwoowo dow kammu to Laamdo am so jippoo oo, mi winndan e mum innde am heyre ndee. 13 Jogiido noppi fuu, yo nanu ko Ruuhu haalanta deente goondin6e dee koo!»

*Bataaki faade e Lawdikiyankoo6e*

14 —Winndu faade e malaa'ika deental goondin6e won6e Lawdikiya, mbiyaa:

«Annii haalaaji biyeteedo Aamiina oo, seedee koolniido goongirante, layli tagoore ndee fuu:

15 Mido anndi gollleeji maa, a wulaa a 6uu6aa. Yo a laato guldo naa 6uu6udo! 16 Nde wonnoo ada forri a wulaa a 6uu6aa, mi tuttete iwde e hunduko am. 17 Ada wiya: « Mi galo, mi moo6tii jawle, mi hasindinaa e fay huunde. » Tawee nee, a anndaa a jaaddo hoore a jurminiido a baasudo a bumdo a koldo! 18 Mido waaje: soodu e am kanje la66iniraado yiite, yalla ada he6a jawdi, coodaa e am kaddule daneeye 6oorno-daa, yalla ada suura hersa terde maa 6ole dee, coodaa e am nebam nguujaa gite maa yalla jiile maa ana laa6a. 19 Miin, mido fela mido ne'a yim6e 6e njidu-mi. Ndennoo, darana ko moyyi, tuubaa! 20 Hettina, mido nii darii e damal mido salmina. Neddo fuu nando daande am so udditi, mi naatan galle mum, mi jaamda e mum. 21 Jaaliido fuu, mi hokkan dum jooddaade e am dow bimmbeere am laamu, no miin duu njaalorii-mi so njooddii-mi e Baabiraado am dow bimmbeere mum nii. 22 Jogiido noppi fuu, yo nanu ko Ruuhu haalanta deente goondin6e dee koo!»

**4***Haala damal udditiingal dow kammu*

1 Caggal dum, njii-mi damal ana udditii dow kammu. Daande nde nanunoo-mi arannde wa'unde no buututal nii ana haalda e am, ana wiya:

—Nabbu ngaraa doo, faa mi holle ko haani laataade caggal dum doo.

2 Don e don, keew-mi Ruuhu, njii-mi bimmbeere laamu to dow kammu too, neddo gooto ana joodii dow mayre. 3 Joodiido oo, mbaadi mum ana jalbira no haayre yaspa, ana wojjitira no haayre sardis, ciio-ciibongal ana filii bimmbeere ndee ana jalbira no haayre emerooda nii. 4 Bimmbeere ndee, bimmbeeje laamu noogay e nay ana pilii nde, maw6e noogayon e nayon ana njoodii dow majje, ana 6oornii kaddule daneeye, tennaade caniraade

kanje ana e ko'e ma66e. <sup>5</sup> Maje e sawtuuji e gidaali ana njalta e bimmbeere laamu ndee, cunkume jeddi ku66ooje ana yeeso mayre doo, deen ngoni ruuhuuji Laamdo jeddi dii. <sup>6</sup> Ko wa'i hono weendu laa6undu tal nanndundu e timtorgal ana foocii yeeso mayre.

Kudde nay guurde jogiide gite keewde yeeso e caggal fuu, ana hakkunde mayre e sera mayre. <sup>7</sup> Huunde wuurnde aranndeere ndee ana wa'i no rawaandu ladde nii, didobere ndee ana wa'i no ngaari nii, tato6ere ndee, yeeso mum ana wa'i no yeeso neddo nii, nayobere ndee ana wa'i hono no ciilal diwoowal nii. <sup>8</sup> Wootere e kudde nay guurde dee fuu ana jogii biifoole jeegom, wooto fuu ana jogii gite keewde ley e dow fuu. Jemma e jalooma fuu de celataa e yimde, ede mbiya:

«Ceniido, Ceniido, Ceniido

yo Joomiraado Laamdo Jom Baawde,  
goodunoodo, goodudo, garoowo oo!»

<sup>9</sup> Kudde nay guurde dee ana njimana joodiido dow bimmbeere laamu, guurdo faa abada oo, jime teddungal e darja e jettooje. <sup>10</sup> Nde 6e ngadata dum fuu, maw6e noogayon e nayon 6ee kippoto e leydi yeeso joodiido e bimmbeere oo, cujidana guurdo faa abada oo, njoyyina tenngaade mum'en yeeso bimmbeere ndee, mbiya:

<sup>11</sup> «Joomiraado amen, Laamdo amen,  
aan haandi e hebude darja e teddungal e baawde,  
sabi aan tagi kulle dee fuu  
e muuyde maa de laatorii, de tagiraa.»

## 5

### *Haala dewtere Laamdo e kaando udditinde nde*

<sup>1</sup> Caggal dum, njii-mi e junngo jaamo joodiido dow bimmbeere laamu ndee oo dewtere nde dow mum e ley mum winndaa, uddiraande pedoode jeddi maandude. <sup>2</sup> Non njii-mi malaa'ika jom semmbe ana ooynoo e daande toownde, ana wiya:

—Homo haandi e fettude pedoode dee uddita dewtere ndee?

<sup>3</sup> Fay gooto walaa dow kammu walaa dow leydi walaa ley leydi kaando udditidde dewtere ndee naa yeewde ley mayre. <sup>4</sup> Ngullu-mi gullaali cattudi, sabi he6aaka kaando udditidde dewtere ndee naa yeewde ko woni e mayre.

<sup>5</sup> Non gooto e maw6e 6ee wii kam:

—Pati woy! Rawaandu ladde haliindu jeyaandu e suudu baaba Yahuuda nduu, iwndu e Daawuuda nduu, jaalike. Endu waawi fettude pedoode jeddi dee, ndu uddita dewtere ndee.

<sup>6</sup> Nden njii-mi Njawdiri ana darii hakkunde bimmbeere ndee, kudde nay guurde dee e maw6e 6ee ana pilii ndi. Endi nanndi e kirsanoondi. Endi jogii luwe jeddi e gite jeddi, dum woni ruuhuuji Laamdo jeddi neleteedi e aduna oo fuu dii. <sup>7</sup> Ndi yehi nanngoyde dewtere ndee e jaamo joodiido dow bimmbeere ndee oo. <sup>8</sup> Ko ndi nanngi dewtere ndee koo, kudde nay guurde dee e maw6e noogayon e nayon 6ee cujidi yeeso mayri. Gooto e ma66e fuu ana jogii hoddu e urdude kanjeere heewnde uurdi, dum woni duwaawuujii seniibe 6ee. <sup>9</sup> Hedde e6e njima jimol kesol e6e mbiya e maggol:

«Aan haani 6amde dewtere ndee

pettaa pedoode mayre,

sabi a hirsanooma,

a soottitanike Laamdo yim6e

e suudu baaba fuu e demngal fuu e jaalepol fuu e lepol fuu,

yiiyam maa coottitori-daa 6e,  
yalla e6e tawdee e Laamdo.

<sup>10</sup> A wadii 6e kaanankoo6e e yottinoo6e sadaka Laamdo meeden oo,  
6e laamoo aduna oo.»

<sup>11</sup> E ley holleede am, nan-mi daade malaa'ika'en heew6e, ujunaaji ujunaaji.  
E6e pili bimmbeere ndee e kudde guurde dee e maw6e 6ee, <sup>12</sup> e6e njima e6e  
toowna daade ma66e:

«Njawdiri kirsanoondi ndii  
ana haandi e he6ude baawde e jawdi  
e hakkilantaaku e semmbe  
e teddungal e darja e jettooje!»

<sup>13</sup> Non nan-mi huunde fuu ko tagaa ko woni dow kammu e ko woni dow leydi  
e ko woni ley leydi e ko woni dow geeci e ko woni e mum'en fuu, ana wiya:

«Jettooje e teddungal e darja e baawde  
ngoodanii joodiido dow bimmbeere ndee oo  
e Njawdiri ndii faa abada!»

<sup>14</sup> Kudde nay guurde dee njaabii:  
—Aamiina!

Maw6e 6ee duu, kippii e leydi kujidani 6e.

## 6

### *Pedoode jeddi*

#### *Haala fettugol fedoode arandeere: jaalogal*

<sup>1</sup> Oon wakkati, yeew-mi non njii-mi Njawdiri ndii fettii wootere e pedoode  
jeddi dee. Nan-mi wootere e kudde nay guurde dee ana iidina daande mum  
no gidaango nii, ana wiya:

—War gaa!

<sup>2</sup> Yeew-mi, njii-mi puccu daneejo. Baddiido mo oo ana jogii laajjal, o hokkaa  
tenngaade laamu, o yaari no jaalotoodo nii o jaaloto duu.

#### *Haala fettugol fedoode didobere: barondiral*

<sup>3</sup> Nde Njawdiri ndii fettunoo fedoode didobere ndee, nan-mi huunde  
didobere ndee ana wiya:

—War gaa!

<sup>4</sup> Non puccu goddo boddejo yalti. Baddiido mo oo hokkaa kaafaawi mawki,  
o hokkaa baawde yalla omo itta jam e aduna oo, faa yim6e mbarondira.

#### *Haala fettugol fedoode tatobere: tiidalla*

<sup>5</sup> Nde Njawdiri ndii fettunoo fedoode tatobere ndee, nan-mi huunde  
wuurnde tatobere ndee ana wiya:

—War gaa!

Njii-mi puccu 6aleejo. Baddiido mo oo ana jogii peesorgal e junngo mum.

<sup>6</sup> Nan-mi ko wa'i no daande neddo iwii hakkunde kudde nay guurde dee, ana  
wiya:

—Munnabi alkama naa munnabiije tati gawri waarata e njo6di golle  
jalooma. Kaa pati mursee nebam dam e peguujam dam.

#### *Haala fettugol fedoode nayobere: maayde*

<sup>7</sup> Nde Njawdiri ndii fettunoo fedoode nayobere ndee, nan-mi daande  
huunde wuurnde nayobere ndee, ana wiya:

—War gaa!

<sup>8</sup>Yeew-mi, njii-mi puccu oolo. Badđiido mo oo ana wiyee Maayde, laakaraa ana jokki e makko. Be ndokkaa baawde dow nayoɓere aduna oo faa 6e mbarda yim6e kaafaawi e yolbere e albalaawuujj e daabaaji ladde.

*Haala fettugol fedoode joyoɓere: wardaabe saabe seedaaku mum'en*

<sup>9</sup>Nde Njawdiri ndii fettunoo fedoode joyoɓere ndee, njii-mi to ley ittirde sadaka too yonkiiji wardanoobe saabe konngol Laamdo ngol e seedaaku mo 6e ceettii oo. <sup>10</sup>Be eewnii faa toowi, 6e mbii:

—Joomiraado ceniido goongirante, faa mande ndoomu-daa sarde yim6e won6e e aduna oo 6ee faa njobto-daa yiyyam amen dam?

<sup>11</sup>Gooto e ma66e fuu hokkaa saaya ndaneewa, 6e mbiyaa 6e powta seeda tafon, faa adadu sakiraabe ma66e, gollidii6e ma66e fodanaabe wareede no ma66e nii 6ee, ki66a.

*Haala fettugol fedoode jeegobere: jalooma mawdo*

<sup>12</sup>Nden njii-mi Njawdiri ndii fettii fedoode jeegobere ndee. Non leydi dimmbii dimmbagol manngol, naange ngee ɓawliri no kaasa ɓaleewa nii, lewru nduu fuu wojjiri no yiyyam nii, <sup>13</sup>koode kammu dee caami e leydi no 6i66e ibbe kecce caamirra so henndu mawndu wibbii. <sup>14</sup>Kammu oo iwi, taggiraa no daago taggirtee nii, kaaye e duude fuu doofaa iwde e nokkuuje mum'en. <sup>15</sup>Nden kaanankoo6e aduna e yim6e teddu6e e hooree6e sordaasi'en e arsukunte'en e jom'en semmbe e rim6e e riimay6e fuu cuudii e loowi kaaye, kaɓum e hakkunde kaaye. <sup>16</sup>Hedde e6e mbiya loowi kaaye dii e kaaye dee:

—Caamee e amen! Cuuɗon min e gite joodiido dow bimmeere laamu ndee oo, kaɓum e tikkere Njawdiri ndii! <sup>17</sup>Sabi jalooma mawdo tikkere ma66e ndee yottiima, homo waawi dadude?

## 7

*Haala yim6e 144 000 wadaabe maande Laamdo*

<sup>1</sup>Caggal dum, njii-mi malaa'ika'en nayon ana ndarii e paale nay dee. Be cakkii kenuuli aduna nay dii, pati mbifa wanaa e leydi wanaa e geeci wanaa fay e lekki. <sup>2</sup>Njii-mi kasen malaa'ika goddo iwruɗo funnaange ana jogii gadirgal maande Laamdo guurɗo oo ngal. O eewnii daande toownde faade e malaa'ika'en nayon hokkaa6e baawde torrude leydi e geeci. <sup>3</sup>O wii 6e:

—Pati mbonnee leydi ndii e geeci oo e ledde dee tafon, faa nde keɓu-den wadude maandeeji e tiide maccu6e Laamdo meeden 6ee.

<sup>4</sup>Non nan-mi adadu wadaabe maande e dow tiide mum'en 6ee: e6e mbaara e ujunaaji teemedere e ujunaaji capande nayon e ujunaaji nayon (144 000) iw6e e cuudi Israa'iilankoo6e 6ee dii fuu:

<sup>5</sup>iw6e e Yahuuda yo ujunaaji sappo e didon (12 000),

iw6e e Ruuben, ujunaaji sappo e didon (12 000),

iw6e e Gada, ujunaaji sappo e didon (12 000),

<sup>6</sup>iw6e e Asiira, ujunaaji sappo e didon (12 000),

iw6e e Naftali, ujunaaji sappo e didon (12 000),

iw6e e Manaasa, ujunaaji sappo e didon (12 000),

<sup>7</sup>iw6e e Simeyon, ujunaaji sappo e didon (12 000),

iw6e e Lewi, ujunaaji sappo e didon (12 000),

iw6e e Isakar, ujunaaji sappo e didon (12 000),

<sup>8</sup>iw6e e Jebulon, ujunaaji sappo e didon (12 000),

iw6e e Yuusufu, ujunaaji sappo e didon (12 000),

iw6e e Benjamin duu, ujunaaji sappo e didon (12 000),  
cuudi baaba dii fuu ngadanaama maande.

### *No yimbe leni fuu njettirta Laamdo*

<sup>9</sup> Caggal dum, yeew-mi, njii-mi jamaa keewdo mo limataako iwdo e yimbe lenol fuu e suudu baaba fuu e jaalenol fuu e demngal fuu ana darii yeeso bimmeere laamu ndee e Njawdiri ndii. E6e boornii saayaaji daneeki, ca6e tamarooje ana e juude ma66e. <sup>10</sup> E6e ilina, e6e mbiya:

—Kisindam dam to Laamdo men joodiido dow bimmeere laamu ndee iwraata, kaɗum e Njawdiri ndii.

<sup>11</sup> Malaa'ika'en 6ee fuu pili bimmeere ndee, maw6e 6ee e kudde nay guurde dee fuu kippii e leydi ana cujidana Laamdo, <sup>12</sup> ana mbiya:  
«Aamiina!

Jettooje e darja e hakkilantaaku e jaarooje  
e teddungal e baawde e semmbe,

fuu ngoodanii Laamdo meeden faa abada!»

<sup>13</sup> Non gooto e maw6e 6ee lamndii kam:

—Ho6e ngoni 6ee yimbe boornii6e saayaaji daneeki? Hoto 6e iwi?

<sup>14</sup> Mbii-moo-mi:

—Moobbo, aan woni anndudo.

O ja66itii o wii kam:

—Kam6e ngoni iw6e e torra mawdo tawi e6e ndeenii. Be loonnii saayaaji ma66e, 6e ndawninirii dum'en yiyam Njawdiri ndii.\* <sup>15</sup> Dum saabii so 6e keddoto yeeso bimmeere laamu Laamdo ndee, 6e ndewa mo jemma e jalooma ley suudu makko seniindu nduu, kasen duu, joodiido e bimmeere laamu ndee oo huuran e ma66e hukkum mum. <sup>16</sup> Be njolbataa, 6e domdataa, naange tappataa 6e, fay nguleefi ngooti yottataako 6e. <sup>17</sup> Sabi Njawdiri ngonndi e hakkunde bimmeere laamu ndii duran 6e, juurna 6e e cewle ndiyam ndokkoojam nguurndam. Laamdo soccan gondi gite ma66e fuu.

## 8

### *Haala fettugol fedoode jeddobere: deyyere mawnde*

<sup>1</sup> Nde Njawdiri ndii fettunoo fedoode jeddobere ndee, kammu oo deyyinii teen ko waarata e feccere leer. <sup>2</sup> Non njii-mi malaa'ika'en njeddon darii6e yeeso Laamdo 6ee ndokkaama buutute jeddi.

<sup>3</sup> Malaa'ika goddo jogiido urdude kanjeere daroyii banngge ittirde sadaka. O hokkaa uurdi keewndi faa o sakkodoo dum e duwaawuuji seniibe, o yottina di dow ittirde sadaka kanjeere wonnde yeeso bimmeere laamu ndee. <sup>4</sup> Cuurki uurdi ndii njabbidi e duwaawuuji seniibe 6ee iwde e junngo malaa'ika dariido yeeso Laamdo oo. <sup>5</sup> Malaa'ika oo 6ami urdude ndee, hebbini nde yiite e ley ittirde sadaka ndee, wedii nde e leydi. Non gidaali e dillereeki ngadi, maje maji, kasen leydi dimmbii.

### *Buutute jeddi*

<sup>6</sup> Caggal dum, malaa'ika'en njeddon jogiibe buutute jeddi 6ee lanndinonii fuufude de.

### *Haala buututal arandeewal*

\* **7:14** Maanaa 6e ndawninirii saayaaji ma66e yiyam, dum woni luutti ma66e fuu njaafaama.

<sup>7</sup> Malaa'ika arano oo fuufi buututal mum, non malumaluuje e yiite jillondi-raange e yiyam mbedaa e leydi ndii. Feccere tatoɓere leydi ndii sumi, feccere tatoɓere ledde dee sumi, kasen duu hudo hecco koo fuu sumi.

### *Haala buututal didoɓal*

<sup>8</sup> Malaa'ika didaɓo oo fuufi buututal mum, non ko wa'i no waamnde haayre huɓoore nii wedaa e ley geeci. Tatoɓere geeci oo laatii yiyam, <sup>9</sup> tatoɓere kudde guurde gonde e geeci dee mbaati, tatoɓere laanaaji ndiyam dii kalkii.

### *Haala buututal tatoɓal*

<sup>10</sup> Malaa'ika tataɓo oo fuufi buututal mum, non koodal manngal kuɓɓiirawal no cunkumal nii iwi dow kammu oo, saami e tatoɓere maaje kaɗum e cewle ndiyam. <sup>11</sup> Ngal koodal «Kaadeefi» wiyetee. Ngal haadiniii tatoɓere ndiyameeji dii kati, yimɓe heewɓe maayi saabe diin ndiyameeji kaadufi.

### *Haala buututal nqyoɓal*

<sup>12</sup> Malaa'ika nayaɓo oo fuufi buututal mum, non tatoɓere naange e tatoɓere lewru e tatoɓere koode piyaa, faa gootel hen fuu tatoɓere mum niɓɓa, jemma e jalooma fuu mbaasa tatoɓere fooyre mum'en.

<sup>13</sup> Caggal dum, njii-mi ciilal ana diwa dow mbeeyu, nan-mi engal eewnoo e daande toownde engal wiya:

—Yoo yoy! Yoo yoy! Bone woodanii yimɓe aduna nde malaa'ika'en taton heddiɓe ɓee puufii buutute mum'en!

## 9

### *Haala buututal joyoɓal*

<sup>1</sup> Malaa'ika joyaɓo oo fuufi buututal mum, non njii-mi hoodere iwii dow kammu saamii e leydi. Nde hokkaa cokitirgal ɓunndu ndu luggeefi mum walaa do haadi nduu. <sup>2</sup> Nde sotti ɓunndu nduu, non cuurki yalti e mayru no wuriya mawdo nii, ki niɓɓini naange e mbeeyu fuu. <sup>3</sup> Buureeti njalti e cuurki kii caakii e leydi, ndokkaa baawde torrude no jahe nii. <sup>4</sup> Di njamiraa pati di mbonna wanaa hudo wanaa ledde wanaa huunde fuu ko fudata e leydi, di torra yimɓe ɓe maande Laamdo walaa e tiide mum'en ɓee tan. <sup>5</sup> Di ndokkaa torrude ɓee yimɓe faa naawa lebbi joy, kaa di ndokkaaka warde ɓe. Torra majji ana wa'i hono naawalla nde yaare fidii neddo nii. <sup>6</sup> Ley diin lebbi, yimɓe muuyan maayde kebataa, yimɓe poodanto maayde, nde dogo dum'en.

<sup>7</sup> Diin buureeti ana nanndi e pucci lanndinaniidi wolde. Ko wa'i no tennaade capiraade kanje nii ana e ko'e majji, yeesooji majji ana mba'i no yeesooji yimɓe nii. <sup>8</sup> Edi njogii leeɓi mbaadi no cukuli rewɓe nii, niye majji ana mba'i no niye dawaadi ladde nii. <sup>9</sup> Ko wa'i no ganndeeje jamde nii ana e becce majji, soyfa biifoole majji ana wa'i hono no wotorooji keewdi kaɓɓaadi e pucci doganooji wolde nii. <sup>10</sup> Edi njogii lace jogiide kure no jahe nii, edi njogii yamiroore torrirde yimɓe lace majji dee hakke lebbi joy. <sup>11</sup> Kaananke majji yo malaa'ika kawjotoodo ɓunndu ndu luggeefi mum walaa do haadi oo. Innde makko e ibaraninkoore Abaddon, e ley yunaninkoore Apolliyon, dum woni kalkoowo.

<sup>12</sup> Bone arano oo ɓettike. Tayka, boneeji didi ana ngara caggal makko kasen.

### *Haala buututal jeegobal*

<sup>13</sup> Malaa'ika jeegaḅo oo fuufi buututal mum, non nan-mi daande iwrii kam to luwe nay gonḁe e coḅḅuli ittirde sadaka kanḅeere wonnde yeeso Laamḁo ndee, <sup>14</sup> ana wiya malaa'ika jeegaḅo jogiḁo buututal oo:

—Yoppitin malaa'ika'en nayon haḅḅaaḅe to maayo manngo wiyeteengo Efarata.

<sup>15</sup> Laamḁo fodii yoppitingol malaa'ika'en nayon ḅee ndee hitaande e nduu lewru e oo jalooma e oo wakkati jaati faa ḅe lanndinoo warde tatoḅere yimḅe. <sup>16</sup> Mi nanii adadu konunkooḅe waddiiḅe pucci: ḅe ujunaaji noogay cili ujunaaji sappo. <sup>17</sup> Annii no njiiru-mi pucci ḁii e waddiiḅe ḅee e ley holleede am: eḅe ḅoornii kaddude jamḁe ḅoḁeeje nanndude e yiite, kaḅum e bula-bulaaje e oole nanndude e sitti. Ko'e pucci ḁii ana wa'i no ko'e dawaadi ladde nii, yiite e cuurki e sitti ana njalta e kundude majji. <sup>18</sup> ḁii balaawuujii tati, ḁum woni yiite nḅee e cuurki kii e sitti oo, njalti e kundude pucci ḁii so mbari tatoḅere yimḅe. <sup>19</sup> Sabi semmbe pucci ḁii ana e kundude mum'en, ana fay e lace majji duu. Lace majji ḁee ana nanndi e ḅoggi leydi, ede njogii ko'e, ḁeen ko'e di ngaajirta yimḅe.

<sup>20</sup> Heddiḅe ana nguuri caggal ḁiin balaawuujii ḅee ana keddi tuubaali e kulle ḁe ngolliri juude mum'en ḁee, ḅe njoppaali sujidande seyḁaani'en, kaḅum e tooruujii kanḅe e kaalisi e jakawalle e kaaye e ledḁe. Eḅe kujidana ḁiin tooruujii ḁi njiyataa, nanataa, ndillintaako. <sup>21</sup> Be tuubaali iwde e war-hoore e mḅoḅbaaku e fijirde e nguuka.

## 10

### *Haala malaa'ika jogiḁo dewtel*

<sup>1</sup> Caggal ḁum, njii-mi malaa'ika godḁo jom semmbe ana iwa dow kammu ana jippoo. Omo ḅoornii luurde, ciḁo-ciḁongal ana tiimti hoore makko, yeeso makko ana ḁelkira no naange jalbirta nii, korre makko ana mba'i no looci yiite nii. <sup>2</sup> Omo jogii e junngo makko dewtel udditiingel. O darni koyngal makko jaamal dow geeci, o darni nanal dow njoorndi, <sup>3</sup> o eewnii daande toownde no rawaandu ladde uggiirta nii. Nde o eewnii ndee, gidaali jeddi njaabii. <sup>4</sup> Nde gidaali jeddi ḁii tilinoo haalde ndee, kosu-mi winndude, non nan-mi daande iwrii kam dow kammu, ana wiya kam:

—Pati winndu ko gidaali jeddi ḁii mbii koo, yo laato kumpa!

<sup>5</sup> Non malaa'ika mo njii-mi ana darii e geeci kaḅum e njoorndi oo hunci junngo mum jaamo faa toowi, <sup>6</sup> hunorii Guurḁo duumiiḁo faa abada, taguḁo kammu e ko woni e mum, taguḁo leydi e geeci e ko woni e mum'en. Malaa'ika oo wii:

—Booyataa hankasen! <sup>7</sup> Kaa e ley balde ḁe buututal malaa'ika jedḁaḅo ngal fuufata ḁee, Laamḁo tabintinan anniya mum cuudinoḁo. ḁum laatoro no o haalanirnoo annabaaḅe gollanoḁe mo ḅee nii.

<sup>8</sup> Non daande iwrunoonde kam dow kammu ndee wii kam kasen:

—Yaa ḅamoy dewtel udditiingel gonngel e junngo malaa'ika dariiḁo e geeci e njoorndi oo.

<sup>9</sup> Njaa-mi to malaa'ika oo, mbii-mi ḁum hokka kam dewtel ngel. O wii kam:

—Bamu ngel moḁaa ngel! Ngel welan e hunduko maa no njuumri nii, kaa ngel wulnan reedu maa taw.

<sup>10</sup> Nanngu-mi dewtel ngel e junngo malaa'ika oo, moḁu-mi ngel. Ngel weliri e hunduko am no njuumri nii, kaa reedu am wuli taw!

<sup>11</sup> Caggal ḁum, mbiyaa-mi:

—Ana tilsi mbaajo-ḁaa ko Laamḁo loowi e maa koo kasen e jaalepi keewḁi e lepi keewḁi e ḁemḁe keewḁe e kaanankooḅe heewḅe.

## 11

*Haala seedaaku annabaabe didon*

<sup>1</sup>Ndokkaa-mi kudol eenndirgol, wiya:

—Imma, eenndoy suudu Laamdo seniindu nduu e ittirde sadaka ndee, kiiso-daa rewoobe wonbe hen bee, <sup>2</sup>kaa pati eenndu daalaare mayru ndee, sabi nde hokkaama heeferbe bee. Be nja66an ngeenndi ceniindi ndii ko waarata e lebhi capande nay e didi. <sup>3</sup>Mi nelayan seedee'en am didon bee, be foornoyto licce caakuuji,\* be mbaajoyto ko Laamdo loowi be koo hakke balde ujunere e teemedede didi e capande jeegom.

<sup>4</sup>Been seedee'en didon ngoni jaytuunaaje didi e moottilaaji didi dariidi yeeso Joomiraado jom aduna oo. <sup>5</sup>Gapo fuu muuydo torrude be, yiite yaltoyan e kundude annabaabe bee halka dum. Muuydo torrude be, waajibi halkiree non. <sup>6</sup>E6e njogii yamiroore hadude kammu to6ude e ley balde de be mbaajotoo konngol Laamdo ngol e mum dee. E6e njogii yamiroore waylitinde ndiyameeji laatoo yiyyam, kasen duu e6e mbaawi jippinde e aduna oo sii balaawu fuu nde be muuyi fuu.

<sup>7</sup>Nde didon bee tilii e seedaaku mum'en oo fuu, taktakol jeyaangol e 6unndu ndu luggeefi mum walaa do haadi nduu yaltan yana e ma66e, jaaloo be, wara be. <sup>8</sup>Tewuuji ma66e ngona e daalaare ngalluure mawnde, do Joomiraado ma66e fejanoo e leggal bardugal doo. Nden ngalluure ana nanndi e Sodooma† naa Misira. <sup>9</sup>Yimbe jaalepi fuu e cuudi baaba fuu e demde fuu e lepi fuu njiyan tewuuji ma66e ko waarata e jaloomaaji tati e feccere jalooma, fay gooto be ndunantaako ira di ley yanaande. <sup>10</sup>Wonbe e aduna oo bee fuu mbeltoto e maayde ma66e ndee, faa wa'ana dum'en no iidi nii, hedde e6e ndokkondira dow weltaare. Sabi annabaabe didon bee torriino be sanne. <sup>11</sup>Kaa caggal jaloomaaji tati e feccere dii, fuufaango nguurndam iwngo to Laamdo naati e ma66e, non be immitii be ndarii e koyde ma66e. Kulol manngol nanngi yiyannoo6e be bee fuu. <sup>12</sup>Daande toownde iwri be dow kammu, ana wiya be:

—Nabbee gaa!

Be njabbi dow kammu e ley lurde, way6e ma66e fuu keddii ana yeewa be. <sup>13</sup>E oon wakkati, leydi dimmbii semmbe wurjini sappo6ere ngalluure ndee. Ujunaaji jeddi neddo halkii hen, heddiibe bee kuli, njabani Laamdo Jom kammu oo teddeengal.

<sup>14</sup>Tayka, bone dida6o oo yawtii, bone tata6o oo ana wara 6ooyataa.

*Haala buututal jeddo6al*

<sup>15</sup>Malaa'ika jedda6o oo fuufi buututal mum, daade toowde nanaa dow kammu, ana mbiya:

—Laamuuji aduna oo fuu laatike laamu Joomiraado men kapum e Almasi-ihu mum. O laamoto faa abada!

<sup>16</sup>Maw6e noogayon e nayon joodiibe dow bimbbeeje yeeso Laamdo bee kippii e leydi, kujidani Laamdo, <sup>17</sup>ana mbiya:

«Miden njette, Joomiraado Laamdo Jom Baawde,  
goodudo goodunoodo oo miden njette,  
sabi a gollirii baawde maa mawde dee,  
a tabintinii laamu maa.

<sup>18</sup>Heeferbe bee yo tikku6e,

\* **11:3** Maanaa be foornoo licce caakuuji woni hollude sunu hono rew6e foornotoo6e kaddule cuddu nii. † **11:8** Sodooma yo ngootiri e geelle didi de Laamdo halki saabe heewgol majje luutti. Yeew Puddoode 19.1-29



kaa tikkere maa aan warii,  
wakkati mo carataa maay6e yonii,  
wakkati warii, mo barjoto-ɗaa annabaa6e gollanoo6e ma 6ee,  
senii6e hul6e innde maa 6ee,  
teddu6e e lo'ube fuu,  
e wakkati mo kalkataa bonnoo6e leydi 6ee.»

<sup>19</sup> Suudu Laamɗo seniindu wonndu dow kammu nduu udditaa, keesuwal aadi ngal 6anngi e ley mayru. Maje maji, dillerejeji e gidaali ngadi, leydi dimmbii, malumaluuje butte caami.

## 12

### *No kuungal waddi e debbo ɗaywudo*

<sup>1</sup> Taagumansa kaayniido 6anngi dow kammu, ɗum woni debbo 6oorniido naange ana fawi koyde mum e lewru ana filkii pilkol koode sappo e didi. <sup>2</sup> O haamili, omo wulla saabe tampere e naawalla ɗatawere. <sup>3</sup> Taagumansa godɗo 6anngi dow kammu, ɗum woni kuungal boɗewal manngal nanndungal e mboddi. Engal jogii ko'e jeddi e luwe sappo, hoore fuu ana jogii tenngaade laamu. <sup>4</sup> Laaci maggal wuuwi tato6ere koode kammu, wedii ɗum e leydi. Ngal darii yeeso debbo ɗaywudo oo faa ngal moda biyiiko nde o rimii ɗum.

<sup>5</sup> Non o rimi 6idɗo gorko. Oon woni durdoowo lepi dii fuu loocol naawngol. Bidɗo oo diwtaa faade to Laamɗo e bimmeere mum laamu. <sup>6</sup> Debbo oo dogi yehi ley ladde, nokku ɗo Laamɗo moyyinannoo ɗum. O hayboyaa ton balde ujunere e teemedede didi e capande jeegom (1 260).

<sup>7</sup> Wolde wadi to dow kammu too. Malaa'ika biyeteedo Miikaa'iilu e malaa'ika'en mum ka6i e kuungal ngal e malaa'ika'en mum, <sup>8</sup> ngal jaalaa, kanngal e malaa'ika'en maggal, 6e mursi nokku ma66e gondo dow kammu too oo. <sup>9</sup> Ngal kuungal manngal nanndungal e mboddi ribbaama. Kanngal woni mboddi aranndeeri mbiyeteendi Ibiliisa naa Seydaani, ceytotoondi aduna oo fuu ndii. Ndi wedaama e leydi, kayri e malaa'ika'en mayri fuu.

<sup>10</sup> Non daande toownde iwri kam dow kammu, ana wiya:

«Jooni kisindam ɗam wari!

Jooni semmbe e Laamu Laamɗo meeden ngari,

laamu ana e hawju Almasiihu.

Sabi kalmotoodo sakiraa6e meeden,

kalmotoodo 6e to Laamɗo jemma e ɗalooma oo,

ribbaama iwde dow kammu.

<sup>11</sup> Sakiraa6e men 6ee libii mo saabe yiyam Njawdiri ndii,

kanum e dow haala seedaaku ma66e,

6e cubaaki nguurndam ma66e e dow maayde.

<sup>12</sup> Saabe ɗum, kammu e hoɗu6e e mum fuu mbeltee!

Kaa leydi e geeci, bone woodanii on!

Sabi Ibiliisa jippiima e mon ana tikki tikkere mawnde,

sabi ana anndi wakkati seeda heddani ɗum.»

<sup>13</sup> Nde kuungal manngal nanndungal e mboddi ngal anndunoo wedaama e leydi ndee, ngal jokkitii debbo dimɗo 6idɗo gorko oo. <sup>14</sup> Debbo oo hokkaa biifoole ciilal manngal, faa mo diwira faade to nokku mo o moyyinanaa ley ladde oo, ɗo o haybetee hakke duubi tati e feccere, faa o reenoo e mboddi ndii. <sup>15</sup> Kuungal manngal ngal siryi ndiyam, ɗam ilii caggal debbo oo no maayo nii faa ɗam na6a mo. <sup>16</sup> Kaa noo, leydi ndii faabii debbo oo, ndi aari hunduko mayri, ndi modi ndiyam ɗam kuungal ngal siryi ɗam. <sup>17</sup> Kuungal manngal ngal tikkani debbo oo sanne, yehi ha6oyde e ko heddii e iwdi debbo

oo koo, dum woni dɔwtaniibe jamirooje Laamdo so tiidi e seettanaade Iisaa.  
 18 Non Kuungal ngal\* darii e njaareendi danjeere geeci oo.

## 13

### *Haala taktakol iwngol ley geeci*

1 Caggal dum, njii-mi taktakol jogiingol luwe sappo e ko'e jeddi ana yeeja iwde e geeci oo. Hooore fuu ana jogii tenngaade laamu. Inde bonkorde Laamdo ana mbinndaa e ko'e dee fuu. 2 Taktakol ngol njii-mi ngol ana nanndi e ndobu, koyde maggol ana wa'i no koyde taktakol mbiyeteengol ursa\* ngol nii, hunduko maggol ana wa'i no hunduko rawaandu ladde nii. Kuungal nanndungal e mboddi ngal hokki ngol baawde mum, bimmbeere mum laamu ndee, e baawde laamaade. 3 Hooore wootere e ko'e taktakol ngol ana wa'i hono ko barminanoo barmere waawnoonde warde dum, kaa barmere ndee sellinaama, faa dum haayinii wonbe e aduna oo bee fuu, be njokki e maggol. 4 Be kujidani kuungal ngal sabi ngal hokkii taktakol ngol baawde maggal laamaade. Kasen duu, be kujidani taktakol ngol, ebe mbiya: —Homo nanndi e taktakol ngol? Homo waawi haude e maggol?

5 Taktakol ngol hokkaa haalde haalaaji mantordi bonkotoodi Laamdo, ngol hokkaa baawde laamaade lebbi capande nay e didi. 6 Ngol fuddi bonkaade Laamdo, engol bonkoo innde makko ndee, kaju e hodorde makko, dum woni be hodorde mum'en woni dow kammu too bee. 7 Ngol hokkaa baawde haude e seniiibe bee, ngol jaaloo dum'en. Ngol hokkaa baawde laamaade suudu baaba fuu e jaalepol fuu e demngal fuu e lepol fuu. 8 Yimbe wonbe e aduna oo bee fuu kujidanani taktakol ngol, dum woni neddo fuu mo innde mum tawaaka ana winndii gila e diidugol aduna oo e ley dewtere nguurndam ndee, dewtere Njawdiri kirsanoondi ndii.

9 Jogiido noppi fuu, yo nanu! 10 Neddo fuu podanaado haabee so nabee, haabete nabee. Neddo fuu podanaado wardeede kaafaawi, wardete kaafaawi. Dum nee, waajibi yimbe Laamdo bee tawree mujal e hoolaare.

### *Haala taktakol iwngol e leydi*

11 Caggal dum, njii-mi taktakol gonngol ana yalta e ley leydi. Engol jogii luwe didi nanndude e luwe bii-mbaalu, kaa engol haaldannoo hono no kuungal nanndungal e mboddi ngal nii. 12 Ngol golliri baawde taktakol arandeewol ngol barmere mum hosunoo warde dum so sellinaa ngol, fuu e dow yamiroore mum. Ngol dooldini yimbe aduna bee kujidana ngol. 13 Taktakol didaɓol ngol wadii kaayeeffiji mawdi, ɓamii faa ngol jippini yiite iwde dow kammu faa yottii leydi, yimbe fuu ana yeewa. 14 Ngol yonjiri yimbe aduna kaayde de ngol hokkaa wadude e dow yamiroore taktakol arandeewol ngol. Engol tinndina yimbe aduna moyyina tooru nanndundu e taktakol barminiranoongol kaafaawi faa hosi waatude kaa ana wuuri ngol. 15 Ngol hokkaa baawde ngol wada yonki e tooru nduu faa ndu watti haalde e wadude faa neddo fuu mo sujidanaali ndu waree. 16-17 Taktakol ngol dooldini yimbe fuu yo kebu maande e juude mum'en jaame naa e tiide mum'en, yalla teddube e lo'ube, arsukunte'en e misikiina'en, rimbe e riimaybe, fuu ana ndonka soodude e soottude so tawraaka maande ndee. Maande ndee yo innde taktakol ngol naa limre innde maggol. 18 Do kaan-daa faamude

\* 12:18 Kuungal ngal darii... E dereeji ɓooydi dii, yoga mbii: Ndarii-mi e njaareendi danjeere geeci oo. \* 13:2 Ursa yo taktakol manngol, takkere maggol ana mawni, engol jogii leebi e koolde mawde.

doo annii: neddo fuu jom hakkille waawan faamude limre taktakol ngol, sabi limre ndee ana hawra e loomto innde neddo. Limre mayre yo teemedé jeegom e capande jeegom e jeegom (666).

## 14

### *Haala jimol soottitanoobe bee, kaḡum e njawdiri ndii*

<sup>1</sup>Yeew-mi, njii-mi Njawdiri ana darii dow haayre Siyona ana wondi e yimbe ujunaaji teemedere e capande nay e nayon (144 000), be innde mayri e innde Baabiraado mayri mbinndaa e tiide mum'en. <sup>2</sup>Nan-mi daande iwrii kam dow kammu wa'unde no dillere ndiyam keewdam nii, no gidaango manngo nii. Daande nde nan-mi ndee ana wa'i no dillere fiyooḡe kolli mum'en nii. <sup>3</sup>Been yimbe fuu ana njima jimol kesol yeeso bimmbeere Laamdo ndee e yeeso kudde nay guurde dee e yeeso mawbe bee. Fay gooto waawaano ekkitaade jimol ngol so wanaa yimbe ujunaaji teemedere e capande nay e nayon (144 000) soottitanoobe e aduna oo bee. <sup>4</sup>Been ngoni be meedaali tuunninde ko'e mum'en banngal rewbe, sabi be laaḡuḡe. Ebe njokki e Njawdiri ndii do ndi waawi yaade fuu. Been ngoni soottitanoobe e hakkunde yimbe, yalla ebe laato adiiḡe fuu sakkeede Laamdo kaḡum e Njawdiri ndii, <sup>5</sup>kasen duu fenaande meedaali yaltude e kundude maḡḡe, be ngalaa jinḡore.

### *Haala malaa'ika'en taton*

<sup>6</sup>Oon wakkati njii-mi malaa'ika goddo ana diwa dow mbeeyu, ana jogii Kabaaru Lobbo duumiido oo, omo waajoo dum yimbe aduna oo, dum woni yimbe lejol fuu e suudu baaba fuu e demngal fuu e jaalejol fuu. <sup>7</sup>Omo eewnotonoo e daande toownde, omo wiya:

—Kulee Laamdo teddinon mo, sabi wakkati mo o sarata oo warii. Cujidane tagudo kammu e leydi e geeci e cewle ndiyam oo!

<sup>8</sup>Malaa'ika goddo didaḡo jokki e makko, ana wiya:

—Nde halkiima! Baabila ngalluure mawnde ndee halkiima! Nde sigirinii leji dii fuu fijirde mayre bonnde.

<sup>9</sup>Malaa'ika goddo, tataḡo, jokki e maḡḡe ana eewnoo daande toownde, ana wiya:

—Neddo fuu kujidando taktakol ngol e tooru nanndundu e maggol nduu, keḡudo maande maggol e tiinde naa e junngo, <sup>10</sup>waajibi joomum yara peguujam tikkere Laamdo dam, njuppaadam tawi jillaaka e ley horde loonde tikkere makko. Joomum jukkete e ley yiite e sitti yeeso malaa'ika'en seniibe bee e yeeso Njawdiri ndii. <sup>11</sup>Cuurki jukkungo maḡḡe duumoto faa abada, be keḡataa fowtere jemma e jalooma fuu. Sabi be kujidanii taktakol ngol e tooru nanndundu e maggol nduu, be keḡii maande innde maggol.

<sup>12</sup>Dum nee, waajibi yimbe Laamdo bee tawre mujal. Been ngoni haybuḡe jamirooje Laamdo so ngoondini lisaḡ bee.

<sup>13</sup>Oon wakkati nan-mi daande ana iwra kam dow kammu, ana wiya:

—Winndu dum doo: gila jooni, maayooḡe saabe gollande Joomiraado bee mbelii hoore.

Ruuhu oo wii:

—Goonga! Be ḡoottinoyto iwde e tampere maḡḡe ndee, sabi barke golleeeji maḡḡe jokkan e maḡḡe.

### *Haala wakkati kettal aduna*

<sup>14</sup>Yeew-mi, njii-mi luurde raneere, nanndoore neddo nii ana joodii dow mayre. Tenngaade saniraande kanje ana e dow hoore makko, omo jogii

wawdu welndu e junngo makko. <sup>15</sup> Malaa'ika goddo yalti e suudu Laamdo seniindu nduu ana eewnoo daande toownde, ana wiya joodiido e luurde oo:  
—Jippin wawdu maa nduu kettaa, sabi wakkati kettal yottiima, ko woni e leydi ndii koo yonii hetteede!

<sup>16</sup> Non joodiido e luurde oo sadiri ko woni e leydi ndii koo wawdu mum, leydi ndii fuu hettaa.

<sup>17</sup> Malaa'ika goddo yalti e suudu Laamdo seniindu wonndu dow kammu nduu, ana jogii kanum duu wawdu welndu. <sup>18</sup> Malaa'ika goddo kawjotoodo yiite oo yalti e ley ittirde sadaka ndee, ana eewnoo daande toownde, ana wiya malaa'ika jogiido wawdu welndu oo:

—Jippin wawdu maa nduu, kettaa biibe peguuje leydi ndii dee, sabi de benndii.

<sup>19</sup> Malaa'ika oo sadiri biibe peguuje leydi ndii wawdu mum, tebi de, wedii de e boosirde mawnde. Dum woni tikkere Laamdo jukkoowo jukkungo naawngo. <sup>20</sup> Biibe peguuje dee bosaa to caggal ngeenndi too, yiyam yalti e boosirde ndee faa hewti labaale pucci, dam ili ko waarata e njuunndi kilooji teeme de tati.

## 15

### *Haala jimol Muusaa e jimol Njawdiri*

<sup>1</sup> Caggal dum, njii-mi dow kammu taagumansa goddo mawdo kaayniido. Njii-mi malaa'ika'en njeddon ana njogii balaawuujj jeddi cakitiidi dii, sabi e majji tikkere Laamdo ndee timmata.

<sup>2</sup> Njii-mi weendu nanndundu e timtorgal jillondirndu e yiite. Jaalinoobe taktakol ngol bee ana ndarii banng mayru. Been ngoni jaalinoobe ngol, kanngol e tooru nanndundu e maggol nduu e limre innde maggol ndee, ebe njogii kolli di Laamdo hokki be dii. <sup>3</sup> Ebe mbiya e ley jimol Muusaa maccudo Laamdo oo e ngol Njawdiri ndii:

«Joomiraado Laamdo Jom Baawde,  
golleji maa yo mawdi, yo kaayniidi!  
Laawi maa yo poccidi, yo goondudi,  
aan woni kaananke jaaleji!

<sup>4</sup> Homo woni mo hulataa ma, Joomiraado,  
mo teddintaa innde maa?

Sabi aan woni gooto Ceniido.

Leni fuu ngaran kujida yeeso maa,  
sabi be njii no golleji maa poccitorii.»

### *Haala le'e jeddi keewe balaawuujj jeddi*

<sup>5</sup> Caggal dum, njii-mi suudu Laamdo seniindu – dum woni hukku seedaaku gondo dow kammu oo – ana udditoo. <sup>6</sup> Malaa'ika'en njeddon jogiibe balaawuujj jeddi bee njalti e mayru, ana boornii kaddule laabude paca jalbooje, ana kabbi ganndilaaji kanje e bece mum'en. <sup>7</sup> Wootere e kudde nay guurde dee hokki malaa'ika'en njeddon bee le'e kanjeeje jeddi keewe tikkere Laamdo guurde faa abada oo. <sup>8</sup> Non suudu nduu heewi curki saabe annoora Laamdo e sembe mum. Fay gooto waawaano naatude e mayru, so wanaa nde balaawuujj jeddi di malaa'ika'en njeddon ngaddi dii timmi.

## 16

<sup>1</sup> Non nan-mi daande toownde iwrii kam to suudu seniindu too, ana wiya malaa'ika'en njeddon bee:

—Njehee, njuppoyee e aduna oo le'e tikkere Laamdo jeddi dee!

<sup>2</sup> Malaa'ika arano oo yehi, yuppi la'al mum e leydi, uube bonde naawde kewtii yimbe tawraabe maande taktakol ngol e sujidanoobe tooru nanndundu e maggol bee.

<sup>3</sup> Malaa'ika didaabo oo yuppi la'al mum e geeci, geeci oo waylitii, laatii no heyyere yiyam maaydo nii. Ko tagaa ko wuuri ko woni ley geeci fuu waati.

<sup>4</sup> Malaa'ika tataabo oo yuppi la'al mum e dow maaje e cewle, de mbaylitii yiyam. <sup>5</sup> Non nan-mi malaa'ika kawjotoodo ndiyameeji oo, ana wiya:

—Aan Laamdo a poocciitido, a goodudo goodunoodo, aan woni Ceniido oo, sabi a jaadirido e sariya maa. <sup>6</sup> Saabe ko be njuppi yiyam seniibe e yiyam annabaabe koo, aan duu, ndokku-daa be yiyam be njara! Ebe kaandi hen.

<sup>7</sup> Non nan-mi daande iwrii to ittirde sadaka too, ana wiya:

—Goonga! Joomiraado Laamdo Jom Baawde, sariyaaji maa yo goongaraaji yo poocciitidi!

<sup>8</sup> Malaa'ika nayaabo oo yuppi la'al mum e dow yitere naange, nde hokkaa sumirde yimbe nguleefi mayre. <sup>9</sup> Yimbe bee cumiraa nguleefi cattuki, kaa be tuubaali be teddinaali Laamdo. Ko be ngadi dee, be njennu innde Laamdo mo baawde ngoodani dow dii balaawuuji oo.

<sup>10</sup> Malaa'ika joyaabo oo yuppi la'al mum e dow bimmeere taktakol ngol, do o laamii doo ni6binaa tika, yimbe ndarii ana njata toni mum'en saabe naawalla. <sup>11</sup> Be njenni Laamdo jom kammu oo saabe uube ma6be e naawalla ma6be, kaa fuu, be tuubaali iwde e golleeji ma6be bondi dii.

<sup>12</sup> Malaa'ika jeegaabo oo yuppi la'al mum dow maayo manngo wiyeteengo Efarata, ndiyam maggo bee6i faa yoori faa mo hokka kaanankoo6e iwroo6e funnaange bee laawol. <sup>13</sup> Non njii-mi seydaani'en tati bon6e nanndu6e e paa6i, wooturu ana yalta e hunduko kuungal nanndungal e mboddi ngal, wooturu ana yalta e hunduko taktakol manngol ngol, wooturu ana yalta e hunduko annabaajo peneejo oo. <sup>14</sup> Been seydaani'en bon6e yo wadoo6e kaayee6iiji, yahoobe e kaanankoo6e aduna oo fuu faa hawrintinana dum'en wolde ley jalaande darnagal, jalaande Laamdo Jom Baawde oo.

<sup>15</sup> Joomiraado wii:

—Kakkilee! Mido nii warda no gujjo nii. Baaldo daanaaki haybi kaddule mum pati yaara terde bole yimbe njiya dum ana taartii, welii hoore!

<sup>16</sup> Di kawrintini be e nokku biyeteedo e ibaraninkoore Harmagedon.

<sup>17</sup> Malaa'ika jeddaabo oo yuppi la'al mum e mbeeyu, daande toownde yalti e suudu seniindu nduu to bimmeere laamu too, ana wiya:

—Timmii!

<sup>18</sup> Maje maji, dillereeji e gidaali ngadi, dimmbagol leydi manngol wadi. Hono ngol dimmbagol leydi wadaali e aduna oo gila yimbe tagaa, no ngol sattiri mawnude! <sup>19</sup> Ngalluure mawnde ndee feccaa pecce tati. Galluuje jaaleji godde dee fuu kalkii. Laamdo rewte ngalluure mawnde wiyeteende Baabila, mo yarni nde horde peguujam heewnde tikkere makko. <sup>20</sup> Duude dee fuu kalkii, baamle kaaye dee fuu majji fey. <sup>21</sup> Malumaluuje butte caami e yimbe, wootere hen fuu teddeefi mum ana waara e kilooji capande nay. Yimbe bee njenni Laamdo saabe balaawu malumaluuje oo, sabi oon balaawu sattii bonde sanne.

## 17

### *Haalajukungo Baabila*

<sup>1</sup> Caggal dum, gooto e malaa'ika'en njeeddon jogiibe le'e jeddi bee wari, wii kam:

—War faa mi holle jukkungo bamfaaru rewru anndaandu sanne, joodiindu dow ndiyameeji keewdi nduu. <sup>2</sup> Kayru kaanankooɓe aduna ɓee pijata, yimɓe aduna ɓee cigirii e bamfaaraaku mayru.

<sup>3</sup> Keew-mi Ruuhu, malaa'ika oo naɓi kam faa ley ladde jeereende. Non njii-mi debbo ana waddii taktakol bodewol keewngol inde bonkorɗe Laamɗo, jogiingol ko'e jeddi e luwe sappo. <sup>4</sup> Debbo oo ana ɓoornii kaddule lobbe bodeeje, ana sodii kanje, kaaye dime e jaaye luulu. Omo jogii e junngo makko horde loonde kanje heewnde ko harmi heewnde tuundi bamfaaraaku makko. <sup>5</sup> Ndee doo innde nde maanaa mum suudii ana winndaa e tiinde makko:

«Baabila ngalluure mawnde, inna bamfaaraaku,  
kanum e ko harmi ley aduna oo fuu».

<sup>6</sup> Njii-mi oon debbo sigirii saabe heewngol ko yari yiyyam seniibe ɓee e yiyyam waraabe saabe njoppaali haala lissaa.

Ko njii-moo-mi koo, kaaynaa-mi sanne. <sup>7</sup> Kaa malaa'ika oo wii kam:

—Ko saabii so dum ana haayni maa? Mi firritante maanaa cuudiɗo oo, maanaa debbo oo e taktakol ngol o waddii jogiingol ko'e jeddi e luwe sappo ngol. <sup>8</sup> Taktakol ngol njii-daa ngol, engol woodunoo, kaa ngol heddaaki jooni. Engol haani yaltude e ɓunndu ndu luggeefi mum walaa do haadi nduu, ngol halkoyoo. Yimɓe aduna ɓe inde mum'en mbinndaaka e dewtere nguurndam ndee gila e fuddoode aduna ɓee, so njii ngol, kaayɗe nanngan dum'en, sabi engol woodunoo ngol heddaaki, ngol ɓanngoyan kasen duu.

<sup>9</sup> Dum doo ana holla waajibi neddo tawree hakkilantaaku e faamu: ko'e jeddi dee yo kaaye jeddi de debbo oo joodii e mum dee. Ede cappoo kasen kaanankooɓe njeddoo: <sup>10</sup> njoyon yaɓɓike, njeegaɓo oo ana woodi jooni, njeddaɓo oo waraali tafon, kaa so o warii, wakkatiwel seeda o laamotoo.

<sup>11</sup> Taktakol goodunoongol ngol yo gooto e njeddoo ɓee, ngol wartin hono kaananke jettaɓo nii, kaa cakite maggol yo halkaare.

<sup>12</sup> Luwe sappo de njii-daa dee yo kaanankooɓe sappo ɓe keɓaali laamu tafon, kaa ɓe keɓoyan baawɗe laamaade no kaanankooɓe nii hakke wakkatiwel gootel, kamɓe e taktakol ngol. <sup>13</sup> Be fuu ɓe anniya gooto, eɓe ndokka taktakol ngol doole maɓɓe e laamu maɓɓe. <sup>14</sup> Be kaɓan e Njawdiri ndii, kaa ndi jaaloto ɓe sabi kayri woni Joomiraado joomiraabe e Kaananke kaanankooɓe, kasen duu wondiibe mayri ɓee yo noddaabe, subaaɓe, goondinɓe.

<sup>15</sup> Malaa'ika oo wii kam kasen:

—Ndiyameeji di njii-daa bamfaaru nduu ana joodii dow mum'en dii, kanji ngonni jaaleji e jamaa e leji e demɗe. <sup>16</sup> Luwe sappo de njii-daa dee, kanum e taktakol ngol, mɓanan bamfaaru rewru nduu, ɓola dum faa laaɓa heddooroo terɗe ɓole, jaama tew mum, nduppa ko heddi koo e yiite. <sup>17</sup> Sabi Laamɗo loowii e ɓerde maɓɓe waɗude anniya mum, ɓe laatoo daande wootere, ɓe ndokka taktakol ngol laamu maɓɓe, faa nde konngi Laamɗo dii fuu tabiti.

<sup>18</sup> Bamfaaru rewru ndu njii-daa nduu, kanum woni ngalluure mawnde huɓindiinde kaanankooɓe aduna.

## 18

### *No Baabila halkirtee*

<sup>1</sup> Caggal dum, njii-mi malaa'ika goddo keewdo baawɗe ana iwa dow kammu ana jippoo, fooyre makko yaayni e aduna oo. <sup>2</sup> O eewnii faa toowi, o wii:

«Nde halkiima!

Baabila ngalluure mawnde ndee halkiima!  
 Nde laatike hodorde seydaani'en bon6e,  
 suudorde ruuhu tuunnudo fuu  
 e foondu tuunnundu wajaandu fuu!

<sup>3</sup> Sabi leyde dee fuu cigirii caamii  
 saabe bamfaaraaku mayre oo,  
 Kaanankoo6e aduna 6ee pijii e mayre,  
 jaagotoo6e e aduna 6ee fuu kebii jawdi  
 saabe neemaaji mayre yabbiitiidi dii.»

<sup>4</sup> Non daande wonnde iwri kam dow kammu, ana wiya:

—Njaltee e mayre, onon yim6e am! Pati on ndeentu e mayre luutti, pati balaawuui mayre hewta on. <sup>5</sup> Sabi luutti mayre njowondirii faa njottii kammu, Laamdo rewitike golleeji mayre bondi dii. <sup>6</sup> Ngadiranee nde no nde wadirani on nii. Njo6to-don ko nde wadi on koo cowe didi. Horde loonde nde nde siiwani on e mum ndee, ciwane nde hen cili didi! <sup>7</sup> Jukkee nde, ngadee sugulla mayre hakke no nde teddiniri hoore mayre so nde wuuri e neema nii, sabi ende wiya e 6ernde mayre: «Mi kaananke debbo, mi wanaa debbo mo gorum maayi, abada mi wonataa e cuddu.» <sup>8</sup> Saabe dum, e jalooma gooto balaawuui mayre caamata e mayre: maayde e sugulla e yolbere, kasen duu nde duppete e yiite, sabi Joomiraado Laamdo caroowo nde oo yo Jom Semmbe.

### *Haala woyeede Baabila*

<sup>9</sup> Nde kaanankoo6e aduna reentu6e e mayre jeenu so neemodii e mayre 6ee njii cuurki cumu mayre, 6e mboyan, 6e nonoto.

<sup>10</sup> Be toowtan nde 6e ndaroo, saabe hulde jukkungo mayre pati hewtoo 6e, e6e mbiya:

—Yoo yoy! Yoo yoy! Baabila, ndee ngalluure mawnde, ndee ngalluure jogiinde semmbe, e ley wakkati gooto tan, nde jukkaa!

<sup>11</sup> Jaagotoo6e e aduna 6ee mboyan cunjlanan nde, sabi fay gooto heddataako e soodude jaaguui ma66e dii. <sup>12</sup> Jaaguui ma66e yo kanje e cardi e kaaye dime e jaaye e bagiiji lobbii e bagiiji ciidi e bagiiji hariiri tiidude e bagiiji boddeji e ledde uurooje yogaaje e kaaki moyyiniraadi niye niibi e kaaki moyyiniraadi ledde tiidude coggu e jamde kire e jamde baleeje e haayre wiyeteende marba. <sup>13</sup> Jaaguui ma66e kasen yo funngooji belnirdi e uurnirdi e gowe e nebam uuroojam e uurdi miira e uurdi suurtinteendi e peguujam e nebam 6i66e jaytun e conndi alkama e na'i e baali e pucci e wotorooji e maccu6e e rugga6e.

<sup>14</sup> Jaagotoo6e 6ee mbii ngalluure ndee:

—Ko njiduno-daa he6ude fuu wodfike ma: neema maa e dawla maa fuu halkike, a hewtataa dum abada kasen.

<sup>15</sup> Jaagotoo6e he6ude jawdi e mayre 6ee toowtan nde ndaroo to woddi, saabe hulde jukkungo mayre ngoo pati hewto 6e, 6e mboyan, 6e nonoto, <sup>16</sup> 6e mbiyan:

—Yoo yoy! Yoo yoy! Ngalluure mawnde parortoonde bagiiji lobbii e bagiiji ciidi e bagiiji boddeji, sodortonoonde kanje e kaaye dime e jaaye! <sup>17</sup> E ley wakkati gooto tan, dee jawle fuu kalkaa!

Dawranoo6e laanaaji ndiyam mawdi dii 6ee e dawoo6e 6ee e summo6e 6ee, kanjam e he6oo6e nguure mum'en e lumbbingol geeci 6ee, 6e fuu 6e toowtan 6e ndaroo. <sup>18</sup> So 6e njii cuurki cumu mayre, 6e ngullan, 6e mbiya:

—Ngalluure honde nanndunoo e nden ngalluure mawnde?

19 Be njooran leydi dow ko'e ma66e no 6e poti metteede, 6e mboyan 6e nonoo, 6e ngulla 6e mbiya:

—Yoo yoy! Yoo yoy! Ndee ngalluure mawnde, nde neema mum hokki jogiibe laanaaji e ley geeci fuu jawdi, e ley wakkati gooto tan, nde halkike!<sup>20</sup> Kammu, welta e halkeede mayre! Seniibe e nelaa6e e annaba6e, onon duu mbeltee hen! Sabi Laamdo sarii nde ko nde wadi on koo!

<sup>21</sup> E oon wakkati, malaa'ika jom semmbe 6ami kaayal nanndungal no niisirde mawnde nii, wedii dum semmbe ley geeci, wii:

—Nii Baabila ngalluure mawnde ndee wedortee, nde yiyataake abada kasen!<sup>22</sup> Hankasen, fay gooto nanataa e mayre kolli hodoo6e gaaci e yimoo6e e puufoo6e cereeli e buutute, golloowo neepudo fay gooto yiyataake kasen e ley mayre. Dillere unude nanataake kasen e ley mayre,<sup>23</sup> fooyre lampa yaaynataa ley mayre kasen, jommbaajo gorko e jommbaajo debbo welbe daade maatataake e mayre kasen. Non worrata sabi jaagotoo6e mayre burnoo aduna oo fuu doole. Kasen duu nde hoomtirii lepi dii fuu mbonjobaaku mayre.<sup>24</sup> Yiyam annaba6e e seniibe e waranoo6e ley aduna oo 6ee fuu tawaama e mayre.

## 19

### *Jime jettooje Laamdo ley alijenne*

<sup>1</sup> Caggal dum, nan-mi daade toowde hono jamaa keewdo iwri kam dow kammu, ana wiya:

«Halleluya!»\*

Kisindam e teddungal e baawde  
ngoodanii Laamdo meeden,

<sup>2</sup> sabi sariyaaji makko yo goongaraaji  
yo poocitiidi!

O sarii bamfaaru rewru anndaandu sanne  
bonnirannoondoo aduna oo fuu bamfaaraaku mum oo,  
kasen duu o yofitii yiyam maccu6e makko njuppaadam e mayru dam.»

<sup>3</sup> Be mbii dido6ere:

«Halleluya!

Cuurki cumu ngalluure mawnde ndee kii  
ana njabba faa abada!»

<sup>4</sup> Maw6e noogayon e nayon 6ee e kudde nay guurde dee, kippii e leydi cujidani Laamdo joodiido e bimmbeere laamu oo, ana mbiya:

—Aamiina! Halleluya!

<sup>5</sup> Daande iwri to bimmbeere too, ana wiya:

—Njettee Laamdo meeden, onon maccu6e makko fuu, onon hul6e mo fuu, teddu6e e lo'u6e!

### *Haala kuurtungu Njawdiri ndii*

<sup>6</sup> Non nan-mi ko wa'i no daande jamaa keewdo nii, ko wa'i no dillere ndiyam keewdam nii, ko wa'i no gidaali mawdi nii, ana wiya:

«Halleluya! Sabi Laamdo Joomiraado meeden

Jom Baawde oo tabintinii laamu mum.

<sup>7</sup> Mbelto-den, ceyo-den, teddinen mo,  
sabi kuurtungu Njawdiri ndii yottiima,  
kasen duu jommbaajo mayri lanndinike.

<sup>8</sup> O hokkaama kaddule o boorno,

\* 19:1 Halleluya yo haala ibaraninkoore, dum woniNjetten JOOMIRAADO.



bagi daatudo, jalboowo, laaɓudo.»

Deen kaddule ngoni gollleeji seniibe moyyudi dii.

<sup>9</sup> Malaa'ika oo wii kam:

—Winndu: noddaaɓe e jiiri yanng'e Njawdiri ndii ɓee, mbelii hoore!

O wii kam kasen:

—Dii konngi yo goongaraaji, to Laamdo di iwi.

<sup>10</sup> Kippii-mi e leydi yeeso makko faa mi sujidana mo, kaa o wii kam:

—Patti! Miin, mi maccudo hono maa hono sakiraaɓe maa tiiduɓe e seettanaade Iisaa ɓee. Sujidan Laamdo!

Sabi ko woni annabaaku dee, yo seettanaade Iisaa.

### *Haala garol Almasihu faa jukka taktakol*

<sup>11</sup> Caggal dum, njii-mi kammu ana udditii, non puccu daneejo ɓanngi. Baddiido mo oo ana wiye'e Koolniido ana wiye'e Goongirante, goonga o sarirta, goonga o honirta. <sup>12</sup> Gite makko ana mba'i no metangal yiite nii, tenngaade laamu keewde ana e hoore makko, innde ana winndii e makko nde fay gooto anndaa so wanaa kanko. <sup>13</sup> Omo ɓoornii saaya cuuwaaka e yiyam, innde makko yo: «Konngol Laamdo.» <sup>14</sup> Konuuji kammu dii njokki e makko ana ɓoornii kaddule bagi daatude, daneeye, laaɓude, ana mbaddii pucci daneiji. <sup>15</sup> Kaafaawi mbelki ki mo soppirta leɓi ana yalta e hunduko makko. Mo durdan di loocol naawngol, o dippan e ɓoosirde peguuje yaltinoore tikkere Laamdo Jom Baawde mawnde. <sup>16</sup> Ndee doo innde ana winndaa e saaya makko, ana winndaa e busal makko:

«Kaananke kaanankooɓe e Joomiraado joomiraabe».

<sup>17</sup> Non njii-mi malaa'ika ana darii e dow yitere naange. O eewnii faa toowi, o wii pooli diwooji dow mbeeyu dii fuu:

—Ngaree nootee jiiri yanng'e mawdo mo Laamdo wadi oo, <sup>18</sup> faa nducciton tew kaanankooɓe e tew hooreeɓe sordaasi'en e tew jom'en semmbe e tew pucci e waddiibe mum'en e tew yimɓe fuu – rimɓe e riimayɓe, tedduɓe e lo'uɓe!

<sup>19</sup> Non njii-mi taktakol manngol ngol e kaanankooɓe aduna ɓee e konuuji mum'en ana kawriti faa kaɓa e baddiido puccu daneejo oo e konu mum. <sup>20</sup> Taktakol ngol honaa, kanngol e annabaajo peneejo gannoodo kaayde yeeso maggol oo. E deen kaayde o hoomtirnoo heɓunoobe maande taktakol ngol ɓee, sujidannoobe tooru nanndundu e maggol ɓee. Be didon fuu, ɓe mbedaa eɓe nguuri e weendu yiite e sitti huɓɓooru nduu. <sup>21</sup> Heddiibe ɓee kalkiraa kaafaawi njaltannooki e hunduko baddiido puccu daneejo oo kii, pooli dii fuu ngari nducciti tewuuli maɓɓe faa kaari.

## 20

### *Haala laamu gadoowo duubi ujunere*

<sup>1</sup> Caggal dum, njii-mi malaa'ika ana iwa dow kammu ana jippoo, ana jogii e junngo mum cokitirgal ɓunndu yiite ndu luggeefi mum walaa do haadi nduu, kaɓum e calalol manngol. <sup>2</sup> O nanngi kuungal ngal, dum woni mboddi aranndeeri mbiyeteendi Ibiliisa naa Seydaani ndii, o haɓɓi dum duubi ujunere. <sup>3</sup> O wedii dum e ley ɓunndu ndu luggeefi mum walaa do haadi nduu, o uddi ndu dow mum, o meeli ndu, pati ngal yonna jaaleɓi faa nde duubi ujunere dii kiɓɓi. Caggal dum, ngal humtete wakkati seeda.

<sup>4</sup> Non njii-mi bimmbeeje laamu. Joodiibe e majje ɓee ndokkaama baawde sarde. Njii-mi kasen yonkiiji ɓe ko'e mum'en tayiranoo saabe ko ɓe ceettanii

Iisaa koo e saabe ko 6e mbaajii konngol Laamdo koo. 'Been ngoni 6e cuji-danaali taktakol ngol e tooru nanndundu e mum nduu, 6e kebaali maande ndee e tiide naa e juude ma66e. 'Been nguurtii, laamodii e Almasiihu duu6i ujunere. <sup>5</sup>Dum woni immital aranal ngal. Maay6e heddiibe 6ee nguurtaali faa nde duu6i ujunere ddi ki66i. <sup>6</sup>Malu e senaare ngoodanii jeyaa6e e immital aranal 6ee! Maayde dido6ere ndee walaa ko waawi e ma66e, 6e laatanto Laamdo e Almasiihu yottinoobe sadaka, 6e laamodoo e Almasiihu duu6i ujunere.

### *Haala jaaleede Ibiliisa*

<sup>7</sup>So duu6i ujunere ddi ki66ii, Ibiliisa humtete yalta kasu mum, <sup>8</sup>faa yoyya jaalepi gondi e paale aduna nay dee, dum woni garol Yaajuuju e Maajuuju,\* kaɗum e hawrintinde 6e faa 6e mba'a no njaareendi geeci kammari wolde. <sup>9</sup>Been yimbe cankitii e aduna oo fuu, 6e pilii ngalluure horsunde ndee, do seniibe 6ee ngoni doo. Ono wakkati fuu, yiite iwi dow kammu, halki 6e. <sup>10</sup>Ibiliisa yoyyannoodo 6e oo wedaa e weendu yiite e sitti nduu, do taktakol ngol e annabaajo peneejo oo ngoni doo. Don 6e njukketee jemma e jalooma faa abada.

### *Haala jannde dargal*

<sup>11</sup>Caggal dum, njii-mi bimbbeere laamu mawnde raneere won joodiido e dow mayre. Kammu e leydi fuu ndogi iwi yeeso joodiido oo, di njiitaaka kasen. <sup>12</sup>Njii-mi maay6e 6ee, teddu6e e lo'u6e, ana ndarii yeeso bimbbeere laamu ndee. Dewte udditaa, e ley majje dewtere nguurndam ndee duu udditaa. Maay6e 6ee cariraa golleeji mum'en binndaadi e dewte dee ddi, gooto fuu hakke golle mum. <sup>13</sup>Geeci oo tottii maay6e mum, maayde e laakaraa tottii maay6e mum'en, gooto e ma66e fuu sariraa hakke golle mum. <sup>14</sup>Maayde e ko sabinbinta dum fuu mbedaa e weendu yiite nduu. Nduu weendu woni maayde dido6ere ndee. <sup>15</sup>Neddo fuu mo innde mum tawaaka ana winndii e dewtere nguurndam ndee, wedaama e weendu yiite nduu.

## 21

### *No huunde fuu heydintirtee*

<sup>1</sup>Caggal dum, njii-mi kammu keso e leydi keyri, sabi kammu arano oo e leydi arandeeri ndii fuu iwii, geeci duu walaa. <sup>2</sup>Njii-mi Ngalluure Seniinde ndee – dum woni Urusaliima keso oo – ana iwa dow kammu to Laamdo ana jippoo, ana parorii no jommbaajo parortoo faa lanndinoo hawra e gorum nii. <sup>3</sup>Nan-mi daande toownde iwrunde to bimbbeere laamu too, ana wiya: —Anni hodorde Laamdo e yimbe: o hodidan e ma66e, 6e laatoo lejol makko. Laamdo e hoore mum wondan e ma66e, laatoo Laamdo ma66e. <sup>4</sup>O soccan gondi gite ma66e fuu. Maayde e sugulla e gullaali e naawalla keddataako, sabi kulle booyde dee fuu njawtii.

<sup>5</sup>Joodiido e bimbbeere ndee oo wii:

—Mi heydintinan huunde fuu!

O wii kam:

—Winndu ddi konngi fuu, di celludi di goongaraaji.

<sup>6</sup>O wii kam kasen,

—Huunde fuu biltike! Miin woni arano miin woni cakito, miin woni fuddoode miin woni timmoode. Neddo fuu domdudo, mi hokkan dum e sewnde ndiyam nguurndam ndee meere meere. <sup>7</sup>Neddo fuu jaaliido he6an

\* **20:8** Yaajuuju e Maajuujana mbiyee Gogu e Magogu e ibaraninkoore.

dum fuu, mi laatoto Laamdo mum, laatoo biyam. <sup>8</sup> Kaa rofeebe e be ngalaa goondinal e sobube gollleeji e waroobe yimbe e fijoobe e bonjobii'en e rewoobe tooruuji e fenoobe bee fuu, weendu yiite e sitti hu66ooru nduu woni ngedu mum'en. Dum woni maayde didobere ndee.

### *Haala Urusaliima keso*

<sup>9</sup> Caggal dum, gooto e malaa'ika'en njeddon jogiinoobe le'e jeddi keewde balaawuuji jeddi cakitiidi dii wari, haaldi e am, wii:

—War faa mi holle jommbaajo debbo, jom suudu Njawdiri ndii.

<sup>10</sup> Non keew-mi Ruuhu, malaa'ika oo nabi kam faa dow haayre mawnde toownde. O holli kam Urusaliima ngalluure seniinde ndee ana iwa dow kammu to Laamdo ana jippoo, <sup>11</sup> annoora Laamdo ana e mayre faa ende jalbira no haayre rimre nii, no haayre yaspe laabunde no timtorgal nii. <sup>12</sup> Tatawol tekkungol toowngol ana filtii nde, engol jogii dame sappo e didi, damal fuu ana jogii malaa'ika. Cuudi baaba bi66e Israa'ila sappo e didi dii, inde mum'en ana mbinndaa e dame dee: <sup>13</sup> dame tati funnaange e dame tati hiirnaange e dame tati saahal e dame tati baleeri. <sup>14</sup> Tatawol ngalluure ndee ngol ana fawii e dow kaaye sappo e didi, wootere e majje fuu innde iwnde e sappo e didon nelaabe Njawdiri ndii bee ana e mum.

<sup>15</sup> Malaa'ika kaaldannoodo e am oo ana jogii loocol kanje eenndirgol faa eennda ngalluure ndee e dame mayre e tatawol mayre ngol. <sup>16</sup> Tatteeji mayre nay dii fuu potu, njuunndi mayre e njaannji mayre potu. O eenndiri nde loocol ngol o joginoo ngol, nde laatii gebe ujunaaji sappo e didi (12 000),\* njuunndi ndii e njaannji ndii e tooweendi mayri fuu fotu. <sup>17</sup> O huulii tatawol ngol, ngol hawri e kuule teemedere e capande nay e nay (144), huulagol ngol yimbe kuulortoo ngol malaa'ika oo huulortoo. <sup>18</sup> Tatawol ngol yaspe mahiraa, ngalluure ndee kanje dimo baado no timtorgal laabungal nii mahiraa. <sup>19</sup> Foomre tatawol ngalluure ndee ana pariraa sii kaaye dime fuu: aranndeere ndee yaspa, didobere ndee safiir, tatobere ndee agate, nayobere ndee emerooda, <sup>20</sup> joyobere ndee sardoniksi, jeegobere ndee sarduwaan, jeddobere ndee kirisolita, jettobere ndee berili, jenaabere ndee topaas, sappobere ndee kirisoparaas, sappo e go'obere ndee yasente, sappo e didobere ndee ametiste. <sup>21</sup> Dame sappo e didi dee yo naaye luulu daneje sappo e didi, damal fuu naayre luulu wootere moyyiriraa. Daalaare ngalluure ndee yo kanje dimo jalbiroowo no timtorgal nii.

<sup>22</sup> Mi yiyaali suudu dewal e ley ngalluure ndee, sabi Joomiraafo Laamdo Jom Baawde oo e Njawdiri ndii ngoni suudu dewal mayre. <sup>23</sup> Ngalluure ndee haajaaka naange naa lewru yaaynana dum, sabi darja Laamdo yaaynata nde, Njawdiri ndii woni lampa mayre. <sup>24</sup> Jaaleji dii fuu e ley fooyre mayre njahata, kaanankooobe aduna bee ngaddan e ley mayre jawle mum'en. <sup>25</sup> Jemma walaa e mayre, kasen duu dame mayre uddataako jalooma! <sup>26</sup> Be ngaddan jawle e teddeengal jaaleji ma66e e ley mayre. <sup>27</sup> Huunde sobunde naatataa e mayre, wanaa haala golloobe ko wanaa, kanum e fenoobe. Naatoo6e e mayre dee, be inde mum'en mbinndaa e dewtere nguurndam bee, dum woni dewtere Njawdiri ndii.

## 22

<sup>1</sup> Caggal dum, malaa'ika oo holli kam maayo ngo ndiyam mum hokkata nguurndam, njalbiroojam no timtorgal nii, edam iwra to bimmeere laamu

\* 21:16 Dum hawrata kilooji 2 200

Laamdo e Njawdiri ndii too. <sup>2</sup>Edam ila e hakkunde daalaare ngalluure ndee. Fonngooji maayo ngoo didi fuu, lekki kokkoowi nguurndam ana e mum, ndimoowi cili sappo e didi – lewru fuu cilol. Haakoolooji makki yo safaare sellinoore jaalepi. <sup>3</sup>Ko Laamdo hufi fuu, tawataake ley ngalluure ndee hankasen. Bimbeere laamu Laamdo e Njawdiri ndii darotoo e ley mayre, maccu6e makko ndewan mo, <sup>4</sup>njiya yeeso makko, innde makko winndee e tiife mum'en. <sup>5</sup>Jemma walaa hankasen, 6e kaajataake fooyre lampa naa fooyre naange sabi Joomiraado Laamdo laatoto fooyre ma66e. Be laamoto faa abada abadin.

### *Haala gartol Iisaa*

<sup>6</sup>Malaa'ika oo wii kam:

—Dii konngi ana celli, ana ngoondi. Joomiraado Laamdo, loowudo konngol mum ley annabaa6e oo, neli malaa'ika mum faa holla maccu6e mum ko warata 6ooyataa.

<sup>7</sup>Iisaa wii:

—Kettinee, mido wara 6ooyataa!

Neddo fuu kaybudo ko woni e dewtere annabaaku ndee doo, weli hoore.

<sup>8</sup>Miin, Yuhanna, mi nanii mi yii kulle dee fuu. Caggal ko nan-mi e so njii-mi koo, kippii-mi e leydi yeeso malaa'ika kollannoodo kam oo faa mi sujidana mo. <sup>9</sup>Kaa o wii kam:

—Patti! Miin, mi maccu6o hono maa hono sakiraa6e maa annabaa6e 6ee, kaɗum e hayboo6e konngi gondi e ndee doo dewtere 6ee. Sujidan Laamdo!

<sup>10</sup>O wii kam kasen:

—Pati suudu haalaaji annabaaku gondi e ndee doo dewtere dii, sabi wakkati mo dum fuu dum laatotoo 6adiima. <sup>11</sup>Gadoowo ko boni yo heddo e bonannda mum, cobudo gollleeji yo heddo e gollleeji mum cobudi dii, moyyo yo heddo e moyyuki mum, ceniido yo heddo e senaare mum!

<sup>12</sup>Iisaa wii:

—Kettinee, mido wara 6ooyataa, mido waddora mbarjaari faa mi barjoo gooto fuu hakke golle mum. <sup>13</sup>Miin woni arano miin woni cakito, miin woni fuddoode miin woni timmoode.

<sup>14</sup>Loonnoo6e saayaaji mum'en yalla ana mbaawa ɗaamde e 6i66e lekki nguurndam kii e naatirde e ngalluure ndee damal, mbelii hoore! <sup>15</sup>Kaa won6e caggal mayre 6ee, 6e dawaadi, 6e bonjoo6e, 6e fi6oo6e, 6e waroo6e yim6e, 6e rewoo6e tooruuji, 6e fenoo6e e ley haalaaji e gollleeji fuu.

<sup>16</sup>Miin Iisaa, mi nelii malaa'ika am faa seetoo dee kulle e ley deente goondin6e dee. Miin woni iwdi Daawuuda, mi taaniiko, miin woni hoodere fajiri jalboore ndee!

<sup>17</sup>Ruuhu oo e jommbaajo debbo oo ndarii ana mbiya:

—War gaa!

Neddo fuu nando yo wii: «War gaa!»

Neddo fuu domdudo yo war, muuydo fuu yo yar e ndiyam ndokkoojam nguurndam dam meere meere.

<sup>18</sup>Miin Yuhanna, mido jeertina neddo fuu nando konngi annabaaku gondi e ndee doo dewtere dii: neddo fuu beydudo e majji huunde, Laamdo beydan e jukkungo joomum balaawuuji cifaadi e mayre dii. <sup>19</sup>Neddo fuu tayudo yoga e konngi ndee doo dewtere annabaaku, Laamdo tayan goodi mum e lekki nguurndam cifaaki e mayre kii, kaɗum e ngalluure seniinde sifaande e mayre ndee.

<sup>20</sup> Ceettantoodo deen kulle oo wii:

—Tayoral, mido wara booyataa!

Aamiina! War Joomiraado men Iisaa!

<sup>21</sup> Yo hinnee Joomiraado men Iisaa wonu e mon on fuu!